


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

Tí Nuevo Testamento cuènte Inchéni Jesucristo C'óna Nquìva New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
b9b09122-b3f6-59f0-9594-749907b32b5b

Contents

SAN MATEO	1
SAN MARCOS	63
SAN LUCAS	102
SAN JUAN	167
LOS HECHOS	216
ROMANOS	272
1 CORINTIOS	295
2 CORINTIOS	319
GALATAS	334
EFESIOS	342
FILIPENSES	350
COLOSENSES	355
1 TESALONICENSES	360
2 TESALONICENSES	365
1 TIMOTEO	368
2 TIMOTEO	375
TITO	380
FILEMÓN	383
HEBREOS	385
SANTIAGO	402
1 PEDRO	408
2 PEDRO	415
1 JUAN	419
2 JUAN	425
3 JUAN	426
SAN JUDAS	427
APOCALIPSIS	429

Tí tan jína chrónka ch'ín Mateo

*Tí sín k'uaxrjeníxin ch'ín Jesús
(Lc. 3.23-38)*

¹ Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham. ² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kichó ch'án. ³ Ch'ín Judá mé it'é tí ch'ín Fares la ko ch'ín Zara la tí ìné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram. ⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón. ⁵ Ch'ín Salmón mé it'é tí ch'ín Booz la ìné mé tjan Rahab. Ch'ín Booz mé it'é tí ch'ín Obed la ìné tí ch'ín Obed mé tjan Rut. Tí ch'ín Obed mé it'é tí ch'ín Isaí. ⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko ìné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa. ⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías. ⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acáz la ch'ín Acáz mé it'é tí ch'ín Ezequías. ¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías. ¹¹ Ch'ín Josías mé it'é tí ch'ín Jeconías la ko kichó ch'án. Tí sín a mé k'uéjò sín tí yaon a ntá xrínahya ikui tí sín Babilonia sákjuíko sín tí sín israelita kixin ts'ejóhina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel. ¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor. ¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud. ¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob. ¹⁶ Ch'ín Jacob mé it'é tí ch'ín José la ch'ín José mé k'óna xii tjan María la jehe tjan María mé ìné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrji k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrji k'uaxrjeníxin tí ch'ín David la ntá tí sín Babilonia sákjuíko tí sín israelita chjasén sín la ntá í jnko catorce t'áchrji k'uéjò la ntá kokjíhi Cristo.

*Kokjíhi Jesucristo
(Lc. 2.1-7)*

¹⁸ Tí kokjíhi Jesucristo mé xikihi kónhen. Tí tjan María ìné ch'án mé tsotehe tjan ch'ín José. A ntá naxa kuákjahya kichó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios. ¹⁹ Ch'ín José mé tí nkexro ts'óna xii tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehe ch'án tjan kixin tjinkaon ch'án kixin ninkexró tsonoehya. ²⁰ Ntá tí naxa tjenkayáxin ch'án kixin xikaha sich'e ch'án ntá kotáchríén ch'án chrónkaxín titàya k'uúkuèn ch'án ikui ijnko ángel kuènte Ìnchéni nixja, chrónka kixin:

—José jaha mé k'uaxrjeníxian David. Tóxakuanhya la ko chrakonhya chrókuákjá tjan María ts'óna ichjián kixin tí xjan tsochóna tjan la kjuachaxin kuènté Nchakuen Dios ikui mé k'óna tí xjan a. ²¹ Sinchekokjíhi tjan ijnko xjan

ntoa la its'in xjan Jesús mé xikaha its'in xjan kixin jehe xjan tsjakjin ijié chojni —mé xikaha chrónka tí ch'ín ángel.

²² Kaín tíha kónhen kixin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchro xikihi:

²³ Ijnko tjan naxa chóntahya chojni ntoa mé tsjak'eyá tjan la tsochóna tjan ijnko xjan,

la sinchek'in sín ch'án Emanuel,*

la tíha t'axrjexín kixin Dios tjejókoni. Mé xikaha chrónka itén Dios.

²⁴ Ntá k'uàya ch'ín José ntá kjuínchexiteyá ch'án tí nkehe k'uetoan tí ángel kuènte Ìnchéni la kuákja ch'án tjan María ts'óna ichjién ch'án. ²⁵ A ntá kjónté xikaha la naxa kójnkójiéhya sín tí naxa kokjiéhya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjiéxín ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uetoenhen ch'án tí nación a. A ntá xrinahya iso chojni ntoa kjuixín ijnko chjasin nó tjitoxín yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé. ² Ntá kjuanchankí sín kixin:

—¿Nketí tjen tí xjan tsíkokjíhi ts'óna tí rey ts'etuenhen tí sín judío? K'uíkonxínni tí konotsé kuènte ch'án nó tjitoxín yaon na ntá ó kjuini kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xikaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén. ⁴ Ntá tí ch'ín rey k'uetoan kixin síxrakoa kaín tí sín nch'at'á t'etoan la kaín tí sín tjako tí ley la ntá kjuanchankíhi sín ch'án nketí chrókokjiéxín tí nkexro Cristo. ⁵ Ntá jehe sín kjuátehe sín kixin:

—Tsokjiéxín xjan chjasin Belén estado Judea mé xikaha tsíkin tí sín tsíchrónka itén Dios. Ntáchro xikihi:

⁶ Jaha chjasin Belén nonte Judá,
jaha la jehya ijnko chjasin imá ntsí;

kixin tí nonte ts'axrjexín tí nkexro antsí t'etoan,

la jehe ch'án ts'ayakonhen tí chjasin kuèntana mé chjasin Israel.*

Mé xikaha nixja itén Dios.

⁷ Ntá imó k'uíyehe ch'ín Herodes tí sín mago la kjuanchankíhi ch'án sín nkesá kjuankixin k'uíkon sín tí konotsé. ⁸ Ntá chrónka sín ntá tuénxín k'uetoan ch'án kixin sátsji sín chjasin Belén la ntáchro ch'án kixin:

—Sátjirá ntiha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntiha tsotjahá xjan kjuasáya —mé xikaha k'uetoan ch'ín Herodes.

⁹ Ntá kuínhin tí sín mago tí nkehe k'uetoan tí ch'ín rey ntá sákjuí sín la xík'ikon sín tí konotsé inaá la kjuítaón va ntia la ntá chréhe sín hasta kjuák'e va chrítaón tí nchia tjen tí xjan a. ¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín. ¹¹ La k'uixenhen sín tí nchia la k'uíkon sín tí xjan kjuák'eko tí tjan María iné xjan. Ntá k'uéjoxin toch'in sín la chjéhe sín kjuasáya ntá kuakitjehe sín tí nkehe kjuikao sín la kjuanjon sín chica oro la ko ihnti tsochéxín chjincō la ko xroan xraxé náxrjón. ¹² Ntá chr'éxin kotáchrién sín chrónkaxín kixin chrókjanhya sín tí tjen ch'ín Herodes. Méxra kjanxin sín íjnko ntia la sákjuí sín chjasén sín.

* 1:23 Isaías 7.14 * 2:6 Miqueas 5.2

Ch'ín José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'ín José chrónkaxín titàya k'uíkon ch'án ijnko ángel kuènte Ìnchéni chrónka kixin:

—T'àyá sátsjikoa xjan la ko ìné xjan la sátsjirá chjasin Egipto la ntahó ts'ejorá hasta tsoxrjankajia, kixin tí ch'ín Herodes xritjeyá tí xjan chrók'óyán ch'án xjan —mé xikaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko ìné xjan la sákjuí sín chjasin Egipto tí tie a. ¹⁵ Ntahó k'uéjó sín hasta ik'uén ch'ín Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchrónka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyahá ch'án”.†

Ch'ín Herodes mé k'ueṭoan its'en xjan

¹⁶ A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'ueṭoan ch'án kixin its'en kaín tí chánjan ntoá siín chjasin Belén ó chóna iyó nánó la ko tí xjan naxa chónahya iyó nánó. Mé xikaha k'ueṭoan ch'án kixin ó xraxinkaon ch'án nkehe kuínhin ch'án chrónka tí sín mago. ¹⁷ Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkama tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.‡

Mé xikaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuènte Ìnchéni mé k'uíkonxín ch'ín José kotáchrién ch'án tí kjuák'e ch'án chjasin Egipto mé ntáchro kixin:

²⁰ —T'àyá sátsjikoa tí xjan la ko tí ìné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xikaha k'ueṭoan tí ch'ín ángel.

²¹ Ntá ch'ín José mé k'uàya ch'án la sákjuíko ch'án tí xjan la ko tí ìné xjan la sákjuí sín chjasin Israel. ²² A ntá kuínhin ch'ín José kixin ch'ín Arquelao xjeen ch'ín Herodes mé k'ueṭoan ch'án tí estado Judea la ntá chrakon ch'án la sáchrókjuihya ch'án ntiha. A ntá kotáchrién ch'án chrónkaxín Dios kixin sáchrókjuí ch'án estado Galilea. ²³ Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uéjó sín. Mé xikaha xiteyá tí nkehe tsíchrónka tí sín k'uénixja itén Dios senó. K'uéntáchro sín kixin jehe ch'án mé tsíkítexín sín nazareno.

3

Juan el Bautista mé kjuák'e ch'án nteje

(Mr. 1.1-8; Lc. 3.1-9, 15-17; Jn. 1.19-28)

¹ A ntá tí yaon a kjuák'e ch'ín Juan Bautista nteje Judea la kjuako ch'án.

² Ntáchro ch'án kixin:

—Títóherá ijjará la tjínkirá tí nkehe tjenkayáxinrá kixin í séhya itsi kjuachaxién Dios.

³ Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuènte tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixín Ìnchéni.

Takitjehérá ijnko ntja ntoí.”*

† 2:15 Oseas 11.1 ‡ 2:18 Jeremías 31.15 * 3:3 Isaías 40.3

⁴ Tí iké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko itsjen kotsjenta tónoxín nteje. ⁵ Itsjé chojni kuixín sín chjasin Jerusalén la ko í so chjasin síin estado Judea la ko chjinaxón tí ntarío Jordán kixin tsinhin sín nkexrí tjechrónka ch'án. ⁶ Ntá chrónka sín ijié sín ntá ch'ín Juan kuikítexín ch'án sín tí ntarío Jordán.

⁷ Ntá xrínahya k'uikon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuente Dios ó tsi? ⁸ T'ichjánxin kixin chrók'uejorá jnkójina chrókjuákoxinrá kixin chaxín kjuítóxinhínrá tí nkehe tjenkayáxinrá. ⁹ Jahará nchehnerá ntáchrorá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ¹⁰ Tí chica hacha ó tjechónhen tsochrínjinxín tí nta. A ntá kaín xín nta t'ónahya to jina mé tsochrínjin kixin tsoche. ¹¹ Janhan mé intá tíkitexián chojni kixin tsjakoxín sín kixin ó kjuítóxinhin sín ntié sín. A ntá tí nkexro itsi chr'éxin mé tsikítexínrá tí Nchakuen Dios la ko xrohi. Antsí tjetóxin t'etoan ch'án a ntá janhan la kánhyó. Méxra chrókósuàna sáchrókjuikian tokaté ch'án. ¹² Jehe ch'án la ó tjexraá ch'án pala sinchetjuáxin ch'án noatrigo kixin tí ntachjiji trigo la ókjé ts'ejo ch'án a ntá tí noatrigo la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochrín —mé xikaha kjuako ch'ín Juan.

Kuikite ch'ín Jesús

(Mr. 1.9-11; Lc. 3.21-22)

¹³ Ntá ch'ín Jesús kjuixín ch'án nó estado Galilea ikui ch'án tí ntarío Jordán tí tjen ch'ín Juan kixin ch'ín Juan tsikíte tí jehe ch'án. ¹⁴ A ntá tí saoxín chrohya ch'ín Juan chrókuikite tí ch'ín Jesús ntáchro ch'án kixin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka kixin jeheni chrókuikitia tí jaha —ichro ch'ín Juan.

¹⁵ Ntá kjuátehe ch'ín Jesús kixin:

—A ntá jie la titohe tí xikaha tjenkayáxian kixin t'ichjánxin tsikiteni kixin sinchexiteyáni tí nkehe k'uetōan Dios.

Ntá ch'ín Juan kuítekaon ch'án la xikaha kjuích'e ch'án. ¹⁶ Ntá tió kuikite tí ch'ín Jesús la ntá xrínahya titàya xitjehe nkajní la k'uikon ch'án tí Nchakuen Dios, éxi kontóá tsjehe, k'uínkajinxín nkaya nkajní ntá kjuák'e chrítaón kja ch'ín Jesús. ¹⁷ Ntá xrínahya kuínhin sín ijnko tan kuixín nkaya nkajní ntáchro kixin:

—Tíhi mé xjanna la imá tjuahá ch'án la imá chàna kixin nchexiteyàna ch'án.

4

Ch'ín Tsochren chrókjuachroe ch'ín Jesús

(Mr. 1.12-13; Lc. 4.1-13)

¹ Ntá tí Nchakuen Dios mé sákjuíko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús. ² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta. ³ Ntá ch'ín Tsochren mé kóchjinehe tí ch'ín Jesús kixin tjinkaon chrókjuachaxín ch'án. Ntáchro ch'án kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ Ntá kjuátehe ch'ín Jesús ntáchro kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tán nixja Dios tjejóchónxin chojni”^{*} —ichro ch'án.

⁵ Ntá ch'ín Tsochren mé sákjuiko ch'ín Jesús tí chjasin tjóá mé chjasin Jerusalén, la sákjuiko ch'án tí chrítaón tí kja ninko a ⁶ la ntáchro ch'án kixin:

—Tí chaxín Xjeen Dios jaha la títóhé t'anótjenxian tí noi ntihi kixin ntáchro xroon itén Dios kixin:

Dios mé ts'etuēhen tí sín ángel kuēnte ch'án kixin ts'ayakonhan sín.

Tsotsé sín itjá

kixin tsotéhya totá ts'itja xro tí ts'anótjen[†]

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjiníhya chrókjuásixián kjuaxroan kjuachaxin kuēnte Ìnchéni Dios”[‡] —ichro ch'ín Jesús.

⁸ A ntá tió kjuixixín sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín xín tí nación siín chjasintajni la ko tí nkehe t'etoan kuēnte. ⁹ La ntáchro ch'ín Tsochren kixin:

—Kaín tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'ín Tsochren.

¹⁰ Ntá kjuátehe ch'ín Jesús ntáchro ch'án kixin:

—Sátjia Satanás kixin xroon itén Dios ntáchro kixin: “Chrókjuíkosáyehé Ìnchéni Dios la jehó ch'án chrókjuich'ehé xra”[§] —ichro ch'ín Jesús.

¹¹ A ntá ch'ín Tsochren mé kuítóhe tí ch'ín Jesús la iso tí sín ángel ikui tsjinkitsa tí jehe ch'án.

Ch'ín Jesús kjuankixin ch'án tí xra kuēnte ch'án estado Galilea

(Mr. 1.14-15; Lc. 4.14-15)

¹² A ntá ch'ín Jesús mé kuínhin ch'án kixin tí ch'ín Juan mé tjechjina ch'án ntoechiso a, a ntá jehe ch'án mé sákjuí ch'án estado Galilea. ¹³ Kuítóehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabulón la ko estado Neftalí. ¹⁴ Mé xikaha kjuích'e ch'án kixin tsoxiteyá tí nkehe tsíkjin ch'ín Isaías, ijnko nkexro k'uechrónka itén Dios. Ntáchro ch'án kixin:

¹⁵ Tí estado Zabulón la ko Neftalí tí ntja

chrínta ntayaon la tí nó chók'á tjitoxin yaon tí ntarío Jordán, mé tí estado Galilea tí tjejó tí sín jehya judío.

¹⁶ Mé ntiha tjejó tí sín sín tí sítié mé ts'ikon sín ijnko xrohi jíé, la tí sín éxí tsík'en xritjejó sín

mé ts'inkaséyanxín ts'ejó sín.

¹⁷ Ntá kjuankixin kjuako ch'ín Jesús ntáchro ch'án kixin:

—Tjitóxinhinrá ntjará. Tsákjára ijnko ntia nixin kixin kjuachaxin kuēnte Dios tjen nkaya nkajni la í séhya tsi.

Ch'ín Jesús k'uíyehé noó chojni k'uétsé koche

(Mr. 1.16-20; Lc. 5.1-11)

¹⁸ Ntá sákjuí ch'ín Jesús chrínta ntayaon Galilea ntá xrínahya k'uíkon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehe sín mé koche xritsé sín. Ntá tinkák'e sín nchísén chrínki nta. ¹⁹ Ntá ch'ín Jesús nixjehe sín ntáchro ch'án kixin:

—Chréhérá tí janhan ntá tsotjahará xra tsjeyará chojni.

²⁰ Ntá tuénxín kuitohe sín tí nchísén k'uétséya sín koche, ntá sákjuíko sín ch'án.

* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16 § 4:10 Deuteronomio 6.13

²¹ Ntá kjínhya kjuíji ch'án ntá k'uikon ch'án ijnko yaá sín, jnkokoá kichó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabárcø la tjejtjonite sín tí nchísén tséya sín koche. Ntá kjaxin tí sín a k'uíyehé ch'ín Jesús. ²² La ntá tuénxín kuítóhe sín tí ntabárcø la ko tí it'é sín ntá sákjuíchréhe sín tí ch'ín Jesús.

Kjuakøhe ch'ín Jesús nchónhya chojni
(Lc. 6.17-19)

²³ Ntá sákjuí ch'ín Jesús nkuixín tí estado Galilea la kjuakoxin ch'án tí nínko Israel siín jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitøhe ch'án jína kaín chojni chóna kaín xín chin la ko kaín kjuatjoté. ²⁴ Ntá kaín xín tí sín tjejó tí estado Siria mé kuínhin sín kuènte Jesús la kjuikao sín kaín xín tí sín níhi chóna kaín chin la ko tí sín imá tjetéhe sín la ko tí sín chóna nchakuen tí jínahya la ko tí sín t'aniáte sín la ko tí sín síxénká toté sín, la ntá ch'ín Jesús mé kjuínchekitøhe ch'án sín jína. ²⁵ Ntá itsjé chojni kjuíchréhe tí ch'ín Jesús, mé kjuixín sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntario Jordán.

5

Kjuakoxin ch'ín Jesús ijnko jna

¹ K'uikon ch'ín Jesús kixin k'uéjò nchónhya chojni la ntá chrìn ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejontaxin sín tí tjen ch'án. ² Ntá ch'ín Jesús kjuankixin kjuakøhe ch'án sín kixin:

Tí nkexro tjejó náxrjón
(Lc. 6.20-23)

³ —Náxrjón tjejó tí sín nohe kixin t'ichjánxinhin sín nkehe kuènte Dios kixin ntá jehe sín mé tsochóna sín tí kjuachaxin kuènte Dios.

⁴ 'Náxrjón tjejó tí sín t'ává kixin Dios mé sinchechéhe asén sín.

⁵ 'Náxrjón tjejó tí sín hnkehya asén kixin jehe sín mé ts'áyéhe sín tí nonte tsjanjon Dios.

⁶ 'Náxrjón tjejó tí sín éxí yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkitsa sín kixin ts'áyéhe sín tí nkehe tjinkaon sín.

⁷ 'Náxrjón tjejó tí sín tikonóhe kichó sín kixin ntá Dios kjaxin tsikonóhe tí jehe sín.

⁸ 'Náxrjón tjejó tí sín kótjóá asén kixin ntá jehe sín sátsjik'ikon sín Dios.

⁹ 'Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

¹⁰ 'Náxrjón tjejó tí sín kjónté tjejtjasótexín sín kixin kjuínchexiteyéhe sín Dios kixin ntá jehe sín mé kuènte sín nkaya nkajní.

¹¹ 'Náxrjón tjejorá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro sín kixin tinkachónkirá tí janhan. ¹² Chrókócháhará la ko kjuaxróxin chrók'uejorá kixin ntá chr'éxin jahará ts'ayéhérá ijnko nkehe antsí má jína nkaya nkajní. Mé xikaha kjuasóte tí sín k'uéjò ósé k'uéchrónka sín tí itén Dios.

Jahará la éxí yóhe xjnta la ko éxí xrohi t'inkaséyanxín chjasintajni
(Mr. 9.50; Lc. 14.34-35)

¹³ 'Jahará mé yóhe éxí xíjnta chjasintajni. A ntá tí chrók'uánkéhé tí jní tí xíjnta la ntá xitjahya chrókójní inaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

¹⁴ 'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá. ¹⁵ La ko kohya nkexro sinchek'ákjen ijnko lámpara ntá tsjak'e chrínki ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro siín tí nchia ntiha. ¹⁶ Mé xikaha tí jahará chrókóyóhara éxí tí xrohi t'inkaséyanxín kixin ts'ikon kaín chojni tí xra jína tjejoch'erá la ntá chrókjuanchehe sín kjuasáyé It'eni tjen nkaya nkajní.

Kjuako ch'ín Jesús kuènte tí ley

¹⁷ 'Jahará chróntáchrohyará kixin k'uinka kixin tsjakjíyan tí ley tsík'etoan ch'ín Moisés la ko tí nkehe kjuako tí sín k'uéchrónka itén Dios. Náhi. Jehya xikaha k'uinka kixin tsjakjíyan tíha. Náhi. K'uinka janhan kixin tsjákoxian nkehe chaxín t'axrjexín tíha. ¹⁸ Chaxín xrjanka kixin tí naxa tjen nkajní la ko chjasintajni la kohya ninkehó ley tsjinhya, mé tsjinhya nijnko punto la nijnko letra kuènté tí ley tsjixinjian tsoxiteyá kaín tí nkehe t'ichjánxin tsoxiteyá. ¹⁹ Mé xikaha tí nkexro tsitekakonhya tí nkehe k'uetóan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsi tí kjuachaxin kuènte Dios. A ntá tí nkexro tsitekaon la ko tsjákohe ókjé nkexro tsitekaon sín, mé antsí imá ts'etoan sín tí tsi kjuachaxin kuènte Dios. ²⁰ Méxra tjonkará kixin t'ichjánxin kixin antsí jína ts'ejorá la tsoyóahyará tí sín tjako ley la ko tí sín fariseo kixin tí tsoyóhara sín la ntá xitjahya tsákjára tí kjuachaxin kuènte Dios tjen nkaya nkajní.

Kjuako ch'ín Jesús kuènte tí kjuanínkaon

(Lc. 12.57-59)

²¹ 'Jahará tsíkinhínra kixin tí sín ósé tsík'ítuenhen sín kixin: "T'oyánhyará kichuára* kixin tí nkexro t'oyán kichó mé t'ichjánxin tsjasóte sín." ²² A ntá janhan tjonkará kixin jnkojín nkexro tsonínkakonhen kichó mé t'ichjánxin tsjasóte. A ntá tí nkexro t'ántaxínhin kichó la mé tí sín t'etoan mé sinchekitoexín ijie ch'án. La ntá tí nkexro tsontáche kichó kixin tsixénká ch'án la tíha mé sátsji tsjasótexín tí siín xrohi. ²³ A ntá tí tsjikuehéra Dios nkehe tsochjehéra ch'án ntá tsjasánra tí altar ntá tsoxráinkáonra tí jnkojín kichuára kjuánjonkoará sín ²⁴ la ntá tí xikaha la tjtóhéra tí nkehe tí altar la sátsjirá tsonixjehéra ch'án jnkojína kixin í tsokohya kjuanínkaon. La ntá tsjixin la ntá tsjihará tsjánjonra tí nkehe tjinkáonra tsjánjonra.

²⁵ 'Tí siín jnkojín nkexro tjanchia jie tí jahará la tjinkaon chrókjuikoára ch'án juzgado, a ntá íchá jína jnkokoá chrókjuenkayáxinra, jehe ch'án la ko jahará, ntia ó, kixin ntá sáchrókjuihyará tí tjen ch'ín juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policía kixin ts'ixenhenra ntóechiso. ²⁶ A ntá chaxín tjonkará kixin tí ts'ikjahara sín ntóechiso la ts'axrjéxinhyará ntiha tsjixinjian tsjenkeherá sín kaín xín chichaon chontará.

Ch'ín Jesús kjuako kixin chrókjuasinhya sín jie, chróchóntahya sín chojni chjin ókjé

²⁷ 'Jahará tsíkinhínra tí nkehe tsík'ítuenhen tí sín ósé ntáchro kixin: "Chrókjuásinhyará jie, chróchóntahyará chojni chjin ókjé."† ²⁸ A ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

* **5:21** Éxodo 20.13; Deuteronomio 5.17 † **5:27** Éxodo 20.14; Deuteronomio 23.21

29 'A ntá tí ikuan chjina chrókjuásixián jie la chrókuakitsjenkiá ikuan la chróchr'an ikjín kixin íchá jína ts'ítjáyán it'o cuerpo kuéntá kixin jehya kuenté cuerpo kuéntá sátsji tsjasótexín tí siín xrohi. 30 'A ntá tí itja chjina chrókjuásixián jie la chrókóchrínjian tí tjá a la chróchr'an ikjín kixin íchá jína ts'ítjáyán it'o cuerpo kuéntá kixin jehya kuenté cuerpo sáchrókjui tsjasóte tí siín xrohi.

Ch'in Jesús kjuako kixin chrók'uitjéhya kichó sín
(Mt. 19.9; Mr. 10.11-12; Lc. 16.18)

31 'Kjaxin tsík'ítuenhen tí sín ósé kixin tí nkeexo tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'itjéxín kichó sín. ‡ 32 'A ntá janhan tjonkará kixin ijnko nkeexo tsjákehe ichjién tí chróchóntahya tjan ókjé nkeexo la jehe ch'án kuítóhe ch'án tjan kixin tsjasin tjan jie. 'A ntá tí nkeexo tsotéhe ijnko tjan tsíkítsínkehe la kjaxin ó kjuasin ch'án jie.

Ch'in Jesús kjuako kixin chjiníhya chrók'uákjenxinni ihnié Dios

33 'Kjaxin tsíkinhínrá tsík'ítuenhen tí sín ósé kixin: “T'ichjánxin sìnchexiteyará tí nkehe tsintáchorá kixin chrók'uákjenxinyhará ihnié Ìnchéni chjiní.” § 34 'A ntá janhan mé tjonkará kixin chrók'uákjenxinyhará ihnié Dios ninkehó la ko chrók'uákjenxinyhará nkajní kixin ntaha tjen Dios t'etóan. 35 La ko chrók'uákjenxinyhará chjasintajni kixin ntaha tjejóken toté ch'án la ko chrók'uákjenxinyhará chjasin Jerusalén kixin ntiha la itjen tí Rey t'etóan. 36 La tjenkayáxixinyhará ikjárá ó kixin jahará xitjahya tsjakérá ijnko kaxíhi tjóá o nijnko kaxíhi tié. 37 Tí nkehe tsontáchorá chaxín la chaxín la tí nkehe náhí la náhí la kohya nkehe chrókjuakét'oxinrá chróchronkará. 'A ntá ichrén nkehe tjakét'oxinrá tsochronkará la táha mé jínahya.

Ch'in Jesús tjako ch'án kuente tí sín t'itjáyehya ichrén kjuanínkaon
(Lc. 6.29-30)

38 'Jahará mé ó tsíkinhínrá tsík'ítuenhen tí sín ósé kixin tí takitsjenkí sín ikonrá la kjaxinrá chrókuakitsjenkírá ikon sín. 'A ntá tí chrókuakitsjenkí sín nënorá la kjaxinrá chrókuakitsjenkírá neno sín kjaxin. * 39 'A ntá janhan mé tjonkará kixin tí jnkójín nkeexo ichrén nkehe jínahya sit'ahará la jahará ch'ehyará xikaha. Náhí. Tí chjéhe ijnko nkeexo ijnko tuáan la ntá tjóka tí í jnko nàngo tuáan. 40 La tí siín jnkójín nkeexo tjanchia jie la tjinkaon sín chrókuakitsjaha sín camisá la títóhé sín sátsjiko sín tí ka t'ínkayate kjaxin. 41 La tí t'etuáanhanrá sín tsámárá nkehe ijnko kilómetro la tjakét'oxinrá í yaá kilómetro. 42 Tí jnkójín nkeexo tsjanchia nkehe la tí tjinkaon ch'án nkehe la chróntáchrohyará kixin “náhí”, chrókjuínchekjenrá ch'án.

Tjuèhérá tí sín nínkakonhanrá sín
(Lc. 6.27-28, 32-36)

43 'Kjaxin ó tsíkinhínrá tsík'ítuenhen tí sín ósé kixin: “Tjuèhérá tí nkeexo choxinrá la tsoninkákonhénrá tí sín jínahya kjuít'ahará.” † 44 'A ntá janhan mé tjonkará kixin chrótjuèhérá tí sín nínkakonhanrá la chrókjuíncheyaonrá tí sín jínahya kjuít'ahará la jína chrókjuinkitsará tí sín tjinkakonhya tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya. 45 Tí xikaha sích'erá la ntá jahará chaxín xjeen It'eni tjen nkaya nkajní kixin jehe ch'án mé t'etóan ch'án tsjítón yaon ts'inkaséyehen tí sín jínahya la ko tí sín jína la ko kjaxin t'etóan ch'án kixin ts'aniá ichrin tí siín tí sín jína la ko tí sín jínahya. 46 Tí jehó tjuèhérá tí nkeexo tjuàhará, ¿la

‡ 5:31 Deuteronomio 24.1-4 § 5:33 Números 30.2; Deuteronomio 23.21 * 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

ntá nkehe chrókjuachará? A ntá kjaxin tí sín nchekjènkì la xikaha ch'e sín. ⁴⁷ La tí jehó nixjehérá tí sín kichuárá la ntá, ¿á chaxín imá jína tíha ní? Kíxin tí xikaha la kjaxin tí sín chónhya Dios la xikaha ich'e sín. ⁴⁸ Kjaxinrá jahará ntoá chrók'uejorá kíxin It'èni tjen nkaya nkajní la antsí má ntoá tjen ch'án.

6

Kjuako ch'ín Jesús kuènté tí xra jína

¹ Chrókjuásixínhyará kjuaxroan tí nkehe tinkachónkirá kíxin tjinkáonrá chrók'uikon chojni ó. A ntá jahará tí xikaha chrókjuich'erá ntá It'èni tjen nkaya nkajní la ninkehó nkehe tsotjáhyará ch'án. ² Tí tjínkítsará ijnko chojni nòà la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kíxin mé xikaha ch'e sín t'óxroan sín nkaxenhen nínko la ko tí ntia kíxin chrók'uikon chojni la chrókjuikosáyehe sín tí jehe sín kíxin jína tjejóch'e sín. A ntá janhan ntáxrjan kíxin ó kjuixin k'uáyéhe sín nkehe la í ts'áyèhya sín inaá. ³ A ntá tí jahará tió chrókjuínkítsará ijnko chojni chaxín nòà la íchá jína kíxin chrókónoehya ninkexró kjónté ijnko nkexro tjuá jína. ⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'èni ts'ikon ch'án kíxin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'ín Jesús nkexrí tsonixjeheni Dios (Lc. 11.2-4)

⁵ A ntá tió nixjehérá Dios la jehya éxi tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen nínko la ko ts'ejó sín esquina calle kuènte ntsin kíxin ts'ikon kaín chojni kíxin tjejónixjehe sín Dios. Ntá janhan chaxín ntáxrjan kíxin jehe sín la xikaha kjuich'e sín la ó kjuixin k'uáyéhe sín nkehe la í ts'áyèhya sín inaá. ⁶ A ntá tió nixjehérá Dios la t'ixenhénrá nchia ntoará la t'ikjehérá tí puerta la nixjehérá It'èni kíxin ntaha tjekoará ch'án. A ntá jehe ch'án ts'ikon kíxin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ 'Ntá tió chrónixjehérá Dios la chrókjateehya chrónixjará kíxin chrókóyóahyará éxi tí sín chónhya Dios kíxin jehe sín tjenkayáxin sín kíxin nchónhya tsonixja sín, la mé xikaha mé chrókuinhin Dios, ichro sín. ⁸ A ntá jahará chrókóyóahyará éxi tí jehe sín. It'èni ó nohe ch'án nkehe t'ichjánxinhanrá kjónté naxa tjanchéhyará ch'án. ⁹ Méxra xíkiki chróntáchrórá:

It'èni tjen nkaya nkajní jaha imá tjóá.

¹⁰ Chrókui tí kjuachaxin kuènta.

Chrókjuich'e tí nkehe tóxrjínhan jaha ntihi chjasintajni éxi tjech'e nkaya nkajní.

¹¹ Ijie la tsjánjuan tí niotja t'ichjánxinhinni.

¹² T'oxíka tí nkehe jínahya kjuich'eni kíxin kjaxin jeheni ts'itjáyenheni tí nkehe kjuich'ehe ni chojni.

¹³ Títóéhyani kíxin xrahya chrókjuasinni jie. Nchekaáni kaín tí jínahya chrókónheni,

kíxin jaha mé kuèntá tí kjuachaxin kíxin ó noheni kíxin jaha tjetétōan tí kjuachaxin jnkochrín. Amén.

¹⁴ 'Tí jahará ts'itjáyanhanrá tí nkexro kjuasinhánrá ichrén jie la mé kjaxin It'èni tjen nkaya nkajní mé ts'ikon ch'án kíxin xikaha kjuich'erá la ntá kjaxin jehe ch'án ts'oxíka ch'án tí jie kjuásinrá. ¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá kjaxin It'èni tjen nkaya nkajní ts'ikon kíxin

xikaha kjuich'erá k'uitjáyanhyará la ntá kjaxin jehe ch'án la ts'óxíkahya ch'án tí jie chontará.

Ch'in Jesús kjuako kixin chrók'óxroanhya sín kixin kjónehya sín

¹⁶ 'A ntá tí jahará tí naxa kjóntehyará kixin tjinkáonrá tsonixjehérá Dios la ntá chrók'uejohyará éxí t'avará éxí ch'e tí sín jehya jnkojínxón tjenkayáxin sín. Mé xikaha ch'e sín kixin tjinkaon sín ts'ikon chojni kixin naxa kjónehya sín. Tí xikaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín inaá. ¹⁷ A ntá tí jahará kjónté naxa kjóntehyará kixin tjinkáonrá tsonixjehérá Dios la t'ontirá ikonrá la tjéntoará kjará ¹⁸ kixin tsonoehya chojni kixin naxa kjóntehyará. Jehó It'eni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

Tí nkehe chaxín tjete siín nkaya nkajní

(Lc. 12.33-34)

¹⁹ Jahará chrókjuásitonhyará nkehe tjete ntihi chjasintajni kixin ntihi la ts'ín kué tí nkehe tjete sinchek'itjáyanhanrá va la ko tsochjisen tí chichaon la ko xíchee ts'ixenhen tsaáhará. ²⁰ Íchá jína tjásitonrá tí nkehe tjete nkaya nkajní kixin ntaha kohya iko sinchek'itjáyan nkehe la tsochjisenhya tí nkehe la ko kohya xíchee ts'ixenhen tseé. ²¹ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

²² Tí ikonrá mé éxí yóhe ijnko xrohi t'inkaséyanxín tí cuerpo kuéntará. Tí jína ikonrá la ntá kjaxin kuenté tí cuerpo kuéntará mé chóna xrohi. ²³ A ntá tí ikonrá la jínahya la ntá kuenté tí cuerpo kuéntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon

(Lc. 16.13)

²⁴ Kohya ninkexró tsjacha sich'ehe xra yaá lamó. Tí xikaha chrókjuich'e ch'án la ntá ijnko tsonínkakonhen ch'án la tí í jnko tsotjuèhe ch'án o ijnko la tsitekakonhen ch'án la tí í jnko la tsitekakuenhya ch'án. Méxra xitjahya chrókjuich'e chojni xra Dios tí tjinkaon sín chróchóna sín itsjé chichaon.

Dios mé t'áyakonhen tí xjeen ch'án

(Lc. 12.22-31)

²⁵ 'A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uítsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuéntará, a ntá kánhyó sínkí tí ka chrók'uítsará? ²⁶ Xráxinkáonrá nkexrí siín tí koxroxé xritjaka. Jehe va la t'enkahya va noa la ko tjáhya va la ko chóntahya va nketí ts'inkachjinayá va tí noa, la kjánchó It'eni tjen nkaya nkajní la tjanjon ch'án nkehe sine va. A ntá jahará mé antsí tjetoan a ntá tí koxroxé la kénhyó. ²⁷ ¿Á tjejó jnkojínrá tjenkayáxinrá kixin tí chrókóxakonhanrá imá a ntá naxa chrók'uankirá it'o metro ntetoxinrá inaá?

²⁸ ¿Nkekuénté kixin imá tóxakonhanrá ikará ó? Tsjehérá nkexrí sít'ánkí tí catsjo siín nteje. Tí itsjo la ní ch'ehya xra la ko tjonhya. ²⁹ La tjonkará kixin kjónté ch'in rey Salomón k'uéchóna itsjé chichaon la naxa kjuíncheyóehya ch'án nkexrí náxrjón tsjehe tí tsjo a. ³⁰ A ntá tí Dios la nchek'itsa tí ka yoa siín nteje kjónté ijie síchón ka la ntóye tsohexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuénté titekákonhyará ch'án? ³¹ Méxra xikaha chrókóxakuanhyará chrókjuanchankíhyará kixin nkehe

chrókjónterá o nkehe chrók'uirá o nkehe chrók'uítsará. ³² Kaín tí nkehe la tí sín chónhya Dios mé tóxakonhen sín tíha. A ntá jahará chontará It'eni tjen nkaya nkajní la mé nohe ch'án kaín nkehe t'ichjánxínhanrá. ³³ A ntá senó mé chrókuéyará tí kjuachaxin kuèté Dios la chrókuínchexiteyará tí nkehe jína tjinkaon ch'án, a ntá jehe ch'án mé tsjanjon ch'án kaín nkehe t'ichjánxínhanrá. ³⁴ Tóxakuanhyará tí nkehe tsonhen ntóye xíkaha kixin ntóye la í jnko yaon táha la jnkojnko yaon tjikao kjuaxikaon kuènte.

7

Chrók'uantaxíenhyará kichuára (Lc. 6.37-38, 41-42)

¹ Chrókuékahyará ókjé chojni jie kixin ntá Dios kjaxin chrókuanchahya jie tí jahará. ² A ntá Dios la tsjanchia ch'án jie tí jahará tí tsékará ókjé chojni jie. A ntá tí xíkaha sich'erá la mé xíkaha tsonhanrá kjaxin. ³ ¿A ntá nkekuènte tsjehé tí chjínínó ntsí tjenkánkí ikon tí kichuá tí naxa ántosán tí inta jie tjenkánkí ikuan? ⁴ A ntá tí chonta jaha tí nta jie tjenkánkí ikuan, ¿a ntá nkexrí kixin chróntáche tí kichuá kixin: “Títóhé tsakitsjenkíni tí chjínínó ntsí tjenkánkí tí kuan?” ⁵ A ntá jaha la ntoáhya tjenkayáxian. Senó chrókuakitsjenkiá tí nta jie tjenkánkí ikuan kixin ntá chrók'uikuan tsakitsjenkiá chjínínó ntsí tjenkánkí ikon tí kichuá.

⁶ Chróchjeéhyará tí nkehe tsíkótjóá tí koniá kixin jehe va tsokjan va tsonínkakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjete kixin tsinkátja va la tsokuen.

Tjanchia la tjéyá la t'inka puerta (Lc. 11.9-13; 6.31)

⁷ Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe. ⁸ Kixin tí nkexro tjanchia nkehe la ts'áyéhe tí nkehe la tí nkexro tjéyá nkehe la ts'itja la tí nkexro t'inka puerta la tsoxitjehe.

⁹ ¿Á tjejó jnkojín nkexro ntihi chrókuanjon xro chrókjóne xjeen tí chrókuanchia xjan niotja? Kja náhí. ¹⁰ O tí chrókuanchia xjan ijnko koche la, ¿á chróchjéhe ch'án tí xjeen ch'án konche chrókjóne ní? Kja náhí. ¹¹ A ntá jahará kjónté jínahyará la ó nohará nkehe jína chjehérá xjaanrá. A ntá It'eni tjen nkaya nkajní kjaxin antsí tsochjéhe ch'án nkehe jína tí nkexro tsjanchia nkehe.

¹² Méxra xíkaha chrókuíkosáyehérá kichuára éxí yóhe nkexrí tjinkáonrá chrókuíkosáyahará sín mé xíkaha k'uetqan ch'ín Moisés la ko xíkaha ntáchro tí xroon kuènte tí sín k'uéchrónka itén Dios ósé.

Tí puerta tekahya (Lc. 13.24)

¹³ T'ixeenxínrá tí puerta tekahya. Kixin tí puerta la ko tí ntia ts'itjáyanxín chojni la imá iton la ko teka la nchónhya chojni sátsji tí ntia ntiha. ¹⁴ A ntá tí puerta la ko tí ntia sátsjixinni tí kjuachón la tekahya ntiha la ko tsjéhya chojni ts'itja tí ntia a.

Tí to mé tjátsoanxíni tí nta (Lc. 6.43-44)

¹⁵ Méxra tóxakonhanrá tí ts'ikonrá itsi tí sín ch'ia tsontáchro sín kixin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jiehe. ¹⁶ Jahará la chrókuátssoanxínrá tí jehe sín kixin tí xra ch'e sín kixin tí ntach'i la xitjahya chrók'óna to uva la ko tí kach'i xitjahya chrók'óna to higo. ¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya

to jína. ¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. ¹⁹ Kaínxín tí nta t'ónahya to jína mé tsochrínjin la tsoche. ²⁰ Mé xíkaha chrókjuatsəanxínrá jahará tí sín jehya jína kixin tí xra tjejóch'e sín.

Jehya kaín chojni ts'ixenhen tí kjuachaxién Dios tjen nkaya nkajní
(Lc. 13.25-27)

²¹ 'Kénhya chojni tsontácho: “Ìnchéni, Ìnchéni”, mé ts'ixenhen sín tí kjuachaxién Dios tjen nkaya nkajní. Náhí. Jehó tí nkexro sinchexiteyá tí nkehe tóxrjínhin T'aná t'ətoan tjen nkaya nkajní. ²² Tsjixraká tí yaon a la ntá itsjé sín tsontácho sín kixin: “Ìnchéni, Ìnchéni, k'uénixjaxínni ihníá la ko tí ihníá mé kuakitsjexínni nchakuen tí jínahya la ko kjuachaxién ihníá kjuasixínni nchónhya kjuaxroan.” ²³ A ntá janhan tsjatahá kixin: “Janhan la chonhya tí jahará. Tìtonará sátjirá kixin jahará imá jínahyará.”

Ch'ín Jesús kjuíncheyóəxin ch'án kixin yaá nchia
(Lc. 6.47-49; Mr. 1.22)

²⁴ Méxra tí nkexro tinhin tí nkehe ntáxrjan la titekaon ch'án la jehe ch'án mé éxí yóhə ijnko nkexro chóna kjuaxrexinkaon jína la kjuích'éna nchia chrítaón tjo. ²⁵ A ntá xrínahya xrakoa chrin, ikui yeé ntəninche la tjian chjéhe xrinto la kjónté xíkaha la xíkaha tí nchia kixin itjo tjekjen nchia. ²⁶ A ntá tí nkexro tinhin tí xrjanka la titekakonhya mé jehe la éxí yóhə ijnko nkexro lontí la kjuích'éna ch'án ijnko nchia tí siín nchesen. ²⁷ La ntá xrínahya xrakoa chrin ntá antsí kóyeé ntəninche tí tsaka la ko chjéhe xrinto la ntá xíka tí nchia, la ijnko kjuachrakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kixin nkexrí kjuako ch'án. ²⁹ Kixin kjuako ch'án éxí ijnko nkexro chóna imá kjuachaxin la tóyoəhya ch'án tí sín maestro kjuako tí ley.

8

Ch'ín Jesús kjuínchekitohe jína ijnko chojni chóna chin lepra
(Mr. 1.40-45; Lc. 5.12-16)

¹ A ntá ch'ín Jesús k'uínkajinxin ch'án tí jna la chréhe nchónhya chojni. ² La ntá kóchjina ijnko ch'ín níhi chóna chin lepra la kjuák'exín toch'in ch'án nkayakon ch'ín Jesús la ntácho ch'án kixin:

—Ìnchéni tí tjinkávan la jína chrókjuínchekitohéni jína —ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntácho ch'án kixin:

—Méxra xíkaha tjínkavan. Ntá jie sintakitoha jína.

A ntá tuénxín kuítóhe ch'án jína la ó kjuin tí chin k'uéchóna ch'án.

⁴ La ntá ntácho ch'ín Jesús kixin:

—Ninkexró chenkahya ntihi. Jehó sátjia tjákohe tí ch'ín nchat'á kixin kuítóha jína la ko sátjíkoa tí nkehe tsík'ətoan ch'ín Moisés* kixin ntá xíkaha tsonoexín kaín xín chojni kixin ó kuítóha jína —mé xíkaha k'ueətoan ch'ín Jesús.

Ch'ín Jesús kjuínchekitohe jína ijnko nkexro ch'ehe xra ijnko capitán romano
(Lc. 7.1-10)

⁵ A ntá tió k'uixenhen ch'ín Jesús chjasin Capernaum la ntá xrínahya kóchjina ijnko capitán romano la chrónə ch'án ⁶ ntácho ch'án kixin:

—Ìnchéni ntəni itjen ijnko ch'ín ch'ehe xra mé níhi ch'án, tjetsínka ch'án, tsík'en toté ch'án la imá tjtóthe ch'án —ichro ch'án.

⁷ A ntá ch'ín Jesús kjuátehe ch'án ntácho ch'án kixin:

* 8:4 Levítico 14.1-32

—¿Á sátsjia sintakitohə jína tí ch'ín a? —ichro ch'án.

⁸ Ntá tí ch'ín capitán kjuátehe kíxin:

—Náhi, Inchéni, tósuèheni kíxin chrók'uixenhén ntøeni kíxin jehya chojni jínani. Jehó chrókjuánjuan kjuachaxin kuèntá, ntá tí ch'ín ch'eheeni xra chrókuitohe ch'án jína. ⁹ Janhan na kjaxin chonta chojni t'etuanna la ko kjaxin janhan tétuanhan tí sín soldado. Tió tétuanhan ijnko sín sátsji sín la ntá ó sátsji sín. La kjaxin tió tétuanhan ijnko sín kíxin xrakoa sín la mé tji sín. La ko tió tétuanhan ijnko nkexro ch'ena xra kíxin sich'e xra la ich'e xra —ichro ch'án.

¹⁰ Ntá kuínhin ch'ín Jesús ntá kóxakonhen ch'án kíxin xikaha chro tí ch'ín a, ntá nixjehe ch'án tí sín chréhe ch'án ntáchro ch'án kíxin:

—Chaxín ntáxrjan kíxin kuenté tí nación Israel la k'uitjahya janhan ninkexró tinkáchónki xikaha éxi tinkáchónki tí ch'ín i. ¹¹ Janhan xrjanka kíxin nchónhya chojni ókjé tjiixin tí tjiroxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuènte Dios. ¹² A ntá itsjé tí sín chrók'uejó tí tjen tí kjuachaxin kuènte Dios la ts'axrjexín sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'ín Jesús mé nixjehe ch'án tí ch'ín capitán ntáchro ch'án kíxin:

—Sátjia ntøa. Éxi kuítekávan jaha la tsoxiteyá tsonhen tíha —ichro ch'án.

La ntá tí ch'ín ch'e xra la o tuénxín tí hora a tsíkitohe ch'án jína.

Ch'ín Jesús kjuínchekitohe ich'ee ch'ín Pedro jína

(Mr. 1.29-31; Lc. 4.38-39)

¹⁴ A ntá sákjuí ch'ín Jesús tí ntøe ch'ín Pedro la ntaha k'uíkon ch'án kíxin tí ich'ee ch'ín Pedro la níhi tjan tjetsínka tjan la chóna tjan sóa. ¹⁵ Ntá itsé ch'án itja tjan la ntá kjuínhin tjan tí sóa la ntá k'uínkatjen tjan la kjuankíxin yaxínhin tjan kíxin tsjanjon tjan nkehe sine sín.

Ch'ín Jesús kjuínchekitohe nchónhya tí sín níhi jína

(Mr. 1.32-34; Lc. 4.40-41)

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrjexín tí nchakuen tí jínahya tí jehe sín la kjaxin kjuínchekitohe ch'án jína kaín tí sinníhi. ¹⁷ Mé xikaha kjuích'e ch'án kíxin tsoxiteyá tí nkehe tsíchrónka tí ch'ín Isaías tí ch'ín k'uéchrónka itén Dios. Mé ntáchro ch'án xikihi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”† Mé xikaha ichro itén Dios.

Tí sín tjinkaon tsochréhe tí ch'ín Jesús

(Lc. 9.57-62)

¹⁸ Tió k'uíkon ch'ín Jesús kíxin nchónhya chojni k'uántatjen sín ch'án la ntá k'ueñoan ch'án kíxin ts'átøye sín íjnko chrínta ntá. ¹⁹ La ntá ijnko tí sín maestro tjan tí ley mé kóchjinehe ch'án tí ch'ín Jesús la ntáchro ch'án kíxin:

—Maestro tjinkaonni chróchréheni tí jaha kjónté nketí tjinkávan sátsjia —ichro tí ch'ín a.

²⁰ La ntá kjuátehe ch'ín Jesús ntáchro ch'án kíxin:

—Tí koxróntá chóna va itjueé va la ko tí koxroxé chóna va kaké va. A ntá tí Xjeen Dios K'óna Chojni mé chóntahya nketí ts'ok'èxin ch'án.

²¹ A ntá ijnko tí chojni k'uájiko ch'án, mé ntáchro ch'án kíxin:

—Inchéni, titoheeni senó sátsjikjaváni it'éni —ichro ch'án.

²² La ntá kjuátehe ch'ín Jesús ntáchro ch'án kíxin:

—Náhi, chréhe tí janhan. Títohé kíxin tí chojni tsík'en la jnkokón sín tsík'en tsjavá kichó sín —mé xikaha ichro ch'ín Jesús.

† 8:17 Isaías 53.4

Ch'ín Jesús kjuínchek'ixrata tí xr̄into la ko tí nta
(Mr. 4.35-41; Lc. 8.22-25)

²³ Ntá ch'ín Jesús k'uixenhen tí ntabárc̄o la k'uixenko ch'án tí sín k'uájiko ch'án.
²⁴ La ntá xr̄inahya imá síchrica nta la ó chjina sítikia nta tí ntabárc̄o. La kjánchó ch'ín Jesús la tjejua ch'án. ²⁵ La ntá tí sín k'uájiko ch'án kjuínchek'aya sín ch'án la ntáchro sín kixin:

—Ínchéni nchekaáni kixin tí ntabárc̄o la ó meró ts'aniánkí nta —ichro sín.

²⁶ Ntá kjuátehe ch'án ntáchro ch'án kixin:

—¿Nkekuènté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xikaha ntá k'uàya ch'án la k'uètuenhen ch'án tí xr̄into la ko tí nta yaon la ntá tuénxín k'uixrata. ²⁷ La ntá imá chrakon sín la ntáchro sín kixin:

—¿Xá nkexro tíhi? Kjonté xr̄into la ko nta yaon la mé nchexiteyéhe ch'án —ichro sín.

Tí sín chóna nchakuen tí jínahya tí nonte Gadara
(Mr. 5.1-20; Lc. 8.26-39)

²⁸ Ntá tió k'uátòye ch'ín Jesús tí nta yaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrjexín tòyé chojni tsík'en la kóchjinehe sín ch'án. Jehe sín mé imá jiehe sín la kohya ninkexró tjacha ts'atsínka tí ntiha. ²⁹ La ntá kjuankixin k'óyako sín ntáchro sín kixin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kixin sínchekjasóteni kjónte naxa kjuixrakáhya tí yaon tsjasóteni? —ichro sín.

³⁰ A ntá ntiha kánhyó kjín síin itsjé cochíno xrine va. ³¹ La ntá tí nchakuen tí jínahya mé chrónóehe tí ch'ín Jesús kixin:

—Tí tsétoan kixin sátsjini la chrókjuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kixin:

—Tí xikaha la sátsjia —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajinxin va ntiha kjuítsínkayá va tsaka, ntá kjuítsínkankí va nta, kjuínhin va nta.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankixin chrónka sín kaín tí nkehe kónhen la ko kaín nkehe kónhen tí sín k'uéchóna tí nchakuen tí jínahya. ³⁴ A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kixin xikaha tsíkónhen la chrónóehe sín ch'án kixin sáchrókjui ch'án ókjé.

9

Ch'ín Jesús kjuínchekitohe jína ijnko chojni tsík'en toté
(Mr. 2.1-12; Lc. 5.17-26)

¹ La ntá kjuixin tíha ntá ch'ín Jesús mé k'uixenhen ch'án ijnko ntabárc̄o la k'uátsínka ch'án í jnko lado chrínta nta la kjuíji ch'án chjasén ch'án. ² A ntá ntiha kuikao sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kixin chaxín tinkáchónki sín ch'án la ntá nixjehe ch'án tí sinníhi ntáchro ch'án kixin:

—Xjeenni nchechéhé asán. Tí jie chonta la ó kjuixin kjuínhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kixin:

—Tí ch'ín i mé ncheyóhe ch'án asén ch'án Dios kixin xikaha nixja ch'án.

⁴ Ntá ch'ín Jesús mé ó nohe ch'án kixin nkehe tí kjo sín asén sín ntá ntáchro ch'án kixin:

—¿Nkekuènté kixin xikaha jínahya tjenkayáxinrá? ⁵ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìnhin ch'án tí jie yámá ch'án o á antsí xrahya chróntátjan ch'án kixin chrók'uínkatjen ch'án sáchrókjui ch'án? ⁶ Méxra tsjákoxián kixin tí Xjeen Dios K'óna Chojni mé ntihi chjasintajni chóna kjuachaxin tsjakjinhin ijje chojni.

Ntá ntáche ch'án tí sinníhi a kixin:

—Ijie la t'inkatjen tjatsíyan kaniáa na sátsjia ntoa —ichro ch'án.

⁷ Ntá tí ch'ín tsík'en toté na tuénxín k'uínkatjen ch'án la sakjuí ch'án ntoe ch'án. ⁸ Ntá kaín tí sín siín ntiha k'uíkon sín kixin xikaha kónhen la imá chrakon sín la kjuanchehe sín Dios kjuasáya kixin tí nkexro imá kjuakoxin ch'án kjuachaxin kuènte Dios.

Ch'ín Jesús k'uíyehé ch'án tí ch'ín Mateo

(Mr. 2.13-17; Lc. 5.27-32)

⁹ A ntá ch'ín Jesús sákjuixin ch'án ntiha la k'uíkon ch'án ijnko ch'ín it'in Mateo tjetjaxin ch'án ntiha nchekjènkj ch'án. Ntá ntáchro ch'ín Jesús kixin:

—Chrèhé tí janhan —ichro ch'án.

Ntá ch'ín Mateo tuénxín k'uínkatjen ch'án chrèhé ch'án tí ch'ín Jesús.

¹⁰ A ntá chr'éxin ch'ín Jesús kjuák'e ch'án ntoe tí ch'ín Mateo la ntaha xranjon nkehe sine ch'án la ntá itsjé tí sín nchekjènkj la ko í so sín chóna jie mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án. ¹¹ La ntá tí sín fariseo kjaxin k'uíkon sín xikaha la kjuanchankíhi sín tí sín k'uájiko ch'ín Jesús, ntáchro sín kixin:

—¿Nkekuènté kixin tí ch'ín maestro kuéntará mé neko ch'án tí sín nchekjènkj la ko tí í so sín chóna jie? —ichro sín.

¹² Ntá ch'ín Jesús la kuínhin ch'án nkehe tí tjo sín la ntáchro ch'án kixin:

—Tí sín níehya la t'ichjánxienhya sín nkexro sich'e xroan. Náhí. Jehó tí chojni níhi mé t'ichjánxinhin sín nkexro sich'ehe sín xroan. ¹³ Sátjirá la ts'ítjará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan tjínkavan kixin chrókuikonóehérá chojni la tjínkakhya kixin chrók'oyánrá iko chrókjuánjonrá.”* Mé xikaha ichro itén Dios. Janhan na k'uinkahya ntihi kixin chrók'uíyaha chojni jína tjejó. Náhí. K'uinka kixin ts'íyaha tí chojni chóna jie kixin chrókuítóhe sín tí ijje sín ntá chrókuinkí sín tí tjenkayáxin sín —ichro ch'án.

Kjuanchankí sín kuènte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kixin:

—Jeheni la ko tí sín fariseo la jnkoyaxon nehyaní, a ntá tí sín xrikoá la, ¿nkekuènte xikahya ch'e sín? —ichro sín.

¹⁵ Ntá kjuátehe ch'ín Jesús, ntáchro ch'án kixin:

—¿Xá chrók'uává kaín tí sín tsík'íyehé sín tsochjina tsothehe ijnko chojni kixin naxa tjen tí ch'ín tsíkótehe tjejóko sín ntiha? A ntá tsjixraká ijnko yaon tsotsé sín tí ch'ín tsíkótehe sátsjiko sín ch'án ntá kaín tí sín tsíkóchjina mé ts'ává sín la í sinehya sín.

¹⁶ Nijnko chojni chrókjuak'eniehe tí ka ó ntaxin it'o ka nixin kixin ntá chrókjuixéhe tí ka nixin chrók'uitjían tí ka ntaxin ntá antsí má chrók'uichje.

¹⁷ La ko kjaxin éxí yóhe chrókuikiahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'uichje ti tjuaxran ntaxin. Ntá chrók'uitjían tí xran la ko chrok'uitjían tí tjuaxran. Ntá tí xranvino nixin chrókuikia ijnko tjuaxran nixin la ntá xikaha la yóí nkehe chrók'uitjíanhya.

* 9:13 Oseas 6.6

Ch'ín Jesús kjuínchexechón tí tjachjin xjeen ch'ín Jairo la ko kjuínchekitohe jína ijnko tjan kuákóxin iké ch'án

(Mr. 5.21-43; Lc. 8.40-56)

¹⁸ Ntá naxa tjenixja ch'ín Jesús la ntá ikjui ijnko ch'ín t'etoan kuente tí sín judío la kjuák'exín toch'in ch'án nkayakon tí ch'ín Jesús la chrónóehe ch'án kixin:

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróxechón tjan —ichro ch'án.

¹⁹ Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uájiko ch'án. ²⁰ A ntá itjen ijnko chojni chjin níhi tjan, ó teyó nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án ²¹ kixin tjenkayáxin tjan kixin kjónté chrínta iké ch'án ó chrókuákóxin tjan, la táhó chrókuítóexín tjan jína. ²² Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítóha jína kixin kuítekáván tí janhan —ichro ch'án.

Na ntá tuénxín ó kuítóhe tjan jína.

²³ Ntá tió kjuíji ch'ín Jesús ntóe tí ch'ín judío t'etoan la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsíkójnkotsé la tsjánkàma sín xjan. ²⁴ La ntá ntáchro ch'ín Jesús kixin:

—Tí xjan méhe títóhéra, kixin tsík'enhya xjan, la tjejua xjan ó —ichro ch'an.

Ntá kjuanoá sín ch'án. ²⁵ A ntá tí k'uaxrje kaín chojni la ntá ch'ín Jesús la k'uixenhen ch'án la itsé ch'án itja tí tjan a la ntá tuénxín k'uínkatjen tjan. ²⁶ Ntá kuenté chjasin ntiha la kuínhin sín kixin xikaha kónhen.

Ch'ín Jesús kjuínchekitohe jína yaá sín t'ikonhya

²⁷ Ntá sákjuíxin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehé sín ch'án ntáchro sín kixin:

—Tíkonóhéni jaha tsík'axrjeníxian David.

²⁸ Ntá k'uixenhen ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á títekáván kixin tsjácha sít'a xikaha? —mé xikaha kjuanchankí ch'án.

Ntá kjuátehe sín kixin:

—Jeén, Ìnchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xikaha kuítekáván la tsoxiteyá —mé xikaha ichro ch'án.

³⁰ La ntá tuénxín ó jína t'ikon sín. Ntá ch'ín Jesús k'uetuenhen sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jína ijnko ch'ín nósin

³² Tió sákjuí tí sín k'uék'ikonhya, a ntá iso chojni kjuíkáo sín ijnko ch'ín nósin ch'án la chóna ch'án nchakuen tí jínahya. ³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankíxin nixja ch'án. Ntá kaín chojni la k'uíkon sín la ntáchro sín kixin:

—Nunca t'ikonhyéni ijnko kjuaxroan xikaha kuenté tí nación Israel —ichro sín.

³⁴ A ntá tí sín fariseo ntáchro sín kixin:

—Tí nkexro t'etuenhen tí nchakuen tí jínahya tsíkjanjon kjuachaxin mé xikaha takitsje tí ch'ín i tí nchakuen tí jínahya —mé xikaha ichro sín.

Ch'ín Jesús kuíkonóehe ch'án chojni

³⁵ Ntá k'uaátsínka ch'ín Jesús itsjé chjasin jié la ko chjasin ntsí la kjuakoxin ch'án jnkojnko nínko Israel. Chrónka ch'án tí tan jína nkexrí tjen tí kjuachaxin kuènte Dios. La ntá kjuínchekitohe ch'án jína chojni níhi chónka kaín xín chin la ko chojni chónka kjuatjoté. ³⁶ K'uúkon ch'án kixin nchónhya chojni k'uéjó sín ntá kjuikonóhe ch'án sín kixin imá tóxakonhen sín la k'uéjó sín éxí kolélo chónkahya nkexro t'ayakonhen. ³⁷ Ntá ntáche ch'án tí sín k'uájiko ch'án kixin:

—Chaxín ntáxrjan janhan kixin imá tsík'óna, kjánchó chojni sich'e xra mé tsjéhya. ³⁸ Chrókjuancheherá tí Inché tí nonte kixin chróchr'án ch'án itsjé chojni chrókjuich'e xra —mé xikaha ichro ch'ín Jesús.

10

Ch'ín Jesús kjueyá teyó sín ts'ajiko ch'án
(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuenhen asén chojni la ko sinchekitohe sín jína kaín chojni chónka kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo. ³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkí la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo. ⁴ La ko kjaxin ch'ín Simón, mé kuènte tí sín cananista, la ko kjaxin ch'ín Judas Iscariote, mé tí nkexro chr'éxin kjuínchekji tí ch'ín Jesús.

Ch'ín Jesús k'uetuenhen tí teyó sín kixin sátsjikako sín kjuachaxin kuènte Dios
(Mr. 6.7-13; Lc. 9.1-6)

⁵ Ntá k'uetuenhen ch'ín Jesús tí teyó sín kixin sátsji sín la k'uetuan ch'án kixin: —Tjihará tí tjejó tí sín jehya judío la ko t'ixeenhyará tí chjasin siín estado Samaria. ⁶ Náhí. Íchá jína sátsjirá tí tjejó tí chojni éxí kolélo kjuíchroe kuènte nación Israel. ⁷ Sátsjirá tjácohérá sín kixin kjuachaxién Dios tjen nkaya nkajní la í séhya tsi. ⁸ Sinchekitohérá jína chojni níhi la ko sinchekitohérá jína tí sín chónka chin lepra la ko sinchexechónrá chojni tsík'en la takítsjerá tí nchakuen tí jínahya. Jahará kjaxin kuitonhanrá tí kjuachaxién Dios, méxra chrókjuachahyará jahará kjaxin.

⁹ 'Chrókjuikuahyará ninkehó chichaon oro la ko ninkehó chichaon plata la ko ninkehó chichaon cobre ¹⁰ la ko tí sátsjirá ntia la chrókjuikuahyará ka bolsa la chrókjuikuahyará yaá ka chrók'uínkayaterá la ko chrókjuankahyará tokatárá la ko chrókjuikuahyará nta tjixinrá. Tí nkexro ch'e xra la jehí siín kjuachaxin ntiha chrókjóne.

¹¹ 'A ntá tió tsjasánrá ijnko chjasin jié o ijnko chjasin ntsí la tjéyará ijnko nkexro tsjanjon kjuachaxin la ntøe sín ntahó chrókuithohará ntá tsjixin tí xra ntá sátsjirá. ¹² A ntá tió t'ixenhénrá ntøe sín la nixjehérá sín tjákoxinrá jnkojína. ¹³ A ntá tí chaxín jína asén sín la ts'áyéhe sín tí kjuaxroxin, a ntá tí náhí la sátsjikorá tí kjuaxroxin. ¹⁴ A ntá tí tsochrohya sín tsjanjon sín kjuachaxin tsitohará la tjinkakonhya sín tsinhin sín tí nkehe tsochronkará na mé t'axrjéxinrá tí ntøe sín o tí chjasén sín la t'oxènjínrá tí inche chónka totará. ¹⁵ A ntá chaxín tjonkará kixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchónka sín jié la kánhyó tsjasóte sín, a ntá tí sín chjasin a la antsí tsjasóte sín kixin k'uéjóroxinhya sín tí tan chrókuaáxin sín.

Óké sín tsonínkakohen tí sín kuènte Cristo

¹⁶ 'Janhan tsochr'an tí jahará éxí yóhe chróchr'an kolélo ts'ejóyakjan kolóbo. Listo chrók'uejorá éxí konche xikaha la chrók'uejorá éxí kontóá chrókójahyará. ¹⁷ Chrókóxakonhanrá kixin itsi chojni tsotsé sín tí jahará la sátsjikoará sín tí tjejó tí sín t'etoan la ko nkaxenhen tí ninkoé sín tsjatiaxínrá sín. ¹⁸ La ntá tsjikaánrá sín tí tjejó tí sín t'etoan la ko tí siín tí sín rey kixin tinkachónkirá tí janhan. Ntá jína tsochronkará kixin tinkachónkirá tí janhan nkayakon tí jehe sín la ko nkayakon tí sín chónhya Dios. ¹⁹ A ntá tió sátsjikoará sín tí tjejó tí sín t'etoan la tóxakuanhyará nkehe tsontáchrora o nkexrí tsonixjará kixin tió tsjixraká tí hora la ntá Dios mé tsjinkjtsará tsonixjará. ²⁰ Kixin jehya jahará tsonixjará. Náhí. Tí Nchakuen It'eni mé tsochronka nkehe tsonixjará.

²¹ 'Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsonínkakohen tí it'é kixin its'en. ²² Kaínxín chojni chjasintajni tsonínkakohen sín kixin tinkachónkirá tí janhan. A ntá tí nkexro tsítøehya tsinkáchónki sín tí janhan hasta tsjéje chjasintajni mé tsaá. ²³ Tió má chónkíhará sín ijnko chjasin la ntá sátsjirá í jnko chjasin. La ntá chaxín tsoxrjanka kixin tí Xjeen Dios K'óna Chojni mé tsokjan tí naxa tjixinhya ts'atsínkará kaín tí chjasin Israel.

²⁴ 'Tí nkexro xrakohe la kánhyó tjetean la tí maestro la antsí tjetean, la ko kjaxin tí nkexro ch'e xra la tjeteanhya la antsí tjetean tí lamo. ²⁵ A ntá tí nkexro xrakohe chrókjuakoxin ch'án éxí tí nkexro kjuakohe ch'án la ko tí nkexro ch'e xra chrókjuakoxin ch'án éxí tí lámoé ch'án ch'ehe ch'án xra. Tí ch'ín ìnché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

*Nkexro tí chróchrakonhénrá
(Lc. 12.2-9)*

²⁶ 'Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin. ²⁷ Tí nkehe tjonkará sítié la t'ichjánxin tsochronkará tió itsi xrohi t'inkaséyanxín tí yaon. La ko tí nkehe tjonkará ijie ninkexró noehya la t'ichjánxin chronkará chrókuinhin kaín sín. ²⁸ Chróchrakuénhyará tí sín t'óyán cuérpøé chojni kixin asén chojni xitjahya ts'óyán sín. Íchá jína chróchrakonhénrá tí nkexro tsjacha sinchek'itjáyaxín cuérpøé chojni la ko asén chojni tí xrohi ts'ankahya.

²⁹ '¿Á chrókóxiñhya yaá koxroxé ntsíntsí ijnko chichaon ntsí? A ntá kjónté xikaha la chrók'uánótjenhya nijnko tí jehe va nonte tí chrókjuanjonhya It'eni kjuachaxin. ³⁰ A ntá kjónté tí kaxihj chóna ikjára la ó nohe ch'án nkekjaín ka chontará. ³¹ A ntá jahará chróchrakonhyará kixin tóyóahyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

*Tí sín tósuèhya tsochronka sín kixin tinkáchónki sín Cristo nkayakon chojni
(Lc. 12.8-9)*

³² 'Kaín tí chojni tsochronka kixin tinkáchónkina sin nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajní. ³³ A ntá tí nkexro sinchemána tsontáchro sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

*Jnkokoáhya tsjenkayáxin chojni kixin ó kui Ìnchéni Jesús
(Lc. 12.51-53; 14.26-27)*

³⁴ 'Tjenkayáxinhyará kixin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Tsjanjonko kichó chojni kixin k'uinka janhan. ³⁵ Janhan k'uinka kixin tsonínkakohen chojni it'é, la ko tí xjeen sín chjin

mé tsonínkakonhen iné, la ko tí tíkinta tsonínkakonhen ich'ee. ³⁶ Mé xikaha tí sín tsonínkakonhen kichó la mé tí sín naxa kjéhya sín.

³⁷ 'A ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuèntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuèntana. ³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuèntana. ³⁹ Tí nkexro tjinkaon kixin kohya nkehe chrókónhen sín mé ts'itjayan sín, a ntá tí nkexro chrókuinçek'itjayanxín asén kixin tinkáchónki sín tí janhan la mé tsaá sín.

Tí nkexro ts'áyéhe nkehe

(Mr. 9.41)

⁴⁰ 'Tí nkexro chrókjuanjón kjuachaxin chrók'uejorá la mé éxí chrók'uáyéhe sín tí janhan la ko tí nkexro chrók'uáyéhe tí janhan la éxí yóhe chrók'uáyéhe sín tí nkexro ichr'ánna k'uinka. ⁴¹ La tí nkexro chrókjuanjón kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nkexro kjuako. La ko tí nkexro chrókjuanjón kjuachaxin tsjak'e ijnko chojni jína kixin jína ch'án mé xikaha ts'áyéhe sín nkehe éxí ts'áyéhe tí nkexro jína. ⁴² 'A ntá tí nkexro sinčekitonhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jína kixin xikaha kjuích'e ch'án.

11

Ch'ín Juan Bautista k'uetuenhen iso sín

(Lc. 7.18-35)

¹ Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuixin ch'án ntiha la sákjuikjako ch'án iso chjasin chjinaxón ntiha.

² 'A ntá ch'ín Juan mé tjechjina ch'án ntoechiso ntá xrínahya kuínhin ch'án nkerí xra tjech'e Cristo. La ntá k'uetuenhen ch'án iyó tí sín k'uék'ajiko ch'án kixin sátsjitsjehe sín tí ch'ín Jesús. ³ Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin:

—¿Á jaha tí nkexro itsi ní o á naxa tsochónhenni í jnko nkexro? —ichro sín.

⁴ 'A ntá kjuátehe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uíkonrá la ko tí nkehe kuínhínrá.

⁵ Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchóntha chin lepra la ó kótjóá sín kuítóhe sín jína la ko tí sín k'uékienhya la ó tinhin sín jie. Kjaxin tí sín tsík'en na ó xechón sín inaá la ko kaín tí sín nòa mé síxrakehé sín tí tan jína tsaáxin sín. ⁶ Méxra imá náxrjón tí nkexro kohya nkehe t'inkákonhen tinkáchónki tí janhan.

⁷ Tió sákjuí sín ntá ch'ín Jesús kjuankixin nixjehe ch'án tí sín k'uéjé la chrónka ch'án kuènte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrínto? ⁸ Tí náhi, la ¿nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la tjejó sín tí nchia kuènte tí sín rey. ⁹ ¿'A ntá nkehe k'uíkonrá? ¿Á ijnko nkexro chrónka itén Dios? Jehe chaxín la antsí chóntha ch'án kjuachaxin la tí sín k'uéchrónka itén Dios la kánhyó. ¹⁰ Ch'ín Juan mé tí nkexro kui éxí xikaha chrónka xroon itén Dios ósé. Mé ntáchro xikihi:

Janhan mé tsochr'an ijnko nkexro tsochrónka itan kuèntana tsitónxin ntja, kixin tsjasiyóxin ch'án ntja kuèntá.*

* 11:10 Malaquías 3.1

Mé xikaha chrónka itén Dios. ¹¹ Ntá ijnko nkehe chaxín tsotjonkará kixin kaín tí nkexro k'uéjé senó la kánhyó tjetóan sín la antsí tjetóan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios tjen nkaya nkajní la antsí tjetóan sín la ntá jehe ch'ín Juan la kénhyó.

¹² Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chóna kjuachaxin mé tsjacha sín. ¹³ Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan. ¹⁴ A ntá tí jahará chrókuítekáonrá tíhi; kixin ch'ín Juan la mé ikui kixin tí xra kuènte ch'ín Elías tsjintaxín sich'e ch'án kixin ch'ín Elías la t'ichjánxin chrókui ch'án inaá. ¹⁵ Tí nkexro tjinkaon chrókuinhin la chrókuinhin.

¹⁶ '¿Nkexrí chrókuíntayóaxian tí chojni tjejó ijie? Tóyóhe sín tí chánjan tjejótxin sín ntsin tsítán sín la t'íyehé sín kichó sín ¹⁷ ntáchro sín kixin: “K'uánoani flauta kjánchó jahará la tehyará. Itsjeni isón kuènte chojni tsík'en la ntá k'uaváhyará la ko tsjankahyará.” ¹⁸ Kixin tí ikui ch'ín Juan la kjónehya ch'án la k'uíhya ch'án vino la jahará ntáchrórá kixin ijnko nchakuen tí jínahya mé chóna ch'án. ¹⁹ A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrórá kixin imá itsjé kjóne ch'án la imá ik'ui ch'án la ko imá t'ito ch'án tí chojni chóna jie la ko tí sín nchekjènkj, ichrorá. A ntá tí kjuachaxin kuènte Dios mé tjakoxin tí xjeen ch'án.

Tí chjasin titekakhya

(Lc. 10.13-15)

²⁰ Ntá ch'ín Jesús mé kjuankixin ch'án ntáche ch'án tí sín tjejó iso tí chjasin imá kjuasixin ch'án kjuaxroan kixin kjónté xikaha la naxa kuinkáchónkihya sín Dios. ²¹ Ntá ntáchro ch'án kixin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uíkonrá jahará ntá tí chrókójehe sín la tjoka chrókuinkáchónki sín Dios la tjoka chrókjuakoxin sín chrók'uinkáya sín ka tié la ko nteso chrókjuinche'ia sín asén sín. ²² Ntá ntáxrjan kixin tí yaon tsitoxín ijie chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín. ²³ A ntá jahará chojni chjasin Capernaum tjenkayáxinrá kixin imá nohará a ntá sátsjirá nkaya nkajní, ichrorá, kjánchó chaxínhya. Jahará la tsjasinkajinxinrá ntiha sátsjirá tsjasótiará tí siín tí sín tsík'en. Tí chrókjuásian tí kjuaxroan tí chjasin Sodoma éxi kjuásian chjasánrá la tí chjasin la kjá naxa chrók'uixin sín naxa chrók'uítjanyanhya sín tí yaon ijie kixin tjoka chrókuitekaon sín. ²⁴ A ntá tjonkará kixin tió sinchekitoéxín Dios ijie chojni la antsí tsjasótiará la tí sín chjasin Sodoma la kénhyó tsjasóte sín.

Xrákirá tí tjén janhan la ts'ok'áhará

(Lc. 10.21-22)

²⁵ Ntá tí yaon a ch'ín Jesús mé nixjehe ch'án It'é ch'án ntáchro ch'án kixin:

—Tjáncháha kjuasáya It'éni mé Inché nkaya nkajni la ko chjasintajni kixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kixin ts'itja tí sín noehya. ²⁶ Mé xikaha It'éni jaha kóxrjínhan kixin xikaha tsonhen —ichro ch'ín Jesús.

²⁷ Ntá ntáchro ch'ín Jesús kixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjejá ch'án tsochóxin sín

ch'án. ²⁸Xrákirá kaín rá tí tjén janhan tí jahará imá tsíkóxrjérá kjuich'erá xra la yamará nkehe iye la ntá janhan mé sintak'ok'áhará. ²⁹Tákjára tí xra kuéntana la ts'itjará kuéntana kixin janhan mé jína asenná la ntahnkehya. Ntaha mé ts'itjará ts'ok'èxin asánrá. ³⁰Tí xra tsotjahára la xrahya la tí nkehe tsotjahára la yehya.

12

Tí sín k'uajiko ch'ín Jesús mé ik'uín sín iso noatrigó ijnko yaon t'ok'éhe tí sín Israel

(Mr. 2.23-28; Lc. 6.1-5)

¹ A ntá ijnko yaon la ch'ín Jesús k'uátsínka ch'án ijnko nonte siín noatrigó tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankíxin sín ik'uín sín iso noatrigó a kixin sine sín. ² A ntá iso tí sín fariseo k'uíkon sín kixin xikaha kjuich'e tí sín xriko ch'ín Jesús la ntá ntáchro sín kixin: —Tsjehe tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon i —ichro sín.

³ Ntá kjuátehe ch'ín Jesús kixin:

—Jahará ¿a kjuínchekuáxinhyará tí xroon chrónka nkehe kjuich'e ch'ín David la ko tí sín k'uájiko ch'án tió k'uén sín kjinta? ⁴ A ntá jehe sín mé k'uixenhen sín tí nchia kuente Dios la kaín sín kjóne sín tí niotja tsíkóyaon kuente Dios kjónté kohya kjuachaxin sine ch'án ni tí sín k'uájiko ch'án. Jehó siín kjuachaxin sine tí sín nchat'á. ⁵ Jahará ¿á nchekuáxinhyará tí xroon tsíkjin ch'ín Moisés ntáchro kixin tí sín nchat'á kuente nínko mé t'ok'èhya sín tí yaon sábadó la kjónté xikaha la jehya jie tíha? ⁶ Ntáxrjan kixin itjén janhan la antsí má chonta kjuachaxin la ntá tí nínko la kénhyó. ⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan Dios tjínkavan kixin chrókuiikonóhéherá chojni la tjínkakhya kixin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhyará tí janhan kixin ninkehó jie chontahya. ⁸ A ntá tí Xjeen Dios K'óna Chojni mé chóna kjuachaxin ts'etóan nkexrí tsonhen tí yaon t'ok'éheni —ichro ch'ín Jesús.

Ch'ín Jesús kjuínchekitohe jína ijnko chojni tsíxámá tja

(Mr. 3.1-6; Lc. 6.6-11)

⁹ Ntá ch'ín Jesús mé sákjuíxin ch'án ntiha la k'uixenhen ch'án ijnko nínko Israel. ¹⁰ Mé ntiha itjen ijnko ch'ín tsíxámá tja. Na ntá tjejóntaxín iso sín fariseo a tjínkaon sín tsjanchia sín jie. La ntá kjuanchankíhi sín ch'án kixin:

—¿Á siín kjuachaxin sinchekitoheni jína ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'ín Jesús ntáchro ch'án kixin:

—Jnkójín tí jahará chontará ijnko kolélo chrókjuítsínkáya ijnko tòye tí yaon t'ok'éheni ¿á chrókjuíhyará chrókuakitsjetaónrá va tòye ní? ¹² Kjánchó tí chojni antsí má tjete sínkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

¹³ Méxra nixjehe ch'án tí ch'ín níhi a, ntáchro ch'án kixin:

—Tjéntoá tja —ichro ch'án.

A ntá tí ch'ín níhi tja kjuentoá tja ch'án la ó kjuixin kuitohe jína éxi tí ijnko tja ch'án xikaha. ¹⁴ Ntá tí sín fariseo kónínkaon sín k'uaxrjexín sín ntiha sákjuí sín la kjuenkayáxin sín nkexrí ts'oyán sín tí ch'ín Jesús.

Itén Dios senó chrónka kuente ch'ín Jesús

* 12:7 Oseas 6.6

15 **A** ntá ch'ín Jesús mé kónohe ch'án kixin xikaha tjenkayáxin sín la ntá sákjuíxin ch'án ntiha la itsjé sín chréhe sín ch'án. Kjuínchekitohe ch'án jína kaín tí sinníhi 16 la k'ueṭoan ch'án kixin tsochrónkahya sín noxín kixin nkexro tí jehe ch'án. 17 Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsintáchro ch'án xikihi:

18 Ntihi tjen tí nkexro ch'ena xra lá janhan mé kjuéyá ch'án, janhan tjuaha ch'án la chàna kixin itjen ch'án.

Tsotjaha ch'án tí nchakuenná

la jehe ch'án mé tsochrónka ch'án nkexrí sintakitoaxián ijíe chojni chjasintajni.

19 Tsonínkakuenhya ch'án chojni la chjinihya ts'óyako ch'án, la ko kohya nkexro tsinhin itén ch'an tí ntja.

20 Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe síhnhikoá.

Jehe ch'án naxa sich'e ch'án xra tsjixrakája tí yaon ts'etoan ch'án.

21 La kaín xín chojni chjasintajni mé tsitekaon sín tí jehe ch'án.†

Mé xikaha chrónka itén Dios ósé.

Tí sín fariseo mé ntáchro sín kixin ch'ín Tsochren t'etuenhen asén tí ch'ín Jesús (Mr. 3.19-30; Lc. 11.14-23; 12.10)

22 Ntá iso chojni sákjuíkohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. **A** ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án. 23 Ntá kaín xín chojni la chrakon sín la tjanhankíhi kichó sín ntáchro sín kixin:

—¿Á jehya xjeen David tíhi? —ichro sín.

24 Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuente ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

25 Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkójín gobierno jnkokoáhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoanxín sín, la ko kjaxin tí sín jnkokoá chjasin o tí sín jnkokoá nchia jnkokónhya tjenkayáxin sín la kjaxin xikaha ts'itjáyán sín. 26 **A** ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naxa chrók'ueṭoan. 27 Jahará ntáchrorá kixin janhan kuakítsjexián tí nchakuen tí jínahya kjuachaxin kuente ch'ín Beelzebú. **A** ntá tí chaxín xikaha la ntá ¿nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoxin sín kixin ntoáhya tjenkayáxinrá. 28 **A** ntá janhan mé kuakítsjexián tí nchakuen tí jínahya kjuachaxin kuente Nchakuen Dios la tíha mé chrókónoaxínrá kixin tí kjuachaxién Dios mé ó kui tí tjejorá.

29 '¿Nkexrí chrók'uixenhen ijnko nkexro ijnko ntoe ijnko ch'ín jiehe la chrókuakitsjehe ch'án tí nkehe chóna ch'án? Senó la chrókónteto ch'án kixin jína chrókueéhe sín ch'án.

30 'Tí nkexro titekakonhya tí janhan la mé nínkakonna sín. **A** ntá tí nkexro tjinkakonhya tí janhan mé t'inkákonhen tí xra it'a.

31 'Méxra xrxanka kixin Dios tsjakjín jnkójnko jie tjasin chojni la ko kaín nkehe jínahya nixja sín. **A** ntá tí t'ántaxínhin sín Nchakuen Dios la xitjahya tsjín ijíe sín. 32 La ko xrxanka kixin kaín nkehe t'ántaxínhínrá tí Xjeen Dios K'óna Chojni la tsjakjín Dios. **A** ntá tí ts'ántaxínhínrá Nchakuen Dios la ntá mé í tsjínhya tí ijará kjónté ntihi chjasintajni la ko kjónté tí chr'éxin.

† 12:21 12.18-21 Isaías 42.1-4

*Tí nta chrókjuatsəanxín sín tí to jína
(Lc. 6.43-45)*

³³ 'Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsəanxínni tí to a. ³⁴ Jahará tsík'axrjeníxinrá konche. ¿Nkexrí jína chróntáchrórá jahará tí jehya jínará? Tí nixja ir'vará la éxí ntáχρο asánrá mé nixja ir'vará. ³⁵ Ijnko chojni jína mé jína nixja kixin jína asén ch'án. A ntá ijnko chojni jínahya mé nixja tí nkehe jínahya kixin tí asén ch'án kjaxin jínahya. ³⁶ Ntá tjonkará kixin itsi tí yaon tsjixixín tió sinchekitoexín Dios ijie chojni ntá tsonohará kaín nkehe chjíní tsínixjará. ³⁷ Kixin tí nkehe nixjará tsjakoxin á kjuásinrá jie ní o náhí.

*Tí sín jehya jína tjanchehe sín ch'ín Jesús kixin tsjakoxin ch'án ijnko kjuaxroan
jie
(Mr. 8.12; Lc. 11.29-32)*

³⁸ Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáχρο sín kixin:

—Maestro, tjinkaonni chrók'uikonni chrókjuásian ijnko kjuaxroan náxrjón tsonoexínni kixin nkexro jaha —ichro sín.

³⁹ Ntá kjuátehe ch'ín Jesús ntáχρο ch'án kixin:

—Tí sín jínahya la ko tí sín kuítóhe Dios mé tjanchia sín chrókjuásian kjuaxroan náxrjón. Kjánchó tsjakoxinhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé. ⁴⁰ Éxí yóhe kjuák'e ch'ín Jonás iní yaon la iní tie nkaxenhen tsee koche jie mé xikaha tí Xjeen Dios K'óna Chojni tsjak'e nkaxenhen tòye tsoxravá iní yaon la iní tie. ⁴¹ A ntá tí yaon tsitoexín ijie chojni la ntá tí sín chjasin Nínive mé tsjanchia sín jie kixin tí sín tjejó jie, kixin tí sín chjasin Nínive mé kuítóhe sín ijie sín tió kuínhin sín itén Dios chrónka ch'ín Jonás. A ntá ijie itjén janhan la antsí má chonta kjuachaxin. A ntá tí ch'ín Jonás la kénhyó k'uéchóna ch'án kjuachaxin, kjánchó jahará kuítekákonhyará tí janhan. ⁴² Kjaxin tí yaon tsitoexín ijie chojni la tí tjan reina k'uetəoan kjuixin nó Sur mé tsjanchia tjan jie kixin tí sín tjejó ijie kixin jehe tjan kjuixin imá ikjín kixin chrókuinhin tjan tí kjuaxrexinkaon jína k'uékjako ch'ín Salomón. A ntá ijie itjén janhan la janhan antsí má nòna a ntá ch'ín Salomón la kénhyó k'uénohe ch'án.

*Tió tsokjan tí nchakuen tí jínahya
(Lc. 11.24-26)*

⁴³ 'A ntá ijnko nchakuen tí jínahya tsík'axrjexín ijnko chojni la mé ixri tí nonte xamá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe. ⁴⁴ La ntá kjuenkayáxin kixin: “Áxri tsokjan ntəna k'uaxrjéxian”, ichro. A ntá tió ikjan tí nchakuen la t'ikon éxí ijnko nchia kohya ninkexró la éxí ijnko chojni tsík'ánjón ntəe la náxrjón tsjehe tí nkaxenhen nchia. ⁴⁵ A ntá k'uíkon tí jínahya xikaha tjen nchia la ntá sákjuúkakjín í jnko yato nchakuen tí jínahya antsí má jínahya. A ntá kaín k'uixenhen tí ntiha. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen kaín tí sín siín ijie titekakonhya.

*Tí iné la ko kichó ch'ín Jesús
(Mr. 3.31-35; Lc. 8.19-21)*

⁴⁶ Ntá ch'ín Jesús naxa tjenixjehe ch'án chojni la ntá xrinahya kjuíji iné ch'án la ko kichó ch'án. Ntá kuítóhe sín ntója ó la tjinkaon sín chrónixjehe sín ch'ín Jesús. ⁴⁷ Ntá ijnko nkexro ntiha sákjuúchénka tí ch'ín Jesús, ntáχρο ch'án kixin:

—Iná la ko kichua tjejó sín ntója la tjinkaon sín chrónixjaha sín tí jaha.

⁴⁸ A ntá ch'ín Jesús kjuátehe ch'án nixjehe ch'án tí nkexro chrónka a, ntáchro ch'án kixin:

—¿Xá nkexro tí naná la ko nkexro tí kichiná? —ichro ch'án.

⁴⁹ Ntá kjuakoxin tja ch'án tí sín xriko ch'án la ntáchro ch'án kixin:

—Tí sín i la mé naná la ko kichiná. ⁵⁰ Tí jnkojín sín i nchexiteyá nkehe tjinkaon T'aná tjen nkaya nkajní na mé táha mé naná la ko kichiná mé xikaha t'íkuan tí jehe sín —ichro ch'án.

13

Ch'ín Jesús mé kjuíncheyóexin ch'án éxi jnko chojni t'enka nontee

(Mr. 4.1-9; Lc. 8.4-8)

¹ A ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjaxin ch'án chrínta ntayaon. ² Ntá k'uixikóchjina nchónhya chojni tí tjen ch'án la ntá jehe ch'án mé k'uit'ótjen ch'án jnko ntabarco kjuák'etjaxin ch'án la kaín sín na tí chrínta ntá ó kuítóhe sín. ³ A ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxi jnko ch'ín sákjuík'enka nontee ⁴ mé xikaha sákjuík'enka ch'án iso tí noatriga a. Ntá iso noa la tsík'ánótjen ntja ntá ikui koxroxé k'uínka va noa. ⁵ A ntá iso noa na mé k'uitji chrík'á xró tí kohya itsjé nche ntá tjoka k'uayan kixin ntaha tjínhya chóntha nche. ⁶ Ntá tí kjujton yaon la ntá tí ka la xamá kixin ninkahya chóntha nuèe. ⁷ A ntá í so noa kjuítsínkak'á tí siín kach'í na k'uánkí tí kach'í a na ntá í xitjahya k'uánkí tí noatriga a kixin tsíkjate tí kach'í. ⁸ A ntá tí noa tsík'itjí nche jína na ntá tió k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta. ⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuènté kjuíncheyóexin ch'ín Jesús

(Mr. 4.10-12; Lc. 8.9-10)

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuènté xikaha nixjehé sín ncheyóexián? —ichro sín.

¹¹ A ntá ch'ín Jesús kjuátehe ch'án ntáchro ch'án kixin:

—Jahará la Dios me tsjinkitsa tsonohará tí nkehe noehya í so chojni kuènte tí kjuachaxin kuènte Dios. A ntá tí jehe sín a la náhi. ¹² Tí nkexro ó chóntha nkehe la antsí ts'áyéhe sín kixin antsí má tsochóntha sín. A ntá tí nkexro chónthaha la kjónté tí ntsí chóntha sín la ts'axrjehe sín. ¹³ Mé xikaha kjuintayóaxuán kjuákuaxian sín kixin jehe sín t'ikon sín la ntá kjónté tjátsoanhya sín la tjejótinhin sín a ntá kjónté kienxínhya sín. ¹⁴ Mé xikaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xikihi:

Jehe sín tsinhin sín a ntá tsienxínhya sín

la ts'ikon sín la tsjatsqanhya sín tí nkehe ts'ikon sín.

¹⁵ Imá icha asén tí sín chjasin i.

Chóntha sín ntatsjon kjánchó ts'íkjehe

la chóntha sín ikon sín kjánchó t'ikonhya sín,

kixin chrók'uikonhya sín

la chrókuienhya sín la ko

xitjahya kienxín sín,

kixin í tjinkakonhya sín chrókjan sín kixin janhan mé chrókjuintakitoha sín jína.*

* 13:15 13.14-15 Isaías 6.9-10

Mé xikaha tsíkjin ch'ín Isaías.

¹⁶ Ntá ntáchro ch'ín Jesús inaá kixin:

—A ntá jahará la imá náxrxjón tjejorá kixin t'ikonrá la ko tinhínrá. ¹⁷ Chaxín xrxjanka kixin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uíkonhya sín la ko k'uétjinkaon sín chrókuinhin sín tí nkehe tjejotinhínrá la ntá kuíenya sín.

*Ch'ín Jesús chrónkaxín nkexrí t'axrxjén tí nkexro sákjuík'enka
(Mr. 4.13-20; Lc. 8.11-15)*

¹⁸ 'Tinhínrá nkexrí t'axrxjén tí ch'ín sákjuík'enka nontee. ¹⁹ Tí nkexro kuínhin tí itén Dios chrónka nkexrí tí kjuachaxin kuènte Dios la ntá kíenxínhya sín la yóhe tí noa xènjintja ntja. Ó kui ch'ín Tsochren ntá kjuínchek'itjáyan ch'án tí itan jína kuínhin sín. ²⁰ A ntá tí tje kjuítsínkak'á xra la mé t'axrxjén kixin tí chojni kuínhin itén Dios la tjoka kóxrxjínhin sín la kuínkáchónki sín. ²¹ Kjánchó ninkahya chóna nuè na ntá itsi tí kjuaxróxinhya o tsochónkíhi sín chojni chrók'óyán sín kixin tí itén Dios kuítekaon sín, a ntá tsítóhe sín tí tinkáchónki sín Dios. ²² A ntá tí tje kjuítsínkak'á kach'í na mé éxí yóhe ijnko chojni kuínhin itan jína kjánchó tjitoxíenya ntje sín kixin tóxakonhen sín tí xra chóna sín chjasintajni la ko tjinkaon sín tsochóna sín itsjé nkehe. Kaín tíha mé t'inkákonhen tí itén Dios kuínhin sín la ntá xikaha xitjahya sich'ehe sín xra Dios. ²³ A ntá tí tje k'uínka tí nonte chóna nche jína na mé yóhe tí chojni kuínhin tí itén Dios na ko kíenxín sín la ntá xikaha jína ch'ehe sín Dios xra. Na iso sín la yóhe éxí tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xikaha chrónka ch'ín Jesús.

Ch'ín Jesús kjuíncheyóexin ch'án éxí tí kajnto k'uánkíkué tí noatrigó

²⁴ Ntá ch'ín Jesús kjuíncheyóexin ch'án inaá ntáchro ch'án kixin:

—Tí kjuachaxin kuènte Dios mé yóhe ijnko ch'ín k'uenká noa jína nontee ch'án. ²⁵ A ntá tió k'uéjójua kaín sín ntá ikui ijnko nkexro nínkakonhen sín la k'uenká ch'án kajnto chrík'á tí noa a la ntá sákjuí ch'án. ²⁶ La ntá tí noatrigó k'uánkí la ntá ó sítintaa la ntá ntiha kjaxin kónoxíxin k'uánkí tí kajnto. ²⁷ Ntá tí sín ch'e xra mé sákjuínixjehe sín tí lámoe sín la ntáchro sín kixin: “Tí noa k'uènká nontaa la noa jína tíha. A ntá ¿nketí kjuixín tí kajnto tsík'ayan?” ichro sín kjuanchankí sín. ²⁸ Ntá kjuátehe tí inché tí nonte ntáchro kixin: “Kjá ijnko nkexro nínkakonna mé kjuích'e xikaha”, ichro ch'án. Ntá tí sín ch'e xra mé kjuanchankí sín kixin: “¿Á tjinkávan kixin sátsjini tsakitsjenkíni tí kajnto?” ichro sín. ²⁹ A ntá kjuátehe ch'án kixin: “Náhí. Tí sátsjia tsakítsjenkiá tí kajnto la kjá chóna tí katrigo ts'axrjenkí. ³⁰ Íchá jína títóhé kixin ts'ánkíkué tsjixin tsotjájiani. Ntá ts'etuehenni tí sín tsotjá kixin senó ts'ejo sín tí kajnto la sinchenteto sín kixin tsoche la ntá chr'éxin tsotjá sín tí noatrigó ntá ts'inkachjina tí noa a” —mé xikaha chrónka ch'ín Jesús.

*Ch'ín Jesús kjuíncheyóexin ch'án éxí tí xroan ijnko ntayoa it'in mostaza
(Mr. 4.30-32; Lc. 13.18-19)*

³¹ Ntá ch'ín Jesús kjaxin kjuíncheyóexin inaá ntáchro ch'án kixin:

—Tí kjuachaxin kuènte Dios mé éxí yóhe ijnko tje mostaza k'uenká ijnko chojni nontee ch'án. ³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jié la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

Ch'ín Jesús kjuíncheyóexin ch'án éxí tí xroan t'ánkíxin nioṭja
(Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kixin:
—Tí kjuachaxin kuènte Dios mé éxí yóhe tí xroan t'ánkíxin nioṭja.
Kjuinkíkjanxin ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesús tí nixja ch'án
(Mr. 4.33-34)

³⁴ Ch'ín Jesús kjuakohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókuíncheyóexin ch'án. ³⁵ Mé xikaha kjuako ch'án kixin tsoxiteyá tí nkehe tsíchrónka ijnko nkexro k'uéchrónka itén Dios ntáchro xikihi:

Mé tsoníxjaxian sintayóaxión nkehe
tsontáxrjan tí nkehe ninkexró noehya desde k'óna chjasintajni.†

Ch'ín Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjehe ch'ín Jesús tí sín a ntá sákjuí sín kaín sín la jehe ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kixin:

—Chronkaxián nkexrí t'axrjexín tí kajnto k'uánkíkué tí noa trigo tí nonte —ichro sín.

³⁷ Ntá ch'ín Jesús kjuátehe ch'án ntáchro ch'án kixin:

—Tí nkexro k'uenkā tí noa jína mé tí Xjeen Dios K'óna Chojni. ³⁸ A ntá tí nonte mé chjasintajni tíha. Tí noa jína mé éxí yóhe tí chojni kuákja kjuachaxin kuènte Dios. La ntá tí kajnto mé éxí yóhe tí chojni t'etuenhen Tsochren. ³⁹ Tí nkexro nínkakhenni mé k'uenkā tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel. ⁴⁰ Éxí xrenájín tí kajnto la tsoche mé xikaha tsonhen tió tsjixixín tsjeje chjasintajni. ⁴¹ Tí Xjeen Dios K'óna Chojni mé ts'etuenhen tí sín ángel kixin tsakitsjexín sín tí tjet'etoan Dios kaín tí chojni tjachroe í so chojni la ko tí sín ch'e tí nkehe jínahya. ⁴² La tsochr'án sín sátsji sín tí tja síin xrohi la ntaha tsotsjánka sín la sinetaón neno sín. ⁴³ Ntá kaín xín tí sín nchexiteyá tí nkehe tjinkaon Dios mé éxí tí yaon xikaha tsotsjehe sín tí tjet'etoan It'eni Dios. Tí nkexro tjinkaon chrókuinhin la chrókuinhin —mé xikaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

⁴⁴ Tí kjuachaxin kuènte Dios mé éxí yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'emā ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

Ch'ín Jesús kjuíncheyóexin éxí ijnko xro perla tjete

⁴⁵ Ntá ntáchro ch'ín Jesús kixin:
—Kjaxin tí kjuachaxin kuènte Dios mé éxí yóhe ijnko nkexro tjeyá xro perla náxrjón. ⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxí ijnko nchísén tséya sín koche

⁴⁷ Ntáchro ch'ín Jesús kixin:
—Kjaxin tí kjuachaxin kuènte Dios mé éxí yóhe ijnko nchísén tséya chojni koche t'enkí sín tí ntayaon la ntá tsotsé nchónhya clase koche. ⁴⁸ Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntā la ntaha ts'ejótjaxin sín la tsíchéhe sín koche jína la t'enkā sín ntaxra. La ntá tí

† 13:35 Salmo 78.2

jehya koche jína la it'e sín. ⁴⁹ Mé xíkaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsitohe tí chojni jína. ⁵⁰ La tsochr'án sín tí sín jínahya sátsji sín tí tjen tja tí siín xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjete ntaxin

⁵¹ Ntá ch'ín Jesús mé kjuanchankí ch'án kixin:

—¿Á tiénxinrá jahará kaín tí nkehe ní? —ichro ch'án.

Ntá kjuátehe sín kixin:

—Jeén, Ìnchéni, ó kíenxínni —ichro sín.

⁵² Ntá ntáchro ch'ín Jesús kixin:

—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxí yóhe injnko ìnché nchia chóna itsjé nkehe tjete tjejóchjina la ntá nohe ch'án tsakitsje tí nkehe tjete nixin la tí nkehe tjete ntaxin —mé xíkaha ichro ch'ín Jesús.

Ch'ín Jesús kjuák'e ch'án chjasin Nazaret

(Mr. 6.1-6; Lc. 4.16-30)

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuíxin ch'án ntiha. ⁵⁴ La ntá sákjuí ch'án chjasén ch'án Nazaret. Ntaha kjuankíxin kjuakoxin ch'án tí nínko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín i la, ¿nketí tsíxrakohe ch'án kixin imá nohe ch'án la ko nkexrí kixin tjasin ch'án kjuaxroan? ⁵⁵ ¿Á jehya tíhi xjeen tí ch'ín carpintero la ìné ch'án mé María? La ko chóxinni tí kíchó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. ⁵⁶ Kjaxin tí sín chjin kíchó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xíkaha chrohya sín tsitekakonhen sín ch'án. Ntá ntáchro ch'ín Jesús kixin:

—Nkuíxín tjikosáyehe chojni injnko nkexro chrónka itén Dios. A ntá tí sín chjasén ch'án la ko kaín tí sín ntøe ch'án mé tjikosáyehya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kixin kuítekakuenhya sín ch'án.

14

Ik'uén ch'ín Juan Bautista

(Mr. 6.14-29; Lc. 9.7-9)

¹ A ntá tí yaon a ntá tí ch'ín Herodes mé tí nkexro k'uetøan tí estado Galilea mé kuínhin ch'án nkexrí ichro ch'ín Jesús. ² Ntá nixjehe ch'án tí sín ch'ehe ch'án xra, ntáchro ch'án kixin:

—Kjá tíha la ch'ín Juan Bautista ó tsíxechón ch'án inaá. Mé xíkaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etøan kixin ch'ín Juan tsontetoxín cadena la ko tsjak'echjina ch'án. Mé xíkaha kjuích'e ch'án kixin xíkaha tsíkjanhia tí tjan Herodías, tí tjan ichjién tí ch'ín Felipe, kíchó ch'án. ⁴ Tí ch'ín Juan tsíntáche ch'án tí ch'ín Herodes kixin:

—Jehya jína tsochonta tí ichjién tí kíchuá —mé xíkaha tsíntáchro ch'án.

⁵ Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kixin kaín sín ntáchro sín kixin ch'ín Juan mé nixja itén Dios, ichro sín. ⁶ A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehé ch'án. A ntá imá kóxrjínhin ch'ín Herodes nkexrí ité tjan. ⁷ La ntá nixjehe ch'án tjan k'uákjenxin ch'án ihnié Dios ntáchro ch'án kixin tsochjéhe ch'án tjan kjónté jnkojín nkehe

tsjanchia tjan, ichro ch'án. ⁸ Ntá jehe tjan la senó kjuíkjanchankíhi tjan ìné tjan ntá ìné tjan tsíntachro kíxin ikja ch'ín Juan mé tsjanchia tjan ntá jehe tjan mé nixjehe tjan tí ch'ín Herodes ínaá ntáchro tjan kíxin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kíxin xíkaha kjuanchia tjan. Na ntá kaín tí sín siín ntiha ó kuínhin sín kíxin kjuínchenohe ch'án Dios kíxin ichrén nkehe tsjanchia tjan tsjanjon ch'án. ¹⁰ Méxra k'uetóan ch'án kíxin ts'óchrínjin sín ikja ch'ín Juan tí tjen ch'án ntóechiso. ¹¹ Ntá kjuíkáo sín kjuíkoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuíkénhen tjan ìné tjan.

¹² Ntá tí sín k'uék'ajiko ch'án a mé sákjuíkakitsje sín tí cuérpóé ch'án la sákjuíkává sín. La ntá chr'éxin la sákjuí sín sákjuíchénka sín tí ch'ín Jesús kíxin xíkaha tsíkónhen ntiha.

Ch'ín Jesús kjuínchekjine ch'án in'ó mil chojni

(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'ín Jesús kíxin xíkaha tsíkónhen la ntá jehó ch'án sákjuí ch'án k'uit'ótjen ch'án ijnko ntabárcó la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjen ch'án la ntá k'uaxrjexín sín chjasén sín la ntá totó sín sákjuíchréhe sín ch'án. ¹⁴ A ntá k'uaxrjexín ch'ín Jesús tí ntabárcó a, a ntá k'uíkon ch'án kíxin nchónhya chojni siín ntiha ntá kuíkonóehé ch'án tí jehe sín na ntá kjuínchekitóhe ch'án jína tí sín níhi tsíkjkáo sín. ¹⁵ La ntá ó k'uíxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kíxin:

—Ntá ó kóntó la kohya nkexro tjejó ntihi. Na ntá jaha chrókuétuénhen sín kíxin sátsji sín tí chjasin ntsí chjinaxón tsjik'ena sín nkehe sine sín —ichro sín.

¹⁶ Ntá kjuátehe ch'ín Jesús, ntáchro ch'án kíxin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷ Ntá kjuátehe sín kíxin:

—Chóntahyani itsjé nkehe. Jehó in'ó niotjā la ko yaá koche chóntani —ichro sín.

¹⁸ Ntá ntáchro ch'ín Jesús kíxin:

—Xrakoanará tí nkehe méhe ntihi —ichro ch'án.

¹⁹ Ntá k'uetóan ch'án kíxin kaín xín sín ts'ixitjāxin sín tí chrítaón kaxi a. Ntá kuákja ch'án tí in'ó niotjā la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'ó ch'án tí niotjā chjéhe ch'án tí sín k'uájiko ch'án la jehe sín mé k'óxikayéhe sín chjéhe sín tí chojni siín a. ²⁰ Ntá kaín sín kjuixin kjóne sín kókjehe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxèhe sín la mé teyó ntaxra kaón. ²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjāin tí sín a.

Ch'ín Jesús mé tjetjitaón ch'án nta

(Mr. 6.45-52; Jn. 6.16-21)

²² Ntá kjuixin tíha ntá k'uetuénhen ch'ín Jesús tí sín k'uájiko ch'án kíxin ts'it'ótjen sín tí ntabárcó ts'atòye sín í jnko nánko ntayaon. Ntá jehe ch'án naxá kuitóhe ch'án nixjehe ch'án tí sín siín ntiha. ²³ Ntá kjuixin xíkayéhe sín na ntá jehó ch'án chriin ch'án ijnko jnā tsonixjehe ch'án It'é ch'án tjen nkaya nkajní. Na ntá ó k'uíxin tie la jehó ch'ín Jesús itjen ch'án ntiha. ²⁴ La ntá tí ntabárcó na mé tjenkátaón ntā jnkosiné ntayaon. Ntá imá chjéhe ntā tí ntabárcó kíxin tí xrintó la chjéhe la xitjahya sátsji ntabárcó. ²⁵ Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá

kóchjinehe ch'án tí tjejó sín. ²⁶ Na ntá tí sín k'uájiko ch'án mé k'uíkon sín kixin tjetjitaón ch'án tí ntayaon na ntá imá chrakon sín la k'óyako sín. Ntáchro sín kixin kjuacha sín ichro sín, chrakon sín.

²⁷ Na ntá nixjehe ch'ín Jesús tí jehe sín ntá ntáchro ch'án kixin:

—Nchefuérte asánrá, chrakonhyará. Janhan kjuihá —ichro ch'án.

²⁸ Ntá ch'ín Pedro mé nixjehe ch'án Ìnchéni, ntáchro ch'án kixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí nta tsjjini tí tjen jaha —ichro ch'án.

²⁹ Ntá ntáchro ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabárcō la kjuankixin ch'án tjetjitaón ch'án nta sákjuíchréhe ch'án tí tjen ch'ín Jesús. ³⁰ A ntá xrínahya ntá kónohe ch'án kixin imá chjéhe xríntō chrítaón nta, ntá chrakon ch'án la kjuankixin tinkák'aniánkí ch'án nta, ntá k'uèya ch'án ntáchro ch'án kixin:

—Ìnchéni, nchekaáni —ichro ch'án.

³¹ A ntá tuénxín ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuènté títekákonhya? —ichro ch'án.

³² Na ntá tió k'uit'ótjen sín yóí sín tí ntabárcō la ntá tuénxín k'uíxratá tí xríntō.

³³ Ntá kaín xín tí sín tjejóxenhen tí ntabárcō mé k'uéjóxin tochr'in sín nkayakon ch'ín Jesús la ntáchro sín kixin:

—Jaha mé chaxín Xjeen Dios —ichro sín.

Ch'ín Jesús mé kjuínchekitōhe jína tí chojni níhi nonte Genesaret

(Mr. 6.53-56)

³⁴ Ntá tió k'uátòye sín tí ntayaon ntá kjuíji sín tí nonte Genesaret. ³⁵ Ntá tí sín siín ntiha tjoka kjuátsoan sín kixin jehe ch'ín Jesús tíha, ntá kuínhin tí sín chjasin chjinaxón ntiha la ntá kuíkao sín kaín tí sín níhi tí tjen ch'án. ³⁶ Na ntá chrónóehe sín ch'án kixin chrókuítōhe ch'án kixin kjónté chrínta iké ch'án chrókuákóxin sín, la ntá kaín tí sín kuákóxin iké ch'án mé kuítōhe sín jína.

15

Tí jie tjasin chojni

(Mr. 7.1-23)

¹ A ntá chjasin Jerusalén kjuixín iso sín fariseo la ko iso tí sín maestro tjako tí ley la kjuíchréhe sín tí ch'ín Jesús. Ntá kjuanchankíhi sín ch'án kixin:

² —¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntihya sín itja sín ntá kjónté ine sín? —ichro tí sín fariseo a.

³ A ntá kjuanchankí ch'ín Jesús kixin:

—¿Nkekuènté jahará kjaxin títekákonhyará nkehe tsík'etoan Dios? A ntá jahará tjinkáonrá naxa chrókuinkachónkirá tí nkehe kuinkáchónki tí sín tsík'axrjeníxinrá. ⁴ Ntáchro Dios kixin: “Tsochontehérá kjuasáya it'ará la ko ìnará”, la ko ntáchro ch'án kixin: “Tí nkexro t'ántaxínhin it'é la ko ìné la chrók'uen.”* ⁵ A ntá jahará tsíntáchrórá kixin ó nchoxon kixin ijnko nkexro tsochénta it'é la ko ìné kixin: “It'éni, ìnéni, chrokjuahya tsjinkítsani tí jaha kixin kaín nkehe chóntani la ó chjéheni Dios.” ⁶ A ntá jnkojín nkexro tsontáchro ch'án tíhi ntá í t'ichjánxinhya tsjinkítsa tí it'é la ko tí ìné, mé xíkaha tsixrorá. Mé xíkaha jahará kuítōhérá tí nkehe k'uetōan Dios kixin tjinkáonrá chrókjuich'erá éxí kjuích'e tí sín tsík'axrjeníxinrá. ⁷ Jahará la jehya jnkojínxón

* 15:4 Éxodo 20.12; 21.17; Levítico 20.9

tjenkayáxinrá. Ntoá tsíntáchro tí ch'ín Isaías, tí nkexro k'uéchrónka itén Dios ósé. Mé chrónka ch'án kixin nkexrí tjejorá la xíkaha tsíkjin ch'án kixin:

⁸ Tí chojni tí chjasin i ir'va ó xraxinkakonxín sín tí janhan a ntá tí asén sín la ikjín kuítóhe sín tí janhan.

⁹ Méxra ó chónko tóchjina sín xraxinkaon sín tí janhan kixin tí nkehe tjako sín la tí nkehe tsík'etōan chojni ó.† Mé xíkaha ichro itén Dios.

¹⁰ Ntá k'uíyehē ch'ín Jesús tí chojni ínaá la ntáchro ch'án kixin:

—Chrókuinhínrá la ko chrókuíénxinrá. ¹¹ Kaín nkehe ine chojni la ó nchoxon, jehya jie. Tí jie la tí nkehe t'axrjexín ir'va chojni —mé xíkaha ichro ch'ín Jesús.

¹² A ntá tí sín k'uájiko ch'ín Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

¹³ Ntá kjuátehe ch'án ntáchro ch'án kixin:

—Kaín tí ka jehya T'aná tjen nkaya nkajní k'uēnkaxin la mé ts'axrjenkixin nuèe. ¹⁴ Nté títōhé sín. Tí jehe sín la ntakótán sín la t'etueñhen sín í so sín ntakótán. A ntá tió ijnko chojni ntakótán tjitaón ntia la ntá yóí sín ts'anótjenyá sín ichrén tōye —ichro ch'án.

¹⁵ Ntá ntáchro ch'ín Pedro kixin:

—Chrónka nkexrí t'axrjexín tíha —ichro ch'án.

¹⁶ Ntá kjuátehe ch'ín Jesús ntáchro ch'án kixin:

—¿Á kjaxinrá jahará tiénxinhyará? ¹⁷ ¿Á tiénxinhyará kixin kaín tí nkehe ineni na sátsi nkaya tseeni na ko xík'axrjexín tí cuérpoeni ínaá? ¹⁸ A ntá tí nkehe t'axrjexín ir'va chojni la t'axrjeníxin asén chojni la tíha la mé tí jie tjasixín chojni. ¹⁹ Kaín tíha mé t'axrjeníxin asén chojni, mé tí jínahya tjenkayáxin sín la ko tí t'óyán kichó sín la ko tí tjahehe kichó sín la ko tí chóna sín í jnko chojni chjin ókjé la ko teé sín la ko tí kjuach'ia la ko tí t'ántaxínhin kichó sín. ²⁰ Tí nkehe a mé tjasixín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xíkaha ichro ch'ín Jesús.

Ijnko tjan jehya sín israelita mé kuinkáchónki tí ch'ín Jesús

(Mr. 7.24-30)

²¹ Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. ²² Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kixin:

—Ìnchéni, Xjeen David, tikonóehéni kixin tí xjeenni chjin la mé níhi tjan chóna tjan ijnko nchakuen tí jínahya —ichro ti tjan a.

²³ A ntá ch'ín Jesús la ninkehó kjuáteehya ch'án. A ntá tí sín k'uájiko ch'án na kóchjina sín la ntáche sín ch'án kixin:

—Tétueñhén tjan sátsi tjan kixin tinkák'óyako tjan chréhe tjan tí jeheni —ichro sín.

²⁴ Ntá ntáchro ch'ín Jesús kixin:

—Dios mé ichr'ánna tsjéyá jehó tí kolélo kjuíchroe kuènte nación Israel —ichro ch'án.

²⁵ A ntá tí tjan a kóchjina la kjuák'exín toch'in tjan nkayakon tí ch'ín Jesús la ntáchro tjan kixin:

—Ìnchéni, tjínkítsani —ichro tjan.

²⁶ A ntá ch'ín Jesús kjuátehe ch'án ntáchro ch'án kixin:

—Jehya tí jína chrókuakitsjahā niotjā tí xjan ntá chrótjahā koniā chrókjóne va —ichro ch'án.

† 15:9 15.8-9 Isaías 29.13

²⁷ A ntá jehe tjan la ntáchro tjan kíxin:

—Chaxín xikaha, ìnchéni. Kjánchó kjónté tí koniã na tí nkehe tsjixènjinnkí mesa kuènte ìnché la ine va —ichro tjan.

²⁸ Ntá ntáchro ch'ín Jesús kíxin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jína.

Ch'ín Jesús mé kjuínchekitohe jína nchónhya chojni níhi

²⁹ Ntá ch'ín Jesús mé sákjuíxin ch'án ntiha la kjuíji ch'án chrínta ntayaon Galilea. Ntá chrín ch'án ijnko jna la ntiha kjuák'etjaxín ch'án. ³⁰ Ntá kójnkotsé itsjé chojni tí tjen ch'án la kjuíkao sín tí sinníhi, mé tí sín xitjahya tji la ko tí sín t'ikonhya la ko tí sín nixjahya la ko tí sín tsíxénká la kaín xín tí í so sinníhi. K'uejo sín tí sinníhi toté tí ch'ín Jesús kíxin jehe ch'án mé sinchekitohe ch'án sín jína. ³¹ Kaín chojni la imá chrakon sín kíxin k'uíkon sín kíxin tí sín k'uénixjahya la ó nixja sín la tí sín tsíxénká la tsíkitóhe sín jína la tí sín xitjahya tji la ó tji sín la ko tí sín k'uék'ikonhya la ó t'ikon sín. Méxra kjuanchehe sín kjuasáyé tí Dios kuènte tí sín Israel.

Ch'ín Jesús mé kjuínchekjine noó mil chojni

(Mr. 8.1-10)

³² Ntá k'uíyehé ch'ín Jesús tí sín k'uájiko ch'án la ntáchro ch'án kíxin:

—Imá tikonóaha kaín tí chojni kíxin ó ní yaon tjejókoni sín ntá kjuèhe sín nkehe sine sín. Tjinkakonhya chrókuétuanhan sín sáchrókjui sín ntóe sín kíxin naxa nehya sín la ntia ó tsotienxín sín kjinta —ichro ch'án.

³³ Ntá ntáchro tí sín k'uájiko ch'án kíxin:

—Ntá jaha la ó noha kíxin nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'an kíxin:

—¿Nkekjaín niotja chontará? —ichro ch'án.

Ntá ntáchro sín kíxin:

—Yato niotja chóntani la ko iso koche ntsíntí —ichro sín.

³⁵ Ntá ch'ín Jesús k'uetóan ch'án kíxin kaín xín sín ts'ixitjaxín sín nonte, ichro ch'án. ³⁶ Ntá kuákja ch'án tí yato niotja la ko tí koche ntsíntí la kjuanchehe ch'án kjuasáyé Dios. Ntá kóchrít'o ch'án tí niotja a la ntá k'uetuènen ch'án tí sín k'uájiko ch'án kíxin ts'óxíkayehé sín tí niotja la ko tí koche kaín xín tí sín siín a, sine sín. ³⁷ Na mé kaín xín sín kjóne sín na kókjehe sín ntá kjuenájín sín yato ntaxra tot'o tí nkehe naxa tsíxehe. ³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a. ³⁹ Ntá ch'ín Jesús mé nixjehe ch'án sín sákjuí sín la ntá k'uit'ótjen ch'án ntabárcó la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxín sín ch'án la kjuanchehe sín ch'án kíxin chrókjuakoxín ch'án ijnko kjuaxroan kíxin á chaxín jehe ch'án tsíkixín ch'án tí tjen Dios. ² A ntá ch'ín Jesús na kjuátehe ch'án, ntáchro ch'án kíxin:

—Jahará ntáchrórá kíxin ijie ntá kónjín ó tsi ijnko yaon jína kíxin kjátse nkajní. ³ La ntá nchítjen ntáchrórá kíxin ijie la náxrjónhya kíxin kjátse nkajní la tjenkáya tjuí. Méxra jahará ntoáhya tjenkáyaxinrá. Ó nohará tjátsoanrá tí nkajní, a ntá tjátsoanhyará tí kjuaxroan sítónhen jie. ⁴ Tí sín jínahya la tí sín

titekakonhya la tjanchia sín ijnko kjuaxroan jíé. A ntá ts'ikonhyará í jnko kjuaxroan, jehó tí kjuaxroan kuènte ch'ín Jonás mé ts'ikonrá —mé xíkaha ichro ch'ín Jesús.

Ntá kuitohe ch'án sín la sákjuí ch'án.

Ch'ín Jesús ntáchro kixin chrókuitekakonhya sín tí nkehe tjako tí sín fariseo (Mr. 8.14-21)

⁵ Ntá tí sín k'uájiko ch'ín Jesús mé k'uátòye sín ntayaon la ntá k'uitjáyenhen sín tsíkjkohya sín niotja. ⁶ Ntá ntáchro ch'ín Jesús kixin:

—Chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kíchó sín ntachro sín kixin:

—Mé xíkaha ichro ch'án kixin tsíkjkohyani niotja —ichro sín.

⁸ Ntá kónohe ch'ín Jesús kixin nkehe tí kjo sín kíchó sín, ntá ntáchro ch'án kixin:

—¿Nkekuènté tjórá kixin chontahyará niotja? Jahará la intsíkoá tinkachónkirá tí janhan. ⁹ Jahará zá naxa tiénxinhyará la ko á xráxinkákonhyará tí in'ó niotja k'óxikayeheni kjóne tí in'ó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe? ¹⁰ La ko zá xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe? ¹¹ A ntá ¿nkekuènté kixin kuiénxinhyará kixin janhan la jehya kuènte niotja tjénixja tió ntáxrjan kixin chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo? —mé xíkaha ichro ch'ín Jesús.

¹² Na ntá kuiénxín sín kixin nixjahya ch'án kuènte tí xroan t'ánkíxin niotja. Náhí. Tjenixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

Chrónka ch'ín Pedro kixin ch'ín Jesús mé tí nkexro Cristo (Mr. 8.27-30; Lc. 9.18-21)

¹³ Kjuíji ch'ín Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elías, ichro sín. A ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'ín Jesús kixin:

—¿A ntá jahará nkechorá kixin nkexro tí janhan? —ichro ch'án.

¹⁶ A ntá ch'ín Simón Pedro kjuátehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'ín Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha. ¹⁸ Méxra ntáxrjan kixin jaha mé Pedro mé t'axrjexín kixin ijnko xro la chrítaón tí xro mé sit'ána nínko la kjónté tí kjuachaxin kuènte kjuach'én la tsjachahya sinchek'itjáyán. ¹⁹ Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntíhi chjasintajni la kjaxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntíhi chjasintajni la ntá kjaxin nkaya nkajní siín kjuachaxin.

²⁰ Ntá ch'ín Jesús mé k'uetuenhen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

*Ch'ín Jesús chrónka ch'án kixin its'en ch'án
(Mr. 8.31—9.1; Lc. 9.22-27)*

²¹ Ntá ch'ín Jesús kjuankíxin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etoan kuènte nínko la tí sín ncha'tá tjetooan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyan sín ch'án kjánchó tí nixin yaon mé tsoxechón ch'án inaá. ²² Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehe ch'án ntácho ch'án kixin:

—Kjá Dios tsjanjonhya kjuachaxin xikaha tsonhan Inchéni kixin jaha la xitjahya tsjasóte xikaha —ichro ch'ín Pedro.

²³ A ntá ch'ín Jesús mé kuinkátjá ch'án la nixjehe ch'án tí ch'ín Pedro, ntácho ch'án kixin:

—Sátjia ntáha, Sátanas. Tjiatéhya tí jaha tí nkehe tsonna. Jaha chrók'uínkakohén tí nkehe tjinkaon Dios. Jaha tjenkayáxinhya éxi tjinkaon Dios. Náhi. Tjenkayáxian éxi tjenkayáxin chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntácho ch'án kixin:

—Jnkójnra tjinkaónra tsochréhéra tí janhan la t'ichjánxin tsitohéra kaín tí nkehe tjaké asánra, ntá tsámára tí ntacruz kuéntára, a ntá tsochréhéra tí janhan. ²⁵ A ntá tí nkexro tjinkaon jehó sinchekaá asén la ts'itjáyan. A ntá tí nkexro chrókjuinçek'itjáyanxín asén kixin tinkáchónki sín tí janhan la tsaá. ²⁶ ¿A ntá nkehe tsonhen tí chrókjuacha ijnko chojni chróchónka kaín nkehe siín chjasintajni a ntá tí kjuachón chrókjuinçek'itjáyan? ¿Nkehe chrókjuenka chojni kixin chróchónka tí kjuachón? ²⁷ Tí Xjeen Dios K'óna Chojni tsikao ch'án tí kjuachaxin jié kuènte It'é ch'án tjen nkaya nkajni la kaín tí sín ángel tsikao ch'án na ntá tsjenkehe ch'án jnkójnko chojni nkexrí tí xra kjuich'e jnkójnko tí jehe sín. ²⁸ Chaxín xrjanka kixin isorá tjejorá ntihi la naxa ts'ényhará naxa ts'ikonjiará kixin nkexrí tí kjuachaxin tsochónka tí Xjeen Dios K'óna Chojni tí tsikao ch'án kjuachaxin jié —ichro ch'ín Jesús.

17

*Ch'ín Jesús mé k'uixitóxin nkexrí tsjehe ch'án
(Mr. 9.2-13; Lc. 9.28-36)*

¹ Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jna imá noi. ² Ntá ntiha tjejó sín ntá xrínahya k'uíkon sín kixin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjákini tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan. ³ Na ntá xrínahya k'uíkon sín itjen ch'ín Moisés la ko tí ch'ín Elías tjejótjo sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kixin:

—Inchéni, jina kixin tjejóni ntihi. Tí tjinkávan la chrókjuich'énnani iní nchia la mé ijnko kuénta jaha la ijnko kuènte ch'ín Moisés la í jnko kuènte ch'ín Elías —ichro ch'án.

⁵ Ntá naxa tjenixja ch'ín Pedro na ntá xrínahya ikui ijnko tjuí imá t'inkaséyan kjuák'etja chrítaón tí jna tjejó sín. Ntá xrínahya chríkjan tí tjuí kuínhin sín itén ijnko nkexro nixja na mé ntácho kixin:

—Tíhi mé xjanna. Imá tjuaha ch'án la ko chána kixin itjen ch'án. Chrókuinhínra tí nkehe tjako ch'án —ichro Dios.

⁶ Kuínhin tí sín k'uájiko ch'án xikaha la ntá kjuítsínka sín nonte kixin imá chrakon sín. ⁷ Na ntá ch'ín Jesús mé kóchjina tí tjejó sín la kuákóxin sín ch'án la ntácho ch'án kixin:

—T'àyá chrakonhyará —ichro ch'án.

⁸ Na ntá xrínahya k'uíkon sín kixin kohya ninkexró. Jehó ch'ín Jesús mé tjen.

⁹ Na ntá tí k'uínkajinxin sín tí jnā ntá k'uetōan ch'ín Jesús, ntáchro ch'án kixin:

—Ninkexró chenkahyará tí nkehe k'uíkonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuènté ntáchro tí sín maestro tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe. ¹² Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxí kóxrjínhin sín. Mé xikaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xikaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuènte Juan Bautista.

*Ch'ín Jesús mé kjuínchekitohe jína ijnko xjan t'aniáte
(Mr. 9.14-29; Lc. 9.37-43)*

¹⁴ Ntá tió k'uíji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'in ch'án nkayakon ch'án. La ntáchro ch'án kixin:

¹⁵ —Ìnchéni, tikonóehéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án ntā. ¹⁶ Ntá kjuikaoni ch'án ntihi la tí sín xrikoá la kjuachahya sín kjuínchekitohe ch'án jína.

¹⁷ A ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jie. ¿Xá hasta nkesá tjinkáonrá naxā ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uetuēhen ch'án tí nchakuen tí jínahya la ntá k'uaxrjéxin tí nchakuen tí jínahya tí chánjan la tuénxín kuítohe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakítsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxí ijnko tje mostaza intsí la ntá chróntácherá tí jnā kixin: “Sátjixian ntihi la sátsjia ókjé”, chróchorá chróntácherá tí jnā la ntá tí jnā sáchrókjuixin ntiha. Mé xikaha kaín nkehe chrókjuachará chrókjuich'erá tí chaxín tinkachónkirá tí janhan. ²¹ A ntá tí tsakítsjerá ijnko nchakuen tí jínahya la t'ichjánxin tsonixjehérá Dios la ko sintehyará.

*Ch'ín Jesús chrónka ch'án inaá kixin its'en ch'án
(Mr. 9.30-32; Lc. 9.43-45)*

²² Naxā k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'etōan sinchekjasóte sín ch'án ²³ la ts'óyán sín ch'án. A ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenkā ch'án tí nkehe kjuanchia tí sín kuènte njnko

²⁴ Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkí kuènte nínko mé sákjuítsjehe sín tí ch'ín Pedro la kjuanchankí sín kixin:

—Tí maestro kuèntá la, ¿a tjenkahya ch'án tí nkehe tjanchia tí sín nchekjènkí kuènte nínko? —ichro sín.

²⁵ Ntá kjuátehe ch'ín Pedro, ntáchro ch'án kixin:

—Kjá tjenka ch'án —ichro ch'án.

Ntá k'uixenhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenka tí nkehe tjanchia tí sín t'etoan chjasintajni, á tí sín kuènte ntiho o á tí sín tsíkixin ókjé? —ichro ch'ín Jesús.

²⁶ Ntá kjuátehe ch'ín Pedro, ntáchro ch'án kixin:

—Tí sín tsíkixin ókjé mé tjenka sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxinhya chrókjuenka sín. ²⁷ Kjánchó tjínkakhya tsonínkaon ninkexró ntihi. La ntá sátsjia tí ntayaon sátsjikoá tí ichjon chóna gancho tséxin sín koche la ntaha itsé tí chjon chrínki ntayaon. Ntá tsákjá tí koche saoxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenka kaín tí tjásikáha sín la ko tí tjásíkehé sín jaha. Táha mé sátsjikoá tjenka —ichro ch'ín Jesús.

18

¿Nkexro tí imá ts'etoan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etoan tí kjuachaxin kuènte nkaya nkajní? —ichro sín.

² Ntá ch'ín Jesús mé k'uíyehé ch'án ijnko chánjan la kjuak'e jnkosiné tí tjejó tí jehe sín ³ la ntáchro ch'án kixin:

—Chaxín xrjanka kixin tí ts'ónahyará éxí ijnko xjan ntsí ntá xitjahya tsákjárá tí kjuachaxin kuènte Dios. ⁴ Tí jnkójín nkexro ts'óna éxí tí chánjan ihnkehya la mé antsí tjeoan ntiha. ⁵ A ntá tí nkexro ts'áyéhe ijnko chánjan kixin tinkáchónki sín tí janhan la mé xíkaha éxí chrók'uáyéhe sín tí janhan —mé xíkaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ Tí jnkójín nkexro chrókjuachroe ijnko chánjan ntsí tinkáchónki tí janhan la íchá jína chrókjuincheteyá sín ch'án ijnko xro tsík'óna xrochre ntá chrókjuíkkakánkí ch'án ntayaon nínka. ⁷ Imá náxrjónhya tjejó tí sín chjasintajni kixin siín nkehe tjasixín chojni jie. Xrácín la jehí siín, a ntá nòa tí nkexro tjasin tí nkehe tsjasixín chojni jie.

⁸ Tí itjá o totá tjásixián jie na chrókójína chrókochrínjian chróchr'an ikjín kixin íchá jína chróchonta kjuachón kjónté it'óo itjá o it'óo totá. Á ntá tí yóí itjá o yóí totá chróchonta tsjásixián jie la tíha mé sátsjixián tí síche xrohi jnkochrín.

⁹ La ko kjaxin tí ikuan tjásixian jie na chrókójína chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yóí ikuan chróchonta tsjásixián jie la tíha mé sátsjixián tí síche xrohi jnkochrín.

Kjuíncheyóexin ch'ín Jesús éxí ijnko kolélo tsík'itjáyan

(Lc. 15.3-7)

10 'Chrókókjoniéhyará nijnko tí chánjan ntsíntsí. Tjonkará kixin nkaya nkajní la tí sín ángel kuènte tí xjanntsí la xráxín tjejó sín tí tjen T'aná nkaya nkajní. 11 Tí Xjeen Dios K'óna Chojni la mé ikui kixin chrókjuinchekaá tí chojni xrichroe.

12 '¿Jahará nkechrorá? Ijnko chojni chóna ijnko ciento kolélo ntá chrók'uitjáyán ijnko va na ¿á chrókuítóehya ch'án tí noventa y nueve va tí jna ó a ntá á chrókjuikjeyáhya ch'án tí ijnko tí ko k'uitjáyán ní? 13 A ntá tí tsjacha ch'án ts'itja ch'án va ntá antsí tsochéhe ch'án kixin tí kolélo k'uitja ch'án la ntá kánhyó tsochéhe ch'án kixin tjejó tí noventa y nueve ko tsík'itjáyánhya va. 14 Mé xikaha kjaxin It'eni tjen nkaya nkajní la tjinkakonhya ch'án kixin chrók'uitjáyán ninkexró kjónté ijnko chojni kánhyó tjeetoan.

*Chrók'uitjáyánhanrá tí jie kjuasinhánrá kíchuára
(Lc. 17.3)*

15 'Tí kíchuá tí chrókjuít'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jie kjuasin ch'án. A ntá tí kjuacha nixjehé tí kíchuá la í kohya kjuanínkaon. 16 A ntá tí tahya ch'án kuentá nkechrua la ntá ntáche á jnko o yaá chojni sátjikoá kixin tsinhin sín á chaxín titekakonhya ch'án. 17 A ntá tí kjónté xikaha naxa titekakuenhya ch'án sín la ntá chenka tí sín tsíkójkotsé nkehe tí jie kjuasin ch'án la ntá tí naxa titekakuenhya ch'án tí sín tsíkójkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjènkj.

18 'Chaxín ntáxrjan kixin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajní tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihi chjasintajni la kjaxin ntaha nkaya nkajní tsjanjon Dios kjuachaxin.

19 'Kjaxin ntáxrjan kixin tí tjejó yaára ntihi chjasintajni la tí jnkokoá tjejójtjenkayáxinrá chrókjuancheherá Dios ijnko nkehe tjinkáonrá la ntá jehe ch'án mé tsotjáhará ch'án. 20 Kixin tí tjejó yaá o iy'á chojni tjejó jnkokoá t'ákjenxin sín niná la janhan koína tjéntaxian tí tjejó sín ntiha.

21 Ntá kóchjina ch'ín Pedro mé kjuanchankí ch'án ntáchro ch'án kixin:

— Ìnchéni, ¿nkekjaín veces chrók'uitjáyénhenni tí jie kjuasin kíchó ní? ¿Á yato veces ó ní? — ichro ch'án.

22 Ntá kjuátehe ch'ín Jesús, ntáchro ch'án kixin:

— Náhí, jehya yato veces ó. Náhí, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uitjáyénhya ch'án ijie kíchó ch'án

23 'Tí kjuachaxin kuènte Dios la éxí yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra. 24 Ntá kjuankixin ch'án tsítsínkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon. 25 Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetóan ch'án kixin tí nkexro a mé tsoxi ch'án la koí tí ichjién ch'án la ko xjeen ch'án la ko kaín nkehe kuènte ch'án kixin ntá xikaha mé tsoxenka kaín tí síká ch'án. 26 A ntá tí nkexro ch'e xra mé kjuák'exín toch'in ch'án nkayakon tí rey la chrónóehé ch'án, ntáchro ch'án kixin: “Jaha Ìnchéni tikonóehéni la kjónté kjaxón tsjenkahani kaín tí sikáhani”, ichro ch'án. 27 A ntá tí ch'ín rey kuikonóehé ch'án tí ch'ín a kjónté itsjé síká ch'án, ntá kuítóhe ch'án sákjuí. 28 A ntá tí sákjuí tí ch'ín a ntá xrínahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: “¿Tsjénkana tí nkehe tjasíkàna ní o náhí!” ichro ch'án. 29 A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóehé ch'án ntáchro ch'án kixin: “Tikonóehéni ijie la

kjónté kjaxón tsjenkahani kaín tí nkehe sikáhani”, ichro ch'án. ³⁰ A ntá jehe ch'án la kuikonóehya ch'án. K'uetōan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án. ³¹ Ntá tí í so sín ch'exón xra mé k'uíkon sín la ntá imá kóxakonhen sín la sákjuíchénka sín tí lámoé sín nkexrí kaá kónhen tí ch'ín síká. ³² A ntá tí lamo mé k'uetōan tsjik'íyehé sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuíntak'itjányanhan tí nkehe tjasíkàna kixin jaha chronóana. ³³ A ntá jaha mé kjaxin chrókujikonóehé tí nkexro choxian éxí janhan kuikonóaha tí jaha”, ichro tí ch'ín lamo. ³⁴ A ntá imá kónínkaon tí lamo a la k'uetōan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

³⁵ A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajní xikaha sit'ahará jahará tí jehya kaín asánrá ts'itjányanhanrá tí jiē chóna kíchuará —ichro ch'ín Jesús.

19

Tjako ch'ín Jesús kuènte tí sín t'itjíhi kichó
(Mr. 10.1-12; Lc. 16.18)

¹ A ntá kjuixin nixja ch'ín Jesús kaín tíha, ntá sákjuíxin ch'án estado Galilea la kjuíji ch'án estado Judea nó tóhe tí ntarío Jordán. ² Ntá nchónhya chojni kjuíjichréhe sín ch'án ntá ntiha mé kjuínchekitohe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á síin kjuachaxin tsjákehé jnkojín chojni ichjién kjónté kohya jiē jié?
—mé xikaha kjuanchankí sín.

⁴ Ntá kjuátehe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'éna kaín chojni síin chjasintajni tí xrankíxixín, la tí nkexro mé “kjuích'éna ch'án chojni ntoa ko chojni chjin”?* ⁵ La ko ntáchro kixin: “Mé xikaha tí chojni ntoa la tsítóhe sín it'é sín la ko ìné sín la tsakja sín ichjién sín la yóí sín la éxí ó jnko chojni xikaha ts'óna sín.”† ⁶ Mé xikaha la í jehya yaá chojni tí jehe sín. Náhí. Ó jnko chojni k'óna tí jehe sín la mé Dios kjuanjon kjuachaxin kixin kuákja kichó sín, la i xitjahya ts'itjíhi kichó sín.

⁷ Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'uetōan kixin ts'óna ijnko xroon tsakja tí ichjién kixin tsjákeexín kichó sín?‡ —ichro tí sín fariseo.

⁸ Ntá ntáchro ch'ín Jesús kixin:

—A ntá jahará títekákonhyará. Méxra ch'ín Moisés kjuanjon ch'án kjuachaxin kixin ts'óna tí xroon ts'itjéxín kíchuará. Kjánchó tí xrankíxixín la xikahya kónhen. ⁹ Méxra ntáxrjan kixin jnkojín sín tjákehé ichjién tí kjuasinhya jiē, chónthya tjan í jnko chojni, ntá kjuákehé ch'án tjan ntá tsakja ch'án í jnko chjin mé xikaha la ó jiē tíha. La ko kjaxin tí jnko chojni chjin tsíkítsinkehe ntá tsakja í jnko chojni la kjaxin jiē tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xikaha tjanjonko kichó sín chrók'uitjíhi kichó sín la íchá jína chrókóteehya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín. ¹² Síin iso chojni tí tsík'ónaxín sín la chónthya sín kojé sín la xitjahya tsochóna sín ichjién sín. La í so sín la chrokjuahya tsakja kichó sín

* 19:4 19.4: Génesis 1.27; 5.2 † 19:5 Génesis 2.24 ‡ 19:7 Deuteronomio 24.1-4

kíxin ókjé chojni kjaxin kjuich'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'án xra. Tí sín tsjacha sich'e tíha la chrókuich'e sín xikaha.

Ch'ín Jesús mé kjuíncheyaon ch'án chánjan

(Mr. 10.13-16; Lc. 18.15-17)

¹³ Ntá ikjui chojni kjuikao sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kóninkakonhen sín tí sín kjuikao tí xjan. ¹⁴ A ntá ntáchro ch'ín Jesús kixin:

—Nté títóherá tsoxrakoa xjan tí tjén janhan la t'ínkakuènhyará xjan kixin tí sín kuènte kjuachaxin nkaya nkajní la mé tóyóhé éxí tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

Ijnko ch'ín ntasoá rico mé kjuínixjehe ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá injko ch'ín ntasoá sákjuítsjehe ch'án tí ch'ín Jesús la kjuanchankíhi ch'án kixin:

—Jaha la injko Maestro jína. La ntá ¿nkehe jína chrókuich'eni kixin chróchóntani kjuachón jnkochrín? —ichro ch'án.

¹⁷ Ntá ch'ín Jesús kjuátehe ch'án, ntáchro ch'án kixin:

—¿Nkekuènté ntáchrúa kixin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochrín la títekávan tí nkehe k'uetōan Dios —ichro ch'ín Jesús.

¹⁸ Ntá ntáchro tí ch'ín ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókuich'iyehya nijnko chojni chjin la ko chrókuèehya la ko chrókuich'énahya kjuach'ia kuènte ókjé chojni ¹⁹ la ko chrókuíkosáyehé it'á la ko iná la ko chrótjuèhé kichuá éxí tjuèxian asán. § —mé xikaha ichro ch'ín Jesús.

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyan? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí ntoá sinchexiteyá la sátjia sinchekjia kaín tí nkehe chonta la sinchekitōnhén tí sín nò. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xikaha ntá t'ává ch'án sákjuí ch'án kixin imá itsjé nkehe chóna ch'án.

²³ Ntá ch'ín Jesús mé nixjehe ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chóna imá itsjé nkehe na imá xra ts'áyéhe sín tí kjuachaxin kuènte nkaya nkajní. ²⁴ Kjatēe xrjanka kixin antsí xrahya chrók'uatsínka injko kocamello injko tjar'i ntachica tjexrja. A ntá antsí xra kixin tí sín chóna itsjé nkehe chrók'uáyéhe tí kjuachaxin kuènte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la ¿xá nkexro chrókuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'ín Jesús.

§ 19:19 Éxodo 20.12-16; Deuteronomio 16.20; Levitico 19.18

²⁷ Ntá ntáchro ch'ín Pedro kixin:

—Ínchéni, jeheni kaín ni la kuítóheni kaín nkehe chóntani kixin tsochréheni tí jaha. A ntá ¿nkehe ts'áyéheni? —ichro ch'án.

²⁸ Ntá kjuátehe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochónta kjuachaxin jié la ntá kjaxinrá jahará chréhérá tí janhan la ts'ejorá teyó trono sìnchekitoxinrá ijie kaín tí sín tsík'axrjenixin tí teyó xjeen ch'ín Israel. ²⁹ La ko kaín tí sín kuítóhe sín nte sín la ko kuítóhe sín tí kichó sín la ko kuítóhe sín it'é sín o ìné sín la ko kuítóhe sín ichjién sín la ko xjeen sín la ko nontee sín kixin tinkáchónki sín tí janhan, na ntá antsí má tsochónta sín la ko kjaxin tsochónta sín kjuachón jnkochrín. ³⁰ A ntá nchónhya tí sín t'etoan ijie, mé tsjixixín tsochréhe sín. A ntá nchónhya tí sín t'ítuenhen ijie la tí sín a mé t'etoan sín tí ntiha.

20

Ch'ín Jesús kjuíncheyóexin ch'án éxi tí sín ch'e xra

¹ Tí kjuachaxin kuente Dios la éxi yóhe ijnko chojni chóna xra nontee ch'án la ntá ijnko yaon imá nchítjen sákjuíkjejá ch'án chojni tsotjéhe ch'án to uva.

² Ntá tí k'uitja ch'án tí sín sich'ehe ch'án xra ntá ikjo ch'án sín kixin ijnko denario tsjenkehe ch'án sín tí xra sich'e sín nontee ch'án tí yaon a. ³ Ntá chr'éxin como las nueve nchítjen ntá sákjuí ch'án ntasin la k'uíkon ch'án í so sín tjejó ntasin chóntahya sín xra. ⁴ Ntá nixjehe ch'án sín ntáchro ch'án kixin: “Kjaxinrá sáchrókuirá chrókjuich'erá xra nonteeni la jína chrókjuénkahará”, ichro ch'án. La ntá jehe sín sákjuí sín. ⁵ A ntá tí inché nonte la sákjuí ch'án inaá chonkixin naxa xík'itja ch'án í so sín ch'ehe ch'án xra la nta tí las tres kónjín la xíkaha naxa xík'itja ch'án í so sín inaá. ⁶ A ntá las cinco kónjín sáxíkji ch'án ntasin inaá la k'uitja ch'án í so chojni ntaha chóntahya sín xra la ntá kjuanchankíhi ch'án sín kixin: “¿Nkekuènté tjejorá ntihi ch'ehyará xra kuenté yaon? —ichro ch'án.

⁷ Ntá ntáchro sín kixin: “Kohya nkexro kjuanjon xra chrókjuich'eni”, ichro sín. Ntá ntáchro ch'án kixin: “Kjaxinrá chrókkuirá chrókjuich'erá xra nonteeni la jína chrókjuénkahará”, ichro ch'án. ⁸ A ntá ó kóntó ntá tí inché nonte mé nixjehe ch'án tí ch'ín t'etoan sítónhen xra nontee ch'án la ntáchro ch'án kixin: “T'iyehé kaín tí sín kjuích'e xra tjénkehé sín. Tjankíxian tjénkehé tí chojni kjuixixín k'uíxehen xra la chr'éxin tjénkehé tí sín saoxín k'uíxehen xra”, ichro ch'án. ⁹ A ntá kóchjina kaín tí sín k'uíxehen xra las cinco kónjín la jnkojnko sín k'uáyéhe sín jnkojnko denario. ¹⁰ Ntá chr'éxin, tió kóchjina tí sín k'uíxehen xra nchítjen la ntá kjuenkayáxin sín kixin antsí itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkojnko denario ó. ¹¹ A ntá tí kjuachahya sín tjete ntá kjuankíxin sín kónínkakhonhen sín tí inché nonte ¹² la ntáchro sín kixin: “Tí sín ikui kjuixixín la kjuích'e sín xra jnkokoá hora la ntá kjaxin kjuénkehé sín jnkokón éxi kjuacha tí jeheni. La ntá jeheni kjuích'eni xra kjónté sóa la kuenté yaon kjuích'eni xra”, ichro sín. ¹³ A ntá kjuátehe tí inché nonte nixjehe ch'án ijnko tí jehe sín, ntáchro ch'án kixin: “Janhan la kjuít'ayahyará ninkehó. Ó kuítóexinni kixin ijnko denario tsjénkahará tí yaon. ¹⁴ Ntá tsákjá chichakoan la sátjia. Janhan tjínkavan tsjénkahá tí sín k'uíxehen kjuixixín éxi tí kjuénkahá jaha. ¹⁵ ¿Á chontahya janhan kjuachaxin xíkaha chrókjuénkahá sín kixin tíha la chichakonna? ¿Nkekuènté tóchjinoxínhan jaha kixin xíkaha kjuénkahá sín?” ichro ch'án. ¹⁶ Mé xíkaha iso tí sín tsjixixín chréhe sín la tí sín a senóxin ntiha la ntá itsjé tí sín senó la mé tsjixixín tsochréhe sín ntiha kixin nchónhya sín k'uíyahá kjánchó tsjéhya sín k'uitja —ichro ch'ín Jesús.

Chrónka ch'ín Jesús inaá kixin its'en ch'án
(Mr. 10.32-34; Lc. 18.31-34)

¹⁷ Ntá ch'ín Jesús sákjuí ch'án ntia nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí siín tí sín nchat'á t'etoan la ko tí sín maestro tí tjako ley. Ntá jehe sín ts'etoan sín kixin its'en ch'án. ¹⁹ Ntá tsjikaán sín ch'án tí siín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkanı sín ch'án ijnko ntacruz kjánchó yaon nixin mé tsoxechón ch'án inaá —mé xikaha chrónka ch'ín Jesús.

Tí nkehe kjuanchia tí iné ch'ín Jacobo la ko ch'ín Juan
(Mr. 10.35-45)

²⁰ A ntá tí iné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóehē tjan ch'án. ²¹ Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátehe tjan ntáchro tjan kixin:

—Tió tsétoanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

Ntá kjuátehe sín, ntáchro sín kixin:

—Kja tsjachani —ichro sín.

²³ Ntá ntáchro ch'ín Jesús kixin:

—Chaxín kjónté chrókjuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajní mé nohe kixin nkexro tsíkjejá ch'án ts'áyéhe tíha —ichro ch'ín Jesús.

²⁴ Ntá kuínhin tí ite sín kixin xikaha tsíkjanhia tí sín a ntá kónínkakonhen sín tí yaá a. ²⁵ A ntá ch'ín Jesús mé k'uíyehē ch'án tí jehe sín ntá ntáchro ch'án kixin:

—Jahará ó nohará kixin tí sín t'etoan chjasintajni la imá t'etuenhen sín kaín chojni la tí sín t'etoan imá nchehnkehe asén sín kixin ihyé sín t'etoan sín. ²⁶ Kjánchó jahará la xikahya chrókjuich'erá. Náhí. Tí jnkojínra tjinkáonra chrókuétoanra la chrókuínkítará tí í so sín. ²⁷ A ntá tí jnkojínra tjinkáonra chrókuétoanra mé t'ichjánxin senó chrókjuákoxinra chrókjuich'eherá kíchuará xra. ²⁸ Mé xikaha tí Xjeen Dios K'óna Chojni mé kuihya kixin chojni chrókjuich'ehe xra. Náhí. Ikui ch'án kixin sich'ehe ch'án sín xra la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitohe jina yaá chojni t'ikonhya
(Mr. 10.46-52; Lc. 18.35-43)

²⁹ Ntá k'uaxrjexín sín chjasin Jericó la nchónhya chojni chréhe tí ch'ín Jesús.

³⁰ Ntá ntaha chrínta ntia tjejótjāxin yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuankixin t'iyehē sín ch'án ntáchro sín kixin:

—Inchéni, jaha tsík'axrjeníxian David, tikonóehéni —ichro sín.

³¹ Ntá nchónhya chojni mé ntáche sín tí sín t'ikonhya kixin:

—Tánirá tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

— Ìnchéni, jaha tsík'axrjeníxian David, tikonóhéni — ichro sín.

³² Ntá ch'ín Jesús kjuák'echónhen ch'án ntá k'uíyehé ch'án tí sín t'ikonhya la kjuanchankíhi ch'án sín ntáchro ch'án kixin:

— ¿Xá nkehe tí tjinkáonrá chrókjuít'ahará? — ichro ch'án.

³³ Ntá jehe sín kjuátehe sín ntáchro sín kixin:

— Jaha Ìnchéni, tjinkaonni chrókjuínchek'ikuanni — ichro sín.

³⁴ Ntá ch'ín Jesús mé kuikonóehé ch'án tí jehe sín la kjuínchekuákóxin tja ch'án tí ikon tí sín t'ikonhya. Ntá tuénxín k'uikon sín la chréhe sín tí ch'ín Jesús.

21

K'uixenhen ch'ín Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfage itjen chjinaxón tí jna Olivo. Ntá ch'ín Jesús k'uetuénhen ch'án iyó tí sín k'uájiko ch'án ² ntáchro ch'án kixin:

— Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehéra va ntá tsjúkuaná va ntihi. ³ A ntá tí jnkójín nkexro tsjanchankíhará nkekuèté tjasintankehéra va la ntá tsontáchrora kixin “Ìnchéni t'ichjánxinhin va la ntá tió tsjixin ntá tuénxín tsjikaáni va”, ichrorá — ichro ch'ín Jesús.

⁴ Mé xíkaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjehéra ó kui tí ch'ín Rey kuéntará.

Ihnkehya ch'án la ijnko kolócho ó tjekjen ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetóan ch'ín Jesús. ⁷ Ntá kjuíkáo sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús. ⁸ Ntá itsjé chojni kuakitsje sín ka titsáte sín na kjuentoá sín ka tinkák'ikjínxin sín ka tí ntja ts'atsínkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntja a. ⁹ Ntá iso sín tsítaón ntja la ko í so sín chréhe iton ch'án mé kjuankixin sín itsje sín kixin:

— Tjancheheni kjuasáyé tí nkexro k'uaxrjeníxin tí rey David. Jína tí nkexro kjuixín kjuachaxièn ihnié Ìnchéni. Tjancheheni kjuasáyé Dios — ichro sín itsje sín.

¹⁰ Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

— ¿Xá nkexro tíhi? — ichro sín.

¹¹ La ntá nchónhya sín kjuátehe sín ntáchro sín kixin:

— Tíhi mé tí nkexro Jesús chrónka itén Dios kjuixín ch'án chjasin Nazaret estado Galilea — ichro sín.

Ch'ín Jesús kjuínchetjóá tí nínko

(Mr. 11.15-19; Lc. 19.45-48; Jn. 2.13-22)

¹² A ntá ch'ín Jesús mé k'uixenhen ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án

* 21:5 Isaías 62.11; Zacarías 9.9

tí mesa tjinkítóxixín sín chichaon la ko tí silla tjejókjen tí sín nchekji kontóá.

¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntóna imé it'in nchia tsonixjanaxian sín.” A ntá jahará tí nchia i tsíkji ch'énará itjueé xíchee† —mé xikaha ichro ch'ín Jesús.

¹⁴ Ntaha nkaxenhen ninko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jina. ¹⁵ A ntá tí sín nchat'á tjetóan la ko tí sín maestro tjako tí ley mé k'uíkon sín kaín tí kjuaxroan kjuích'e ch'án la ko kuínhin sín kixin iso chánjan mé itsje sín nkaxenhen ninko ntáchro sín kixin: “Chjéheni kjuasáyé tí nkexro k'uaxrjeníxin rey David”, ichro sín. Ntá kuínhin tí sín a xikaha ntá kónínkaon sín ¹⁶ la nixjehe sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xikihi chro:

Jaha kjuánjuan kjuachaxin kixin tí sín chánjan hyé la ko chánjan naxa tjejótaki mé tsotsje sín‡

—mé xikaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákuí ch'án chjasin Betania la ntiha k'ok'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr. 11.12-14, 20-26)

¹⁸ A ntá tí kóyaon nchítjen ntá kjan sín chjasin Jerusalén inaá la ikui sín ntia ntá ch'ín Jesús mé ik'uén ch'án kjinta. ¹⁹ Ntá k'uíkon ch'án itjen ijnko nta t'óna to higo chjino ntia. La ntá sákuítsjehe ch'án tí nta, ntá k'uíkon ch'án kixin jehó ka itsa tí nta, naxa k'ónahya to. A ntá jehe ch'án mé nixjehe ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xamá. ²⁰ Ntá tí sín k'uájiko ch'ín Jesús mé k'uíkon sín kixin xikaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkekuénté kixin tí nta t'óna to higo tuénxín xamá? —ichro sín.

²¹ Ntá kjuátehe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxin chrónixjeherá tí jna i kixin: “Sátjixian ntihi sátjijkjankiá ntayaon”, la mé xikaha tsonhen. ²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin chóna ch'ín Jesús

(Mr. 11.27-33; Lc. 20.1-8)

²³ Ntá kjuixin ntá ch'ín Jesús mé k'uíxenhen ch'án tí ninko ntiha. Ntá tió tjetjako ch'án ntá kóchjina iso tí sín nchat'a t'etóan la ko tí sín táda judío t'etóan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátehe ch'ín Jesús ntáchro ch'án kixin:

—Ntá kjaxian janhan tsjánchánkíhará ijnko nkehe siná tsjateherá ntá janhan tsotjonkará nkehe tí kjuachaxin chonta tjet'a tí xra i. ²⁵ ¿A ntá nkexro

† 21:13 Isaías 56.7; Jeremías 7.11 ‡ 21:16 Salmo 8.2

k'uetuēnhen ch'ín Juan ḱixin tsíkíte ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehe sín itjo sín ḱíchó sín ḱixin:

—A ntá tí tsontáchroni ḱixin Dios tsík'etuēnhen tí ch'ín Juan ntá tsjanchankí tí ch'ín a ḱixin nkekuēnté kuítekakuenhyani ch'án. ²⁶ A ntá tí tsontáchroni ḱixin chojni ó tsík'etuēnhen ch'án la ntá chrakonhenni tí chojni ḱixin kaín sín kuítekaon sín ḱixin ch'ín Juan la nixja ch'án itén Dios —ichro sín.

²⁷ A ntá kjuátehe sín ntáche sín tí ch'ín Jesús ḱixin:

—Náhi, noehyani —ichro sín.

Ntá ntáchro ch'án ḱixin:

—La ko kjaxin janhan tsoxrjankahya nkexro kjuanjon kjuachaxin ḱixin tjét'a tí xra —ichro ch'án.

Ch'ín Jesús mé kjuíncheyóexin ch'án ḱixin éxí yaá xjan

²⁸ Ntá ntáchro ch'ín Jesús ḱixin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehe ch'án ijnko xjan ntáchro ch'án ḱixin: “Xjeenni ijie la sátsjia t'akjínjián to uva nontēni”, ichro ch'án. ²⁹ Ntá kjuátehe tí xjan ḱixin: “Náhi tjinkakonhyani”, ichro ch'án. A ntá chr'éxin ntá k'uíxitoxin tí kjuenkayáxin ch'án la sákjuík'jich'e ch'án tí xra a. ³⁰ A ntá tí it'é xjan a mé kjuínixjehe ch'án tí í jnko xjan la jnkokón k'uetuēnhen ch'án la kjuátehe tí xjan ḱixin: “Jeén, ó sátsjini”, ichro ch'án. La ntá chaxínhya sátsík'ji ch'án —ichro ch'ín Jesús.

³¹ Ntá kjuanchankí ch'ín Jesús ḱixin:

—¿Nkexéhe tí yaá chánjan kjuínchexiteyá tí nkehe k'uetuēnhen it'é? —ichro ch'án.

Ntá kjuátehe sín ḱixin:

—Tí xjan saó —ichro sín.

Ntá ntáchro ch'ín Jesús ḱixin:

—Méxra chaxín tjonkará ḱixin tí sín nchekjènk'j la ko tí chojni chjin ch'iyēhe nchónhya chojni ntoa la saoxín ts'ixenhen sín tí kjuachaxin t'etoan Dios la ntá jahará la náhi. ³² Ḱixin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjènk'j la ko tí chojni chjin ch'iyēhe nchónhya chojni ntoa mé kuítekaon sín. A ntá jahará kjónté xikaha k'uíkonrá la kjuítoxiénhyará tí tjenkayáxinrá la ko kuítekákuenhyará —ichro ch'ín Jesús.

Ch'ín Jesús kjuíncheyóexin ch'án ḱixin éxí chojni ch'e xra la jínahya asén sín (Mr. 12.1-12; Lc. 20.9-19)

³³ Ntá ch'ín Jesús ntáchro ch'án ḱixin:

—Tsinhínrá ijnko nkehe sintayóaxian. Éxí ijnko ch'ín k'ueñkaxin ch'án itsjé ntanoa t'óna to uva nontē ch'án. Ntá kjuích'éna ch'án ijnko corral. La ko ijnko tjo kjuích'éna ch'án tòye ḱixin ts'énya sín ìnté to uva. La ko kjuích'éna ch'án ijnko tjet'o noi ḱixin ts'it'ótjen ch'án tsotsjehe ch'án nkuíxín. §

'A nta kjuínchekjen ch'án tí nontē ch'án iso tí sín ch'e xra ntá kjuixin ntá sákjuí ch'án imá ikjín. ³⁴ A ntá tí kjuixraká tí yaon k'óna nkehe ntá jehe ch'án mé ichr'án ch'án iso tí chojni ch'ehe ch'án xra ḱixin tsjikjanchehe sín tí sín ch'e xra nontē ch'án ḱixin tsjanjon sín tí nkehe tsakja ch'án. ³⁵ A ntá tí sín t'ayakonhen tí nonte mé itsé sín tí sín kjuík'janchia tí nkehe la kjuate sín iso la ko í so la k'óyán sín la í so la ixro k'uíchexín sín. ³⁶ A ntá tí ìché nonte a xíchr'án ch'án iso chojni ch'ehe ch'án xra inaá, a ntá tí sín ch'e xra la kjaxin xikahó kjuích'ehe sín tí sín kjuíji.

³⁷ 'A ntá xikaha tsíkónhen ntá kjuenkayáxin ch'án ichr'án ch'án tí xjeen ch'án, la kjá chróchóntehe sín kjuasáyé tí xjeen ch'án, ichro ch'án. ³⁸ A ntá tí k'uíkon tí sín ch'e xra tí xjeen ch'án la ntá jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe. Ts'óyánni ch'án kixin ntá tsitokoni kaín tí nkehe kuente ch'án”, ichro sín. ³⁹ Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'óyán sín ch'án —mé xikaha kjuako ch'ín Jesús.

⁴⁰ Ntá kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí ìnché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

⁴¹ Ntá kjuátehe sín kixin:

—Mé tsjiji ch'án la tsíkonóehya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntáchro ch'ín Jesús kixin:

—¿Á nunca kjuínchekuáxinhyará tí xroon itén Dios tsíkjin sín ósé? Mé ntáchro xikihi:

Tí xro náxrjónhya kuítōenta tí sín ch'éna tjat'ō,

a ntá mé jie k'óna tí xro tjetōan.

Mé xikaha kjuích'e Ìnchéni Dios,

na ntá tíha mé ijnko nkehe kjuachrakon k'uíkonni.*

Mé xikaha ichro itén Dios.

⁴³ Ntá ntáchro ch'ín Jesús kixin:

—Tjonkará kixin Dios tsakitsjahará tí kjuachaxin kuente ch'án la ntá sinchek'áyéhe ch'án tí sín ch'e xra jína. ⁴⁴ A ntá jnkojín nkexro tsjitsínka chrítaón tí xro i mé tsokuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

⁴⁵ Ntá tí sín nchat'á tjetōan la ko tí sín fariseo mé kuínhin xikaha kjuíncheyóexin ch'ín Jesús ntá kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsonhen sín. ⁴⁶ La ntá tjinkaon sín chrókjuínchekjasóte sín ch'án kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuente Dios.

22

Ch'ín Jesús kjuíncheyóexin éxi ijnko kia kótehe sín

¹ Ntá ch'ín Jesús mé kjuankíxin nixja ch'án inaá la kjuíncheyóexin ch'án ntáchro ch'án kixin:

² —Tí kjuachaxin kuente Dios mé éxi yóhe ijnko ch'ín rey kjuasin ch'án ijnko kia kixin tsotehe xjeen ch'án. ³ K'uētuenhen ch'án tí sín ch'ehe ch'án xra kixin tsjik'íyehé sín tí sín kjueyá ch'án, kjánchó jehe sín mé tjinkakonhya sín tsochjina sín. ⁴ A ntá k'uētuenhen ch'án inaá í so tí sín ch'ehe ch'án xra ntáchro ch'án kixin: “Chenka tí sín ó k'uíyaha kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanka la kaín nkehe la ó síchónhen. A ntá chróxrakoa sín tí síin kia”, mé xikaha k'uétoan ch'án. ⁵ A ntá tí sín tsík'íyehé ch'án mé ántosén sín. Ijnko sín la sákjuí nontee la í jnko la sákjuí ch'án í jnko xra chóna ch'án. ⁶ La í so tí sín a mé tsítsé sín tí sín tsík'etuenhen tí ch'ín rey la k'óka tí sín a hasta ik'uén tí jehe sín. ⁷ Ntá tí ch'ín rey mé kónínkaon ch'án ntá k'uētuenhen ch'án tí sín soldado kixin its'en tí sín kjuàya la ko tsoche tí chjasén sín. ⁸ Ntá nixjehé ch'án tí sín ch'ehe ch'án xra inaá ntáchro ch'án kixin: “Kaín nkehe la ó síchónhen kixin tí nkexro tsotehe la ntá tí sín k'uíyaha kuítékakonhya sín la kjuihya sín. ⁹ Méxra sátsjirá tí esquina tí ntja jié la t'iyehérá kaín tí sín

* 21:42 Salmo 118.22-23

tsoxetará kixin itsji sin ti kia”, ichro ch'án. ¹⁰ Ntá tí sín ch'e xra mé sákjuí sín la k'uíyehé sín kaín tí sín t'átsínka tí ntja ntiha, mé chojni jína la ko chojni jínahya hasta k'uíxikaón chojni tí nchia ntiha.

¹¹ Ntá tí ch'ín rey mé kuitsjehe kaín tí sín tsík'íyehé ch'án la ntá k'uíkon ch'án ijnko ch'ín ntiha chóntahya ka jína kuènte tí kia a. ¹² La ntá nixjehe ch'án, ntáchro ch'án kixin: “Amigo, ¿nkexrí k'uíxenhén kixin tsík'ítsahya kuènte kié chojni tsoṭehé?” ichro ch'án. Ntá tí ch'ín a kjuáteehya ch'án ninkehó. ¹³ A ntá tí ch'ín rey mé k'uíyehé ch'án tí sín ch'ehe ch'án xra la ntáchro ch'án kixin: “Sinchenteto toté la ko itja tí ch'ín a la ité ntója sítié la nta ntiha a mé tsotsjánka ch'án la sinetaón ch'án neno ch'án.”

¹⁴ Ntá ntáchro ch'ín Jesús kixin:

—Nchónhya sín k'uíyahá la séhya sín k'uitja —mé xíkaha kjuako ch'án Jesús.

*Ch'ín Jesús ntáchro ch'án kixin ó nchoxon tsjenkehe sín gobierno
(Mr. 12.13-17; Lc. 20.20-26)*

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxin sín tí ch'ín Jesús kixin ách'e ichrén jié tsjasin ch'án la ntá tsjanchia sín jié. ¹⁶ Ntá ichr'án sín iso tí sín ch'ehe sín xra la iso tí sín ch'ehe tí ch'ín Herodes xra kixin tsjachaxin sín tí ch'ín Jesús. Ntá tí sín a nixjehe sín ch'án ntáchro sín kixin:

—Maestro, ó noheni kixin tí nkehe ntáchrúa jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jína sín. ¹⁷ A ntá jaha chronka nkehe tjenkayáxian. ¿Á jína chrókjuenkehéni tí gobierno romano o náhí? —ichro sín kjuanchankí sín.

¹⁸ Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxinráni?

¹⁹ Tjákonará tí chichaon tjenkehérá sín méhe —mé xíkaha k'uetōan ch'ín Jesús.

Ntá kjuikohe sín ch'án tí chichaon a. ²⁰ Ntá k'uíkon ch'ín Jesús ntá kjuanchankí ch'án kixin:

—¿Nkexro tí tsík'axrjexín tjenkáni tí chichaon méhe la ko nkexro ihñié chóna? —ichro ch'án.

²¹ Ntá kjuáteehe sín kixin:

—Tí ch'ín t'etōan mé tjenkáni ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'etōan tí nkehe kuènte ch'án la kjaxin tí nkehe kuènte Dios la chróchjehérá Dios —mé xíkaha chro ch'ín Jesús.

²² Ntá tí kuínhin sín xíkaha la chrakon sín la komá sín ch'án ntá sákjuí sín.

*Kjuanchankí sín kixin á tsoxechón chojni
(Mr. 12.18-27; Lc. 20.27-40)*

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xíkaha chrókjuáchaxin sín ch'ín Jesús. Ntáchro sín kixin:

²⁴ —Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxi xjeen tí ch'ín saó tsík'en. ²⁵ Ntá ntihi k'uejō yato sín jnkokoá kichó sín. Ntá tí ch'ín saó kótehe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo. ²⁶ A ntá tí ch'ín yóxin ik'uén kjaxin la tí ch'ín níxin kuákja ch'án tjan la ntá xíkaha kónhen inaá. La kayatoé tí sín k'uéchóna sín tjan xíkaha kónhen sín kaín sín ik'uén sín. ²⁷ A ntá kjuixixín ntá kjaxin tjan

ik'uén tjan. ²⁸ Ntá tió tsoxechón kaín xín chojni tsík'en, ¿ntá nkexro ts'óna xìi tí jehe tjan kixin kayatoé sín kótehe tjan? —mé xikaha kjuanchankíhi sín tí ch'ín Jesús.

²⁹ Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios. ³⁰ A ntá tí chojni tsík'en tió tsoxechón la tsoteehya sín la ko tsoteehya tí xjeen sín kixin tí sín tsík'en la éxí tí sín ángel kuènte Dios ts'ejó sín nkaya nkajní. ³¹ A ntá tí kaín tí sín tsík'en tsoxechón, ¿á kjuinchekuáxinhyará nkehe ntáchro Dios? Jehe ch'án xikihi chro ch'án: ³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóhón —mé xikaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjetooan

(Mr. 12.28-34)

³⁴ Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuáteehya tí sín saduceo. ³⁵ La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

³⁶ —Maestro, ¿nkexéhe tí nkehe imá tjetooan kuènte tí ley? —ichro ch'án.

³⁷ Ntá ntáchro ch'ín Jesús kixin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuèntará.”† ³⁸ Mé tíha mé tí ley imá tjetooan la ko saoxín k'uetooan Dios tíha. ³⁹ A ntá tí nkehe yóxin la tóyóhe la mé ntáchro xikihi: “Chrótjuèhérá kíchuará éxí tjuèxínrá asánrá.”‡ ⁴⁰ Tí iyó nkehe i la mé antsí tjetooan kuènte tí ley tsík'etooan Moisés la ko tí nkehe kjuako tí sín k'uéchrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokoá tjejó sín ⁴² la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xikihi:

⁴⁴ Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etooan sín kixin jahvá mé tsétoan.”§

Mé xikaha chro itén Dios. ⁴⁵ 'A ntá ¿xá nkexrí kixin Cristo chrók'óna xjeen David a ntá jehe ch'ín David kuikítexín ch'án Ìnché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuátehe sín ninkehó la desde tí yaon a chrakon sín la í nínkehó kjuanchankíehya sín ch'án.

* 22:32 Éxodo 3.6 † 22:37 Deuteronomio 6.5 ‡ 22:39 Levítico 19.18 § 22:44 Salmo 110.1

23

Ch'ín Jesús tjanchia jje tí sín fariseo la ko tí sín maestro tjako tí ley
(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehē ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés. ³ Méxra chrókjuinchexiteyéhérá kaín tí nkehe t'etōan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín. ⁴ T'etuenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkítsa sín tí nkehe imá ye yamá chojni. ⁵ Ich'e sín kaín xín nkehe kixin tsotsjehe chojni. Tóxrjínhin sín tsjak'enkáni totjen sín la ko itja sín ijnko xroon kjínjin iton ts'ínixín itén Dios la tjinkaon sín iké sín síxinkáni nkehe tjákiní. ⁶ Tjinkaon sín tsochóna sín silla jína ts'ejóksen sín sine sín tió sátsji sín tí siín kia la ko xritjeyá sín tí silla antsí náxrjón chrók'uejóya sín nkaxenhen njnko. ⁷ La ko tjinkaon sín kixin chojni chrókjuikosáyehe sín tsoxeta sín tí ntja la ko tjinkaon sín kixin tsontáchro chojni kixin maestro tí jehe sín.

⁸ A ntá jahará la titoéhyará kixin tsontáchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. ⁹ La ntá chróntáchrohýará kixin ninkexró mé it'ará ntihi chjasintajni kixin jahará la chontará jnkokoá It'ará mé itjen nkaya nkajni. ¹⁰ La ko jehe sín chróntáchrohýa sín kixin jefe tí jahará kixin jehó Cristo mé jefe. ¹¹ Tí nkexro antsí tsjinkítsa iso chojni la jehe ch'án mé antsí t'etōan ch'án. ¹² Kixin tí nkexro ntáchro kixin imá ijíé la mé imá tsontsí. A ntá tí nkexro nchehnkehya la antsí tsojié.

¹³ Nòará tí jahará maestro tjàkorá tí ley la ko tí jahará chojni fariseo. Jahará la jnkójínxónhya tjenkayáxinrá. Jahará la t'ikjéherá tí puerta ts'ixenxín chojni tí kjuachaxin kuente Dios kixin titoéhyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

¹⁴ Nòará tí jahará maestro tjàkorá tí ley la ko chojni fariseo. Jnkójínxónhya tjenkayáxinrá. Jahará takitsjeherá ntōe tí chojni tsíkók'án la ntá isé nixjehérá Dios kixin ch'iyexínrá chojni kixin jína tí jahará. A ntá xikaha kjuich'erá jahará la antsí tsjasótiará.

¹⁵ Nòará tí jahará maestro tjàkorá tí ley la ko chojni fariseo. Jahará la jnkójínxónhya tjenkayáxinrá. Jahará sájtirá nonte la chrítaón ntayaon kixin tsjákohérá ijnko chojni tsinkáchónki xikaha tí tinkachónkirá la ntá tió kjuachará kjuachroerá sín la ntá jehe sín antsí má tsjasótexín sín tí xrohi la kánhyó jahará.

¹⁶ Nòará tí jahará kixin tétōanrá kjánchó ntakótánrá. Ntáchrorá kixin tí jnkójín chojni tsontáchro kixin sinchexiteyá sín nkehe la t'ákjenxin sín tí njnko la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí chica oro siín nkaxenhen njnko la ntá t'ichjánxin sinchexiteyá sín. ¹⁷ Imá lōntirá la ko ntakótánrá. ¿Á imá tjetoan tí chica oro o á imá tjetoan tí njnko kixin tí njnko mé kótjuáxin tí chica oro? ¹⁸ Kjaxin ntáchrorá kixin: “Tí jnkójín chojni tsontáchro sín kixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí nkehe tjokehē sín Dios chrítaón tí altar la ntá t'ichjánxin sinchexiteyá sín tí nkehe tsintáchro sín.” ¹⁹ Imá lōntirá la ko ntakótánrá. ¿Á imá tjetoan tí nkehe tsochjehérá Dios

o á imá tjetōan tí altar kixin tí altar mé tótjuáxin tí nkehe tsjánjonrá? ²⁰ Kixin tí nkexro tsontáchro kixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhi. Kjaxin t'ákjenxin ch'án kaín tí nkehe siín chrítaón ntiha. ²¹ A ntá tí nkexro tsontáchro kixin sinchexiteyá ch'án nkehe la t'ákjenxin tí ninko la jehya t'ákjenxin ch'án ninko ó. Náhi. Kjaxin t'ákjenxin ch'án tí Dios itjen ntiha. ²² A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuènte Dios la ko tí nkexro tjet'etōan ntiha.

²³ 'Nòará jahará maestro tjàkorá ley la ko jahará chojni fariseo. Jahará jnkójínxónhya tjenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá tjetōan kuènte tí ley. Mé ntoá chrókjuenkayáxinrá la ko chrókjuikonóehérá kíchuará la ko chrókuinkachónkirá Dios. Tíhi la antsí tjetōan chrókjuinchexiteyará la kjaxin chrókuitoéhyará chrokjuich'erá tí í so nkehe. ²⁴ Jahará la tétōanrá kjánchó ntakótánrá. Jahará la nchek'ankihirá kjónté ijnko kochjisen intsí chóna tí nkehe its'irá, a ntá ijnko kocamello kjónté ijie va la t'ínkará.

²⁵ 'Nòará tí jahará maestro tjàkorá ley la ko jahará fariseorá. Jahará la jnkójínxónhya tjenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsíkaón kjuachee la ko jahorá tjinkáonrá chróchontará itsjé nkehe. ²⁶ Jahará chojni fariseorá imá ntakótán jahará. Saoxín chrókjuinchetjóará tí nkehe nkaxenhen tí vaso la ko tí plato la ntá ó chrókótjóá tí chrítaón kjaxin.

²⁷ 'Nòará jahará maestro tjàkorá tí ley la ko chojni fariseorá. Jnkójínxónhya tjenkayáxinrá. Jahará la éxi yóhe ijnko tòye tsíxravá chojni, imá náxrjón tsjehe ntója, a ntá nkaxenhen mé tsíkaón huésoé chojni tsík'en la ko kaín nkehe tjuáhya. ²⁸ Mé xikaha tí jahará la tsjehe éxi chojni jína xikaha, a ntá jnkójínxónhya tjenkayáxinrá la ko jínahyará.

²⁹ 'Nòará tí jahará maestro tjàkorá ley la ko chojni fariseorá. Jahará la jnkójínxónhya tjenkayáxinrá. Jahará la kjuich'énará tjàt'o náxrjón chrítaón tí tòye tsíxravá tí sín k'uékjako itén Dios ósé la ko nchek'ítsará tjàt'o chrítaón tòye kuènte tí sín jína asén. ³⁰ La ntá ntáchrórá kixin tí chrók'uejorá tí k'uéjó tí sín tsík'axrjeníxinrá la ntá chrókjuínkítsahyará chrók'uén tí sín kjuako itén Dios. ³¹ Méxra xikaha jahorá ntáchrórá kixin chaxín tsík'axrjeníxinrá tí sín k'óyán tí sín k'uékjako itén Dios. ³² Méxra ijie la tjinkáonrá tsjixinhanrá tí xra kjuich'e tí sín tsík'axrjeníxinrá.

³³ 'Jahará la tsík'axrjeníxinrá konche. ¿Ntá nkexrí chrókuaará kixin itsi tí tsjasótiará? ³⁴ Méxra janhan mé tsétuānhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen ninko la ko tsochonkíhírá sín chjasin la chjasin. ³⁵ Méxra jahará la yamará tí jie kixin tí sín jína k'uítjixín ijnie senó. Méxra tsamará tí jie kixin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, xjeen Berequías, tí nkexro k'oyánxinrá chjino tí altar. ³⁶ Chaxín tjonkará kixin kaín tí jie a mé yamá tí chojni siín ijie.

Tsjánka ch'ín Jesús (Lc. 13.34-35)

³⁷ Ntá ntáchro ch'ín Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuinkítsará. Nchónhya veces tjínkavan chrókójnkotsérá la chrók'uáyakonhánrá éxi ijnko cochíká mé t'ayakonhen xjeen va chrínkí kanenee va mé xikaha tjínkavan chrók'uáyakonhánrá tí

jahará. Kjánchó jahará la tjinkákonhyará xikaha. ³⁸ Ntá jie la Dios la tsítóhe tí jahará. ³⁹ Ntáxrjan kixin í ts'ikonhyará tí janhan ínaá tsjixrakája tí yaon tsontáchrora kixin: “Ímá jína tí nkexro kujixin kjuachaxién ihnié Ìnchéni” —mé xikaha ichro ch'ín Jesús.

24

Chrónka ch'ín Jesús kixin ts'itjáyán tí nínko
(Mr. 13.1-2; Lc. 21.5-6)

¹ Ntá ch'ín Jesús k'uaxrjexín ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin ch'án chrótsjehe ch'án kixin náxrjón tsík'óna tí nínko a. ² A ntá ch'ín Jesús mé kjuátēhe ch'án kixin:

—Jahará ¿á tjeotsjehérá kaín tíha? Chaxín tjonkará kixin tsjixraká tí yaon ts'oya kuenté nínko. Nijnko xro ts'ejókjehya kichó kixin kaín tíha la tsoxíka —ichro ch'án.

Tí nkehe tsonhen tió tsjixixín
(Mr. 13.3-23; Lc. 21.7-24; 17.22-24)

³ Ntá sákjuí sín chrítaón tí jna Olivo la ch'ín Jesús kjuák'etjaxin ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsochronka nkesá tsonhen tíha. ¿Nkexrí tsonoexínmi tió ts'inka tí jaha la ko nkexrí tsonoexínmi tí itsi tí tsjixixín chjasintajni? —ichro sín.

⁴ Kjuátēhe ch'ín Jesús kixin:

—Tóxakonhanrá titoéhyará kixin ninkexró chrókjuít'áyahará. ⁵ Nchónhya chojni itsi sich'iyaxín nina tsontáchrora kixin: “Janhan mé tí Cristo” tsixro sín, la sich'iyehé sín nchónhya chojni. ⁶ A ntá tió tsinhínra tsontáchrora chojni kixin ó síin kjuanínkaon la ko ts'ixin kjuachrakon kixin tsjanjonko kichó sín la kjónté xikaha tsonhen la chrakonhyará. Ó jehí tsonhen tíha tí naxa ts'itjáyánhya chjasintajni. ⁷ Ijnko nación tsjanjonko í jnko nación la tsjanjonxin sín tí xra ts'etōan sín. La ko itsjé chjasin na tsokjinta la ko tsoníhi chojni la ko ntihi la ntaha tsinkí nonte. ⁸ Kaín tíha la ntá tsoxrankíxixón tí kjuatjoté tsonhen chojni.

⁹ A ntá tsotsérá chojni la tsjikaánra sín tí tjejó tí síxreé kixin sinchekjasótiará sín la ntá ts'óyánra sín. La ko kaín xín chojni síin chjasintajni tsonínkakonhanrá sín kixin tinkachónkirá tí janhan. ¹⁰ Ntá tí yaon a la itsjé sín la tsítóhe sín tsinkáchónkihya sín tí janhan la ko tsonínkakonhen sín kichó sín la ko sinchekji kichó sín. ¹¹ Ntá itsi nchónhya chojni ntoáhya tsjako la ntá sich'iyehé sín nchónhya chojni. ¹² La ts'ixin nchónhya jie jínahya la ntá ts'ixin itsjé chojni tsotjuèhya sín kichó sín. ¹³ A ntá tí nkexro naxa tjejótkáchónki tí janhan hasta tí tsjixixín la mé tsaá. ¹⁴ La ko tí itán jína chrónka nkexrí tjen tí kjuachaxin kuènte Dios la t'ichjánxin tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'itjáyán chjasintajni.

¹⁵ 'Ch'ín Daniel k'uéchrónka itén Dios mé tsíkjin ch'án kixin tsjixraká ijnko yaon tsjak'e ijnko nkehe jínahya nkaxenhen nínko tjóá.* Ntá jahará ts'ikonrá tíha. A ntá tí nkexro nchekuáxin mé tsiénxín nkehe tíha. ¹⁶ Ntá kaín tí sín tjejó estado Judea tsochrin sín jna sátsji sín. ¹⁷ A ntá tí sín tjejó chrítaón nchia ntóé sín la í xitjahya tsakitsje sín ninkehó. ¹⁸ Ntá tí tjejóch'e sín xra nontēe sín la kjá í tsokjanhya sín tsjikakja sín iké sín. ¹⁹ Ntá nòa tí chojni chjin tjejóyá sín la ko nòa tí sín nchekakí xjan tí yaon a. ²⁰ Chrókjuanchehérá Dios kixin tí tsonhen tíha la chrókójehya nchakuen kin la ko chrókójehya tí yaon t'ok'éhe

* 24:15 Daniel 9.27

chojni. ²¹ Kíxin tíha mé ijnko kjuachrakon imá ijié la desde tí xrankíxixín chjasintajni la nunca xikahya kónhen. ²² Ntá tí chrók'uetoanhya Dios kíxin tjoka ts'atsínka tíha ntá chrókuaáhya ninkexró. Ntá ts'etōan ch'án kíxin tjoka ts'atsínka tí kjuachrakon jié kíxin jehe ch'án mé imá tjuèhe ch'án tí sín tsíkjejá ch'án.

²³ Ntá tí tsontáchro chojni kíxin: “Tsjehé ntihi itjen Cristo”, o “Tsjehé ntiha itjen ch'án”, la ntá chrókuítekákuénhyará sín. ²⁴ Kíxin ntá itsi iso sín tsontáchro sín kíxin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jié kíxin tjinkaon sín chrókujuich'iyehé sín chojni kjónté tí sín tsíkjejá Dios. ²⁵ Ó xrxanka senó nkehe tsonhen kíxin tsonohará. ²⁶ Méxra tí chróntáchro sín kíxin: “Tsjeherá tí nteje ntiha tjen ch'án”, la ntá tsjihyará nó ntiha. O tí chróntáchro sín kíxin: “Tsjeherá ntihi tí cuarto mé tjen ch'án”, la chrókuítekákonhyará. ²⁷ Méxra éxí tsjonkíxín la t'ikon chojni t'inkaséyanxín tí tjitoxin yaon hasta tsjiatóxin yaon mé xikaha ts'ikon chojni tió itsi tí Xjeen Dios K'óna Chojni. ²⁸ Mé éxí yóhe tí tjen ijnko cuerpo tsík'en la ntiha tsojnkotsé tí kontexjuen.

Tsokjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

²⁹ A ntá séhyó tí tsjixixín tí kjuachrakon jié la ntá tí yaon la tsotie a ntá tí nitjó la í ts'inkaséyanxínhya. La ko tí konotsé la tsoxènjinxín nkajní la kjaxin kaín nkehe siín nkaya nkajní la tsinkí. ³⁰ La ntá ts'ikon chojni kíxin nkajní tsixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'ikon sín kíxin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsíkao tí kjuachaxin jié. ³¹ Ntá tsochr'án Dios tí sín ángel kíxin ts'ánoa sín tí trompeta itsen kíxin tsochjina kaín tí nkexro kjueyá Dios tsjixín kanóé lado chjasintajni.

³² Chrók'uitjará nkexrí sintayóaxian kuente ijnko nta to higo. Éxí yóhe tíó chóna ntahte la ko ts'ixín kayoa la nta tsonoaxínra kíxin í séhya tsokjan ichrin. ³³ Mé xikaha tí ts'ikonrá ts'atsínka kaín tíha la ntá xikaha tsonoaxínra kíxin í séhya itsi Ìnchéni. ³⁴ Ntá tjonkará chaxín kíxin kaín tíha senó tsonhen tí naxa ts'enhya tí chojni siín jie. ³⁵ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la nunca ts'itjáyanhya tsoxiteyá tíha.

³⁶ A ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajní noehya sín la ko ni tí Xjeen Dios noehya. Ó jehó tí It'é mé nohe.

³⁷ Éxí yóhe tí nkehe kónhen tí yaon k'uékjak'e ch'ín Noé mé xikaha tsonhen tí tsokjan tí Xjeen Dios K'óna Chojni. ³⁸ Tí naxa titjiéhya sín nta la kaín chojni la jina k'uéjé sín la kjóne sín la ko ik'uí sín la ko sítótehe sín kjuixrakájia tí yaon k'uixenhen ch'ín Noé ntabarco.† ³⁹ A ntá jehe sín mé kienxínhya sín hasta kuijia tí k'uániá chrin ntá ikui nta la k'uátjoá kaín sín. Mé xikaha tsonhen tió itsi tí Xjeen Dios K'óna Chojni. ⁴⁰ A ntá yaá chojni ntoa tjejóch'e sín xra nonte la ntá ijnko la sátsji la í jnko la tsítóhe. ⁴¹ La ko yaá chojni chjin mé tjejó't'o sín la ijnko la sátsji la í jnko la tsítóhe.

⁴² Chrók'uejotsjeherá kíxin noahyará nkehora la ko nkesá ts'inka janhan. ⁴³ Chrókónohará tíhi: tí chrókónohe ijnko ìnché nchia nkehora tie chrókjui ijnko nkexro tseé la ntá chrókjuak'echónhen tí ìnché tí nchia ntá xitjahya ts'ixenhen tí nkexro tjinkaon chrókueé. ⁴⁴ Méxra jahará la jina chrók'uejorá kíxin tí Xjeen Dios K'óna Chojni me titàya itsi.

† 24:38 Génesis 6.5-8

*Tí nkexro jina ch'e xra la tí nkexro ch'ehya xra jina
(Lc. 12.41-48)*

⁴⁵ 'Tí nkexro chaxín ch'e xra jina la ko imá nohe la ntá tí lámoe ch'án ts'etuenhen kixin ts'ayakonhen ch'án tí sín síin ntøe ch'án la ko tsjanjon ch'án nkehe sine sín chintji tí hora a. ⁴⁶ Náxrjón tjen tí nkexro ch'e xra tíó itsi tí lamo la ts'ikon kixin xikaha tjenchexiteyá ch'án tí xra k'uituenhen ch'án. ⁴⁷ Chaxín tí lamo la tsjanjon ch'án kaín tí xra chóna ch'án ts'etøan tí ch'ín a. ⁴⁸ A ntá ijnko chojni ch'ehya xra jina la ntá tsjenkayáxin ch'án kixin kjá tjokahya tsokjan tí lámoe ch'án ⁴⁹ la ntá tsjankíxin ch'án tsjanjonko ch'án tí í so sín ch'e xra la ko tsjankíxin sineko ch'án la ko its'ikao ch'án kaín tí sín sítókoan. ⁵⁰ Ntá xrinahya tsokjan ti lamo ijnko yaon la ko ijnko hora noehya tí nkexro ch'e xra. ⁵¹ La ntá jehe ch'án la sinchekjasóte tí ch'ín kuitohehe xra kjuínchexiteyáhya la ts'etøan ch'án kixin tsjasóte tí ch'ín a éxí tí sín jnkojínxónhya tjenkayáxin. Ntá ntiha la tsotsjánka ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

¹ Ntáchro ch'ín Jesús kixin:

—Tí kjuachaxin kuènte Dios mé éxí yóhe ite sín tjarisoá sátsji tí tsotehe chojni chuénko linterna tjiá aceite la sákjuíchónhen sín tí ch'ín tsíkótehe. ² In'ó sín la tsíkóyaxíenhya sín la in'ó sín ó tsíkóyaxínhin sín. ³ Tí sín tsíkóyaxíenhya na kjaxin la tsíkjjiko sín linterna kjánchó tsíkjjikohya sín aceite tsíkja inaá. ⁴ A ntá tí sín tsíkóyaxínhin la sátsíkjiko sín xro tjiá aceite la ko tí linterna kuènte sín. ⁵ A ntá tí ch'ín tsíkótehe la tjokahya kui ch'án la ntá jehe sín mé tsíkhi sín kotáchrín la tsík'ejóua sín kaín sín. ⁶ A ntá kuichjina k'áxrótjen la kuínhin sín t'èya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án. ⁷ A ntá kaín tí sín tjarisoá la k'uàya sín la kjuasiyóxin sín tí linterna kuènte sín. ⁸ A ntá ti in'ó sín tsíkóyaxíenhya la nixjehe sín tí sín in'ó tsíkóyaxínhin ntáchro sín kixin: “Chjehéni intsí aceite kuèntará kixin ó k'uànká aceite tjiá linternéni”, ichro sín. ⁹ A ntá tí sín tsíkóyaxínhin mé ntáchro sín kixin: “Náhí, tí aceite tí xikaha tsjanjonni intsí jahará la antsí jeheni la tsjachahya. Íchá jina sátsjik'ènará tí sítoxin ntiha”, ichro sín. ¹⁰ Ntá tí in'ó tí sín kóyaxíenhya mé sákjuík'èna sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuíko sín ch'án tí kia tsíkótehe sín la ntá ó tuénxín k'uikjéhe tí puerta. ¹¹ Ntá chr'éxin ikui tí in'ó sín tjarisoá tsíkóyaxíenhya la t'ínka sín puerta ntáchro sín kixin: “Ó kuini takitjehé nchia.” ¹² A nta jehe ch'an kjuátehe ch'án ntáchro ch'án kixin: “Chaxín tí jahará la ní chonhyará”, ichro ch'an.

¹³ Ntá ntáchro ch'ín Jesús inaá kixin:

—Méxra xikaha tí jahará chrók'uejótshjehérá kixin noahyará nkeyaon la nkehora itsi ti Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuènte chichaon

¹⁴ Ntá ntáchro ch'ín Jesús kixin:

—Tí kjuachaxin kuènte Dios la yóhe ijnko chojni tjinkaon sáchrókjui ch'án í jnko nación la ntá k'uíyehé ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

¹⁵ 'Ijnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án nkexro ti tsjacha sich'e jnkojnko xra. Ntá jehe ch'án tíó kjuixin kjuanjon ch'án la ntá sakjuí ch'án ikjín. ¹⁶ Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án

la kjuacha ch'án í jnko in'ó mil. ¹⁷ Kjaxin tí nkexro k'uáyéhe iyó mil chichaon mé xíkjacha ch'án í jnko iyó mil. ¹⁸ A ntá tí nkexro k'uáyéhe ijnko mil chichaon mé sákjuí ch'án la kjuích'éna ch'án ijnko tòye kjuavá ch'án tí chichaon kuènte lámogé ch'án.

¹⁹ A ntá nchónhya nánó k'uátsínka la ntá ikjan tí lámogé sín kixin ntá tsjentoáko sín ch'án cuenta. ²⁰ Saxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáchro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án. ²¹ Ntá tí lamo mé ntáchro kixin: “Nchoxon tí xíkaha. Jaha la ijnko chojni jína ch'e xra. La ó kjuínchexiteyá jína. Kjónté jehya xra jié la kjuínchexiteyá jína la ntá tsotjaha ijnko xra antsí jié la tjak'e tsochéheni.” ²² Ntá chr'éxin ikui tí nkexro k'uáyéhe iyó mil la ntáchro ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án. ²³ La ntá tí lamo ntáchro kixin: “Nchoxon jaha mé ijnko nkexro jína ch'e xra la ó kjuínchexiteyá. Kjónté jehya xra jié la kjuínchexiteyá jína la ntá tsotjaha í jnko xra antsí jié. Tjak'e tsochéheni”, ichro ch'án. ²⁴ A ntá ikui tí ch'ín k'uáyéhe ijnko mil la ntáchro ch'án kixin: “Ó nòna kixin ijnko chojni imá jiehe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya. ²⁵ Méxra chrakonni la sákjuíkjak'emáni tí chichaon chrínki nche. Tákjá chichakoan tjinhin”, ichro ch'án. ²⁶ A ntá kjuátehe tí lamo kixin: “Jaha ijnko chojni jínahya la ko séhe. Jaha la ó noha kixin chrótjaa tí nonte k'uénkahya la chrókuákjaá tí nkehe k'uénkahya. ²⁷ A ntá tí chichaon chróchr'an banco. Ntiha chrókjuich'exín xra ntá tí ikjan janhan ntá chrók'uayáha antsí itsjé chichaon chrókjuacha kichó chica”, ichro tí lamo. ²⁸ A ntá nixjehe ch'án tí í so sín tjejó la ntáchro ch'án kixin: “Takitsjehérá tí mil chóna ch'án la chjehérá tí nkexro chóna tí ite mil chichaon ²⁹ kixin tí nkexro kjónté itsjé chóna la mé ts'áyéhe antsí la ntá tí nkexro chóntahya la kjónté tí intsí chóna la ts'axrjehe. ³⁰ A ntá tí nkexro ch'ehya xra la tsétuénhén sátsji ch'án tí sítié ntója la ntá ntiha la tsotsjánka ch'án la ko sinetaón ch'án neno ch'án.”

Tsitoxín ijíe chojni chjasintajni

³¹ A ntá tí tsi tí Xjeen Dios K'óna Chojni la tsíkao ch'án kjuachaxién jié éxí ijnko Réy la ko tsíkao ch'án kaín xín tí sín ángel ntá ntaha tsjak'etjaxin ch'án tí trono ts'etoanxín tí kjuachaxién jié. ³² Ntiha kaín xín tí chojni tsíkjin nkuíxín nación tsochjina tí tjen ch'án la jehe ch'án tsakitsjekjan ch'án ijnko la í jnko. Éxí ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí kotèntso la ókjé ts'ixin. ³³ Méxra ts'etoan ch'án kixin tí kolélo la ts'ixin nó tja ch'án chjina, a ntá tí kotèntso la nó tí tja ch'án kjon. ³⁴ Ntá tí Rey tsonixjehe tí sín tjejó tja ch'án chjina tsontáchro kixin: “Xrákirá jahará tí tjen kjuachaxin kuènte T'aná kixin T'aná ó kjuíncheyaonrá ch'án. Tí naxa kjuích'énahya Dios chjasintajni la xráxín kjuenkayáxin ch'án xíkaha tsonhen. ³⁵ Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uia, la k'uájia éxí ijnko chojni kjuixin ikjín la jahará kjuánjonrá nketí k'ók'ána. ³⁶ La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjeherá tí janhan, la kjuak'échjina la ntá jahará kjuasántsjeherá tí janhan.” ³⁷ A ntá tí sín jína la tsjanhankí sín kixin: “Ínchéni, ¿nkesá k'uíkonní kixin ik'uén kjinta ntá kjuanjonní nkehe kjónte? ¿La nkesá k'uíkonní kixin ik'uén ntá la kjuanjonní nkehe ik'uia? ³⁸ ¿La ko nkesá k'uíkonní kixin ikjín kjuixian ntá kjuanjonní nketí k'ók'áha? ¿La ko nkesá k'uíkonní kixin chontahya iká la kjuanjonní ika k'uítsa? ³⁹ ¿La nkesá k'uíkonní kixin kóniha o kjuák'echjina la ntá kjuíjtsjeheni tí

jaha?” mé xikaha tsjanchankíhi sín ch'án. ⁴⁰ A ntá tí Rey tsontáchro kixin: “Tió kjuínkĩtsará ijnko kichó ni kjónté ijnko chojni nóé la mé yóhē kixin tí janhan chrókjuínkĩtsará.”

⁴¹ A ntá tí Rey t'etōan mé tsonixjehe tí sín tjejó nó tja ch'án kjon tsontáchro kixin: “Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuènte ch'án. ⁴² Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uia. ⁴³ K'uájia éxi ijnko nkexro kjuixín kjín la jahará kjuánjonhyará nketí k'ók'ána la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántsjehyará tí janhan.” ⁴⁴ Ntá tí jehe sín la tsjanchankí sín kixin: “Inchéni, ¿nkesá k'uíkoni kixin ik'uén kjinta la ik'uén ntá la ko kjuixian kjín la ko chontahya iká la ko níha la ko kjuák'echjina? ¿Mé nkesá k'uíkoni xikaha la ntá kjuínkĩtsahyani ti jaha?” tsixro sín. ⁴⁵ La ntá tí Rey tsjatehe ch'án tsontáchro ch'án kixin: “Tí xikaha kaín tíha kjuínkĩtsahyará ijnko chojni imá nóé la éxi xikaha kjuínkĩtsahyará tí janhan.” ⁴⁶ A ntá tí sín jínahya xikaha kjuích'e la mé sátsjixin sín ntihi tsjasóte sín jnkochrín. A ntá tí sín jína la sátsji sín ts'áyehē sín kjuachón jnkochrín —mé xikaha chrónka ch'ín Jesús.

26

Tí sín nínkakonhen ch'ín Jesús tjenkayáxin sín kixin nkexrí ts'óyán sín ch'án
(Mr. 14.1-2; Lc. 22.1-2; Jn. 11.45-53)

¹ Ntá kjuixín chrónka ch'ín Jesús kaín tíha, ntá nixjehe ch'án tí sín k'uájiko ch'án, ntáchro ch'án kixin:

² —Jahará ó nohará kixin t'itjayan iyó yaon ntá tsjasín sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etōan ntá tsjak'enkani sín ch'án ijnko ntacruz —ichro ch'ín Jesús.

³ Ntá tí sín nchat'á t'etōan la ko tí sín maestro tjako tí ley la ko tí sín táda kuènte tí sín judío mé kójnkotsé sín tí ntasin kuènte tí nchia kjuák'e ch'ín Caifás tí ch'ín nchat'á t'etōan. ⁴ Ntaha tjenkayáxin sín kixin nkexrí tsotsé sín ch'ín Jesús la ts'óyán sín ch'án. ⁵ A ntá ntáchro sín kixin:

—Tí siín kia la chrótséhyaní ch'án kixin imá tsonínkaon tí chojni —ichro sín.

Ijnko tjan kjuikao aceite xraxé kuikite tjan ikja ch'ín Jesús
(Mr. 14.3-9; Jn. 12.1-8)

⁶ Ch'ín Jesús tjen chjasín Betania ntōe ch'ín Simón tí ch'ín k'uéchóna chinlepra. ⁷ Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuíkaón aceite xraxé náxrjón la imá tjete k'uíte. A ntá tí tjene ch'ín Jesús ntá tí tjan a mé kuikite aceite ikja ch'án. ⁸ A ntá tí sín k'uájiko ch'ín Jesús mé k'uíkon sín xikaha ntá kónínkaon sín la ntáchro sín kixin:

—¿Nkekuènté kóxénhen tí xroan a? ⁹ Íchá jína chrókóxiixin itsjé chichaon tí xroan ntá tí chichaon a chrókjuínkĩtsa tí sín nóé a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntáchro ch'án kixin:

—¿Nkekuènté t'antaxínhínrá tí tjan i? Ó nchoxon ijnko nkehe jína kjuích'e tjan. ¹¹ Tí sín nóé la ó xráxin ts'ejókoará sín, a ntá janhan la jnkochrínnya ts'ejóni. ¹² Tí nkehe kjuích'e tjan mé kjuíncheke tjan aceite xraxé tí cuerpo kuèntana la mé xikaha kjuakoxín tjan kixin xikaha tsoxravána. ¹³ Ntá chaxín tjonkará kixin kuènté chjasintajni tió tsjako sín tí tán jína tsaáxin sín ntá tsochrónka sín kixin xikaha kjuích'e tjan ntá tsoxraxinkakonxín sín kixin nkehe tí kjuích'e tjan —ichro ch'ín Jesús.

Ch'ín Judas kjuínchekji tí ch'ín Jesús
(Mr. 14.10-11; Lc. 22.3-6)

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákuínixjehé ch'án tí sín nchat'á t'etoan ¹⁵ la ntáchro ch'án kixin:

—¿Nkekjaín tsochjinará tsoxrjanka nketí tjen tí ch'ín Jesús? —mé xikaha chro tí ch'ín Judas.

Ntá tí sín nchat'á t'etoan kjuenkehe sín ch'án treinta chichaon plata. ¹⁶ Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

Kjuixixín kjóneko sín tí ch'ín Jesús
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankixixín kia sine sín niotja tsíkjikohya tí xroan t'ánkixin niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kixin:

—¿Inchéni, nketí tjinkávan sincheyaxíxinni tí sineni tí kia pascua? —ichro sín.

¹⁸ Ntá ntáchro ch'án kixin:

—Sátsjirá Jerusalén la tsjasánrá ntøe ijnko ch'ín la nixjehérá ch'án tsontáchrórá kixin: “Ntáchro Maestro kuénténi kixin í séhya naxá tsjak'e ch'án la ntá ijie ntøa ntihi tsoyaxíxin kixin sineko ch'án tí sín xriko ch'án tí kia pascua”, tsixrorá —mé xikaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxíxin sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uéjoko tí teyó sín k'uájiko ch'án kjóne sín.

²¹ La ntá tió naxá tjejóne sín la ntáchro ch'ín Jesús kixin:

—Chaxín tjonkará kixin jnkojínrá tjejorá ntihi mé sinchekjirána —ichro ch'án.

²² Ntá kaín sín la kjuankíxin kóxakonhen sín k'uává sín la ntá kjuankíxin sín jnkojnko sín kjuanchankíhi sín tí ch'ín Jesús kixin:

—Inchéni, ¿á jeheni ní? —ichro sín.

²³ Ntá kjuátehe ch'ín Jesús kixin:

—Tí nkexro tsochr'ánkíxian niotja tí plato a mé tí nkexro a mé sinchekjina ch'án. ²⁴ Tí Xjeen Dios K'óna Chojni xikaha tsjasóte ch'án éxí nixja xroon itén Dios, a ntá nòa tí ch'ín sinchekji ch'án. Íchá jína chrókokjéhya ch'án —mé xikaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'ín Jesús kixin:

—Méxra xikaha tsintáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'ø ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tíhi mé cuerpo kuéntana —ichro ch'án.

²⁷ Na ntá kuákja ch'án ijnko vaso tjiá înté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá ²⁸ kixin tíhi mé jnina mé chrónkaxín ijnko nkehe nixin tsonhen. Mé tí jnina ts'ítji na mé tsjacha tsjinkítsa nchónhya chojni kixin ts'íjmáxin ijie sín. ²⁹ Tjonkará kixin ts'íhya janhan tí înté to uva inaá tsjixrakájia tí yaon ts'ayàjia kjuachaxin kuènte T'aná ntá xík'ini înté to uva inaá —mé xikaha ichro ch'ín Jesús.

Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuí sín tí jnə Olivo. ³¹ Ntá ntáchro ch'ín Jesús kixin:

—Jahará tsítōnaráni kaín rá ijie tie kixin ntáchro tí xroon itén Dios kixin: “Its'en tí nkexro Pastor t'ayakonhen kolélo ntá kaín tí ko mé tsjichroe va.”*

³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátehe ch'ín Pedro ntáchro ch'án kixin:

—Kjonté kaín sín tsítōha sín ntá janhan la náhí —ichro ch'án.

³⁴ Ntá ntáchro ch'ín Jesús kixin:

—Chaxín tsoxrjanka kixin tí tie i naxə tsotsjehya kochíntōa la ó sinchemána níya —ichro ch'án.

³⁵ Ntá ntáchro ch'ín Pedro kixin:

—Kjonté koína its'én la sintamáhya tí jaha —ichro ch'án.

La ntá kaín tí sín k'uájiko ch'án na xikaha ichro sín kaín sín.

Ch'ín Jesús chrónóehē ch'án It'é ch'án tí tjen ch'án tí Huerto Getsemaní

(Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemaní. Ntá jehe ch'án mé ntáchro ch'án kixin:

—Tjejorá ntiho ntá janhan sátsjia tsonixjaha T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankixin kóxakonhen ch'án la ko k'uává ch'án. ³⁸ Ntá ntáche ch'án tí iy'á sín kixin:

—Imá t'avá asenná éxí its'én ntá ts'axrje asenná. Ntá jahará ntiho tsitōhará ts'ejotsjehekoárána —ichro ch'án.

³⁹ Ntá sákjuí ch'án antsí kjínxin ntá kjuák'exín toch'in ch'án k'uísén ch'án hasta caxin kja ch'án nonte ntá chrónóehē ch'án It'é ch'án tjen nkaya nkajni, ntáchro ch'án kixin:

—It'eni, tí tjinkávan chrókjuinchekaáni kixin chrók'uihyani tí nkehe tsjá tjiá tí copa i. Kjánchó jehya éxí tjinkaonni jeheni. Náhí. Éxí tjinkávan jaha —ichro ch'án.

⁴⁰ Ntá ikjan ch'án tí kuítóhe sín la ó k'uíkon ch'án kixin tjejójua sín. Ntá nixjehe ch'án tí ch'ín Pedro ntáchro ch'án kixin:

—Xá xitjahya chrók'uejósjehekoarána ijnko hora. ⁴¹ Titōhará tjejotsjehérá la nixjehérá Dios kixin tsjinkitsará ch'án kixin chrókjuachroehyará ch'ín Tsochren. Asánrá tóxrjinhin kjánchó tí cuerpo chontará la imá ntá —mé xikaha ichro ch'ín Jesús.

⁴² Ntá sákjuí ch'án yóxin inaá chrónóehē ch'án It'é ch'án, ntáchro ch'án kixin:

—Jaha It'eni tí xitjahya tsjakjían tí nkehe tsjasótexinni la ntá tjinkaonni éxí jaha tjinkávan —mé xikaha ichro ch'án.

⁴³ Ntá ikjan ch'án la k'uíkon ch'án tjejójua tí sín k'uájiko ch'án inaá kixin tjehya sín kotáchrin. ⁴⁴ Ntá kuítóhe ch'án sín inaá la nixin sáxíkji ch'án ntá ó xikahó xínixja ch'án inaá. ⁴⁵ Ntá kjan ch'án tí k'uéjé sín la ntáchro ch'án kixin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án. ⁴⁶ Ntá ijie t'inkatjenrá sátsjini kixin ó kjui tí ch'ín sinchekjina —ichro ch'án.

Sákjuíko sín tí ch'ín Jesús tsjak'echjina ch'án ntōechiso

(Mr. 14.43-50; Lc. 22.47-53; Jn. 18.2-11)

* 26:31 Zacarías 13.7

⁴⁷ Ntá naxa tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuikao ch'án nchónhya chojni kjuíjiko sín chica espada la ko inta. Na mé kjuachaxién tí sín nchat'á t'etoan la ko tí sín táda kuènte tí sín judío mé kui sín. ⁴⁸ Ntá ch'ín Judas, tí ch'ín kjuínchekji, mé tsintáchro ch'án kixin:

—Tí ch'ín tsakihá tuéen ch'án na mé tsonoaxínrá kixin jehe ch'án. Ntá itserá ch'án —mé xikaha tsintáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehe ch'án ntáchro ch'án kixin:

—¿Á jína tjen, Maestro? —ichro ch'án.

Ntá kjóneko ch'án kochíto. ⁵⁰ Ntá kjuátehe ch'ín Jesús, ntáchro ch'án kixin:

—Amigo, á ó k'uinka tí xra tjinkávan sich'e?

Ntá xikaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án tatsjon ijnko tí sín ch'ehe tí nchat'á t'etoan xra. ⁵² Ntá ntáchro ch'ín Jesús kixin:

—Chr'axenhén tjoé chica espada méhe. Kaínxín tí sín tjà yaxin chica espada la xikaha ts'enxín sín. ⁵³ ¿Á noahyará kixin janhan jína chrókjuáncháha T'aná la ntá tuénxín chróchr'án ch'án teyó ejército sín ángel? ⁵⁴ Kjánchó tí xikaha chrókónhen la chróxiteyáhya éxí nixja xroon itén Dios kixin itén Dios mé chrónka kixin t'ichjánxin ó jehí xikaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsotserána éxí chrótserá ijnko síchee xikaha. A ntá kaín yaon kjuak'é nkaxenhen nínko kjuákua ¿na ntá nkexrí ntiha mé tsexinhyarána? ⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíkin xroon itén Dios ósé —ichro ch'án.

Mé xikaha ntá kaín tí sín k'uájiko ch'ín Jesús na mé kuítóhe sín ch'án, ntá sákjuí sín.

Ch'ín Jesús kóchjina ch'án tí síxreé t'etoan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuíko sín ch'án ntóe ch'ín Caifás, tí nchat'á t'etoan. Ntaha mé tsíkójnko sé kaín tí sín maestro tjako tí ley la ko tí sín t'etoan kuènte nínko. ⁵⁸ Ntá ch'ín Pedro ikjín tinkáchréhe ch'án ntá kjuíji ch'án tí ntasin ntóe tí nchat'á t'etoan la kjaxin k'uixenhen ch'án tí ntasin la kjuák'eko ch'án tí sín policía kuènte nínko kixin tsotsjehe ch'án nkerí tsonhen.

⁵⁹ Ntá tí sín nchat'á t'etoan la ko tí sín táda la ko kaín tí sín t'etoan mé kjueyá sín nkexrí ts'eka sín jie tí ch'ín Jesús kixin jína chrók'óyán sín ch'án. ⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó testigo ntoáhya chrónka sín ⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuènte Dios la ntá iní yaon koá la ó tsjaké inaá”† —mé xikaha chro sín.

⁶² Ntá tí nchat'á t'etoan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté tjáteéhya ninkehó? ¿Á chaxín xikaha tsintáchrúa éxí xikaha ichro sín? —ichro ch'án.

⁶³ Ntá ch'ín Jesús la táníkoá ch'án nixjahya ch'án. Ntá ntáchro tí nchat'á t'etoan kixin:

—Kjuachaxién ihnié tí Dios tjechón t'akjénxian chrónka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'ín Jesús ntáchro ch'án kixin:

† 26:61 Juan 2.19

—Éxí tí ntáchrua jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chóna kaín xín kjuachaxin la ko ts'ikuan ítjuí mé tsixin ch'án nkaya nkajní —ichro ch'ín Jesús.

⁶⁵ Ntá kuínhin tí nchat'á t'etoan la ntá imá kónínkaon ch'án ntá kótséchje ch'án tí iké ch'án la ntáchro ch'án kixin:

—Tí ch'ín a k'uántaxínhin ch'án Dios kixin xikaha nixja ch'án. Méxra t'ichjánxinya í so chojni tsochrónka. La ntá jahará la ó kuínhrá kixin nkexrí nixja ch'án. ⁶⁶ ¿A ntá jahará la, ¿nkechorá? —mé ichro tí nchat'á a.

Ntá kjuátehe sín ntáchro sín kixin:

—Chóna ch'án jie la chrók'uen ch'án —ichro sín.

⁶⁷ Ntá iso sín la kuikite sín ntate sín nkayakon ch'án na í so sín na kjuate sín ch'án la í so la chjéhe sín ikon ch'án. ⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án kixin chónhya ch'án tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro naxa tjetjaxin ch'án tí ntasin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xríkoa tí ch'ín Jesús tsíkjixin estado Galilea —ichro tjan.

⁷⁰ A ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrua —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uíkon tí jehe ch'án la nixjehe tjan kaín sín tjejóntaxín, la ntáchro tjan kixin:

—Tí ch'ín i la kjaxin k'uájiko ch'án tí ch'ín Jesús tsíkjixin chjasin Nazaret —ichro tjan.

⁷² Ntá ch'ín Pedro kjuínchemá ch'án inaá, k'uákjenxin ch'án ihnié Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'éxin tí sín k'uéjontaxín kóchjinehe sín ch'ín Pedro la ntáchro sín kixin:

—Chaxín jaha kjaxin jnkójín tí sín a kixin tjátsoanxínni tí nixja jaha —ichro sín.

⁷⁴ Ntá k'uákjenxin ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xrínahya itsje kochíntoa. ⁷⁵ Ntá ch'ín Pedro mé xraxinkaon ch'án kixin nkexrí chrónka ch'ín Jesús senó kixin: “Naxa tsotsjehya kochíntoa mé ó tsjixin sinchemána níya kixin chonhyana.”[‡] Ntá xikaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

27

Kjuikénhen sín ch'ín Jesús tí ch'ín Pilato

(Mr. 15.1; Lc. 23.1-2; Jn. 18.28-32)

¹ Ntá tí kóyaon k'uínkaséyan ntá kaín sín nchat'á t'etoan la ko tí sín t'etoan kuente tí sín judío kjuenkayáxin sín nkexrí ts'óyán sín tí ch'ín Jesús. ² Ntá tjechronseto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

Ik'uén ch'ín Judas

[‡] 26:75 Mateo 26.34

³ Ntá tí ch'ín Judas, tsíkjinčekji ch'ín Jesús, mé k'uíkon ch'án kixin ts'óyán sín tí ch'ín Jesús. La ntá xraxinkaon ch'án tí jie kjuasin ch'án la sákjuíkénhen ch'án sín inaá tí treinta chichaon plata kuákja ch'án, mé chjéhe ch'án tí sín nchat'á t'etoan la ko tí sín táda. ⁴ La ntá ntáchro ch'án kixin:

—Ó kjuasinni jie kixin kjuínčekjini ijnko nkexro tjóá —ichro ch'án.

À ntá jehe sín kjuátehe sín kixin:

—Ntá janhanna la nonahyana tíha. Tíha la ó jie kuènta —ichro sín.

⁵ Ntá ch'ín Judas mé sákjuík'e tí chichaon nkaxenhen njnko ntá sákjuí ch'án kjuísik'á isin ch'án nta.

⁶ Ntá tí sín nchat'á t'etoan kjuenájín sín tí chichaon la ntáchro sín kixin:

—Tí chichaon la kóxixín ijnié chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontee Tí Ch'ín Ch'éna Nchésen kixin tsochónta sín nketí tsoxravá tí chojni tsíkixín ikjín. ⁸ Mé xíkaha kjuínček'in sín tí nonte mé Campo Kuènte Jni la hasta ijie la naxa xíkaha nček'in sín. ⁹ Mé xíkaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'ín a), ¹⁰ la k'uénaxín sín tí nonte kuènte tí ch'ín ch'éna nchésen kixin xíkaha kjuínchexiteyá sín tí nkehe k'uetuanna Inchéni.”*

Ch'ín Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'ín Jesús sákjuíko sín ch'án nkayakon tí ch'ín gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús, ntáchro ch'án kixin:

—Éxí ntáchrúa jaha —ichro ch'án.

¹² Na ntá tí sín nchat'á t'etoan la ko tí sín táda t'etoan t'eka sín jie tí ch'ín Jesús kjánchó la ch'ín Jesús la ninkehó kjuáteheya.

¹³ À ntá ch'ín Pilato kjuanchankí ch'án kixin:

—¿Á kiénhya kaín tí jie t'eka sín tí jaha? —ichro ch'án.

¹⁴ Kjánchó ch'ín Jesús la ninkehó kjuáteheya ch'án. Ntá tí ch'ín gobernador la chrakon ch'án.

K'uetoan sín kixin its'en ch'ín Jesús

(Mr. 15.6-20; Lc. 23.13-25; Jn. 18.38—19.16)

¹⁵ À ntá tí kié pascua mé kuènenhén tí ch'ín gobernador kixin jnkojnko nánó takitsjexín ch'án ntóechiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji. ¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás. ¹⁷ Ntá itsjé chojni kójnkotsé la ntá ch'ín Pilato mé kjuanchankí ch'án kixin:

—¿Nkexro tjinkáonrá ts'atjánta, á tí ch'ín Barrabás o á tí ch'ín Jesús nček'in sín Cristo? —ichro ch'án.

¹⁸ Kixin tí ch'ín Pilato la ó nohe ch'án kixin kjuachjinoxínhin chóna tí sín kjuíkaán tí ch'ín Jesús.

¹⁹ Ntá jehe ch'án naxa tjetjaxín ch'án tí nčekitoexíxin ch'án ijie chojni la ntá tí ichjién ch'án mé k'uetuénhen tjan ijnko chojni tsjichénka ch'án kixin tsjiatéhya ch'án tí nkexro jína kixin kóntó náxrjónhya k'uíkonxín tjan kotáchrién tjan kixin tí jehe ch'án.

* 27:10 Zacarias 11.12-13

20 **A** ntá tí sín nchat'á t'etōan la ko tí sín táda t'etōan a mé nixjehe kaín tí chojni tsíkóhjna kixin chrókjuanchia sín kixin chrókuítóhe ch'án tí ch'ín Barrabás sáchrókjui, a ntá ch'ín Jesús mé chrók'uen. 21 **A** ntá tí ch'ín gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

22 **A** ntá ch'ín Pilato mé kjuanchankí ch'án kixin:

—¿A ntá nkehe sít'ahá tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátehe sín kixin:

—¡Tsjak'enkáni ch'án ntacruz! —ichro sín.

23 Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuích'e tí ch'ín i kixin? —ichro ch'án.

Ntá antsí má itsen k'uíxite sín, k'óyako sín, ntáchro sín kixin:

—¡Tsjak'enkáni ch'án ntacruz! —ichro sín.

24 Ntá ch'ín Pilato k'uikon ch'án kixin í kohya tsjitóxinhin sín tsjenkayáxin sín la antsí má k'uíxité sín, nínkaon sín, la ntá kjuanchia ch'án xrakao sín ìnta, la nkayakon kaín tí sín tsíkójnkotsé ntaha k'ònti ch'án tja ch'án. La ntáchro ch'án kixin:

—Janhan tsámáhya jie tí its'en tí nkexro í chóntahya jie. Jahará xikaha tjinkáonrá tsonhen —ichro ch'án.

25 Ntá kaín sín kjuátehe sín kixin:

—Jeheni la ko xjeenni mé yámáni tí jie tí its'en tí nkexro i —ichro sín.

26 Ntá ch'ín Pilato kuítóhe ch'án kixin sáchrókjui tí ch'ín Barrabás. Ntá tuénxín k'uetōan ch'án kixin tsjate sín tí ch'ín Jesús la ntá kjuínchek'áyéhe ch'án tí sín tsjak'enkáni sín ch'án ntacruz.

27 **A** ntá tí sín soldado a mé sákjuiko sín tí ch'ín Jesús tí palacio kuènte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án. 28 Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. 29 La kjuak'enkáya sín kja ch'án ijnko corona tsíkjich'éna sín ntach'í la ko kjuanjon sín ijnko nta vara kixin tjenkáya tja ch'án chjina. La ntá k'uéjoxin toch'in sín nkayakon ch'án la kjuanoá sín ch'án, ntáchro sín kixin:

—Jnkochrín tsjak'é tsétuēnhén tí sín judío —ichro sín.

30 La ko kjaxin ntaté sín kuíkite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án. 31 Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxín. Ntá sákjuiko sín ch'án kixin tsjak'enkáni sín ch'án ntacruz.

Kjuák'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

32 **A** ntá sákjuixin sín ntiha la xéta sín ijnko ch'ín kjuixin ch'án chjasin Cirene, mé it'in ch'án Simón. Ntá k'uetuēnhen sín ch'án kixin tsámá ch'án tí ntacruz tsjak'enkáni ch'ín Jesús.

33 Ntá kjuíji sín ijnko tjo it'in Gólgota na mé nkívee sín t'axrjexín Nta Hueso Kja Chojni Tsík'en. 34 Ntá chjéhe sín ch'ín Jesús xranvino tsík'ixinkíkjanxín xroan tsjá kjánchó jehe ch'án k'uíhya ch'án.

35 **A** ntá tí sín soldado kjuixin kjuak'enkáni sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xikaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuích'exín sín tí kaná.”† 36 Ntá tí sín soldado ntaha k'uéjonta sín t'ayakonhen

† 27:35 Salmo 22.18

sín ch'án. ³⁷ Ntá kjuak'enkani sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuenhen tí sín judío.”

³⁸ Kjaxin yaá tí síchee k'uéjónyáni sín ntacruz ijnko la nó tja chjina la í jnko la nó tja kjon. ³⁹ Ntá tí sín tinkák'atsínka mé kjuanoá sín ch'án tinkátjía kja sín ⁴⁰ la ntáchro sín kixin:

—Jaha ntáchrua kixin chrók'oxíka tí nínko a ntá iní koá yaon la ó chrókjuixin chrókjuich'éna ínaá, † ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxián tí ntacruz méhe —ichro sín.

⁴¹ La ntá kjaxin tí sín nchat'á t'etoan la ko tí sín maestro tjako tí ley la ko tí sín fariseo la ko tí sín k'uetoan kuènte nínko kjuanoá sín ch'án, ikjo sín kichó sín kixin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuènte Israel ntá jehó ch'án chrókjuinkajinxin ch'án asén ch'án tí ntacruz kixin ntá kjaxinni chrókuitekaonni tí jehe ch'án. ⁴³ Jehe ch'án tsintáchro ch'án kixin Dios tjinkitsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxínhin sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkixin hasta las tres kónjin mé k'uixin tie chjasintajni. ⁴⁶ Ntá tí hora a ch'ín Jesús itsen k'uèya ch'án, ntáchro ch'án kixin:

—Elí, Elí, ¿lama sabactani? —mé tíhi t'axrjexín kixin: It'éni, It'éni, ¿nkekuènté kuitohéni? § —mé xikaha ichro ch'án.

⁴⁷ Ntá iso sín tjejontaxín kuínhin sín ntá ntáchro sín kixin:

—Tí ch'ín a mé t'íyehé tí ch'ín profeta Elías —ichro sín.

⁴⁸ Ntá ijnko ch'ín kuinká ch'án sákjuikakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjinjin ntá kjuínchechrin ch'án kixin chrók'ui ch'ín Jesús.

⁴⁹ Ntá í so sín ntáchro sín kixin:

—Nté títoghé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án ínaá, ntá kjuixin ik'uén ch'án. ⁵¹ Mé ntá tuénxín k'uíchje tí ka tjenkákuènxín nkaxenhen nínko. Mé k'uíchje tí ka k'óna yaá tí kjuankixixín noi hasta nonte. La ko kuínkí nonte la ko tí tjo la kjaxin xitjehe. ⁵² La ko ó xitjehe tí tòye tsíxravá chojni la ko ó xechón itsjé tí sín k'uékinkáchónki Dios. ⁵³ Kaín tí sín a mé k'uaxrjexín sín tí tòye, la tió kjuixin xechón ch'ín Jesús ntá k'uíxehen sín tí chjasin tjóá mé chjasin Jerusalén la ntaha itsjé chojni k'uíkon kixin xíxechón tí sín a.

⁵⁴ Ntá tí ch'ín capitán la ko tí sín k'uéjoko ch'án, mé tí sín t'ayakonhen ch'ín Jesús, na ntá k'uíkon sín kuínkí nonte la kaín tí í so nkehe la ntá imá chrakon sín, la ntáchro sín kixin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ikjín tjejó sín, tjejótsjehe sín. Jehe sín k'uékinkáchréhe sín ch'ín Jesús tí kjuixin ch'án estado Galilea kixin mé ntiha kjuankixixín sín k'uékjinkitsa sín ch'án. ⁵⁶ Ntaha kjaxin tjen tjan María Magdalena la ko tjan María, ìné tí ch'ín Jacobo, la ko ch'ín José la ko tí ìné tí xjeen tí ch'ín Zebedeo.

Ntá xrává ch'ín Jesús

(Mr. 15.42-47; Lc. 23.50-56; Jn. 19.38-42)

† 27:40 Juan 2.19 § 27:46 Salmo 22.1

⁵⁷ Ntá tí ó ntá kóntó ikui ijnko ch'ín it'in José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús. ⁵⁸ Ntá tí ch'ín José sákjuítsjehe ch'án ch'ín Pilato kjuíkjanchia ch'án tí cuérpóé tí nkexro Jesús. Ntá ch'ín Pilato mé kjuanjon ch'án kjuachaxin. ⁵⁹ Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá. ⁶⁰ Na ntá kjuak'enkaya ch'án ijnko tòye nixin kuènte ch'án kixin senó tsíkjach'éna ch'án. Ntá ijnko xro jíé k'uíkjàxín ch'án tí ntója tí tjo, ntá kjuixin ntá sákjuí ch'án. ⁶¹ Ntaha kjuák'e tí tjan María Magdalena la ko í jnko tjan María tjejótxaxin sín ntoí chok'èxin tjen tòye.

Tí sín soldado k'uáyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nchát'á t'etóan la ko tí sín fariseo sákjuítsjehe sín tí ch'ín Pilato ⁶³ la ntá ntáchro sín kixin:

—Ó xraxinkaonni kixin tió naxa kjuák'echón tí nkexro kjuích'ia la tsíntáchro ch'án kixin ts'atsínka iní yaon ntá tsoxechón ch'án inaá, tsíchro ch'án. ⁶⁴ Méxra tsétuènhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhí, la kjá tie itsi tí sín k'uájiko ch'án la tseé sín tí cuerpo kuènte ch'án la ntá chr'éxin tsochéna sín chojni kixin ó xíxechón tí nkexro a, mé xíkaha sich'ia sín. La ntá tí xíkaha sich'e sín antsí má sich'ia sín que tí xrankíxixín —mé xíkaha ichro sín.

⁶⁵ Ntá ntáchro ch'ín Pilato kixin:

—Ntihi tjejó soldado. Sátsjirá la ts'ayakonhenrá jína tí tòye éxí tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkèxin tí tòye la kuítóhe sín tí sín soldado ntahó kixin ts'ayakonhen sín.

28

Ó xechón ch'ín Jesús

(Mr. 16.1-8; Lc. 24.1-12; Jn. 20.1-10)

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankíxixín semana, la ntá tjan María Magdalena la ko tí í jnko tjan María sákjuítsjehe sín tí tsíkjàxravá Jesús. ² Ntá xrínahya kuínkí nonte imá tjian kixin ijnko ángel kuènte Inchéni k'uínkajinxin nkaya nkajní la kjuíji ch'án tí tsíxravá Jesús la kjuakjín ch'án tí xro a tjejkèxin tòye la ntá chrítaón tí xro a kjuák'ekjen ch'án. ³ Tí ángel la imá tjákini tsjehe éxí ijnko xrohi la tí iké ch'án la imá tjóá tsjehe éxí chrinta. ⁴ Tí sín soldado mé k'uíkon sín xíkaha la ntá síxranka sín chrakon sín la éxí tsík'en sín xíkaha k'uéjó sín. ⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nòna kixin xritjéyará tí nkexro Jesús mé tí nkexro tsíkjak'enkáni ntacruz. ⁶ Kjánchó í kohya ch'án ntihi ó tsíxechón ch'án inaá éxí chrónka ch'án senó. Xrákirá tsjehérá tí tsíkjak'e sín ch'án, í kohya ch'án. ⁷ Ntá sátsjirá tjoka tjíchenkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntja sátsji ch'án estado Galilea. Ntiha ts'ikonrá ch'án”, mé xíkaha tsochronkará. Káin tíha mé tjonkará —mé xíkaha chrónka tí ch'ín ángel.

⁸ A ntá tí chojni chjin tjoka sákjuíxin sín tí tsíxravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús. ⁹ Ntá xrínahya titàya k'uíkuèn sín kixin itjen tí ch'ín Jesús la nixjehe sín ch'án. Ntá kóchjinehe sín ch'án la kjóá sín toté ch'án, kuítekaon sín ch'án. ¹⁰ La ntáchro ch'án kixin:

—Chrakonhyará sátsjirá tjíchenkará tí sín kíchó ni kixin sáchrókjuí sín estado Galilea la ntaha ts'ikon sín tí janhan —mé xíkaha ichro ch'ín Jesús.

Tí nkehe chrónka tí sín soldado

¹¹ Tió sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchat'á t'etoan kaín tí nkehe tsíkónhen tí k'uéjó sín ntiha. ¹² Ntá tí sín nchat'a t'etoan kjuínixjehé sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado. ¹³ La ntáchro sín kixin:

—Chronkará kixin tí tie naxa tjejochrinrá ikui tí sín k'uék'ajiko tí nkexro Jesús, mé kueé sín cuerpo kuente ch'án, ichrorá. ¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án kixin tsonínkakuanhyará ch'án —mé xikaha ichro tí sín nchat'á.

¹⁵ La ntá tí sín soldado k'uáyéhe sín tí chichaon la sákjuí sín la xikaha kjuích'e sín éxí k'uítuenhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

*Ch'ín Jesús k'uētuenhen ch'án tí sín k'uék'ajiko ch'án tí xra sich'e sín
(Mr. 16.14-18; Lc. 24.36-49; Jn. 20.19-23)*

¹⁶ A ntá tí tejnko sín k'uék'ajiko ch'ín Jesús sákjuí sín ijnko jna estado Galilea kixin xikaha tsík'etoan ch'ín Jesús. ¹⁷ Ntá k'uíkon sín ch'ín Jesús la ntá kuinkáchónki sín ch'án kjónté iso sín naxa kjuenkayáxin á chaxín jehe ch'án o náhí. ¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajní la ko chjasintajni. ¹⁹ Méxra sátjirá kaín xín nación la tjácohérá chojni kixin tsitekaon sín tí janhan. Tíkítexínrá sín kjuachaxiэн ihnié It'éni la ko ihnié tí Xjeen la ko Nchakuэн Dios. ²⁰ Tjácohérá sín kixin sinchexiteyá sín kaín xín nkehe kuétuanhanrá. Ijie la ó nohará kixin tsjak'é ts'ejokoará jnkochrín hasta tsjeje chjasintajni. Mé xikaha tsonhen. Amén —ichro ch'ín Jesús.

Tí tan jína chrónka ch'ín Marcos

*Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)*

¹ Xikihi mé xrankíxixín tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin: Janhan tsochr'an ijnko nkexro tsochrónka tan kuèntana tsitónxin ntia, kixin tsjasiyóxin ch'án ntia kuèntá.*

³ Ntá tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixin Inchéni, takitjehérá ijnko ntia ntoí.”†

⁴ Tíha mé xíteyá ikui ch'ín Juan Bautista, mé xikaha kjuák'e ch'án nteje kuikite ch'án chojni. Kjuakohe ch'án chojni ntiha kixin chrókjuinkí sín tí nkehe tjenkayáxin sín chrókuítóhe sín tí ijíé sín ntá chrókuikite sín kixin xikaha mé chrókjuin ijíé sín. ⁵ Itsjé chojni kuixin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jje yámá sín ntá ch'ín Juan mé kuikite sín ch'án ntario Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje. ⁷ Mé kjuák'ekjakohe ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuàna chrókjuasintanka tí correa tí tokaté ch'án. ⁸ Janhan mé ìnta ó kuikite sín. Ntá jehe ch'án mé tsikite sín ch'án tí Nchakuen Dios —ichro ch'ín Juan.

*Ch'ín Juan kuikite ch'án tí ch'ín Jesús
(Mt. 3.13-17; Lc. 3.21-22)*

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuikite sín ch'án tí ntario Jordán. ¹⁰ Tió k'uaxrjenkixin ch'ín Jesús tí ìnta, ntá xrínahya titàya k'uikuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án.

¹¹ Ntá xrínahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

*Ch'ín Tsochren chrókjuachroe tí ch'ín Jesús kixin chrókjuasin ch'án jje
(Mt. 4.1-11; Lc. 4.1-13)*

¹² Ntá tí Nchakuen Dios mé sákjuíko tí ch'ín Jesús nteje. ¹³ Kjuák'e ch'án cuarenta yaon tí nteje la ko ntiha mé k'uixin ko jjehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

*Ch'ín Jesús kjuankíxixín kjuako ch'án estado Galilea
(Mt. 4.12-17; Lc. 4.14-15)*

¹⁴ Kjuixin kjuák'echjina ch'ín Juan ntóechiso ntá ch'ín Jesús na mé sákjuí ch'án nó estado Galilea sákjuíkakohe ch'án tí sín ntiha tí tan jína kuènte Dios.

¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etōan ch'án. Chrókuítóhérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xikaha kjuako ch'ín Jesús.

* 1:2 Malaquías 3.1 † 1:3 Isaías 40.3

Ch'ín Jesús k'uíyehē noó tí sín itsé koche
(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kichó ch'án mé it'in Andrés, mé koche xritsé sín, ntá tinkák'e sín tí nchísén chrínkí ntá. ¹⁷ Ntá ntáchro tí ch'ín Jesús kixin:

—Chréhérá tí janhan, ntá tsotjahará xra tsjéyará chojni —ichro ch'án.

¹⁸ Ntá tuénxín kuítóhe sín tí nchísén k'uétséya sín koche ntá sákjuíko sín ch'án.

¹⁹ Ntá kjínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehe sín la ko tí it'é sín tjejóxenhén sín tí ntabárcō tjejójtjonité sín tí nchísén tséya sín tí koche. ²⁰ Na ntá ch'ín Jesús mé k'uíyehē tí jehe sín kixin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'an tí ntabárcō la ko tí sín tjinkítsa ch'án ch'e xra. A ntá jehe sín sákjuíko sín ch'ín Jesús.

Ijnko chojni chóna injnko nchakuen tí jínahya
(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uixenhén ch'in Jesús tí nínko Israel. Na ntá ntaha mé kjuankíxin ch'án kjuako ch'án. ²² A ntá tí chojni siín ntiha mé chrakon sín kuínhin sín tí nkehe kjuako ch'án kixin kjuakoxin ch'án kixin chóna ch'án kjuachaxin, la jehya éxí tí sín maestro tjako tí ley, ichro sín. ²³ Ntá tí nínko Israel chjasin ntiha itjen injnko chojni chóna injnko nchakuen tí jínahya k'uíyato ntáchro kixin:

²⁴ —¿Nkekuènté tjiaté tí jeheni kaín ni? Jaha Jesús kjuíxian Nazaret. ¿Á k'uinka kixin sinchek'itjáyaní? Janhan mé ó kjuátsoan tí jaha, la ko nóna kixin jaha tí nkexro tjóá kuènte Dios —mé xíkaha ichro tí nchakuen tí jínahya.

²⁵ Ntá ch'ín Jesús mé k'uétuēnhén tí nchakuen tí jínahya ntáchro ch'án kixin: —Tániá, t'axrjéxian tí jehe ch'án —mé xíkaha ichro ch'ín Jesús.

²⁶ A ntá tí nchakuen tí jínahya mé kjuínchek'aniáte tí ch'ín a la ko k'uíyatoxín tsen ntá k'uaxrjexín tí ch'ín a. ²⁷ A ntá kaín sín chrakon sín ntá kjuanchankíhi sín kichó sín, ntáchro sín kixin:

—¿Xá nkexro tíha kixin tjako ch'án nkehe nixin? Jehe ch'án chóna kjuachaxin kixin t'etuēnhén ch'án tí nchakuen tí jínahya la titekakonhen —mé xíkaha ichro sín.

²⁸ A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'ín Jesús a.

Ch'ín Jesús kjuínchekitohe jína tí ich'ee tí ch'ín Simón Pedro
(Mt. 8.14-15; Lc. 4.38-39)

²⁹ Ntá tí ch'ín Jesús mé k'uaxrjexín ch'án tí nínko, a ntá tuénxín sákjuíko ch'án ch'ín Jacobo la ko ch'ín Juan, sákjuí sín ntōe ch'ín Simón la ko ch'ín Andrés.

³⁰ Ntá tí ich'ee ch'ín Simón na tjetsínka tjan, níhi tjan kixin chóna tjan sóa. Ntá chénka sín tí ch'ín Jesús. ³¹ Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuíinhin tjan tí sóa chóna tjan. Ntá kjuanjón tjan nkehe sine sín.

Ch'ín Jesús kjuínchekitohe jína nchónhya chojni níhi
(Mt. 8.16-17; Lc. 4.40-41)

³² A ntá tió kjuíátaón yaon tió k'uíxin tie kuíkohe sín tí ch'in Jesús kaín tí sín níhi la ko tí sín chóna nchakuen jínahya; ³³ na ntá kuenté chjasin kójnkotsé sín k'uíxintankí sín ntója tí nchia a. ³⁴ Ntá kjuínchekitohe ch'án jína kaín tí chojni níhi chóna nchónhya clase chin la ko kuakítsje ch'án kaín tí nchakuen tí jínahya. Na í kjuanjónhya ch'án kjuachaxin kixin tsonixja tí nchakuen tí jínahya kixin ó kjuátsoan tíha nkexro tí jehe ch'án.

*Ch'ín Jesús mé kjuako ch'án estado Galilea
(Lc. 4.42-44)*

³⁵ Ntá naxa sítié k'uàya ch'ín Jesús k'uaxrjexín ch'án tí chjasin a sákjui ch'án nteje kixin ntiha nixjeexín ch'án It'é ch'án tjen nkaya nkajní. ³⁶ Ntá ch'ín Simón la ko tí sín xriko ch'án mé sákjuikjeyá sín ch'án. ³⁷ Ntá k'uitja sín ch'án ntá chénka sín kixin:

—Kaín sín xritjeyá sín tí jaha —ichro sín.

³⁸ Ntá ntáchro ch'ín Jesús kixin:

—Sátsjini ókjé chjasin chjinaxón kixin ntaha kjaxin tsjákoḥa sín tí tan jína, kixin xikaha mé tí k'uaxrjexian chjasin ntiha.

³⁹ Ntá nkuíxín estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chónṭa sín.

*Ch'ín Jesús kjuínchekitoḥe jína ijnko ch'ín chónṭa chinlepra
(Mt. 8.1-4; Lc. 5.12-16)*

⁴⁰ Ntá kui ijnko ch'ín chónṭa chinlepra kjuák'exín toch'in ch'án nkayakon ch'ín Jesús ntá chrónóḥe ch'án ntáchro ch'án kixin:

—Tí tjinkávan jaha la jína chrókjuínchekitoḥéni jína —ichro ch'án.

⁴¹ Ntá ch'ín Jesús na imá kuikonóḥe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xikaha tjinkávan. Ntá jie sintakitoha jína —ichro ch'án.

⁴² A ntá xikaha ntáchro ch'án ntá tuénxín kjuin tí chinlepra ntá kuítóḥe ch'án jína. ⁴³ Ntá k'uētuenhen ch'ín Jesús tí ch'ín a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sátsja tjákoḥé tí ch'ín nchāt'á kixin ó kjuinhan tí chinlepra la ko tjánjuan tí nkehe tsík'etōan ch'ín Moisés‡ kixin tsonoexín kaín xín chojni kixin ó kuítóḥa jína —ichro ch'án.

⁴⁵ A ntá tí ch'ín tsíkitoḥe jína, a ntá sákjuí ch'án kjuankíxín ch'án chénka ch'án kaín xín chojni kixin nkexrí kuítóḥe ch'án jína. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuíxín chjasin.

2

*Ch'ín Jesús mé kjuínchekitoḥe jína ijnko chojni tsík'en toté
(Mt. 9.1-8; Lc. 5.17-26)*

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uixikónohe chojni kixin ijnko nchia ntiha kjuák'e ch'án. ² Ntá tuénxín nchónhya chojni kóchjina ntá kjuachahya tí nchia k'uixixenhen sín la ko kjaxin kjuachahya tí ntója nchia chrók'uixintankí sín. A ntá ch'ín Jesús kjuako tí tan jína kuènte Dios. ³ Ntá kui noó sín tinkátsénki sín ijnko ch'ín tsík'en toté ch'án. ⁴ Kjánchó xitjahya kóchjina sín tí tjen ch'ín Jesús kixin nchónhya chojni sín. La ntá k'uit'ótjen sín tí chrítaón nchia a ntá k'óxrat'o sín. Na ntá ijnko hno kjuak'ete sín tí kania tjenkáya tí sinníhi a ntá kjuinkajin sín ntoí tí tjen ch'ín Jesús a. ⁵ Tió k'uíkon ch'ín Jesús tí nkehe kjuích'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjeḥe ch'án tí sinníhi ntáche ch'án kixin:

—Xjeenni, ó kjuixin kjuinhan tí jie chonta —mé xikaha ichro ch'án.

⁶ Na ntá iso tí sín maestro tjako tí ley tjejótjaxin sín ntiha na ntá jehó sín mé kjo sín asén sín kixin: ⁷ “¿Nkekuènté xikaha nixja tí ch'ín i ncheyóḥe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chónṭa

‡ 1:44 Levítico 14.1-32

kjuachaxin tsjatsen ijié chojni”, mé xikaha ikjo sín asén sín. ⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xikaha tjenkayáxinrá? ⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìnhin ch'án tí jie yámá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaniee ch'án ntá sáchrókjui ch'án? ¹⁰ Méxra jie tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjlinhin ijié chojni —ichro ch'án.

Ntá ntáche ch'án tí ch'ín xitjahya tji kixin:

¹¹ —Jaha tétuanhan t'inkatjen, tjenájían kaniaa na sátjia ntoa —ichro ch'án.

¹² A ntá tí sinníhi na tuénxín k'uinkatjen ch'án kjuák'exín toté ch'án na kjuenájín ch'án kaniee ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín siín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uikonhyéni tí nkehe i —ichro sín.

*Ch'ín Jesús k'uíyehé ch'ín Leví
(Mt. 9.9-13; Lc. 5.27-32)*

¹³ A ntá chr'éxin ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. ¹⁴ Ntá k'uátsínka ch'án k'uíkon ch'án tí ch'ín Leví xjeen ch'ín Alfeo tjetjaxin ch'án tjenchekjènkj ch'án. Ntá ch'ín Jesús mé k'uíyehé ch'án, ntáchro ch'án kixin:

—Chréhé tí janhan —ichro ch'án.

Ntá ch'ín Leví mé tuénxín k'uinkatjen ch'án chréhe ch'án tí ch'ín Jesús.

¹⁵ A ntá ch'ín Jesús kjuák'e ch'án ntoe tí ch'ín Leví, la ntá kjuanjon sín nkehe sine ch'án la ko kjaxin k'uéjónchónhya tí sín nchekjènkj la ko kjaxin í so chojni chóna jie. Mé kaín tí sín a mé tjejótxaxin sín tjejóneko tí ch'ín Jesús la ko tí sín k'uájiko ch'án, kixin nchónhya chojni chréhe sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uíkon sín kixin ch'ín Jesús tjejóneko kaín tí sín nchekjènkj la ko tí í so sín chóna jie, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuéntará neko ch'án la ko t'ikao ch'án tí sín nchekjènkj la ko tí í so sín chóna jie? —ichro sín.

¹⁷ Na ntá ch'ín Jesús kuínhin ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. Janhan na k'uinkahya ntihi kixin chrók'uíyaha chojni jína tjejó sín. Náhí. K'uinka kixin ts'iyaha chojni chóna jie —ichro ch'án.

*Tjanckankíhi sín tí ch'ín Jesús kixin á chrókjónehya sín tió tsonixjehe sín Dios
(Mt. 9.14-17; Lc. 5.33-39)*

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kixin mé xikaha ts'áyéhe sín kjuaxróxin, ichro sín. A ntá kui iso chojni nixjehe sín tí ch'ín Jesús ntáchro sín kixin:

—¿Nkekuènté kixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

¹⁹ Ntá kjuátehe ch'ín Jesús ntáchro ch'án kixin:

—¿Xá chrókjónehya tí chojni tsík'íyehé sín kóchjina ijnko kia tsotehe chojni tí naxa tjejóko sín tí nkexro tsotehe? Tí naxa tjen tí nkexro tsotehe la xitjahya kixin chrókjónehya sín. ²⁰ A ntá itsi ijnko yaon itsi chojni sátsjiko sín tí ch'ín tsíkótehe, ntá tí yaon la chaxín sinehya sín.

21 'Ninkexró chrókjuak'eniēhe ijnko ka ó ntaxin it'o ka nixin kixin ntá chrókjuixéhe tí ka nixin ntá antsí má chrók'uichje tí ka ntaxin a. 22 La ko kjaxin ninkexró chrókuiķia xran vino nixin ijnko tjuaxran ó ntaxin; kixin tí xran vino nixin la chrókótséchje tí tjuaxran ntaxin ntá chrók'uitjayan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigo ijnko yaon t'ok'éhe sín (Mt. 12.1-8; Lc. 6.1-5)

23 Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte siín noatrigo. Na ntá tí sín k'uájiko ch'án kjuankixin sín ik'uín sín iso noatrigo. 24 Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuèté kixin tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ok'éheni —ichro sín.

25 Ntá kjuátehe ch'án ntáchro ch'án kixin:

—¿Á kjuinchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta? 26 A ntá jehe ch'án k'uixenhen ch'án ntoe Dios tió kjuák'e nchat'á Abiatar k'uetōan, a ntá kjóne ch'án tí niotja tsíkóyaon kjónté jehó tí sín nchat'á mé k'uéchónta kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

27 Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin t'ichjánxin sín, la jehya kixin chrókjuikosáyehe tí yaon a. 28 A ntá tí Xjeen Dios K'óna Chojni mé chóna kjuachaxin ts'etōan nkehe tsonhen tí yaon t'ok'éheni —ichro ch'án.

3

Ijnko chojni tsixámá tja

(Mt. 12.9-14; Lc. 6.6-11)

1 Ntá ch'ín Jesús k'uixenhen ch'án ijnko njnko Israel inaá. Na mé ntiha tjen ijnko ch'ín tsixámá ijnko tja ch'án. 2 Na ntá kóchjina iso chojni tsáyehe sín ch'ín Jesús ts'ikon sín kixin á sinchekitohe ch'án jina tí ch'ín tsixámá tja tí yaon t'ok'éhe sín kixin mé jina tsjanchia sín jie, ichro sín. 3 Ntá ch'ín Jesús mé ntáche ch'án tí ch'ín tsixámá tja a kixin:

—T'inkatjen, tjak'e jnkosiné ntihi —ichro ch'án.

4 A ntá kjuanchankíhi ch'ín Jesús tí sín siín ntiha kixin:

—¿Nkehe siín kjuachaxin tsonhen tí yaon t'ok'éheni? ¿Á chrókjuich'eni tí jina ní o á chrókjuich'eni tí jinahya? ¿Á chrókjuinchekitoheni chojni jina ní o á chrók'óyánni chojni? —ichro ch'án.

A ntá jehe sín la tánikoá sín. 5 Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín ts'ikonóehē sín chojni. Na ntá k'uetuenhen ch'án tí ch'ín a kixin:

—Tjéntoá tja —ichro ch'án.

A ntá kjuéntoá ch'án tja ch'án la ó kuítóhe tja ch'án jina. 6 Na ntá tí sín fariseo a k'uaxrjexín sín njnko sákjuí sín k'uíto sín tí sín kuènte ch'ín Herodes ntá kjuenkayáxinko kichó sín kixin nkexrí chrók'óyán sín tí ch'ín Jesús.

Nchónhya chojni siín chrínta ntayaon

7 Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea 8 la ko chjasín Jerusalén la ko estado Idumea la ko

* 2:26 1 Samuel 21.1-6; Levítico 24.5-9

ikjé sín kuixin sín nó tóhe ntarío Jordán la ko iso sín tsíkixin sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jie kjuasin ch'ín Jesús ntá kuichréhe sín ch'án kixin chrók'uikon sín tíha kjaxin. ⁹ Ntá k'uetuēnhen ch'án tí sín k'uájiko ch'án a kixin ntahó chrókjuak'e chonhen sín ijnko ntabarco. A ntá tí imá chrók'uixitja sín ch'án ntá chrók'uixenhen ch'án tí ntabarco, a ntá ntiha chrókjuak'e ch'án tsochrónka ch'án. ¹⁰ Kixin itsjé chojni tsíkjinchekitohe ch'án jína, na ntá kaín xín tí sín níhi k'uixitja sín ch'án kixin tjinkaon sín chrókuákoxin sín ch'án. ¹¹ Kjaxin tí sín chóna nchakuen tí jínahya na mé tió k'uikon sín tí ch'ín Jesús ntá k'uejoxin sín toch'in sín nkayakon ch'án. Ntá k'oyako tí nchakuen tí jínahya a ntáchro kixin:

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

*Ch'ín Jesús kjueyá ch'án teyó sín ts'ajiko ch'án
(Mt. 10.1-4; Lc. 6.12-16)*

¹³ A ntá chr'éxin chr'in ch'ín Jesús ijnko jna, a ntá ntiha k'uíyehē ch'án tí sín tjinkaon ch'án chrók'uajiko ch'án ntá kóchjinehe sín ch'án. ¹⁴ Ntá kjueyá ch'án teyó tí sín ts'ajiko ch'án kixin ts'etuēnhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchakuen tí jínahya chóna chojni. ¹⁶ A ntá tí sín i mé tí teyó sín tsíkjejá ch'án mé it'in sín xikihi: Simón na mé kjuínchek'in ch'án Pedro; ¹⁷ la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuente tí sín cananista, ¹⁹ la ko Judas Iscariote, mé kjuínchekji tí ch'ín Jesús chr'éxin.

*Ntáchro sín kixin ch'ín Jesús chóna kjuachaxin kuente tí jínahya
(Mt. 12.22-32; Lc. 11.14-23; 12.10)*

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia. ²⁰ A ntá inaá kójnkotsé nchónhya chojni, a ntá xitjahya sine sín. ²¹ Ntá kónohe tí sín naxa kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

²² Kjaxin tí sín tjako ti ley kuixin sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuēnhen kaín tí nchakuen tí jínahya ntá xikaha tjacha ch'án takitsje ch'án nchakuen tí jínahya a —ichro sín.

²³ Ntá ch'ín Jesús k'uíyehē ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? ²⁴ A ntá tí sín t'etoan ijnko nación tjanjonko kichó la tsjachahya ts'etoan. ²⁵ La ko kjaxin tí sín jnkokoá ntoe jnkokoáhya tjenkayáxin sín ntá xitjahya ts'ejóko kichó sín. ²⁶ A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjayan kjuachaxin kuente.

²⁷ 'Ninkexró tsjacha ts'ixenhen ntoe ijnko chojni jiehe kixin ts'axrjehe tí nkehe chóna ch'án. Náhi. T'ichjánxin saxín sinchenteto ch'án tí ch'ín jiehe kixin jína tseéhe ch'án nkehe chóna tí ch'ín a.

²⁸ 'Ijnko nkehe chaxín tsotjonkará kixin tió tsoxraxinkaon ijnko chojni tí jie chóna la ko tsochronóehē Dios la ntá tsjakjinhin ch'án kaín tí jie la ko kaín tí nkehe jínahya tsintáchro sín. ²⁹ A ntá tí nkexro ts'ántaxinhin tí Nchakuen Dios na mé xitjahya tsjin tí jie na mé jnkochrín tsochóna sín tí jie a —ichro ch'án.

³⁰ Mé xikaha ichro ch'án kixin tí sín a tsíntáchro sín kixin ijnko nchakuen tí jínahya mé chóna tí jehe ch'án.

*Tí iné la ko kichó ch'ín Jesús
(Mt. 12.46-50; Lc. 8.19-21)*

³¹ A ntá kui iné ch'ín Jesús la ko kichó ch'án tjejó sín ntója ó na ntá k'uetuēnhen sín ijnko chojni tsjik'íyehē ch'án. ³² A ntá tí sín tjejótxaxin tí tjen ch'ín Jesús ntiha chénka sín ch'án kixin:

—Iná la ko kichuá tjejó sín ntója xritjeyá sín ti jaha. —ichro sín.

³³ Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejótxaxin tí tjen ch'án ntá ntáchro ch'án kixin:

—Jahará mé nana la ko kichiná. ³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

4

*Kjuíncheyóexin ch'án éxi ijnko chojni t'enka nonte
(Mt. 13.1-9; Lc. 8.4-8)*

¹ Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabarco tjenkátaón nta k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójnkotsé mé kuítóhe sín chrínta ntayaon k'uejókínhin sín.

² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuík'enka nontee. ⁴ Mé xikaha sákjuík'enka ch'án iso tí noatriga a. Ntá iso noa la tsík'ánótjen ntia ntá kui koxroxe k'uínka va tí noa. ⁵ A ntá iso noa na mé k'uitji chrik'á xro tí kohya itsjé nche ntá tjoka k'uayan kixin tjínhya chóna nche. ⁶ A ntá tió kjuiton yaon la ntá tí ka la chján; la ko chónahya nuèe a ntá xamá. ⁷ A ntá í so noa kjuítsínkak'á tí síin kach'í la ntá tí kach'í k'uánkí la ntá tí noa í k'ónahya kixin síntja tí kach'í. ⁸ A ntá iso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

*Ch'ín Jesús chronkaxín nkexrí t'axrjexín tí nkehe ntáchro ch'án
(Mt. 13.10-17; Lc. 8.9-10)*

¹⁰ A ntá chr'éxin, tió kuítóhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. ¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuíntayóaxuán kaín nkehe kuínhin sín. ¹² Kixin kjónté ts'ikon sín la éxi k'uíkonhya sín, la ko kjónté tsinhin sín la tsienxínhya sín kixin ntá chrók'uixitoxinhya tí tjenkayáxin sín a la ko chrókjuinhinhyá tí ijié sín* —ichro ch'án.

*Ch'ín Jesús chrónkaxín nkexrí t'axrjexín tí nkexro sákjuík'enka
(Mt. 13.18-23; Lc. 8.11-15)*

¹³ Ntá ntáche ch'án sín kixin:

—¿Á kiénxinhyará jahará nkexrí t'axrjexín tí nkehe kjuíntayóaxian ní? ¿A ntá nkexrí chrókiénxinrá tí í so nkehe naxa sintayóaxian? ¹⁴ A ntá tí nkexro sákjuík'enka tí tje a mé yóhe ijnko nkexro sákjuík'jako itén Dios. ¹⁵ A ntá iso

* 4:12 Isaías 6.9-10

chojni la éxí tí tje kjuítsínka ntia; kixin kuínhin sín itén Dios, ntá chr'éxin ó kui ch'ín Tsochren kjuínchek'itjáyan ch'án tí tan jína kuínhin sín. ¹⁶ A ntá í so chojni la éxí yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín. ¹⁷ Kjánchó nínkahya chóna nuèe, a ntá séhya kuitohe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios. ¹⁸ A ntá í so chojni la éxí yóhe tí tje k'uínka chrík'á kach'i na mé kuínhin sín itén Dios ¹⁹ kjánchó tóxakonhen sín tí nkehe siín chjasintajni la ko tí nkehe tjete tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xikaha la xitjahya sich'ehe sín xra Dios. ²⁰ A ntá í so chojni kuínhin tí itén Dios na kuinkáchónki sín la ntá xikaha jína ch'ehe sín Dios xra. La iso sín la éxí yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xikaha ichro ch'ín Jesús.

*Ch'ín Jesús mé kjuíncheyóexin éxí ijnko xrohi tjeche
(Lc. 8.16-18)*

²¹ Kjaxin ntáchro ch'ín Jesús kixin:

—¿Á chrókuikaonni xrohi tjeche chrókjuak'emá chrínki ntacajón o chrínki cama? Kjá náhi. Tí xrohi la noi chrókjuak'e ts'inkaséyanxín. ²² Mé xikaha kaín tí nkehe tjejomá jie tsonoxín chr'éxin la ko kaín tí nkehe ninkexró noehya jie la tsonoxín chr'éxin. ²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókjuenkayáxinrá jína tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhéra tí jahará tjejontinhinrá. ²⁵ A ntá tí nkexro chóna nkehe la antsí má ts'ayéhe sín. A ntá tí nkexro chóntahya la kjónté tí ntsí chóna la ts'axrijehe —ichro ch'án.

Ch'ín Jesús mé kjuíncheyóexin ch'án éxí ijnko tje ts'ayan ts'ánki

²⁶ Kjaxin ntáchro ch'ín Jesús kixin:

—Tí kjuachaxin t'etōan Dios tóyóhe ijnko chojni sátsjik'enka nonte. ²⁷ Ntá sákjuík'ajua ch'án tí tie la ko k'uàya ch'án tí nchítjen. A ntá xikahó k'uátsínka iso yaon la ko iso tie, a ntá tí tje la k'uayan la k'uánkí. A ntá tí nkexro k'uēnka la noehya ch'án nkexrí kónhen tíha. ²⁸ A ntá tí nche mé kjuích'e xra jehó. Senó k'uayan tí chaon tí ka, a ntá kjuintaa, a ntá chr'éxin icha tí noa tsjinjin; ²⁹ a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsotjá sín.

*Ch'ín Jesús kjuíncheyóexin ch'án éxí ijnko tje it'in mostaza
(Mt. 13.31-32; Lc. 13.18-19)*

³⁰ Kjaxin ntáchro ch'ín Jesús kixin:

—¿Nkehe chrókóyóhe tí kjuachaxin t'etōan Dios, nkehe chrókóyóexin tíha? ³¹ Mé éxí yóhe tí tje it'in mostaza tsík'inka nonte. Tíha mé ijnko tje imá ntsí, a ntá tí í so tje siín chjasintajni la kénhyó. ³² A ntá jnkonaá tsík'inka tí tje la tsík'ayan tsík'ánki imá ihyé, a ntá tí í so nta la kánhyó. A ntá kjaxin tí chaon tí nta tsík'ánki imá ihyé, a ntá kjónté koxroxé xritjaka la jína ts'ok'éhe va chrínki tí ts'van chaon tí nta.

*Nkehe tí xra kjuích'e tí nkehe kjuíncheyóexin ch'ín Jesús
(Mt. 13.34-35)*

³³ Mé xikaha ch'ín Jesús kjuakohe ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókjuacha chrókienxín sín tíha. ³⁴ Kaínxín

nkehe kjuakohē ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe kjuíncheyóexin ch'án.

Ch'ín Jesús k'uētuenhen ch'án tí xrinto la ko tí ntá síchrica kixin ts'ixita
(Mt. 8.23-27; Lc. 8.22-25)

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

³⁶ Ntá kuítóhe sín kaín tí chojni a ntá sákjuíko sín tí ch'ín Jesús naxa tjenkáya ch'án tí ntabárcō la ko kjaxin í so ntabárcō sákjuí koí. ³⁷ Ntá xrínahya tjian chjéhe xrinto la ntá síchrica ntá t'ixenhen tí ntabárcō, ó mero tsokaón ntá tí ntabárcō. ³⁸ A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárcō a tjejkón ch'án ijnko ka. Na ntá kjuínchekjaya sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni ntá ní? —ichro sín.

³⁹ A ntá ch'ín Jesús k'uàya ch'án, k'uētuenhen ch'án tí xrinto la ko tí ntá kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xrinto la ko tí ntá k'uíxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuènté kixin imá chrakonrá? ¿Á naxa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kíchó sín kixin:

—¿Xá nkexro tíhi? Kjónté xrinto la ko ntayaon la mé kjuínchexiteyéhe ch'án —ichro sín.

5

Ijnko chojni chóna nchónhya nchakuen tí jínahya nonte Gadara
(Mt. 8.28-34; Lc. 8.26-39)

¹ Ntá tió k'uátòye sín tí ntayaon, a ntá kjuíji sín tí nonte Gadara. ² Ntá k'uínkajinxin ch'ín Jesús tí ntabárcō a. Ntá xrínahya xeta ch'án ijnko ch'ín kuixin nó tsíkjixravá chojni mé chóna ch'án ijnko nchakuen tí jínahya. ³ Tí ch'ín a mé kjuák'e ch'án tí tsíkjixravá chojni. Ninkexró tjachahya sinchenteto ch'án kjónté cadena tjachahya. ⁴ Nchónhya veces kjuínchentetoxín sín ch'án cadena toté ch'án la ko itja ch'án, la kjónté kóchríton ch'án kjuínchekuen ch'án tí cadena. Kohya ninkexro tjacha ts'etuenhen tí jehe ch'án. ⁵ K'uék'aji ch'án nchakotjin la ko tie t'iyato ch'án nó jna la ko tí tsíkjixravá chojni la ko chjéhe asén ch'án xro. ⁶ Na ntá k'uíkon ch'án kixin kui ch'ín Jesús kjónté ikjín la kuínká ch'án kjuíji ch'án kjuák'exín toch'in ch'án nkayakon ch'ín Jesús a ⁷ k'óyako ch'án ntáchro ch'án kixin:

—¿Nkekuènté tjiaté jaha tí jeheni, jaha Jesús Xjeen Dios tjen nkaya nkajní? Dios nchenoheni kixin xrjanóaha nchekjasótehyani —ichro ch'án.

⁸ Mé xikaha ichro ch'án kixin tsíntáchro ch'ín Jesús kixin:

—Jaha nchakuen tí jínahya, títóhé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónóehē ch'án tí ch'ín Jesús kixin tsochr'ánhya ch'án ókjé tí nchakuen tí jínahya. ¹¹ Na ntá siín nchónhya cochíno xrine va chjinaxón tí jna ntiha. ¹² A ntá chrónòā tí nchakuen tí jínahya ntáchro kixin:

—Tétuenhenni sátsjini tí siín tí cochíno, t̄it̄ohé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexín tí ch'ín a sákjuí kjuík'ixenhen tí cochíno a. Na ntá kaín xín tí ko a mé chjina iyó mil va siín va xrine va. Na mé kaín xín va k'uínkajinxin va ntiha kjuítsínkayá va tsaka ntá kjuítsínkankí va ntayaon ntá kjuínhin va ntá.

¹⁴ Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nont̄ee chojni. Na ntá itsjé chojni mé kuitsjehe sín nkehe tí tsíkónhen ntiha. ¹⁵ Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchónta tí nchónhya nchakuen tí jínahya senó la ó jina tjen ch'án tjetj̄axin ch'án tjenkáya ch'án iké ch'án, na ntá chrakon sín. ¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchónta tí nchakuen tí jínahya la ko nkexrí kónhen tí cochíno a. ¹⁷ Ntá kjuankixin sín chrónóeh̄e sín tí ch'ín Jesús a kixin sáchrókjuixin ch'án ntiha.

¹⁸ A ntá ó ts'it'ótjen ch'ín Jesús tí ntabárco na ntá tí ch'ín k'uéchónta nchakuen tí jínahya na mé chrónòna ch'án kixin kjaxin ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjonha ch'án kjuachaxin sátsjiko sín ch'án. Náhí. K'uet̄oan ch'án kixin:

—Sátjia nt̄oa t̄jichenka tí sín nax̄a kjéhya tí jaha kixin nkexrí kaín tí kjuaxroan jje kjuasin Dios kjuínchekit̄oha jina kuíkonóaha ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankixin chrónka ch'án kaín tí chjasin kuente Decápolis kixin nkexrí kaín tí nkehe kjuích'e ch'ín Jesús kjuínchekit̄ohe ch'án jina. A ntá kaín tí sín kuínhin na chrakon sín.

*Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Lc. 8.40-56)*

²¹ Ntá tió xikjank̄ao ch'ín Jesús tí ntabárco tóhe tí ntayaon inaá ntá kóchjina nchónhya chojni ntá ntahó chrínta nt̄a kuít̄ohe ch'án inaá. ²² Na ntá ikui ijnko ch'ín t'et̄oan kuente n̄inko mé it'in ch'án Jairo. A ntá tió k'uíkon ch'án kixin itjen ch'ín Jesús ntá kjuák'exín toch'in ch'án chrínkí toté ch'ín Jesús a ²³ imá chrónóeh̄e ch'án kixin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'étja itj̄a chrítaón kja xjan ntá chrókuit̄ohe xjan jina —ichro ch'án.

²⁴ Ntá ch'ín Jesús sákjuíko tí ch'ín a. Na nchónhya chojni chréhe sín tinkák'ixitja sín ch'án inaá. ²⁵ A ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni. ²⁶ Imá tjote tjan kixin nchónhya chojni kjuanjon xroan kónhen tjan na ó kjuixin kjuèhe tjan kaín xín nkehe k'uéchónta tjan. Ó jehí tit̄oehya tjan jina la íchá ntsí tinkákótao tjan. ²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án, ²⁸ ntáchro tjan kixin kjónté iké ch'án ó chrókuakóxin tjan na ó tíhó mé chrókuit̄ohe tjan jina, ichro tjan. ²⁹ Ntá tuénxín tí jni na mé ó kjuixié tjan la ko kónohe tjan kixin ó kjuixin kuít̄ohe tjan jina ti chin k'uéchónta tjan. ³⁰ Ntá ch'ín Jesús na ó kónohe ch'án kixin kjuachaxién ch'án mé kuít̄oexín ijnko chojni jina ntá kuinkátjía ch'án kjuanchankíhi ch'án tí chojni siín a kixin:

—¿Nkexro kuákóxin tí kaná? —ichro ch'án.

³¹ Ntá kjuát̄ehe tí sín k'uajiko ch'án a ntáchro sín kixin:

—Ó noha kixin nchónhya chojni sítja, ¿ntá nkekuènté kixin nax̄a tjanchankiá kixin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuíxín kixin t̄sonohe ch'án nkexro tí kuákóxin tí ké ch'án. ³³ Ntá tí tjan a na mé chrakon tjan síxrànk̄a tjan ó nohe tjan kixin ó kuít̄ohe tjan jina ntá xrakoa tjan kjuák'exín toch'in tjan nkayakon

ch'ín Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'ín Jesús kixin:

—Xjeenni, kaín asán kuinkachónkia tí janhan ntá kuítóha jína. Ijie la kjuaxróxin sátsjia ntóla la ó kuítóha jína a —ichro ch'án.

³⁵ Na ntá naxa tjenixja ch'án ntá ó kui chojni kuixin sín ntóe tí ch'ín t'etóan tí nínko. Ntá chénka sín ch'án kixin:

—Xjaan na ó kjuixin k'uén. ¿Nkekuénté naxa chjehé xra tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjehe ch'án tí ch'ín t'etóan tí nínko ntáchro ch'án kixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín. ³⁸ Na ntá tió kjuíji sín tí ntóe tí ch'ín t'etóan tí nínko na k'uíkon sín kixin imá sítjité sín tsjankàma sín tí xjan a. ³⁹ Ntá k'uixenhen ch'ín Jesús nchia kjuanchankí ch'án kixin:

—¿Nkekuénté ánta tjasitérá tsjankàmará tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetóan ch'án kixin kaín sín sátsji sín ntója. Ntá kjuíko ch'án tí it'é la ko tí iné xjan la ko tí iy'á sín xriko ch'án ntá k'uixenko sín ch'án tí tjen tí xjan a. ⁴¹ Itsé ch'án tja xjan ntá nkivee xjan mé nixjeexín ch'án ntáchro ch'án kixin:

—Talita, cumi —mé t'axrjexín kixin: Lonchí, tétuanhan kixin t'aya.

⁴² A ntá tí xjan a ó chónka tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni siín ntiha la chrakon sín k'uíkon sín xikaha.

⁴³ Ntá fuerte k'uetóan ch'ín Jesús kixin chróchenkahya sín ninkexró. La kjaxin k'uetóan ch'án kixin tsjanjon sín nkehe sine tjan.

6

Ch'ín Jesús kjuák'e ch'án chjasin Nazaret

(Mt. 13.53-58; Lc. 4.16-30)

¹ A ntá chr'éxin k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkixin ch'án. ² Na ntá tió kui tí yaon t'ok'éhe sín ntá kjuankixin ch'án kjuakoxin ch'án tí nínko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxrakohé tí ch'ín i kaín tíhi? ¿Nketí kuixin tí kjuaxrexinkaon chónka ch'án la ko tí kjuaxroan tjasin ch'án? ³ ¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxra tahya sín kuentá nkerí ch'e ch'án. ⁴ Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntóe ch'án na mé tjikosáyehya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitóhe ch'án sín jína. ⁶ Ntá chrakon ch'án kixin xikaha kuítekakuenhya sín ch'án. Na ntá k'uáji ch'án tí chjasin ntsínsí chjinaxón ntiha kjuako ch'án.

Ch'ín Jesús mé ichr'án tí teyó sín kixin sátsji sín tsjikjako sín itén Dios

(Mt. 10.5-15; Lc. 9.1-6)

⁷ Na ntá k'uíyehé ch'ín Jesús tí teyó sín k'uajiko ch'án a. Ntá kjuankixin k'uetuenhen ch'án kixin yóyó yóyó sín sátsji sín la ko kjaxin kjuanjon ch'án

kjuachaxin kixin tsakitsje sín nchakuen tí jínahya chóna chojni. ⁸ La ko k'uetōan ch'án kixin ninkehó tsjikohya sín kuente ntia. Jehó tí nta tjixin sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tokate ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'án kixin:

—A ntá tí ts'ixenhénra ijnko nchia a ntá ntaha tsjanjon sín kjuachaxin na ntahó chókuitōhará. A ntá tsjixinjian tí xra ntá sátsjixinrá ntiha. ¹¹ Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrjéxinrá tí chjasin a ntá ts'oxènjnra tí nche chóna totará kixin xikaha tsjákoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitoexín ijie chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakohe sín tí chojni a kixin mé chrókjuítóxinhin sín ntie sín. ¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuikite sín itsjé chojni níhi a la ntá kuítóhe sín jina.

Ik'uén ch'ín Juan Bautista

(Mt. 14.1-12; Lc. 9.7-9)

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóna tí ch'ín a —ichro ch'ín Herodes a.

¹⁵ A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etōan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanhia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kixin ts'óna ichjién ch'án. ¹⁸ A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kjánchó xitjahya ²⁰ kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jina la ko tjóá asén la méxra kuítóehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjinhin ch'án tí nkehe kuínhin ch'án kjuako ch'ín Juan. ²¹ A ntá tí tjan Herodías mé kjuacha tjan tí yaon kia tsíkjitoxinhin nánó tí ch'ín Herodes a kixin tsík'íyehé ch'án tí síxreé la kó tí sín k'uetuēnhen tí sín soldado la ko tí sín t'etōan estado Galilea kixin itsi sín ntōe ch'án kixin siín kia. ²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjinhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanhia tjan kjónté jnkosiné tí chjasin t'etōan ch'án. ²⁴ Ntá jehe tjan na mé kuínhin tjan ntá sákjuí tjan chénka tjan iné tjan kixin tsintáchro ch'ín Herodes

kíxin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kíxin:

—¿Nkehe tí chrókjuanchiani? —ichro tjan.

Ntá tí ìné tjan mé ntáchro kíxin:

—Ijie la itjia tjanhia tí kja tí ch'ín Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kíxin:

—A ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

²⁶ Na ntá tí ch'ín rey la mé imá k'uává ch'án kíxin xikaha kjuanchia tjan kjánchó tsikjinchenohe ch'án Dios la ko tsíkinhin kaín tí sín tsík'íyehé ch'án, la ntá xitjahya tsontáchro ch'án “Náhi” tí nkehe kjuanchia tjan. ²⁷ Na ntá tuénxín k'uetuenhen ch'án ijnko ch'ín soldado kíxin tsjikao ch'án tí kja ch'ín Juan a. ²⁸ Ntá tí ch'ín soldado mé sákjuí ntøechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan ìné tjan.

²⁹ Na ntá kuínhin kaín tí sín k'uék'ajiko ch'ín Juan kíxin xikaha tsíkónhen. Na ntá sákjuíkakja sín tí cuérpøe ch'án ntá kjuikao sín ntá sákjuíkjavá sín.

Ch'ín Jesús mé kjuanjon nkehe kjóne in'ó mil chojni

(Mt. 14.13-21; Lc. 9.10-17; Jn. 6.1-14)

³⁰ A ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xrə kjuích'e sín na ko nkexrí kjuako sín. ³¹ A ntá ntáchro ch'ín Jesús kíxin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kíxin sásítji la ko síti nchónhya chojni na ntá xrankahya ts'ejó sín sine sín. ³² Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárco sákjuí sín ijnko nonte jehó tjen. ³³ Na ntá itsjé chojni k'uíkon sín kíxin sákjuí sín la ko kjuátsøan sín kíxin ch'ín Jesús. Ntá xrákuaxín sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús. ³⁴ Ntá k'uínkajinxín ch'án tí ntabárco, a ntá k'uíkon ch'án kíxin nchónhya chojni siín ntiha ntá kuíkonóehé ch'án tí jehe sín na mé éxí yóhe kolélo tjejó sín chóntahya va nkexro ts'ayakonhen va. Ntá kjuankíxin ch'án kjuakohe ch'án sín nchónhya nkehe a. ³⁵ Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kíxin:

—Ntá ó kóntó la kohya ninkexró tjejó ntihi ³⁶ na ntá jaha chrókuítohé sín kíxin sátsji sín tí chjasin chjinaxón a tsjik'ena sín nkehe kíxin chóntahya sín nkehe sine sín —ichro sín.

³⁷ A ntá ch'ín Jesús kjuátehe ch'án ntáchro ch'án kíxin:

—Chjéhe sín nkehe sine sín —ichro ch'án.

Ntá kjuátehe sín ntáchro sín kíxin:

—¿Á tsjik'enani iyó ciento denario niotja tsochjehéni sin sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kíxin:

—¿Nkekjaín niotja chontará? Sátjítsehérá —ichro ch'án.

Ntá sákjuítsehe sín na ntá chrónka sín kíxin:

—In'ó niotja la ko yaá koche mé siín —ichro sín.

³⁹ Na ntá k'uetøan ch'án kíxin kaín xín sín chrók'uixitjaxín sín tí chrítaón tí ka yoa a. ⁴⁰ Na ntá xikaha kójnkojié sín ciento sín la ko cincuenta sín k'uixitjaxín sín. ⁴¹ Na ntá ch'ín Jesús kuákja ch'án tí in'ó niotja na ko tí yaá koche ntá konta ch'án nkajní ntá kjuanchia ch'án kjuasáyé Dios. Na ntá

kóchrít'ò ch'án tot'ò tí niotjã a ntá chjéhe ch'án tí sín k'uájiko ch'án kixin ts'óxikayehé sín sine tí sín síin a la ko kjaxin kóchrít'ò ch'án tí yaá koche ntá k'óxikayehé sín kixin sine sín kaín sín. ⁴² Ntá kaín xín sín kjóne sín kókjehe sín. ⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ò tí niotjã la ko tí koche tsíxehé. ⁴⁴ A ntá tí sín kjóne na mé in'ó mil chojni ntoa.

Ch'ín Jesús mé tjitaón ntayaon
(Mt. 14.22-27; Jn. 6.16-21)

⁴⁵ A ntá tuénxín k'uētuenhen ch'ín Jesús tí sín k'uájiko ch'án kixin ts'it'ótjen sín tí ntabárcø a ts'atòye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxã kuítóhe ch'án nixjehe ch'án kaín tí sín síin a. ⁴⁶ Kjuixin nixjehe ch'án sín na ntá jehe ch'án chrin ch'án ijnko jnã tsonixjeexín ch'án Dios. ⁴⁷ A ntá tió k'uíxin tie ntá tí ntabárcø na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chrínta ntayaon. ⁴⁸ Ntá kotohe ch'án k'uíkon ch'án kixin imá xra tjiko sín tí ntabárcø a kixin tí xrinto imá chjéhe. Nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjuí ch'án. ⁴⁹ A ntá tí k'uíkon sín kjuítaón ch'án ntá, ntá kjuenkayáxin sín kixin kjuacha sín, ichro sín, ntá k'óyako sín ⁵⁰ kixin kaín sín k'uíkon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'uit'ótjen ch'án tí ntabárcø tí tjejó sín, a ntá tí xrinto la ó k'uíxratá. Ntá imá chrakon sín kixin xíkaha kónhen ⁵² kixin kienxínhya sín tí kjuaxroan kjuích'e ch'án kuènte tí niotjã kixin naxã kénhya asén sín kuinkáchónki sín ch'án.

Ch'ín Jesús mé kjuínchekitohe jína tí chojni níhi tí nonte Genesaret
(Mt. 14.34-36)

⁵³ Ntá tió k'uátòye sín tí ntayaon ntá kjuíji sín tí nonte Genesaret ntá kjuak'echroé sín tí ntabárcø a tí chrínta ntá. ⁵⁴ Na ntá tió k'uínkajinxín sín tí ntabárcø, a ntá tí sín síin ntiha tjoka kjuátsoan sín tí ch'ín Jesús. ⁵⁵ Ntá sákjuí sín nkuíxín chjinaxón ntiha kjuankíxin sín kuíkao sín tí sinníhi tinkátsénki sín kuíkao sín tí tjen ch'ín Jesús. ⁵⁶ La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí sinníhi a chrínta ntá. Na ntá chrónóehé sín tí ch'ín Jesús kixin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jína.

7

Tí nkehe nchekjita asén chojni
(Mt. 15.1-20)

¹ A ntá iso sín fariseo la ko iso tí sín tjako tí ley kuíxin sín chjasin Jerusalén ntá kóchjinehe sín tí ch'ín Jesús. ² Tí sín a, tió k'uíkon sín kixin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrjexín kixin kjuínchexiteyáhya sín tí ley, ntá kjonta tí sín a. ³ (Mé xíkaha kjuích'e sín kixin tí sín fariseo la ko kaín tí sín judío mé kuinkáchónki sín éxi k'uékjich'e tí sín táda ósé kixin ná t'ontó itja sín ntá sine sín. ⁴ Na ko tí tsokjanxin sín ntsin ná t'onti sín ntá sine sín. Na ko kjaxin itsjé í so nkehe tinkáchónki sín, éxi tjonemá sín tí vaso t'iyá sín nkehe la ko tí nchésen la ko tí chj chjányan nkehe ne sín la ko tí kámé sín nchetjóá sín.) ⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjé ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsíntáchro ch'án kixin ntoáhya tsjenkayáxinrá tí jahará kixin xíkíhi tsíkjin ch'án ntáchro ch'án kixin: Tí chojni tí chjasin i ir'va ó xraxinkakonxín sín tí janhan, a ntá tí asén sín ikjín kuítóhe sín tí janhan

⁷ Méxra ó chónkó tóchjina sín xraxinkaon sín tí janhan, kixin tí nkehe tjako sín la tí nkehe tsík'etoan chojni ó.*

Mé xíkaha ichro itén Dios. ⁸ Ntá jahará kuítóhérá tí nkehe tsík'etoan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'íará nkehe, la ko kjaxin í so nkehe yóhé tinkachónkirá —ichro ch'án.

⁹ Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xíkaha títóhérá ntáha tí nkehe tsík'etoan Dios. ¹⁰ Tsíntáchro ch'ín Moisés kixin: “Tsochonteherá kjuasáyé it'ará la ko ñará”, la ko “A ntá tí nkexro t'ántaxínhin it'é o ñé la chrók'oyán sín.”† ¹¹ A ntá jahará ntáchrórá kixin ó nchoxon kixin ijnko nkexro tsochéna it'é la ko ñé kixin: “It'éni, ñéni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios). ¹² A ntá xíkaha jnkojín nkexro tsontáchro ch'án tíhi ntá jahará tsontáchrórá kixin í t'ichjánxinhya tsjinkitsa ch'án tí it'é ch'án la ko tí ñé ch'án. ¹³ A ntá tí xíkaha la títóhérá tí nkehe tsík'etoan Dios éxí sínkíhya, a ntá ókjé nkehe ich'erá, ntá tánkíhará chojni. Mé xíkaha ich'erá nchónhya nkehe tóyóhé tíha —ichro ch'ín Jesús.

¹⁴ Na ntá k'uíyehé ch'ín Jesús tí chojni inaá ntáchro ch'án kixin:

—Tinhínrá kaín rá tí nkehe ntáxrjan la ko tiénxinrá. ¹⁵ Tí nkehe ine chojni la jehya jie tíha. Tí nkehe t'axrjeníxin asén chojni mé jie tíha. ¹⁶ Tí tjinkáonrá chrókuinhínrá la chrókuinhínrá —ichro ch'án.

¹⁷ A ntá tíó kuítóhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uíxenhen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a. ¹⁸ Na ntá ntáchro ch'ín Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jie ¹⁹ kixin jehya asénni sátsji? Tí nkehe ineni na sátsji nkaya tseeni na ko xik'axrje inaá —ichro ch'án.

Mé t'axrjexín kixin tí nkehe sineni la jehya jie.

²⁰ Ntá ntáchro ch'ín Jesús kixin:

—A ntá tí nkehe t'axrjeníxin chojni na mé jie táha. ²¹ Nkaya asánrá mé t'axrjeníxin tí jínahya tjenkayáxinrá, la ko tí tjachehe kíchuará, la ko tí tjinkáonrá tsochontará chojni chjin ókjé, la ko tí t'oyán kíchuará ²² la ko tí chrókuéerá, la ko tí tjaké asánrá tí nkehe chóna ókjé sín, la ko tí jínahya ch'ehérá kíchuará, la ko tí kjuach'ia xrikoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na ko tí chontahyará kjuaxrexinkaon jína. ²³ Kaín tí nkehe jínahya a mé t'axrjeníxin chojni, la mé tjasixín sín jie.

*Ijnko tjan tsíkjin kjin mé kuítekaon tjan tí ch'ín Jesús
(Mt. 15.21-28)*

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uíxenhen ch'án ijnko nchia kixin tjinkakonhya ch'án kixin chrókónohe chojni kixin ntaha tjen ch'án. Kjánchó xitjahya kjuák'emá

* 7:7 Isaías 29.13 † 7:10 Éxodo 20.12; 21.17

ch'án ntiha. ²⁵ Na ntá ijnko ìné ijnko tjan tjarisoá chón̄ta ijnko nchakuen tí jínahya mé kuínhin nkehe tí x̄ra ch'e ch'ín Jesús kíxin tjasin ch'án kjuaxroan, ntá tuénxín kui tjan kjuák'exín toh'in tjan chrínkí toté ch'ín Jesús. ²⁶ Na mé jehe tjan tsíkjixín kjín, na mé tsíkjixín tjan nó nación Sirofenicia. Na ntá jehe tjan a mé kui tjan chrónóeh̄e tjan tí ch'ín Jesús kíxin chrókuakitsje ch'án tí nchakuen tí jínahya chón̄ta xjeen tjan.

²⁷ Ntá ntáchro ch'ín Jesús kjuátehe ch'án kíxin:

—Títóhé senó chrókjóne tí xjan. Jehya tí jína chrókuakítsjah̄a xjan tí niotja ntá chrótjah̄a konīa chrókjóne va —ichro ch'án.

²⁸ Ntá jehe tjan kjuátehe tjan ntáchro tjan kíxin:

—Chaxín xíkaha, Ìnchéni. Kjánchó kjónté tí konīa tjejoyánkí mesa ine tí tot'ó niotja tóxènjín tí chánjan —ichro tjan.

²⁹ Na ntá ntáchro ch'ín Jesús kíxin:

—Táha la chaxín ntoá ntáchr̄ua. Sátjia kíxin tí nchakuen tí jínahya ó k'uaxrjexín tí xjaan —ichro ch'án.

³⁰ A ntá tió kjuíji tjan ntoe tjan, na ntá k'uúkon tjan kíxin tí xjeen tjan na mé ó ntoá tjetsínkaták'a xjan tí cama kíxin ó tsík'axrje tí nchakuen tí jínahya a.

Ch'ín Jesús mé kjuínchekitoh̄e jína ijnko ch'ín tienhya la ko nixjahya

³¹ Ntá ch'ín Jesús mé ó k'uaxrjexín ch'án ínaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea. ³² Ntá kuikao sín ijnko ch'ín tienhya na ko ntoáhya nixja ch'án. Ntá chrónóeh̄e sín tí ch'ín Jesús a kíxin tsjak'etja tja ch'án chrítaón kja tí ch'ín a kíxin tsitoh̄e ch'án jína. ³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenh̄en ch'ín Jesús tatsjon tí ch'ín tienhya. La ko kjaxin tí dedo tja ch'án mé kuikite ch'án ntaté ch'án ntá kjuínchekákóxín ch'án nejen tí ch'ín nixjahya a. ³⁴ Ntá konta ch'án nkajní k'uáváxin ch'án na ntá nixjehe ch'án tí ch'ín tienhya a, ntáchro ch'án kíxin:

—Efata —mé t'axrjexín nkívee sín kíxin: ¡Tsoxitjehe!

³⁵ Na ntá tuénxín xítjehe tatsjon tí ch'ín tienhya ntá kuínhin ch'án la ko kuitoh̄e jína tí nejen ch'án, ntá jína nixja ch'án. ³⁶ Ntá ch'ín Jesús k'uetōan ch'án kíxin ninkexró tsochenkahya sín. Ntá kjónté imá k'uetōan ch'án ntá ántosén sín kjónté íchá xrichronka sín. ³⁷ Na mé imá chrakon sín ntá ntáchro sín kíxin:

—Káin nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjon nkehe kjóne noó mil chojni

(Mt. 15.32-39)

¹ A ntá ijnko yaon nchónhya chojni k'uúxikóchjina ínaá. A ntá chóntahya sín nkehe sine sín. Na ntá ch'ín Jesús mé k'uúyeh̄e ch'án tí sín k'uájiko ch'án, a ntá ntáchro ch'án kíxin:

² —Imá tikonóh̄a káin tí sín i kíxin ó ní yaon tjékian sín ntihi ntá chóntahya sín nkehe sine sín. ³ Ntá chrókuétuanhya sín sáchrókjui sín ntoe sín tí naxa nehya sín kíxin ntia ó chrókótiexin sín kíxin iso sín la imá kjín tsíkjixín sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kíxin:

—¿Nkexrí chrókónoxín nchónhya niotja chrókjóne káin tí sín a kíxin kohya nchia tí tjejóni? —ichro sín.

⁵ Na ntá ntáchro ch'ín Jesús kíxin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uetuēnhen ch'án kaín xín sín kixin ts'ixitjāxín sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'o ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayēhe sín tsakja kaín xín tí sín siín a. ⁷ Na ko iso koche ntsíntsí chóna sín. Ntá ch'ín Jesús kjuanchia ch'án kjuasáya ntá k'uetōan ch'án ts'óxíkayēhe sín kjaxin. ⁸ Na mé kaín xín sín kjóne sín na kókjehe sín. Ntá chr'éxin naxa kjuínchekaon sín yato ntaxra tí tot'o tí nkehe tsíxehe. ⁹ Na mé chjina noó mil chojni kjóne sín. Ntá ch'ín Jesús mé nixjehe ch'án sín sákjuí sín ¹⁰ ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabarco a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jié

(Mt. 16.1-4; Lc. 12.54-56)

¹¹ Na ntá kui iso sín fariseo kjuankixin sín tjo sín tí ch'ín Jesús kjuanchehe sín ch'án kixin chrókjuakoxín ch'án ijnko kjuaxroan jié kuente nkaya nkajní kixin tjinkaon sín chrókjuachaxín sín ch'án. ¹² A ntá ch'ín Jesús na mé k'uáváxin ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

¹³ Na ntá kuítóhe ch'án tí sín a, ntá xík'it'ótjen ch'án tí ntabarco ntá sákjuí ch'án í jnko tóhe ntayaon inaá.

Tí xroan nchek'ánkí tí niotjé tí sín fariseo

(Mt. 16.5-12)

¹⁴ Ntá k'uitjáyēnhen sín tsíkjikohya sín nkehe sine sín. Jehó jnkokoá niotja chóna sín nkaxēnhen tí ntabarco a. ¹⁵ Ntá ch'ín Jesús k'uetuēnhen ch'án tí jehe sín kixin:

—Chrókóxonhanrá kixin tí xroan nchek'ánkí niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kichó sín kixin:

—Mé xikaha ichro ch'án kixin tsíkjikohyani niotja.

¹⁷ Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuènté tjórá kixin chontahyará niotja? ¿Á naxa tiénxinyará la ko naxa noahyará? ¿Á kénhya asánrá tinkachónkirá Dios? ¹⁸ ¿Á t'ikonxinyará ikonrá la ko á tiénxinyará tátsjinrá? ¿Á xráxinkákonhyará? ¹⁹ Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'o niotja naxa kjuenájínrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xíntáchro ch'ín Jesús inaá kixin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'o niotja kjuenájínrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjonté xikaha la, ¿á naxa tiénxinyará? —ichro ch'án.

Ch'ín Jesús mé kjuínchekitōhe jina ijnko ch'ín t'ikonhya tí chjasin Betsaida

²² A ntá chr'éxin kjuíji sín chjasin Betsaida, a ntá ikui iso sín kuikao ijnko ch'ín t'ikonhya. Ntá chrónóhehe sín tí ch'ín Jesús kixin chrókjuinchekitōhe ch'án

jína tí ch'ín a. ²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

²⁵ Ntá ch'ín Jesús mé xíkjak'etja tja ch'án inaá tí kon tí ch'ín t'ikonhya a. A ntá tí ch'ín k'uíkonhya kuitohe ch'án jína la jína t'ikon ch'án kaín nkehe. ²⁶ Na ntá ch'ín Jesús mé k'uetuēhen ch'án tí ch'ín k'uék'ikonhya kixin sátsji ch'án ntōe ch'án ntáchro ch'án kixin:

—Chrók'uixenhya chjasin la ko ninkexró chróchenkahya ntiha —ichro ch'án.

*Ch'ín Pedro chrónka ch'án kixin ch'ín Jesús mé tí nkexro Cristo
(Mt. 16.13-20; Lc. 9.18-21)*

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntja mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

²⁸ Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín inaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuátehe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

³⁰ Ntá k'uetōan ch'ín Jesús kixin tsochenkahya sín ninkexró.

*Ch'ín Jesús chrónka ch'án kixin ts'en ch'án
(Mt. 16.21-28; Lc. 9.22-27)*

³¹ Na ntá kjuankíxin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuēte nínko la ko tí sín t'etōan kuēte tí sín nchat'á la ko tí sín maestro tjako tí ley. A ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án inaá. ³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuēhe ch'án. ³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuēhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxí tjenkayáxin Dios. Náhí. Jaha tjenkayáxian éxí tjenkayáxin chojni ó —ichro ch'án.

³⁴ Ntá ch'ín Jesús mé k'uíyēhe ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkojínrá tjinkáonrá tsochréhérá tí janhan na t'ichjánxin tsitohérá kaín tí nkehe tjaké asanrá na ntá tsamará tí ntacruz kuéntará, a ntá tsochréhérá tí janhan. ³⁵ A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsonhen tí chrókjuacha ijnko chojni chróchónka kaín nkehe síin chjasintajni, a ntá kjuachón chrókjuinçek'itjáyan? ³⁷ ¿Nkehe chrókjuenkā chojni kixin chróchónka tí kjuachón? ³⁸ A ntá jnkojín nkexro tsosuēhe kixin tinkáchónki tí janhan la ko tí tan kuētāna nkayakon tí chojni jínahya chónka jie la kjaxin tí Xjeen Dios K'óna Chojni tsosuēhe ch'án tsontáchro ch'án kixin chóxin ch'án tí jehe sín tió tsokjan ch'án tsikāo ch'án tí kjuachaxin jié kuēte It'é la ko tsikāo tí sín ángel.

9

¹ Na ko kjaxin chrónka ch'ín Jesús kixin:
—Chaxín ntáxrjan kixin isorá tjejorá ntihi la naᵗᵗ ts'énhyará ts'ikonjiará itsi tí kjuachaxin ts'etoan Dios —ichro ch'án.

*Ch'ín Jesús mé k'uixitoxin nkexrí tsjehe ch'án
(Mt. 17.1-13; Lc. 9.28-36)*

² Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuí sín jehó sín ijnko jna noi. Ntá ntiha mé xrinahya k'uixitoxin ókjé nkexrí tsjehe ch'án k'uikon tí jehe sín. ³ A ntá iké ch'án tsík'óna imá tjákini la ko imá tjóá éxí chrinta tsjehe, a ntá ntihi chjasintajni kohya ninkexró chrókjuen tí ka chrókuitohe imá tjóá xikaha. ⁴ Na ntá titàya k'uikuèn sín ntiha itjen tí ch'ín Elías la ko tí ch'ín Moisés tjejótjo sín tí ch'ín Jesús. ⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jina kixin tjejóni ntihi. Chrókjuich'énani iní nchia la mé ijnko kuéntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. ⁷ Na ntá xrinahya ikui ijnko tjuí kjuák'etja chrítaón kaín sín tí tjejó sín. Na ntá chríkjan tí tjuí kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuahá ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxin sín tí jna ntá k'uetōan ch'ín Jesús kixin tsochenkahya sín ninkexró tí nkehe k'uikon sín hasta tsoxechónjian tí Xjeen Dios K'óna Chojni. ¹⁰ Ntá ninkexró chenkahya sín tí nkehe k'uikon sín. Na ntá jehó sín mé tjejótjo sín kixin nkehe t'axrjexín tí nkehe chrónka ch'án kixin tsoxechón ch'án inaá. ¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxín itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín sín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxin tsjasóte la ko tsotjinkakonhya sín. ¹³ Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhin sín éxí nixja tí xroon itén Dios kixin xikaha tsonhen —mé xikaha chrónka ch'ín Jesús.

*Ch'ín Jesús mé kjuínchekitohe jina ijnko xjan chóna ijnko nchakuen tí jínahya
(Mt. 17.14-21; Lc. 9.37-43)*

¹⁴ A ntá tió ikjan sín tí kuítohe tí í so sín k'uájiko ch'án ntá k'uikon sín kixin nchónhya chojni tsík'antatjen tí jehe sín. Kjaxin ntaha síin tí sín tjako tí ley ikjo tí jehe sín. ¹⁵ A ntá tuénxín tió k'uikon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án. ¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátēhe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan. ¹⁸ Kjónté nkerí tjen xjan la tí nchakuen tí jínahya mé tjáka xjan nonte, ntá ntáloxrjo sítixin ir'va xjan na netaón xjan neno xjan na méxra

tjehya xjan. Ntá xrjanóaha tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xrákōarā ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uíkon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntalóxrjo ir'va xjan. ²¹ Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xíkaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsí xjan. ²² A ntá jnkoyaxón tí nchakuen tí jínahya a mé tjákate xjan xrohi la ko tjákánkí xjan inta kixin tjinkaon chrók'óyán tí xjan a. A ntá jaha ¿á tsjácha tsjínkítsani? La tikonóehéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuèté tjanchankina kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

²⁵ Ntá k'uíkon ch'ín Jesús kixin itsje chojni kóchjina. Ntá nixjehe ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekíenhya chojni. Ijie la tétuanhan kixin t'axrjéxian tí xjan na ko tsitohé xjan la í tsokjanhya ínaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a ínaá, ntá k'uaxrjéxín ntiha. Na éxí tsík'en xjan xíkaha tsjehe xjan. Ntá itsje sín ntáchro sín kixin ó tsíkjixin tsík'en xjan, ichro sín. ²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uíxehen sín ijnko nchia. Ntá jehe sín kjuanchankíhi sín ch'án kixin:

—¿Nkekuèté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tíhi la t'ichjánxín kixin nchónhya tsochronóehérá T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án

(Mt. 17.22-23; Lc. 9.43-45)

³⁰ A ntá tió sákjuíxin sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonohe sín ³¹ kixin tinkákjakohe ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon níxin na ó tsoxechón ch'án ínaá —ichro ch'án.

³² Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjéxín tíha.

¿Nkexro tí imá tjetooan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kichuárá tí kuini ntia? —ichro ch'án.

³⁴ Ntá jehe sín la táníkoá sín kixin tí ntia kui sín tinkákjo kichó sín kixin nkexro tí imá ts'etōan. ³⁵ Ntá ch'ín Jesús mé kjuák'etjāxin ch'án ntá k'uíyēhe ch'án tí teyó sín k'uájiko ch'án, a ntá ntáche ch'án sín kixin:

—Tí jnkójnra tjinakónra chrókuétōanra má ntá t'ichjánxin kixin tsjixixín tsochréhéra kaín sín, ts'ítuanhanra la ko tsjínkītsará kaín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkójn nkexro chrók'uáyéhe ijnko chánjan kixin tinkáchónki sín tí janhan la mé xikaha chrók'uáyéhe sín tí janhan la ko kjaxin éxí chrók'uáyéhe sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjinkītsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:

—Maestro, k'uíkonní ijnko chojni na mé kjuachaxin ihnjá mé takitsjexín ch'án nchakuen tí jínahya chóna chojni. Ntá k'uetuenhenni ch'án kixin xikahya chrókjuich'e ch'án kixin xrikohyani ch'án —ichro ch'án.

³⁹ Ntá ntáchro ch'ín Jesús kixin:

—Nté tjtōhé ch'án kixin ninkexró tjasixín kjuaxroan kjuachaxin njina la tuénxín chrókjuacha chrók'uántaxína sín. ⁴⁰ Tí nkexro nínkakuenhyani la mé tjinkītsa tí jeheni. ⁴¹ A ntá jnkójn nkexro tsotjáhará kjónté ijnko vaso ñta tsjanjonxín sín njina kixin jahará la tinkáchónkirá Cristo, ntáxrjan kixin chaxín ts'áyéhe sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

⁴² 'A ntá jnkójn nkexro chrókjuachroe ijnko xjan kixin chrókjuasin xjan jie tío tinkáchónki xjan tí janhan la íchá jina chrókjuincheteyá sín ch'án ijnko xro jie tsík'óna xrochre la chrókjuikákánkí sín ch'án ntayaon. ⁴³ A ntá tí itjá tjásixián jie na mé íchá chrókójina chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuíxian tí síin xrohi xitjahya ts'anka, ⁴⁴ tí síin kosínto t'enhya la ko síche xrohi ts'ankahya. ⁴⁵ A ntá kjaxin tí totá tjásixián jie na íchá jina chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuíxian tí síin xrohi xitjahya ts'anka, ⁴⁶ tí síin kosínto t'enhya la ko síche xrohi ts'ankahya. ⁴⁷ A ntá tí ikuan tjásixián jie na íchá jina chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etōan. A ntá tí yóí kuan la tíha mé sáchrókjuíxian tí síche xrohi ⁴⁸ tí síin kosínto t'enhya la ko síin xrohi ts'ankahya.

⁴⁹ 'A ntá kaín nkexro t'ichjánxin tsjasóte. A ntá kaín nkehe ts'áyéhe Dios chóna xjnta. ⁵⁰ Tí xjnta la jina. A ntá tí chrók'uankehe tí jní la ntá xitjahya chrókójni ínaá. Jahará mé chrókóyohará éxí xjnta kixin kjuaxróxin chrók'uejokoará kichuárá —ichro ch'án.

10

Tjako ch'ín Jesús kixin chrókjuákēhya kichó sín

(Mt. 19.1-12; Lc. 16.18)

¹ Na ntá ch'ín Jesús mé k'uaxrjexín ch'án chjasin Capernaum sákjuí ch'án nó estado Judea la ko nó tóhe ntarío Jordán. Ntá nchónhya chojni kójnkotsé sín tí tjen ch'án ntiha. Ntá kjuakohē ch'án tí jehe sín kixin xikaha kuèhen ch'án.

² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxín sín ch'án. Ntáchro sín kixin:

—¿Á siín kjuachaxin tsjákehe chojni ntoa ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'uetuñhanrá tí ch'ín Moisés? —ichro ch'án.

⁴ Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjéxin kichó sín —ichro sín.

⁵ Ntá ch'ín Jesús ntáchro ch'án kixin:

—Ntá jahará icha asánrá titekákonhyará ntá k'uetuñhanrá ch'án ts'óna tí xroon a.

⁶ Kjánchó tí xrankíxín tió kjuích'éna Dios kaín xín nkehe la kjuích'éna ch'án ijnko chojni ntoa la ko ijnko chojni chjin.* ⁷ Méxra tí chojni ntoa tsítóhe ch'án tí it'é ch'án la ko ìné ch'án kixin tsakja ch'án ichjién ch'án ⁸ ntá yóí sín ts'óna sín éxí jnkokoá chojni. Méxra jehya yaá chojni. Náhi, jnkokoá.† ⁹ Na mé xikaha tí kjuachaxin kuènte Dios kójnkojéxin sín ntá jehe sín chrók'uitjéhya kichó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjéhi kichó sín. ¹¹ Na ntá ntáchro ch'ín Jesús kixin:

—Tí jnkojín nkexro tsjákehe ichjién ntá tsakja ch'án í jnko chjin na mé xikaha tsjákehe ch'án tí tjan tsíkótehe ch'án saoxín. ¹² La ko kjaxin tí chojni chjin tsíkjákehe xii tsakja tjan í jnko chojni ntoa na mé xikaha kjaxin tjan tjasin tjan jié —ichro ch'án.

Ch'ín Jesús kjuíncheyaon ch'án xjan

(Mt. 19.13-15; Lc. 18.15-17)

¹³ Ntá kjuíkao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sin kjuíkao xjan. ¹⁴ Ntá k'uíkon ch'ín Jesús ntá kónínkaon ch'án ntáchro ch'án kixin:

—Nté títóherá tí xjan tsoxrakoa tí tjén janhan la t'inkakuènhyará xjan kixin tí sín kuènte kjuachaxin kuènte Dios la mé tóyóhe éxí tí xjan a. ¹⁵ Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etoan Dios tí kjuachaxin kuènte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehé ch'án tí ch'ín Jesús

(Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrín? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkekuènté ntáchrua kixin jína tí janhan? Jehó jnkokoá nkexro mé jína la tíha mé Dios. ¹⁹ Ntá jaha ó noha kixin nkexrí k'uetuñhan Dios kixin: “Chrókjuacheéhya kichuá la chrók'oyánhya chojni la chrókueéhya la chrókjontahya kichuá la chrókjuich'iahya la ko chróchontehé kjuasáya it'á la ko iná”‡ —ichro ch'án.

²⁰ A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

* **10:6** Génesis 1.27; 5.2 † **10:8** Génesis 2.24 ‡ **10:19** Éxodo 20.12-16; Deuteronomío 5.16-20

—Naxa t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sinchekjixián tí nkehe chonta la mé nchekitonhén tí chojni nòà, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

²² Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chóna ch'án.

²³ Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xra ijnko chojni chóna imá tsjé nkehe ts'ixenhen sín tí tjen Dios t'etoan —ichro ch'án.

²⁴ Ntá tóxonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjekonhen tí nkehe chóna sín na imá xra ts'ixenhen sín tí tjen Dios t'etoan. ²⁵ Antsí xrahya chrók'uátsínka ijnko kocamello ijnko tjar'in ntachica tjexrja. A ntá antsí má xra ijnko ch'ín chóna itsjé nkehe chrók'uixenhen ch'án tí tjen Dios t'etoan —ichro ch'án.

²⁶ Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

²⁷ Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Inchéni, kaín ni mé kuítóheni kaín nkehe chóntani ntá chréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkójín nkexro tsítóhe ntoe sín la o tí kichó ntoa o tí kichó chjin la o it'é o iné sín o ichjién sín o xjeen sín o nontee kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón ³⁰ na mé ntihi chjasintajni tsochóna sín ciento veces nchónhya ntoe sín la ko éxi kichó sín la ko éxi iné sín la ko éxi xjeen sín ts'ikon sín itsjé chojni kjé la ko éxi nontee sín xikaha ts'ikon sín itsjé nonte. Kjónté tsjasóte sín ntihi chjasintajni ntá chr'éxin tsochóna sín tí kjuachón jnkochrín. ³¹ A ntá itsjé tí sín t'etoan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etoan sín tí ntiha.

Nixin chronka ch'ín Jesús kixin its'en ch'án

(Mt. 20.17-19; Lc. 18.31-34)

³² Ntá tjejóti sín chrìn sín tí ntia sátsji chjasin Jerusalén. Ntá ch'ín Jesús mé tjetaón ch'án ntia ntá tí sín k'uájiko ch'án mé tóxonhen sín chrakon sín chréhe sín. Ntá k'uíyehé ch'án jehó tí teyó sín inaá ntá kjuankixin ch'án chénka ch'án sín nkexrí tí nkehe tsonhen ch'án. ³³ Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchat'á t'etoan la ko tí sín tjako tí ley. Ntá ts'etoan sín kixin its'en ch'án. Ntá sinchek'áyéhe sín ch'án tí sín jehya judío. ³⁴ Ntá jehe sín la tsjanoá sín tí jehe ch'án la ko ntaté sín tsikite sín ch'án la ko tsjate sín ch'án ntá ts'óyán sín ch'án. Kjánchó tí yaon nixin mé tsoxechón ch'án inaá —mé xikaha ichro ch'ín Jesús.

Ch'ín Jacobo la ko ch'ín Juan tjanchia sín nkehe

(Mt. 20.20-28)

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétoanxián tí kjuachaxián jié na tjinkaonni kixin ijnkonni chrókjuak'eni itjá chjina a í jnkonni chrókjuak'eni itjá kjon —ichro sín.

³⁸ Ntá ntáche ch'ín Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

³⁹ Ntá jehe sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan.

⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsíkónoxín —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankixin kóninkakonhen sín tí ch'ín Jacobo la ko tí ch'ín Juan. ⁴² Ntá k'uíyehé ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'etoan chjasintajni la imá t'etuēnhen sín kaín chojni la ko tí sín imá tjetōan mé imá nchehnkehe asén sín kixin ihyé sín ts'etoan sín. ⁴³ Kjánchó jahará la xikahya chrókjuich'erá. Náhi. Tí jnkojínrá tjinkáonrá chrókuétoanrá la chrókjuínkitsará tí í so sín. ⁴⁴ A ntá tió jnkojínrá antsí chrókuétoanrá mé t'ichjánxin senó chrókjuákoxinrá chrókjuich'eherá kíchuará xra. ⁴⁵ Kixin tí Xjeen Dios K'óna Chojni mé kuihya ch'án kixin chojni chrókjuich'ehe ch'án xra. Náhi. Ikui ch'án kixin sich'ehe ch'án sín xra la ko ts'enyákonhen nchónhya chojni kixin tsaáxin sín ch'án —ichro ch'án.

Ch'ín Bartimeo k'uék'ikonhya ch'án ntá ch'ín Jesús kjuínchekitohe ch'án jína (Mt. 20.29-34; Lc. 18.35-43)

⁴⁶ Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjāxin ch'án chrínta ntia tjanchak'á ch'án. ⁴⁷ Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuixin chjasin Nazaret, ntá tí ch'ín t'ikonhya kjuankixin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóehéni —ichro ch'án.

⁴⁸ Ntá nchónhya sín k'uetuēnhen sín ch'án kixin tsotání ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóehéni —ichro ch'án.

⁴⁹ Ntá ntahó kjuák'e ch'ín Jesús. Ntá k'uetōan ch'án kixin:

—T'iyehérá tí ch'ín a —ichro ch'án.

Ntá k'uíyehé sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

⁵⁰ Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús. ⁵¹ Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítóha jína kixin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

11

*Ntá ch'ín Jesús k'uixenhen ch'án chjasin Jerusalén
(Mt. 21.1-11; Lc. 19.28-40; Jn. 12.12-19)*

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuēnhen ch'ín Jesús iyó tí sín k'uájiko ch'án, ² ntáchro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehéra va ntá tsjikoanará va ntihi. ³ A ntá tí jnkojín chojni tsjan-chankíhará sín kixin nkekuènté xíkaha ch'erá ntá tsontáchrora kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. ⁵ Ntá iso tí chojni tjejó ntiha kjuanchankí sín kixin:

—¿Nkekuènté xíkaha ch'erá tjasintankehéra tí kolócho a? —mé chro sín.

⁶ Ntá kjuátexín sín éxí k'uetōan ch'ín Jesús. Ntá kjuanjon sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. ⁸ Ntá itsjé chojni kuakitsje sín iké sín la kjuentoá sín tinkák'ikjínxin sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xráqao sín tinkát'itjín sín ntja.

⁹ A ntá tí sín tsítaón ntja la ko tí sín chréhe iton kjuankíxin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kuixín kjuachaxin ihnjé Ìnchéni. ¹⁰ Jína tí kjuachaxiēn Dios itsi mé ts'etuēnhen tí nkexro k'uaxrjeníxin it'ēni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uixenhen ch'ín Jesús chjasin Jerusalén la ko kjaxin k'uixenhen ch'án tí ninko jié tsjehe ch'án nkuíxín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

*Ch'ín Jesús kónínkakonhen ch'án ijnko nta t'óna to higo tsík'ónahya to
(Mt. 21.18-19)*

¹² A ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta. ¹³ Ntá k'uíkon ch'án kjín kixin itjen ijnko nta t'óna to higo itsá kayoa. Ntá sákjuítsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to. ¹⁴ Ntá nixjehe ch'ín Jesús tí nta t'óna to higo k'uetuēnhen ch'án tí nta kixin:

—Í ninkexró sinehya tí to ts'óna tí jaha ínaá —ichro ch'án.

A ntá tí sín k'uájiko ch'án mé kuínhin sín xíkaha.

*Ch'ín Jesús kjuínchetjóá ch'án ninko
(Mt. 21.12-17; Lc. 19.45-48; Jn. 2.13-22)*

¹⁵ Ntá kjuíji sín chjasin Jerusalén. Ntá k'uixenhen ch'ín Jesús nkaxenhen ninko a. Ntá kjuankíxin ch'án k'uinkité ch'án tí sín nchekjixín nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá ¹⁶ la ko kjuanjonhya ch'án kjuachaxin kixin tsamá sín nkehe ts'ajixenhen sín ninko. ¹⁷ Ntá kjuakohe ch'án sín ntáchro ch'án kixin:

—Ntáchro xroon itén Dios kixin: “Tí ntona i mé it'in nchia tsonixjanaxín chojni nkuíxín nación”, a ntá jahará tsíkijich'énará itjueé xíchee* —ichro ch'án.

¹⁸ Ntá tí sín nchat'á t'etoan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án. ¹⁹ Kjánchó ntá ó kóntó ntá k'uaxrjexín ch'án tí chjasin a sákjuí ch'án.

Ó tsíxámá tí nta t'óna to higo

(Mt. 21.20-22)

²⁰ A ntá tí nchítjen k'uátsínka sín tí tjen tí nta t'óna to higo ntá k'uíkon sín kixin ó tsíxámáxin nuèe tí nta. ²¹ A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakonhén jna na ó tsíxámá nta —ichro ch'án.

²² Ntá kjuátehe ch'ín Jesús ntáchro ch'án kixin:

—Tinkachónkirá Dios. ²³ Chaxín ntáxrjan kixin jnkojínrá chróntácherá tí jna i kixin: “Sátjixián ntihi tjíkjiankiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchrora, ntá xikaha chaxín tsonhen. ²⁴ Mé xikaha ntáxrjan kixin kaín tí nkehe tsjancheherá Dios tí tsítekáonrá kixin chaxín ts'ayéherá ntá xikaha tsonhen tsoxiteyá. ²⁵ A ntá tío tjejonixjehé Dios ntá jnkojín nkexro naxa ninkákonhénrá, la chrók'uitjáyanhanrá tíha kixin It'ará tjen nkaya nkajní kjaxin chrókjuinck'itjáyan ch'án tí jie chontará. ²⁶ A ntá tí sinck'itjáyanhyará tí ijie chojni ntá It'ará tjen nkaya nkajní la kjaxin sinck'itjáyanhya ch'án tí jie chontará.

Tjanckíhi sín tí ch'ín Jesús nkehe tí kjuachaxin chóna ch'án

(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén ínaá. Ntá xritjak'e ch'án nkaxenhen nínko ntá kóchjina tí sín nchat'á t'etoan la ko tí sín tjako tí ley la ko tí sín táda t'etoan nínko ²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xikaha ch'e? ¿Nkexro tjáha tí kjuachaxin kixin xikaha kjuich'e? —ichro sín.

²⁹ Ntá kjuátehe ch'ín Jesús ntáchro ch'án kixin:

—Ntá kjaxin janhan tsjánchánkíhárá ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xikaha it'a. ³⁰ ¿A ntá nkexro k'uetuēnen ch'ín Juan kixin tsíkíte ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankíxin jehó sín tjo sín kíchó sín kixin:

—Tí tsontáchroni kixin Dios tsík'etuēnen tí ch'ín Juan ntá tsjanckí tí ch'ín a kixin nkekuēnté kuítekakuenhyani ch'án. ³² ¿Á chróntáchroni kixin chojni ó tsík'etuēnen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'ín Juan mé k'uénixja ch'án itén Dios. ³³ Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsoxrjancahya nkexro kjuanjon kjuachaxin kixin xikaha t'a —ichro ch'án.

* **11:17** Isaías 56.7; Jeremías 7.11

12

Ch'ín Jesús mé kjuíncheyóexin ch'án éxí chojni ch'ehya xra jína
(Mt. 21.33-46; Lc. 20.9-19)

¹ Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'uenkaxin ch'án itsjé ntanò t'óna to uva nontee ch'án la ko kjuích'éna ch'án corral la ko kjuích'éna ch'án ijnko tòye ts'énya sín to uva. A ntá kjuích'éna ch'án ijnko tjat'ò noi kixin ts'it'ótjen ch'án tsokotohe ch'án.

'A ntá kjuínchekjen ch'án tí nonte iso chojni ch'e xra. Ntá sákjuí ch'án kjín.

² Ntá tí kjuixraká tí yaon ts'óna to ntá k'uetuēhen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkosiné tí to tsakja ch'án.

³ Ntá tí sín ch'e xra mé tsé sín tí ch'ín a, kjuate sín ch'án ntá ninkehó ch'éhya sín ch'án ntá sákjuí ch'án. ⁴ A ntá tí inché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá ch'éhe sín ch'án xro kjuíncheníhi sín kja ch'án la ko k'uántaxínhin sín ch'án. ⁵ Ntá tí inché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí inché mé xíchr'án ch'án í so nkexro ch'ehe ch'án xra sákjuitsjehe sín, kjánchó iso sín k'uékon sín la í so sín la k'óyán sín.

⁶ Ntá jehe ch'án chóna ch'án jnkokoáxon xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochónthehe sín kjuasáyé tí xjanna”, ichro ch'án. ⁷ A ntá tí sín ch'e xra a tjo sín kichó sín kixin: “Tí ch'ín i mé ts'áyéhe kaín nkehe síin ntihi. A ntá jie ts'óyánni ch'án, a ntá jeheni ts'áyéheni kaín tí nkehe a”, ichro sín. ⁸ Ntá xikaha itsé sín ch'án k'óyán sín ch'án ntá kuakitsjexín sín ntøe ch'án tí nontee ch'án.

⁹ A ntá kjuanchankí ch'ín Jesús ntáchro ch'án kixin:

—¿A ntá nkehe chrókjuich'e tí inché tí nonte a? Chrókui ch'án chrók'óyán ch'án tí sín ch'e xra, a ntá chróch'éhe ch'án ókjé chojni.*

¹⁰ ¿Á kjuínchekuáxinhyará jahará tí xroon itén Dios? Ntáchro xikihí: Tí xro náxrjónhya kuitøenta tí sín ch'éna tjat'ò, mé jie k'óna tí xro tjetøan.

¹¹ Mé xikaha kjuích'é Inchéni Dios,

na ntá tíha mé ijnko nkehe kjuachrakon k'uíkonni† —ichro ch'ín Jesús.

¹² Ntá chrótsé sín tí ch'ín Jesús chrókjuak'echjina sín ch'án kixin kíenxín sín kixin kaín tí ntáchro ch'án la jehe ch'án k'uántaxínhin tí jehe sín. Kjánchó chrakon sín kixin nchónhya chojni kóchjina ntá kuitøhe sín ch'án ntá sákjuí sín.

¿A jína chrókjuenkehe sín gobierno?

(Mt. 22.15-22; Lc. 20.20-26)

¹³ A ntá ichr'án sín iso tí sín fariseo la ko iso tí sín kuente ch'ín Herodes kixin tsjanchankíhi sín ch'án iso nkehe kixin tí ntoáhya chrókjuatehe ch'án ntá jína chrók'ueka sín ch'án jie. ¹⁴ Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxixián kixin á jína sín, la ko ntoá tjákua ntje Dios. ¿A jína chrókjuenkeheni tí gobierno tí chichaon tjanchia? ¿Á chrókjuenkeheni sín ní ø náhí? —ichro sín.

¹⁵ Ntá ch'ín Jesús kjuátsoan ch'án kixin jehya jína tjenkayáxin sín ntáchro ch'án kixin:

—Jehya jína kixin tjáchaxinráni. Xrákøará ijnko tí chichaon tjanchia sín tsotsjáha —ichro ch'án.

¹⁶ Ntá xrákao sín ijnko tí chichaon tsotsjehe ch'án. A ntá kjuanchankí ch'án kixin:

* 12:9 Isaías 5.1-7 † 12:11 Salmo 118.22-23

—¿Nkexro tí tsík'axrjexín tjenkáni tí chichaon i la ko nkexro ihnié chóna? —ichro ch'án.

Ntá jehe sín kjuátehe sín kixin:

—Tí ch'ín t'etōan mé tjenkáni ch'án —ichro sín.

¹⁷ Ntá kjuátehe ch'ín Jesús ntáchro ch'án kixin:

—Chróchjehérá tí ch'ín gobierno t'etōan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kixin xikaha kjuátehe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

¹⁸ A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxín sín tí ch'ín Jesús ntáchro sín kixin:

¹⁹ —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxi xjeen tí nkexro tsík'en. † ²⁰ Kjánchó k'uéj yato sín jnkokoá kichó sín. Ntá tí ch'ín sao mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjich'énahya sín. ²¹ Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjich'énahya sín xjan. A ntá tí ch'ín níxin kuákja ch'án tí jehe tjan ntá xikaha kónhen inaá. ²² Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan. ²³ Ntá tió tsoxechón kaín xín chojni la, ¿Ntá nkexro ts'óna xii tjan kixin kayatoé sín tsíkótehe tjan? —ichro sín.

²⁴ Ntá kjuátehe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios. ²⁵ A ntá tió tsoxechón tí chojni tsík'en la tsoteehya sín la ko tsjanjonhya sín xjeen sín kixin tsotehe sín kixin tí sín tsík'en la éxi sín ángel ts'ejó sín nkaya nkajní. ²⁶ A ntá tí tsoxechón tí sín tsík'en, ¿á kjuinchekuáxinhyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”? § ²⁷ Méxra tí Dios i la jehya tinkáchónki tí sín tsík'en. Náhi. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanchankirá —ichro ch'án.

Tí nkehe antsí tjeoan tsík'etōan Dios

(Mt. 22.34-40)

²⁸ Ntá kui ijnko ch'ín tjako tí ley kjuák'ekinhin ch'án nkexrí kjuachaxín sín ch'ín Jesús. Ntá kuínhin ch'án kixin imá jina kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjeoan tsík'etōan Dios? —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Tí nkehe antsí tjeoan tsík'etōan Dios mé tíhi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro. ³⁰ Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”* Mé xikaha tí nkehe antsí tjeoan tsík'etōan Dios. ³¹ A ntá tí nkehe yóxin tsík'etōan Dios la mé tóyóhe na mé ntáchro xikihi: “Chrótjuèhéra kichuára éxi tjuèxínrá asánrá,”† la kohya í jnko nkehe antsí má tjeoan tsík'etōan ch'án —ichro ch'ín Jesús.

‡ 12:19 Deuteronomio 25.5 § 12:26 Éxodo 3.6 * 12:30 Deuteronomio 6.4-5 † 12:31 Levítico 19.18

³² A ntá kjuátehe tí ch'ín tjako n̄nko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxón Dios la ko kohya í jnko Dios.‡ ³³ Noheni kixin kaín asénni la ko kaín kjuaxrexinkaon kuènténi la ko kaín fuerza kuènténi chrótjuèxinni Dios la ko chrótjuèheni kichó ni éxí tjuèxinni asénni.§ Tíha mé antsí má sínkí. A ntá kaín tí ko chrók'óyánni chrókjuanjonni chróchjánxin chrítaón altar la kánhyó tjetóan tíha —ichro ch'án.

³⁴ A ntá tió k'uúkon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuènte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'ín Jesús kjuák'ekjako ch'án tí n̄nko jíé. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David? ³⁶ A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntihó tsétóan,

tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétóan”*

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókinhin sín kóxrjínhin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín. ³⁹ Jehe sín xritjeyá sín tí nta antsí náxrjón ts'ejóyá sín tí nkaxenhen n̄nko. La ko kjaxin tió sátsji sín tí sine sín xritjeyá sín tí nta antsí náxrjón ts'ejókjen sín sine sín. ⁴⁰ La ko takitsje sín ntøe chojni k'án. La ko ch'iyexín sín chojni kixin isé nixjehe sín Dios kixin chrókuinhin chojni chróntáchro sín kixin imá jína tí jehe sín. Tí sín a mé antsí má tsjasóte sín —ichro ch'án.

Tí ofrenda kjuanjon ijnko tjan k'án

(Lc. 21.1-4)

⁴¹ A ntá jnkonaá mé ch'ín Jesús tjetjaxin ch'án nkaxenhen n̄nko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a. ⁴² Ntá kjaxin ntaha mé kjui ijnko tjan k'án nòa tjan ntá chr'áxenhen tjan tí ntacajón yaá chichaon kánhyó tjete sínkí. ⁴³ Ntá ch'ín Jesús k'uúyehē ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòa tjan antsí tjete k'uúkon Dios tí chichaon chr'áxenhen tjan tí ntacajón, a ntá tí sín í so la kánhyó ⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòa tjan la kjuanjon tjan kaín tí chichaon k'uéchóna tjan chrók'uíte nkehe chrókjone tjan —ichro ch'án.

‡ 12:32 Deuteronomio 4.35 § 12:33 Oseas 6.6 * 12:36 Salmo 110.1

13

Ch'ín Jesús chrónka kixin tsoxíka nínko
(Mt. 24.1-2; Lc. 21.5-6)

¹ A ntá tió k'uaxrjexín ch'ín Jesús tí nínko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kíchó, la kaín tíha la tsoxíka —ichro ch'án.

Tí nkehe tsonhen chjina tí tsjixixín
(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jna Olivo chók'èxin tjen tí nínko a. Ntiha kjuák'etjaxín ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexrí tsonoexínni nkesá tsoxiteyá kaín tíha —ichro sín.

⁵ Ntá ch'ín Jesús kjuátehe ch'án ntáchro ch'án kixin:

—Tóxakonhanrá titoéhyará kixin ninkexró chrókjuít'ayahyará. ⁶ Nchónhya chojni tsi tsonáchro sín kixin jehe sín mé Cristo. Ntá xíkaha sich'iyehé sín nchónhya chojni.

⁷ A ntá tió tsinhínra kixin tjanjonko kíchó sín la t'óyán kíchó sín la chrakonhyará tóxakuanhyará ó jehí tsonhen tíha. Kjónté xíkaha naxá tsjejehya chjasintajni. ⁸ Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankíxixón tí kjuatjoté.

⁹ Tóxakonhanrá jahará kixin mé tsjikaánra sín nkayakon tí sín t'etoan ntá tí nkaxenhen nínko ntiha mé tsjatiaxínra sín. Jahará t'ichjánxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín.

¹⁰ Tí naxá ts'itjáyanhya chjasintajni la mé t'ichjánxin tsinhin chojni kaín xín nación tí tan jina tsaáxin sín. ¹¹ Tió sátsjikoará sín tsjikaánra sín tí tjejó tí sín t'etoan, la tóxakuanhyará nkehe tsjateherá la ko nkehe tsjenkayáxinra. Náhi. Chronkará tí nkehe kjuanjon Dios tsonáchrorá tí hora a, kixin jahyará tsonixjará. Náhi. Nchakuen Dios mé tsonixja. ¹² Iso chojni kjónté naxá kjéhya sín tsjikaán tí kíchó sín kixin its'en. La ko kjaxin xíkaha iso chojni tsjikaán tí xjeen sín la ko kjaxin iso sín tsonínkakohen sín tí it'é la ko iné la tsjikaán sín kixin its'en. ¹³ Kaínxin chojni chjasintajni tsonínkakohenra sín kixin tinkachónkirá tí janhan. A ntá tí sín tsítøehya tinkáchónki sín tí janhan hasta tsjixixín ná mé tsaá sín.

¹⁴ Tsjixraká ijnko yaon ts'ikonra tsjak'e tí nkehe jínahya tí chrókjuak'ehya éxí tsintáchro profeta Daniel* —ntá tí chojni sinchekuáxin tí xroon i mé chrókuienxin sín tíha—, a ntá tí chojni tjejó estado Judea ts'ikon sín xíkaha la sátsji sín tsochrìn sín jna tsjík'ejómá sín. ¹⁵ A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín. ¹⁶ Ntá tí sín tjejó nontee sín la í chrókjanhya sín naxá chrókjuikakja sín iké sín. ¹⁷ Ntá nòa tí chojni chjin ts'ejóyá tí yaon a la ko tí sín tjejónchekakí xjeen. ¹⁸ Chrókjuancheherá Dios kixin jehya nchakuen kin chrókónhen tíha. ¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuènhya xíkaha desde ti kjuankíxixín Dios kjuíchéna ch'án

* 13:14 Daniel 9.27; 11.31; 12.11

chjasintajni la ko kjá xikahya tsonhen chr'éxin inaá. ²⁰ A ntá tí chrókjuanjon Ìnchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhí la kuikonóhe ch'án tí sín tsíkjejá ch'án ntá k'uetōan ch'án kixin tjoka ts'atsínka tí kjuachrakon a.

²¹ 'A ntá jnkojín nkexro tsontácho kixin: “Tsjehe, ntihi itjen tí Cristo”, o tsontácho sín kixin: “Tsjehe, ntiha tjen ch'án”, la titekákuenhyará sín. ²² Na mé itsi iso sín tsontácho sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jié tjinkaon sín chrókjuich'iyexín sín chojni, kjónté tí sín tsíkjejá Dios. ²³ A ntá jahará chrokóxakonhanrá kaín tíha. Tjéjtonkará senó kixin tsonohará kixin xikaha tsonhen.

Itsi tí Xjeen Dios K'óna Chojni

(Mt. 24.29-35, 42-44; Lc. 21.25-36)

²⁴ 'Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. ²⁵ A ntá tí konotsé la ts'anótjexín nkajní la ko tí kjuachaxin síin nkaya nkajní la kjaxin tsinkí. ²⁶ Ntá ts'ikon sín tí Xjeen Dios K'óna Chojni itsi chríkjan tjuí tsíkáo tí kjuachaxin jié. ²⁷ Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjejá ch'án.

²⁸ 'Chrókiénxinrá tí nkehe sintayóaxian. Éxí yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa ²⁹ mé xikaha tió ts'ikonrá xikaha tsonhen kaín tíha ntá tsonoaxínrá kixin ó kuichjina tí tsjeje chjasintajni. ³⁰ Chaxín ntáxrjan kixin kaín tíha tsonhen tí naxa t'enhya tí chojni síin chjasintajni. ³¹ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³² 'A ntá tí yaon la tí hora tsoxiteyá tíha la ninkexro noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'eni mé nohe.

³³ 'Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha. ³⁴ Éxí yóhe ijnko chojni sátsji kjín, a ntá tí naxa sátxixínhya ch'án ntōe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntōe ch'án, la jnkojnko sín ts'áyéhe sín jnkojnko xra kuente sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia. ³⁵ Méxra jahará chrók'uejotsjehérá kixin noahyará nkesá tsokjan tí ìché tí nchia a, á ijnko tsontanonte o á ijnko k'áxrótjen o á ijnko tjetee tsje cochíká o á ijnko ts'inkaséyan. ³⁶ Ntá xrinahya tsi ch'án ts'itjaxín ch'án kixin tjejochrinrá. ³⁷ Mé xikaha tjonkará la ko xikaha ntátjan kaín chojni kixin chrók'uejotsjehe sín —ichro ch'án.

14

Tjoyá sín kixin nkexrí tsotsé sín tí ch'ín Jesús

(Mt. 26.1-5; Lc. 22.1-2; Jn. 11.45-53)

¹ Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjikohya tí xroan nchek'ánki niotja.

Ntá tí sín nchát'á t'etōan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyán sín ch'án.

² Ntá ntácho sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókónínkaon sín —ichro sín.

Ijnko tjan kuikitexín aceite náxrjón xraxé ikja ch'ín Jesús

(Mt. 26.6-13; Jn. 12.1-8)

³ **A** ntá ch'ín Jesús kjuák'e ch'án chjasin Betania ntøe ch'ín Simón, tí ch'ín k'uéchóna chinlepra. **A** ntá tí tjene ch'ín Jesús ntá xrínahya ikui ijnko tjan kuikao tjan ijnko xro mé tjiá tí aceite xraxé itsjo nardo, imá tjete tsík'ite. Ntá tí tjan a mé kuakitjehe tjan tí xro a ntá kuikite tjan kja ch'ín Jesús tí aceite a. ⁴ **A** ntá iso tí sín tjejó ntiha kónínkakonhen sín tjan ntáchro sín kixin:

—¿Nkekuènte kjuínchexénhen tjan tí aceite náxrjón xraxé? ⁵ Íchá jína chrókóxixín iní ciento chichaon denario tí aceite a ntá tí chichaon a mé chrókujitonhen tí chojni nòa —mé xikaha ichro sín k'uántaxínhin sín tjan.

⁶ Ntá ntáchro ch'ín Jesús kixin:

—Nté tìtoherá tjan; ¿nkekuènte t'antaxínhínrá tjan? Ó nchoxon tí nkehe kjuích'ena tjan. ⁷ **A** ntá tí chojni nòa la ó xráxín ts'ejókoará sín la jína tsjínkítará sín jnkójín yaon. Ntá janhan la jnkochrínhíhya ts'ejóni. ⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuèntana kixin tsoxravána. ⁹ Chaxín ntáxrjan kixin tí tsjako sín tí tan jína tsaáxin chojni nkuíxín chjasintajni ntá tsochronka sín kixin xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

Ch'ín Judas kjuínchekji ch'án tí ch'ín Jesús

(Mt. 26.14-16; Lc. 22.3-6)

¹⁰ **A** ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nchat'á t'etøan kixin tsochrónka ch'án nkexrí tsotsé sín tí ch'ín Jesús. ¹¹ **A** ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankíxin ch'án kjuéyá ch'án nkexrí tsochrónka ch'án kixin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² **A** ntá kui tí yaon xrankíxixín kia sine sín niotja tsíkjikohya tí xroan nchek'ánkí nio tió ts'óyán sín tí kolélo kuènte kia pascua. **A** ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjínkávan sátsjini sincheyaxíxinni kixin sineni kuènte tí kia pascua? —ichro sín.

¹³ Ntá k'uètuènen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará ijnko ch'ín yamá tóa tjiá ntá. Tí ch'ín a tsochréhérá. ¹⁴ **A** ntá tí nchia ts'ixenhen ch'án la tsjanchankíhírá tí ìché nchia, tsontáchrórá kixin: “K'uètoan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xikaha mé tsixrorá. ¹⁵ Ntá tsjakohará ch'án ijnko cuarto jíé, yóxin piso mé chóna kaín nkehe t'ichjánxín. Mé ntaha mé sincheyaxíxinrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xikaha k'uitja sín. Ntá tí cuarto a mé kjuíncheyaxíxin sín tí nkehe sine sín kuènte tí kia pascua.

¹⁷ **A** ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha. ¹⁸ Ntá k'uéjó sín, a ntá tió tjejóne sín ntá ntáchro ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinchekjiráni —ichro ch'án.

¹⁹ Ntá jehe sín mé kjuankíxin k'uává sín. Ntá kjuankíxin sín jnkójnko kjuanchankíhi sín tí jehe ch'án kixin:

—¿Á janhan ní? —ichro sín.

²⁰ Ntá kjuátehe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi. ²¹ Chaxín tí Xjeen Dios K'óna Chojni mé tsonhen éxí nixja xroon itén Dios. Kjánchó nòà tí ch'ín sinchekji ch'án. Íchá jína tí ch'ín a la chrókokjéhya ch'án —mé xikaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'o ch'án tí niotja ntá kjuanjon ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuèntana —ichro ch'án.

²³ Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá. ²⁴ Ntá ntáchro ch'án kixin:

—Tíhi mé jnina mé chrónkaxín kixin chaxín tsoxiteyá tí nkehe nixin tsonhen na mé ts'itjí kixin tsaáxin nchónhya chojni. ²⁵ Chaxín ntáxrjan kixin ts'íhya janhan tí ìnté to uva ínaá tí naxa tsjixrakáhya tí yaon itsi kjuachaxin kuènte Dios, a ntá ti yaon a xik'ía ìnté to uva nixin —mé xikaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án

(Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuènte Dios ntá sákjuí sín tí jna Olivo. ²⁷ Ntá ch'ín Jesús ntáchro ch'án kixin:

—Ijie tie kaín rá tsochrakonrá ntá tsitonará. Ntá tsoxiteyá éxí ntáchro xroon iten Dios kixin: “Ts'óyan sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”* ²⁸ A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáchro ch'ín Pedro kixin:

—Kjonté kaín sín tsítóha sín ntá janhan la náhi —ichro ch'án.

³⁰ Ntá ntáchro ch'ín Jesús kixin:

—Chaxín ntáxrjan kixin ijie tie tí naxa tsjehya kochíntoa yáya, la jaha mé sinchemána níya kixin chonhyana, tsixrua —ichro ch'án.

³¹ Ntá itsen kjuátehe ch'ín Pedro ntáchro ch'án kixin:

—Kjonté koína its'én la sintamáhya tí jaha —ichro ch'án.

La ko xikaha ntáchro sín kaín sín.

Ch'ín Jesús nixjexín ch'án Dios tí Huerto Getsemaní

(Mt. 26.36-46; Lc. 22.39-46)

³² Ntá kjuíji sín ijnko nonte mé it'in Getsemaní. Ntá k'uetuenhen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjaha Dios —ichro ch'án.

³³ Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án. ³⁴ Ntá ntáche ch'án sín kixin:

—Imá t'ává asenná éxí chrók'uén xikaha. Ijie la ntihyó titohará tjejot-sjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóehe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a. ³⁶ A ntá ntáchro ch'án kixin:

—It'eni jaha. Jaha mé chonta kaín xín kjuachaxin na ntá chrónóahani tsjakjínhinni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhi. Éxí tjinkávan jaha —ichro ch'án.

* 14:27 Zacarías 13.7

³⁷ Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora?

³⁸ Ijie la tjejotsjehérá la ko chronóehérá Dios kixin títoehya ch'án tí Jínahya chrókjuichroerá. Tí asánrá ntáchro kixin chrókjuinchexiteyará tí jína kjánchó tí cuérporá la tsjachahya —ichro ch'án.

³⁹ Ntá sákjuí ch'án ínaá chrónóehé ch'án Dios. Ntá ó jehe xikahó xínixja ch'án.

⁴⁰ Ntá ikjan ch'án la ó tjejójua sín ínaá kixin kuihi sín kotáchrin. Ntá í noehya sín nkexrí chrókjuatehe sín. ⁴¹ Ntá nixin sáxíkji ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án.

⁴² Ntá t'áyará sátsjini kixin ó kjuí tí nkexro sinchekjina.

Sákjuíko sín tí ch'ín Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)

⁴³ Naxa tjenixja ch'ín Jesús ntá xrínahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuíkao ch'án kjuíjiko sín chica espada la ko inta. Na mé kjuachaxién tí sín nchat'á t'etoan la ko tí sín maestro tjako tí ley la ko tí sín táda t'etoan nínko mé kjuixín sín.

⁴⁴ A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinekian kochíto mé jehe tíha la itserá ch'án sátsjikoará ch'án —ichro ch'án.

⁴⁵ Ntá kjuí sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. ⁴⁶ A ntá tí sín kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etoan xra. ⁴⁸ Ntá ch'ín Jesús mé ntáche ch'án tí sín a kixin:

—¿Nkekuènté kixin éxí chrótserá xíchee mé xikaha k'uinkakoará chica espada la ko inta kixin tsotseráni? ⁴⁹ Kaín yaon kjuak'é nkaxenhen nínko kjuáakohará, ¿ntá nkekuènté tsehvaráni? Kjánchó t'ichjánxin xikaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

Ijnko ch'ín ntasoá sákjuixín ch'án ntiha

⁵¹ A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án. ⁵² Kjánchó tí ké ch'án ó tsítsé sín ntá kjónté tjóchin ch'án sákjuí ch'án.

Ch'ín Jesús kóchjina ch'án tí tjejó tí sín t'etoan
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuíko sín tí ch'ín Jesús tí ntøe tí nchat'á imá t'etoan. Ntaha mé tsikójnkotsé kaín tí sín nchat'á t'etoan la ko tí sín táda t'etoan nínko la ko tí sín maestro tjako tí ley. ⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntasin ntøe tí nchat'á imá t'etoan a. Ntaha síche xrohi. A ntá ntiha tjejótxaxín tí sín policía tjejóchjixrohe sín, ntá kjaxin ch'án ntahó kuítóhe ch'án tjechjixrohe ch'án.

⁵⁵ Ntá tí sín t'etuenhen tí sín nchat'á la ko kaín tí sín t'etoan kjueyá sín chojni kixin tsochrónka sín nkehe tí jie chóna ch'ín Jesús kixin jína chrók'óyán sín ch'án. Kjánchó ninkexró k'uitjahya sín tsjinkitsa tsochrónka. ⁵⁶ Kjánchó itsjé

sín ntáchro sín kjuach'ia ó t'eka sín ch'án jiē kixin jnkokónhya tí nkehe ntáchro sín. ⁵⁷ Ntá k'uínkatjen iso sín ntá chaxínhya tí jiē kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxíka ch'án tí nínko tsíkijich'énaxín chojni tja ntá iní yaon koá la ó tsjak'e ch'án í jnko nínko jehya chojni sich'éna† —ichro sín.

⁵⁹ Kjónté xíkaha la jnkokónhya tí nkehe chrónka sín.

⁶⁰ Ntá tí ch'ín t'etuenhen tí sín ncha't'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tjateehya jaha? ¿Á chaxín tí jiē t'eka sín tí jaha? —ichro ch'án.

⁶¹ Ntá ch'ín Jesús tání ch'án la ninkehó tjateehya ch'án. Ntá xíkjanchankí tí ncha't'á t'etōan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'ín Jesús kixin:

—Chaxín janhan tíha. Ntá chr'éxin ts'íkonrá kixin tí Xjeen Dios K'óna Chojni mé tsjak'etjaxín ch'án tí tja chjina kjuachaxin kuente Dios la ko itjuí mé ts'inkajinxín ch'án nkaya nkajní —ichro ch'án.

⁶³ A ntá tí ncha't'á t'etōan kótséchje ch'án tí iké ch'án kjuakoxín ch'án kixin imá nínkaon ch'án ntáchro ch'án kixin:

—T'ichjánxínhya í so chojni tsochrónka nkehe. ⁶⁴ Jahará ó kuínhínra kixin k'uántaxínhin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

⁶⁵ Ntá ikjé sín la kjuankixin sín kuíkíte sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuente nínko chjéhe sín nkayakon ch'án.

*Ch'ín Pedro kjuínchemá ch'án kixin chónhya ch'án tí ch'ín Jesús
(Mt. 26.69-75; Lc. 22.56-62; Jn. 18.15-18, 25-27)*

⁶⁶ Ntá tí ntāsin nonte itjen ch'ín Pedro. Ntá ikui ijnko tjan ch'ehe tjan xra tí ncha't'á t'etōan. ⁶⁷ Ntá k'uíkon tjan kixin tjechjírōhe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'ín Jesús kjuixín chjasin Nazaret —ichro tjan.

⁶⁸ Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexín ch'án ntiha sákjui ch'án ntója. Ntá xrínahya itsje ijnko kochíntōa. ⁶⁹ Ntá tí tjan a mé k'uíkon tjan tí jehe ch'án ntá chénka tí sín sntaxín ntaha kixin:

—A ntá tí ch'ín i mé jnkojín tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'éxin tí sín k'uéjontaxín ntáche sín tí ch'ín Pedro kixin:

—Chaxín kjaxian jaha tsíkíxian estado Galilea kixin tjatsoanxínni kixin nixja jaha éxí nixja tí jehe sín —ichro sín.

⁷¹ Ntá ch'ín Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrórá jahará —ichro ch'án.

⁷² Ntá yóxin itsje kochíntōa. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Naxa tsotsjehya kochíntōa yáya mé ó tsjixin sijnchemána níya kixin chonhyana.”‡ Ntá xraxinkaon ch'án tíha la ntá

† 14:58 Juan 2.19 ‡ 14:72 Marcos 14.30

kjuankíxin ch'án tsjánka ch'án kixin ntoáhya kjuích'e ch'án kjuínchemá ch'án tí ch'ín Jesús.

15

Ch'ín Jesús nkayakon tí ch'ín Pilato

(Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uínkaséyan ntá tí sín nchat'á t'etoan kójnkotséko sín tí sín táda la ko tí sín tjako tí ley la ko kaín tí sín t'etoan kuènte nínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato. ² Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús ntáchro ch'án kixin:

—Kjāxian jaha ntáchrua —ichro ch'án.

³ A ntá tí sín nchat'á t'etoan mé k'ueka sín ch'án nchónhya jīe. ⁴ Ntá ch'ín Pilato xíkjanckhankí ch'án ínaá ntáchro ch'án kixin:

—¿Jaha, nkekuèté tjetēehya ninkehó? Tsjehé kixin nchónhya jīe t'eka sín tí jaha —ichro ch'án.

⁵ A ntá ch'ín Jesús la ninkehó kjuáteehya ch'án. Ntá ch'ín Pilato la í noehya ch'án nkehe tsjenkayáxin ch'án.

K'uáyéhe ch'ín Jesús kixin sinchekjasóte sín ch'án ntá its'en ch'án

(Mt. 27.15-31; Lc. 23.13-25; Jn. 18.38—19.16)

⁶ A ntá ch'ín Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxí tjinkaon tsjanckhia tí sín tsíkójnkotsé tí kia a. ⁷ A ntá ntiha tjechjina ijnko ch'ín mé it'ín Barrabás, la ko í so sín kuitekakuenhya sín tí síxreé ntá k'óyán sín chojni. ⁸ Ntá kui nchónhya chojni kjuankíxin sín kjuanchehe sín tí ch'ín Pilato kixin chrókjuich'e ch'án éxí kaín nánó xíkaha. ⁹ Ntá kjuátehe ch'ín Pilato kixin:

—¿Á tjinkáonrá tsitōhā sátsji tí ch'ín Rey t'etuenhen tí sín judío? —ichro ch'án.

¹⁰ Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nchat'á t'etoan, a ntá tsé sín tí ch'ín Jesús kjuíkénhen sín ch'án. ¹¹ A ntá tí sín nchat'á t'etoan a mé kjuínchekóninkaon sín kaín tí chojni síin, ntáche sín kixin íchá jina chrókjuanchia sín kixin chrók'uatjánta ch'án tí ch'ín Barrabás. ¹² Ntá ch'ín Pilato kjuanchankí ch'án ntáchro ch'án kixin:

—A ntá tí ch'ín tikitexínrá kixin ch'ín Rey t'etuenhen tí sín judío la ¿nkehe tjinkáonrá sit'ahā ch'án? —ichro ch'án.

¹³ Ntá jehe sín kjuátehe sín k'óyako sín kjuanchia sín kixin:

—¡Tjakénkǎnia ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénkǎnia ch'án ntacruz! —ichro sín.

¹⁵ Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uixité ntá kuítóhe ch'án kixin sátsji tí ch'ín Barrabás. Ntá k'uetōan ch'án kixin tsjate sín tí ch'ín Jesús. Ntá kjuixin ntá kjuanjon ch'án kjuachaxin kixin tí sín soldado sátsjiko sín ch'án tsjak'enkǎni sín ch'án ntacruz.

¹⁶ Ntá tí sín soldado a mé sákjuíko sín ch'án tí ntasin tí palacio. Ntaha kójnkotséxin kaín tí sín soldado. ¹⁷ Ntá ntiha kuakitsje sín iké ch'án ntá

kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'i. ¹⁸ Ntá kjuankíxin k'uíxité sín ntáchro sín kíxin:

—Jnkochrín tsjak'e tsétuēnhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntaté sín kuikite sín ch'án. K'uéjoxin toch'in sín nkayakon ch'án kjuích'eyáxixín sín éxí imá chrókjuikosáyehe sín ch'án. ²⁰ Ntá tió kjuixin xíkaha kjuích'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsíkjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjexín sín ch'án ntiha sákjuíko sín ch'án kíxin ntá tsjak'enkani sín ch'án ntacruz.

Ntá kjuak'enkani sín ch'ín Jesús ntacruz

(Mt. 27.32-44; Lc. 23.26-43; Jn. 19.17-27)

²¹ A ntá ijnko ch'ín tsíkjin sín chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjin sín ch'án nontee ch'án, ntá k'uátsínka ch'án ntiha. Ntá tí sín soldado a mé k'uētuenhen sín ch'án kíxin tsochréhe ch'án tsamá ch'án tí ntacruz tsjak'enkáni ch'ín Jesús.

²² A ntá sákjuíko sín tí ch'ín Jesús ijnko tjo it'in Gólgota, na mé nkívee sín t'axrjexín kíxin Tjo Calavera. ²³ Ntá ntiha chjéhe sín ch'án xranvino tsík'ixinkíjxanxín xroan mirra chrók'ui ch'án, kjánchó k'uíhya ch'án. ²⁴ Ntá tí sín soldado kjuak'enkani sín ch'án tí ntacruz a. Kjuixin ntá kjuích'exín sín suerte tí ké ch'án kíxin tsonohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkani sín ch'án tí ntacruz a. ²⁶ Ntá ikja tí ntacruz kjuak'enkani sín ijnko ntachiso ntsí tsíkjin sín nixja nkekuente kjuínchekjasóte sín ch'án na mé ntáchro kíxin: “Jehe ch'án mé Rey kuente tí sín judío”. ²⁷ Na ko kjaxin k'uéjovýáni sín ntacruz yaá tí síchee la ijnko la nánko chjina la í jnko la nó kjon tí tjen ch'ín Jesús. ²⁸ Na mé xíkaha xiteyá éxí nixja xroon itén Dios ntáchro kíxin: “Éxí yóhe ijnko chojni kjuasin jie mé k'uíkon sín ch'án”*.

²⁹ Ntá tí sín k'uátsínka ntiha mé kjuanoá sín ch'án la ko k'uántaxínhin sín ch'án tinkátjía kja sín ntáchro sín kíxin:

—Kjá na ntáchrúa kíxin chrók'oxíka tí nínko, a ntá iní yaon koá la ó chrókjuixin chrókjuích'éna inaá,† ichrua. ³⁰ Nchekaá asán jahvá tjasinkajinxían tí ntacruz méhe —ichro sín.

³¹ Ntá tí sín nchát'á t'etōan la ko tí sín tjako tí ley mé kjuanoá sín ch'án ikjo sín kíchó sín kíxin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án. ³² A ntá chaxín jehe ch'án tí Cristo tí Rey kuente tí nación Israel ntá chrók'uikonni kíxin jehó ch'án chrókjuinkajinxín ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejóyáni ntacruz mé k'uántaxínhin sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkíxin mé k'uíxin tie kuenté chjasintajni, kóxrjenhen tí sítié hasta las tres kónjín ³⁴ ntá tí hora a mé itsen k'uèya ch'ín Jesús ntáchro ch'án kíxin:

—Eloi, Eloi, ¿lama sabactani? —tí nkívee sín mé t'axrjexín kíxin: It'éni, It'éni, ¿nkekuènté kuítōhéni?,‡ mé xíkaha ichro ch'án.

³⁵ Ntá iso sín síin ntiha kuínhin sín, ntá ntáchro sín kíxin:

—Tinhínrá kíxin t'íyehé ch'án tí ch'ín Elías tí ch'ín k'uéchrónka itén Dios ósé —ichro sín.

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

³⁶ Ntá ijnko tí jehe sín siín ntiha kuinká ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjínjin ntá kjuínchekhina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a kixin:

—Tsítóheni tsotsjeheni á chaxín tsi tí ch'ín Elías tsjinkajin tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án. ³⁸ A ntá tí ka tjenkáuénxín nkaxenhen nínko mé yaá k'óna k'uichje kjuankíxixín noi la hasta nonte k'uichje. ³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin xíkaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. ⁴¹ A ntá tí chojni chjin i mé kuinkáchréhe sín tí ch'ín Jesús ntá kjuíkáo sín ch'án kixin k'uékjinkítsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuíko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankíxixín tí yaon t'ok'éhe sín, ⁴³ mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etóan ch'án tí xra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntoe ch'ín Pilato kjuíkjanchia ch'án tí cuerpo kuènte ch'ín Jesús. ⁴⁴ Ntá ch'ín Pilato chrakon ch'án kixin ó tsíkjin tsík'en ch'ín Jesús, ntá k'uíyehé ch'án tí ch'ín capitán a kjuanchankíhi ch'án kixin á chaxín xíkaha kónhen. ⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xíkaha ntá kjuanjon ch'án kjuachaxin kixin tsjikakja ch'ín José tí cuerpo kuènte ch'ín Jesús. ⁴⁶ Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte ch'ín Jesús, a ntá jehe tí ka a mé kjuínchek'isímá ch'án tí cuerpo kuènte ch'án. Ntá kjuak'enkaya ch'án ijnko tòye tsíxrayá itjo. Ntá ijnko xro jíé mé k'uíkjèxin ch'án tí ntója tí tòye. ⁴⁷ A ntá tí tjan María Magdalena la ko tí tjan María ìné ch'ín José mé k'uíkon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ A ntá tíó k'uátsínka tí yaon t'ok'éhe sín ntá tí tjan María Magdalena la ko tí tjan María ìné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuènte ch'ín Jesús. ² Ntá imá nchítjen tí yaon xrankíxixín tí semana mé kjuíji sín tí tòye tsíxravá ch'án, na mé ó kjuíton yaon.

³ A ntá jehe sín mé tinkákjo kichó sín kixin:

—¿Xá nkexro tí chrókuakjìnhinni tí xro tjejkèxin tí tòye? —ichro sín.

⁴ A ntá xrínahya k'uíkon sín kixin ó tsíkjin tsíkjin tí xro jíé tjejkèxin tí tòye kixin í tjenhya éxí k'uékjak'e senó. ⁵ Ntá kjuíji sín ikon tí tòye ntá k'uíkon sín kixin tjetjaxin ijnko ch'ín ntasoá tí tja sín chjina tjenkáya ch'án ka kjínjin tjóá ntá imá chrakon sín k'uíkon sín. ⁶ Ntá ntáchro ch'án kixin:

—Chrakonhyará. Ó nòna kixin xritjéyará jahará tí ch'ín Jesús tsíkjiixin chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án. ⁷ Ntá sájtirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxí tsíchrónka ch'án —mé xíkaha chrónka tí ntasoá a.

⁸ Ntá tí chojni chjin a mé sákjuíxin sín tí tsíxravá tí ch'ín Jesús imá síxránka sín chrakon sín. Ntá naxa chenkahya sín ninkexró kixin chrakon sín.

*Ch'ín Jesús titàya xeta tí tjan María Magdalena
(Jn. 20.11-18)*

⁹ Tió tsíkjiixin tsíxechón ch'ín Jesús nchítjen tí yaon xrankíxixin semana ntá titàya xeta ch'án saoxín tí tjan María Magdalena na mé jehe tjan tsíkakitsjexín ch'án yato nchakuen tí jínahya. ¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín. ¹¹ A ntá tió kuínhin sín kixin tjechón tí ch'ín Jesús kixin xíkaha tsík'ikon tjan la kjónté kuítekakonhya sín.

*Iyó sín k'uék'ajiko ch'ín Jesús titàya k'uíkuèn sín tí jehe ch'án
(Lc. 24.13-35)*

¹² A ntá chr'éxin ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótti sín ntá sátsji sín ijnko nonte. ¹³ A ntá jehe sín sákjuíchenka sín tí sín í so a; la kjónté xíkaha la kuítekakonhya sín.*

*Ch'ín Jesús k'uetuenhen ch'án tí sín k'uék'ajiko ch'án tí xraq sich'e sín
(Mt. 28.16-20; Lc. 24.36-49; Jn. 20.19-23)*

¹⁴ A ntá tió kjuixixin la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án. ¹⁵ Ntá ntáche ch'án sín kixin;

—Sájtirá kuenté chjasintajni tjákohérá kaín xín chojni tí tan jína tsaáxin sín. ¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. ¹⁷ Ntá tí sín tsinkáchónki tí janhan mé tsjasin sín kjuaxroan kixin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkíva. ¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxin ts'ejotja tja sín chojni níhi la tsitohe sín jína.

*Ch'ín Jesús chrìn ch'án nkaya nkajní
(Lc. 24.50-53)*

¹⁹ Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxin ch'án tí tja chjina Dios. ²⁰ A ntá jehe sín sákjuí sín nkuíxín sákjuíkako sín tí tan jína tsaáxin chojni. A ntá jehe Ìnchéni mé kjuínkítsa ch'án tí sín a la ko kjuachaxièn ch'án mé kjuasixín sín kjuaxroan kixin tíha mé tsonoexín tí sín tjejótinhin kixin chaxín nkehe kuènte Dios kjuako sín. Amén.

* 16:13 Lucas 24.13-35

Tí tan jína chrónka ch'ín Lucas

Tíhi mé xrankíxín tí xroon i

¹ Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni. ² Éxí kjuakoheni tí sín tsík'ikonxín kon sín tí xrankíxín nkehe k'uátsínka ch'án la ntá k'uáyéhe sín tí xra sákjuíchronka sín tí tan jína ³ a ntá janhan kjaxian kjuánchánkiá jína kaín nkehe k'uátsínka tí xrankíxín. Ntá nòna jína ikjian kaín tíha éxí tsíkónhen ntá tsochr'anhan jaha Teófilo kíxin imá tjuaha ⁴ kíxin ntá jaha tsonoha jína tí nkehe chaxín tsíkjakoha sín.

Ijnko ángel mé chrónka kíxin tsokjíhi Juan Bautista

⁵ A ntá tí ch'ín rey Herodes k'uetōan ch'án tí estado Judea la ko ntiha kjuák'e ijnko nchat'á mé it'in Zacarías. Jehe ch'án mé kuènte tí sín tsík'axrjeníxin tí ch'ín Abías.* A ntá ichjién ch'án mé it'in Elisabet. Jehe tjan mé tsík'axrjeníxin tjan tí nchat'á Aarón. ⁶ Yóí sín na mé jína sín kíxin éxí tjinkaon Dios la mé kjuínchexiteyéhe sín kaín nkehe k'uetōan ch'án. Méxra ninkexró chrók'uekahya jie tí jehe sín. ⁷ A ntá jehe sín chóntahya sín xjeen sín kíxin ó jehí tsíkitoenhya tjan Elisabet kíxin sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchat'á kuènte Dios. ⁹ A ntá xikaha kuènnen tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte nínko tsjak'e ch'án chjincō chrítaón tí altar kuènte Dios. ¹⁰ Ntá kjuák'e ch'án ntiha kjuák'e ch'án tí chjincō la nachrohe kaín tí chojni k'uéjóni sín ntója nixjehe sín Dios. ¹¹ Ntá xrinahya k'uíkon ch'ín Zacarías ijnko ángel kuènte Dios tjexín toté ch'án nánko chjina tí altar tjak'exin sín chjincō. ¹² A ntá tió k'uíkon ch'ín Zacarías tí ángel la imá kóxakonhen ch'án la ko imá chrakon ch'án. ¹³ A ntá ntáchro tí ch'ín ángel kíxin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sinchek'ian xjan Juan. ¹⁴ Jaha la tsocháha má la ko itsjé chojni tsochéhe sín kíxin tsokjíhi xjan ¹⁵ kíxin imá tjetōan tsjak'e tí xjaan éxí tóxrjínhin Dios. Ninkehó xran vino la ko ninkehó í jnko xran ts'ihya ch'án. Tsochónta ch'án kjuachaxin kuènte Nchakuen Dios kjónté naxa tokjéhya ch'án. ¹⁶ Jehe ch'án mé tsjakohé ch'án tí chojni nación Israel a ntá itsjé sín tsokjan sín tsinkáchónki sín Ìché sín Dios. ¹⁷ Jehe ch'ín Juan tsítaón ch'án ntia tsixín Ìnchéni. Éxí k'uékjako ch'ín Elías ósé mé tsjako ch'án la ko tsochónta ch'án kjuachaxin éxí k'uéchónta ch'ín Elías kíxin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kíxin ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kíxin:

—¿Nkexrí chrókónona kíxin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

¹⁹ Ntá kjuátehe tí ch'ín ángel ntáchro ch'án kíxin:

—Janhan mé Gabriel la mé t'ahā xra Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jína tsonhen. ²⁰ A ntá jie kuítekákonyha

* 1:5 1 Crónicas 24.10

tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xíkaha tsoxiteyá kaín tíha —ichro ch'án.

²¹ A ntá tí í so sín ntiha k'uéjóchóhnen sín ntója nínko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen nínko.

²² Ntá tió k'uaxrjexín ch'ín Zacarías tí nkaxenhen nínko la í xitjahya nixja ch'án. Ntá kónohe sín kixin ichrén kjuaxroan kuente Dios tsík'íkon ch'án tí nkaxenhen nínko. Ntá itja ch'án ó tjákoxin ch'án tí nkehe chróntáchro ch'án kixin í xitjahya nixja ch'án.

²³ A ntá tió kjuixin tí yaon kjuích'e ch'ín Zacarías xra nínko ntá sákjuí ch'án ntøe ch'án. ²⁴ A ntá chr'éxin ntá kjuák'eyá tí ichjién ch'án Elisabet. Ntá ntøe tjan ó kuítóhe tjan in'ó nitjó kjuenkayáxin tjan kixin: ²⁵ “Mé xíkaha ijnko kjuaxroan kjuanjon Ìnchéni kixin chrók'uántaxiéhnyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kixin tsokjíhi Jesús

²⁶ A ntá k'uátsínka injon nitjó ntá Dios k'uëtuenhen tí ch'ín ángel Gabriel kixin sátsji ch'án ijnko chjasin estado Galilea mé it'in Nazaret, ²⁷ sátsji nixjehé ch'án ijnko tjan tjarisoá naxa kuákjahya tjan chojni ntoa mé it'in tjan María. Jhehe tjan mé tsíkatehe tjan kixin tsotehe tjan ijnko ch'ín mé it'in José, mé tsík'axrjeníxin ch'án tí ch'ín rey David. ²⁸ A ntá tí ch'ín ángel k'uíxehen tí tjan tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kixin nkekuente xíkaha nixjeheni ch'án, ichro tjan. ³⁰ A ntá ntáchro tí ch'ín ángel kixin:

—Chrakonhya, María. Dios la imá tjetjinkítsa tí jaha. ³¹ A ntá jie la tsjak'èyá jaha, tsochonta ijnko xjan ntoa la ko sìnchek'ian xjan Jesús. ³² Imá ts'etøan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etøan ch'án éxí ijnko rey éxí k'uëtøan ch'ín David, tí nkexro ts'axrjeníxin ch'án. ³³ Jnkochrín tsjak'e ch'án ts'etuenhen ch'án tí sín nación Israel, la mé tsjejhya tí kjuachaxin ts'etøan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kixin:

—¿Nkekuente kixin xíkaha chrókónhen kixin janhan la naxa chontahya chojni ntoa? —ichro tjan.

³⁵ Ntá kjuatehe tí ch'ín ángel, ntáchro ch'án kixin:

—Tí Nchakuen Dios mé ts'inkajin éxí ijnko tjuí la ko tí kjuachaxin kuente Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios. ³⁶ La ko kjaxin tjan Elisabet kjéhya jaha kjónté ó nána tjan la mé tjeyá tjan. Senó la k'uéchóntahya tjan xjan, a ntá jie la ó injon nitjó tjeyá tjan. ³⁷ Kixin tí kjuachaxiéh Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María kixin:

—Janhan mé t'aha Ìnchéni Dios xra. Ó nchøxon tí nkehe k'uëtøan ch'án sintaxiteyáha ch'án éxí chrónka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

Tjan María sákjuitsjehé tí tjan Elisabet

³⁹ A ntá ijnko yaon tí tjan María tjan sákjuí tjan ijnko chjasin tjan tí jna estado Judea. ⁴⁰ Ntá kjuíji tjan tí chjasin ntiha ntá k'uíxehen tjan ntøe ch'ín Zacarías la ntá nixjehé tjan tí tjan Elisabet. ⁴¹ A ntá tió kuínhin tjan Elisabet

nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios ⁴² ntá itsen nixja tjan ntáchro tjan kixin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaon ch'án tí xjaan. ⁴³ ¿Xá nkexro tí janhan kixin kjuínixjana ìné Ìnchéni? ⁴⁴ Tió kuínhan nixjana ntá tí xjan la chrika xjan nkaya tseña kixin chéhe xjan kjuiha. ⁴⁵ Ntá jaha la cháha kixin kuítekávan kixin Ìnchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kixin:

Asenná imá tjikosáyehe Ìnchéni Dios

⁴⁷ la ko chéhe asenná kixin Dios sinchekaáni ch'án.

⁴⁸ Kixin Dios ikuá kuentá ijnko tí chojni chjin nòé ch'exón xra kuènte ch'án.

À ntá ijie la ko jnkochrixin tsontáchro chojni kixin náxrjón tjèn janhan, tsixro sín.

⁴⁹ Kixin Dios chóna kaín kjuachaxin ntá janhan mé kjuasixinna ch'án ijnko kjuaxroan jie;

imá tjóá tí ihnié ch'án.

⁵⁰ Jnkochrixin tsikonóehé ch'án kaín tí sín tjikosáyehe sín ch'án.

⁵¹ Tsíkjasin ch'án itsjé kjuaxroan jie;

kuakitsjehe ch'án tí kjuachaxin chóna tí sín nchehnke.

⁵² Kuakitsjehe ch'án tí kjuachaxin chóna tí sín t'etoan,

À ntá tí sín nòa k'uék'etuñhya senó la mé jie chjéhe ch'án kjuachaxin ts'etoan sín.

⁵³ À ntá tí sín t'enxín kjinta la kjuanjon ch'án kaín nkehe tsicháxinhin sín, a ntá tí sín rico xráxin jehó tja sín sákjuí sín.

⁵⁴ Kjuínkítsa ch'án tí sín nación Israel kixin tjejóch'ehe sín ch'án xra;

k'uitjáyenhya ch'án tí jehe sín kuikonóehé ch'án sín,

⁵⁵ éxí k'uéchenka ch'án tí sín k'uaxrjeníxinni k'uéjó sín ósé,

na mé tí ch'ín Abraham la ko kaín tí sín naxa ts'axrjeníxin ch'án —mé xikaha ichro tjan María.

⁵⁶ À ntá tjan María kuítóeko tjan tí tjan Elisabet iní nitjó la ntá chr'éxin xíkjan tjan ntøe tjan.

Kokjíhi ch'ín Juan Bautista

⁵⁷ Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa. ⁵⁸ À ntá tí sín chjinaxón ntøe la ko tí sín kjéhya tjan mé kjuíjitsjehe sín kixin tsöchéheko sín tjan kixin kuínhin sín kixin Dios imá tsíkikonóehé tí jehe tjan. ⁵⁹ Ntá tí yaon jnixin ikui sín sincheka sín xjan tí xroye kuènte tí sín judío. Ntá chrókjuinçek'in sín xjan Zacarías éxí it'in it'é. ⁶⁰ Kjánchó ntáchro ìné xjan kixin:

—Náhí. T'ichjánxin its'in xjan Juan —ichro tjan.

⁶¹ Ntá ntáchro sín kixin:

—¿Nkekuènte kixin xikaha chrók'uín xjan? Kohya nkexro naxa kjéhya xikaha it'in —ichro sín.

⁶² À ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uín tí xjan. ⁶³ À ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin: “Ihnié xjan mé Juan.” À ntá kaín tí sín tjejó sín ntiha la chrakon sín kuínhin sín xikaha kónhen. ⁶⁴ À ntá xríñhya ch'ín Zacarías kjuankíxin ch'án nixja ch'án inaá kjuanchehe ch'án Dios kjuasáya. ⁶⁵ À ntá kaín tí sín chjinaxón ntøe sín mé chrakon sín. La ntá nkuíxin tí jna kuènte estado Judea mé kjo sín kichó sín

chrónka sín kixin xikaha tsíkónhen. ⁶⁶ A ntá kaín tí sín kuínhin mé kjuenkayáxin sín kjuanchankíhi sín kíchó sín kixin:

—¿Xá nkehe tí xra tsíkítonhen tí xjan i? —ichro sín.

Kixin chaxín Ìnchéni Dios tsíkjincheyaon ch'án tí xjan.

Tí ch'ín Zacarías itsje ch'án

⁶⁷ A ntá it'é tí xjan mé ch'ín Zacarías, mé antsí k'uáyéhe ch'án kjuachaxin kuènte Nchakuen Dios ntá xikaha nixja ch'án itén Dios ntáchro ch'án kixin:

⁶⁸ Imá jína Ìnchéni, na mé tí Dios kuènte tí nación Israel, kixin ikui ch'án tí tjejóni kjuínchekaá ch'án nación kuènténi.

⁶⁹ La ko kjuanjón ch'án ijnko nkexro t'etōan sincheakaáni ch'án na mé ijnko nkexro k'uaxrjeníxin tí ch'ín David, tí nkexro k'uékjich'ehe Dios xra.

⁷⁰ Éxí k'uéchronkaxín tí sín kjueyá Dios k'uéchronka itén Dios ósé,

⁷¹ k'uéchronka Dios kixin sincheakaáni ch'án kixin ntá tsjachahya kaín tí sín nínkakhenni,

⁷² tsíkonóehē ch'án tí sín k'uaxrjeníxinni ósé, ts'itjáyenhya ch'án tí nkehe tsíchronka ch'án tsoxiteyá.

⁷³ Tíhi mé tsíkjo Dios tí ch'ín Abraham ósé kixin nkehe chaxín tsoxiteyá chr'éxin

⁷⁴ kixin sincheakaáni ch'án kixin kohya nkehe sich'ehe ni tí sín nínkakhenni kixin jína sich'ehe ni ch'án xra tsochrakonhyani,

⁷⁵ la ntá jína ts'ejóni sinchetjóáni ch'án kaín yaon tí naxa tjejóchónni.

⁷⁶ A ntá jaha xjeenni mé tsontáchro Dios kixin jaha ijnko nkexro tsochrónka itén Dios tjen nkaya nkajní.

Jaha tsítōnxian ntia tsixin Ìnchéni la ko jaha tsjásiyóxian ntia tsixin ch'án.

⁷⁷ Jaha tsjákohé tí chojni chjasintajni nkexrí tsjin tí jie chóna sín, ntá tsaá sín.

⁷⁸ A ntá Dios mé tjuèheni ch'án la ko kujkonóeheni ch'án, kixin nkajní kujxin ijnko xrohi nixin ts'inkaséyanxín tí yaon nixin.

⁷⁹ Tíha mé tsíkao tí xrohi ts'inkaséyanxín tí sín tjejó sítié la ko tí sín chrók'uitjayan, la ko ts'ikonxínni tí ntia tsjanjon kjuaxróxin.

Na mé kaín tíhi chrónka tí ch'ín Zacarías.

⁸⁰ A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte xjan kixin antsí tsonohe xjan nkexrí tjen Dios. A ntá kjuák'e xjan nteje k'uánkí xjan kjuixrakájia tí yaon kjuankíxin kjuakohē ch'án tí chojni nación Israel.

2

Kokjíhi ch'ín Jesús

(Mt.1.18-25)

¹ A ntá tí yaon a na mé tí ch'ín imá t'etōan mé it'in Augusto César na mé k'uētōan ch'án kixin ts'ínixín ihnié kaín xín chojni síin tí chjasin t'etōan ch'án kixin tsonohe ch'án nkekjaín chojni síin. ² Tí xrankíxixín k'uínixín ihnié sín tíó Cirenio mé k'uégovernador k'uētōan estado Siria. ³ Kaínxín chojni t'ichjánxin sátsji sín chjasén sín kixin ntaha ts'ínixín ihnié sín. ⁴ Mé xikaha ch'ín José kjaxin k'uaxrjexín ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsíkokjéxín tí ch'ín rey David kixin jehe ch'ín José mé tsík'axrjeníxin ch'án tí ch'ín David. ⁵ Sákjuí ch'án chjasin Belén sákjuíko ch'án tí tjan María kixin ntiha ts'ínixínko ihnié ch'án tjan kixin jehe tjan tsíkatehe kixin tsotehe ch'án. A ntá jehe tjan na mé ó tjejá tjan.

⁶ A ntá xikaha kónhen nachrohe k'uéjé sín chjasin Belén, ntá kjuixraká tí yaon tsokjíhi xjeen tjan María. ⁷ A ntá ntiha kokjéxín tí xjeen tjan saō. Ntá

kjuínchek'ísímá tjan xjan ka, a ntá kjuák'enkaya tjan ijnko nta neyá iko kixin jehe sín la k'uitjahya sín nchia xranka ts'ok'èxín sín mé kjónté ntiha k'uéjó sín.

Tí sín ángel la ko tí sín k'uáyakonhen kolélo

⁸ Kjaxin chjinaxón tí chjasin Belén tjejó iso chojni nteje ó la ntá ntahó titohe sín tí tie a kixin t'ayakonhen sín kolélo. ⁹ A ntá titàya k'uíkuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxin jié kuènte Dios kuikao ch'án. Ntá jehe sín la imá chrakon sín. ¹⁰ A ntá tí ch'ín ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixin kixin tsochéhe kaín sín chojni ¹¹ kixin ijie tí chjasén ch'ín David kokjiéxín tí nkexro tsaáxinrá jahará na mé Ìnchéni Cristo tíha. ¹² Ntá tsonoaxínrá jahará kixin tí xjan a kixin ika tjechr'ísímá xjan la ko ijnko nta neyá iko mé tjetsínkayá xjan —mé xikaha chrónka tí ch'ín ángel.

¹³ A ntá titàya k'uíkuèn sín kixin nchónhya sín ángel kuixín nkaya nkajní tjejóko tí ch'ín ángel tjejótsje sín tjanchehe sín Dios kjuasáya, ntáchro sín kixin:

¹⁴ Kjuasáyé Dios tjen nkaya nkajní kixin imá chónka ch'án kjuachaxin. Ntá chjasintajni ts'ixin kjuaxróxin tí tjejó tí sín sinchexiteyéhe ch'án. Mé xikaha ichro sín.

¹⁵ A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kichó sín ntáchro sín kixin:

—Ìntá sátsjini tí chjasin Belén tsjitsjeheni tí nkehe tsíkónhen kixin Ìnchéni k'ueṭoan kui tí nkexro kjuínchenoheni —ichro sín.

¹⁶ Ntá tjan sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko. ¹⁷ A ntá tió k'uíkon sín xikaha ntá chrónka sín tí nkehe tsíchrónka tí ángel kixin nkexrí tjen tí xjan a. ¹⁸ Ntá chrakon kaín tí sín kuínhin kixin xikaha chrónka tí sín k'uáyakonhen kolélo. ¹⁹ Kjánchó tí tjan María la asén tjan ó xraxinkakonxín tjan kaín tíha. ²⁰ A ntá tí sín k'uáyakonhen kolélo la sákjuí sín ntia kuinkákjanchehe sín Dios kjuasáya kixin kaín tí nkehe tsíkinhin sín la ko k'uíkon sín kixin ó xiteyá kaín nkehe éxí tsíchrónka tí ángel.

Sákjuiko sín tí xjan Jesús tí nínko Jerusalén

²¹ A ntá tió xétja tí ijní yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxí tsintáchro tí ch'ín ángel chénka tí tjan María tí naxa kjuák'eyáhya tjan.

²² A ntá tió kuítohe tjan María jína éxí chrónka ley kuènte Moisés * ntá sákjuiko sín tí xjan tí chjasin Jerusalén kixin tsochjéhe sín Dios kjuasáya. ²³ Éxí ntáchro tí xroon ley kuènté Ìnchéni Dios kixin: “A ntá kaín xjan ntoa tsokjihi saoxín la mé tsochjéhe sín Dios tí xjan a sich'ehe xjan xra Dios.”† ²⁴ Ntá xikaha sákjuí sín kixin ntaha tsjanjon sín iko ts'enxín ntiha tsochjéxín sín Dios kjuasáyé éxí t'etoan tí ley kuènte ch'án na mé yaá kontóá najni o yaá kontóá nteje chrókjuanjon sín.

²⁵ A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochrín xrxinkaon ch'án Dios la ko kjuák'echónhen ch'án kixin itsi tí nkexro tsaáxin tí nación Israel. Tí Nchakuen Dios tjeko tí ch'ín Simeón ²⁶ tsíkjinchenohe ch'án kixin naxa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios. ²⁷ A ntá tí Nchakuen Dios kjuínchexrxinkaon tí ch'ín a kixin sátsji ch'án nínko. A ntá tió kui tí iné la ko it'é xjan Jesús k'uíxenko sín xjan nkaxenhen nínko kixin

* 2:22 Levítico 12.1-8 † 2:23 Éxodo 13.2,12

sinchexiteyéhe sín tí nkehe t'et̄oan tí ley ²⁸ ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

²⁹ Ijie jaha Ìnchéni Dios, tsjánjuan kjuachaxin kixin kjuaxróxin its'én janhan kixin jaha ó kjuínchexiteyá tí nkehe tsintáchrúa

³⁰ kixin ó k'uik̄onxin kuān tí nkexro tsaáxinni,

³¹ mé x̄ikaha kjuich'e kixin ts'ikon kaín xín chojni.

³² Jehé ch'án mé tí xrohi ts'inkaséyanxín nt̄ie tí sín jehya kuènte Israel, la ko jehé ch'án tsjikosáyehe ch'án tí chjasín kuèntá Israel, mé ichro ch'ín Simeón.

³³ Ntá ch'ín José la ko tí ìné ch'ín Jesús la chrakon sín kixin x̄ikaha kuínhin sín ntáchro ch'ín Simeón kixin nkexrí t̄jen tí xjan. ³⁴ Ntá ch'ín Simeón kjuíncheyaon ch'án sín ntá chénka ch'án tí tjan María mé tí ìné xjan Jesús kixin:

—Tí xjan i tsík̄ik̄ao itsjé xr̄a la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín ant̄sí t̄sonohe sín la ko nchónhya chojni tsotjinkakonhya tsinhin sín tí nkehe tsjako ch'án. ³⁵ Mé x̄ikaha t̄sonoxín nkexrí t̄jenkayáxin jnkojnko asén chojni. Kjánchó kaín tíha t̄soyóhe éxí ijnko chica espada chróchr'áte asán na mé t̄soxakonhan la ko ts'avá má —ichro ch'án nixjehe ch'án tí tjan María.

³⁶ Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxin ch'án tí ch'ín Aser. Jehé tjan la ó nána tjan. Tí nax̄a k'uétjarisoá tjan la kótehe tjan. Ntá yatokoá nánó kjuák'eko tí x̄i tjan ³⁷ ntá jie ochenta y cuatro nánó tsíkók'án tjan. Kuítóehya tjan tí xr̄a kuènte n̄inko la mé ntahó t̄jen tjan ch'ehe tjan Ìnchéni Dios xr̄a nchakotjin la ko tie la jnkoyaxón nehya tjan kixin jína t̄sonixjehe tjan Dios. ³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí t̄jen tí xjan Jesús nixjehe tjan kaín tí sín t̄jejóchónhen kixin itsi nkexro sinchekaá tí chjasín Jerusalén.

Ntá kjan sín chjasín Nazaret

³⁹ Na ntá tió kjuixin kjuínchexiteyá sín kaín nkehe t'et̄oan tí ley kuènte Dios ntá kjan sín estado Galilea na mé chjasén sín chaxín Nazaret. ⁴⁰ A ntá tí xjan a mé k'uánkí xjan la ko ts̄ank̄a xjan la ko imá kónohe xjan kixin Dios imá t̄jink̄itsa t̄jencheyaon xjan.

Tí xjan Jesús kjuák'e xjan tí n̄inko Jerusalén

⁴¹ Tí it'é la ko ìné tí xjan Jesús xr̄axín k'uék̄ji sín kaín nánó tí chjasín Jerusalén kixin tí kia pascua. ⁴² A ntá tió xetjehe ch'ín Jesús tí teyó nánó, ntá sákjuj sín kaín sín tí chjasín Jerusalén kixin x̄ikaha kuènnen sín kixin tí kia a. ⁴³ A ntá kjanxin sín ntiha sáchrók̄jui sín chjasén sín tió k'uátsínka kia la tí xjan Jesús ó tsík̄it̄ohe xjan Jerusalén ntahó, kjánchó ìné xjan la ko ch'ín José xraxinkakonhya sín kixin kohya tí xjan. ⁴⁴ Jehé sín mé kjuenkayáxin sín kixin ách'e tí sín kuichréhe mé kuik̄ao sín xjan la ntá x̄ikaha chjina ijnko yaon ó t̄jejóyá sín nt̄ia tsík̄ji sín. A ntá k̄jueyá sín xjan tí t̄jejó tí sín kjéhya la ko tí sín chóxin sín ⁴⁵ kjánchó k'uitjahya sín xjan. Ntá kjan sín tí chjasín Jerusalén kixin tsjeyá sín xjan ntiha.

⁴⁶ Ntá k'uátsínka iní yaon ntá k'uitja sín xjan la mé nkaxenhen n̄inko ntiha t̄jetj̄axin xjan jnkosiné tí t̄jejó tí sín maestro tjako tí ley la t̄jetinhin xjan tí nkehe ntáchro sín la ko t̄jetjanckh̄k̄ihi xjan tí jehé sín. ⁴⁷ Ntá kaín tí sín t̄jejóntaxín t̄jejótinhin sín mé chrakon sín kixin x̄ikaha imá nohe xjan la ko x̄ikaha t̄jatehe xjan kaín nkehe t̄janckh̄k̄ihi sín xjan. ⁴⁸ Ntá tió k'uik̄on ìné la ko it'é la chrakon sín. Ntá ntáchro ìné kixin:

—Xjeenni, ¿nkekuènte xikaha kjuich'e? It'á la ko janhan imá kóxakonhenni kjueyáni tí jaha —ichro tjan.

⁴⁹ Ntá ntáchro ch'ín Jesús kixin:

—¿Nkekuènte tjéyá tí jeheni? ¿Á noahya jaha kixin tóxakonhenni kixin tí xra kuènte It'éni? —ichro ch'án.

⁵⁰ Kjánchó kienxínhya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naxa kuítekakohen xjan tí jehe sín. A ntá tí iné la ntá asén tjan xráxín ó nohe kixin xikaha kónhen. ⁵² La ko naxa k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhín nkexrí kjuínchexiteyá xjan la ko kjaxin kaín chojni kóxrjínhín sín kixin jina tjen xjan.

3

Ch'ín Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

¹ A ntá quince nánó k'uék'etōan ch'ín Tiberio tí xra gobierno, la ko tí ch'ín Poncio Pilato k'uégobrador tí estado Judea, la ko tí ch'ín Herodes k'uégobrador tí estado Galilea, la ko tí kichó ch'án Felipe mé k'uégobrador estado Iturea la ko estado Traconite, la ko ch'ín Lisantias k'uégobrador tí estado Abilinia. ² A ntá ch'ín Anás la ko ch'ín Caifás k'uéchónta sín xra nchat'á t'etōan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías. ³ Ch'ín Juan k'uátsínka ch'án kaín tí chjasin chjino tí ntarío Jordán kjuakohe ch'án chojni ntiha kixin chrókjuinkí sín tí nkehe tjenkayáxin sín chrókuítóhe sín tí ijié sín ntá chrókuikite sín kixin xikaha mé chrókjuin ijié sín. ⁴ Mé xikaha kónhen éxí k'uéchronka la ko tsíkjin ch'ín Isaías, mé tí nkexro k'uéchronka itén Dios óse kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixín Ìnchéni

Takítjehérá ijnko ntia ntoí.

⁵ Kaínxín tsaka mé tsoyóxin,

la ko kaín xín jna la ko kaín xín itjo tsitōhe yóxin,

la ko tí ntia tsíxrèya mé tsoxrentoá,

la ko kaín tí ntia yóxinhya la mé tsoyóxin;

⁶ Xikaha mé kaín xín chojni chjasintajni mé ts'ikon sín kixin Dios mé chrókuaáxin sín.”*

Mé xikaha ichro itén Dios.

⁷ A ntá tió kjuíji chojni ntiha kixin ch'ín Juan chrókuikite ch'án sín ntá ntáche ch'án tí jehe sín kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkeherá tí kjuanínkaon kuènte Dios ó tsi? ⁸ T'ichjánxin kixin chrók'uejorá jnkójina chrókjuákoxinrá kixin chaxín kjuitoxinhínrá tí nkehe tjenkayáxinrá. Jahará nchehkerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ⁹ Kixin tí chica hacha ó tjechónhen tsochrínjinxín tí nta. A ntá kaín xín nta t'ónahya to jina mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xikaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátehe ch'ín Juan kixin:

* 3:6 3.4-6 Isaías 40.3-5

—Tí nkexro chón̄ta yaá camisa la chrókjuinchek̄itonhen tí nkexro chón̄tahya. La ko tí nkexro chón̄ta nkehe sine chróchjéhe sín tí nkexro chón̄tahya nkehe sine —ichro ch'án.

¹² Kjaxin ikui iso tí sín nchekjènki kixin chrókuikite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kixin:

—Jehó éxí tí tsík'ítuanhanrá chrókjuinchekjènkirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chichakoen sín la ko ninkexró sich'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uéjóchónhen sín tóxakonhen asén sín tjinkaon sín tsonohe sín kixin á tí ch'ín Juan mé tí Cristo. ¹⁶ Kjánchó chénka ch'ín Juan kaín tí sín tjejó a kixin:

—Janhan mé int̄a tíkitexián chojni. A ntá tí nkexro itsi chr'éxin mé tsíkítexinrá tí Nchakuen Dios la ko xrohi. Antsí t'etoan ch'án a ntá janhan la kánhyó. Méxra chrókósuàna chrókjuasintankaha ch'án tí correa tí tokaté ch'án. ¹⁷ Jehe ch'án la ó tjexraá ch'án pala sinchetjuáxin ch'án noatrigo kixin tí ntachjiji trigo la ókjé tsjejo ch'án a ntá tí noatrigo la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochrín —mé xikaha ichro ch'ín Juan.

¹⁸ Mé xikaha chronkaxín ch'án la ko itsjé í so nkehe kjuínchexraxinkaon ch'án chojni mé xikaha kjuakoxín ch'án sín tí tan jina. ¹⁹ Kjaxin kjuentuéhe ch'án tí ch'ín Herodes kixin chón̄ta ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsíkjich'e ch'án. ²⁰ Kjánchó ch'ín Herodes ántosén ch'án kjónté kuínhin ch'án la kjuínchek'ánkí ch'án tí ijje ch'án inaá kixin kjuak'echjina ch'án tí ch'ín Juan tí ntoechiso.

Kuikite ch'ín Jesús

(Mt. 3.13-17; Mr. 1.9-11)

²¹ A ntá naxa kuènhya tíha naxa kjuák'e ch'ín Juan kuikite ch'án chojni ntá kjaxin ch'ín Jesús mé kuikite ch'án. A ntá tjenixjehe ch'án Dios ntá xitjehe nkajní ²² ntá k'uínkajin Nchakuen Dios éxí ijnko kontóá tsjehe la kjuák'e chrítaón kja ch'án. Ntá xrínahya kuínhin sín itén nkexro nkaya nkajní ntáchro kixin:

—Jaha mé xjanna la tjuaha tí jaha. Imá chàna kixin nchexiteyána tí jaha.

Tí sín tsík'axrjenixin ch'ín Jesucristo

(Mt. 1.1-17)

²³ Ch'ín Jesús k'uéchón̄ta ch'án chjino treinta nánó tió kjuankixin kjuako ch'án. Ntá kjuenkayáxin sín kixin it'é la mé ch'ín José. Ntá it'é tí ch'ín José la mé ch'ín Elí. ²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. ²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, ²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José

na mé ch'ín Judá, ²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, ²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er, ²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, ³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, ³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, ³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, ³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, ³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham na mé ch'ín Taré, a ntá it'é tí ch'ín Taré na mé ch'ín Nacor, ³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala, ³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, ³⁷ a ntá it'é tí ch'ín Lamec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán, ³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4

Ch'ín Tsochren chrókjuachroe tí ch'ín Jesús (Mt. 4.1-11; Mr. 1.12-13)

¹ A ntá ch'ín Jesús imá chóna ch'án kjuachaxién Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje. ² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xrinahya ik'uén ch'án kjinta. ³ Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhí. Ntáchro xroon itén Dios kixin: “Jehya niotja ó chrók'uejóchónxin chojni. Náhí. Kaín tí tan nixja Dios tjejóchónxin chojni”^{*} —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí nación siín chjasintajni. ⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nación a. Janhan na k'uayáha kaín tíha la ntá jie tsotjaha tí nkexro tjínkavan

* 4:4 Deuteronomio 8.8

tsotjaha. ⁷ Tí tsjak'éxian tóch'ian tsjíkosáyana tí janhan ntá kaín tí nkehe la ts'óna kuèntá —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuíkosáyehé Ìnchéni Dios la jehó ch'án chrókjuich'ehé xra”† —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja ninko, a ntá ntáchro ch'án kixin:

—Tí chaxín Xjeen Dios jaha la tìtohé t'anótjénxian tí noi ntihi ¹⁰ kixin ntáchro xroon itén Dios kixin:

Dios mé ts'etuénhen tí sín ángel kuènte ch'án kixin ts'ayakonhan sín.‡

¹¹ Tsotsé sín itjá

kixin tsotéhya totá ts'itja xro tí ts'anótjén§

—mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuènte Ìnchéni Dios”* —ichro ch'ín Jesús.

¹³ Mé xikaha tió kjuachahya tí ch'ín Tsochren kaín nkehe chrók'uetuénhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuènte ch'án estado Galilea

(Mt. 4.12-17; Mr. 1.14-15)

¹⁴ Ntá ch'ín Jesús xíkjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejóto sín nkuíxín ntiha kixin nkexro tí jehe ch'án. ¹⁵ Kjuakoxin ch'án tí ninkoe sín kaín chjasin la ko kaín xín chojni kjuanchia sín kjuasáya kixin kóxrjinhin sín tí kjuako ch'án.

Ch'ín Jesús kjuák'e ch'án chjasin Nazaret

(Mt. 13.53-58; Mr. 6.1-6)

¹⁶ Ntá ch'ín Jesús sákjuí ch'án chjasin Nazaret na mé tí chjasin tsík'ánkixin ch'án. Ntá tí yaon t'ok'éhe sín mé k'uixenhen ch'án ijnko ninko Israel kixin xikaha kuènen ch'án. Ntá kjuák'exín toté ch'án kixin sinchekuáxin ch'án tí xroon itén Dios. ¹⁷ Chjéhe sín ch'án tí xroon kuènte tí profeta Isaías. Ntá kuakitjehe ch'án tí xroon ntá k'uitja ch'án nketí nixja xikihí:

¹⁸ Tí Nchakuen It'éni Dios tjetjinkitsana má,

kixin kjueyána ch'án kixin tsoxrjanka tí tan jína kuènte Dios tsjakohá tí sín nòa. K'uetuanna ch'án kixin sintakitohá jína tí sín t'ává asén kixin chóntahya sín

nkerí tsaáxin sín,

la ko tsjakohá tí sín tjejóchjina kixin nkexrí tsaá sín,

la ko sintak'ikuán tí sín t'ikonhya,

la ko sintakaá kaín tí sín tjejótojasóte kohya nkehe tsaáxin sín,

¹⁹ la ko tsoxrjanka kixin ó kjuixraká tí yaon kixin tí nkexro tsitekaon la tsaá sín.†

²⁰ A ntá ch'ín Jesús kjuixin kjuínchekuáxin ch'án tí xroon, a ntá chjéhe ch'án tí ch'ín tjinkitsa tí xra ninko ntá kjuák'etjaxin ch'án. Ntá kaín tí sín tsíkójkotsé ntiha ninko naxa tjejókomá sín tí jehe ch'án. ²¹ Ntá kjuankixin chronkaxín ch'án ntáchro ch'án kixin:

—Ntá ijie la ó xiteyá tí nkehe kjuintakuáxian tí xroon itén Dios kuínhínrá —ichro ch'án.

²² Ntá kaín sín kóxrjinhin sín tí kjuako ch'ín Jesús la ko chrakon sín kixin náxrjón tí nkehe nixja ch'án. Ntá kjuanchankíhi sín kichó sín ntáchro sín kixin:

—¿A jehya xjeen ch'ín José tíhi? —ichro sín.

† 4:8 Deuteronomio 6.13 ‡ 4:10 Salmo 91.11 § 4:11 Salmo 91.12 * 4:12 Deuteronomio 6.16

† 4:19 4.18-19 Isaías 61.1-2

²³ Ntá kjuátehe ch'ín Jesús ntáchro ch'án kixin:

—Kjá tsontáchrórá kixin janhan ijnko chojni ch'e xroan chrókjuintakitoha jína asenná senó, la ko tsontáchrórá kixin tí nkehe kuínhínrá kjuít'a tí chjasin Capernaum xikaha chrókjuít'a ntihi chjasenná, tsixrorá —ichro ch'án.

²⁴ Naxa tjenixja ch'án ntáchro ch'án kixin:

—Ijnko nkehe chaxín tsotjonkará kixin tí sín chjasén ijnko nkexro chrónka itén Dios la mé xráxín chóntehya sín kjuasáyé tí nkexro a. ²⁵ Chaxín ntáxrjan kixin k'uéjó itsjé chojni chjin tsíkók'án tí nación Israel tió kjuák'e ch'ín Elías tí nkexro k'uéchrónka itén Dios la ntá í k'uániáhya chrin iní nánó ko t'ò la ko imá kókjinta nkuíxín chjasin ntiha. ²⁶ Kjánchó Dios la k'uëtuenhya ch'ín Elías sáchrókjuitsjehe ch'án nijnko chojni chjin tsíkók'án tí nación Israel. Náhi. Dios k'uëtuenhen ch'án kixin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón.‡ ²⁷ Kjaxin nación Israel k'uéjó nchónhya chojni chóna chinlepra tió kjuák'e ch'ín Eliseo chrónka ch'án itén Dios, kjánchó nijnko sín kuitóehya sín jína la mé jehó ch'ín Naamán kjuixín ch'án nación Siria mé kuitóhe ch'án jína§ —mé xikaha ichro ch'án.

²⁸ A ntá tió kuínhin sín xikaha ntáchro ch'ín Jesús la ntá kaín tí chojni k'uéjóxehen njnko la mé imá kónínkaon sín. ²⁹ K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuinçek'anótjenxin sín ch'án tí tjo a. ³⁰ A ntá ch'ín Jesús k'uátsínka jnkosiné tí siín tí jehe sín la sákjuí ch'án.

Ijnko chojni chóna ijnko nchakuen tí jínahya

(Mr. 1.21-28)

³¹ A ntá ch'ín Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuankixin ch'án kjuakohé ch'án chojni tí yaon t'ok'éhe sín. ³² Chrakon sín kixin nkexrí kjuako ch'án kixin kjuakoxín ch'án kixin chóna ch'án kjuachaxin.

³³ A ntá nkaxenhen njnko kjuák'e ijnko ch'ín chóna ijnko nchakuen tí jínahya k'óyakoxín itén tí ch'ín a, ntáchro kixin:

³⁴ —Títóhéni; ¿nkekuènte tjiaté tí jeheni kaín ni, jaha Jesús kjuíxian chjasin Nazaret? ¿Á k'uinka kixin sinček'itjáyanni? Ó tjátsoan tí jaha la ko nóna kixin jaha mé tí nkexro tjóá kuènte Dios —ichro tí nchakuen tí jínahya.

³⁵ Ntá ch'ín Jesús jiehe k'uëtuenhen tí nchakuen tí jínahya ntáchro ch'án kixin:

—Táníá. T'axrjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí siín sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka. ³⁶ A ntá kaín sín chrakon sín itjo sín kichó sín kixin:

—¿Xá nkexrí kixin xikaha nixja tí ch'ín í? Jehe ch'án chóna kjuachaxin kixin k'uëtuenhen ch'án tí nchakuen tí jínahya k'uaxrjexín tí nkexro i —ichro sín.

³⁷ A ntá nkuíxín ntiha ikjo sín kichó sín kixin nkerí kjuaxroan kjuích'e ch'ín Jesús.

Ch'ín Jesús kjuínčekitohé jína tí tjan ich'ee ch'ín Simón Pedro

(Mt. 8.14-15; Mr. 1.29-31)

³⁸ Ntá ch'ín Jesús k'uaxrjexín ch'án tí njnko la ntá k'uixenhen ch'án ntóe ch'ín Simón. A ntá tí tjan ich'ee ch'ín Simón mé níhi tjan chóna tjan ijnko sóa jié ntá chrónóehé sín ch'án kixin chrókjuinčekitohé ch'án tjan jína. ³⁹ Ntá k'uísén ch'ín Jesús tí tjen tjan ntá k'uëtuenhen ch'án tí sóa a ntá kjuìn. Ntá tuénxín k'uàya tjan la ntá kjuanjon tjan nkehe sine sín.

‡ 4:26 4.25,26 1 Reyes 17.9;18.1 § 4:27 2 Reyes 5.1-14

Ch'ín Jesús kjuínchekitohe ch'án jína itsjé chojni níhi
(Mt. 8.16-17; Mr. 1.32-34)

⁴⁰ A ntá kuétaón yaon ntá kaín tí sín chón̄ta sín sinníhi chón̄ta sín nchón̄hya clase chin mé kuikao sín tí tjen ch'ín Jesús. Ntá kjuak'etja tja ch'án jnkojnko tí jehe sín a ntá xikaha kuítóhe sín jína. ⁴¹ La ko nchón̄hya chojni níhi chón̄ta nchakuen tí jínahya la mé k'uaxrje tí nchakuen tí jínahya la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínahya.

Kjánchó ch'ín Jesús k'uetuēnhen ch'án tí nchakuen tí jínahya la kjuanjonhya ch'án kjuachaxin kixin tsonixja kixin ó nohe tí nchakuen tí jínahya kixin jehe ch'án na mé tí nkexro Cristo.

Ch'ín Jesús kjuako ch'án tí estado Galilea
(Mr. 1.35-39)

⁴² A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuí ch'án nteje. A ntá kaín tí chojni kjuíkjejá sín ch'án la k'uitja sín tí tjen ch'án. Tjinkaon sín chrókjuinchexrjenhen sín ch'án kixin sáchrókjuihya ch'án ókjé. ⁴³ Kjánchó kjuátehe ch'ín Jesús ntáchro ch'án kixin:

—T'ichjánxin kixin sátsjia kaín chjasin ókjé tsoxrjanka tí tan jína kuēnte Dios kixin nkexrí tí kjuachaxin t'etoan Dios, kixin xra ó mé k'uinka —ichro ch'án.

⁴⁴ A ntá xikaha k'uájkjako ch'ín Jesús kaín tí n̄nko Israel tí estado Galilea.

5

Kjuaxroan itsé sín koche
(Mt. 4.18-22; Mr. 1.16-20)

¹ Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchón̄hya chojni na mé k'uúxitja kichó sín kixin tjinkaon sín chrókuinhin sín itén Dios. ² Ntá k'uíkon ch'ín Jesús kixin tjejó iyó ntabárc̄o jehó chjino chrínta ntayaon. A ntá tí sín itsé koche mé tsík'axrjexín sín ntiha la k'uéjó sín tjentoá sín la ko tjejó̄tjonemá sín tí nchísén tséya sín koche. ³ Ntá ch'ín Jesús k'uit'ótjen ch'án ijnko tí ntabárc̄o ntiha na mé ntabárc̄o kuēnte ch'ín Simón na ntá chronóehe ch'án tí ch'ín Simón kixin sátsjiko ch'án ntabárc̄o ijnko chrínta ntá kjínhya. Ntá ntahó kjuák'enkáya ch'ín Jesús tí nta kjuák'etjaxin ch'án kjuakohe ch'án nchón̄hya chojni siín chrínta ntá. ⁴ A ntá tió kjuixin nixja ch'án ntá ntáche ch'án tí ch'ín Simón kixin:

—Tjiko ntabárc̄o tí tjiá ntá n̄nka ntá itérá tí nchísén tseyará koche —ichro ch'án.

⁵ Ntá kjuátehe ch'ín Simón ntáchro ch'án kixin:

—Maestro, kjuích'eni xra kuenté tie la tséhyani ninkehó koche. Kjánchó tí jaha xikaha kuétuēnhéni la mé tsochr'ánni tí nchísén inaá —ichro ch'án.

⁶ Na ntá xikaha kjuích'e sín la ntá nchón̄hya koche tsítsé tí nchísén la ntá tí nchísén kjuankixin tinkák'ichje. ⁷ Ntá k'uèyaxin sín tja sín kixin chróxrakoa tí sín ch'eko sín xra tjejó̄xehen tí í jnko ntabárc̄o kixin tsjink̄itsa sín. Ntá xráko sín ntabárc̄o kuēnte sín ntá kjuínchekaón sín yóí tí ntabárc̄o ntá chrókjuachahya tí ntabárc̄o na tjinkaon chrók'uániánkí ntá. ⁸ Ntá xikaha k'uíkon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—T̄itohéni Ìnchéni kixin jeheni ijnko chojni chón̄ta jje —ichro ch'án.

⁹ Mé xikaha ichro ch'ín Simón kixin chrakon ch'án la ko kjaxin chrakon tí í so sín tjejóko ch'án kixin xikaha kónhen xrenájín nchón̄hya koche. ¹⁰ La ko ch'ín Jacobo la ko ch'ín Juan, xjeen ch'ín Zebedeo, na mé jnkokoá ch'eko sín xra ch'ín Simón, la kjaxin chrakon sín. Kjánchó ntáche ch'ín Jesús tí ch'ín Simón kixin:

—Chrakonhya. Senó la koche k'uétse la nta jie la náhi la mé chojni tsjéyá —ichro ch'án.

¹¹ Ntá tió kjuíjiko sín tí ntabárcō tí chrínta ntā la kuítóhe sín kaín nkehe kuènte sín ntá chréhe sín sákjuíko sín tí ch'ín Jesús.

Ch'ín Jesús kjuínchekitohe ch'án jína ijnko chojni chóna chinlepra
(Mt. 8.1-4; Mr. 1.40-45)

¹² Kjuák'e ch'ín Jesús ijnko tí chjasin, ntá kui ijnko chojni níhi chóna chinlepra. A ntá tió k'uíkon ch'án tí ch'ín Jesús ntá kjuák'exín toch'in ch'án chronóehē ch'án jnkojína ntáchro ch'án kixin:

—Ínchéni, tí tjinkávan jaha la jína chrókjuínchekitohéni jína —ichro ch'án.

¹³ Ntá ch'ín Jesús kjuéntoá tja ch'án ntá kjuak'etja tja ch'án chrítaón tí sijníhi ntáchro ch'án kixin:

—Méxra xikaha tjinkávan. Ntá jie sintakitoha jína —ichro ch'án.

Ntá xikaha ichro ch'án ntá tí chinlepra tuénxín kjuínhin tí sijníhi. ¹⁴ A ntá k'uetuēnhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsjánjuan tí nkehe tsík'etōan ch'ín Moisés ts'áyéhe Dios* kixin ntá tsonoxín kaín xín chojni kixin ó kuítóha jína —ichro ch'án.

¹⁵ Kjánchó antsí k'uíxikónohe sín nkexrí tí kjuaxroan kjuasin ch'ín Jesús, ntá nchónhya chojni k'uíxikóhchinehe sín ch'án kixin tsinhin sín nkehe tsjako ch'án, la ko tsitōexín sín jína tí chin chóna sín. ¹⁶ Kjánchó ch'ín Jesús la k'uaxrjenta ch'án tí kohya chojni la ntaha nixjeexín ch'án Dios.

Ch'ín Jesús kjuínchekitohe ch'án jína ijnko ch'ín tsík'en toté
(Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'ín Jesús na ntá ntiha k'uéjótjaxín iso sín fariseo la ko iso tí sín tjako tí ley, tsíkjixín sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuènte Dios kjuakoxín ch'án kixin sinchekitohe ch'án chojni jína.

¹⁸ Ntá kui iso chojni tinkátsénkí sín ijnko ch'ín tsík'en tote tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án. ¹⁹ Kjánchó xitjahya ts'ixenhen sín kixin nchónhya chojni síxenhen nchia. Ntá k'uit'ótjen sín tí chrítaón nchia, ntá kjuakjín sín iso teja la ko tí nta sít'ó ntá ntiha kjuinkajinxín sín tí ch'ín níhi tjenkáya kania ntoí tí tjen ch'ín Jesús. ²⁰ Na ntá tió k'uíkon ch'ín Jesús kixin imá tinkáchónki sín ch'án ntá nixjehe ch'án tí ch'ín níhi, ntáchro ch'án kixin:

—Jaha, ó kjuixin kjuínhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjín ijie kixin jehó Dios mé chóna kjuachaxin tsjatsen ijie chojni”, mé xikaha kjuenkayáxin sín.

²² Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuènte kixin xikaha tjenkayáxinrá? ²³ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuínhin ch'án tí ijie yamá ch'án, o á antsí xrahya chróntátjan ch'án kixin chrók'uínkatjen ch'án sáchrókjui ch'án? ²⁴ Méxra ijie tsjákoxian kixin tí Xjeen Dios K'óna Chojni mé chóna kjuachaxin ntihi chjasintajni tsjakjínhin ijie chojni —ichro ch'án.

Ntá k'uetuēnhen ch'án tí ch'ín tsík'en tote ntáchro ch'án kixin:

—Jaha tétuanhan t'inkatjen tjatsíyan kaniāa la sátjia ntōa —ichro ch'án.

* 5:14 Levítico 14.4-8

25 Ntá tuénxín k'uínkatjen tí ch'ín tsík'en tote nkayakon kaín tí sín siín a la kuákja ch'án kaniee ch'án k'uékjak'eták'á ch'án ntá sákjuí ch'án ntøe ch'án la kjuanchehe ch'án Dios kjuasáya. 26 Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uíkoni antsí má kjuaxroan jie —ichro sín.

*Ch'ín Jesús k'uíyehē ch'án tí ch'ín Leví
(Mt. 9.9-13; Mr. 2.13-17)*

27 Ntá chr'éxin ntá ch'ín Jesús k'uaxrjexín ch'án nchia ntá k'uíkon ch'án ijnko ch'ín nchekjènkí mé it'in ch'án Leví tjetjaxín ch'án tjech'e ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kixin:

—Chréhé tí janhan —ichro ch'án.

28 Ntá ch'ín Leví mé tuénxín k'uínkatjen ch'án la ntá kuítóhe ch'án kaín xín nkehe ntá chréhē ch'án tí ch'ín Jesús.

29 Ntá chr'éxin ch'ín Leví chóna ch'án ijnko kia jie ntøe ch'án kjuikosáyehe ch'án tí ch'ín Jesús. Kjaxin k'uéjé itsjé tí sín nchekjènkí la ko itsjé í so chojni chóna jie k'uéjótjaxínko sín tí ch'ín Jesús chjino tí mesa a. 30 A ntá tí sín fariseo la ko tí sín maestro tjako tí ley la mé kjuankíxin sín tjonta sín tí sín k'uájiko ch'ín Jesús ntáchro sín kixin:

—¿Nkekuènte ntekoará la ko t'ikoará tí sín nchekjènkí la ko tí sín chóna jie? —ichro sín.

31 A ntá kjuátehe ch'ín Jesús ntáchro ch'án kixin:

—Tí chojni níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. 32 Janhan la k'uinkahya ntihi kixin chrók'uíyahā tí sín jina tjejó. Náhí. Janhan k'uinka kixin ts'iyahā tí sín chóna jie kixin chrókuítóhe sín tí ijie sín ntá chrókuinkí sín tí tjenkayáxin sín —ichro ch'án.

*Tjanchankíhi sín tí ch'ín Jesús kixin á chrókjónehya sín tió tsonixjehē sín Dios
(Mt. 9.14-17; Mr. 2.18-22)*

33 A ntá kjuanchankíhi sín tí ch'ín Jesús kixin:

—¿Nkekuènte kixin tí sín k'uék'ajiko ch'ín Juan jnkoyaxón nehya sín na nixjehē sín Dios, la ko kjaxin xikaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

34 Ntá kjuátehe ch'ín Jesús kixin:

—¿Xá chrókuachará chrókuétuēnhenrá kaín tí sín tsík'íyehē sín tsíkóchjina tí tjejó tí sín tsíkótehe kixin chrókjónehya sín tí naxā tjejóko sín tí ch'ín tsíkótehe? 35 Kjánchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

36 Kjaxin kjuíncheyóexin ch'án ntáchro ch'án kixin:

—Ninkexró chrókuaté ijnko camisa nixin ntá chrókuak'eniēhe ijnko camisa ntaxin kixin xikaha chrókuich'e sín ntá chrók'uitjāyan tí camisa nixin la ko kjaxin tí t'ø ka k'uaxrjexín tí camisa nixin tsoyóehya tí camisa ntaxin. 37 Kjaxin chrókuikiahýará xranvino nixin ijnko tjuaxran ntaxin kixin tí xikaha chrókuich'erá la chrók'uichje tí tjuaxran ntaxin ntá chrók'uitjāyan tí xran la ko chrók'uitjāyan tí tjuaxran. 38 A ntá tí xranvino nixin chrókuikia ijnko tjuaxran nixin kixin yóí la chrók'uitjāyanhya. 39 La ko kjaxin ninkexró tió tsík'i tí xran ntaxin naxā chrókóxrjínhin chrók'ui xran nixin. Náhí. Tsontáchro ch'án kixin íchá jina tí xran ntaxin, tsixro ch'án —mé xikaha ichro ch'ín Jesús.

6

Tí sín k'uájiko ch'ín Jesús mé k'uín sín iso noatrigo ijnko yaon t'ok'éhe tí sín israelita

(Mt. 12.1-8; Mr. 2.23-28)

¹ Ijnko yaon t'ok'éhe sín la ch'ín Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankíxin sín nkaya tja sín ó k'óntajinyá sín tí noa ntá k'jóné sín. ² Ntá iso tí sín fariseo kjuanchankí sín k'íxin:

—¿Nkekuènte k'íxin tjejoch'erá xra jie? La mé kohya kjuachaxin tsonhen xra tí yaon t'ok'éheni —ichro sín.

³ Ntá kjuátehe ch'ín Jesús k'íxin:

—¿Jahará á kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? ⁴ Na mé jehe ch'án mé k'uíxenhén ch'án ntoe Dios la k'jóné ch'án tí niotja tsíkóyaon, la ko kjaxin ch'jéhe ch'án tí niotja tí sín k'uájiko ch'án k'jóné jehó siín kjuachaxin sine tí sín nchat'á* —ichro ch'ín Jesús.

⁵ Kjaxin ntáchro ch'án k'íxin:

—A ntá tí Xjeen Dios K'óna Chojni mé chóna kjuachaxin ts'etoan nkexri tsonhen tí yaon t'ok'éheni —ichro ch'án.

Ch'ín Jesús kjuínchekitohe jína ijnko ch'ín tsíxámá tja

(Mt. 12.9-14; Mr. 3.1-6)

⁶ A ntá í jnko yaon t'ok'éhe chojni ntá k'uíxenhén ch'ín Jesús ijnko nínko Israel la ntá kjuankíxin kjuako ch'án. A ntá ntaha kjuák'e ijnko ch'ín tsíxámá tja ch'án chjina. ⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'uíkon sín á sinchekitohe ch'án chojni jína tí yaon t'ok'éhe sín k'íxin ntá chrók'ueka sín ch'án jie. ⁸ Kjánchó jehe ch'án ó nohe ch'án nkehe tjenkayáxin asén sín ntá nixjehe ch'án tí ch'ín tsíxámá tja ntáchro ch'án k'íxin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tote ch'án. ⁹ Ntá nixjehe ch'ín Jesús tí í so sín ntáchro ch'án k'íxin:

—Tsjánchánkíhára ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitoheni chojni jína ní o á chrók'óyánni chojni? —ichro ch'án.

¹⁰ Ntá ch'ín Jesús komá ch'án kaín tí chojni siín ntiha ntá nixjehe ch'án tí ch'ín níhi ntáchro ch'án k'íxin:

—Tjéntoá tjá —ichro ch'án.

A ntá tí ch'ín a xikaha kjuích'e ch'án ntá kuitohe tja ch'án jína. ¹¹ Kjánchó tí sín fariseo tjejó mé kónínkaon sín mé ntá kjo sín k'íchó sín k'íxin tjinkaon sín chrók'óyán sín tí ch'ín Jesús.

Ch'ín Jesús kjueyá ch'án tí teyó sín ts'ajiko ch'án

(Mt. 10.1-4; Mr. 3.13-19)

¹² A ntá ijnko yaon ch'ín Jesús sákjui ch'án ijnko jna k'íxin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios. ¹³ A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín k'íxin ts'óna sín apóstol ts'ajiko sín ch'án. ¹⁴ A ntá tí sín í mé xikihi it'in sín. Na mé ch'ín Simón la ntá ch'ín Jesús kjuínchek'in ihnié ch'án Pedro kjaxin; la ko k'íchó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, ¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín

* 6:4 6.3-4 1 Samuel 21.6; Levítico 24.5-9

a mé k'uék'aji tí partido cananista; ¹⁶ la ko ch'ín Judas la kichó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

Ch'ín Jesús kjuakohe ch'an nchónhya chojni
(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxin sín tí jna ntá k'uéjó sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixin nkuixín estado Judea la ko chjasin Jerusalén la ko tí chrínta ntayaon tí sín tí chjasin Tiro la ko tí chjasin Sidón. Ó kjui sín kixin tsinhin sín tí nkehe tsjako ch'ín Jesús la ko tsitohé sín jína. ¹⁸ A ntá tí sín kjuaxróxinhya k'uéjó k'uéchónta sín nchakuen jínahya na mé kuítóhe sín jína kjaxin. ¹⁹ Kaín chojni tjinkaon chrókuákóxin sín tí ch'ín Jesús kixin kjuínchekitohé ch'án jína kaín xin chojni kixin jehe ch'án chóntha ch'án kjuachaxin jié.

Tí kjuachéhe la ko tí kjuaxróxinhya
(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:
—Náxrjón tjejorá jahará nòará kixin chontará kjuachaxién Dios.
²¹ 'Náxrjón tjejorá jahará t'énxinrá kjinta ijie kixin chr'éxin sinterá jína.
'Náxrjón tjejorá jahará tsjankará ijie kixin chr'éxin tsjanorá.
²² 'Náxrjón tjejorá jahará nínkakonhanrá chojni la ko ts'inkítíará sín sátsjirá ókjé, la ko t'ántaxínhanrá sín la ko t'ákjenxin sín ihniará éxi ijnko nkehe jínahya kixin tinkachónkirá tí Xjeen Dios K'óna Chojni. ²³ Tsocháhará má la ko imá tsochontará kjuachéhe tí yaon a kixin ts'ayéhé nkehe kuènte nkaya nkajni. A ntá xikaha tí t'áchrji tí sín jínahya ch'e la mé ósé kjuate sín tí sín k'uéchronka itén Dios.
²⁴ 'A ntá jahará rícorá kjuaxróxinhya ts'ejorá chr'éxin kixin ó kjuixin k'uayéhé kaín nkehe.
²⁵ 'A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.
'A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.
²⁶ 'Kjuaxróxinhya ts'ejorá tió kaín chojni tsjikosáyahará sín kixin xikaha tí t'áchrji sín kjuikosáyehe tí sín ntoáhya k'uéchronka itén Dios ósé.

Tsotjuèheni tí sín nínkakonhenni
(Mt. 5.38-48; 7.12)

²⁷ 'A ntá jahará tjejotinhínrá mé tjéxrjanka kixin chrótjuèhérá tí sín nínkakonhanrá la ko jína chrókuínkítsará tí sín tjinkakonhya tí jahará. ²⁸ Jína nixjehérá tí sín t'ántaxínhanrá la ko tjanchehérá Dios kixin tsjinkítsa ch'án tí sín chónkíhará sín. ²⁹ Tí chjéhe ijnko nkexro ijnko tuaanrá chrókjóka tí íjnko nánko kixin chróchjéhe sín tíha kjaxin. La ko tí sín ijnko nkexro tjinkaon sín tsakitsjaha sín tí chamara tjín t'inkayate na mé títóhé kixin kjaxin sátsjiko sín camisá kjaxin. ³⁰ Tí jnkójin nkexro tjanchaha nkehe chonta la chjehé sín. A ntá tí tsakja sín nkehe kuéntá la tjanchehya sín kixin naxa ts'ókjanhan sín. ³¹ Méxra chrókuíkosáyehérá kichuárá éxi yóhe nkexrí tjinkáonrá chrókuíkosáyahará tí jehe sín kjaxin.
³² Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjónté tí sín jínahya tjasin jie la xikaha ch'e sín. ³³ A ntá tí tjíkosáyehérá jehó tí sín tjíkosáyahará la kohya ninkehó tsjachahyará xikaha. Kjónté tí sín jínahya tjasin jie mé kjaxin xikaha ch'e sín. ³⁴ La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjónté tí sín jínahya tjasin jie xikaha ch'e sín nchekjen

kíchó sín chichaon la ko chónhen sín kixin tsokjan tí chichakoēn sín inaá. ³⁵ Kjánchó jahará chrótjuèhéra tí sín nínkakonhanrá la ko jína chrókjuich'eherá sín xra la ko chrókjuinchejenrá sín chichaon la chróchoénhyará kixin chrókjan tí chichakoanrá inaá. Mé xikaha chrókjuich'era la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya. ³⁶ Chrókuikonóehéra kichuára éxi yóhe It'ára nkaya nkajní tikonóehē ch'án chojni.

*Chrók'uantaxienhyani kichó ni
(Mt. 7.1-5)*

³⁷ 'Chrókuékahyará jie ókjé chojni kixin ntá Dios chrókjuanchahya ch'án jie tí jahará. Chrókuétuanhyará kixin chrókjuasóte í jnko chojni kixin Dios kjaxin chrókjuinchejasótiahya ch'án tí jahará. Chrók'uitjányanhanrá ichrén jie kjuasinhanrá í jnko chojni kixin ntá Dios chrókjuinchek'itjányanhanrá ch'án tí jie kjuásinrá. ³⁸ Chjehéra í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsík'enka ch'án kixin tsík'ótsjéyehe ch'án tí nkehe tsíkjachroayá ch'án tjetóxin tsjanjon ch'án. Dios tsotjáhará xikaha yóhe éxi tsíchjehéra í so chojni.

³⁹ Ntá kjuíncheyóexin ch'ín Jesús ntáchro ch'án kixin:

—¿Xá á chrókójína ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanótjenyá sín ichrén tòye. ⁴⁰ Ijnko nkexro xrakohe la noehya éxi tí nkexro tjako. Kjánchó tió tsjixin tsoxrakohe ch'án ntá tsonohe ch'án éxi nohe tí nkexro kjuakohe ch'án.

⁴¹ '¿A ntá nkekuènté tsjehé tí chjinínó ntsí tjenkánkí ikon tí kichuá, tí naxa ántosán tí nta jie tjenkánkí ikuan? ⁴² ¿Mé xikaha nkexrí kixin chróntáche kichuá kixin chrókuítóhe ch'án kixin chrókuakitsjenkíhí ch'án tí chjinínó ntsí tjenkánkí ikon ch'án tí naxa ántosán tí nta jie tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jie tjenkánkí ikuan kixin ntá chrók'uikuan chrókuakitsjenkiá chjinínó ntsí tjenkánkí ikon tí kichuá.

*Tí nta mé tjatsoanxínni tí to tsík'óna
(Mt. 7.17-20; 12.34-35)*

⁴³ 'Kohya nta jína chrók'óna to jínahya, la ko kjaxin kohya nta jínahya chrók'óna to jína. ⁴⁴ Jnkojnko tí nta mé tjatsoanxínni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva. ⁴⁵ Ijnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxi tjenkayáxin asén mé xikaha nixja ir'va.

*Ch'ín Jesús kjuíncheyóexin éxi yaá nkexro kjuích'éna nchia
(Mt. 7.24-27)*

⁴⁶ '¿Nkekuènte ntáchrora kixin janhan Inchára, la ntá tahyará kuenté tí nkehe tétuanhanrá? ⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. ⁴⁸ Na mé jehe sín tóyóhe ijnko nkexro kjuích'éna nchia la senó k'óxraya ch'án tòye nínka kixin ntá sich'éna ch'án nchia chrítaón tí tjo a. A ntá tió k'uánkí tí ntarío la ikui tí ntá k'uíntate tí nchia, kjónté xikaha la k'uátjoákohya la ní kuínkíhya tí nchia a kixin jína tsík'óna chrítaón tjo tjekjen. ⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntarío la ikui tí ntá k'uíntate tí nchia la ntá k'uátjoáko ntá tí nchia la ntá kuenté tí nchia la k'uítjányan —mé ichro ch'ín Jesús.

7

Ch'ín Jesús kjuínchekitohe jína ijnko ch'ín ch'ehe ijnko soldado romano xra
(Mt. 8.5-13)

¹ Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum. ² Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án. ³ A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjijitsjehe sín tí ch'ín Jesús tsochronóehe sín ch'án kixin chrókjuiji ch'án chrókjuinchekitohe ch'án jína tí ch'ín ch'ehe ch'án xra. ⁴ Ntá kjuíji sín kóchjinehe sín tí ch'ín Jesús kjuankíxin chrónóehe sín ch'án ntáchro sín kixin:

—Imá jína tí ch'ín capitán la mé tjinkaon ch'án chrókjuinkitsa ch'án ⁵ kixin tjuèhe ch'án tí nación kuènteni la ko jehe ch'án kjuínkitsa ch'án la ko k'uetōan kixin ts'óna ijnko nínko kuènteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuēhen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uíxēnhén ntōe ch'án. ⁷ Mé xikaha chrókósuèhe ch'án chrókjuiji ch'án chrókjueyá ch'án tí jaha. Méxra tí kjuachaxin chrónixja ó chrókuitōexín jína tí ch'ín ch'ehe ch'án xra. ⁸ Kixin jehe ch'án kjaxin t'ítuēhen ch'án la ko kjaxin chóna ch'án soldado t'etūēhen ch'án inaá. Tió t'etūēhen ch'án ijnko sín kixin sátsji la mé sátsji la ko tió t'etūēhen ch'án íjnko sín kixin xrákoa la mé xrákoa la ko tió t'etūēhen ch'án íjnko sín kixin sich'e ijnko xra la mé nchexiteyá ch'án —mé xikaha ichro tí sín kui.

⁹ Ntá ó kuínhin ch'ín Jesús xikaha ntá chrakon ch'án kixin xikaha tjenkayáxin tí ch'ín a, a ntá nkátjáa ch'án komá ch'án tí chojni chréhe ntáchro ch'án kixin:

—Ntáxrjan kixin naxa k'uítjahya nijnko nkexro israelita xikaha tinkáchónki éxí tí ch'ín í —ichro ch'án.

¹⁰ A ntá ó kjan nchia tí sín tsík'ítuēhen la ó k'uíkon sín kixin ó tsíkitohe jína tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxin ntá sákjuí ch'ín Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni. ¹² Tió kjuíjichjina sín tí chjasin a la k'uíkon sín nchónhya chojni sákjuíkjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuíkotoxin sín tjan. ¹³ Ntá tió k'uíkon Inchéni tí tjan a ntá kuíkonóehe ch'án tjan ntáchro ch'án kixin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénkia sín tí ch'ín tsík'en. A ntá tí sín kuámá nta k'uéjóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuānhan t'àya —ichro ch'án.

¹⁵ Ntá tí ch'ín tsík'en tuénxín kjuák'etjaxin ch'án la ko kjuankíxin nixja ch'án. Ntá ch'ín Jesús kjuínchek'áyéhe ch'án iné tí ch'ín ntasoá la sákjuíko. ¹⁶ A ntá tió k'uíkon sín xikaha kónhen la kaín sín imá chrakon sín la ko kjuankíxin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etōan chrónka itén Dios ts'ejókoni —ichro sín.

Kjaxin ntáchro sín kixin:

—Ó kui Dios tsjinkitsa ch'án chjasén ch'án —ichro sín.

¹⁷ A ntá nkuíxín estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehé ch'án iyó tí sín k'uájiko ch'án ¹⁹ k'uētuenhen ch'án sín sátsjtsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi ó á tsochónhen sín í jnko nkexro, tsixro sín. ²⁰ A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kixin:

—Ch'ín Juan Bautista k'uētoan ch'án kuini tsikjanchankíhani kixin á jaha tí nkexro tsi ní ó á tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitohe ch'án itsjé chojni jína la mé kjuatsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'ikon ch'án itsjé chojni t'ikonhya.

²² A ntá kjuátehe ch'ín Jesús ntáchro ch'án kixin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kixin tí sín k'uíkonhya la ó t'ikon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuitohe sín jína, la ko tí sín kienhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxraohé sín tí tan jína tsaáxin sín. ²³ Ntá náxrjón tjen tí nkexro kohya nkehe t'inkákonhen tí tinkáchónki sín tí janhan —mé ichro ch'án.

²⁴ Tió sátsíkji tí sín ichr'án ch'ín Juan ntá kjuankixin nixjehe ch'ín Jesús tí sín k'uéjé ntiha kixin nkexrí tjen ch'ín Juan ntáchro ch'án kixin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrínto? ²⁵ Tí náhi, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la ko chóna kaín nkehe náxrjón la mé ntøe rey tjejó sín. ²⁶ ¿A ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xrjanka kixin chaxín xíkaha jehe ch'án na mé antsí t'etøan ch'án la ntá tí sín k'uéchrónka itén Dios ósé la kánhyó. ²⁷ Ch'ín Juan mé tí nkexro kui éxí chrónka tí xroon itén Dios ósé ntáchro kixin: Janhan mé tsochr'an ijnko nkexro tsochrónka itan kuèntana tsitónxin ntja, kixin tsjasiyóxin ch'án ntja kuènta.*

Mé xíkaha chrónka tí xroon itén Dios. ²⁸ Ntá ijnko nkehe chaxín tsotjonkará kixin kaín tí nkexro k'uéjé senó k'uéchrónka itén Dios la kánhyó tjetøan sín la antsí tjetøan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios nkaya nkajní la antsí tjetøan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjènkí tsíkíkite ch'ín Juan la ó kjuátsoan sín kixin Dios la jína ch'án. ³⁰ Kjánchó tí sín fariseo la ko tí maestro tjako tí ley tsíkíkítehya ch'ín Juan la mé tjinkakonhya sín tí nkehe tjinkaon Dios chrókjuinkitsa tí jehe sín. ³¹ Ntá ntáchro Ìnchéni kixin:

—¿Nkexrí chrókjuíntayóaxian tí chojni tjejó jie? ¿Nkehe chrókóyóhe sín?

³² Tóyóhe sín tí chánjan tjejótxaxin sín tí ntasin tsítan sín la t'íyehé kichó sín ntáchro sín kixin: “Kjuínchentáchroni flauta la tēhyará la ko tsjeni isón kuènte chojni tsík'en la tsjankahyará.” ³³ Kixin ó kui ch'ín Juan Bautista la kjónehya ch'án niotjā la ko k'uíhya ch'án vino la ntá jahará ntáchrórā kixin ijnko

* 7:27 Malaquías 3.1

nchakuen tí jínahya chón̄ta ch'án. ³⁴ A ntá kjaxin ikui tí Xjeen Dios K'óna Chojni la kjón̄e ch'án la ko ik'ui ch'án la ntáchrorá kixin imá kjón̄e ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènki. ³⁵ A ntá tí xjeen Dios mé tjakoxin sín kaín tí nkehe tjinkaon Dios.

Ch'ín Jesús mé kjuák'e ch'án ntøe ijnko ch'ín fariseo it'in Simón

³⁶ Ijnko ch'ín fariseo mé chronøeh̄e ch'án tí ch'ín Jesús kixin tsjiji ch'án ntøe ch'án sineko sín ch'án. Ntá sákjui ch'án ntøe tí ch'ín a, a ntá ntiha kjuák'etjaxin ch'án tí tjen mesa. ³⁷ A ntá itjen ijnko tjan nchón̄hya jie chón̄ta tjan. Itjen tjan tí chjasin ntiha la ntá kónohe tjan kixin tsíkijji ch'ín Jesús ntøe tí ch'ín fariseo la ko ntaha sineko sín ch'án. Ntá kui tjan ntiha kuikao tjan ijnko xro tjele tsíkaón aceite xraxé náxrjón. ³⁸ Ntá tsjánka tjan kóchjina tjan toté ch'ín Jesús ntá ntakon tjan kjuátanxín toté ch'án la ko kaxihi tjan kjuínchexámáxin tjan toté ch'án la ko kjón̄eko kochító toté ch'án la ko kjuíncheka tjan toté ch'án tí aceite xraxé náxrjón. ³⁹ A ntá tió k'uikon tí ch'ín fariseo tsík'íyeh̄e tí ch'ín Jesús ntá kjo ch'án asén ch'án kixin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetákóxin ch'án kixin ijnko tjan jínahya tíha”, ichro ch'án. ⁴⁰ Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátøeh̄e tí ch'ín fariseo ntáchro ch'án kixin:

—Chronka, Maestro —ichro ch'án.

⁴¹ Ntá ntáchro ch'ín Jesús kixin:

—K'uéjó yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario. ⁴² A ntá kjuachahya sín k'ókjenhen sín tí chichaon tí ch'ín síkéhe sín ntá kuikonøeh̄e ch'án sín ntá k'óxíka ch'án tí cuenta síká yóí sín. A ntá jie chronka jaha kixin nkexro tí yóí sín antsí chrótjuèhe tí nkexro kuikonøeh̄e ch'án —ichro ch'ín Jesús.

⁴³ Ntá kjuátøeh̄e tí ch'ín Simón ntáchro ch'án kixin:

—Janhan ntáxrjan tí nkexro kuikonøeh̄e má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'ikuan tí tjan a ní? Janhan na mé k'uixanhan ntøa la ntá jaha la kjuánjonhya ntá chrók'ontia totená. Kjánchó jehe tjan tí ntakon tjan kjuínchek'ontixín tjan totená la ko kaxihi tjan kjuínchexámáxin tjan. ⁴⁵ A ntá jaha la kjóntekoahyana kochító. Kjánchó jehe tjan naxa kuítóehya tjan neko kochító totená. ⁴⁶ Jaha la kuikiteixinhya aceite kja. A ntá jehe tjan kuikite tjan aceite xraxé náxrjón totená. ⁴⁷ Mé xikaha ntáxrjan kixin imá tjuana tjan kixin kaín tí nchón̄hya jie kjuasin tjan la mé kjuinhin tjan. A ntá ijnko nkexro kjuinhin intsíkoá jie la mé xikaha intsíkoá tjakoxin kixin tjuana sín —ichro ch'án.

⁴⁸ Ntá nixjeh̄e ch'án tí tjan a ntáchro ch'án kixin:

—Ó kjuinhan tí jie chonta —ichro ch'án.

⁴⁹ A ntá kaín tí sín tsíkóchjina sín k'uéjótjaxin sín tí tjen ch'án mé kjuankixin kjo sín kichó sín ntáchro sín kixin:

—¿Xá nkexro tíhi kixin tjakjlinhin ch'án ijje chojni?

⁵⁰ A ntá ch'ín Jesús ntáche ch'án tí tjan a kixin:

—Ó kuaá jaha kixin kuítekávan tí janhan. A ntá jie kjuaxróxin sátsjia ntøa —ichro ch'án.

8

Iso chojni chjin kjuínkítsa tí xra kjuích'e ch'ín Jesús

¹ A ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsíntsí kjuako ch'án la ko chrónka ch'án tí tan jína kixin nkexrí tí kjuachaxin t'etoan Dios. A ntá tí teyó sín mé k'uájiko ch'án. ² Kjaxin chréhe iso chojni chjin tsíkjinchekitóhe ch'án jína tsíkakítsje ch'án tí nchakuen tí jínahya k'uéchónta sín la ko tsíkjatsen ch'án tí chin k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchónta tjan, ³ la ko í jnko tjan it'in tjan Juana ne mé xii mé it'in ch'án Chuza. Jehe ch'án mé ch'ehe ch'án xra tí ch'ín Herodes t'etoan ch'án, la ko í jnko tjan mé it'in tjan Susana, la ko itsjé í so sín k'uéjó sín. A ntá kaín sín kjuanjon sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexin ch'án éxí ijnko ch'ín k'uénkə nonte (Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntiha. A ntá ch'ín Jesús kjuíncheyóexin ch'án ntáchro ch'án kixin:

⁵ —Éxí ijnko ch'ín sákjuík'enka noatrigó nontee ch'án. Mé xikaha sákjuí ch'án ik'ue ch'án tí noatrigó a. Ntá iso noa la k'uanojtjen chrínta ntia ntá nkaxénjin chojni tí noa a la ko kjaxin tí koxroxé k'uínka va. ⁶ A ntá í so la k'uitji chrík'á xro ntá k'uayan la xamá kixin kánhyó siín tjo. ⁷ A ntá í so la kjuítsínkák'á kach'í ntá k'uánkí kach'í la ntá í xitjahya k'uánkí tí no a kixin tsíkjate tí kach'í. ⁸ A ntá í so la mé tsík'itjí nche jína. A ntá tió k'uánkí la k'óna jína la mé jnkojnko noatje k'óna ciento neno noa —mé xikaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:
—Tí tjinkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuènte kjuíncheyóexin ch'án (Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. ¹⁰ Ntá ntáchro ch'án kixin:

—Dios mé tsjinkítsa kixin tsonohará tí nkehe noehya í so chojni nkexrí t'etoan Dios. Kjánchó tí í so sín tjáqohə sín kjuíntayóaxoán kixin ntá k'uíkon sín la kjónté tsjatsəanhya sín la ko kuínhin sín na kjónté naxə tienxínhya sín.

Ch'ín Jesús chronkaxín nkexrí t'axrjexín tí ch'ín k'uénkə nonte (Mt. 13.18-23; Mr. 4.13-20)

¹¹ 'Ntá tsoxrjanka nkexrí t'axrjexín tí nkehe kjuíntayóaxoán. Tí noatje mé tí itén Dios. ¹² A ntá tí noa k'uanojtjen chrínta ntia la mé tóyóhe tí sín kuínhin tí tan a. A ntá ó kui ch'ín Tsochren ntá kjuínchek'itjáyan ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín. ¹³ A ntá tí noa kjuítsínkák'á xro la éxí yóhe tí chojni kuínhin itén Dios la tjoka kóxrjínhin sín kuínkáchónki sín. Na ntá itsi tí kjuaxróxinhya, a ntá tsítóhe sín tí itén Dios kuínhin sín kixin naxə nínkahya chóna nuè. ¹⁴ A ntá tí noa kjuítsínkák'á kach'í na mé éxí yóhe ijnko chojni kuínhin tí tan jína kjánchó tjitoxienhya ntie sín kixin tóxakonhen sín tí xra chóna sín la ko tjinkaon sín tsochóna sín itsjé nkehe la ko kaín tí nkehe tóxrjínhin sín mé t'ínkakonhen kixin xikaha la xitjahya sich'ehe sín xra Dios. ¹⁵ A ntá tí noa k'uínka nonte jína na mé éxí yóhe tí chojni kuínhin tí itén Dios a ntá kaín asén sín kuítekaon sín la ntá kuítóehya sín tí tan, a ntá xikaha la jína ch'ehe sín Dios xra.

Ch'ín Jesús mé kjuíncheyó_exin éxí ijnko xrohi tjeche
(Mr. 4.21-25)

¹⁶ Nijnko nkexro chrókjuinçek'ákjen xrohi chrókjuak'ema nkaxenhen chí o chrókjuak'ema chrínkí cama. Náhí. Noi chrókjuak'e xrohi kixin ntá tí sín ts'ixenhen nchia ts'ikonxín sín tí t'inkaséyan. ¹⁷ Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxín ti xrohi a. ¹⁸ A ntá chrókuinhínrá jína kixin tí tjen ijnko nkexro chóna nkehe la mé ts'áyéhe ch'án má. A ntá tí nkexro chónahya nkehe la mé ts'axrjehe ch'án kjónté tí nkehe ntsí tónhen ch'án kixin chóna ch'án.

Tí iné la ko tí kichó ch'ín Jesús
(Mt. 12.46-50; Mr. 3.31-35)

¹⁹ A ntá kjuíjíné la ko kichó ch'ín Jesús tí tjen ch'án. Ntá xitjahya tsochjinehe sín ch'án kixin nchónhya chojni síin. ²⁰ A ntá ijnko sín ntiha tsíkjichenka ch'ín Jesús kixin:

—Iná la ko kichuá tjejó sín ntója la tjinkaon sín chrók'uikon sín tí jaha —ichro sín.

²¹ Kjánchó kjuátehe ch'án ntá chro ch'án kixin:

—Tí sín tinhin itén Dios la ko titekaon sín na mé t'íkuan tí jehe sín éxí naná la ko kichiná —ichro ch'án.

Ch'ín Jesús k'uetuenhen tí xrinto la ko tí ntá kixin ts'ixita
(Mt. 8.23-27; Mr. 4.35-41)

²² Ntá ijnko yaon k'uixenhen ch'ín Jesús ijnko ntabárcō la koí tí sín k'uájiko ch'án. Ntá ntá chro ch'án kixin:

—Sátsjini tóhe ntayaon —ichro ch'án.

Ntá sákjuí sín. ²³ Ntá nachrohe tjejó'tatōye sín a ntá ch'ín Jesús mé kjuák'ejua ch'án. A ntá xrínahya tjan chjéhe xrinto chrítaón ntá ntá xrankixin sítikia ntá tí ntabárcō ntá chrakon sín kixin ts'aniankí ntá tí ntabárcō. ²⁴ Ntá kjuínchekjayehe sín tí ch'ín Jesús, ntá chro sín kixin:

—Maestro, Maestro. Tjejó'taniankíni ntá —ichro sín.

Ntá ch'ín Jesús k'uàya ch'án ntá k'uetuenhen ch'án tí xrinto la ko tí ntá kixin ts'ixita, a ntá náxrjón k'uixita tí ntá la ko tí xrinto. ²⁵ Ntá ntáche ch'án tí sín k'uájiko ch'án kixin:

—¿Á naxa tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

—¿Xá nkexro tíhi kixin t'etuenhen ch'án xrinto la ko tí ntá la titekakonhen ch'án?

Ijnko ch'ín nonte Gadara chóna nchakuen tí jínahya
(Mt. 8.28-34; Mr. 5.1-20)

²⁶ Ntá kjuíjín sín tí nonte Gadara, na mé tóhe ntayaon ntoí chók'èxin estado Galilea. ²⁷ Ntá k'uínkajinxín ch'ín Jesús tí ntabárcō ntá kóchjina ijnko ch'ín chjasin ntiha. Ntá ó má sé chóna ch'án nchakuen tí jínahya. Na ntá ni ké ch'án t'inkáyahya ch'án, la ko jehya ntōe ch'án k'uékjak'e ch'án na mé tjen ch'án tí panteón. ²⁸ Tió k'uikon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'óyako ch'án ntá chro ch'án kixin:

—¿Nkekuènte tjiaté tí jeheni, jaha Jesús Xjeen Dios itjen nkaya nkajní? Chronóahani nchekjasótehyani —ichro ch'án.

²⁹ Xikaha ntá chro ch'án kixin ch'ín Jesús tsík'etuenhen tí nchakuen tí jínahya kixin ts'axrjexín tí jehe ch'án. Nchónhya veces tí nchakuen tí jínahya k'uék'etuenhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsíkóntetoxín ch'án kixin tjinkaon

sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án kixin nchakuen tí jínahya tjinkaon sáchrókjuiko ch'án nteje. ³⁰ Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xikaha kixin nchónhya nchakuen tí jínahya chóna ch'án. ³¹ A ntá kaín tí nchakuen tí jínahya chronóehé tí ch'ín Jesús kixin chrók'uetōanhya ch'án kixin chrókjuitsínkayá tí tòye ninka. ³² A ntá ntiha tí jna siín nchónhya cochíno xrine va. A ntá tí nchakuen tí jínahya chronóehé tí ch'ín Jesús kixin chrókjuanjon ch'án kjuachaxin chrók'uixenhen tí cochíno a. A ntá kjuanjon ch'án kjuachaxin. ³³ A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochíno a. A ntá kaín tí cochíno kuinká va sákjuí va nó nkaya tsaka k'uánótjenkí va ntá kjuínhin va ntá.

³⁴ A ntá tí sín sít'ayakonhen tí cochíno k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho. ³⁵ A ntá tí chojni k'uaxrjexín sín chjasin sákjuitsjehe sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjaxin ch'án chrínkí toté tí ch'ín Jesús, ó tsík'inkáya ch'án iké ch'án kixin ó jína tjen ch'án, a ntá chrakon sín tí k'uíkon sín xikaha. ³⁶ A ntá tí jehe sín tsík'ikon sín kixin xikaha kónhen la chrónka sín kixin nkexrí kuítóhe jína tí ch'ín k'uéchóna tí nchakuen tí jínahya. ³⁷ A ntá kaín tí chojni chjasin Gadara kjuankixin chronóehé sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'uit'ótjen ch'án tí ntabarco sákjuíxin ch'án ntiha. ³⁸ A ntá tí ch'ín tsík'axrjexín tí nchakuen tí jínahya chronóehé ch'án tí ch'ín Jesús kixin á chrókjuanjonha ch'án kjuachaxin sáchrókjuí ch'án koí ch'án. Kjánchó ch'ín Jesús k'uetuēnhen ch'án kixin tsitóhe ch'án ntáchro ch'án kixin:

³⁹ —Titoha satjia ntoa la ko chrónka nkexrí ti kjuachaxin jié kuēnte Dios kuítóaxián jína jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin ijnko kjuaxroan jié kjuích'e ch'ín Jesús kjuínchekítóhe ch'án jína.

*Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Mr. 5.21-43)*

⁴⁰ Tió ch'ín Jesús kjan ch'án tí í jnko chrínta ntá ntá nchónhya chojni siín ntiha la chéhe sín kjuíji ch'án ntiha, kixin kaín sín tjejóchónhen sín ch'án. ⁴¹ Ntá kui ijnko ch'ín it'in Jairo na mé ijnko ch'ín t'etōan kuēnte ninko. A ntá kjuák'exín toch'in ch'án tote tí ch'ín Jesús chronóehé ch'án kixin sáchrókjuí ch'ín Jesús ntōe ch'án ⁴² kixin chóna ch'án jnkokoáxon xjeen ch'án chjin chóna teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uíxitja kichó sín.

⁴³ Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóna tjan teyó nánó titōehya tjan jína. A ntá kaín nkehe k'uéchóna tjan kjuenkehe tjan tí sín ch'e xroan la ko nijnko sín kjuachahya sín kjuínchekítóhe sín tjan jína. ⁴⁴ A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

⁴⁵ Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin ninkexró, ichro sín. A ntá ch'ín Pedro la ko tí sín k'uéjóko ch'án ntáchro sín kixin:

—Maestro, nchónhya chojni síin la ko tótéka sín la ntáhi ntáha, ¿ntá nkekuènte kixin naxa tjanchankiá kixin nkexro tí kuákóxian? —ichro sín.

⁴⁶ Kjánchó ntáchro ch'ín Jesús kixin:

—Jnkojín nkexro kuákóxinna kixin kónòna kixin kjuachaxin kuèntañá kuítóexín ijnko chojni jína —ichro ch'án.

⁴⁷ A ntá tió k'uikon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínki toté tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxin tjan iké ch'án la ko nkexrí kuítóexín tjan jína xikaha.

⁴⁸ Ntá ntáchro ch'án kixin:

—Jaha, xjeenni, ó kuítóha jína kixin kuítekávan tí janhan. Kjuaxróxin sátjia —ichro ch'án.

⁴⁹ Naxa tjejóto sín ntiha ntá xrínahya ikui ijnko nkexro kjuixín ntøe tí ch'ín t'etøan kuènte nínko, a ntá chénka ch'án tí ch'ín t'etøan kixin:

—Xjaan na mé ó kjuixin k'uén. Áxri í chjeéhya xra tí maestro —ichro ch'án.

⁵⁰ A ntá tió kuínhin ch'ín Jesús la kjuátøhe ch'án ntáchro ch'án kixin:

—Chrakonhya. Títekávan tí janhan la tsitøhe xjaan jína —ichro ch'án. A ntá sákjuí sín.

⁵¹ A ntá tí kjuíjik'ixenhen sín nchia ntá kuítóehya ch'ín Jesús kixin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjin chrók'uixenhen sín tí tjen tí xjan a. ⁵² Kaín tí sín tjejó ntaha tsjánkàmá sín tí xjan a. Kjánchó jehe ch'án ntáchro ch'án kixin:

—Tsjankahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá sín ch'án kixin jehe sín la ó nohe sín kixin tsík'en xjan. ⁵⁴ A ntá jehe ch'án itsé ch'án tja xjan ntá itsen k'uíyøhe ch'án tí xjan ntáchro ch'án kixin:

—Tjarisoá, t'àya —ichro ch'án.

⁵⁵ Ntá kjan asén tjan ntá tuénxín k'uínkatjen tjan. Ntá k'uetøan ch'ín Jesús kixin tsjanjon sín nkehe sine tjan. ⁵⁶ Ntá it'é la ko iné xjan la chrakon sín. A ntá ch'ín Jesús k'uetuønen ch'án sín kixin ninkexró chróchenkahya sín kixin xikaha kónhen.

9

Ch'ín Jesús ichr'án ch'án tí teyó sín (Mt. 10.5-15; Mr. 6.7-13)

¹ Ntá ch'ín Jesús k'uetøan kixin tsochjina tí teyó sín k'uájiko ch'án. Ntá chjehe ch'án sín kjuachaxin tsakitsje sín kaín tí nchakuen tí jínahya chóna chojni la ko sinchekitøhe sín chojni jína. ² Ntá k'uetøan ch'án kixin sátsjikjako sín nkexrí tí kjuachaxin t'etøan Dios la ko sinchekitøhe sín chojni jína. ³ La ko k'uetøan ch'án kixin:

—Ninkehó nkehe sátsjikohyará ntja sátsjirá, ni tí nta tjíxinrá la náhí, ni bolsa la náhí, ni niotja, ni chichaon, la ko tsjikoará jehó tí ka tjejóyará ó. ⁴ A ntá tí tsjasánrá ijnko nchia tsjanjon sín kjuachaxin la ntahó tsitøhará la tsjixixín tí xra ntá sátsjíxinrá ntiha. ⁵ A ntá tí tsjasánrá ijnko chjasin la ntá tsjanjonhya sín kjuachaxin tsjàkorá ntá t'axrjéxinrá tí chjasén sín ntiha tsotsénkará tí nche chóna totará tsjåkoxínrá xikaha kixin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsínsí sákjuíchronka sín tí tan jína tsaáxin chojni la ko kjuínchekitøhe sín chojni jína kaín chjasin.

Ik'uén ch'ín Juan Bautista (Mt. 14.1-12; Mr. 6.14-29)

⁷ A ntá tí ch'ín Herodes t'etōan kuínhin ch'án kaín tí xra tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín. ⁸ A ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. A ntá í so sín la ntáchro sín kixin jnkojín tí sín k'uéchronka itén Dios ósé la mé ó tsíxechón, ichro sín. ⁹ Kjánchó ntáchro ch'ín Herodes kixin:

—Janhan mé kuétōan kóchrínjin sín kja ch'ín Juan. ¿Á chrókóchaxín jehe ch'án kixin nchónhya kjuaxroan kuínhan tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni
(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuích'e sín. Ntá k'uaxrjentako sín ch'án tí kohya ninkexró chjinaxón chjasin Betsaida. ¹¹ Ntá tió k'uíxikónohe chojni kixin ntaha tjen ch'ín Jesús ntá sákjuíchréhe sín ch'án. A ntá kjuanjon ch'án kjuachaxin ts'ejó sín. Ntá kjuankixin chrónka ch'án nkexrí tjen tí kjuachaxin t'etōan Dios la ko kjuínchekitohe ch'án chojni jína.

¹² A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuátehe sín ntáchro sín kixin:

—Chóntahyani itsjé nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kaín tí chojni siín? —ichro sín.

¹⁴ Kixin siín chjina in'ó mil chojni ntoa. A ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkojié sín ts'ixitjaxin sín jnkojnko cincuenta sín —ichro ch'án.

¹⁵ A ntá xikaha kjuích'e sín k'uetōan sín, a ntá k'uíxitjaxin sín kaín sín. ¹⁶ A ntá ch'ín Jesús kuákja ch'án tí n'ó niotja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin kjuanjon tí nkehe sine sín. Ntá kóchrít'o ch'án tí niotja la ko tí koche la chjéhe ch'án tí sín xriko ch'án. A ntá jehe sín k'óxikayehé sín chjéhe sín kaín tí chojni siín. ¹⁷ A ntá kaín sín kjóne sín la kókjéhe sín. A ntá chr'éxin kjuenájín sín kaín tí nkehe síxehé mé teyó ntaxra kjuínchekaón sín.

Ch'ín Pedro mé chrónka kixin ch'ín Jesús mé tí Cristo
(Mt. 16.13-19; Mr. 8.27-29)

¹⁸ Ntá ijnko yaon ch'ín Jesús k'uaxrjenta ch'án tjenixjehe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan? —ichro ch'án.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'ín Elías. A ntá í so sín ntáchro sín kixin jaha ijnko nkexro k'uéchronka itén Dios ósé mé ó tsíxechón —ichro sín.

²⁰ A ntá kjuanchankíhi ch'ín Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'ín Pedro kixin:

—Jaha tí Cristo ichr'án Dios —ichro ch'án.

Ch'ín Jesús chrónka kixin its'en ch'án
(Mt. 16.20-28; Mr. 8.30—9.1)

²¹ Ntá ch'ín Jesús k'uetuenhen ch'án sín kixin ninkexró tsochenkahya sín kixin nkexro tí jehe ch'án. ²² Ntá chénka ch'án sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsonhen la ko tsitekakuenhya tí sín t'etōan kuente ninko la ko tí sín t'etōan kuente tí sín nchat'á la ko tí sín maestro tjako tí ley. Ts'óyán sín tí jehe ch'án, kjánchó tí nixin yaon na ó tsoxechón ch'án inaá —ichro ch'án.

²³ Ntá chr'éxin chénka ch'án kaín sín kixin:

—Tí chaxín tsochréhérá tí janhan na t'ichjánxin tsitohérá kaín tí nkehe tjaké asánrá, ntá tsamará tí ntacruz kuéntará jnkoinko yaon, a ntá tsochréhérá tí janhan. ²⁴ Tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la tsaá. ²⁵ ¿A ntá nkehe tsonhen tí chrókjuacha ijnko chojni chróchónka kaín nkehe síin chjasintajni a ntá kjuachón chrókjuinchek'itjáyan ch'án? ²⁶ A ntá jnkoin chojni chrókósuèhe kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsoyuèhe chróntáchro ch'án kixin chóxin ch'án tí jehe sín tió tsi ch'án éxi ijnko rey tsikao ch'án tí kjuachaxin kuente It'é ch'án la ko tí sín ángel jína. ²⁷ Tíhi mé ntoá xrjanka kixin iso chojni tjejó ntihi tjejótinhin sín naxa ts'enhya sín ts'ikon sín kixin Dios ts'etōan tí kjuachaxin kuente ch'án.

K'uixitóxin nkexrí tsjehe ch'ín Jesús
(Mt. 17.1-8; Mr. 9.2-8)

²⁸ A ntá k'uátsínka ijní yaon tí tsíchronka ch'án tíhi ntá sákjuiko ch'án ch'ín Pedro la ko ch'ín Juan la ko ch'ín Jacobo la chriin sín ijnko jna kixin tsonixjehe ch'án Dios. ²⁹ Ntá ch'ín Jesús tjenixjehe ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákiní tsjehe. ³⁰ Ntá xrínahya k'uikon sín yaá chojni tjejótjo sín tí jehe ch'án na mé jehe sín la tí ch'ín Moisés la ko tí ch'ín Elías. ³¹ Imá t'inkáséyan jnkontatjen tí tjejó sín tjejótjo sín tí ch'ín Jesús kixin nkexrí its'en ch'án la ko nkexrí tsjasótexín ch'án tí chjasin Jerusalén. ³² A ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjóttsjehe sín k'uikon sín tí kjuachaxin kuente ch'ín Jesús la ko k'uikon sín tí yóí chojni ntoá tjejóko sín ch'án. ³³ A ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuich'éneni iní nchia la mé ijnko kuéntá la ijnko kuente ch'ín Moisés la ko ijnko kuente ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchro ch'án kixin chrakon ch'án. ³⁴ A ntá naxa tjenixja ch'án ikui ijnko tjuí kjuák'etja tí jna tjejó sín. Ntá chrakon sín tjejó sín chrínki tí tjuí. ³⁵ Ntá xrínahya kuínhin sín chríkan tí tjuí itén nkexro ntáchro kixin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ A ntá tió kjuixin kuínhin sín tí tan nixja ntá k'uikon sín kixin jehó ch'ín Jesús tjen. A ntá tí jehe sín la tání sín kixin xikaha k'uikon sín tí yaon a la ninkexró chenkahya sín tí nkehe k'uikon sín.

Ch'ín Jesús kjuínchekitōhe jína ijnko chánjan chónka nchakuen tí jínahya
(Mt. 17.14-21; Mr. 9.14-29)

³⁷ A ntá tí yaon chr'éxin k'uínkajinxín sín jna la ntá nchónhya chojni sákjuixinhin sín ntia ch'ín Jesús. ³⁸ A ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kixin:

—Maestro, chronóahani kixin chrótsjehé tí xjeenni kixin jnkokoaxón ó chóntani a ntá níhi xjan. ³⁹ Chónka xjan nchakuen tí jínahya la ntá nchek'iyato

xjan la ko nchek'aniáte xjan nchexrànkà xjan kixin tjetéhe xjan la ko ntálorjo sítjixín ir'va xjan la ko ncheníhi xjan, na mé chrohya tsjinhin xjan. ⁴⁰ A ntá chronóeheni tí sín xríkoa chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátehe ch'ín Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjákohará kixin nunca t'itjáhyará? Xrákoa tí xjan ntihi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan ínaá. Kjánchó ch'ín Jesús jiehe k'uetuēhen tí nchakuen tí jínahya kixin ts'axrjexín xjan. Ntá k'uaxrje tí nchakuen tí jínahya ntá kuítóhe xjan jína. A ntá ch'ín Jesús kjuínchek'áyéhe tí it'é xjan. ⁴³ A ntá kaín sín chrakon sín kixin k'uíkon sín tí kjuachaxin jié kuēnte Dios.

Ch'ín Jesús chrónka ch'án ínaá kixin its'en ch'án

(Mt. 17.22-23; Mr. 9.30-32)

Naxa chrakon sín kaín sín kixin tí kjuaxroan kjuích'e ch'ín Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etoan —ichro ch'án.

⁴⁵ Kjánchó jehe sín kienxínhya sín tí nkehe ntáchro ch'án kixin naxa kjuanjonhya Dios kjuachaxin kixin chrókuiēnxín sín, ntá chrakon sín na kjuanchankíehya sín ch'án kixin nkexrí t'axrjexín tí nkehe ntáchro ch'án.

Nkexro tí imá tjetōan ts'etoan

(Mt. 18.1-5; Mr. 9.33-37)

⁴⁶ A ntá tí sín k'uájiko ch'ín Jesús kjuankixin sín itjo sín kíchó sín kixin nkexro tí jehe sín antsí má tjetōan ts'etoan. ⁴⁷ Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án ⁴⁸ ntá ntáche ch'án sín kixin:

—Tí jnkojín nkexro chrók'uáyéhe tí xjan i kixin tinkáchónki sín tí janhan mé xíkaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xíkaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchehnkehya la mé antsí chrók'uáyéhe kjuachaxin chrók'uetōan.

Tí nkexro nínkakuenhya tí jeheni la mé tóxrjínhin ch'án tí xra ch'eni

(Mr. 9.38-40)

⁴⁹ Ntá ntáchro ch'ín Juan kixin:

—Maestro, k'uíkonni ijnko nkexro kjuachaxin ihniá kuakitsjexín ch'án nchakuen tí jínahya chóna chojni. A ntá chénkani ch'án kixin xíkahya chrókjuich'e ch'án kixin xrikohyani ch'án.

⁵⁰ Kjánchó ch'ín Jesús ntáchro ch'án kixin:

—Xíkahya chróntáche ch'án kixin tí nkexro nínkakuenhya tí jeheni la kjá tóxrjínhin tí xra ch'eni —ichro ch'án.

Ch'ín Jesús kjuentuéhe ch'án tí ch'ín Jacobo la ko tí ch'ín Juan

⁵¹ A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén. ⁵² Ich'án ch'án chojni kuitónxin ntia a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín. ⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'uíkon sín kixin ó xra ó sátsji ch'án chjasin Jerusalén. ⁵⁴ A ntá tió k'uíkon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

— Ìnchéni, ¿á tjinkávan ḱixin chrókjuanchiani xrohi chrók'uinkajinxin nkaya nkajni chrókjuinçek'itjáyan tí jehe sín éxí kjuanchia tí ch'ín Elías?*

⁵⁵ Ntá ch'ín Jesús kuinkátjía ch'án komá ch'án tí jehe sín ntá kjuentuéhe ch'án sín ntáchro ch'án ḱixin:

— Jahará la kjá noahyará nkexro nchakuen chontará. ⁵⁶ Ḱixin tí Xjeen Dios K'óna Chojni kuihya ch'án ḱixin chrókjuinçek'itjáyan ch'án chojni. Náhí. Xra ó ikui ch'án sinchekaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjinkaon chróchréhe sín tí ch'ín Jesús
(Mt. 8.19-22)

⁵⁷ A ntá jehe sín sákjuí sín ntia inaá. Ntá xeta sín ijnko nkexro ntáche ch'án tí ch'ín Jesús ḱixin:

— Ìnchéni, tjinkaonni chróchréheni tí jaha nketí tjinkávan sátsjia —ichro ch'án.

⁵⁸ Ntá ch'ín Jesús kjuátehe ch'án ntáchro ch'án ḱixin:

— Tí koxrón tá chón ta va itjueé va la ko tí koxroxé chón ta va kaké va. A ntá tí Xjeen Dios K'óna Chojni chón tahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

— Chréhe tí janhan —ichro ch'án.

Kjánchó kjuátehe ch'án ḱixin:

— Ìnchéni, títóhéni senó sátsjikjaváni it'éni —ichro ch'án.

⁶⁰ Ntá kjuátehe ch'ín Jesús ntáchro ch'án ḱixin:

— Títóhé ḱixin tí chojni tsík'en la jnkokón sín tsík'en tsjavá kichó sín. A ntá jaha la sátsjikjàkua nkexrí tjen tí kjuachaxin t'etōan Dios —ichro ch'án.

⁶¹ Ntá ntáchro í jnko nkexro ḱixin:

— Ìnchéni, tjinkaonni tsochréheni tí jaha. Jehí títóhé tsjinixjeheni tí sín siín ntoeni —ichro ch'án.

⁶² Kjánchó ntáchro ch'ín Jesús ḱixin:

— Tí nkexro kjuanḱixin tsotsé ch'án arado ntá chrókjan chrókotónhen nóton mé xikaha xitjahya sich'ehe ch'án Dios xra.

10

Ch'ín Jesús k'uetuēnhen setenta chojni sátsjikjako sín

¹ Ntá chr'éxin Ìnchéni kjueyá ch'án í jnko setenta chojni ntá k'uetuēnhen ch'án sín sátsji sín yóyó sín sátsji sín tsitónxin sín ntia tí kaín chjasin na ko nkúixín tjinkaon ch'án sáchrókjuí ch'án. ² Ntá ntáchro ch'án ḱixin:

— Chaxín ntáxrjan ḱixin imá tsík'óna, a ntá tí chojni ch'e xra mé tsjéhya. Chrókjuancheherá tí Ìnché nonte ḱixin chróchr'án ch'án itsjé chojni chrókjuich'e xra. ³ Sátjirá jahará. Xráxinkáonrá ḱixin tétuanhanrá sátsjirá éxí kolélo ts'ejóyakjanrá chríkjan tí kolobo. ⁴ Tsjikoahyará kabólsa la ko tjoa t'inka chichaon la ko tokate tjikoahyará la ko tí nixjehérá chojni tí ntia títóéhyará ḱixin chrókjuintaxrjanhanrá sín. ⁵ A ntá tió ts'ixenhenrá jnkojín nchia la senó nixjehérá sín ntáchrórá ḱixin ts'áyéhe sín kjuaxróxin, tsixrorá. ⁶ A ntá tí tjejó sín kjuaxróxin ntiha la nixjehérá sín la ts'áyéhe sín kjuaxróxin. A ntá tí la náhí, a ntá tí kjuaxróxin chrók'uáyéhe sín na sátsjikoará inaá. ⁷ A ntá tí nchia ntiha chrókjuanjón sín kjuachaxin chrókuítóhará, ntaha mé tsjanjón sín nkehe chón ta sín sinterá la ko its'irá, ḱixin tí nkexro ch'e xra la siín kjuachaxin tsoxenkehe. Tsjíhyará í jnko nchia la ko í jnko nchia. ⁸ A ntá tsjasánrá ijnko chjasin tsjanjón sín kjuachaxin ts'ejorá ntiha ntá interá tí nkehe tsjanjón sín.

* 9:54 1 Reyes 18.30-40

⁹ Nchekitohérá chojni níhi jína. Ntá chenkará sín kixin tí kjuachaxin t'etoan Dios la kjinhya tjen tí tjejó sín, ichrorá. ¹⁰ A ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntøe sín sátjirá tí ntia chjasin ntiha ntá ntáchrórá kixin ¹¹ kjónté tí nche tsík'ixitja totará tsotsénkará kixin tsjákoxinrá kixin tí kjuaxróxinhya ts'áyéhe sín chr'éxin. Kjánchó chrókónohe sín kixin tí kjuachaxin t'etoan Dios la kjinhya tjen tí tjejó sín, ichrorá. ¹² Ntáxrjan kixin tí yaon tsjejéxin chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya

(Mt. 11.20-24)

¹³ 'Nòará jahará chjasin Corazín. Nòará jahará chjasin Betsaida. Tí chrók'uibin tí kjuaxroan tí chjasin Tiro la ko chjasin Sidón éxi k'uikonrá jahará, ntá chrókójehe sín la tjoka chrókjuítóxinhin ntje sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókjuákoxin sín kixin t'ává sín. ¹⁴ A ntá tí yaon tsitoéxin ijje chojni a ntá jahará antsí tsjasótiará, a ntá tí sín kuènte chjasin Tiro la ko chjasin Sidón la kénhyó tsjasóte sín. ¹⁵ A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajní, ichrorá. Chaxínhya. Jahará la tsjasinkajinrá sátsjirá tí tsjasótéxin tí sín tsík'en.

¹⁶ Tí nkexro tinhin tí nkehe ntáchrórá la mé xikaha tinhin tí nkehe ntáxrjan la ko tí sín titekakonhya sín tí jahará na mé xikaha titekakonnahya sín tí janhan. A ntá tí nkexro titekakonnahya sín tí janhan xikaha titekakonhya sín tí nkexro chr'ánna k'uinka.

Ó kjan tí sín setenta sátsíki

¹⁷ A ntá ó kjan tí sín setenta sátsíki la imá chéhe sín ntáchró sín kixin:

—Inchéni, kjónté tí nchakuen tí jínahya titekakonhenni tió t'ákjénxinni ihniá —ichro sín.

¹⁸ Ntá ntáchró ch'ín Jesús kixin:

—Kja chaxín k'uikuán kixin ch'ín Tsochren k'uánótjénxin nkajní éxi ijnko kjónkixin xikaha kónhen.† ¹⁹ Ó tjahará kjuachaxin kixin kjónté konche la ko konchiá tsinkátjará la ko tsjachahya ninkehó tí kjuachaxin kuènte tí ch'ín Tsochren kixin ninkehó tsoanhyará. ²⁰ Kjánchó jehya tíha chrókóchàxinrá kixin tí nchakuen tí jínahya kuítekakonhanrá. Náhí. Chrókóchàxinrá kixin ihniárá ó ts'ínixín nkaya nkajní —ichro ch'án.

Tí Xjeen Dios nixjehe It'é ch'án

(Mt. 11.25-27; 13.16-17)

²¹ A ntá tuénxín tí Nchakuen Dios kjuínchechéhe tí ch'ín Jesús ntá ntáchró ch'án kixin:

—Tjáncháha kjuasáya It'éni Inché nkaya nkajní la ko chjasintajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'itja tí sín noehya. Mé xikaha It'éni, jaha kóxrjínhan kixin xikaha tsonhen.

²² T'aná mé chjina kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjeýá ch'án kixin tjinkaon ch'án tsonohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kixin:

* **10:12** Génesis 19.24–28 † **10:18** Isaías 14.12

—Chéhe tí sín k'uíkonxín kon sín éxí k'uíkonrá. ²⁴ Ntáxrjan kixin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uikon sín éxí t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kíenhya sín —ichro ch'án.

Ch'ín Jesús kjuíncheyóexin éxí ijnko samaritano jína

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án tsonoexín ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochrín? —ichro ch'án.

²⁶ Ntá kjuátehe ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátehe ch'án ntáchro ch'án kixin:

—Chrótjuèheni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuénteni la ko chrótjuèheni kíchó ni éxí tjuèxínni asénni‡ —ichro ch'án.

²⁸ Ntá ntáchro ch'ín Jesús kixin:

—Jína kjuátehe. A ntá tí jaha xíkaha sích'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxín ch'án tí ch'ín Jesús ntá kjuanchankí ch'án inaá kixin:

—¿Xá nkexro tí kíchó ni chrótjuèheni, ichrua? —ichro ch'án.

³⁰ Ntá ch'ín Jesús kjuátehe ch'án ntáchro ch'án kixin:

—Ijnko chojni k'uínkajinxín nó ntia kjuixín chjasin Jerusalén sátsji ch'án chjasin Jericó, ntá kuátóhe ntia iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkate sín ch'án, la ntá sátsíkji sín tsíkitohe sín ch'án la ó mero tjet'en ch'án. ³¹ Ntá xrínahya k'uátsínka ijnko nchát'á tí ntia ntiha ntá k'uíkon ch'án xíkaha ntá ántosén ch'án k'uátsínké ch'án. ³² A ntá kjaxin ijnko ch'ín levita k'uátsínka chjinaxón ntiha. Ntá k'uíkon ch'án xíkaha ntá ántosén ch'án k'uátsínké ch'án kjaxin. ³³ A ntá ijnko ch'ín kjuixín estado Samaria k'uátsínka tí ntia ntiha ntá k'uíkon ch'án xíkaha tjetsínka tí nkexro ntá kuikonóehe ch'án. ³⁴ Ntá kóchjinehe ch'án tí nkexro tsíkóníhi ntá kjuích'ehe ch'án xroan tí síchrit'o chjéhe ch'án aceite la ko vino la ko kjuínchentetoxín ch'án ka. Ntá kjuixin ntá kjuínchekiták'á ch'án tí kolóchoe ch'án. Ntá sákjuíko ch'án ijnko nchia t'ok'èxín chojni ntiha la k'uáyakonhen ch'án. ³⁵ Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí ìché tí nchia ntáchro ch'án kixin: “T'ayakonhén tí nkexro i, a ntá antsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha,” ichro ch'án. ³⁶ A ntá tí iní nkexro k'uátsínka ntia la, ¿nkexro tjuèhe tí nkexro kjuíncheníhi tí síchee? —mé kjuanchankí ch'ín Jesús.

³⁷ A ntá kjuátehe tí maestro tjako tí ley kixin:

—Tí nkexro kuikonóehe tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xíkaha chrókjuích'e —ichro ch'án.

Ch'ín Jesús sákjuí ch'án ntøe tjan Marta la ko tjan María

³⁸ Naxa tjetji ch'ín Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuitohe ch'án ntøe tjan ntiha. ³⁹ A ntá tjan Marta chóna tjan ijnko kíchó tjan it'in María. A ntá jehe

‡ 10:27 Deuteronomio 6.5; Levítico 19.18

tjan kjuák'etjaxin tjan chrínkí toté tí ch'ín Jesús tjetinhin tjan nkehe tí tjechro ch'án. ⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Inchéni, ¿á tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ Kjánchó ch'ín Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta. ⁴² Kjánchó jnkokoá nkehe t'ichjánxin. A ntá tjan María kjueyá tjan tí nkehe antsí jína la ko ninkexró tsakitsjehya tjan tíha —ichro ch'án.

11

Ch'ín Jesús tjako ch'án nkexrí tsonixjeheni Dios (Mt. 6.9-15; 7.7-11)

¹ A ntá jnkonaá ch'ín Jesús tjenixjehe ch'án Dios ijnko lugar tjan. Ntá kjuixin la ijnko tí sín xriko ch'án ntáchro kixin:

—Inchéni, tjácohéni nkexrí tsonixjeheni Dios kixin xikaha ch'ín Juan kjuakohe ch'án tí sín k'uájiko ch'án.

² Ntá ch'ín Jesús ntáchro ch'án kixin:

—Tió nixjehérá Dios ntáchrórá kixin:

It'éni tjan nkaya nkajní, jaha imá tjóá.

Chrókui ti kjuachaxin kuéntá.

Chrókuich'e tí nkehe tóxrjínhan jaha ntihi chjasintajni éxí tjech'e nkaya nkajní.

³ Ijie tsjánjuan tí niotja t'ichjánxinhinni jnkojnko yaon.

⁴ T'óxíka tí nkehe jínahya kjuích'eni kixin kjaxin jeheni ts'itjáyenheni tí nkehe kjuích'eheni chojni.

Títóéhyani jeheni xrahya chrókuasinni jie. Nchekaáni kaín tí nkehe jínahya chrókónheni

—mé xikaha ichro ch'ín Jesús.

⁵ Kjaxin ntáchro ch'án kixin:

—A ntá jnkojínrá chróchontará ijnko chojni choxian, a ntá sáchrókjuia ntøe ch'án k'áxrótjen chróntáche ch'án kixin: “Amigo, nchekjenni iy'á niotja ⁶ kixin nantá ó kui ijnko chojni chóxinni kuixin ch'án kjín kjuíji ch'án ntøeni ntá chóntahyani ninkehó tsochjeheni ch'án.” ⁷ A ntá tí chrókuatehe tí nkexro choxian tjan nkaxenhen chróntáchro kixin: “Chjeéhyani xra. Tí ntója ntøeni méhe t'íkjehe. A ntá xjeenni tjejót'ok'èkoni xjan. Ntá xitjahya ts'àyani tsotjáhani nkehe”, ichro ch'án. ⁸ Ntáxrjan kixin kjónté chrók'uayahya ch'án chrótjáhya ch'án nkehe kjónté chóxian ch'án, kjá ts'àya ch'án tsotjáha ch'án kaín nkehe t'ichjánxinhan kixin tjinkakonhya ch'án kixin naxa chrókuak'é chrók'uèya jaha. ⁹ Mé xikaha ntáxrjan kixin: Tjanchará nkehe la Dios tsotjáhará; tjéyará nkehe la ts'itjará; t'inkará puerta la tsoxitjehe. ¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjejá nkehe la ts'itja; la ko tí nkexro t'ínka puerta la tsoxitjehe.

¹¹ ¿Xá jnkojínrá chontará xjaanrá chrókuanchahará xjan niotja la ¿á chrókuánjonrá ijnko xro? O chrókuanchahará xjan koche la ¿a chróchjehérá ijnko konche? ¹² O chrókuanchahará xjan koja la ¿á chrókuánjonrá ijnko konchia? ¹³ A ntá jahará kjónté jínahyará la ó nohará nkehe jína tsochjehérá xjaanrá, la mé antsí chrókónohará kixin It'éni tjan nkaya nkajní tsotjáhará Nchakuen ch'án tí jnkojínrá chrókuanchehérá ch'án —ichro ch'ín Jesús.

Tjanchia sín jiē kixin ch'ín Jesús chóna kjuachaxin tí Jínahya
(Mt. 12.22-30; Mr. 3.19-27)

¹⁴ Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsík'axrje tí nchakuen tí jínahya a ntá tí ch'ín xitjahya nixja la jína nixja ch'án. Ntá kaín chojni chrakon sín kixin xikaha tsíkjih'e ch'án. ¹⁵ A ntá jnkójín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé t'etuenhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxin sín tí ch'ín Jesús ntá kjuanchehe sín ch'án ijnko kjuaxroan náxrjón kuènte nkaya nkajní. ¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkójín gobierno jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoxán sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá. ¹⁸ A ntá kjaxin tí ch'ín Tsochren chrókjuánjonko kichó ch'án, ¿la nkexrí chróchóna ch'án kjuachaxin naxa chrók'uetoan ch'án tí chrók'uaxrje tí jínahya? A ntá jahará ntáchrorá kixin janhan takítsjé nchakuen tí jínahya kixin tí kjuachaxién ch'ín Tsochren chonta janhan, ichrorá. ¹⁹ A ntá tí xikaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxin sín kixin jahará ntoáhya tjenkayáxinrá. ²⁰ A ntá tí kjuachaxién Dios mé takítsjéxian tí nchakuen tí jínahya na mé chrókónoaxínrá kixin tí kjuachaxién Dios t'etoxan ch'án mé ó kui tí tjejorá.

²¹ A ntá ijnko chojni jiéhe yamá chica t'ayakonhen ch'án ntoe ch'án kixin tí nkehe chóna ch'án ts'itjáyánhya. ²² A ntá itsi ijnko nkexro antsí má tsehe, a ntá tsjanjonko ch'án tí ìnché nchia, a ntá tsjacha tsakitsjehe tí ìnché nchia kaín tí chica yamá ch'án kixin imá jiéxín ch'án. A ntá tí ch'ín antsí tsehe mé tsakja ch'án kaín nkehe siín ntiha. ²³ Tí nkexro titekakonhya tí janhan mé nínkakonna ch'án. A ntá tí nkexro tjinkitsahya tí janhan mé t'inkákonhen tí xra t'a —ichro ch'án.

Ijnko tí nchakuen tí jínahya mé tsokjan ínaá
(Mt. 12.43-45)

²⁴ A ntá ijnko nchakuen tí jínahya tsík'axrjéxín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Áxri tsokjan ntona k'uaxrjéxian.” ²⁵ A ntá tió kjan la éxí ijnko chojni tsík'ánjón ntoe la náxrjón tsjehe tí nkaxenhen nchia. A ntá k'uíkon tí jínahya xikaha tjen nchia ²⁶ a ntá sákjuíkajín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen ijnko chojni kénhya asén tinkáchónki Dios —ichro ch'án.

Tí kjuachéhe chaxín

²⁷ Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjeníxin tí jaha kjuíntak'ánkiá —ichro tjan.

²⁸ Ntá jehe ch'án kjuátehe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjón
(Mt. 12.38-42; Mr. 8.12)

²⁹ Ntá nchónhya chojni sítójnkotsé sín tí tjen ch'ín Jesús ntá jehe ch'án kjuankíxin nixja ch'án ntáchro ch'án kixin:

—A ntá tí chojni siín jie la jínahya sín, a ntá tjanchia sín kíxin chrókjuásian ijnko kjuaxroan náxrjón. Kjánchó tsjáko_xinhya í jnko kjuaxroan la jehó tí nkehe tsikónhen ch'ín Jonás. ³⁰ Ntá éxí yóhe kónhen ch'ín Jonás kónoexín tí sín chjasin Nínive mé xíkaha tsonhen tí Xjeen Dios K'óna Chojni la ts'ikon tí chojni siín jie. ³¹ A ntá tí yaon tsitoexín ijié chojni tjejó jie la mé tí tjan reina k'ueñoan kjuixín nó Sur mé ts'inkatjen tjan tsjanchia tjan jie kíxin tí sín tjejó jie. Kíxin jehe tjan imá kjín kjuixín tjan tsinhin tjan nkexrí imá k'ueñohe ch'ín Salomón.* A ntá jie itjèn janhan antsí chonta kjuachaxin, a ntá ch'ín Salomón la kénhyó. ³² La ko tí sin chjasin Nínive kjaxin ts'inkatjen sín tió tsitoexín ijié chojni la tsjanchia sín jie kíxin tí sín tjejó jie la ko tsontácho sín kíxin chrókjuasóte tí chojni tjejó jie kíxin tió kuínhin tí sín Nínive chrónka ch'ín Jonás itén Dios la kjuítóxinhin sín ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

Xrohi t'inkaséyanxín cuerpo kuènte chojni
(Mt. 5.15; 6.22-23)

³³ 'Nijnko chojni chrokjuinchek'ákjen ijnko xrohi chrókjuak'ema ch'án la ko chrókjuak'ehya ch'án chrínki ijnko ntacajón. Náhí. Noi chrókjuak'e xrohi chrókjuak'enkáya candelero kíxin ts'ikonxín chojni tí t'inkaséyan.† ³⁴ Tí ikonrá mé éxí yóhe ijnko xrohi t'inkaséyanxín tí cuerpo kuéntará. A ntá tí chontará ikonrá jína la ntá kuenté cuerpo kuéntará chóna xrohi. A ntá tí chontará ikonrá jínahya la ntá kuenté cuerpo kuéntará la sítié tjen. ³⁵ Chrókóxakonhanrá kíxin chrók'uayakonhénrá tí xrohi chontará kíxin chrók'uankahya kíxin chrók'uixitiéhya tí tjejorá. ³⁶ A ntá tí kuenté tí cuerpo kuéntará chróchóna xrohi la ko nit'q chrók'uixitiéhya la ntá kuenté la chrók'uikonrá jína la éxí ijnko lámpara kuenté ch'e xra jína.

Ch'ín Jesús chrónka kíxin ntoáhya tjako tí sín fariseo la ko tí sín tjako ley
(Mt. 23.1-36; Mr. 12.38-40; Lc. 20.45-47)

³⁷ A ntá tió kjuixin nixja ch'ín Jesús ntá ijnko ch'ín fariseo chrónóhe ch'án tí ch'ín Jesús kíxin sátsjiko ch'án ntqoe ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjaxín ch'ín Jesús chjino tjen tí mesa a. ³⁸ A ntá tí ch'ín fariseo chrakon ch'án k'uikon ch'án kíxin ch'ín Jesús k'óntihya ch'án tja ch'án senó tí sine ch'án éxí tinkáchónki tí jehe sín. ³⁹ Kjánchó Inchéni ntácho ch'án kíxin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachee la ko kjuachjinoxínhin. ⁴⁰ Jahará lontirá. ¿A noahyará kíxin tí nkexro kjuích'ena tí ntója la koí tí nkaxenhen kjuích'ena ch'án? ⁴¹ Tí chrókjuinchekitonhénrá chojni nòa kaín asánrá tí nkehe chontará la ntá chrókóxakuanhyará tí chrók'ónti chojni q náhí.

⁴² 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuentá tí nkehe ntoá la ko nkexrí chrótjuèhéra Dios la ko nkexrí chrótjuèhéra kíchuára. Jína chróchjehérá Dios nkehe la ko chrók'uitjáyanyhará tí chrókjuínkítsará kíchuára.

⁴³ 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kíxin jnkojína tsonixjahará sín tió tsoxétará sín ntasin.

⁴⁴ 'Nòará jahará maestro tjakorá tí ley la ko jahará fariseorá. Ntoáhya tjenkayáxinrá ch'iará. Jahará éxí yóhe tòye tsíxravá chojni tsík'en t'ikonhya chojni la t'atsínka sín nátaón la noehya sín kíxin tsíxravá chojni ntiha.

⁴⁵ A ntá kjuátehe ijnko tí maestro tjako tí ley ntácho ch'án kíxin:

* 11:31 1 Reyes 10.1-10 † 11:33 Lucas 8.16

—Maestro, xikaha ntáchrua la, ¿á kjaxinhya jeheni kaín ni t'ántaxínhínni ní? —ichro sín.

⁴⁶ A ntá ntáchro ch'ín Jesús kixin:

—Kjaxin nòará tí jahará tjàkorá tí ley. Tétuènhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará nijnko dedo tjárá chrókjuínkítsará tí nkehe imá ye yámá sín.

⁴⁷ Nòará tí jahará. Ch'énará tjàt'oe tí sín k'uéchrónka itén Dios ósé tsík'óyán tí sín k'uaxrjeníxinrá. ⁴⁸ Xikaha jahará tjákoxinrá kixin ó nchoxon tí nkehe kjuích'e tí sín k'uaxrjeníxinrá ósé kixin jehe sín k'óyán sín tí nkexro k'uéchrónka itén Dios ósé. A ntá jahará ch'énará tjàt'o tí tsíxravá sín.

⁴⁹ Mé xikaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkojín tí jehe sín la ko tsochónkíhi tí í so sín, ichro ch'án. ⁵⁰ A ntá Dios mé tsjanchia jie tí chojni síin jie kixin k'úitji ijnié kaín tí sín k'uéchrónka itén ch'án ósé desde tí xrankíxin k'óna chjasintajni ⁵¹ la mé xrankíxixín k'úitji ijnié ch'ín Abel la mé kjuixixín k'óyán sín ch'ín Zacarías k'óyáxin sín ch'án jnkosiné tí tjen tí altar la ko tí nínko. Ntá Dios sinchekjasóte ch'án tí sín síin jie kixin xikaha ik'uén kaín tí sín a.

⁵² Nòará jahará maestro tjàkorá tí ley. Jahará tjinkákonhyará kixin í so chojni tsonohe sín tí nkehe chaxín la ni jahará tjinkákonhyará sinchexiteyará la ko titoéhyará kixin í so chojni chrókjuinchexiteyá sín —ichro ch'án.

⁵³ A ntá kjuixín nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakonhen sín ch'án ntá kjuankíxin sín kjuanchankíhi sín ch'án nchónhya nkehe ⁵⁴ chrókjuachaxín sín ch'án kixin ách'e ntoáhya chrókjuatehe ch'án ntá chrókjuanchia sín jie tí jehe ch'án.

12

Ch'ín Jesús chrónka kixin ntoáhya ch'e tí sín fariseo

¹ A ntá nchónhya míl chojni kójnkotsé sín ntá tinkák'íntate kichó sín. Ntá ch'ín Jesús saoxín kjuankíxin chénka ch'án tí sín k'uájiko ch'án ntáchro ch'án kixin:

—Chrókuítekákonyará tí nkehe ntoáhya tjenkayáxin tí sín fariseo ch'ia sín, na mé éxí yóhe tí xroan nchek'ánkí niotja tí nkehe tjako sín. ² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin. ³ A ntá kaín nkehe ntáchrórá tí sítié la chr'éxin tsinhin chojni tí nchakotjin; la ko kaín nkehe mó ntáchrórá k'uikjéhérá nchia la chr'éxin ts'èya sín chritaón nchia tsinhin kaín xín chojni.

Nkexro tí chróchrakonhenni

(Mt. 10.26-31)

⁴ Jahará chojni chóxin kichó ni mé tjonkará kixin chróchrakonyará tí chojni t'óyán tí cuerpo, a ntá chr'éxin la kohya nkehe tsjacha sín chrókjuích'e sín. ⁵ Kjánchó tjonkará kixin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chóna kjuachaxín tsochr'án chojni tí síin xrohi tsjasótexín sín. Tí nkexro a mé chróchrakonhénrá ch'án má.

⁶ ¿Á chrókóxixinhya in'ó koxroxé yaá chichaon ntsíntsí? Kjánchó Dios la ts'itjáyenhya ch'án nijnko tí jehe va. ⁷ Kjonté tí kaxihí chóna ikjára la nohe ch'án nkekjaín ka chontará. Méxra chrakonhyará tí jahará kixin antsí má tjete sínkí tí jahará. A ntá kjonté nchónhya koxroxé la kánhyó sínkí tíha.

Chróchrónkani kixin tinkáchónkini Ìnchéni Jesucristo nkayakon chojni

(Mt. 10.32-33; 12.32; 10.19-20)

⁸ 'Ntáxrjan kaín tíhi kixin tí nkexro tsochrónka kixin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kixin ch'ón ch'án tí jehe sín nkayakon tí sín ángel kuènte Dios. ⁹ A ntá tí sín sinchemá sín kixin chónhyana sín nkayakon chojni la ntá kjaxian janhan s̄ntamá kixin chonhya tí jehe sín nkayakon tí sín ángel kuènte Dios.

¹⁰ A ntá jnkojín nkexro ts'ántaxínhin sín tí Xjeen Dios K'óna Chojni naxa jina ts'itjáyán tí jie k'uántaxínhin sín. A ntá tí nkexro ts'ántaxínhin tí Nchakuen Dios la xitjahya tsjin tí jie tí xikaha tsixro sín.

¹¹ 'Tió tsjikoará sín nkaxenhen njnko Israel la ko tí tjejó tí sín t'etoan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá ¹² kixin tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochóna chojni itsjé nkehe

¹³ Ijnko nkexro tjenkákjan tí sin tsikójnkotsé ntáche ch'án tí ch'ín Jesús kixin: —Maestro, ntáche tí kichó ni a kixin tsjanjon ch'án tí nkehe tónhenni tocar tsíkitohe it'éni tsakjani —ichro ch'án.

¹⁴ Ntá kjuátehe ch'ín Jesús ntáchro ch'án kixin: —Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

¹⁵ Kjaxin ntáchro ch'án kixin: —Tóxonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kixin: —Kjuák'e ijnko chojni rico, a ntá tí nontee ch'án na mé imá k'óna. ¹⁷ A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuit'a jie kixin chontahya nketí ts'ínkachjina tí noa k'ónana?” ichro ch'án. ¹⁸ Ntá kjuenkayáxin ch'án ntáchro ch'án kixin: “Ó nòna nkehe s̄it'a jie. Ts'oxíka tí t'ínkachjinayá noa chonta ntá s̄it'ána ijnko antsí jie ts'ínkachjinayá kaín nkehe k'ónana jie chonta. ¹⁹ Ntá tsontátjan asenná kixin: Asenni, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la inte la its'ia la tócháha,” ichro ch'án. ²⁰ Kjánchó ntáche Dios tí jehe ch'án kixin: “Lontia xikaha ichrua la, kixin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án. ²¹ Mé xikaha tsonhen tí nkexro chóna nchónhya nkehe chjasintajni ntihi, a ntá naxa kjueyáhya ch'án nkehe kuènte nkaya nkajní —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kixin: —Tjonkará kixin chrókóxakuanhyará tí nkehe chrókjónterá la ko tí ka chrók'uítsará. ²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuéntará, a ntá kánhyó sínkí tí ka chrók'uítsará. ²⁴ Xráxinkáonrá nkexrí síín tí kontálo. T'enkahya va la ko tjáhya va la ko chónthahya va nketí ts'ínkachjinayá va tí noa. Kjánchó Dios la tjanjon nkehe sine va. A ntá jahará la antsí tjetóan, a ntá tí ko xritjaka la kénhyó. ²⁵ ¿Á tjejó jnkojínrá tjenkayáxinrá kixin tí chrókóxakonhanrá má ntá naxa chrók'uankirá it'o metro ntetoxinrá inaá? ²⁶ A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxonhanrá í so nkehe síín?

²⁷ 'Xráxinkáonrá nkexrí sít'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uék'inkáya ch'án naxa kjuíncheyóehya ch'án kixin antsí náxrjón tí tsjo a. ²⁸ A ntá xikaha

Dios mé nchek'itsa ch'án kaín kayoa kjónté ijie síchón la ntóye tsoche, la mé xíkaha tsjanjon ch'án tí nkehe chrok'uitsará jahará. ¿Ntá nkekuènte kixin naxa titekákonhyará ch'án? ²⁹ ¿Ntá nkekuènte ixrírá tóxakonhanrá xritjeyará nkehe sinterá la ko nkehe its'irá? ³⁰ A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a. ³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tjete síin nkaya nkajní
(Mt. 6.19-21)

³² Chrakonhyará jahará kolélo kuèntana. Kjónté tsjéhyará la It'ará tóxrjínhin ch'án tsotjáhará ch'án tí kjuachaxin kuènte ch'án. ³³ Nchekjirá kaín nkehe chontará la ntá chjeherá tí chichaon tí sín chóntahya. A ntá xíkaha sích'erá la tí tjoa t'inka chichakoanrá tsontaxinhya kixin tí nkehe tjete síin nkaya nkajní tsjejhya la ko ntaha kohya xíchee la ko ts'ínhya kué la ko ts'itjáyanhya. ³⁴ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxin listo chrók'uejóchónhenni

³⁵ T'ichjánxin listo ts'ejochonhénra la ko tsjak'ekoará xrohi tjeche. ³⁶ Listo chrók'uejorá éxí chojni ch'e xra tjejóchónhen sín tsokjanxin tí lámoe sín tí tsíkótehe chojni kixin tió tsi ch'án la ts'èya ch'án, la ntá tsakitjehe sín tí puerta tjoka. ³⁷ Náxrjón tí nkexro ch'e xra tió chrókjan tí lámoe sín chrók'uikon ch'án kixin naxa tjejótsjehe sín. Ntá chaxín ntáxrjan kixin tí ch'ín lamo ts'etóan ch'án kixin ts'ejótjāxin sín tí tjen mesa ntiha ntá tsjanjon ch'án nkehe sine sín. ³⁸ Kjónté chrókui ch'án k'áxrótjen o chrókui ch'án nantóye mé xíkaha chrók'uikon ch'án kixin tjejótsjehe sín la náxrjón tí sín ch'ehe ch'án xra. ³⁹ Chrókónohará tíhi kixin tí chrókónohe tí ìnché nchia nke hora chrókui tí xíchee ntá chrókjuak'etsjehe ch'án chrókuítóehya ch'án chrók'uixenhen xíchee tí ntóe ch'án chrókueé. ⁴⁰ Ntá jahará kjāxinrá xíkaha chrók'uejotsjehérá kixin titàya tsi tí Xjeen Dios K'óna Chojni.

Tí nkexro jína ch'e xra la ko tí ch'ín ch'ehya xra jína
(Mt. 24.45-51)

⁴¹ A ntá ch'ín Pedro kjuanchankí ch'án kixin:
— Ìnchéni, ¿á jehóni kaín ni kjuincheyóéxian nkehe ntáchrúa o kaín chojni? —ichro ch'án.

⁴² Ntá ntáchrú Ìnchéni kixin:
— ¿Nkexro tí t'etóan tí xra jína, a ntá tí lámoe ts'etuenhen kixin ts'ayakonhen ch'án tí chojni síin tí nchia ntiha kixin tsjanjon ch'án nkehe sine sín xintii tí hora a? ⁴³ Náxrjón tjen tí nkexro a tió tsi tí lámoe ts'ikon ch'án kixin naxa tjech'e tí xra. ⁴⁴ Tíhi mé chaxín tsontáxrjan kixin tí ch'ín lamo tsochjéhe ch'án kaín xra chóna ch'án ts'etóan tí ch'ín a. ⁴⁵ A ntá tí ch'ín t'etóan sítónhen xra tsjenkayáxin kixin tjokahya tsokjan tí lámoe ch'án, a ntá tsjankíxin ch'án tsonínkakonhen ch'án tsjanjonko ch'án tí í so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokóan ch'án. ⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuítóhehe xra la ntá tsjasóteko ch'án tí sín titekakonhya.

⁴⁷ A ntá tí nkexro nohe ch'án nkehe tí xra tjinkaon tí lámoe ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. ⁴⁸ A ntá tí nkexro noehya nkehe tí xra tjinkaon tí lámoe ch'án ntá ch'e ch'án nkehe chrókjuasótexín ch'án la kjónté kánhyó tsjasóte ch'án

ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

*Jnkokoáhya tsjenkayáxin chojni kixin ó kui Ìnchéni Jesús
(Mt. 10.34-36)*

⁴⁹ Janhan k'uinka kixin sintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá naxa náhi. ⁵⁰ T'ichjánxin nchónhya tsona tsjasótena. Tóxakonna tsoxiteyáxia kaín tíha. ⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xikaha. ⁵² Kixin ijie xrankixín in'ó chojni naxa kjéhya jnkokoáhya tsjenkayáxin sín. Tí iní tsonínkakohen tí yaá. Tí yaá tsonínkakohen tí iní. ⁵³ A ntá tí it'é tsonínkakohen tí xjeen ntoa, la ko tí xjeen ntoa tsonínkakohen tí it'é. A ntá tí iné tsonínkakohen tí xjeen chjin, la ko tí xjeen chjin tsonínkakohen tí iné. Tí ich'ee tsonínkakohen tí tíkíntee la ko tí tíkíntee tsonínkakohen tí ich'ee tjan.

*Tí nkehe chronkaxín nkehe tsonhen
(Mt. 16.1-4; Mr. 8.11-13)*

⁵⁴ Ch'ín Jesús kjaxin ntáche ch'án tí chojni síin kixin:

—A ntá ts'ikonrá ts'àya tjuí tí tjiatóxin yaon, a ntá ntáchrórá kixin ts'aniá chrin, a ntá xikaha chaxín tsonhen ts'aniá chrin. ⁵⁵ A ntá tí chjéhe xrínto nó sur ntá ntáchrórá kixin tsosóa, a ntá xikaha chaxín tsosóa. ⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajní la ko chjasintajni. ¿Ntá nkexrí naxa tiénxinhyará nkehe sítónhen tí tjejorá jie?

*Chrókóxakohenni kjuaxróxin chrók'uejókoni tí sín nínkakohenni
(Mt. 5.25-26)*

⁵⁷ ¿Nkekuènte tjéyáhyará jahará nkehe tí jína? ⁵⁸ Tí jnkojín nkexro tsjanchia jie sátjikoará ch'án nkayakon tí sín t'etoan na tí ntia ó chrónkajórá ch'án kixin tsoyóxin ts'ixinhya kjuanínkaon kixin sátsjikoahyará nkayakon tí ch'ín juez, kixin tí ch'ín juez chrók'ueñoan ch'án kixin sátsjikoará tí sín comandante. A ntá tí ch'ín comandante chróchr'áxanhanrá ch'án ntoechiso. ⁵⁹ Ntáxrjan kjá ní chrók'uaxrjéxinhyará ntiha tsjenkajiará kaín xín chichaon chonta.

13

T'ichjánxin chrókjuinkí chojni tí nkehe tjenkayáxin sín

¹ A ntá tí yaon k'uejó iso sín chénka sín tí ch'ín Jesús kixin nkexrí kjuích'e ch'ín Pilato k'ueñoan its'en iso chojni tsíkjiñin estado Galilea k'uitji ijnié sín kójnkojéko tí ijnié tí ko k'óyán sín kjuanchexín sín kjuasáyé Dios. ² A ntá kjuátehe ch'ín Jesús ntáchró ch'án kixin:

—¿Á tjenkayáxinrá kixin xikaha kónhen tí sín tsíkjiñin estado Galilea kixin antsí jie jie chóna sín, a ntá tí í so sín chjasén sín la á náhi ní? ³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin. ⁴ ¿Á tjenkayáxinrá kixin antsí má k'uéchóna jie tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhi ní? ⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha ts'itjáyanrá kjaxin.

Ch'ín Jesús kjuíncheyóexin ch'án éxi jnko nta to higo t'ónahya to

⁶ A ntá ch'ín Jesús kjuíncheyóexin ch'án ntáchró ch'án kixin:

—Ijnko chojni chóna jnko nta to higo nóntee ch'án. Ntá sákjuítsjehe ch'án á k'óna to. A ntá náhi k'uitjahya ch'án ninkehó to. ⁷ Ntá ntáche ch'án tí

nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjáhya ninkehó to higo. T'ochrínjian tí nta kixin tsoxéhe tí nonte a.” ⁸ A ntá tí ch'ín t'ayakonhen nonte kjuátehe ch'án ntáchro ch'án kixin: “Áxri, títóhé ijie nánó kixin sántantá nche la ko tsjiko nchekatjehe. ⁹ A ntá tí xikaha ách'e ts'óna to. A ntá tí náhi na ntá ts'ochrínjian chr'éxin.”

Ch'ín Jesús kjuínchekitohe jína ijnko tjan níhi tí yaon t'ok'éhe chojni

¹⁰ Ch'ín Jesús kjuák'e ch'án ijnko nínko kjuakoxin ch'án ijnko yaon t'ok'éhe chojni. ¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan. ¹² A ntá ch'ín Jesús k'uíkon ch'án kixin xikaha tjan tjan ntá k'uíyehé ch'án tjan ntáchro ch'án kixin:

—Naná, ó kjuínhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxín xrentoá tjan ntá chjéhe tjan kjuasáyé Dios. ¹⁴ A ntá tí ch'ín t'etōan kuènte nínko kónínkaon ch'án kixin ch'ín Jesús kjuínchekitohe jína ijnko chojni ijnko yaon t'ok'éhe sín, ntá ntáche ch'án tí chojni a kixin:

—Sín injon yaon mé chrókónhen xra chrók'uinkará chrókuitōhará jína na jehya tí yaon t'ok'éheni chrókónhen tíha —ichro ch'án.

¹⁵ A ntá Ìnchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintānkeehyará tí koxintāarā la o tí kolóchoarā chrókjuíkoarā va nta tí yaon t'ok'éheni ní? ¹⁶ A ntá tí tjan mé tsík'axrjeníxin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintānkā tí nkehe tsíkóntetoxín tjan tí yaon t'ok'éheni? —ichro ch'án.

¹⁷ Ntá xikaha ichro ch'ín Jesús la ntá kaín tí sín kónínkakonhen ch'án la kósuèhe sín. A ntá kaín tí chojni sín ntaha chéhe sín k'uíkon sín kaín tí kjuaxroan jié kjuakoxin tí jehe ch'án.

Kjuíncheyóexin ch'ín Jesús éxi ijnko tje ntsí kuènte nta mostaza

(Mt. 13.31-32; Mr. 4.30-32)

¹⁸ Ntá ntáchro ch'ín Jesús kixin:

—¿Nkehe tóyóexin tí t'etōan Dios tí kjuachaxin kuènte ch'án la ko nkehe jína chrókjuíntayóaxian? ¹⁹ Éxi yóhe ijnko tje kuènte nta mostaza k'uenkā ijnko chojni nontee ch'án. A ntá tíó k'uánkí kóyóhe éxi ijnko nta jié. A ntá tí koxroxé xritjaká mé kui va kjuích'éna va kaké va chrík'á tí chaon tí nta.

Ch'ín Jesús kjuíncheyóexin éxi tí xroan t'ánkíxin niotja

(Mt. 13.33)

²⁰ Ntá ntáchro ch'ín Jesús inaá kixin:

—¿Nkehe chrokjuíntayóaxian tí t'etōan Dios tí kjuachaxin kuènte ch'án?

²¹ Éxi yóhe tí xroan nchek'ánkí niotja kjuinkíjjanxin ijnko chojni chjin iní medida harina. A ntá tí ch'o la k'uánkí.

Tí puerta tekahya

(Mt. 7.13-14, 21-23)

²² K'uátsínka ch'ín Jesús kaín chjasin hyé la ko kaín chjasin ntsínsí nkákjako ch'án tí tan jína kixin jehe ch'án ó sátsji ch'án chjasin Jerusalén. ²³ A ntá ijnko nkexro kjuanchankí ch'án kixin:

—Ìnchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

²⁴ —Tóxakonhanrá t'ixeenxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. ²⁵ A ntá tí ìnché nchia ts'ikjéhe

ch'án tí puerta. **A** ntá chr'éxin jahará ts'ejorá ntója ts'èyará ts'inkará tí puerta tsontáchrórá kixin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchró ch'án kixin: “Nonahya nketí k'uinkaxínrá jahará”, tsixro ch'án. ²⁶ **A** ntá tsjankíxinrá tsontáchrórá kixin: “Kjóneni la ko k'uíni jnkokoá la ko jaha kjuákoxian tí ntájinni”, tsixrorá. ²⁷ **A** ntá jehe ch'án tsjatehe ch'án tsontáchró ch'án kixin: “Ó ntáxrjan janhan kixin chonhya tí jahará. Títohérá tí janhan sájtirá ókjé kaín tí jahará jínahya kjuich'erá.” ²⁸ Ntaha tsotsjankará la ko sintetaónrá nénorá tíó ts'ikonrá kixin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etóan ch'án, **a** ntá jahará la ts'axrjéxinrá ntója ntiha. ²⁹ Tsjixín chojni nó tjítoxin yaon la ko nó tjíátóxin yaon la ko nó norte la ko nó sur ntá ts'ejótjaxín sín tí tjen Dios t'etóan ch'án la sine sín. ³⁰ **A** ntá iso tí sín k'uítuenhen senó la mé ts'etóan sín, la ko iso tí sín k'uék'etóan senó la mé ts'ítuenhen sín.

T'ává ch'ín Jesús

(Mt. 23.37-39)

³¹ **A** ntá tí yaon a ikui iso sín fariseo ntáche sín tí ch'ín Jesús kixin:
—Sátjixian ntihi kixin ch'ín Herodes tjinkaon chrók'óyan ch'án tí jaha —ichro sín.

³² **A** ntá jehe ch'án kjuátehe ch'án ntáchró ch'án kixin:
—Sátjirá chenkará tí ch'ín jínahya ch'ia kixin: “Ijie la ko ntóye tsakítsje nchakuen tí jínahya la ko sintakítóha chojni níhi jína la ntá tí níxin yaon a ntá tsjixínna tí xrá kuéntana,” tsixrorá. ³³ Kjánchó t'ichjánxin kixin naxá sátjiya tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uenxín ch'án chjasin Jerusalén.

³⁴ 'Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítará. Imá itsje veces tjínkavan chrókójnksérá la chrók'uáyakonhanrá éxí ijnko cochíká mé t'ayakonhen xjeen va chrínkí kanenee va mé xíkaha tjínkavan chrók'uáyakonhanrá tí jahará. Kjánchó jahará la tjínkákonhyará xíkaha. ³⁵ Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakájia tí yaon tsontáchrórá kixin: “Jína tí nkexro kjuixín kjuachaxin ihnié Inchéni Dios.”

14

Ch'ín Jesús kjuínchekítóhe jína ijnko nkexro tsík'atjoyé kuenté

¹ **A** ntá tí yaon t'ok'éhe sín sákjuí ch'ín Jesús ntoe ijnko ch'ín fariseo t'etóan kixin ntaha sineko sín ch'án. **A** ntá tí í so sín fariseo tinkáchréhe sín tsotsjehe sín nkehe sich'e ch'án. ² **A** ntá ntiha ntoí chók'èxin tí tjen ch'án itjen ijnko chojni tsík'atjoyé kuenté. ³ **A** ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿**A** síin kjuachaxin sinchekítóheni jína ijnko chojni níhi tí yaon t'ok'éheni o náhi? —ichro ch'án.

⁴ **A** ntá jehe sín la tání sín. **A** ntá ch'ín Jesús sákjuíko ch'án tí ch'ín níhi la kjuínchekítóhe ch'án jína la k'uétuenhen ch'án kixin sátsji ch'án. ⁵ **A** ntá ntáche ch'án tí sín fariseo kixin:

—Jnkójín tí jahará chontará kolóchoará o koxintaará chrókjuítsínkáya va tòye ¿á senóhya chrókuakítsjetaónrá va tòye kjónté yaon t'ok'éheni ní? —ichro ch'án.

⁶ **A** ntá jehe sín ninkehó kjuáteehya sín kixin xíkaha ichro ch'án.

Tí sín tsík'iyehé sín sátsji sín kia tsíkótehe chojni

⁷ Ntá k'uíkon ch'ín Jesús kixin tí sín tsíkóchjina tí kia a kjueyá sín silla náxrjón ts'ejóya sín tí tjen mesa ntá kjuíncheyóexin ch'án ntáchró ch'án kixin:

8 —Tió jnkojín nkexro ts'iyaha sín kixin tsjasán ijnko kia tsotehe chojni la tjeýahya tí nta silla kuènte tí sín t'etoan kixin ách'e tsi jnkojín nkexro antsí t'etoan ⁹ a ntá tí nkexro k'uíyahará yóirá itsi ch'án tsjanchará ch'án kixin t'inkátjenxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsošuaha sátsjia tsjak'etjaxian tí silla kjuixixín. ¹⁰ Íchá jína tió t'iyaha sín chrókjuak'etjaxian tí silla tjetuanhya, kixin ntá chrókui tí ch'ín tsík'iyaha tsontáchro ch'án kixin: “Jína tjoni la t'atsínka tjak'etjaxian tí silla antsí náxrjón”, kixin ntaha tsjikosáyaha sín nkayakon kaín tí sín ts'ejótjaxinkoa sín ntiha. ¹¹ Kixin tí nkexro sinchehnkehe asén kixin imá chrók'uetōan ch'án la mé chr'éxin Dios tsjanjonhya kjuachaxin kixin ts'etoan ch'án. A ntá tí nkexro k'uék'etōanhya la mé chr'éxin Dios tsjanjon kjuachaxin kixin antsí ts'etoan ch'án.

¹² Kjaxin ntáche ch'án tí nkexro tsík'iyehē ch'án kixin:

—Tió tsjásian kia it'ō yaon la o tsonjin la t'iyēehya tí sín choxian la ko tí sín kichuá la ko tí sín naxa kjéhya la ko tí sín rico chjino ntoa, kixin jehe sín la chr'éxin ts'iyaha sín inaá la xikahó la ó kjuixin kjan tí k'uiyehé sín. ¹³ Íchá jína chrók'uiyehé tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya. ¹⁴ Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkĩtsa tí jehe sín.

Ch'ín Jesús kjuíncheyóexin ch'án éxí ijnko kia jié

¹⁵ A ntá kuínhin ijnko tí sín tjejótjaxin sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niotja tí tjen Dios t'etoan ch'án —ichro ch'án.

¹⁶ Ntá ntáchro ch'ín Jesús kixin:

—Ijnko chojni kjuasin ijnko kia jié ijnko kónjin la k'uiyehē ch'án nchónhya chojni tsi sín tí kia a. ¹⁷ A ntá ó kuichjina tí hora sine sín ntá k'uetuenhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyehē ch'án kixin chrókóchjina sín kixin ó tjejóchónhen kaín nkehe sine sín. ¹⁸ Ntá kaín sín kjuankixin sín chrónòla sín kixin xitjahya tsjiji sín sine sín. A ntá tí ch'ín saoxín kjuítsjehe ch'án ntáchro ch'án kixin: “Na ntá k'uenani ijnko nontēni la t'ichjánxin tsjitsjeheni la xitjahya tsjijini tí t'iyeheni ch'án, ntá chénka ch'án kixin chrókónínkakuenhyani ch'án”, ichro ch'án. ¹⁹ A ntá í jnko ch'ín ntáchro ch'án kixin: “Na ntá k'uenani in'ó yunta koxinta, a ntá t'ichjánxin tsotsjeheni á jína ch'e va xra, ntá chénka ch'án kixin chrókónínkakuenhyani ch'án”, ichro ch'án. ²⁰ A ntá í jnko ch'ín ntáchro kixin: “Na ntá kóteheni, méxra xitjahya tsjijini”, ichro ch'án. ²¹ Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintáchro sín. A ntá tí ch'ín lámo kuínhin ch'án xikaha la ntá kónínkaon ch'án ntá ntáche ch'án tí ch'ín ch'ehe ch'án xra kixin: “Tjoka sátsjia kaín ntja chjasin i la tsjikoa ntihi tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya”, ichro ch'án. ²² A ntá chr'éxin ntá kjan tí ch'ín ch'e xra chénka ch'án tí lámo kixin: “Ó kjuínchexiteyáni xikaha kuétuenhéni la kjónté naxa xranka chrókui chojni”, ichro ch'án. ²³ A ntá tí ch'ín lámo ntáche ch'án tí ch'ín ch'ehe ch'án xra kixin: “Sátsjia kaín ntja jié la ko kaín ntja ntsí la tétuenhén chojni siín chrókui sín chrók'uiixixenhen nchia ntona naxa xranka. ²⁴ Kixin ntáxrjan kixin nijnko tí sín k'uiyaha senó chrókui sín chrókjone sín tí nkehe chrótjaha sín”, ichro ch'án.

Ixra tsochréheni Cristo

²⁵ Nchónhya chojni nkáchréhe sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kixin:

26 —A ntá jnkojín chojni tsotjinkaon tsochréhe tí janhan la antsí má tjetooan chrótuana sín la kjónté kénhyó chrótuéhe it'é sín la ko iné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótuéhe asén sín. A ntá náhí la xitjahya ts'óna discípulo kuéntana jehe sín. 27 Tí nkexro tsamáhya tí ntacruz kuente sín tsochrèhya sín tí janhan la xitjahya ts'óna discípulo kuéntana. 28 A ntá jnkojín tí jahará chrókjuich'énará ijnko tjat'o nteto, ¿á senóhya chrókjuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchoxon chrókjuixixín chrók'ónaxín tí tjat'o a? 29 A ntá tió tsjankíxinrá sich'énará tí tjat'o ntá chr'éxin xitjahya tsjixin sich'énará, ntá kaín chojni ts'ikon sín tsjanoará sín 30 tsontáchro sín kixin jaha kjuankíxian kjuich'éna, a ntá jie xitjahya sinchekjixian ts'óna, tsixro sín. 31 A ntá jnkojín tí ch'ín rey t'etoan tsjanjonko í jnko rey t'etoan kjaxin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuachaxin ch'án tí kán mil soldado chóna tí í jnko ch'ín t'etoan. 32 A ntá ti chrókjuachahya ch'án chrókjuanjonko ch'án tí í jnko ch'ín rey, ntá naxa ikjín tjen ch'án la íchá jína chróchr'án ch'án ijnko nkexro tsochronóehe ch'án kixin chrók'uixinhya kjuanínkaon. 33 Mé xikaha jnkojín tí jahará tí tsítóéhyará kaín nkehe ntoáhya tjenkayáxinrá xitjahya ts'óna discípulo kuéntana.

*Tí xijnta tsík'ánkéhe tí jní
(Mt. 5.13; Mr. 9.50)*

34 A ntá jína tí xijnta, kjánchó tí chrók'uánkéhe tí jní la ntá xitjahya chrókójní inaá. 35 Ntá tí xikaha la ni tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'ín Jesús.

15

*Kjuíncheyóexin ch'ín Jesús éxi ijnko kolélo tsik'itjáyán
(Mt. 18.10-14)*

1 Kaín tí sín nchekjènkí la ko tí sín chóna nchónhya jie kóchjinehe sín tí ch'ín Jesús kixin tjinkaon sín chrókuinhin sín tí nkehe tjechronka ch'án. 2 A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'ín i la kjónté tí sín chóna nchónhya jie la t'ito ch'án la ko neko ch'án —ichro sín.

3 Ntá ch'ín Jesús kjuíncheyóexin ch'án ntáchro ch'án kixin:

4 —A ntá jnkojín tí jahará, tí chontará ijnko ciento kolélo ntá chrók'uitjáyán ijnko va, ¿á chrókjuítóéhyará tí noventa y nueve va tí nteje ó, a ntá á chrókjuíkjayáhyará tí ko tsík'itjáyán hasta chrók'uitjájíará va ní? 5 A ntá tí ts'itjájíará va ntá tsamará va tsocháhará. 6 Ntá tió tsokjanrá ntóará ntá ts'iyehérá kaín tí sín choxinrá tjóra jína la ko tí sín chjinaxón ntóará ntá tsontácherá sín kixin: “Tsochéheni ts'ejóni jie kixin ó k'uitjá tí kolélo tsík'itjáyán.” 7 Na mé kjaxin xikaha tsotjonkará kixin antsí tsochéhe kaín tí sín siín nkaya nkajní tió ijnko chojni tsítóhe kaín tí jie tsíkjenkayáxin ch'án. Ntá kánhyó tsochéxin tí sín nkaya nkajní kixin tí noventa y nueve chojni jína t'ichjánxienhya chrókjuinkí sín tí nkehe tjenkayáxin sín.

Kjuíncheyóexin ch'án éxi chichaon k'uitjáyán

8 A ntá ijnko chojni chjin chóna ite chichaon, a ntá tí chrókjuinçek'itjáyán tjan ijnko tí chichaon a la, ¿á chrókjuinçek'ákjenhya tjan xrohi kixin chrókjuéyáxin tjan la ko chrok'uánjón tjan tí nchia kixin chrótsjehe tjan jína hasta chrók'uitjajia tjan? 9 A ntá tió chrók'uitja tjan la ts'iyehé tjan kaín tí chojni chjin jína tjo tjan la ko tí sín chjinaxón ntóe tjan la ntá tsontáche tjan

sín kixin: “Tsochéheni ts'ejóni kixin ó k'uitjani tí chichaon kjuínchek'itjáyani.”
¹⁰ Ntá kjaxin xikaha tsotjonkará kixin imá tsochéhe kaín tí sín ángel kuènte Dios tió ijnko chojni tsítóhe kaín tí jie tsíkjenkayáxin ch'án.

Ch'ín Jesús kjuíncheyóexin ch'án éxí ijnko ch'ín kuicháxinhin chichaon

¹¹ Kjaxin ntáchro ch'ín Jesús kixin:

—Ijnko nkexro chóna yaá xjeen ch'án. ¹² A ntá tí ch'ín tsoyo ntáche ch'án tí it'é ch'án kixin: “It'éni, chjehéni kaín nkehe chróchjehéni.” A ntá tí it'é sín k'óchrít'óhe ch'án tí nkehe chóna ch'án. A ntá tí ch'ín tsoyo k'uáyéhe tí nkehe kuènte ch'án. ¹³ A ntá kánhyó tsjé yaon chr'éxin tí xjeen ch'án tsoyo kjuínchekji ch'án kaín nkehe tsík'áyéhe ch'án, ntá sákjuíko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kaín chichaon chóna ch'án kixin jehya tí jína kjuích'e ch'án. ¹⁴ A ntá tió kjuixin kjuèhe ch'án tí chichaon kuicháxinhin ch'án ntá xrínahya kókjinta tí chjasin ntiha ntá kohya nkehe sine kaín sín. A ntá jehe ch'án kjuankixin ch'án t'énxín ch'án kjinta. ¹⁵ Ntá jehe ch'án sákjuíkjejá ch'án xra sich'e ch'án. Ntá chjasin ntaha tjen ijnko ch'ín kjuanchehe ch'án xra. Ntá tí ch'ín a kjuanjon ch'án xra ntá k'uetóan ch'án kixin sátsji ch'án nontee ch'án kixin ntiha ts'ayakonhen ch'án cochíno. ¹⁶ A ntá jehe ch'án t'énxín ch'án kjinta ntá tjinkaon ch'án chrókjóne ch'án tí nkehe ine tí cochíno kixin ninkexró tí ntiha chrohya tsjanjon nkehe sine ch'án. ¹⁷ Ntá jehe ch'án kjuák'e ch'án kjuenkayáxin ch'án kixin: “Nchónhya chojni siín ntóe t'aná ch'e sín xra la chóna sín nkehe sine sín. Ntá janhan tjét'énxian kjinta ntihi. ¹⁸ Ntá jie tsokjan tí tjen t'aná la ntá tsontáxrjan kixin: It'éni, kjuasinni jie kuítékakuenhya It'éni nkaya nkajní la ko kjuasinhanni jie kuítékakuanhyani tí jaha. ¹⁹ Tósuèheni tsontáchrúa kixin xjaan tí jeheni. Ch'énani éxí ijnko chojni t'aha xra”, mé xikaha kjuenkayáxin ch'án tsontáchrú ch'án. ²⁰ Ntá kuákja ch'án ntia xrakoa ch'án tí ntóe it'é ch'án.

A ntá kjónté naxa kjín kui ch'án a ntá tí it'é ch'án la ó tsík'ikon ntá kuikonóhe ch'án tí xjeen ch'án. Ntá kuinká ch'án la kjuíxinhin ch'án ntia la kjóa ch'án la ko kjóneko ch'án kochító. ²¹ Na ntá ntáchrú tí xjeen kixin: “It'éni kjuasinni jie kuítékakuenhyani Dios la ko kjuasinhanni jie kuítékakuanhyani tí jaha. Tósuèheni tsontáchrúa kixin xjaan tí jeheni”, ichro ch'án. ²² A ntá tí it'é ch'án k'uíyehé ch'án tí sín ch'ehe ch'án xra ntáchrú ch'án kixin: “Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án totjoa. ²³ La ko tjicakjínrá koxintáxjan tsanká la t'oyánrá va kixin sinekoni ch'án tsjasinhinni ch'án kia. ²⁴ Kixin tí xjanna i la éxí ó tsík'en ch'án xikaha ntá jie la éxí ó xechón ch'án la tsík'itjáyan ch'án la ntá jie la ó kónoxín ch'án inaá”, ichro ch'án. Ntá kjuankixin sín kjuasin sín kia.

²⁵ A ntá tí xjeen ch'án sao la nonte tjech'e ch'án xra. A ntá tió kjan ch'án kui ch'án chjinaxón nchia ntá kuínhin ch'án siín són la ko ité sín. ²⁶ Ntá k'uíyehé ch'án ijnko ch'ín ch'e xra ntá kjuanchankíhi ch'án kixin nkekuènte xikaha sítónhen. ²⁷ A ntá tí ch'ín a ntáchrú ch'án kixin: “Kíchuá la ó tsíkjan. A ntá it'á la k'uetóan k'uén koxintáxjan tsanká kixin jína xíkjan ch'án”, ichro ch'án. ²⁸ A ntá tí ch'ín sao la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóehé ch'án kixin chrók'uixenhen nchia. ²⁹ Kjánchó jehe ch'án kjuátehe ch'án ntáche ch'án it'é ch'án kixin: “Nchónhya nánó t'ahani xra, la xráxín kuítékakonhanni kaín nkehe kuétoan la kjuánjonhya nijnko kotentsó chrókjónekoni tí sín chóxinni. ³⁰ A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naxa t'oyán koxintáxjan tsanká”, ichro ch'án. ³¹ A ntá ntáchrú tí it'é ch'án kixin: “Xjeenni jaha, xráxín tjejóko

kíchó ni ntihi. Kaínxín nkehe kuèntana la kuènta jaha kjaxin. ¿Nkekuènte ninkávan? ³² A ntá jie la t'ichjánxin tsjasinhinni kichuá kia tsochéheni kixin éxí tsík'en ch'án la ntá jie la ó tsíxechón, la tsík'itjáyán ch'án xíkaha la ntá jie la kónoxín ch'án inaá.”

16

Ch'ín Jesús kjuíncheyóexin ch'án éxí tí ch'ín k'uáyéhe xra la ntá kjuích'ehya xra jína

¹ Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etōan tsonhen xra. Ntá kui ijnko nkexro chénka tí lamó kixin: “Tí nkexro t'etōan nchexénhen ch'án tí nkehe chonta”, ichro ch'án. ² A ntá tí ch'ín lamó k'uíyēhe ch'án tí ch'ín ch'ehe ch'án xra ntáche ch'án kixin: “¿Á chaxín xíkaha ch'e kixin xíkaha ichro sín? A ntá jie tsjánjuan jaha kuentá tí xra kjuích'e kixin ijie í sich'ehya xra tsétōan ntihi”, ichro ch'án. ³ A ntá tí ch'ín t'etōan tónhen xra kjuenkayáxin ch'án kixin: “¿Nkehe chrókjuít'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nontee chojni la ko tósuana kixin chrók'uájia chrókjuánchák'á nkehe. ⁴ Ó nòna nkehe sít'a kixin ntá tsochonta nkexro tsjanjon kjuachaxin tsjak'é ntōe sín tí í tsochontahya xra sít'a”, ichro tí ch'ín t'etōan. ⁵ Ntá k'uíyēhe ch'án jnkojnko jnkojnko tí sín síkéhe tí lámōe ch'án. A ntá tí ch'ín saò kui ntá tí ch'ín t'etōan mé kjuanchankíhi ch'án kixin: “¿Nkekjaín tjasikéhé lámōeni?” ichro ch'án. ⁶ A ntá jehe ch'án kjuátēhe ch'án ntáchro ch'án kixin: “Síkani ijnko ciento ntabarril aceite”, ichro ch'án. A ntá tí ch'ín t'etōan ntáchro ch'án kixin: “Ntihi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án. ⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjásiká?” ichro ch'án. Ntá ntáchro ch'án kixin: “Ijnko ciento medida noatrigo síkani”, ichro ch'án. A ntá ntáchro tí ch'ín t'etōan kixin: “Tí xíkaha la ntihi tjen tí xroon tsjénkaxian. A ntá jie la ch'éna ochenta ó”, ichro ch'án. ⁸ A ntá tí ch'ín lamó kjuátsoan ch'án kixin kjónté jehya xra jína kjuích'e tí ch'ín t'etōan kjuích'ehe ch'án xra la kjánchó tí kjuích'ia ch'án la antsí nohe ch'án kjuích'ia ch'án. Méxra tí sín chjasintajni antsí nohe sín ch'iyēhe kíchó sín, a ntá tí sín ixri tí t'inkaséyan la xíkaha chrókjuenkayáxin sín chrókjuích'ia sín, chrókjuenkayáxin sín tí jína.

⁹ Janhan la tétuanhanrá kixin chrókuicháxinhanrá tí chichaon siín chjasintajni kjónté tjuáhya kixin tsjínkitsará chojni kixin ntá itsjórá sín jína. A ntá tíó tsjeje kaín chichaon ntá jehe sín ts'ejóchónhen sín nkaya nkajní ts'áyáhará sín jnkochrín.

¹⁰ Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án. ¹¹ Mé xíkaha tí xitjahya t'ayakonhénrá tí chichaon kuènte chjasintajni ntihó la, ¿ntá nkexrí chrók'uayéherá nkehe tjete chaxín kuènte nkaya nkajní? ¹² Mé xíkaha tí kjuachahyará k'uáyakonhénrá tí chichaon kuènte ókjé nkexro, ¿ntá nkexro chrótjáhará jahará tí nkehe chaxín tjete chrók'uáyakonhénrá?

¹³ Nijnko nkexro xitjahya sich'ehe yaá lamó xra kixin ijnko la tsonínkakonhen ch'án la ko tí í jnko tsotjuēhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuích'ehe chojni xra Dios tí tjinkaon sín tsochóna sín itsjé chichaon —ichro ch'án.

¹⁴ A ntá tí sín fariseo imá kóxrjínhjn sín chichaon, ntá kuínhin sín kaín tíha nkerí ichro ch'ín Jesús, ntá kjuanoá sín ch'án. ¹⁵ Na ntá ch'ín Jesús ntáche ch'án sín kixin:

—A ntá jahará tjinkáonrá chrók'uejóxinrá jína nkayakon chojni. A ntá Dios la chóxin ch'án asánrá. A ntá tí nkehe imá tóxrjínhjn ch'e chojni la Dios la tóxrjénhya ch'án.

Tí ley la ko tí t'etoan Dios tí kjuachaxin kuènte ch'án

¹⁶ Naxa kjuakohya ch'ín Juan la k'uékjako sín tí ley kuènte ch'ín Moisés la ko tí nkehe k'uékjin tí sín k'uéchronka itén Dios ósé. A ntá kui ch'ín Juan la chrónka ch'án tí tan jína nkexrí ts'etoan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etoan ch'án.

¹⁷ Antsí xrahya chrók'uitjáyan tí nkehe siín nkajní la ko chjasintajni. A ntá xitjahya kixin chróxiteyáhya kjónté ijnko nkehe ntsí t'etoan tí ley.

*Ch'ín Jesús tjako ch'án kixin chrókjuákēhya kichó chojni
(Mt. 19.1-12; Mr. 10.1-12)*

¹⁸ A ntá ijnko chojni tsjakehe ichjién la ntá tsakja ch'án í jnko chojni chjin la ijie tíha. A ntá tí ch'ín tsakja ijnko tjan tsíkítsinkehe la kjaxin ijie tíha.

Tí ch'ín rico la ko tí ch'ín Lázaro

¹⁹ Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia. ²⁰ A ntá ntója ntøe ch'án kjuák'etjaxin ijnko ch'ín nòa mé it'in ch'án Lázaro tjanchak'á ch'án la ko níhi ch'án tsichr'enka kuenté ntøe ch'án. ²¹ A ntá tí ch'ín nòa la imá kjuak'e asén ch'án chrókjóne ch'án la ko chrókókjeexín ch'án tí nkehe tot'o tsjixènjinkixin mesa kuènte tí ch'ín rico. A ntá tí konia la kjuamá va tí tosóa chóna ch'án. ²² A ntá ijnko yaon mé ik'uén tí ch'ín nòa. A ntá tí sín ángel mé sákjuiko ch'án tí náxrjón tjen ch'ín Abraham. La ko kjaxin ik'uén tí ch'ín k'uéríko la sákjuíkjavá sín ch'án. ²³ Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uíkon ch'án kixin ikjín náxrjón tjen ch'ín Abraham tjeko ch'án tí ch'ín Lázaro. ²⁴ Ntá k'uèya tí ch'ín k'uéchóna tsjé nkehe ntáchro ch'án kixin: “It'eni Abraham, tikonóana tétuènhén tí ch'ín Lázaro kixin sinchekjataxín ch'án kóhe dedo tja ch'án inta ntá tsi ch'án tsjak'etak'á ch'án nejèn kixin tsoxruehe kixin tjinhya sóa tí xrohi siín ntihi”, ichro ch'án. ²⁵ Kjánchó ntáchro ch'ín Abraham kixin: “Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uáyéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe. ²⁶ A ntá kjaxin jnkosiné tjen tsaka imá jié xitjahya ts'átòye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átòye sín itsji sín ntihi”, mé ichro ch'ín Abraham. ²⁷ A ntá tí ch'ín k'uéríko mé ntáchro ch'án kixin: “Ntá xrjanóaha jaha It'eni Abraham kixin tétuènhén tí ch'ín Lázaro sátsji ch'án ntøe t'aná ²⁸ kixin ntaha kuítóhe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhya ntihi”, mé ichro ch'án. ²⁹ Kjánchó kjuátehe ch'ín Abraham ntáchro ch'án kixin: “Ó chóna sín tí nkehe tsíkjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsíntáchro tí sín a”, ichro ch'án. ³⁰ Ntá ntáchro tí ch'ín a inaá kixin: “Náhi, It'eni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókuítóhe sín ijie sín”, ichro ch'án. ³¹ Ntá ntáchro ch'ín Abraham kixin: “Tí tsitekakonhya sín tí nkehe tsíntáchro ch'ín Moisés la ko tí nkehe tsíntáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka inaá”, ichro ch'án.

17

Tí kjuaxikaon naxa tjasin chojni jie
(Mt. 18.6-7, 21-22; Mr. 9.42)

¹ Ch'ín Jesús ntáche ch'án tí sín k'uájiko ch'án kixin:

—Xrácín siín nkehe tsjasixín chojni jie. Kjánchó nòà tí nkexro tjasin tí nkehe tsjasixín chojni jie. ² Íchá jína chrókjuincheteyá sín ch'án ijnko xro tsík'óna xrochre chrókjuikákánkí sín ntayaon kixin tjasin ch'án tí nkehe tjasixín jie ijnko chánjan naxa noehya. ³ Tóxakonhanrá kixin xikahya chrókjuásinrá nkehe.

'A ntá tí kichuárá chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jína tí xikaha kjuít'ahará ch'án. A ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjáyahanrá tí nkehe kjuít'ahará ch'án. ⁴ Kjonté chrókjuasinhanrá ch'án jie yato veces jnkokoá yaon la ko yato veces chróntáchro ch'án kixin í xikahya tsjasin ch'án jie inaá, la t'ichjánxin ts'itjáyahanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kixin tinkáchónkini Cristo

⁵ Ijnko yaon tí sín k'uájiko Ìnchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

⁶ A ntá Ìnchéni ntáchro ch'án kixin:

—Kjonté intsí chrókuinkáchónkirá tí janhan éxí jiéxin ijnko tje ntsí kuènte nta mostaza la jína chrókuétuènhénrá tí nta sicómoro kixin chrók'uaxrjenkixin tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókjuinchexiteyá tí xikaha chróntáchrorá.

Nkexrí chrókjuinchexiteyá tí nkexro ch'e xra

⁷ 'Jnkojín tí jahará tí chróchontará ijnko nkexro t'ahará xra, a ntá tí chrókjanxin ch'án nontaará kjuínchenta ch'án nche o k'uàyakonhen ch'án tí ko kuèntará, ¿á chróntácherá ch'án kixin senó chrókjuak'e ch'án chrókjóné ch'án?

⁸ Kjá náhí. Kjá chrókuétuènhénrá ch'án kixin senó chrókjuinchechján ch'án tí nkehe sinte la ko chrókóyaxínhin ch'án kixin tsjanjon ch'án nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'án sine ch'án la ko its'i ch'án. ⁹ ¿Á chrókjuancheherá ch'án kjuasáya kixin kjuínchexiteyá ch'án tí nkehe kuétuènhénrá ch'án? Kjá náhí. ¹⁰ Mé kjaxin xikaha tí jahará tió chrókjuixin kaín tí xra k'uetuanhanrá Dios chróntáchrohýará kixin jína kjuich'erá xra kixin ó jehó tí nkehe k'uítuanhanrá kjuínchexiteyará, tsixrorá.

Ch'ín Jesús kjuínchekitohe ch'án jína ite chojni chóna chinlepra

¹¹ Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea. ¹² Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín ¹³ ntá itsen k'uíyehé sín ch'án ntáchro sín kixin:

—Jesús, Maestro, tikonóhéni kaín ni —ichro sín.

¹⁴ Ntá k'uíkon ch'ín Jesús tí jehe sín ikjín tjejó sín ntáche ch'án sín kixin:

—Sátsjirá tjácohérá tí sín nchat'á kixin ó kuítóhará jína, ichrorá.

Nachrohe sákjuí sín tinkákitóhe sín jína. ¹⁵ Ntá ijnko tí jehe sín tió kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án. ¹⁶ Kjuák'exín toch'ín ch'án chrínkí toté ch'ín Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'ín a mé tsíkjin ch'án estado Samaria. ¹⁷ A ntá ch'ín Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina? ¹⁸ ¿Á jehó tí ch'ín i kjónté ikjín tsíkjixín ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹ A ntá ntáche ch'án tí ch'ín a kixin:

—T'ínkatjen sátjia. Kixin tí kuítekáván Dios la kuítóha jína —ichro ch'án.

Itsi tí kjuachaxién Dios

(Mt. 24.23-28, 36-41)

²⁰ A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuènte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuènte Dios la me tíha ijnko nkehe xitjahya ts'ikon chojni. ²¹ Xitjahya tsontáchrórá kixin: “Ntihi tjen,” o “Ntiha tjen”; kixin tí kjuachaxin kuènte Dios itjen jnkosiné tí tjejórá —ichro ch'án.

²² Ntá ntáche ch'án tí sín k'uájiko ch'án kixin:

—A ntá itsi tí yaon tsojtjinkáonrá jnkójín yaon chrók'uikonrá tí Xjeen Dios K'óna Chojni, ntá í ts'ikonhyará ch'án. ²³ Tsontáchró sín kixin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín. ²⁴ Kixin éxí ts'ikonrá tsjonkixín ts'inkaséyanxín kuénté nkajní mé xikaha tsonhen tió itsi tí Xjeen Dios K'óna Chojni. ²⁵ T'ichjánxin senó tsjasóte ch'án nchónhya la ko tí sín siín jie tsitekakuenhya sín ch'án. ²⁶ Éxí kónhen tí yaon kjuák'e ch'ín Noé mé xikaha tsonhen tió tsokjan tí Xjeen Dios K'óna Chojni. ²⁷ K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uixenhen ch'ín Noé tí ntabárcq ntá k'uániá chrin, a ntá tí sín kuítóhe ntója la kaín sín k'uitjáyan sín.* ²⁸ Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enka sín nontee sín la ko k'uékjich'ena sín nchia. ²⁹ A ntá tí yaon k'uaxrjexín ch'ín Lot tí chjasin Sodoma, na mé nkajní kuixín xrohi la ko azufre, na mé tíha k'uénxín kaín xín tí sín ntiha.† ³⁰ Mé xikaha tsonhen tí yaon itsi tí Xjeen Dios K'óna Chojni.

³¹ A ntá tí yaon i tí tjejó jnkójín nkexro chrítaón nchia tjejót'ok'éhe sín, a ntá ichrén nkehe chóna sín kuítóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjuí sín ókjé. Kjaxin xikaha jnkójín chojni tjejó sín nontee sín la í chrókjanhya sín ntqe sín. ³² Xráxinkáonrá nkehe kónhen ichjién ch'ín Lot.‡ ³³ Tí nkexro tjinkaon kixin kohya nkehe chrókónhen na mé ts'itjáyan. A ntá tí nkexro chrókjuincheck'itjáyanxín asén kixin chróchronka itén Dios la mé tsaá. ³⁴ A ntá tsontáxrjan kixin tí tie a jnkokoá ts'ejóhua yaá chojni la ijnko la sátsji la ko tí í jnko la tsitqhe. ³⁵ Yaá chojni chjin its'o sín jnkokoá, la ijnko la sátsji la ko ijnko la tsitqhe. ³⁶ Yaá chojni ts'ejóch'e sín xra nonte, la ijnko la sátsji a ntá ijnko la tsitqhe —ichro ch'án.

³⁷ Ntá kuínhin sín tíha ntá kjuanchankíhi sín ch'án kixin:

—¿Xá nketí tsonhen tíha, Inchéni? —ichro sín.

A ntá jehe ch'án kjuátehe ch'án ntáchro ch'án kixin:

—Tí tjen tí cuerpo kuènte chojni tsík'en la mé ntiha tsojnkotsé tí kontexjuen —ichro ch'án.

18

Ch'ín Jesús kjuíncheyóexin ch'án éxí jnko tjan k'án la ko ijnko ch'ín juez

¹ A ntá ch'ín Jesús kjuíncheyóexin ch'án kjuákoxin ch'án kixin jnkochrínxín chrónixjehe chojni Dios la ko chrókóxrjéhya sín. ² Ntá ntáche ch'án sín kixin:

* **17:27** 17.26–27 Génesis 6.5–7.24 † **17:29** 17.28–29 Génesis 18.20–19.25 ‡ **17:32** Génesis 19.26

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró. ³ Kjaxin chjasin ntiha kjuák'e ijnko tjan k'án, jnkoyaxón sákjuítsjehe tjan tí ch'ín juez kjuanchia tjan jië ntáchro tjan kixin chrókuitoxín kixin ijnko chojni nínkakohen tjan ntiha. ⁴ Nchónhya veces tjítsjehe tjan tí ch'ín juez la chrohya ch'án chrókjuinchekitoxín ch'án. Ntá chr'éxin kjuenkayáxin ch'án ntáchro ch'án kixin: “Kjonté í tsjikosáyàhya Dios la ko ninkexró tsjikosáyàhya ⁵ a ntá tí tjan k'án jnkoyaxón tjanchia tjan jië, la tsjínkítsa tjan tsitoxín tí jië tjanchia tjan kixin í jnkoyaxónhya itsi tjan tsochronòa tjan kixin ó kjuixin kónínkavan jië”, ichro ch'án.

⁶ Ntá ntáchro Ìnchéni kixin:

—Mé xikaha ichro tí ch'ín juez jínahya. ⁷ ¿Xá chrókjuinkítsahya Dios tí sín kjueyá ch'án tí chróchronóehé sín ch'án nchakotjin la ko tie? ¿Á tjokahya chrókjuatehe chrókjuinkítsa sín ch'án? ⁸ Ntáxrjan kixin kjá tjoka chrókjuinkítsa sín ch'án. A ntá tió itsi tí Xjeen Dios K'óna Chojni, ¿á naxa chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxí ijnko ch'ín fariseo la ko ijnko ch'ín nchekjènkí

⁹ Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín kixin imá jína sín a ntá tí í so sín la náhí, ichro sín. Ntá ntáchro ch'án kixin:

¹⁰ —Iyó sín ntoa sákjuí nkaxenhen nínko kixin tsonixjehe sín Dios. Ijnko la fariseo la ko ijnko la ch'ín nchekjènkí. ¹¹ A ntá tí ch'ín fariseo tjexín ch'án toté ch'án nixjehe ch'án Dios ntáchro ch'án kixin: “It'éni Dios, kjuasáya tjàhá kixin jeheni la chóntahyani jië éxí tí sín í so kixin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxí tí ch'ín nchekjènkí tjinhin. ¹² Jeheni la nehyani iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án. ¹³ A ntá tí ch'ín nchekjènkí la imá kjín kuitohe ch'án kóxakonhen ch'án chrókonta ch'án nkajní la mé chjéhe ch'án ntakuin ch'án ntáchro ch'án kixin: “It'éni Dios tikonóehéni tí jeheni kixin nchónhya jië chóntani”, ichro ch'án. ¹⁴ Tjonkará kixin tí ch'ín nchekjènkí tió kjan ch'án ntøe ch'án la Dios kuikonóehé tí jehe ch'án la kjuínhin ch'án tí jië chóna ch'án, a ntá tí ch'ín fariseo la náhí. Kixin kaín chojni nchehnkehe asén kixin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

*Ch'ín Jesús kjuíncheyaon ch'án chánjan
(Mt. 19.13-15; Mr. 10.13-16)*

¹⁵ Kjaxin kjuíkao sín chánjan ntsíntí tí tjen ch'ín Jesús kixin chrókjuincheyaon ch'án xjan. Kjánchó tió k'uíkon tí sín k'uájiko ch'án la í kjuanjonhya sín kjuachaxin kixin tsochjinako sín xjan. ¹⁶ A ntá ch'ín Jesús k'uíyehé ch'án sín ntáchro ch'án kixin:

—Títóhérá chánjan méhe xrakoa tí tjèn janhan la t'ínkakuènyará xjan kixin tí sín kuènte kjuachaxin kuènte Dios la mé tóyóhe tí jehe xjan. ¹⁷ Ntá chaxín ntáxrjan kixin tí nkexro ts'ónahya éxí ijnko chánjan xitjahya ts'ejó sín tí ts'etøan Dios tí kjuachaxin kuènte ch'án.

*Ijnko ch'ín ntasoá ríco kjuínixjehe ch'án tí ch'ín Jesús
(Mt. 19.16-30; Mr. 10.17-31)*

¹⁸ Ijnko ch'ín t'etøan kuènte nínko kjuanchankíhi ch'án tí ch'ín Jesús kixin: —Jaha la ijnko maestro jína la, ¿nkehe naxa t'itjáyan chrókjuich'eni kixin chróchóntani kjuachón jnkochrín? —ichro ch'án.

¹⁹ Ntá kjuátehe ch'ín Jesús ntáchro ch'án kixin:

—¿Nkekuènte ntáchrua kixin jina tí janhan? Jnkokoá nkexro la mé jina la tíha mé Dios. ²⁰ Jaha la ó noha nkehe tí k'uetoan Dios kixin chrókjuacheéhya kichuárá, la ko chrók'oyánhya chojni, la ko chrókuèehya, la ko chróntáchrohya ninkehó nkehe chaxínhya kuènte ókjé chojni, la ko chrókjuíkosáyehé it'á la ko ìná —ichro ch'án.

²¹ A ntá jehe ch'án kjuátehe ch'án ntáchro ch'án kixin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kixin:

—A ntá jnkokoá nkehe naxa t'itjayan chrókjuich'e, chrókjuínchekjia kaín nkehe chonta la chróchjehé tí chichaon tí sín nòa. A ntá tí nkehe tjele la tsochonta nkaya nkajní. A ntá tió tsjixin sìnchekitonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xikaha la kóxakonhen ch'án kixin imá itsjé nkehe chóna ch'án. ²⁴ Tió k'uíkon ch'ín Jesús kixin kóxakonhen tí ch'ín a la ntá ntáchro ch'án kixin:

—Imá xra kixin tí chojni chóna itsjé nkehe chrók'uixenhen sín tí tjen Dios t'etoan. ²⁵ Antsí xrahya chrók'uatsínka ijnko kocamello ijnko tjar'i ntachica tjexrja, a ntá antsí má xra kixin ijnko chojni chóna itsjé nkehe chrókjuak'e tí t'etoan Dios —ichro ch'án.

²⁶ A ntá kuínhin sín kixin xikaha ntáchro ch'án ntá ntáchro sín kixin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kixin:

—Tí nkehe tsjachahya chojni chrókjuínchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kixin:

—Ìnchéni, jeheni la ó kuítóheni kaín nkehe chóntani kixin tsochréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Ntá chaxín tsotjonkará kixin jnkojínra chrókjuítóherá ntoa, la o chrókjuítóherá it'á la ko ìná, la o chrókjuítóherá kichuárá, la o chrókjuítóherá ichjiánra, la o chrókjuítóherá xjaanra kixin chrókjuich'era xra kuènte Dios ³⁰ la antsí nkehe ts'ayéherá ntihi chjasintajni la ko tí chr'éxin la ts'ayéherá kjuachón jnkochrín —ichro ch'án.

Ch'ín Jesús chrónka ch'án inaá kixin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uíyehé ch'án jehó tí teyó sín k'uájiko ch'án ntá chrónka ch'án kixin:

—Ijie sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni. ³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhin sín ch'án la ko ntate sín tsíkite sín ch'án. ³³ Tsjate sín ch'án, a ntá chr'éxin la ts'óyán sín ch'án. A ntá nixin yaon tsoxechón ch'án —ichro ch'án.

³⁴ A ntá jehe sín la ninkehó kienxínhya sín tí nkehe nixja ch'án kixin tíha ijnko nkehe naxa tsjachahya sín chrókienxín sín.

Ch'ín Jesús kjuínchekitohe ch'án jina ijnko chojni t'ikonhya chjasin Jericó

(Mt. 20.29-34; Mr. 10.46-52)

³⁵ A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntia tjetjaxin ijnko ch'ín t'ikonhya tjanchak'á ch'án. ³⁶ Ntá xrínahya kuínhin tí ch'ín t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

³⁷ Ntá chénka sín ch'án kixin ch'ín Jesús tsíkjixín chjasin Nazaret ts'atsínka ch'án ntiha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'ín David, tikonóehéni —ichro ch'án.

³⁹ A ntá tí sín tsítaón ntia la k'uētuenhen sín ch'án kixin tsotání ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'ín David, tikonóehéni —ichro ch'án.

⁴⁰ A ntá ch'ín Jesús ntá ntahó kjuák'echónhen ch'án ntá k'uētoan ch'án kixin tsjikakjín sín tí ch'ín a. Ntá tió kuikao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátēhe tí ch'ín t'ikonhya ntáchro ch'án kixin:

—Jaha Ìnchéni, tjinkaonni chrókjuinçek'ikuanni —ichro ch'án.

⁴² Ntá ntáchro ch'ín Jesús kixin:

—Ó ts'ikuan. Ó kuítóha jína kixin kuítekávan tí janhan —ichro ch'án.

⁴³ Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xikaha kónhen kjuanchehe sín kjuasáyé Dios.

19

Ch'ín Jesús la ko ch'ín Zaqueo

¹ A ntá ch'ín Jesús k'uixenhen ch'án chjasin Jericó la ntá k'uátsínka ch'án tí chjasin a. ² A ntá ntiha tjen ijnko chojni ríco it'in ch'án Zaqueo, t'etuenhen ch'án tí sín nchekjènkí. ³ Tjinkaon ch'án chrókjuatsoan ch'án nkexro tí ch'ín Jesús, kjánchó nchónhya chojni siín la xitjahya t'ikon ch'án kixin intsí ch'án. ⁴ Ntá kuinká ch'án kuítaón ch'án ntia kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús. ⁵ A ntá tió k'uátsínka ch'ín Jesús ntiha konta ch'án tí nta ntáchro ch'án kixin:

—Zaqueo, tjoka tjasinkajían kixin ntōa ntahó tsitōna jie —ichro ch'án.

⁶ Ntá ch'ín Zaqueo la tjoka k'uínkajin ch'án kóchéhe ch'án. ⁷ Ntá kaín sín k'uíkon sín xikaha ntá kjuankíxin sín tjonta sín tí ch'ín Jesús, ntáchro sín kixin ntōe ijnko chojni chóntha nchónhya jie tsitōhe ch'án. ⁸ Ntá ch'ín Zaqueo kjuák'exín toté ch'án ntáche ch'án Ìnchéni kixin:

—Jaha Ìnchéni, chrókónoha kixin tsjánjuan jnkosiné tí nkehe chonta sintakitonhan tí sín nōa. A ntá tí jnkojín nkexro kjuít'áyaha kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'ín Jesús kixin:

—A ntá jie la tsaá chojni tí nchia i kixin tí ch'ín a mé k'uaxrjeníxin ch'ín Abraham. ¹⁰ A ntá tí Xjeen Dios K'óna Chojni mé kuikjeyá la ko sinchekaá tí chojni chóntha jie.

Ch'ín Jesús kjuíncheyóexin ch'án éxí ite chichaon imá tjete sínkí

¹¹ A ntá tí chojni siín ntiha nachrohe tjejótinhin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuente Dios la ách'e ó tuénxín tsi, ichro sín. ¹² A ntá ntáchro ch'án kixin:

—Itjen ijnko nkexro tsík'axrjeníxin ijnko nkexro imá k'uék'etōan. Ntá sákjuí ch'án ókjé nación kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá. ¹³ A ntá tió chjina sátsji ch'án ntá k'uíyēhe ch'án ite tí sín ch'ehe ch'án xra ntá chjéhe ch'án jnkojnko tí jehe sín jnkojnko chichaon imá tjete sínkí. Ntá k'uētoan ch'án kixin: “Tsjankíxinrá ch'ekoará

xra tí chichaon hasta tí tsokjanjian”, ichro ch'án. ¹⁴ A ntá tí sín chjasén ch'án ntiha imá kónínkakonhen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín siín ntiha kixin tjinkakonhya sín tí nkexro a ts'óna rey ts'etuēnhen sín. ¹⁵ Kjónté xikaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetōan ch'án xrakoa tí sín ch'ehe ch'án xra, na mé tí sín tsík'áyéhe tí chichaon, kixin tsonohe ch'án nkehe tí xra kjuích'eko sín tí chichaon k'uáyéhe sín. ¹⁶ A ntá tí ch'ín xrankíxixín kóchjina la ntáchro ch'án kixin: “Tí chichakoan la kjuachani ite chichaon inaá”, ichro ch'án. ¹⁷ A ntá kjuátehe tí ch'ín rey kixin: “Ó nchōxon tí xikaha jaha la ijnko chojni jina ch'e xra. Jina kjuích'e xra kjónté jehya xra jié ntá tsjánjuan kjuachaxin tsétoan ite chjasin”, ichro ch'án. ¹⁸ A ntá kóchjina tí ch'ín íjnko a inaá ntáchro ch'án kixin: “Tí chichakoan la kjuachani in'ó chichaon inaá”, ichro ch'án. ¹⁹ A ntá xikaha inaá kjuátehe tí ch'ín rey kixin: “Tsjánjuan kjuachaxin tsétoan in'ó chjasin”, ichro ch'án. ²⁰ A ntá kóchjina tí ch'ín níxin ntáchro ch'án kixin: “Tí chichakoan la tjinhin. K'uánkíntani panítóeni ²¹ kixin chrakonhanni kixin jaha la jiaha la tjinkávan tsákjá tí nkehe jehya jaha kjuaké la ko tsotja tí nkehe jehya jaha kuènkaxian”, ichro ch'án. ²² A ntá tí rey ntáchro ch'án kixin: “Jehya chojni jina ch'e xra jaha. Tí nkehe ntáchrúa tsjáncháxian jié. Jaha la ó noha kixin jiēna janhan tsákjaá tí nkehe kjuakéhya, ichrúa, la ko tsotja tí nkehe kuènkahya. ²³ ¿Ntá nkekuēnte kixin chr'anhya tí chichaon ijnko banco chrókjuich'exín xra? A ntá tió kjan ntona la antsí tsjé chichaon chrók'uayáha tí chrókjuacha kichó chica”, ichro ch'án. ²⁴ A ntá ntáche ch'án tí sín siín ntiha kixin: “Takítsjehérá ch'án tí chichaon tsík'áyéhe ch'án la ntá chjehérá tí ch'ín chóna ite chichaon”, ichro ch'án. ²⁵ A ntá jehe sín ntáchro sín kixin: “¿Nkekuēnte chrók'uáyéhe ch'án kixin ó chóna ch'án ite chichaon?” ichro sín. ²⁶ A ntá tí ch'ín rey kjuátehe ch'án ntáchro ch'án kixin: “Kjónté jnkójín nkexro itsjé chóna la ts'áyéhe má. A ntá tí nkexro chóntahya la kjónté tí ntsí chóna ch'án la ts'axrjehe ch'án. ²⁷ A ntá tí sín nínkakonna sín tjinkakonhya sín kixin ts'ónana rey la xrákoará sín ntihi ts'íkōnxín kuān ts'ochrínjinrá kja sín.”

*Ch'ín Jesús k'uixenhen ch'án chjasin Jerusalén
(Mt. 21.1-11; Mr. 11.1-11; Jn. 12.12-19)*

²⁸ Tió kjuixin ntáchro ch'ín Jesús tíhi ntá chrìn ch'án sátsji ch'án chjasin Jerusalén. ²⁹ A ntá ó kjuíji chjinaxón tí chjasin Betfagé la ko chjasin Betania chjinaxón tí jna nchek'in sín Olivo, ntá k'uetuēnhen ch'án iyó tí sín k'uájiko ch'án ³⁰ ntáche ch'án sín kixin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxa ninkexró tjiták'áhya va. Tjasintankehérá va la tsjíkuanará va ntihi. ³¹ A ntá tí jnkójín nkexro tsjanchankíhará nkekuēnte tjasintankehérá va la ntácherá sín kixin: “Ìnchéni ts'ichjánxinhin va”, tsixrorá.

³² A ntá tí sín k'uituēnhen sákjuí sín k'uitja sín éxí ntáchro ch'án. ³³ A ntá tió tjejótjasintankehe sín va la ntá tí sín ìnché va kjuanchankíhi sín kixin:

—¿Nkekuēnte tjasintankehérá tí kolócho? —ichro sín.

³⁴ A ntá jehe sín kjuátehe sín kixin:

—Ìnchéni ts'ichjánxinhin va —ichro sín.

³⁵ Ntá sákjuíkohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a. ³⁶ A ntá tinkákji tí kolócho tjejkjen ch'án la tinkák'ikjínxín sín tí iké sín ntia kixin nátaón tí ka ts'atsínka tí kolocho tjejkjen ch'án. ³⁷ Ntá tió kjuíjichjina sín tí chjinaxón tí t'inkajinxín chojni tí jna Olivo, a ntá kaín tí sín kuítekaon tí jehe ch'án chréhe sín kjuankíxin sín itsen nixja sín

chéhe sín kjuanchehe sín kjuasáyé Dios kixin kaín tí kjuaxroan k'uíkonxín kon sín. ³⁸ Ntá ntáchro sín kixin:

—Jína tí nkexro Rey kjuixin kjuachaxin ihnié Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

³⁹ A ntá iso tí sín fariseo tjejóyákjan sín í so chojni tjeónchexroan sín ntiha ntáchro sín kixin:

—Maestro, tétuēhén tí sín chréhe tí jaha kixin tsotání sín —ichro sín.

⁴⁰ A ntá ch'ín Jesús kjuátehe ch'án ntáche ch'án sín kixin:

—A ntá tí sín i tsotání sín la ixro tsotsje —ichro ch'án.

⁴¹ A ntá tió kjuíjichjina ch'án chjasin Jerusalén ntá k'uíkon ch'án tí chjasin la ntá tsjánka ch'án kixin kuítekakonhya sín ⁴² ntáchro ch'án kixin:

—Chrókuiénxinrá la ko chrókónohará nkexrí chrók'uayèxinrá tí kjuaxróxin, kjánchó jahará kuítekakonhyará. A ntá ó kjuixin k'uátsínka tí kjuaxróxin chrók'uikonrá la xitjahya ts'ikonrá jie. ⁴³ A ntá tsi iso yaon jínahya itsi tí sín nínkakonhanrá la sich'éna sín ijnko tjat'o ts'ántatjen tí chjasin tjejórá ntihi ts'inkákonhen kixin xitjahya ts'axrjéxinrá chjasin ntihi kixin nkuíxín ts'ejó sín ts'inkákonhanrá sín ⁴⁴ ntá ts'óxíka sín kaín tí tjat'o síin ntihi la ko ts'óyán sín kaín tí chojni síin la ko tsítóehya sín kixin ninkehó xro naxa ts'ejóksen kichó, kixin jahará kjuátsəanhyará kixin kuitsjehe Dios tí chjasin tjejórá ntihi.

Ch'ín Jesús kjuínchetjóá ch'án nkaxenhen nínko

(Mt. 21.12-17; Mr. 11.15-19; Jn. 2.13-22)

⁴⁵ A ntá ch'ín Jesús k'uixenhen ch'án tí nínko jie, a ntá kjuankíxin ch'án kuakítsje ch'án tí sín nchekji nkehe la ko tí sín t'ena nkehe ntiha. ⁴⁶ Ntá ntáchro ch'án kixin:

—A ntá ntáchro xroon itén Dios chrónka kixin: “Tí ntəna i mé it'in nchia tsonixjanaxián chojni”,* ichro. A ntá jahará tí nchia i tsíkjich'énará itjueé xíchee —ichro ch'án.

⁴⁷ A ntá tí nínko ntiha kjuák'e ch'ín Jesús kjuako ch'án kaín yaon. A ntá tí sín nchat'á t'ətoan la ko tí maestro tjako tí ley la ko kjaxin tí sín t'ətoan tí chjasin ntiha kjueyá sín nkexrí chrók'óyán sín ch'án. ⁴⁸ Kjánchó k'uitjahya sín nkexrí chrók'óyán sín ch'án kixin kaín chojni tjejótinhin tí nkehe tjechronka ch'án.

20

Tí kjuachaxin chóna ch'ín Jesús

(Mt. 21.23-27; Mr. 11.27-33)

¹ A ntá ijnko yaon kjuák'e ch'ín Jesús tí nínko ntiha kjuakohe ch'án chojni tí tan jína tsaáxin sín. A ntá kjui tí sín nchat'á t'ətoan la ko tí sín maestro tjako tí ley la ko kjaxin tí sín t'ətoan kuente nínko. ² Ntá kjuanchankíhi sín ch'án kixin:

—Chronka nkehe tí kjuachaxin chonta kixin xíkaha ch'e. ¿Nkexro kjuanjon tí kjuachaxin a? —ichro sín.

³ Ntá kjuátehe ch'ín Jesús ntáchro ch'án kixin:

—Kjaxin janhan tsjánchánkíhará ijnko nkehe siná nkexrí tsjateherá. ⁴ ¿A ntá nkexro k'uətuēhen tí ch'ín Juan kixin tsíkite ch'án chojni? ¿Á Dios ní o chojni ó? —ichro ch'án.

⁵ Ntá kjuankíxin sín tjo sín kichó sín ntáchro sín kixin:

—¿Nkehe chrókjuateheni? A ntá tí tsontáchroni kixin Dios tsíchr'án tí ch'ín Juan la ntá tsjanchankí ch'án kixin nkekuente kuítekakuenhyani ch'án. ⁶ A ntá tí tsontáchroni kixin chojni ó k'uətuēhen sín ch'án la ntá kaín chojni tsonínkaon sín la ixro ts'óyánxinni sín kixin tjenkayáxin sín kixin ch'ín Juan chaxín k'uékjako ch'án itén Dios —mé xíkaha ikjo sín.

* 19:46 Isaías 56.7

7 Ntá kjuátehe sín kixin noehya sín nkexro tsíchr'án tí ch'ín Juan. 8 Ntá ntáchro ch'ín Jesús kixin:

—Kjāxin janhan tsōxrjankahya nkexro kjuanjon kjuachaxin tjet'a tíhi —ichro ch'án.

*Ch'ín Jesús kjuíncheyóexin ch'án éxí tí sín ch'ehya xrā jína
(Mt. 21.33-44; Mr. 12.1-11)*

9 Ntá tuénxín kjuankixin ch'ín Jesús nixjehe ch'án chojni kjuíncheyóexin ch'án ntáchro ch'án kixin:

—Kjuák'e ijnko chojni k'uenkaxin ch'án nta to uva tí nontee ch'án, a ntá chr'éxin kjuínchekjen ch'án tí iso tí sín ch'e xrā. A ntá kjuixin ntá sákjuí ch'án imá sé. 10 A ntá kui tí yaon tsakjinjin sín to uva. Ntá k'uetuēnhen ch'án ijnko nkexro ch'ehe ch'án xrā kixin tsjikjanchehe ch'án tí sín ch'e xrā nontee ch'án kixin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkité sín ch'án la ninkehó tsíchjéhya sín ch'án. 11 A ntá tí ch'ín nontee ichr'án ch'án í jnko nkexro ch'ehe ch'án xrā. A ntá kjāxin k'uántaxínhín sín ch'án la ko kjuate sín ch'án la ko kjāxin ninkehó tsíchjéhya sín ch'án inaá. 12 A ntá tí ch'ín nontee ichr'án ch'án í jnko nkexro. A ntá tí sín ch'e xrā kjāxin xikahó tsíkjich'ehe sín inaá, tsík'inkité sín ch'án.

13 Ntá tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjanna imá tjuāhā. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án. 14 A ntá kjónté kui ch'án la k'uikon tí sín ch'e xrā ntá chénka sín kichó sín kixin: “Tí ch'ín i mé ts'áyéhe ch'án kaín nkehe kuènte it'é ch'án. Ts'óyánni ch'án kixin jeheni tsitōekoni kaín tí nkehe a,” ichro sín. 15 A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—A ntá tí ìché nonte la, ¿nkehe chrókjuich'e ch'án kixin xikaha kónhen tí xjeen ch'án? 16 Chrókui ch'án chrókjuinchek'itjáyān ch'án tí sín ch'e xrā kixin xikaha kjuich'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xrā tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

17 A ntá ch'ín Jesús komá ch'án tí jehe sín ntáchro ch'án kixin:

—¿A ntá nkehe t'axrjexín tí nkehe ntáchro xroon itén Dios ntáchro xikihi?:

Tí xrō náxrjónhya kuitōenta tí sín ch'éna tjat'o, a ntá mé jie k'óna tí xrō tjetōan.*

18 A ntá jnkojín chojni tsjitsínka chrítaón tí xrō i tsōkuen ch'án. A ntá ts'ánótjen tí xrō i tsōxratja ijnko chojni la tsōkuen, ts'óna nche.

*Tí xrā tsjenkehe sín gobierno
(Mt.21.45-46; 22.15-22; Mr.12.13-17)*

19 A ntá tí nchat'á t'etōan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni siín. 20 Ntá k'uetuēnhen sín chojni tsotsáyehe sín ch'án, éxí chojni chóna kjuasáyé ch'án chrókjo sín ch'án jnkojína kixin ách'e ichrén nkehe ntoáhya tsonixja ch'án. A ntá jína tsjanchaxín sín jie tsjikaán sín ch'án tí tjen tí ch'ín gobernador. 21 Mé xikaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrúa la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios. 22 A ntá jie la chrónka, ¿á jína chrókjuenkeheni tí gobierno romano o náhi? —ichro sín.

* 20:17 Salmo 118.22

²³ A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuènte chrokjuachaxinráni? ²⁴ Tjákonará ijnko tí chichaon méhe. ¿Nkexro tí tsík'axrjexín tjenkáni tí chichaon i la ko nkexro ihnié chóna méhe? —ichro ch'án.

Ntá kjuátehe sín kixin:

—Tí ch'ín t'etoan mé tjenkáni ch'án —ichro sín.

²⁵ Ntá ntáchro ch'án kixin:

—Chróchjehérá tí ch'ín gobierno t'etoan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

²⁶ A ntá ninkehó kjuachahya sín kjuachaxin sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni

(Mt.22.23-33; Mr.12.18-27)

²⁷ A ntá chr'éxin iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

²⁸ —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitöhe ichjién, tí chónahya sín xjeen, la t'ichjánxin kixin kichó tí ch'ín tsík'en tsötehe tí tjan k'án kixin tsochóna sín xjeen sín éxi xjeen tí ch'ín sao tsík'en ts'ikon sín.† ²⁹ A ntá k'uéjó sín yato sín jnkokoá kichó sín. A ntá tí ch'ín sao la kótehe ch'án. Ntá k'uén ch'án la chónahya ch'án ninkehó xjeen ch'án. ³⁰ A ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chónahya sín xjeen sín. ³¹ A ntá tí ch'ín níxin xíkótehe jehe tjan inaá. Kjaxin xíkaha kayatoé sín. Kaín sín k'uén sín ninkehó xjeen sín chónahya sín. ³² A ntá kjuixixín kjaxin jehe tjan ik'uén tjan. ³³ A ntá tió tsoxechón chojni tsík'en, ¿ntá nkexro tí jehe sin ts'óna ichjién tí jehe tjan kixin yato tí jehe sín kótehe tjan? —ichro sín.

³⁴ Ntá ch'ín Jesús kjuátehe ch'án ntáchro ch'án kixin:

—Ntihi chjasintajni tí chojni ntoa la ko ti chojni chjin tótehe sín takja kichó sín. ³⁵ A ntá tí sín kuítekaon sín tí janhan ntá tsjacha sín tsoxechón sín inaá la í tsöteehya sín la koí tsöteehya tí xjeen sín. ³⁶ Kixin tí sín a la xitjahya ts'en kixin éxi tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín. ³⁷ Kjaxin ch'ín Moisés tió chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡ ³⁸ Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón, la Dios la t'ikon ch'án kixin kaín chojni la síchón —ichro ch'án.

³⁹ A ntá iso tí sín tjako tí ley la ntáchro sín kixin:

—Jína kjuàkua la ko jína ntáchrúa, Maestro— ichro sín.

⁴⁰ A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

⁴¹ Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjeníxin tí ch'ín David? ⁴² A ntá ch'ín David ikjin ch'án tí libro Salmos la ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntiho tsétoan

† 20:28 Deuteronomio 25.5 ‡ 20:37 Éxodo 3.6

43 tsjixinjian kaín xín tí sín nínkakonhan la tsjachahya sin ts'etəan sín kixin jahvá mé tsétəan.”§

44 ¿Xá nkexrí kixin Cristo chrók'óna it'é David, kixin jehe David kuikítexín ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jie tí sín tjako tí ley
(Mt. 23.1-36; Mr. 12.38-40; Lc.11.37-54)

45 Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án kixin:

46 —Chrókóxakonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka kínjin la ko tjinkaon sín kixin kaín chojni chrókjuikosáyehe sín tsoxeta sín ntsín la ko tjejá sín silla antsí náxrjón chrók'uejóyá sín nkaxenhen nínko la ko tjejá sín kixin jína chrók'uejó sín tí sátsji sín kia, 47 la ko kjaxin takitsjehe sín ntəe tí chojni chjin k'án. A ntá kjuixin kjuích'iyehé sín chojni ntá náxrjón nixjehe sín Dios. A ntá jehe sín antsí má sinchekjasóte sín Dios kixin xíkaha kjuích'ia sín.

21

Tí chichaon kjuanjon ijnko tjan k'án nò
(Mr. 12.41-44)

1 A ntá tí nkaxenhen nínko ch'ín Jesús k'uíkon ch'án kixin tí sín ricó kjuikao sín chichaon chr'áxenhen sín tí ntacajón tjetóxroyéya chichaon. 2 A ntá kjaxin k'uíkon ch'án ikjui ijnko tjan k'án nò la ntá jehe tjan chr'áxenhen tjan yaá chichaon ntsínsí. 3 Ntá ntáchro ch'ín Jesús kixin:

—La chaxín ntáxrjan kixin tí tjan k'án i nò tjan kjánchó antsí tjeje sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhí. 4 Kixin kaín tí chichaon kjuanjon sín la chichaon síxèhe sín. A ntá jehe tjan kjónté nò tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án kixin tí nínko ts'itjáyan
(Mt. 24.1-2; Mr. 13.1-2)

5 Iso sín tjejóto sín kixin nkexrí tsjehe nínko tsík'óna xro náxrjón la ko í so nkehe tsíkjanjon chojni éxí ijnko nkehe chjéhe sín Dios. A ntá ch'ín Jesús ntáchro ch'án kixin:

6 —A ntá tsi ijnko yaon tí nínko tjejokomará ntihi la tsoxíka. A ntá tsokohya ninkehó xro ts'ejókjen kíchó inaá —ichro ch'án.

Tí nkehe tsonhen tí naxa ts'itjáyanhya chjasintajni
(Mt. 24.3-28; Mr. 13.3-23)

7 Ntá kjuanchankíhi sín ch'án kixin:

—Maestro, ¿nkesá tsonhen tíha? ¿Nkexrí tsonhen tí tsonoexínni tí nkehe tsonhen? —ichro sín.

8 Ntá ntáchro ch'ín Jesús kixin:

—Chrókóxakonhanrá titoéhyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Ije mé tsoxiteyá tsonhen.” Kjónté xíkaha tsontáchro sín la chrókuítekákuenhyará tí jehe sín. 9 A ntá tió tsinhínrá tsontáchro chojni kixin ó siín kjuanínkaon tjanjonko kíchó sín, kjónté xíkaha naxa chróchrakonhyará kixin kaín tíha t'ichjánxin ts'atsínka senó tí naxa tsjixixínhya ts'itjáyan chjasintajni —ichro ch'án.

10 Naxa tjechrónka ch'án ntáchro ch'án kixin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin. ¹¹ Kjaxin imá tjan tsínkí nonte la ko tsokjinta la ko tsoníhi chojni nchónhya chjasin, a ntá nkajní nchónhya kjuachrakon jié ts'ixin ts'ikon chojni.

¹² 'Naxa ts'atsínkahya tíha la tsonínkakonhanrá sín tsotsérá sín sátsjikoará sín tí nínko tsjanchia sín jie la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador kixin tinkachónkirá nina. ¹³ A ntá tí yaon xikaha tsonhen la ts'ixin kjuachaxin kixin tsochronkará nkexro tinkachónkirá. ¹⁴ Tóxakuanhyará senó nkexrí tsjateherá tí nkehe tsjanchankíhará sín ¹⁵ kixin janhan la tsjánjuan kjuaxrexinkaon jina tsonixjará kixin nijnko tí sín nínkakonhanrá xitjahya tsontácho sín kixin ntoáhya tí nkehe tsjateherá. ¹⁶ Kixin kjónté it'ará la ko kichuára la ko tí sín kjéhyará la ko tí sín tjóra jina mé sintakjirá sín. Jehé sín ts'óyán sín jnkójnra. ¹⁷ Kaín chojni chjasintajni tsonínkakonhanrá sín kixin tinkachónkirá nina. ¹⁸ Kjánchó xikaha la nijnko kaxihí chóna kjára ts'itjányahya. ¹⁹ Tí tsjtoéhyará tinkachónkirá tí janhan la tsochontará kjuachón jnkochrín.

²⁰ A ntá tió ts'ikonrá kixin kuenté chjasin Jerusalén tsík'ántatjen sín soldado ntá tsonoaxínra kixin í séhya ts'itjányan tí chjasin a. ²¹ A ntá tí sín tjejó sín Judea la t'ichjánxin sátsjixin sín ntiha sátsji sín jna. A ntá tí sín síin chjasin Jerusalén kjaxin t'ichjánxin sátsjixin sín ntiha la ko tí sín tjejó sín nontee sín la í xitjahya tsokjan sín chjasin. ²² Kixin tí yaon ts'ixin tsjasóte chojni tsoxiteyá tsonhen kaín nkehe nixja xroon itén Dios. ²³ Nòa tí chojni chjin tjejóyá tí yaon a la ko tí sín chóna xjanhte naxa nchekakí sín. Kixin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha. ²⁴ Jnkójnra ts'énxinra tí síin kjuanínkaon ntiha la ko jnkójnra tsotsérá sín sátsjikoará sín sinchekjasótiará kaín tí í so nación. A ntá tí sín jehya judío tsjixin ókjé nación tsinkátja sín chjasin Jerusalén kixin Dios mé tsjanjon kjuachaxin iso yaon xikaha tsonhen. A ntá chr'éxin tsontácho ch'án kixin: “La í kohya nkehe tsonhen.”

A ntá tió itsi ti Xjeen Dios K'óna Chojni

(Mt. 24.29-35, 42-44; Mr. 13.24-37)

²⁵ A ntá tsonoaxínra nkexrí tsonhen tí yaon la ko nkexrí tsonhen nitjó la ko nkexrí tsonhen konotsé. A ntá chjasintajni tsokohya kjuaxróxin kaín nación la ko tsochrakon chojni kixin imá tsojna ntayaon. ²⁶ A ntá chojni la tsotinhin sín kixin tsochrakon sín tsjenkayáxin sín nkehe tsonhen chjasintajni kixin kaín tí nkehe sínkání nkajní la tsínkí. ²⁷ Ntá xikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuí tsikao ch'án tí kjuachaxin jié kuènte nkaya nkajní. ²⁸ A ntá tió tsoxrankixin tsonhen kaín tíha chrókocháhará chrókjuaya kjára ntá chróntáchorá kixin kjínhya tjen tí nkexro tsaáxinra —ichro ch'án.

²⁹ Kjaxin kjuíncheyóxin ch'án í jnko nkehe ntácho ch'án kixin:

—Tjenkayáxinra nkexrí síin tí nta t'óna to higo la ko kaín tí í so nta. ³⁰ Tió ts'ikonrá kixin tinkák'ayan kahnte tí nta, ntá tsonoaxínra kixin í séhya ts'ixenhen nchakuen chrin. ³¹ Mé kjaxin xikaha tió ts'ikonrá kixin kaín tí nkehe sítónhen, ntá tsonoaxínra kixin tí kjuachaxin kuènte Dios la ó chjino tjen.

³² Mé chaxín ntáxrjan kixin kaín tíhi tsonhen senó naxa t'enhya chojni tjejó jie. ³³ A ntá tí nkajní la ko tí chjasintajni mé ts'itjányan. A ntá tí nkehe ntáxrjan la ts'itjányahya, tsoxiteyá tíha.

³⁴ Chrókóxakonhanrá chrókuítoéhyará kixin chrókjuichròerá kixin tí imá chrókjónterá la ko tí chrókókoanra. Kixin tí xikaha la ntá titàya tsi tí yaon la chrók'uejochoénhyará. ³⁵ Na mé éxí ijnko trampa xrínahya ts'ikjehe mé

xíkaha itsi tí yaon a, la ko xíkaha tsonhen kaín chojni síin chjasintajni tí ts'ejóchóehya sín. ³⁶ Méxra listo chrók'uejorá la ko chrónixjehérá Dios kaín yaon chronóehérá ch'án kixin tió tsi kaín tí kjuaxikaon xíkaha la ntá tsjinkĩtsará ch'án tsaára kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'ín Jesús kjuák'ekjakoḡin ch'án tí n̄nko ntiha jnkojnko yaon, a ntá tie la sákjuí ch'án tí jna nchek'in sín Olivo, la ntaha kuítóhe ch'án. ³⁸ A ntá kaín chojni kóchjina sín tí n̄nko jnkojnko nchítjen kixin tsinhin sín tí nkehe tsochronka ch'án.

22

Imó kjuenkayáxin sín nkexrí tsotsé sín tí ch'ín Jesús
(Mt. 26.1-5,14-16; Mr. 14.1-2, 10-11; Jn. 11.45-53)

¹ Ntá kuichjina tí yaon kia sine sín tí niotja tjikohya tí xroan t'ánkixin niotja na mé tí kia nchek'in sín pascua. ² Ntá tí nchát'á t'etoan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús kixin chrakonhen sín tí chojni chjasin ntiha.

³ A ntá ch'ín Tsochren k'uixenhen asén ch'ín Judas, mé kjaxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús. ⁴ Tí ch'ín a mé sákjuítsjehe tí sín nchát'á t'etoan la ko tí sín t'etoan kuènte n̄nko, ikjo kichó sín kixin nkexrí tsjikaán sín tí ch'ín Jesús. ⁵ Ntá jehe sín kóchéhe sín la ko ntáchro sín kixin tsjenkehe sín tí ch'ín Judas. ⁶ Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

Kjuixixín kjoneko sín tí ch'ín Jesús
(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroan t'ánkixin niotja, a ntá t'ichjánxin ts'óyán sín tí kolélo sine sín kuènte tí kia pascua. ⁸ A ntá ch'ín Jesús k'uetuēnhen ch'án tí ch'ín Pedro la ko tí ch'ín Juan kixin sátsji sín sincheyaxín sín tí nkehe sine sín kuènte tí kia pascua. ⁹ Ntá jehe sín kjuanchankíhi sín ch'án kixin:

—¿Nketí tjinkávan sincheyaxíxinni? —ichro sín.

¹⁰ Ntá kjuátehe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko tóa tjiá nta. Chréhéra ch'án sátsjirá tí nchia ts'ixenhen ch'án. ¹¹ Tsontácherá tí ìnché tí nchia kixin: “Ntáchro Maestro kixin: ¿Nketí tjen tí cuarto tsjánjuan kjuachaxin tsoyaxín sineko ch'án tí sín teyó xriko ch'án tí yaon pascua?” tsixrorá. ¹² A ntá jehe ch'án tsjakohará ch'án ijnko cuarto jié tí yóxin piso la ntiha síin nkehe t'ichjánxin, la ntaha sincheyaxínrá tí sineni tsonjín —ichro ch'án.

¹³ A ntá jehe sín sákjuí sín k'uitja sín kaín nkehe éxí tsíchronka ch'ín Jesús. Ntá ntiha kjuíncheyaxín sín sine sín kuènte pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uéjótjaxín sín tí tjen tí mesa. ¹⁵ Ntá ntáchro ch'ín Jesús kixin:

—Imá tjínkavan kixin tsjasinni kia sinekianrá tí yaon pascua naxa ts'énhya janhan. ¹⁶ Ntáxrjan kixin sinehya janhan xíkaha ínaá tí naxa tsoxiteyáhya tíha tió tsi kjuachaxín kuènte Dios —ichro ch'án.

¹⁷ Ntá kuákja ch'án tí nkehe tjiá ìnté to uva ntá chjéhe ch'án kjuasáya Dios ntá ntáchro ch'án kixin:

—Tákjára tíhi la its'irá kaín rá ¹⁸ kixin ntáxrjan kixin xík'ikianhyará tí ìnté to uva tí naxa tihya tí kjuachaxín kuènte Dios —ichro ch'án.

¹⁹ **A** ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ò ch'án chjéhe ch'án tí jehe sín ntáchro ch'án kixin:

—Tíhi mé cuerpo kuéntana kixin ts'ényákonhanrá. Mé xikaha tsoxráxinkákonxínrá tí janhan —ichro ch'án.

²⁰ Kjaxin xikaha kjuanjon ch'án tí nkehe tjiá ìnté to uva tió kjuixin kjóne sín la ntáchro ch'án kixin:

—Tí nkehe tjiá tí vaso chronkaxín tí nkehe nixin tsonhen tsoxiteyá kixin tí jnina ts'itjí tsotjuáxin tí ijiará.

²¹ Tí nkexro sinchekjina mé tjekian tí tjen mesa ntihi. ²² Méxra tí Xjeen Dios K'óna Chojni its'en éxí k'uítuenhen; kjánchó nòà tí ch'ín sinchekji ch'án kixin tsjasóte ch'án —ichro ch'án.

²³ **A** ntá jehe sín kjuankíxin sín tjanchankíhi kichó sín:

—¿Xá nkexro sinchekji ch'án? —ichro sín.

Ikjo sín kixin nkexro tí imá ts'etōan

²⁴ **A** ntá jehe sín mé tjo sín kixin nkexro antsí ts'etōan. ²⁵ **A** ntá ntáchro ch'ín Jesús kixin:

—Tí sín reyes kuènte tí naciones imá t'etōan sín. **A** ntá tí chojni mé ntáchro sín kixin tí sín t'etōan la mé chojni ch'e xrā jína. ²⁶ **A** ntá jahará xikahya chrókjuich'erá. Íchá jína tí nkexro imá t'etōan chrók'óna éxí tí nkexro antsí ntasoá chróchóxin chrók'uítuenhen, na mé tí nkexro t'etōan chrók'óna éxí ijnko nkexro ch'exón xrā. ²⁷ ¿**A** ntá nkexro tí antsí t'etōan, á tí nkexro lámō tjetjaxin tí tjen mesa ntá sine ch'án, o á antsí t'etōan tí nkexro kuikāo tí nkehe sine ch'án? Náhi. Tí nkexro tjetjaxin tí tjen mesa mé antsí t'etōan ch'án. Mé xikaha janhan tjénkākjánrá éxí ijnko nkexro ch'exón xrā tí janhan.

²⁸ Jahará xráxin k'uéjontaxínrá k'uíkonrá kaín nkehe náxrjónhya kónna. ²⁹ Méxra janhan tsjánjuan kjuachaxin tsétoanrá éxí chjina T'aná tí tétōan janhan ³⁰ kixin sinterá la ko its'irá tí tsjak'e mesa kuéntana tí tsétoan janhan nkaya nkajní la ko tsétoanrá sinchekitoexínrá tí ijié kaín tí sín k'uaxrjenixin tí teyó xjeen ch'ín Israel.

Ch'ín Jesús chrónka ch'án kixin ch'ín Pedro sinchemá kixin chónhya tí jehe ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ìnchéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxí noatrigo. ³² Kjánchó janhan xrjanóaha T'aná kixin jaha chrókujtoéhya tí tinkachónkia tí janhan. **A** ntá jaha kjónté tsjásian jie, a ntá tsokjan inaá ts'itjáyanyha tinkachónkia tí janhan ntá sinchéchéhé kichuárá —ichro ch'án.

³³ **A** ntá ntáchro ch'ín Simón kixin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ **A** ntá kjuátehe ch'ín Jesús ntáchro ch'án kixin:

—Pedro, ntáxrjan kixin ijie jaí naxa tsjehya kochíntōa sinchemána iníya kixin chonhya tí janhan, tsixrua —ichro ch'án.

Ntá ó kuichjina tí hora xikaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kixin:

—Tió kuétuanhanrá sákjuírá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tokatē na, ¿á naxa t'itjayan ichrén nkehe ní? —ichro ch'án.

Ntá kjuátehe tí jehe sín ntáchro sín kixin:

—Náhi. Ninkehó nkehe t'itjáyanhya —ichro sín.

³⁶ Ntá ntáchro ch'án kixin:

—A ntá jie tí nkexro chóntha kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chónthahya ch'ica espada chrókjuinckeki ch'án tí ka t'inkáya ch'án kixin chrók'uenaxín ch'án ijnko ch'ica. ³⁷ Ntáxrjan kixin t'ichjánxin tsoxiteyá tsona éxí nixja xroon itén Dios ntáchro kixin: “Éxí yóhe ijnko chojni kjuasin jie mé xikaha ts'ikon sín ch'án.”* Mé xikaha kaín nkehe chrónka xroon itén Dios kixin tsona mé t'ichjánxin tsoxiteyá —ichro ch'án.

³⁸ A ntá jehe sín ntáchro sín kixin:

—Ìnchéni, ntihi tjejó yaá ch'ica espada —ichro sín.

Ntá kjuátehe ch'án kixin:

—Kjónté ó táhó la ó nchoxon —ichro ch'án.

*Ch'ín Jesús nixjexín ch'án Dios tí Huerto Getsemani
(Mt. 26.36-46; Mr. 14.32-42)*

³⁹ Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kixin xikaha kuènen ch'án k'uékjich'e ch'án la koí tí sín k'uájiko ch'án tinkáchréhe sín. ⁴⁰ Ntá kjuíji sín ntiha ntá ntáchro ch'án kixin:

—Nixjehérá Dios kixin tsjinkitsa ch'án tí jahará kixin tsjásinhyará jie —ichro ch'án.

⁴¹ Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin éxí chrók'ue chojni xro. Ntá kjuák'exín toch'in ch'án kixin tsonixjehe ch'án Dios.

⁴² Ntá ntáchro ch'án kixin:

—It'eni, tí tjinkávan chrókjuinckekaáni kaín nkehe náxrjónhya chrók'uatínkani. Kjánchó jehya éxí tjinkaonni jeheni chrókónhenni. Náhi. Éxí tjinkávan jaha —ichro ch'án.

⁴³ Ntá xrínahya k'uíkon ch'án itjen ijnko ángel tsíkixin nkaya nkajní kixin tsjinkitsa ch'án. ⁴⁴ A ntá imá tóxakonhen ch'án, a ntá antsí fuerte nixjehe ch'án Dios, ntá k'uíxin ch'án ntachjin éxí yóhe jni xikaha k'uitji k'uánótjen nonte.

⁴⁵ Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín. ⁴⁶ A ntá ntáchro ch'án kixin:

—¿Nkekuènte tjejochrinrá? T'àyará. Nixjehérá Dios kixin tsjinkitsará ch'án kixin tsjachroehyará ch'ín Tsochren —ichro ch'án.

*Itsé sín tí ch'ín Jesús
(Mt. 26.47-56; Mr. 14.43-50; Jn. 18.2-11)*

⁴⁷ A ntá ch'ín Jesús naxa tjenixja ch'án ntá xrínahya kui nchónhya chojni yámá ch'ica. Tí ch'ín it'in Judas, ijnko tí teyo sín k'uájiko ch'ín Jesús, kuítaón ch'án ntia, ntá kóchjinehe ch'án tí ch'ín Jesús kixin sineko ch'án kochító. ⁴⁸ A ntá ntáchro ch'ín Jesús kixin:

—Judas, ¿á ijnko kochító ó sìnckekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'ín Jesús tió k'uíkon sín kixin xikaha kónhen ntá kjuanchankíhi sín ch'án kixin:

—Ìnchéni, ¿á chrókuatéxinni sín ch'ica espada? —ichro sín.

⁵⁰ A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etōan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kixin:

—Táhó, tìtohé, ó tjen —ichro ch'án.

* 22:37 Isaías 53.12

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekitohe ch'án jína. ⁵² Ntá tuénxín ch'ín Jesús ntáche ch'án tí sín nchat'á t'etoan la ko tí sín t'etoan kuènte nínko la ko tí sín táda t'etoan mé tí sín tsíki sátsjiko sín ch'án ntáchro ch'án kixin:

—¿Nkekuènte k'uinkakoará chica espada la ko inta éxí chrótserá ijnko xíchee? ⁵³ A ntá kaín yaon kjuak'é janhan k'uejóni kjuákoáxinrá tí nínko ntiha la ninkehó tsehyará tí janhan. A ntá jie mé tí hora kuèntará ntá kjuacha tí kjuachaxin kuènte sítié —ichro ch'án.

*Ch'ín Pedro kjuínchemá ch'án kixin chónhya ch'án tí ch'ín Jesús
(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

⁵⁴ Ntá itsé sín tí ch'ín Jesús kjuínchenteto sín ch'án sákjuíko sín ch'án ntøe nchat'á t'etoan. A ntá ch'ín Pedro ikjín tinkáchréhe ch'án. ⁵⁵ A ntá tí ntasin ntiha kjuaka sín xrohi síxrohe sín. A ntá ch'ín Pedro kjaxin kjuák'entaxín ch'án tí tjejó sín ntiha. ⁵⁶ A ntá ijnko tjachjin ch'e xra tió k'uíkon tjan kixin koí ch'ín Pedro tjechjixrohe ch'án ntiha ntá komá tjan tí jehe ch'án ntá ntáchro tjan kixin:

—Kjaxin tí ch'ín i xriko tí ch'ín Jesús —ichro tjan.

⁵⁷ Ntá ch'ín Pedro kjuínchemá ch'án ntáchro ch'án kixin:

—¿Nkekuènte xíkaha ichrua jaha? Ni chonhya tí nkexro a —ichro ch'án.

⁵⁸ A ntá antsíkoá chr'éxin ikui í jnko chojni k'uíkon tí jehe ch'án ntá ntáchro kixin:

—Kjaxin jaha xríkoa tí nkexro a —ichro.

Ntá ch'ín Pedro ntáchro ch'án kixin:

—Náhí, janhya —ichro ch'án.

⁵⁹ Ntá éxí ijnko hora chr'éxin ntá nixja í jnko ch'ín chénka tí í so sín kixin:

—Tí ch'ín i chaxín xriko tí ch'ín Jesús kixin kjaxin tsíkjin ch'án estado Galilea —ichro ch'án.

⁶⁰ Ntá ntáchro ch'ín Pedro kixin:

—Nonahya janhan nkehe tí ntáchrúa —ichro ch'án.

Ntá tuénxín naxa tjenixja ch'án ntá xrínahya ó tsje kochíntøa. ⁶¹ Ntá Ìnchéni kuinkátjía ch'án komá ch'án tí ch'ín Pedro. Ntá ch'ín Pedro xraxinkaon ch'án kixin xíkaha tsíchronka Ìnchéni kixin: “Naxa tsotsjehya kochíntøa sìnchemána iníya.”† ⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús

(Mt. 26.67-68; Mr. 14.65)

⁶³ Tí sín sákjuíko ch'ín Jesús kjuanoá sín ch'án la ko kjuate sín ch'án.

⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáchro sín k'uántaxínhín sín ch'án.

Ntá sákjuíko sín tí ch'ín Jesús nkayakon tí sín t'etoan

(Mt. 26.59-66; Mr. 14.55-64; Jn. 18.19-24)

⁶⁶ A ntá kóyaon nchakotjin la kójnkotsé kaín tí sín táda t'etuènen tí sín judío, la ko tí nchat'á t'etoan, la ko tí sín maestro tjako tí ley la sákjuíko sín tí ch'ín Jesús nkayakon tí sín imá t'etoan. Ntá ntiha kjuanchankíexín sín ch'án kixin:

⁶⁷ —Ijie la chronka, ¿á jaha tí Cristo? —ichro sín.

Ntá jehe ch'án kjuátehe ch'án kixin:

—Tí tsontáxrjan kixin chaxín janhan na tsitekákonhyará. ⁶⁸ A ntá tí chrókjuánchánkíhará ichrén nkehe la chrókjuátehehyará la ko

† 22:61 Lucas 22.34

chrók'uatjántahyarána. ⁶⁹ A ntá jie tí Xjeen Dios K'óna Chojni mé tsjak'etjaxin tí tja chjina kuènte Dios chóna kaín xín kjuachaxin —ichro ch'án.

⁷⁰ A ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáchro ch'án kixin:

—Chaxín janhan xikaha ntáchrora tí jahará —ichro ch'án.

⁷¹ Ntá kjo sín kichó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

23

Sákuiko sín tí ch'ín Jesús nkayakon tí ch'ín Pilato

(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uínkatjen sín ntá sákuiko sín tí ch'ín Jesús nkayakon tí ch'ín Pilato. ² A ntá ntiha kjuankíxin sín t'eka sín jie tí jehe ch'án ntáchro sín kixin:

—K'uitjani tí nkexro i tjachroe ch'án chojni nación kuènténi ntáchro ch'án kixin chrókjuenkeehyani tí gobierno romano, la ko kjaxin ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kixin:

—¿Á jaha tí Rey t'etuenhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xikaha ntáchrúa jaha —ichro ch'án.

⁴ A ntá ch'ín Pilato ntáche ch'an tí sín nchat'á t'etoan la ko tí chojni tsíkikao sín kixin:

—T'itjáhya nijnko jie chóna tí nkexro i —ichro ch'án.

⁵ A ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankíxin ch'án kjuako ch'án estado Galilea, a ntá jie ó kui ch'án ntihi la xikaha tjako ch'án —ichro sín.

Sákuiko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsíkjixín ch'án. ⁷ A ntá kjuátehe sín kixin ntaha tsíkjixín ch'án, ntá k'ueoan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxin ch'án tjen ch'án chjasin Jerusalén tí yaon a. ⁸ A ntá ch'ín Herodes k'uíkon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxin ch'ín Jesús. ⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án. ¹⁰ Kjaxin ntiha k'uejó tí sín nchat'á t'etoan la ko tí sín maestro tjako tí ley la ntá nchónhya jie k'ueka sín ch'án kixin nínkakonhen sín ch'án.

¹¹ A ntá ch'ín Herodes la ko tí sín soldado kuènte ch'án kjuankíxin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrjón éxí t'inkáya tí sín rey. A ntá tuénxín ch'ín Herodes k'ueoan ch'án kixin sátsji ch'án inaá tí tjen ch'ín Pilato. ¹² A ntá tí yaon a ch'ín Pilato la ko ch'ín Herodes kjuankíxin sín tjuèhe kichó sín kixin tí senó la k'uénínkakonhen kichó sín.

K'ueoan sín kixin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uíyehē ch'án tí nchat'á t'etōan la ko tí sín gobernador la ko kaín chojni chjasin ntiha kixin tsojnkotsé sín ¹⁴ ntá ntáche ch'án sín kixin:

—Jahará kjuikuānará tí nkexro i ntáchorá kixin ntoáhya tjakohē ch'án chojni kixin chrókónínkakohen sín tí gobierno. Kjánchó janhan kjuánchánkíhā ch'án itsjé nkehe kuínhínrá ntá k'uikonrá kixin k'uitjahya ninkehó tí jie tékará ch'án. ¹⁵ La ko kjaxin ch'ín Herodes k'uitjahya ch'án tí jie tékará tí ch'ín Jesús ntá chr'án ch'án inaá ntihi. Ó k'uikonrá kixin ninkehó jie chóntahya ch'án chrók'uenxín ch'án. ¹⁶ Sintakjasóte ch'án ntá chr'éxin tsjánjuan kjuachaxin sátsji ch'án —ichro ch'án.

¹⁷ A ntá tí yaon kia a la t'ichjánxin kixin ch'ín Pilato tsjanjon kjuachaxin sátsji ijnko chojni tjechjina kixin xikaha kuénhen sín ósé. ¹⁸ Ntá kaín sín kjuankixin sín k'óyako sín ntáchro sín kixin:

—¡Tí nkexro la náhí! ¡Ch'ín Barrabás mé t'atjánta! —ichro sín.

¹⁹ A ntá ch'ín Barrabás tsík'ikjéhe sín ch'án kixin jehe ch'án la ko í so chojni kónínkakohen sín tí chjasin ntiha la ko tsík'óyán ch'án chojni. ²⁰ A ntá ch'ín Pilato tjinkaon ch'án chrókjuanjon ch'án kjuachaxin sáchrókui ch'ín Jesús. A ntá xíkjanchankíhi ch'án tí chojni siín ntiha inaá. ²¹ Kjánchó jehe sín antsí má tsen k'óyako sín ntáchro sín kixin:

—¡Tjakékanirá ch'án ntacruz! ¡Tjakékanirá ch'án ntacruz! —ichro sín.

²² Nixin xíkjanchankí ch'ín Pilato ntáchro ch'án kixin:

—¿Xá nkehe ntoáhya kjuích'e ch'án? Janhan la k'uitjahya ninkehó jie chóna ch'án chrók'uenxín ch'án. Sintakjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

²³ Kjánchó jehe sín antsí tsen kjuanchia sín ntáchro sín kixin chrókjuak'enkáni ch'án ntacruz. A ntá k'óyako sín la ko k'óyako tí sín nchat'á t'etōan ntá kjuacha sín kjuanchia sín tí nkehe tsonhen. ²⁴ A ntá ch'ín Pilato kjuanjon ch'án kjuachaxin xikaha tsonhen tí nkehe kjuanchia sín. ²⁵ A ntá kjuanjon ch'ín Pilato kjuachaxin sátsji tí ch'ín Barrabás éxi kjuanchia sín, na mé tí ch'ín k'uikjéhe sín kixin k'uékje ch'án kjuanínkaon la ko k'uék'óyán ch'án chojni. A ntá ch'ín Pilato kjuanjon ch'án kjuachaxin kixin sátsjiko sín tí ch'ín Jesús sinchekjasóte sín ch'án éxi tjinkaon sín.

Kjuak'enkani sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

²⁶ A ntá tió sákjuíko sín ch'ín Jesús tsjak'enkani sín ch'án ntacruz, ntá itsé sín ijnko ch'ín tsíkjixin chjasin Cirene it'in ch'án Simón, mé kjuixin ch'án nontee ch'án, ntá kjuínchekamá sín ch'án tí ntacruz tsjak'enkáni ch'ín Jesús la tinkáchréhe ch'án.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjánkàma sín ch'án. ²⁸ Kjánchó ch'ín Jesús nkátjía ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjankamahyará tí janhan. Chrótsjankará kixin tí nkehe tsonhanrá jahará la ko xjaanrá. ²⁹ Kixin itsi yaon tsontáchorá kixin náxrjón tí sín chóntahya xjan la ko tí sín kjuínchekokjéhya xjan la ko tí sín kjuínchekakíhya ninkehó xjan. ³⁰ Ntá tsjankixin chojni tsontáche sín tí jnā kixin tsoxrátja sín la ko tsontáche sín tjo kixin tsjavá sín. ³¹ Kjónté tí nta yoa la ó sitónhen kaín tíhi la íchá tió chróxámá tí nta la ¿nkehe tí kaá chrókónhen tí nta tsíxámá? —ichro ch'án.

³² Kjaxin sákjuíko sín iyó sín tsíkjasin jie kixin ts'óyánko sín ch'ín Jesús. ³³ Ntá tió kjuíji sín tí jnā tikítexín sín tí jnā Nta Hueso Kja Chojni, na mé ntiha kjuak'enkani sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la í jnko la tja ch'án kjon tjejóyáni sín ntacruz kjaxin. ³⁴ Ntá

tió kjuixin kjuak'enkani sín tí ch'ín Jesús tí ntacruz ntá nixjehe ch'án tí It'é ch'án Dios ntáchro ch'án kixin:

—It'éni, tónínkakuènhya sín kixin tí nkehe kjuích'ehe ni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikeyehe sín iké ch'án ch'exín sín suerte kixin tsonoexín sín nkexro tsakja tí ka a. ³⁵ Kaín chojni chjasin ntiha tjejótsjehe sín kixin xikaha sítónhen la ko kjaxin tí sín t'etōan tjanoá sín tí jehe ch'án ntáchro sín kixin:

—Kjuíncheakaá ch'án ókjé chojni, a ntá jie jehe ch'án chrókjuíncheakaá ch'án asén ch'án tí chaxín jehe ch'án tí Cristo tí nkexro tsíkjejá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kuikao sín xranvino náxrjónhya chjehe sín ch'án chrók'ui ch'án, ³⁷ ntáche sín ch'án kixin:

—Tí jaha chaxín rey kuènte tí sín judío ntá jahvá chrókjuíncheakaá asán —ichro sín.

³⁸ Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkiva griego la ko nkiva latín la ko nkiva hebreo ntáchro kixin: “Tíha mé Rey kuènte tí sín judío”, ichro.

³⁹ Ijnko tí sín chónta jie tjenkáni ntacruz k'uántaxínhin ch'án tí ch'ín Jesús ntáchro ch'án kixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

⁴⁰ A ntá tí ch'ín jnko a k'uetuènenhén tí íjnko ch'ín a kixin tsotání ch'án, ntáchro ch'án kixin:

—Ntáchrohya xikaha. ¿Á chrakuenhya Dios kixin xikaha ichrua kixin kjaxin jeheni na ó tjejótsjásóteni? ⁴¹ Yóini na nchoxon tjejótsjásóteni tjejótsjenkani tí jie kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáchro ch'án kixin:

—Jesús, xráxinkávan tí janhan tió ts'ayéhé kjuachaxin tsétōan jaha —ichro ch'án.

⁴³ Ntá kjuátehe ch'ín Jesús ntáchro ch'án kixin:

—Chaxín ntáxrjan kixin ijie jaí ts'ejóko kichó ni nkaya nkajní —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkixin. A ntá k'uíxin tie kuenté chjasintajni hasta las tres kónjin. ⁴⁵ Ik'uén yaon, la ko tí ka t'ínkakuènxín nkaxenhen nínko k'uichje jnkosiné. ⁴⁶ Ntá ch'ín Jesús k'uèya ch'án itsen ntáchro ch'án kixin:

—It'éni tjen nkaya nkajní, jaha ts'ayéhé asénni —ichro ch'án.

Xikaha ichro ch'án ntá k'uén ch'án.

⁴⁷ A ntá k'uikon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kixin:

—Chaxín tí nkexro la jína la ninkehó jie chóntahya —ichro ch'án.

⁴⁸ A ntá kaín tí chojni tsíkójnkotsé ntiha k'uikon sín xikaha kónhen ntá sákjuíxin sín ntiha chakon sín tjate sín ntakuin sín kixin xikaha kónhen. ⁴⁹ A ntá kaín tí sín chóxin ch'ín Jesús la ko kjaxin tí chojni chjin k'uékinkáchónki sín ch'án tsíkjin sín estado Galilea ikjín tjejó sín tjejótsjehe sín nkerí sítónhen.

Sákjuíkjává sín tí ch'ín Jesús

(Mt. 27.57-61; Mr. 15.42-47; Jn. 19.38-42)

⁵⁰ A ntá ntiha tjen ijnko ch'ín it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etōan kuènte tí sín judío, jehe ch'án mé ijnko nkexro jína. ⁵¹ Jehe ch'án kjuák'echónhen ch'án itsi tí kjuachaxin

kuènte Dios. Méxra kóxrjienhya ch'án nkexrí kjuích'e tí sín í so t'etōan. ⁵² Méxra sákjuítsjehe ch'án tí ch'ín Pilato kjuíkjanhia ch'án tí cuerpo kuènte ch'ín Jesús. A ntá ch'ín Pilato kjuanjōn ch'án kjuachaxin. ⁵³ Ntá sákjuí sín tsjinkajinxin sín ch'án ntacruz. Ntá kjuixin kjuinkajin sín ch'án ntá kjuínchek'ísímá sín ch'án ijnko ka jié, ntá sákjuíko sín tsoxravá ch'án ijnko tòye xráxín tsíkjich'éna ch'ín José jehó tjo la ko naxa ninkexró tsíxraváhya ntiha. ⁵⁴ Kaín tíha kónhen tí yaon viernes kónjín. Tí yaon mé tjejóyaxínhin sín kixin í séhya tsoxrankixin tí yaon t'ok'éhe sín sábadō kixin kohya kjuachaxin sich'e sín ninkehó xra.

⁵⁵ A ntá tí chojni chjin nkáchréhe kjuíkoxín ch'ín Jesús estado Galilea kjaxin sákjuíko sín sákjuítsjehe sín tí tòye tsoxravá ch'án la ko k'uíkon sín jína nkexrí kjuak'e sín tí cuerpo kuènte ch'án. ⁵⁶ A ntá tío kjan sín tí nchia tjejó sín k'óyaxínhin sín kjueyá sín xroan xraxé náxrjón itsa ntōé ch'án kixin xikaha k'uékinkáchónki tí sín judío. A ntá k'ok'éhe sín tí yaon sábadō éxí t'etōan tí ley.

24

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

¹ Tí yaon domingo, mé tí yaon xrankíxixín semana tí chojni chjin na xíkjan sín inaá tí tsíxravá ch'ín Jesús sákjuíko sín xroan xraxé tsík'ena sín. La ko í so chojni chjin sákjuíkotoxin sín. ² Ntá ó kjuíji sín ntiha k'uíkon sín tí xro tsíkjèxín tí tòye la í xikahya tjen tí sákjuí sín. ³ Ntá k'uíxénhen sín tòye ntá k'uitjahya sín cuerpo kuènte Inchéni Jesús. ⁴ Ntá chrakon sín ntá noehya sín nkehe sich'e sín. Ntá xrínahya k'uíkon sín iyó chojni ntoa tjejóxin toté chjinaxón tí tjejó sín, la iké sín la tjákini tsjehe. ⁵ A ntá tí chojni chjin kjuínchek'ísén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuènte xritjéyará tí nkexro tjechón tí siín tí sín tsík'en? ⁶ Tjenhya ch'án ntihi la ó xechón ch'án. Xráxinkáonrá nkehe ntáchro ch'án tí kjuák'e ch'án estado Galilea ⁷ ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chóna jié tsjak'enkani sín ch'án ntacruz la ko tí níxin yaon tsoxechón ch'án inaá —ichro sín.

⁸ A ntá tí síchjin xráxinkaon sín kixin nkexrí tsíchronka ch'ín Jesús, ⁹ a ntá tío kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín. ¹⁰ A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María Iné ch'ín Jacobo la ko tí í so chojni chjin. ¹¹ A ntá tí sín apóstol kuínhin sín éxí ijnko nkehe chaxínhya tí nkehe chrónka tí jehe sín ntá kuítekakónhya sín.

¹² Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkjixravá ch'ín Jesús. Ntá kjuíji ch'án k'uíkon ch'án tí nkaxénhen tòye k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xikaha tsíkónhen.

Tí ntia Emaús sákjuí sín la kjuíjichréhe Inchéni

(Mr. 16.12-13)

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjínxin tejnko kilómetro tí chjasin Jerusalén. ¹⁴ Tinkákjo sín kichó sín kixin kaín tí nkehe tsíkónhen tí chjasin Jerusalén. ¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án. ¹⁶ Kjónté k'uíkon sín ch'án la kjuanjōnhya Dios kjuachaxin kixin chrókjuatsoan sín tí jehe ch'án. ¹⁷ A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntia? ¿Nkekuènte kixin t'avará? —ichro ch'án.

18 **A** ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. **A** ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

19 **A** ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkjin ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxin ch'án kjuachaxin kuente nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xikaha k'uíkon Dios la ko k'uíkon tí chojni. 20 **A** ntá tí nchat'á t'etoan la ko tí sín gobierno kjuínchek'áyéhe sín ch'án kixin its'en ch'án la tsjak'enkani sín ch'án ntacruz. 21 **A** ntá jeheni k'uejóchónhenni kixin jehe ch'án chrókjuinchekaá ch'án tí sín Israel. **A** ntá jie ó chóna iní yaon xikaha kónhen. 22 **A** ntá iso chojni chjin kjaxin k'uékinkáchónki sín ch'án kjuínchechrakon sín tí jeheni kixin jehe sín tsíkjitsjehe sín tí tsíxravá ch'án imá nchítjén 23 la mé tsík'itjahya sín tí cuerpo kuente ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín. 24 Ntá tuénxín iyó tí sín k'uájikoni kjaxin sákjuitsjehe sín tí tsíxravá ch'án la kuik'itja sín éxí chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

25 Ntá kjuátehe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uéjó ósé. 26 ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'uetōan ch'án? —ichro ch'án.

27 Ntá kjuankixin ch'án chronkaxín ch'án nkexrí t'axrjexín kaín tí nkehe nixja xroon itén Dios kixin nkehe tsonhen tí jehe ch'án la mé kjuankixixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

28 Ntá kjuíji sín tí chjasin ntsí a, a ntá ch'ín Jesús tsjehe ch'án éxí naxa sáchrókjui ch'án kjín. 29 **A** ntá jehe sín mé chronóhehe sín ch'án kixin ntahó chrókuitōhe ch'án, ntáchro sín kixin:

—Titōha ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uíxenhén ch'án nchia kixin tsitoeko sín ch'án. 30 **A** ntá tjejótjaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'o ch'án kuákja tí jehe sín. 31 Ntá tuénxín xraxinkaon sín ntá kjuátsoan sín tí jehe ch'án. Ntá tuénxín k'uitjáyankoá ch'án. 32 Ntá jehe sín itjo sín kichó sín ntáchro sín kixin:

—¿Á chaxínhya chéhe asénni tí kuikāoni ch'án ntia kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

33 Ntá tuénxín k'uínkatjen sín kjan sín chjasin Jerusalén. **A** ntá ntaha k'uitja sín tí tejnko sín jnkokóá tjejó sín la ko tí í so sín. 34 **A** ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

35 Ntá jehe sín kjaxin chrónka sín nkehe tsíkónhen tí ntia sákjuí sín kixin nkexrí kjuátsoanxín sín tí ch'ín Jesús tí kóchrít'o ch'án niotja kjuanjon ch'án.

*Titàya k'uíkuèn sín ikui ch'ín Jesús
(Mt. 28.16-20; Mr. 16.14-18; Jn. 20.19-23)*

³⁶ A ntá jehe sín naxa tjejó tjo sín kaín tí nkehe tsíkónhen, a ntá xrínahya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejórá? —ichro ch'án.

³⁷ A ntá jehe sín la imá chrakon sín kjuenkayáxin sín kixin k'uíkon sín ijnko xrintoe chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xikaha tjenkayáxin asánrá? ³⁹ Tsjehérá tjaná la ko totená kixin chaxín janhan. Itserána la ko komárána, kixin ijnko xrintoe chojni chóntahya nto la ko chóntahya hueso éxí t'íkonrá kixin chonta janhan —ichro ch'án.

⁴⁰ A ntá xikaha ichro ch'án ntá kjuako ch'án itja ch'án la ko toté ch'án.

⁴¹ Ntá kjónté xikaha k'uíkon sín la naxa kuítekakonhya sín kixin chéhe sín la ko chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

⁴² Ntá chjéhe sín ch'án it'ò koche tsíchjántaón xrohi la ko ijnko t'ò katje kotsjenta tjiá tsjen. ⁴³ A ntá jehe ch'án kuákja ch'án kjóne ch'án k'uíkonxín kon sín. ⁴⁴ Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

⁴⁵ Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé. ⁴⁶ Ntá chénka ch'án sín kixin:

—Mé xikaha nixja tí xroon itén Dios kixin tí Cristo la t'ichjánxin ts'en, la níxin yaon t'ichjánxin tsoxechón ch'án. ⁴⁷ A ntá t'ichjánxin tsjakoxín sín ihnié ch'án tsjankixixín sín chjasin Jerusalén la ko chrókuinhin chojni kuenté chjasintajni kixin chrókuítóhe sín ijje sín chrókuitekaon sín tí jehe ch'án kixin jehe ch'án mé chrókjuincheyaon tí ijje sín. ⁴⁸ A ntá jahará mé tsochronkaxínrá kixin xikaha k'uíkonrá kaín tíha. ⁴⁹ Ntá tsochr'an janhan tí Nchakuen T'aná éxí tsintáchro ch'án. Kjánchó chjasin Jerusalén ntahó titohará tsoxiteyájia ts'ayéhérá kjuachaxin tsixín nkaya nkajní.

Ch'ín Jesús sákjuí ch'án nkaya nkajní

(Mr. 16.19-20)

⁵⁰ A ntá ch'ín Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín.

⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní. ⁵² A ntá jehe sín k'uíkon sín xikaha, a ntá xraxinkaon sín ch'án, ntá kjan sín chjasin Jerusalén chéhe sín. ⁵³ A ntá kaín yaon tjejó sín nkaxenhen ninko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naxa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha. ² Tí xrankíxixín na mé tí nkexro xráxín kjuák'eko Dios ³ la ko kjuachaxin kuènte ch'án na mé k'ónaxín kaín xín nkehe siín jie. A ntá kohya ninkehó nkehe k'ónakoá, na mé kaín xín nkehe siín na mé k'ónaxín tí kjuachaxin kuènte ch'án. ⁴ Jehe ch'án na mé kjuanjon kjuachaxin kaín nkehe síchón siín chjasintajni la ko jehe ch'án mé xrohi t'inkaséyanxínhin jnkojnko ntje chojni chjasintajni. ⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

⁶ Ntá kjuák'e ijnko chojni k'uetuenhen Dios kui mé it'in ch'án Juan. ⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kixin kaín xín chojni chrókuitekaon sín tí tjechrónka ch'án a. ⁸ A ntá tí ch'ín Juan la jehya tí xrohi a. Ó k'uituenhón ch'án kui ch'án kixin tsochrónka ch'án nkerí kuènte tí xrohi a. ⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkjach'énaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naxa kjuátsoanhya sín ch'án. ¹¹ Ikui ch'án tí tjejó tí sín judío k'uaxrjeníxin ch'án, kjánchó kuítekakuenhya sín ch'án. ¹² A ntá tí sín kuítekaon sín ch'án mé k'uáyéhe sín kjuachaxin kixin ts'óna sín xjeen Dios. ¹³ Ntá yóehya ts'axrjeníxin sín it'é sín chjasintajni ntihyó la ko yóehya ijnko it'é chrókjuenkayáxin ch'án chrókjuich'éna ch'án ijnko xjan. Náhí. Dios mé kjueyá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uetjuèhé ch'án chojni chjasintajni la ko imá ntoá chrónka ch'án. Kuayeni k'uíkonní kixin imá t'etōan ch'án kixin jehe ch'án mé tí jnkokoáxón Xjeen It'éni tjen nkaya nkajní na mé xíkaha imá t'etōan ch'án.

¹⁵ Ch'ín Juan mé chrónka ch'án nkexrí tjen tí nkexro a. Ntáchro ch'án kixin: —Senó k'uékjákohará kixin chr'éxin tsi tí nkexro a, na mé antsí má t'etōan ch'án, a ntá janhan la náhí kixin tí janhan naxa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

¹⁶ Kaínni ó k'uáyéheni tí kjuachaxin jie tjetjanjon ch'án la ko antsí má tjencheyaonni ch'án la ko tjencheyaonni ch'án. ¹⁷ Dios mé tsík'etuenhen ch'ín Moisés kixin tsokjin ch'án tí ley. A ntá Inchéni Jesucristo mé kjuakoxin ch'án kixin nkexrí imá tjuèhé Dios tí chojni chjasintajni. A ntá kaín nkehe chrónka ch'án mé antsí ntoá. ¹⁸ Kohya ninkexró chjasintajni k'uíkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

Ch'ín Juan mé chrónka ch'án nkexrínchi tjen ch'ín Jesús

(Mt. 3.11-12; Mr. 1.7-8; Lc. 3.15-17)

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni nchat'á la ko iso tí sín levita, ikui sín kuinixjehe sín tí ch'in Juan kjuanchankíhi sín ch'án kixin:

—¿Nkexro tí jaha? —ichro sín.

20 Ntá kjuínchemáhya ch'án, ntáchro ch'án kixin:

—Náhi. Jehya janhan tí Cristo —ichro ch'án.

21 Ntá xíkjanckhíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkjatehe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjanckhíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'ín Juan inaá kixin:

—Náhi. Janhya —ichro ch'án.

22 Ntá kjuanchankíhi sín ch'án inaá kixin:

—¿Ntá nkexro jaha? T'ichjánxin tsonoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

23 Ntá kjuátehe ch'ín Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Takitjehérá ijnko ntja ntoí tsixin Inchéni” —mé xíkaha ichro ch'án kjuáteexín ch'án itén ch'ín Isaías k'uéchrónka xroon itén Dios ósé.*

24 A ntá tí sín fariseo mé tsíchr'án tí jehe sín kuikjanckhíhi sín tí ch'ín Juan.

25 A ntá kjuanchankíhi sín ch'án kixin:

—Ó ntáchrúa kixin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uéchrónka itén Dios ósé. ¿A ntá nkekuenté tikite chojni tí xíkaha? —mé ichro sín.

26 Ntá ntáchro ch'ín Juan kixin:

—Janhan na mé ìnta ó tíkitexián chojni. Ó ntihi tjenkákjan ijnko nkexro naxa tjátsòanhyará. 27 Jehe ch'án mé tsi ch'án nóton tí janhan. A ntá antsí má t'etoan ch'án, a ntá janhan na kénhyó. A ntá tósuàna chrókjuasíntanka tí correa tokaté ch'án —ichro ch'án.

28 Kaín tíha mé tsíkónhen tí chjasin it'in Betábara tí nó tjitoxin yaon tóhe tí ntarío Jordán tí kjuák'e ch'ín Juan kuikite chojni.

Ch'ín Jesús na mé éxí yóhe ijnko kolélo kuènte Dios

29 A ntá tí yaon chr'éxin mé k'uíkon ch'ín Juan kixin ó tjekui ch'ín Jesús. Ntá nixjehe ch'án tí sín tsíkóchjina ntáchro ch'án kixin:

—Tsjeherá tí nkexro tjekui mé tí Kolélo kuènte Dios jehe ch'án. Tíha mé tsjinxín ijié chojni chjasintajni. 30 Janhan mé k'uéxrjanka kixin tí iton tí janhan mé tsichréhe ijnko nkexro antsí t'etoan, a ntá janhan la kénhyó tétòan kixin naxa kohyana na jehe ch'án la ó xráxín tjen ch'án. 31 Kjaxin janhan naxa chonhya nkexro tíha. A ntá xra ó k'uinka kjuak'é kuikitexián chojni ìnta kixin tí chojni nación Israel mé chrókjuátsòanxín sín ch'án —ichro ch'ín Juan

32 Kjuintaxín ntáchro ch'ín Juan kixin:

—Ó k'uíkuan kixin tí Nchakuen Dios mé k'uínkajinxín nkaya nkajni na éxí yóhe ijnko kontóá k'uínkajin la ko kjuák'e va ntoí tí tjen ch'án. 33 A ntá janhan kjaxin naxa chonhya nkexro tíha. A ntá tí nkexro k'uètuanna kixin tsjak'é tsíkitexián chojni ìnta mé tsíchrónka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsòanxián janhan kixin tí nkexro a mé tsíkitexin ch'án Nchakuen Dios chojni. 34 A ntá janhan jie mé ó k'uíkonxín kuan kixin xíkaha kónhen tí jehe ch'án, a ntá xrjankaxián kixin táha mé Xjeen Dios tíha —mé xíkaha chrónka ch'án.

Tí sín saxín kjueyá ch'ín Jesús

* 1:23 Isaías 40.3

³⁵ Tí yaon chr'éxin kjuák'e ch'ín Juan la ko iyó tí sín k'uájiko ch'án, ³⁶ a ntá xrinahya k'uikon ch'án k'uátsínka ch'ín Jesús. Ntá ntáchro ch'ín Juan kixin:

—Tsjeherá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús. ³⁸ Ntá kuinkátjía ch'ín Jesús k'uikon ch'án kixin tinkáchréhe sín ntá kjuanchankíhi ch'án sín kixin:

—¿Xá nkehe xritjeyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

³⁹ Ntá kjuátehe ch'án ntáchro ch'án kixin:

—Íntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uikon sín nketí nchia kjuák'e ch'án ntá k'uéjóko sín ch'án kuenté tí kónjín kixin kjuíji sín ntiha como las cuatro kónjín.

⁴⁰ A ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chónka ch'án ijnko savé mé it'in Simón Pedro. ⁴¹ Na ntá tuénxín tí ch'ín Andrés sákjuíkjeyá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexín kixin Cristo.

⁴² A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sintak'ian Cefas —ichro ch'án.

A ntá tí palabra Cefas la ko tí palabra Pedro na mé yóí mé t'axrjexín kixin ixro tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxin mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kixin:

—Chréhé tí janhan —ichro ch'án.

⁴⁴ A ntá tí ch'ín Felipe mé chjasén ch'án mé it'in Betsaida tí chjasén ch'ín Andrés la ko ch'ín Pedro. ⁴⁵ Ntá tí ch'ín Felipe mé sákjuíkjeyá ch'án tí ch'ín Natanael na ntá chénka ch'án kixin:

—Ó k'uitjani tí nkexro tsi éxí k'uéchrónka tí ch'ín Moisés tí tsíkjin ch'án tí xroon chrónka tí nkehe k'uetqan Dios. Kjaxin tí sín k'uéchrónka tí itén Dios chr'éxin mé k'uéchrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrjexín tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kixin:

—Xrákiá ts'ikuan —ichro ch'án.

⁴⁷ Na ntá k'uikon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankíhi ch'án tí ch'ín Jesús kixin:

—¿Nkexrí kixin tjátsoanna? —ichro ch'án.

Ntá kjuátehe ch'ín Jesús ntáchro ch'án kixin:

—Naxa nixjaahya tí ch'ín Felipe mé k'uíkuan tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajní tsétuenhén tí nación Israel —ichro ch'án.

⁵⁰ Ntá kjuátehe ch'ín Jesús ntáchro ch'án kixin:

—Jehya tí nkehe ntáxrjan k'uíquān tjenkankiá nta t'óna to higo, jehya táhó tsítékákonxian. Náhi. Chr'éxin xiki í jnko kjuaxroan antsí má jié ts'íkuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsoxrjanka kixin tsoxitjehe tí nkajní ts'ikonrá itsi itsjé tí sín ángel kuènte Dios mé ts'it'ótjen la ko ts'inkajin tí tjén janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí iné ch'ín Jesús tsík'íyehé sín tjan la ntiha tjen tjan koí. ² Kjaxin tsík'íyehé sín tí ch'ín Jesús la ko tí sín k'uájiko ch'án kixin sátsji sín tí tsíkótehe sín ntiha. ³ Ntá ó tsík'ankehe sín tí xranvino ik'uí sín na ntá tí iné ch'ín Jesús mé ntáche tjan tí jehe ch'án kixin:

—Ó tsík'ànka xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ¿nkehe tsonhen chronka? Naxa kjuixrakáhya tí yaon tsjásian kjuaxroan —ichro ch'án.

⁵ A ntá tí iné ch'án na mé ntáche tjan tí sín ch'e xra kixin:

—Tí chrén nkehe chrók'uetuanhanrá ch'án chrókjuínchexiteyará —ichro tjan.

⁶ A ntá siín ntiha injon chi tsík'óna xro na mé tíha tjiá nta t'ònti sín kixin xikaha mé ts'axrjehe tí jié chóna sín koí, mé xikaha kuinkáchónki tí sín judío. Na mé jnkojnko chi mé tjacha tikia ochenta litro la o ciento litro nta. ⁷ Ntá k'uetuēnhen ch'ín Jesús tí sín ch'e xra kixin:

—Tíkiará nta kaín tí chi a tsokaón —ichro ch'án.

Ntá kjuínchexiteyá sín kjuínchekaón sín nta jnkojnko tí chi a. ⁸ A ntá ntáche ch'ín Jesús tí jehe sín inaá kixin:

—Tákjá intsí nta tjiá chi tjikuehé tí ch'ín t'etōan tí kia a —ichro ch'án.

Ntá xikaha kjuích'e sín kjuínchexiteyá sín. ⁹ A ntá tí ch'ín t'etōan tí kia a mé tsjexín ch'án tí nta tsík'óna xranvino kjónté noehya ch'án nketí kuixin tí xran a. Jehó tí sín ch'e xra kuikao sín mé nohe sín kixin jehe sín mé tsíkakitsje sín nta. Ntá tí ch'ín t'etōan mé k'uíyehé ch'án tí ch'ín tsíkótehe. ¹⁰ Ntáche ch'án kixin:

—Xrácín tí sín tjasin kia la senó tí xranvino náxrjón tjanjon sín na tió chrók'uíhya tí sín tsíkóchjina na ntá tjanjon sín tí xranvino náxrjónhya. A ntá jaha la náhi. Senó kjuakéchjina tí xranvino antsí má náxrjón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuích'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxin ch'án nkexrí imá jié tí kjuachaxin kuènte ch'án, a ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uátsínka kia, a ntá sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí nínko jié

(Mt. 21.12-13; Mr. 11.15-18; Lc. 19.45-46)

¹³ A ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjuí ch'án chjasin Jerusalén. ¹⁴ Ntá nkaxenhen tí nínko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha

kjaxin tjejótj_{ax}in tí sín tjinkíxixín chichaon. ¹⁵ Ntá ch'ín Jesús mé kuákja ch'án ihno tsíxehe sín ntiha, kjuích'ena ch'án ijnko chikoté, ntá kuakitsjexín ch'án sín nkaxenhen n_{in}ko kaín xín sín la ko tí kolélo la ko tí koxinta. Na ntá tí ntamesa tjinkítóxixín sín tí chichaon mé kótéka ch'án tsíkjaminkí xènjn tí chichaon a. ¹⁶ Ntá k'uetuēnhen ch'án tí sín nchekji tí kontóá a kíxin:

—Takítsjerá kaín tí nkehe a. Ch'énahyará ijnko n_{in}sin tí ntōe T'aná ntihi —ichro ch'án.

¹⁷ Ntá xráxinkaon tí sín k'uájiko ch'án ti nkehe tsíkjin sín ósé kíxin: “Éxí xrohi k'uákjen asenná n_{in}ka_{van} kíxin tí ntōa tjikosáyehya sín.” *

¹⁸ Ntá tí sín judío mé kjuanchankíhi sín ch'án kíxin:

—¿Xá nkerí kjuaxroan tsjásixián tsjákoxian nketí kjuachaxin chonta kíxin xikaha kjuích'e tíhi? —ichro sín.

¹⁹ Ntá kjuátehe ch'ín Jesús kíxin:

—Tí ts'oxikará tí n_{in}ko i ntá iníkoá yaon la ó sít'ána n_{in}xin tsjak'e inaá —ichro ch'án.

²⁰ Na ntá ntáchro tí sín judío a kíxin:

—Cuarenta y seis nánó k'uéjé sín kjuích'ena sín tí n_{in}ko i, a ntá jaha ntáchrua kíxin iní yaon koá s_{ich}'ena inaá, ichrua —ichro sín.

²¹ Kjánchó kienxínhya sín kíxin tí n_{in}ko ntáchro ch'ín Jesús la tí cuerpo kuènte ch'án. ²² Ntá tió kjuixin xechón ch'án ntá xráxinkaon tí sín k'uájiko ch'án kíxin xikaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

²³ Tió kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kíxin ó k'uíkon sín tí kjuaxroan kjuasin ch'án.

²⁴ Kjánchó ch'ín Jesús la kuítekakuenhya ch'án tí jehe sín kíxin jehe ch'án la ó nohe ch'án jína nkexrí tónhen asén jnkojnko chojni ²⁵ a ntá t'ichjánxienhya ch'án kíxin ninkexró chróchenka ch'án nkexrí tjenkayáxin chojni kíxin ó kónohe ch'án kaín nkehe tónhen asén kaín xín chojni.

3

Ch'ín Nicodemo kuinixjehe ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjetoan kuènte tí sín Israel. ² A ntá ijnko tie kjuíchréhe ch'án tí ch'ín Jesús a nixjehe ch'án ntáchro ch'án kíxin:

—Maestro, kónoheni kíxin It'éni tjen nkaya nkajní mé tsíchr'án k'uinka tsjákohéni kíxin tí jehya Dios chrókjuak'ekoa la xitjahya chrókjuásian kjuaxroan jié —ichro ch'án.

³ Ntá kjuátehe ch'ín Jesús ntáchro ch'án kíxin:

—A ntá tsotjonka ijnko nkehe imá tjetoan. Tí nkexro tsokjéhya n_{in}xien mé xitjahya ts'ikon tí kjuachaxin ts'etōan Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án kíxin:

—Ó tádana, ¿nkexrí chrókokjína n_{in}xien? ¿Á chrók'uíxanhan tsee naná inaá ntá chrókokjína n_{in}xien ní? —ichro ch'án.

⁵ Ntá kjuátehe ch'ín Jesús ntáchro kíxin:

—Ntá tsotjonka ijnko nkehe imá tjetoan. Jehó tí sín tsíkokjéxín ntá la ko kjaxin tsíkokjéxín Nchakuen Dios mé ts'áyéhe sín tí kjuachaxin kuènte Dios.

⁶ Tió ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsokjéxín n_{in}xien ijnko chojni na ntá ts'áyéhe sín tí Nchakuen Dios a. ⁷ Chrakonhya tí nkehe xrjanka kíxin “Kaín chojni t'ichjánx_{in} tsokjíhi

* 2:17 Salmo 69.9

nixien.”⁸ Éxí yóhē tí tinhín tí chjéhe xrinto ntá noahya nketí kujxin tí xrinto la ko noahya nketí sátsji na mé kjaxin xikaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xíkjanckankí ch'ín Nicodemo inaá kixin:

—¿Nkekuènté kixin xikaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án kixin:

—¿Jaha ijnko maestro imá t'etoan tí nación Israel ntá naxa tiénxinhya tí nkehe ní? ¹¹ Chaxín tjétjonka tí nkehe nòna la ko tí nkehe k'uíquán ntá títékákonahya jaha. ¹² Tí nkehe tjétjonka la kuènte chjasintajni ó ntá kjónté la títékákonahya jaha. ¿Ntá nkexrí chrókuítekáván tí chrótjonka nkehe kuènte nkaya nkajní? ¹³ Kohya í jnko nkexro k'uit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kujxin ch'án. ¹⁴ Éxí yóhē ch'ín Moisés tió k'uíxín sín tí nteje, a ntá Dios mé k'ueetoan kixin sinchekjanoya ch'án ijnko konche tsjak'enkani ch'án ijnko nta, ntá xikaha kjuích'e ch'án kjuak'enkani ch'án tí konche tí nta a komá sín tí konche ntá kuaá sín k'uénhya sín, * mé xikaha tsonhen tí Xjeen Dios K'óna Chojni mé t'ichjánxin kixin tsjak'enkani ch'án ijnko ntacruz ¹⁵ kixin mé xikaha kaín nkexro tsinkáchónki tí jehe ch'án mé tsaá sín tsochóna sín kjuachón jnkochrín.

Dios imá tjuèhe ch'án tí chojni chjasintajni

¹⁶ 'Kixin Dios mé imá tjuèhe ch'án chojni chjasintajni ntá kjuanjon ch'án jnkokoáxón Xjeen ch'án, kixin ntá jnkojnko chojni tsinkáchónki tí Xjeen ch'án mé ts'itjáyanhya sín tsochóna sín kjuachón jnkochrín. ¹⁷ Chr'ánhya Dios tí Xjeen ch'án chjasintajni kixin sinchekjasóte chojni kixin tí jié kjuasin sín. Náhí. Ó jehí ichr'án ch'án tí Xjeen ch'án chjasintajni kixin sinchekaá chojni.

¹⁸ 'Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitoxín Dios tí ijje sín tsjasóte sín kixin titekakuenhya sín tí jnkokoáxón Xjeen Dios. ¹⁹ Na mé xikaha Dios sinchekjasóte sín jnkochrín kixin ó kui tí nkexro t'inkaséyanxín chjasintajni na kjónté ntá antsí má tóxrjínhín sín tí sítié a. A ntá tí t'inkaséyan la náhí kixin naxa tóxrjínhín sín tí nkehe jínahya tjejóch'e sín. ²⁰ Kaín tí sín tjejóch'e nkehe jínahya na mé tóxrjénhya sín t'inkaséyan chrókóchjinehya sín kixin tsonoxínhya tí nkehe jínahya tjejóch'e sín. ²¹ A ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuènte Dios kixin tsonoxín tí nkehe ch'e sín kixin ntá kaín xín chojni mé tsjatsqan sín kixin tjejóch'e sín tí nkehe tóxrjínhín Dios.

Ch'ín Juan Bautista chrónka inaá kuènte ch'ín Jesús

²² Na ntá chr'éxin ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjóko sín ch'án kuíkite ch'án chojni. ²³ Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuíkite ch'án chojni kixin ntiha mé yeé ntá síín. Na ntá nkáki sín kuíkite sín. ²⁴ Mé xikaha kónhen naxa kjuák'echjinhya ch'ín Juan.

²⁵ Ntá tí sín k'uájiko ch'ín Juan la ko tí sín judío mé kjuachaxín kichó sín kixin nkexrí íchá jína chrókótjuáxin chojni, ichro sín. ²⁶ A ntá tí sín k'uájiko ch'ín Juan sákjuítsjehe sín ch'án chénka sín ch'án kixin:

—Maestro, tí ch'ín kjuák'ekoa tóhe ntarío Jordán, na mé tí nkexro tsíchronka kuènte ch'án, la mé itjen ch'án tikite ch'án chojni la ko kaín xín chojni mé tjichréhe sín ch'án —ichro sín.

²⁷ Na ntá ntáchro ch'ín Juan kixin:

* 3:14 Números 21.9

—Tí chrókjuanjonhya Dios kjuachaxin ntá chrokjuahya chrók'uáyéhe chojni. ²⁸ Ó kuínhínrá ntoá k'uéxrjanka senó kixin janhya tí Cristo. Náhí. Janhan ó kuítuannuá kuítónxián ntia tsoxrjanka kixin ó tsi ch'án. ²⁹ Éxí yóhe ijnko ch'ín tsotehe na mé jehe ch'án mé ts'áyéhe ch'án tí ichjién ch'án. A ntá tí ch'ín chóxin ch'án mé chéhe asén ch'án tjetinhin ch'án tjenixja tí ch'ín ts'áyéhe ichjién a. Mé xikaha janhan imá chàna kixin xikaha sítónhen kixin itsjé chojni sítóchjinehe sín tí ch'ín Jesús tsinhin sín nkehe tí tjenixja ch'án. ³⁰ A ntá jehe ch'án t'ichjánxin antsí ts'etoan ch'án. A ntá janhan la kénhyó —mé chro ch'ín Juan.

Tí nkexro kuixin nkaya nkajní

³¹ Tí nkexro kuixin nkaya nkajní mé kaín nkehe t'etuēnhen ch'án. A ntá ijnko chojni kuēnte chjasintajni ó mé chrónka kuēnte chjasintajni ó. A ntá tí nkexro kuixin nkaya nkajní mé kaín nkehe t'etuēnhen ch'án. ³² Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án. ³³ A ntá jnkójín nkexro titekaon sín tí nkehe chrónka ch'án na mé xikaha tjakoxin ch'án jie kixin chaxín ntoá chrónka Dios ³⁴ kixin tí nkexro ichr'án Dios mé nixja itén Dios kixin jehya intsíkoá tí Nchakuen Dios k'uáyéhe ch'án. Náhí. ³⁵ It'éni Dios mé tjuēhe ch'án tí Xjeen ch'án na mé xikaha ó tsíchjéhe ch'án kjuachaxin kixin kaín xín nkehe ts'etuēnhen ch'án. ³⁶ A ntá tí nkexro tsitekaon tí Xjeen Dios mé xikaha tsochónta sín tí kjuachón jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xikaha. Tí sín a mé Dios sinchekjasóte sín jnkochrín.

4

Ch'ín Jesús ikjo ch'án ijnko tjan samaritana

¹ A ntá tí sín fariseo mé kónohe sín kixin antsí tsjé chojni chréhe sín tí ch'ín Jesús kuikite ch'án sín na ntá tí chojni chréhe sín tí ch'ín Juan la kánhyó tsjé sín. ² Kjánchó jehya ch'ín Jesús kuikite ch'án chojni. Méxra tí sín k'uájiko ch'án mé kuikite sín chojni. ³ A ntá tió kónohe ch'ín Jesús kixin xikaha tsíkinhin tí sín fariseo ntá k'uaxrjexín ch'án tí estado Judea xíkjan ch'án estado Galilea ínaá.

⁴ Ntá t'ichjánxin ts'átsínka ch'án estado Samaria. ⁵ A ntá kjuíji ch'án ijnko chjasin mé it'in Sicar kuēnte estado Samaria, mé chjino tí nonte tsíkjinchekitonhen ch'ín Jacob tí xjeen ch'án José. ⁶ La ó chjino tjen tí tōye takitsje chojni ìnta mé it'in Ìnté Jacob. Na ntá ó chonkixin kjui sín ntiha. Méxra tí ch'ín Jesús la imá kóxrjé ch'án kixin imá kjín tí ntia kjuixin ch'án ntá kjuák'etjxin ch'án chrínta tí tōye takitsje sín ìnta. ⁷⁻⁸ Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuēnte estado Samaria ikui tjan tsakitsje tjan ìnta. Ntá ntáchro tí ch'ín Jesús kixin:

—Chjina intsí ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kixin:

—¿Nkekuenté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xikaha kjuanchankí tjan kixin tí sín judío mé ninkehó t'ikonhya tí sín samaritano.) ¹⁰ Na ntá ntáchro ch'ín Jesús kixin:

—Chrókónoha tí nkehe tjanjon Dios la ko chrókjuatsōan jaha nkexro tí tjetjanchaha ntá ntá chrókjuanchana ntá, ntá chrótjaha tí ntá tjechón chaxín —ichro ch'ín Jesús.

¹¹ Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntá kixin tí tòye i la imá ninka? ¿Ntá nkexrí tsochjina tí ntá tjechón tjemé? ¹² Tí nkexro k'uaxrjeníxinni mé Jacob mé kuítóeheni tí tòye tjiá ntá ntihi la ko kjaxin ik'uí ch'án tí ntá la ko kjaxin ik'uí tí xjeen ch'án la ko tí iko kuènte ch'án. ¿A ntá xá jaha la xá antsí má tjeoan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátehe ch'ín Jesús ntáchro ch'án kixin:

—Tí sín it'i sín tí ntá ntihi tí tòye i nántaxón its'en sín ntá inaá. ¹⁴ A ntá tí sín its'i sín tí ntá sintakitonhan sín mé í ts'enhya sín ntá inaá. Tí ntá sintakitonhan sín mé ts'óna éxí yóhe ijnko ntá ts'axrje nkaya asén sín mé tsinkákjanjon tí kjuachón tsochóna sín jnkochrín —ichro ch'án.

¹⁵ Ntá ntáchro tí tjan a inaá kixin:

—Chjina tí ntá, a ntá ts'énhyana ntá inaá la ko ts'inkahya ntihi tsakítsje ntá —ichro tjan.

¹⁶ Ntá k'uetōan ch'ín Jesús kixin:

—Sátjia tjík'iyehé xiá ntá ts'inkará ntihi inaá —ichro ch'án.

¹⁷ Ntá ntáchro tjan kixin:

—Chontahya xíná —ichro tjan.

Ntá ntáchro ch'ín Jesús kixin:

—Chaxín ntáchrua kixin chontahya jaha xiá. ¹⁸ K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrua kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuān kixin jaha ijnko nkexro chrónka itén Dios. ²⁰ A ntá tí sín k'uaxrjeníxinni k'uúxin ósé mé k'uéxraxinkakonxín sín Dios tí jna ntihi. Kjánchó jahará chojni judío mé ntáchrorá kixin tí ninko jie chjasin Jerusalén kaín ni chrórxaxinkakonxínni Dios —ichro tjan.

²¹ Ntá ch'ín Jesús ntáche ch'án tjan kixin:

—Títekávan kixin tjetsi tí hora a tsoxráxinkákonxínhyará It'éni Dios tí jna ntihi la ko tsoxráxinkákonxínhyará ch'án chjasin Jerusalén kjaxin. ²² Jahará chojni samaritano chonhyará tí nkexro xráxinkaonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjinhin chojni tí jie yámá sín mé ts'axrjeníxin tí sín judío. ²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chrórxaxinkaon sín It'éni la mé asén sín ó tsoxráxinkakonxín sín It'éni Dios. Dios mé tóxrjínhin ch'án kixin chojni xikaha chrókjuich'e sín chrórxaxinkakonxín sín ch'án. ²⁴ Jehe Dios na mé nchakuen ó, a ntá tí sín chrórxaxinkaon sín ch'án na mé t'ichjánxin kixin asén sín ó tsoxráxinkakonxín sín ch'án —mé xikaha chrónka ch'ín Jesús.

²⁵ A ntá ntáchro tí tjan a kixin:

—Ó nòna kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kixin:

—Tí nkexro a la mé janhan tjétjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uúkon sín kixin tjenixjehe ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjinkaon ch'án na nkekuèté nixjehe ch'án tí tjan a. ²⁸ A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Ìntará sátsjitsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókójehya tí nkexro i Cristo? —ichro tjan.

³⁰ Na ntá tí chojni a mé xrákuaxín sín tí chjasin a ntá kuitsjehe sín tí ch'ín Jesús. ³¹ Naxa tihya sín nachrohe tí sín k'uájiko ch'án mé chrónóehē sín ch'án ntáchro sín kixin:

—Maestro, kjaxian chrókjonte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kichó sín kixin:

—¿Xá jnkójín sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxí yóhe chrókjoné nkehe mé tí sít'a tí xra la ko tsjixinna tí xra kuente tí nkexro chr'ánna k'uinka. ³⁵ Ntáchrórá kixin: “Noó nitjó naxa t'itjáyan tsochónhenni ntá tsotjáni noatrigo”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxámá kixin ó jína chrótjáni. ³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochrixin. Ntá tí sín k'uenká sín nonte la ko tí sín tjá sín jnkokón tsochéhe sín. ³⁷ Mé xíkaha tsoxiteyá tí nkehe ntáchro sín kixin: “Ijnko nkexro mé t'enká noa, a ntá ókjé sín tsotjá sín tí noa a”, ichro sín. ³⁸ A ntá janhan ichr'an tí jahará tsotjará ijnko nonte tsík'énkahyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

³⁹ A ntá itsjé tí sín samaritano kuente tí chjasin ntiha mé kjuankixin kuinkáchónki sín tí jehe ch'án kixin xíkaha chrónka tjan kixin jehe ch'án ó chrónka ch'án kaín xín nkehe kjuích'e tjan tí senó a. ⁴⁰ A ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóehē sín ch'án kixin tsitohe ch'án ntiha. Ntá kúitohe ch'án ntiha iyó yaon. ⁴¹ Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án. ⁴² Ntá ntáche sín tí tjan a kixin:

—Ntá jie jehya jehó tí nkehe chrónka kuítekaonni. Náhí. Tí jie ó kuínhinni nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitohe jína ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea. ⁴⁴ A ntá jehe ch'án tsintáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án. ⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehe sín ch'án jína kixin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntiha.

⁴⁶ Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjaminca ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum.

⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóehē ch'án tí ch'ín Jesús kixin sáchrókjui ch'ín Jesús ntøe ch'án sinchekitohe jína tí xjeen ch'án ó tjet'en xjan. ⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

⁴⁹ Ntá chrónò a tí ch'ín ch'ehe xra gobierno ntáchro ch'án kixin:

—¿Á chrókójínahya sáchrókjuíni ntøna jaí kixin xjanna ó tjet'en? —ichro tí ch'ín a.

⁵⁰ Ntá kjuátehe ch'ín Jesús ntáchro ch'án kixin:

—Ikjan sátsjia ntøa kixin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án. ⁵¹ A ntá kjuíji ch'án chjino ntøe ch'án ntá xrínahya tí sín ch'ehe sín ch'án xrä kjuíxinhin sín ntia chrónka sín kixin:

—Xjaan la ó jína tjen —ichro sín.

⁵² Ntá kjuanchankíhi ch'án sín kixin nkehora kjuankíxin kuítóhe xjan jína, na ntá chrónka sín kixin:

—Ijna la una kónjín mé kjuíin tí sóa —ichro sín.

⁵³ Ntá kónohe tí it'é xjan kixin xikaha tí hora tsintáchro ch'ín Jesús kixin tí xjeen ch'án na ó jína tjen. A ntá jehe ch'án la ko kaín tí sín siín ntøe ch'án mé kuinkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tió kuixin ch'án estado Judea ikjan ch'án estado Galilea.

5

Ch'ín Jesús kjuínchekitohe jína ijnko ch'ín tsík'en tote chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xikjan ch'án chjasin Jerusalén inaá. ² A ntá ntaha chjino tí ntója t'ixenxín kolélo chjasin mé tjen ijnko pila tóxyoyéya ntä mé nkiva hebreo tí ntä mé it'in Betesda. A ntá chrínta tí pila siín in'ó cuarto ntsíntí. ³ Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en toté. Tjejóchónhen sín kixin nkehora tsinkí ntä ⁴ kixin nántaxón k'uínkajin ijnko ángel kjuíankí ntä kjuínchekinkí ntä. A ntá tí nkexro senó tsjiánkí ntä mé tsitohe jína kjónté cualquiera chin chóna. ⁵ A ntá ntaha kjuák'e ijnko ch'ín na mé chóna ch'án treinta y ocho nánó níhi ch'án. ⁶ A ntá tió k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsitøha jína? —ichro ch'án.

⁷ Ntá ntáchro tí sijníhi kixin:

—Chóntahyani ninkexró tsjinkitsani tsjiánkíni ntä. A ntá tí tjinkaonni chrókjuíánkíni ntä la ntá ókjé nkexro tjítaón ntia tjiánkí ntä senó —mé chro tí sijníhi.

⁸ A ntá k'uetøan ch'ín Jesús kixin:

—Ijie la t'inkatjen, tjatsíyan kaniaa, itjia —ichro ch'án.

⁹ Ntá tuénxín kuítóhe ch'án jína, ntá kjuatsen ch'án kaniee ch'án kjuankíxin itji ch'án. Kjánchó yaon sábadó tíha mé tí yaon t'øk'éhe sín. ¹⁰ Mé xikaha tí sín judío ntáche sín tí ch'ín kuítóhe jína kixin:

—Ijie tí yaon t'øk'éheni ntá kohya kjuachaxin tsamá kaniaa —ichro sín.

¹¹ A ntá ntáchro tí ch'ín a kixin:

—Tí nkexro kjuínchekitøna jína mé k'uetuanna kixin tsjatsíyan kaniaa la ko sátsjia —ichro ch'án.

¹² Ntá kjuanchankíhi sín ch'án kixin:

—¿Nkexéhe tí nkexro k'uetuannhan kixin tsjatsíyan kaniaa la ko sátsjia? —ichro sín.

¹³ A ntá tí ch'ín tsíkitohe jína na í kjuátsoanhya ch'án tí nkexro kjuínchekitohe ch'án jína kixin ntaha la siín nchónhya chojni, a ntá ntahó k'uitáyaxín ch'ín Jesús. ¹⁴ A ntá chr'éxin ch'ín Jesús xeta ch'án tí ch'ín a nkaxenhen tí njnko jie ntá ntáchro ch'án kixin:

—Tsjehé kixin ijie la ó jína tjen jaha la í tjásinhya jie inaá. A ntá tí tsjásian jie inaá a ntá antsí má jínahya tsonhan —ichro ch'án.

¹⁵ A ntá sákjuí tí ch'ín a ntá chénka ch'án tí sín judío kixin jehe ch'ín Jesús mé kjuínchekitohe ch'án jína. ¹⁶ Mé xikaha tí sín judío kjuankíxin sín chónkíhi sín

tí ch'ín Jesús la ko chrók'óyán sín ch'án kixin kjuínchekitohe ch'án chojni jína tí yaon t'ok'éhe sín. ¹⁷ Kjánchó ch'ín Jesús ntáche ch'án tí jehe sín kixin:

—Méxra T'aná naxa tjech'e ch'án xra. A ntá janhan kjaxin tjét'a xra —ichro ch'án.

¹⁸ Méxra xikaha tí sín judío antsí tjinkaon sín chrók'óyán sín ch'án kixin kuitekakuenhya ch'án tí ley kuente tí yaon t'ok'éhe sín la ko kjaxin ntáchro ch'án kixin tí It'é ch'án la mé Dios, mé xikaha ncheyóhe ch'án asén ch'án Dios.

Tí kjuachaxin chóna tí Xjeen Dios

¹⁹ Ntá ntáche ch'ín Jesús tí jehe sín kixin:

—Ijnko nkehe tjetoan tsotjonkará kixin tí Xjeen Dios nkaya nkajní tí jehó kjuachaxin kuente ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xikaha ch'e ch'án. ²⁰ A ntá tí It'é mé tjuèhe tí Xjeen ch'án, la ko tjakohe ch'án kaín xín xra ch'e ch'án, la ko antsí tjetoan tí xra naxa tsjakohe ch'án kixin ntá tsochrakonrá kixin ts'ikonrá tí xra sich'e ch'án. ²¹ Tí It'é mé chóna kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'án. ²² A ntá It'é la í sinchekitoexínhya ch'án ijié ninkexró. Kaín tí kjuachaxin kuente ch'án chjéhe ch'án tí Xjeen kixin sinchekitoexín ch'án ijié chojni chjasintajni ²³ kixin ntá kaín chojni tsjikosáyehe sín tí Xjeen éxí yóhe tjikosáyehe sín tí It'é ch'án. Tí sín tjikosáyehya tí Xjeen xikaha kjaxin tjikosáyehya sín tí It'é kixin jehe ch'án mé tsíchr'án tí Xjeen.

²⁴ 'Ijnko nkehe tjetoan tsotjonkará kixin tí jnkojínra tjejotinhínra tí nkehe tjakua la ko tinkachónkirá tí T'aná, mé tí nkexro ichr'ánna, na mé xikaha ó chontará tí kjuachón la ko tsjasótiahyará, na mé kuítóherá tí ntja chrók'uénxinra, la ntá jie kjuankixinra tsochontará tí kjuachón jnkochrín.

²⁵ Ijnko nkehe tjetoan tsotjonkará kixin ó tsi tí yaon, na mé jie tíha, mé xikaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóchón sín. ²⁶ Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón ²⁷ la ko kjaxin chjéhe ch'án kjuachaxin tí Xjeen ch'án sinchekitoexín tí ijié chojni chjasintajni kixin jehe mé tí Xjeen Dios K'óna Chojni. ²⁸ Chrakonhyará tjétjonkará xikaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án. ²⁹ A ntá ts'axrjexín sín tí tóye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'ín Jesús

³⁰ 'Tí jehó kjuachaxin kuéntana xitjahya sít'a ninkehó xra. A ntá jie ntakitoaxián tí ijié éxí k'uetuanna T'aná. A ntá tí nkehe ntakitoaxián la jína ntoá kixin tjínkakhonhya sít'a éxí tjínkavan. Náhí. Éxí tjinkaon T'aná, tí nkexro ichr'ánna, mé xikaha tjét'a. ³¹ A ntá tí chróxrjanka kixin nkexrí imá jína janhan la tíha la ninkehó kjuachaxin chróchóntahya. ³² Itjen í jnko nkexro tjechrónka nkexrí tjén janhan a ntá ó nóna kixin tí nkehe chrónka ch'án la sínkí. ³³ Jahará tsíkétuénhénra chojni kjuíkjanchankíhi sín tí ch'ín Juan kixin nkexrínchi tjén janhan. A ntá tí nkehe tsíkatehe ch'án la chaxín ntoá tíha. ³⁴ Kjánchó chontiaxinhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kixin jahará jína chrókuaará. ³⁵ Tí ch'ín Juan kjuák'e éxí yóhe ijnko xrohi kjuák'eche k'uínkaséyanxín la ko jahará kócháhará xikaha, kjánchó séhya kóxrjínhanra tí xrohi a. ³⁶ Kjánchó síin nkehe antsí tjetoan

tjako_xin nkexrí tjén janhan, a ntá kánhyó tjetóan tí nkehe tsíchrónka tí ch'in Juan. Tí xra₂ tjét'a, mé tí xra₂ kjuanjon T'aná sít'a tsjixinna tí xra₂, na mé tíha mé tjako_xin kixin chaxín T'aná tsíchr'án k'uinka. ³⁷ Kjaxin jehe T'aná, tí nkexro ichr'anna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uíkonhyará ch'án ³⁸ la ko kjaxin itén ch'án kuítóehya nkaya kjará kixin tjinkákonhyará tsítekáonrá tí Xjeen Dios tsíchr'án tsíki. ³⁹ Jahará nchekuáxinrá jína tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochrín. A ntá tí nkehe tsíkjin sín ósé mé chrónka kuènte janhan. ⁴⁰ Kjánchó jahará tjinkákonhyará tsochjinará tí tjén janhan kixin chrók'uayéhérá tí kjuachón a.

⁴¹ 'Janhan na tjéyáhya kixin chojni chrókjuikosáyana sín. ⁴² A ntá janhan ó nòna kixin jahará la tjuèhyará Dios. ⁴³ Mé k'uinkaxian janhan tí kjuachaxin kuènte T'aná. Kjánchó jahará la títekákonnahyará. A ntá tí chrókui í jnko nkexro kjuachaxin chrókuakitsjeníxin asén ó, a ntá tíha mé tjinkáonrá chrókuítekákonhénrá. ⁴⁴ ¿Nkexrí chrókuítekáonrá jahará kixin tjéyará kixin tí chojni chjasintajni chrókjuikosáyahará sín, a ntá tjéyáhyará tí kjuachaxin chrókjuanjon jnkokoá Dios? ⁴⁵ Tsontáchróhyará kixin janhan tsjáncháá jie tí jahará nkayakon T'aná. Náhí. Ch'ín Moisés mé tsjanchia ch'án jie tí jahará kixin tsontáchrórá kixin jehe ch'án kuinkachónkirá. ⁴⁶ Kja tí jahará chrókuítekáonrá nkehe tsintáchró ch'ín Moisés ntá chrókuítekáonrá tí janhan kixin tí xroon tsíkjin ch'án mé chrónka kuènte tí janhan. ⁴⁷ A ntá tí títekákonhyará tí nkehe tsíkjin ch'án, ¿ntá nkexrí chrókuítekákonnará nkehe ntáxrjan janhan? —ichro ch'án.

6

Ch'ín Jesús kjuanjon ch'án nkehe kjóne in'ó mil chojni (Mt. 14.13-21; Mr. 6.30-44; Lc. 9.10-17)

¹ A ntá chr'éxin ntá sákjuí ch'ín Jesús k'uátòye ch'án tí ntayaon Galilea na mé tí ntayaon Tiberias tíha. ² A ntá nchónhya chojni tinkáchréhe sín kixin k'uíkon sín tí kjuaxroan jie kjuasin ch'án kjuínchekitòhe ch'án jína tí sinníhi. ³ A ntá jehe tí ch'ín Jesús chríin ch'án ijnko jna na ntá ntaha kjuák'etjaxin ch'án la koí tí sín k'uájiko ch'án a. ⁴ A ntá í séhya ts'ixin tí kia pascua a mé kié tí sín judío a. ⁵ A ntá tí ch'ín Jesús k'uíkon ch'án kixin nchónhya chojni chríin sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'uèneni nkehe sine kaín tí chojni a? —ichro ch'án.

⁶ Mé xíkaha ntáchró ch'án kixin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án. ⁷ Ntá kjuátèhe ch'ín Felipe ntáchró ch'án kixin:

—Kjónté doscientos chichaon denario chróchóntani chrók'uínáxin tí niotja la naxa chrókjuachahya chrók'uáyéhe jnkójnko sín tot'ò tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchró ch'án kixin:

⁹ —Ntíhi tjen ijnko xjan ntoá chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni siín? —ichro ch'án.

¹⁰ A ntá ntáchró ch'ín Jesús kixin:

—Tétuènhén tí sín siín a kixin ts'ixitjaxin sín —ichro ch'án.

A ntá nchónhya ika yoa siín na ntá ntaha k'uixitjaxin sín na mé éxi in'ó mil chojni k'uixin sín. ¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikeyehe sín chjéhe sín kaín tí sín sítjaxin a. Xíkaha kjaxin k'óxikeyehe sín

tí koche. **A** ntá kaín sín kjóne sín éxí tjinkaon sín. ¹² Kjuixin kjóne sín ntá k'uetuēnhen ch'ín Jesús tí sín k'uájiko ch'án ntá chro ch'án kixin:

—Tjénájínrá tí nkehe tot'ò síxèhe sín kixin ts'itjáyanhya ninkehó —ichro ch'án.

¹³ Ntá xíkaha jehe sín kjuenájín sín kjuínchekaón sín teyó ntaxra tí tot'ò tí in'ó niotja tsík'óna noa cebada síxèhe sín tí kjuixin tsíkjine sín. ¹⁴ **A** ntá tí sín kjóne tí niotja k'uíkon sín tí kjuaxroan jié kjuasin ch'ín Jesús ntá chro sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni tsjakoheni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxēnhen sín ch'án tí xra rey kixin chrók'uetōan ch'án. **A** ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntiha.

*Éxí ijnko ntia xíkaha kjuítaón ch'ín Jesús tí ntayaon
(Mt. 14.22-27; Mr. 6.45-52)*

¹⁶ **A** ntá ó kóntó ntá tí sín k'uájiko ch'ín Jesús k'uínkajinxin sín jnā sákjuí sín chrínta ntayaon ¹⁷ k'uit'ótjen sín ijnko ntabárcō kjuankíxin sín ts'atōye sín ntayaon sátsji sín chjasin Capernaum. Na ó k'uíxin tie na naxa kjanhya ch'ín Jesús. ¹⁸ Ntá kjuankíxin chjéhe xrintō tsanka ntá kjuankíxin tinkákjaminkí ntá. ¹⁹ **A** ntá tió kjuacha sín á in'ó o injon kilómetro ntá xrinahya k'uíkon sín tí ch'ín Jesús tinkákóchjinehe ch'án tí ntabárcō, éxí ijnko ntia tjetjitaón ch'án tí ntá, ntá k'uíkon sín ntá imá chrakon sín. ²⁰ Kjánchó ntá chro ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcō. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² **A** ntá tí yaon chr'éxin na mé tí sín kuítóhe tóhe ntayaon na mé ó nohe sín kixin jnkokoáxón ntabárcō k'uékjak'e ntiha la ko ó nohe sín kixin ch'ín Jesús kjá ní sátsíkjikohya sín ch'án na mé k'uíkon sín kixin jehó tí sín k'uájiko ch'án sátsíkji sín. ²³ Kjánchó siín ntabárcō tixín chjasin Tiberias tinkákóchjinehe tí nó kjónexín sín tí niotja kjuanchaxín ch'ín Jesús kjuasáyé Dios. ²⁴ **A** ntá tió k'uíkon sín kixin kohya ch'ín Jesús la ko kjaxín kohya tí sín k'uájiko ch'án, ntá jehe sín mé k'uit'ótjen sín iso ntabárcō ntá sákjuí sín chjasin Capernaum sákjuíkjeyá sín tí ch'ín Jesús.

Ìnchéni Jesús mé éxí niotja tjanjon kjuachón

²⁵ **A** ntá tóhe ntayaon xéta sín tí ch'ín Jesús ntá kjuanchankíhi sín ch'án kixin: —Maestro, ¿nkesá k'uinka ntihi? —ichro sín.

²⁶ Ntá kjuátehe ch'ín Jesús ntá chro ch'án kixin:

—Ó nōna kixin jahará tjéyará tí janhan kixin kjónterá niotja kókjahará, la jehya kixin kiénxinrá tí kjuaxroan kjuásian. ²⁷ Chrókjuich'ehyará tí xra chrók'uite tí nkehe chrókjónterá tjoka tsjeje ó. Náhí. Chrókjuéyará tí nkehe chrókjuejehya chrókjónterá chrók'uayéxinrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjakoxin ch'án kixin tí Xjeen ch'án mé chóna kjuachaxién tí jehe ch'án —ichro ch'ín Jesús.

²⁸ **A** ntá kjuanchankíhi sín ch'án kixin:

—¿Nkexrí chrókjuich'eni chrokjuinchexiteyáni nkexrí tjinkaon Dios? —ichro sín.

²⁹ **A** ntá kjuátehe ch'ín Jesús ntá chro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuákoéxianni chrók'uikonni kixin ntá chrókuitekaonni tí jaha? ¿Nkehe tí xra ch'e jaha? ³¹ Tí sín tsík'axrjeníxinni k'uéjós sín ósé mé kjóne sín maná k'óna niotja tió k'uixin sín nteje mé xikaha tí xroon kuente Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkixin nkaya nkajní”^{*} —ichro sín.

³² A ntá kjuátehe ch'ín Jesús ntáchro ch'án kixin:

—Ijnko nkehe tjetoan tjonkará kixin jehya ch'ín Moisés kjuanjon tí maná k'óna niotja k'uínkajinxin nkaya nkajní. Náhí. T'aná mé tjetjanjon tí niotja chaxín jina k'uínkajinxin nkaya nkajní. ³³ Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kixin:

—Jaha Inchéni, jnkochrín chjehéni tí niotja a —ichro sín.

³⁵ A ntá ntáchro ch'ín Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín nta. ³⁶ Kjánchó éxí k'uétjonkará senó na ó k'uíkonrá tí janhan na kjónté naxa titekákonhyará. ³⁷ A ntá kaín tí sín chjina T'aná la tsochjina sín tí janhan. A ntá kaín tí sín tjejótochjinehe sín tí janhan la tsétuanhya sín kixin sátsji sín. ³⁸ Janhan k'uinkaxian nkaya nkajní jehya tí xra tóxrjina chrókjuít'a. Náhí. K'uinka kixin chrókjuít'a tí xra tóxrjinhin tí nkexro tsíchr'ánna. ³⁹ A ntá T'aná mé tí nkexro tsíchr'ánna mé tjinkaon ch'án kixin sintak'itjáyanhya ninkexró tí sín chjina ch'án na mé tjinkaon ch'án kixin janhan mé sintaxechón kaín sín tí yaon tsjixixín. ⁴⁰ Mé xikaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. A ntá janhan sintaxechón sín tí yaon tsjixixín —ichro ch'án.

⁴¹ A ntá tí sín judío kjuankixin sín kjonta sín tí ch'ín Jesús kixin tsintáchro ch'án kixin jehe ch'án mé tí niotja k'uínkajinxin nkaya nkajní. ⁴² Mé ntáchro sín kixin:

—¿Á jehya tí Jesús, it'é mé it'ín José, na mé chóxinni tí it'é la ko tí ìné ch'án? ¿Ntá nkekuènté ntáchro ch'án kixin nkajní k'uínkajinxin ch'án? —ichro sín.

⁴³ Ntá kjuátehe ch'ín Jesús ntáchro ch'án kixin:

—Títohérá tjóntahyará tí janhan. ⁴⁴ Kohya nkexro chrókóchjina tí tjén janhan tí chrókjuínkítsahya T'aná. A ntá tí sín tóchjina na mé sintaxechón sín tí yaon tsjixixín. ⁴⁵ Na mé tí sín k'uéchrónka itén Dios ósé mé tsíkjin sín xroon ntáchro kixin: “Dios mé tsjakohe ch'án kaín chojni.”[†] A ntá kaín tí sín tsíkinhin tí nixja T'aná la ko kjuakohe ch'án sín mé sítóchjina sín tí tjén janhan.

⁴⁶ Jehya kixin itjen ijnko chojni tsík'ikon T'aná. Náhí. Jehó tí nkexro kujxin tí tjén Dios mé tsík'ikon ch'án Dios. ⁴⁷ Chaxín tí nkehe tjéxrjanka kixin tí sín titekaon sín tí janhan mé ó tsochóna sín kjuachón jnkochrín. ⁴⁸ Janhan na mé tí niotja tjanjon kjuachón. ⁴⁹ Tí sín k'uaxrjeníxinrá k'uéjós ósé kjóne sín tí maná k'óna niotja tió k'uéjós sín nteje, a ntá kjónté ik'uén sín k'uitjayan sín. ⁵⁰ Tí nkehe xrjanka mé tí niotja k'uínkajinxin nkaya nkajní, a ntá tí sín sine tí niotja a mé ts'enhya sín. ⁵¹ Janhan mé tí niotja tjechón k'uínkajinxin nkaya nkajní. A ntá tí sín sine tí niotja a mé ts'ejóchón sín jnkochrín. Tí niotja tsjánjuan ts'ejóchónxin chojni chjasintajni mé ntona tíha —ichro ch'ín Jesús.

⁵² A ntá tí sín judío mé sítjité sín itjo sín kichó sín ntáchro sín kixin:

* **6:31** Salmo 78.24 † **6:45** Isaías 54.13

—¿Nkexrí chrókjuanjon ch'án ntøe ch'án chrókjóneni? —ichro sín.

⁵³ A ntá kjuátehe ch'ín Jesús ntáchro ch'án kixin:

—Ntá tsotjonkará kixin tí sintehyará ntøe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará. ⁵⁴ Tí sinterá ntøna la ko it'irá jnina ntá tsochontará kjuachón jnkochrín la ko janhan mé sintaxechnrá tí yaon tsjixín. ⁵⁵ Kixin ntøna na mé chaxín nkehe ine chojni la ko jnina na mé chaxín nkehe it'i chojni. ⁵⁶ Tí sín ine ntøna la ko it'i sín jnina mé jnkokoá tjenkayáxinkian sín la ko janhan mé xrikian sín. ⁵⁷ T'aná tsíchr'án ch'án tí janhan mé chóna kjuachaxin, a ntá janhan mé tjéchnxian tí jehe ch'án. Ntá tí sín sine tí ntøna mé ts'ejóchnxin sín tí janhan. ⁵⁸ A ntá tjénixja kuente tí niotja k'uínkajinxin nkaya nkajní na mé yóehya tí maná tsík'óna niotja kjóne tí sín tsík'axrjeníxinrá óse kixin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajní ntá ts'ejóchnrá jnkochrín —mé chro ch'ín Jesús.

⁵⁹ Kaín tíha mé kjuakøhe ch'án tí sín tsíkójnkotséxin tí njnko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrín

⁶⁰ A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

⁶¹ A ntá kónohe ch'ín Jesús kixin xikaha tóxakonhen sín kíenxínhya sín tí nkehe tsintáchro ch'án ntá kjuanchankíhi ch'án sín kixin:

—¿Á kjaxinrá tjinkákonhyará tsinhínrá tíhi? ⁶² ¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixin ch'án tí tsíkjak'e ch'án ósé? ⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjonkará na mé kuente tí Nchakuen Dios na mé tjejóchnxin chojni. ⁶⁴ Kjánchó isorá naxa títekákonnahyará —ichro ch'án.

Mé xikaha ichro ch'án kixin tí xrankíxixín ó kónohe ch'án kixin nkexro tí sín tsitekakuenhya sín ch'án la ko kónohe ch'án kixin nkexro sinchekji ch'án. ⁶⁵ A ntá ntáchro ch'án kixin:

—Méxra xikaha k'uétjonkará kixin ninkexró tsochjina tí tjén janhan tí tsjinkitsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'ín Jesús ntá xrínahya kuítóhe sín, í chrèhya sín ch'án. ⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxinrá tjinkáonrá xikaha sáchrókjuirá? —ichro ch'án.

⁶⁸ Ntá kjuátehe ch'ín Simón Pedro kixin:

—Jaha Ìnchéni, ¿nkekuénté tjanchankíhíni á sáchrókuini ókjé? Jaha tí tan chónka a mé tsochóntaxínni kjuachón jnkochrín ⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kixin:

—Janhan kjuéyá tí kaín rá teyórá la ko jnkójnirá ntihi mé ts'ónará ijnko jínahya —ichro ch'án.

⁷¹ Tíha mé t'axrjexín tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'ín Jesús.

7

Tí sín jnkokoá kíchó ch'ín Jesús mé kuítekakuenhya sín ch'án

¹ Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'oyán sín ch'án. ² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia.*

³ A ntá tí sín kichó ch'ín Jesús ntáche sín ch'án kixin:

—Chrókuitoahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian. ⁴ Kixin tíó tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhí. Chrók'uikon kaín xín chojni siín chjasintajni —mé chro sín.

⁵ Xikaha ntáchro tí sín kichó ch'án kixin kjaxin jehe sín titekakuenhya sín tí jehe ch'án. ⁶ A ntá kjuátehe ch'ín Jesús ntáchro ch'án kixin:

—Naxa kjuixrakáhya tí hora kuèntana tsjásian kjuaxroan. Ntá jahará la cualquier hora tjinkáonrá jína chrók'uikonrá kjuaxroan. ⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jína tí nkehe tjejóch'e sín. ⁸ Jahará la sátjirá tí kia a. A ntá janhan la tjíhya kixin naxa kjuixrakáhya tí hora kuèntana —ichro ch'án.

⁹ Mé xikaha ntáchro ch'án ntá kuítóhe ch'án estado Galilea.

Itjen ch'ín Jesús tí kia a

¹⁰ A ntá ó kjuixin sátsíkji tí sín jnkokoá kichó ch'ín Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án. ¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jína ch'án”; kjánchó í so sín ntáchro sín kixin: “Jehya chojni jína ch'án, méxra imá ch'iyehé ch'án chojni”, ichro sín.

¹³ Kjánchó noxínhya kjo sín xikaha kixin chrakonhen sín tí sín judío a.

¹⁴ A ntá ó kjuíji jnkosiné tí kia a ntá k'uixenhen ch'ín Jesús tí nínko jié ntá kjuankixin ch'án kjuako ch'án. ¹⁵ A ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakóehya ch'án? —ichro sín.

¹⁶ Ntá kjuátehe ch'ín Jesús ntáchro ch'án kixin:

—Tí nkehe tjákua la jehya kuèntana na mé tí xra kuènte tí nkexro tsíchr'ánna k'uinka. ¹⁷ Tí jnkojinrá tjinkáonrá chrókjuinchexiteyéhérá éxí tóxrjínhin Dios la tsonohará á chaxín kuènte Dios tí nkehe tjákua o á kuèntana tíha. ¹⁸ A ntá tí nkexro tjako tí nkehe t'axrjeníxin kja sín ó mé xikaha ch'e kixin tjinkaon sín kixin tí chojni ó mé chróchóntehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ ¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekáuenhyará tí nkehe tsíkjin ch'án. ¿Méxra nkekuènté tjinkáonrá chrók'oyánrá tí janhan? —ichro ch'án.

²⁰ Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'oyán tí jaha? —ichro sín.

²¹ Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá.† ²² A ntá ch'ín Moisés tsík'etōan kixin xjaanrá ntoá itsa xjan xroye, (kjánchó jehya ch'ín Moisés kjuankixin ch'án kjuako ch'án tíha, na mé tí sín tsík'axrjeníxinrá

* 7:2 Levítico 23.34 † 7:21 Juan 5.2-9

kjuankíxin sín kjuako sín tíha). Mé xíkaha nchekará xjan tí xroye a kjónté yaon t'ok'éheni. ²³ A ntá xíkaha nchekará xjan xroye tí yaon t'ok'éheni kixin xíkaha chrókjuinche'itjáyankíhyará ninkehó tí nkehe k'uetōan ch'ín Moisés, ¿ntá nkekuènté kixin ninkákonará tí janhan kixin kjuintakitoḥa jína ijnko chojni tí yaon t'ok'éheni? ²⁴ Chrókjuanchahyará jie kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjínhin Dios —mé chro ch'ín Jesús.

Ch'ín Jesús chrónka kixin nketí k'uaxrjeníxin ch'án

²⁵ A ntá iso sín chjasin Jerusalén kjuankíxin sín kjo sín kichó sín kjuanchankí sín kixin:

—¿Á jehya tí ch'ín a xritjeyá sín chrók'óyán sín? ²⁶ Ntá jie noxín tjen ch'án nixja ch'án kohya ninkexró nínkakonhen ch'án. Kjá tí síxreé titekaon sín kixin tí nkexro a chaxín Cristo tíha. ²⁷ Kjánchó ó noheni nketí tsíkjixín ch'án. A ntá tió tsi tí nkexro Cristo ntá ninkexró tsonoehya nketí tsixín ch'án —ichro sín.

²⁸ A ntá ch'ín Jesús kjuák'ekjako ch'án tí nínko jie ntá kuínhin ch'án kixin xíkaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkjixian. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naḥa chonhyará tí nkexro a. ²⁹ Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

³⁰ Ntá chrótsé sín ch'án chrókjuak'echjina sín ch'án ntá kjónté ninkexró tséhya sín ch'án kixin naḥa kjuanjonhya Dios kjuachaxin chrótsé sín ch'án.

³¹ Kjánchó itsjé chojni kuítekaon sín tí jehe ch'án. A ntá ntáchro sín kixin:

—A ntá tió chrókui tí Cristo la, ¿á má jie kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

³² A ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín ncha'tá t'etōan k'uetuēnhen sín iso sín policia kuēnte nínko tsotsé sín ch'án tsjak'echjina sín ch'án. ³³ A ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjija tí tjen tí nkexro ichr'ánna.

³⁴ A ntá jahará tsjeyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

³⁵ A ntá tí sín judío kjuankíxin sín kjuanchankíhi sín kichó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkiva griego kixin ntá tsjakōhe ch'án tí sín griego? ³⁶ ¿Nkexrí t'axrjexín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntarío tjechón

³⁷ A ntá tí yaon tsjixixín tí kia a mé tí yaon jie mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kja tí jnkojínrá ik'uénrá ntá xrákirá its'irá ntá. ³⁸ A ntá éxí ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje intá tjechón —ichro ch'án.

³⁹ Mé xíkaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naḥa tihya tí Nchakuen Dios kixin ch'ín Jesús naḥa sátsjihya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáchro ch'ín Jesús ntá ntáchro sín kixin: —Kja chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuèté chrókjuixín Galilea tí nkexro Cristo? ⁴² Tí xroon tsíkjin sín ósé mé chrónka kixin tí nkexro Cristo mé ts'axrjeníxin tí sín k'uaxrjeníxin tí ch'ín rey David la ko tsjixín ch'án chjasin Belén mé tí chjasin k'uékjak'e ch'ín David —ichro sín.

⁴³ Mé xikaha jnkokoáhya kjuenkayáxin sín kaín sín kixin nkexro tí ch'ín Jesús. ⁴⁴ Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuích'ehya xikaha.

Tí síxreé kuítekakonhya sín tí ch'ín Jesús

⁴⁵ A ntá tí sín policia kuènte nínko mé kjan sín tí tjejó tí sín fariseo la ko tí sín nchat'á t'etoan. Ntá tí sín a mé kjuanchankíhi sín tí sín policia kixin:

—¿Nkekuèté kjuíkoahyará ch'án? —ichro sín.

⁴⁶ Ntá kjuátehe tí sín policia kixin:

—Kohya ninkexró nixja éxí xikaha nixja tí ch'ín a —ichro sín.

⁴⁷ Ntá ntáche tí sín fariseo tí sín policia kixin:

—¿Á kjaxinrá kuítóherá kjuít'ayahará ch'án? ⁴⁸ ¿Á kuítekaon tí jehe ch'án jnkójín tí sín t'etoan kuèténi o tí sín fariseo? ⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

⁵¹ —Tí ley kuèténi la kohya kjuachaxin sinchekjasóteni ijnko chojni tí naxa kíenhyani nkehe nixja ch'án la ko kíenhyani tí jië kjuasin ch'án —ichro ch'án.

⁵² Ntá kjuátehe sín ntáchro sín kixin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsonoha kixin nijnko tí sín k'uéchrónka itén Dios tsíkjiixínhya sín tí estado Galilea —ichro sín.

Ijnko tjan kjuasin jië chóna ókjé chojni nto

⁵³ Ntá jnkójnko tí sín xíka sín sákjuí sín ntøe sín.

8

¹ Ntá ch'ín Jesús mé sákjuí ch'án tí jna Olivo. ² Ntá tí kóyaon nchítjen ikjan ch'án k'uixenhen ch'án tí nínko jié a la ko kaín xín tí chojni mé kóchjinehe sín ch'án. Ntá kjuák'etjaxín ch'án kjuankíxin ch'án kjuako ch'án. ³ Ntá tí sín tjako tí ley la ko tí sín fariseo mé kjuíkao sín ijnko tjachjín kónoxíxin kixin chóna tjan ókjé chojni nto. Ntá kjuak'e sín tjan jnkosiné tí sín tjejó ntiha. ⁴ Ntá ntáche sín tí ch'ín Jesús kixin:

—Maestro, tí tjan i kónoxíxin kixin kjuasin tjan jië chóna tjan ókjé chojni nto. ⁵ A ntá tí ley tsíkjin ch'ín Moisés mé t'etoan kixin ixro chrók'óyánxinni tí chojni chjín xikaha ch'e. ¿A ntá jaha, nkechrua? —ichro sín.

⁶ Mé xikaha ichro sín kixin tjinkaon sín kixin ách'e ntoáhya chrókjuátehe ch'ín Jesús ntá chrókjuanchia sín jië. Ntá ch'ín Jesús mé k'uísén ch'án kjinxín ch'án dedo tja ch'án nonte a. ⁷ Ntá naxa tinkákjanchankíhi sín ch'án. Ntá k'uínkatjen ch'án k'uetøan ch'án kixin:

—Xá nkexro tí tjejorá ntihi chóntahya ninkehó jië mé saoxín chróchjéhe sín tjan xro —ichro ch'án.

⁸ Ntá xík'isén ch'án inaá ikjin ch'án tí nche inaá. ⁹ Ntá tí sín a mé kuínhin sín tí nkehe k'uetōan ch'ín Jesús ntá kósuèhe sín kixin koí sín chóna sín jie, ntá jnkojnko jnkojnko sín, sásítji sín na mé saoxín tí ch'ín antsí má táda ch'án sákjuí ch'án, ntá kaín tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítóhe sín ntiha. ¹⁰ Ntá xrentoá ch'án la kjuanchankíhi ch'án tjan kixin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kixin:

—Náhí, Ìnchéni, ninkexró —ichro tjan.

Ntá ntáchro ch'ín Jesús kixin:

—Kjaxin janhan s̄intakjasótiahya. Sátjia la í tjásinhya jie inaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjehe ch'án tí sín tsíkóchjina inaá ntáchro ch'án kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítié a —ichro ch'án.

¹³ Ntá tí sín fariseo ntáchro sín kixin:

—Jahvá tjechronka nkexri tjen jaha na mé chaxínhya tíha kixin jahvá tjechronka —ichro sín.

¹⁴ Ntá kjuátehe ch'ín Jesús ntáchro ch'án kixin:

—Janhván tjétjonkará nkexrí tjén na kjónté chaxín xrjanka kixin ó nòna nketí nó k'uinkaxian la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá. ¹⁵ Jahará la éxí chojni chjasintajni ó tékará jie. A ntá janhan la tékahya jie ninkexró. ¹⁶ Kjánchó ntoá chrókujintakitoaxián ijié chojni kixin jehya janhván t'a tíha, T'aná tjékian, na mé tí nkexro k'uetuanna k'uinka ntihi na mé jehe ch'án mé tjékian ch'án ntihi ntakitoaxínkian ijié chojni. ¹⁷ A ntá tí ley tsíkjin ch'ín Moisés mé ntáchro kixin tí tsonoxín iyó sín tsochrónka á chaxín xikaha tsíkónhen ntá chrókuitekaon chojni. ¹⁸ Ntá janhan na mé tjéxrjanka nkexrí tjén janhan la ko kjaxin T'aná mé tí nkexro k'uetuanna k'uinka mé jehe ch'án kjaxin chrónka ch'án nkexrí tjén janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'ín Jesús ntáchro ch'án kixin:

—Jahará la chonhyará tí janhan la ko kjaxin chonhyará T'aná. Tí chrókochoxinrá tí janhan ntá kjaxin chrókochoxinrá tí T'aná —ichro ch'án.

²⁰ Mé xikaha chro ch'ín Jesús tí kjuák'ekjakoxxin ch'án tí ninko jié chjino ntacajón tjetóxroyéya chichaon tjanjon sín. Kjánchó ninkexró tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijiará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntáchro ch'án kixin xitjahya tsjijini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntihi k'uaxrjénixínrá. A ntá janhan la nkaya nkajni k'uaxrjénixian. Jahará la kuènte chjasintajni ntihi. A ntá janhan la janhya

kuènte chjasintajni. ²⁴ Mé xikaha tjonkará kixin tió ts'énra naxa tsochontará ijjará kixin tí tsítekákonyará tí janhan, mé tí nkexro xráxin tjen,* ntá kjónté ts'énra naxa tsochontará tí ijjará —ichro ch'án.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

—Tí xrankíxixín kjuankíxian tjonkará kixin nkexro tí janhan. ²⁶ Itsjé nkehe chonta chróntáxrjan kixin chrókjuintakitoaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuñhan chrónka ch'án mé tjákoħa tí sín chjasintajni —ichro ch'án.

²⁷ Kjánchó jehe sín mé kíenxínhya sín kixin nixja ch'án kuènte It'é ch'án tjen nkaya nkajní. ²⁸ A ntá ntáchro ch'án kixin:

—Tió sinchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxin tjen.† Ntá tsonohará kixin jehya janhan tétōan tí xra tjet'a. Náhí. Jehó tí nkehe kjuakona T'aná mé tjetjækua. ²⁹ Tjékian tí nkexro k'uetuanna k'uinka kixin jehí xráxin T'aná la kuítōnahya janhván kixin xráxin ntaxiteyáħa tí nkehe tóxrjínħin ch'án —ichro ch'án.

³⁰ Mé xikaha ntáchro ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsítóhe sín ijjé sín

³¹ Ntá nixjeħe ch'ín Jesús tí sín judío kuinkáchónki sín ch'án ntáchro ch'án kixin:

—Tí tsítóéhyará tí tan kjuákohará ntá jahará chaxín discípulo kuéntana ³² la ko tsjátsoanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsokohya nkehe ts'inkákonħen —ichro ch'án.

³³ Ntá kjuátehe sín ntáchro sín kixin:

—Jeheni mé tsík'axrjeníxinni ch'ín Abraham na í xráxin kohya nkexro k'uena tí jeheni. ¿Nkekuèté ntáchrúa jaha kixin ts'áyéħeni kjuachaxin tsaáxinni? —ichro sín.

³⁴ Ntá ntáchro ch'ín Jesús kixin:

—Tjetoan tí nkehe tjetjonkará kixin tí sín tjasin jie mé éxi chojni k'uíná chrokjuahya tsítóhe sín ijjé sín. ³⁵ A ntá ijnko chojni k'uíná la jnkochríxínhya tsjak'e ch'án tí ntōe tí nkexro a. A ntá tí xjeen tí nkexro na mé jnkochríxín tsítóhe ntiħa. ³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonħen. ³⁷ Ó ñona kixin jahará tsík'axrjeníxinrá ch'ín Abraham. Kjánchó tjinkáonrá chrók'oyánrá tí janhan kixin títekákonyará tí nkehe tjéxrjanka. ³⁸ Janhan xrjanka tí nkehe k'uíkuañ kixin nkexrí tjen T'aná. A ntá jahará tjejonchexiteyéħerá tí nkehe kuínħínrá chrónka it'ará —ichro ch'án.

³⁹ A ntá jehe sín kjuátehe sín ntáchro sín kixin:

—It'éni mé ch'ín Abraham —ichro sín.

Kjánchó ntáchro ch'ín Jesús kixin:

—A ntá tí jahará chrókóchaxín xjeen ch'ín Abraham ntá chrókjuich'erá éxi kjuích'e ch'án. ⁴⁰ A ntá tjetjonkará tí tan chaxín kuñhan chrónka Dios na kjónté chrók'oyánrá tí janhan. A ntá ch'ín Abraham xikahya kjuích'e ch'án.

⁴¹ Jahará tjejoch'erá éxi kjuích'e it'ará —ichro ch'án.

Ntá ntáchro sín kixin:

—Jehya k'ónamá tí jeheni. Náhí. Chóntani jnkokoá It'éni mé Dios —ichro sín.

⁴² Ntá ntáche ch'ín Jesús tí jehe sín kixin:

* 8:24 Éxodo 3.14 † 8:28 Éxodo 3.14

—Tí chrókóchaxín kixin Dios mé It'ará la ntá chrótjuanará kixin janhan kjaxin k'uaxrjenixinna Dios k'uinkaxian tí tjen ch'án. Jehya kixin janhván k'uinka. Náhi. Dios mé ichr'ánna k'uinka. ⁴³ ¿Nkekuènté kixin tiénxinhyará tí nkehe tjonkará? Jehí tjinkákonhyará chrókuinhínrá tí nkehe xrjanka. ⁴⁴ Jahará mé xjeen Tsochren la ko jahará tsík'axrjenixinrá ch'án la ko tjinkáonrá sinchexiteyará tí nkehe tjinkaon ch'án. Tsochren mé xrankixixin kjuaya ch'án. Nunca k'uénixja ch'án ntoá. Xráxín ch'ia ch'án kixin xikahó tjenkayáxin ch'án. Jehe ch'án mé it'é kaín tí kjuach'ia. ⁴⁵ A ntá janhan tjétjonkará nkehe ntoá ntá titekákonnahyará. ⁴⁶ ¿Á tjejorá jnkojínrá nohará nkerí jie kjuásian janhan? A ntá tí ntáxrjan tí nkehe ntoá, ¿ntá nkekuènté titekákonnahyará? ⁴⁷ Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonhyará chrókuinhínrá itén ch'án —ichro ch'ín Jesús.

Cristo la ó xráxín tjen ntá chr'éxin kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátehe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan. ⁵⁰ Janhan na tjéyáha nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuítékakonhya. ⁵¹ Imá tjetoan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'án.

⁵² Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrúa kixin tí tsitekaonni tí nkehe tjákua jaha ntá í ts'énhyani, ichrúa. ⁵³ ¿Xá imá tétóan jaha la ntá kánhyó t'etóan it'eni Abraham? Jehe ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrúa? —mé chro sín.

⁵⁴ Ntá kjuátehe ch'ín Jesús ntáchro ch'án kixin:

—Tí chrókjuíkosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchrórá kixin jehe ch'án mé Dios kuéntará. ⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyona tí jahará chrókjuít'ayahará. Kjánchó janhan na choxian ch'án la ko ntáxiteyáha tí nkehe t'etóan ch'án. ⁵⁶ Ch'ín Abraham tí nkexro tsík'axrjenixinrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uíkon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuènté ntáchrúa kixin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kixin:

—Imá tjetoan tí nkehe tjétjonkará kixin naxa kohya ch'ín Abraham mé xráxín itjen janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án ninko ntá chr'éxin k'uaxrjexín ch'án ntiha. K'uátsínka ch'án jnkosiné tí tjejó sín sákjuí ch'án.

9

Ch'ín Jesús kjuínchekitøhe jína ijnko ch'ín tsíkókjéxin t'ikonhya ch'án

¹ K'uaátsínka sín ijnko ntia ntá k'uúikon ch'ín Jesús ntiha tjen ijnko ch'ín tsíkokjéxín t'íkonhya ch'án. ² Ntá tí sín k'uaájiko ch'ín Jesús kjuanchankíhi sín ch'án kixin:

—Maestro, ¿Nkekuènté tsíkokjéxín ch'án t'íkonhya ch'án? ¿Á ijíé it'é o ò iné ch'án o á ijíé ch'án? —ichro sín.

³ Ntá kjuátehe ch'ín Jesús ntáchro ch'án kixin:

—Jehya ijíé ch'án la ko jehya ijíé it'é la ko òné ch'an. Náhí. Jehí xíkaha tsíkonhen ch'án kixin tí kjuachaxièn Dios tsjakoxin kixin tsitoexín ch'án jína.

⁴ Naxa nchakotjin t'ichjánxin sít'a tí xra tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e xra. ⁵ Naxa itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuíkíte ch'án ntaten ch'án intsí nche k'óna nchet'o ntá kuátematóxin ch'án ikon tí ch'ín t'íkonhya. ⁷ Ntá k'uetuèhen ch'án tí ch'ín t'íkonhya kixin:

—Sátjia tí pila tjiá ntá it'in Siloé t'ontia kuan —ichro ch'án. (A ntá tí ihnié Siloé mé t'axrjexín nkívee sín kixin K'uituèhen.)

Ntá sákjuí tí ch'ín t'íkonhya k'ónti ch'án ikon ch'án ntá kjan ch'án k'uúikon ch'án. ⁸ Ntá tí sín ntøe chjinaxón ntøe ch'án la ko tí sín k'uék'ikon sín kixin t'íkonhya ch'án mé ntáchro sín kixin:

—¿Á jehya tí ch'ín i k'uékjak'etjaxin ch'án k'uékjanhak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'íkuan jaha? —ichro sín.

¹¹ Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuích'éna ch'án nchet'o kuátematóxin ch'án kuan la ntá k'uetuanna ch'án kixin satsjia ti pila tjiá ntá nchek'in sín Siloé ts'ontia kuan, ichro ch'án. Ntá sákjuia k'ontia, ntá xríngaha ó k'uíkuan —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'ín k'uék'ikonhya kuítóhe jína

¹³ Ntá tí sín a sákjuíko sín tí ch'ín k'uék'ikonhya sákjuíchréhe sín tí sín fariseo a. ¹⁴ A ntá tí yaon t'ok'éhe sín mé tsíkjich'éna ch'ín Jesús tí nchet'o kjuínchekitoexín jína tí ch'ín k'uék'ikonhya. ¹⁵ A ntá tí sín fariseo xíkjanchankíhi sín ch'án ínaá kixin nkexrí kuítóhe ch'án jína t'íkon ch'án jie. Ntá kjuátehe ch'án ntáchro ch'án kixin:

—Kuátematóxin ch'án nchet'o kuan, ntá k'ontia kuan ntá jie t'íkuan —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuènte Dios kixin chóntahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jie tí chóna ch'án jie? —ichro sín.

Mé xíkaha jnkokónhya kjuenkayáxin tí jehe sín. ¹⁷ Ntá xíkjanchankíhi sín tí ch'ín k'uék'ikonhya ínaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

¹⁸ Kjánchó tí sín judío kuítekakonhya sín kixin chaxín k'uék'ikonhya ch'án ntá jie t'ikon ch'án. Ntá k'uíyehé sín tí it'é la ko tí ìné tí ch'ín tsíkitohe jína.

¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrórá kixin tí tsíkokjéxín ch'án t'ikonhya ch'án? ¿Ntá nkexrí jie t'ikon ch'án? —ichro sín.

²⁰ Ntá kjuátehe tí it'é la ko tí ìné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxín ch'án t'ikonhya ch'án. ²¹ Kjánchó noehyani nkexrí kixin t'ikon ch'án jie la ko noehyani nkexro kjuínchekitohe ch'án jína. Tjanchankíhírá ch'án, ó nteto ch'án, ntá jehe ch'án tsochrónka ch'án kixin nkexrí kuítohe ch'án jína —ichro sín.

²² Mé xikaha kjuátehe tí it'é la ko tí ìné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin tsixenhen nínko tí sín titekaon kixin ch'ín Jesús mé tí nkexro Cristo. ²³ Mé xikaha ntáchro tí it'é la ko tí ìné ch'án kixin chrókjuanchankíhi sín ch'án, ó nteto ch'án, ichro sín.

²⁴ Ntá yóxin xík'íyehé tí sín judío tí ch'ín k'uék'ikonhya ntá k'uëtuënen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na chóna ch'an jie —ichro sín.

²⁵ Ntá tí ch'ín k'uék'ikonhya kjuátehe ch'án kixin:

—Nonahya á chóna ch'án jie o á chónahya ch'án jie. Jnkokoá nkehe nóna kixin senó k'uék'ikonhya ntá jie t'íkuan —ichro ch'án.

²⁶ Ntá xíkjanckankíhi sín ch'án inaá kixin:

—¿Nkexrí kjuích'e ch'án kixin kjuíntak'ikuan ch'án? —ichro sín.

²⁷ Ntá kjuátehe ch'án ntáchro ch'án kixin:

—Ó kjuixin tjonkará kjánchó títekákonhyará. ¿Nkekuèté tjinkáonrá kixin tsotjonkará inaá? ¿Á kjaxinrá tjinkáonrá tsochréhérá ch'án? —ichro ch'án.

²⁸ Ntá kónínkakohen sín ch'án la k'uántaxínhin sín ch'án la ko kjuátehe sín kixin:

—Jaha la chréhé tí chojni a. A ntá jeheni na chréhéni tí nkehe k'uëtoan ch'ín Moisés. ²⁹ Ó noheni kixin Dios k'uénixjehé ch'ín Moisés. A ntá tí ch'ín a la noehyani nketí tsíkjin ch'án —ichro sín.

³⁰ Ntá kjuátehe tí ch'ín ntáchro kixin:

—Imá ókjé tíha. Tí ch'ín a mé kjuínckek'ikonna. A ntá jahará ntáchrórá kixin noahyará nketí tsíkjin ch'án. ³¹ Ó noheni kixin tienhya Dios tí nkehe tjanchia tí chojni chóna jie. Jehó tinhin ch'án tí nkehe tjanchia tí sín titekaon Dios la ko nchexiteyéhe sín tí nkehe tjinkaon ch'án. ³² Nunca kienhyéni kixin ijnko nkexro chrókjuínckek'ikon ijnko chojni tsíkokjéxín t'ikonhya. ³³ A ntá tí nkexro a tí chrókjuínckek'ikon ch'án tí tjen Dios la kjá ninkehó nkehe xitjahya chrókjuích'e ch'án —ichro ch'án.

³⁴ Ntá kjuátehe tí sín fariseo ntáchro sín kixin:

—Jaha la nchónhya jie chonta tió kokjíha. A ntá jie ¿á tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjéxín ch'án tí nínko a sátsji ch'án.

Ntakótán nchakuen sín

35 Ntá kuínhin ch'ín Jesús kixin xikaha k'uetuēnhen tí sín judío kixin ts'axrjexín ninko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

36 Ntá kjuátehe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

37 Ntá kjuátehe ch'ín Jesús ntáchro ch'án kixin:

—Ó k'uíkuan jaha. Janhan mé tí nkexro tjetjuá jaha —ichro ch'án.

38 Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítekavan tí jaha Ìnchéni —ichro ch'án.

39 Ntá ntáchro ch'ín Jesús kixin:

—K'uinka ntihi chjasintajni kixin sintakitoaxián ijie chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

40 A ntá iso tí sín fariseo k'uéjontaxín kuínhin sín kixin xikaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

41 Ntá kjuátehe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahyará jie. Kjánchó ntáchrorá kixin t'ikonrá. Méxrā chontará jie —ichro ch'án.

10

Ch'ín Jesús ncheyóexín tí t'inkachjina kolélo

1 Ntá ntáchro ch'ín Jesús kixin:

—Imá tjettoan tí nkehe tjetjonkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé. 2 A ntá tí nkexro t'ixenxín tí puerta na mé nkexro t'ayakonhen tí kolélo a. 3 La ko tí ch'ín tjet'ayakonhen tí puerta a mé tsakitjehe ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsoan va itén ch'án. Ntá t'iyexín ch'án jnkojnko ihnié jnkojnko tí kolélo kuènte ch'án ntá ts'axrjexín va ntōe va. 4 Ntá t'ikon ch'án kixin k'uaxrje kaín va ntá kuítonhen ch'án va ntja ntá tinkáchréhe va kixin tjatsoan va itén ch'án. 5 Chrohya va tjichréhe va ijnko chojni ókjé na mé tsinkéhe va tí chojni a kixin tjatsoanhya va itén ókjé chojni —ichro ch'án.

6 Mé xikaha ntáchro ch'ín Jesús kjuíncheyóexin ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jina

7 Ntá chrónka ch'ín Jesús inaá ntáchro ch'án kixin:

—Ijnko nkehe tjettoan tsotjonkará kixin janhan la éxí tí puerta t'ixenxín tí kolélo tí t'inkachjina va. 8 Kaín tí sín kuitónxin ntja kui senó mé xíchee la ko chrókueé. La ntá tí kolélo la ántosén va tí nkehe ntáchro tí jehe sín. 9 Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo siín kjuachaxin ts'axrjexín va tí kòrré va sátsjikjine va la ko siín kjuachaxin ts'ixenhen va tí ts'inkachjina va inaá.

10 'A ntá xíchee mé jehó chrókueé la ko tjinkaon chrók'óyán la ko chrókjuinchek'itjāyan kaín nkehe. A ntá janhan k'uinka kixin tsochontaxinrá kjuachón na mé kjuachón jnkochríxín. 11 Janhan mé ijnko pastor jina a ntá tí pastor jina mé ts'enyákonhen tí kolélo a. 12 A ntá tí nkexro ch'e xra tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo

kuènte ch'án. Ntá tí kolobo mé tsotsé va tí kolélo ntá tsinká va la sátsjichroe va. ¹³ Mé xíkaha tí chojni tjinkaon chrókjuacha tí xra chrókjuich'e ó la mé sátsji. A ntá tí kolélo la ántosén ch'án kuáhya ch'án kuenté tí jehe va.

¹⁴⁻¹⁵ 'A ntá janhan mé ijnko pastor jína. Mé xíkaha T'aná chóxin ch'án tí janhan la ko kjaxin janhan choxian tí jehe ch'án mé xíkaha choxian janhan tí sín éxí kolélo kuèntana la ko jehe sín mé chóxin sín tí janhan. Ntá ts'ényákonhan tí sín éxí kolélo kuèntana. ¹⁶ Kjaxin chonta kolélo naxa jehya kòrré va ntihi mé kjaxin t'ichjánxin sátsjícakjián va. A ntá tí sitekakonna va ntá ts'óna jnkokoá kòrré va la ko jnkokoá nkexro ts'ayakonhen va.

¹⁷ 'Tjuana T'aná kixin kjónté its'én la tsoxechónna ínaá. ¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna ínaá. Tíhi mé k'uetuanna T'aná —ichro ch'ín Jesús.

¹⁹ Tió kuínhin tí sín judío tí nkehe ntáchro ch'ín Jesús ntá kjuankíxin jnkokoáhya kjuenkayáxin sín. ²⁰ Nchónhya tí jehe sín ntáchro sín kixin:

—¿Nkekuènté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

²¹ Ntá ikjé sín ntáchro sín kixin:

—Xíkaha chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

Tí sín judío kuítékakuenhya sín tí ch'ín Jesús

²² A ntá tí nchakuen kin tí chjasin Jerusalén k'uíxin kia xraxinkakonxín sín tí yaon tsíkjixin tsík'óna njnko. ²³ Ntá ch'ín Jesús itjen ch'án tí njnko tí ntasin kuènte Salomón. ²⁴ Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chronka ntoá kixin á chaxín jaha tí Cristo —ichro sín.

²⁵ Ntá kjuátehe ch'ín Jesús kixin:

—Ó tjonkará ntá naxa títekákonhyará. Kaín tí xra tjét'a janhan tí kjuachaxin kuènte T'aná mé tjákoxin nkexro tí janhan. ²⁶ Kjánchó jahará títekákonhyará kixin jahará la jehya kolélo kuèntana éxí tjonkará senó. ²⁷ Tí kolélo kuèntana mé tjatsoan va tí tanná la ko kjaxin janhan tjátsoan tí jehe va la ko jehe va mé chréhe va tí janhan. ²⁸ Janhan mé tjaha va tí kjuachón jnkochrín la í ts'itjáyanhya va la ko ninkexró tsjachahya tsakitsjexín va tjaná. ²⁹ Ó kjuanjon T'aná, mé tí nkexro tjetóxin t'etóan, na ninkexró tsjacha tsakitsjexín va tí tja ch'án. ³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xro chróchjéhe sín ch'án ínaá. ³² Ntá kjuátehe ch'ín Jesús ntáchro ch'án kixin:

—Nchónhya nkehe jína k'uíkonrá kjuákoxián kjuachaxin kuènte T'aná. ¿Ntá nkekuènté chróchjínará xro? —mé chro ch'án.

³³ Ntá kjuátehe tí sín judío kixin:

—Jehya tí kjuaxroan jína tjásian chrótjiáxiánni xro. Náhí. Jaha ijnko chojni ó ntá kjuíncheyóhé asán Dios na mé tsotjiáxiánni xro —ichro sín.

³⁴ Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjaxinrá éxí Dios tí jahará.”* ³⁵ Ntá ó noheni nkehe ntáchro xroon itén Dios na ntá xitjahya sitekakonhyani tíha. Mé xíkaha ntáchro Dios kixin éxí Dios jnkoinko nkexro k'uáyéhe itén ch'án. ³⁶ A ntá kjueyána Dios ichr'ánna ch'án

* 10:34 Salmo 82.6

chjasintajni, ¿ntá nkekuènté ntáchrórá kixin k'uántaxínhan Dios kixin janhan ntáxrjan kixin Xjeen Dios tí janhan? ³⁷ Kja tí chrókjuít'ahya tí xra ich'e T'aná la chrókuítekákonhyará. ³⁸ A ntá kjónté tjét'a tí xra a kjónté títekákonhyará tí janhan na mé chrókuítekáonrá tí xra tjét'a chrókónoaxínrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

³⁹ Mé xikaha chrótsé sín tí ch'ín Jesús inaá chrók'uikjéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xíkjan ch'án tí í jnko lado ntario Jordán inaá tí k'uékjak'e ch'ín Juan k'uékikítexín ch'án chojni senó. ⁴¹ Ntá nchónhya chojni sákjuíchréhe sín ch'án ts'ikon sín ch'án ntáchró sín kixin:

—Chaxín ch'ín Juan kjuasinhya ch'án kjuaxroan jié la kjónté ntoá tí nkehe chrónka ch'án kuènte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

¹ Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta. ² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuíkítexín aceite xraxé toté Ìnchéni la ko kjuínchexámáxin tjan kaxihi tjan toté ch'án.* ³ A ntá yóí tí kichó ch'án chjin ichr'án sín ijnko nkexro tsochénta tí ch'ín Jesús kixin:

—Ìnchéni jaha, tí nkexro choxian tjuèhé la níhi ch'án —ichro ch'án.

⁴ Ntá kuínhin ch'ín Jesús ntá ntáchró ch'án kixin:

—Tí chin chóna ch'án jehya kixin ónaá chrók'uitjáyanxón ch'án tí ts'en ch'án. Náhi. Tíha mé tsjakoxin tí kjuachaxin jié kuènte tí Xjeen Dios —ichro ch'án.

⁵ A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro. ⁶ Na ntá tió kuínhin ch'án kixin níhi ch'ín Lázaro na kjónté kuítóhe ch'án iyó yaon inaá tí nó kjuák'e ch'án. ⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea inaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha inaá? —ichro sín.

⁹ Ntá ntáchró ch'ín Jesús kixin:

—Jnkojnko yaon mé chóna teyó hora. Tió ixri chojni nchakotjin tsóténkixinhya sín ninkehó kixin t'inkaséyanxín xrohi chjasintajni a. ¹⁰ Tí sín ixri tie mé tsóténkixín sín nkehe kixin chónahya sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayaḥa ch'án —ichro ch'án.

¹² Ntá ntáchró tí sín k'uájiko ch'án kixin:

—Ìnchéni, tí k'uájua ch'án la mé chrókuitóhe ch'án jina —ichro sín.

¹³ Kjánchó tí nkehe ntáchró ch'ín Jesús mé t'axrjexín kixin ó tsíkjixin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjejua ch'ín Lázaro. ¹⁴ Ntá ntoá chrónka ch'ín Jesús kixin:

—Ó tsík'en ch'ín Lázaro. ¹⁵ Ntá chàna kixin kohyana ntiha kixin mé xikaha tsítekákonxínrá. A ntá jie întará sátsjitsjeheni ch'án —ichro ch'án.

¹⁶ Ntá ch'ín Tomás, kjaxin tikítexín sín ch'án ch'ín Nohé, mé ntáche ch'án tí í so sín kixin:

—Sátsjini koíni kaín ni ts'enkaoni Ìnchéni —ichro ch'án.

* 11:2 Juan 12.3

Ch'ín Jesús ntáchro ch'án kixin sinchexechón ch'án chojni inaá

¹⁷ Ntá kjuíji ch'ín Jesús kuínhin ch'án kixin ch'ín Lázaro la ó chóna noó yaon tsíkji_xravá ch'án. ¹⁸ A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ò kjínxin. ¹⁹ A ntá itsjé tí sín judío sátsíkjitsjehe sín tí tjan Marta la ko tí tjan María tjejónixjehe sín kixin kánhyó ts'ává sín kixin tsík'én tí kichó sín a. ²⁰ Ntá kuínhin tjan Marta kixin ó kui ch'ín Jesús ntá k'uaxrjexín tjan nchia tsjixinhin ntia. A ntá tí tjan María kuítóhe tjan nchia. ²¹ Ntá tí tjan Marta ntáche tí ch'ín Jesús kixin:

—Ínchéni jaha. Chrókjuak'e ntihi ntá chrók'uenhya kichó ni. ²² Kjánchó ó nòna kixin Dios tsotjáha kaín nkehe tsjanchehé ch'án —ichro tjan.

²³ Ntá ntáchro ch'ín Jesús kixin:

—Tsoxechón kichuá inaá —ichro ch'án.

²⁴ Ntá ntáchro tjan Marta kixin:

—Ó nòna kixin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

²⁵ Ntá ntáchro ch'ín Jesús kixin:

—Janhan mé ntáxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sintaxechón sín inaá. ²⁶ La ko kaín xín tí sín naxa tjejóchón sín la tsitekaon sín tí janhan na ts'enhya sín. ¿Á titekávan xikaha ní? —ichro ch'án.

²⁷ Ntá ntáchro tjan kixin:

—Chaxín Ínchéni titekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkji_xravá nkexro Lázaro

²⁸ Ó kjuixin ntáchro tjan Marta xikaha ntá sákjuík'íyehé tjan kichó tjan María ntá imó chénka tjan kixin:

—Ntiha tjan Maestro t'iyahá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuítsjehe tjan tí ch'ín Jesús. ³⁰ Naxa tsík'ixenhya ch'án chjasin naxa tjan ch'án tí xéta ch'án tjan Marta. ³¹ Ntá tí sín judío tjejónixjehe tjan María kixin kánhyó ts'ává tjan, mé k'uíkon sín kixin tjoka k'uaxrjexín tjan nchia, ntá kjuíchréhe sín tjan kjuenkayáxin sín kixin sátsji tjan tí tsíkji_xravá kichó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuíji tjan tí tjan ch'ín Jesús ntá kjuák'exín toch'in tjan toté ch'án ntáchro tjan kixin:

—Ínchéni jaha, chrókjuak'e jaha ntihi ntá chrók'uenhya kichiná —ichro tjan.

³³ Ntá k'uíkon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án. ³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Ínchéni, ¿á sátsjitsjehé? —ichro sín.

³⁵ Ntá tsjánka ch'ín Jesús. ³⁶ Ntá ntáchro tí sín judío kixin:

—Tsjehérá kixin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'ává asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro. ³⁹ Ntá k'uetōan ch'ín Jesús kixin:

—Tjakjíyan tí xro a —ichro ch'án.

À ntá tí tjan Marta mé kichó tí nkexro k'uén mé ntáchro tjan kixin:

—Ìnchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

⁴⁰ Ntá kjuátehe ch'ín Jesús ntáchro ch'án kixin:

—Ó tjonka kixin tsítekavan ntá ts'ikuan tí kjuachaxin jié kuènte Dios —ichro ch'án.

⁴¹ Ntá kjuakjìn sín tí xro a. Ntá ch'ín Jesús konta ch'án nkajní ntáchro ch'án kixin:

—It'éni, tjáncháha kjuasáya kixin ó kuínhín tí nkehe ntáxrjan. ⁴² Janhan na ó nòna kixin xráxín tjetinhín tí nkehe ntáxrjan ntá xikaha ntáxrjan jie kixin tsinhin tí sín tjejontaxín ntihi ntá tsitekaon sín kixin jaha mé kuétoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—¡Lázaro, t'axrjéxian méhe! —ichro ch'án.

⁴⁴ Ntá tí ch'ín tsík'en k'uaxrjéxín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkèxin ijnko ka. Ntá k'uétoan ch'ín Jesús kixin:

—Tjasintankará tí ka chróntetoxín ch'án kixin jína tsji ch'án —ichro ch'án.

Imó kjuenkayáxin sín kixin nkexrí ts'óyán sín tí ch'ín Jesús

(Mt. 26.1-5; Mr. 14.1-2; Lc. 22.1-2)

⁴⁵ Ntá itsjé tí sín judío sákjuíkotoxin sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án. ⁴⁶ Kjánchó iso tí jehe sín sákjuítsjehe sín tí sín fariseo kjuíchénka sín tí kjuaxroan tsíkjasin ch'ín Jesús. ⁴⁷ Ntá tí sín fariseo la ko tí sín nch'at'á t'etōan jnkokoá kójnkotséko sín tí sín antsí t'etōan, la ntáchro sín kixin:

—¿Xá nkexrí chrókjuich'ehe ni tí ch'ín a kixin jehe ch'án mé tjasin ch'án kjuaxroan jié? ⁴⁸ À ntá tí chrókuítóheni ch'án xikahó ntá kaín xín chojni chrókuítekaon sín tí jehe ch'án, ntá tsi tí sín romano t'etōan sinchek'itjayan sín tí ninkoéni la ko tí xra chóntani la ko tí nación kuènténi —ichro sín.

⁴⁹ Ntá ch'ín Caifás mé tí nkexro t'etūenhen tí sín nch'at'á tí nánó a ntáche ch'án tí jehe sín kixin:

—Jahará la noahyará ninkehó tíha ⁵⁰ la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjaséni kixin ntá chrók'uitjayanhya kuenté tí nación kuènténi —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhi. Jehe ch'án mé k'uétūenhen tí sín nch'at'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía. ⁵² À ntá jehya tí nación kuènte sín ó chrók'uenyákonhen ch'án. Náhi. Kjaxin kixin sinchekaá ch'án kaín tí sín ts'óna xjeen Dios tjejó sín kuenté chjasintajni. ⁵³ À ntá tí yaon a tí sín t'etūenhen tí sín judío mé kjuankixin sín kjuenkayáxin sín kixin chrók'óyán sín tí ch'ín Jesús.

⁵⁴ À ntá ch'ín Jesús la í noxínhya k'uáji tí k'uéjé tí sín judío, na mé k'uaxrjéxín ch'án tí estado Judea, sákjuí ch'án chjinaxón nteje, tí tjen ijnko chjasin it'ín Efraín. Ntaha kuítóeko ch'án tí sín k'uájiko ch'án.

⁵⁵ Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjéxín sín chjasén sín sákjuí sín chjasin Jerusalén kixin ntaha tsoyaxínhin sín kixin tsotjóá sín kjónté naxa xrankixinhya ts'ixin tí kia pascua. ⁵⁶ Ntaha k'uájikjeyá sín tí ch'ín Jesús k'uéjóxenhen sín tí ninko jié ntá kjuanchankíhi sín kichó sín kixin:

—¿Jahará nkechorá? ¿Á chrókjuí ch'án tí kia ní o náhi? —ichro sín.

⁵⁷ A ntá tí sín fariseo la ko tí sín t'etuenhen tí sín nch'at'á na ó k'uetōan sín kixin tí siín ijnko nkexro nohe nketí tjen ch'ín Jesús chróchrónka sín kixin ntá jína chrókjuitsé sín ch'án chrókjuinchenteto sín ch'án la ko chrókjuak'echjina sín ch'án.

12

*Ijnko tjan kjuíncheká tjan aceite xraxé náxrjón toté tí ch'ín Jesús
(Mt. 26.6-13; Mr. 14.3-9)*

¹ Naxa t'itjayan injon yaon ntá ts'ixin tí kia pascua. A ntá ch'ín Jesús sákjui ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án. ² Ntá ntiha kjóne sín ijnko kónjin kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uéjó sín kjóneko sín tí ch'ín Jesús. ³ Ntá tjan María kuikao tjan it'ō litro aceite tsík'óna xroan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxihi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan. ⁴ Ntá ch'ín Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kixin:

⁵ —¿Nkekuèté kóxiha tí xroan xraxé, chrókóxixin iní ciento chichaon denario kixin chrókjuinkitsa tí sín nòà? —ichro ch'án.

⁶ Kjánchó ch'ín Judas la jehya ntáchro ch'án xikaha kixin chrókuikonóhe ch'án tí sín nòà. Náhí. Ntáchro ch'án tíhi kixin xráxin chee ch'án kixin jehe ch'án t'ayakonhen ch'án tí nkehe tjinká chichaon ntá xráxin teé ch'án tí chichaon tsíxrenájín ntiha. ⁷ Ntá ntáchro ch'ín Jesús kixin:

—Nté tìtoherá tjan. Tsíkjak'echjina tjan tí xroan a kixin tí yaon tsoxrávána.

⁸ Tí sín nòà jnkochrín sín ts'ejokoará sín. A ntá janhan jnkochrínnya ts'ejóni —ichro ch'án.

Tí sín judío itjo sín nkexrí chrók'óyan sín tí ch'ín Lázaro

⁹ A ntá itsjé tí sín judío k'uixikónohe sín kixin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'ín Jesús ó. Náhí. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús. ¹⁰ Ntá tí sín nch'at'á t'etōan mé kójnkotsé sín kjuenkayáxin sín chrók'óyan sín tí ch'ín Lázaro kjaxin ¹¹ kixin itsjé tí sín judío kuítekaon sín tí ch'ín Jesús kixin xikaha kjuínchexechón ch'án tí ch'ín Lázaro ntá k'uaxrjekjanxin sín tí sín nch'at'á.

*K'uixenhen ch'ín Jesús chjasin Jerusalén
(Mt. 21.1-11; Mr. 11.1-11; Lc. 19.28-40)*

¹² Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uixikónohe sín kixin tsjiji ch'ín Jesús tí chjasin ntiha. ¹³ Ntá kóchrínjin sín chaan ntakajni kjuíxinhin sín ntia itsji ch'ín Jesús, itsje sín, ntáchro sín kixin:

—Tjancheheni Dios kjuasáya. Imá jína tí nkexro kuixin tí kjuachaxién It'eni tjen nkaya nkajni. Imá jína tí ch'ín Rey ts'etuenhen tí nación Israel —ichro sín itsje sín.

¹⁴ Ntá tsík'itja ch'ín Jesús ijnko kolócho la ntá kjuák'ekjen ch'án, éxí nixja itén Dios kixin:

¹⁵ Chrakonhyará jahará tjejorá chjasin Jerusalén, tsjehérá ó tje kui tí ch'ín Rey kuéntará, tjejen ch'án ijnko kolócho.*

* 12:15 Zacarías 9.9

¹⁶ A ntá tió kónhen tíha kíenxínhya tí sín k'uájiko ch'ín Jesús kíxin nkekuènté xíkaha kónhen. A ntá chr'éxin tió kjuixin sákjujia ch'án nkaya nkajní ntá xraxinkaon sín kíxin xíkaha tsíkjin tí sín k'uéchrónka itén Dios ósé nkexrí tsonhen ch'án, na ntá xíkaha chaxín xiteyá tí chrónka sín senó kíxin xíkaha tsonhen ch'án.

¹⁷ Mé xíkaha kaín tí sín tsíkójnkotsé tí kjuák'e ch'ín Jesús tió k'uíyehé ch'án tí ch'ín Lázaro kíxin ts'axrjexín ch'án tí tòyè tsíkji_xravá ch'án ntá xechón ch'án mé tí sín a mé chrónka sín tí nkehe k'uikon sín. ¹⁸ Mé xíkaha sákjuixinhin sín tí ntia tsjixín ch'ín Jesús, k'uixikónohe sín kíxin xíkaha tsíkjasin ch'ín Jesús tí kjuaxroan jíé. ¹⁹ Mé xíkaha ntáchro tí sín fariseo itjo sín kichó sín kíxin:

—Tsjuhérá kaín rá, ninkehó tsjachahyani sich'eni kíxin kaín xín chojni sákjuíchréhe tí jehe ch'án —ichro sín.

Iso sín nkivee griego tjejá sín tí ch'ín Jesús

²⁰ Iso sín nixja griego k'uéjójákjan tí sín sákjuí sín tí kia chjasin Jerusalén tsoxraxinkakonxín sín Dios. ²¹ Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónóehé sín ch'án kíxin:

—Tjinkaonni chrók'uikonni tí ch'ín Jesús —ichro sín.

²² Ntá ch'ín Felipe sákjuíchenka ch'án tí ch'ín Andrés. Na ntá yóí sín sákjuíchenka sín tí ch'ín Jesús. ²³ Ntá ntáchro ch'ín Jesús kíxin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhe ch'án tí kjuachaxin kuènte It'é. ²⁴ A ntá tsotjonkará ijnko nkehe chaxín kíxin tí chrókjuítsínkahya ijnko noatrigó tí nche chrók'uenhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kíxin chrótjá sín. ²⁵ A ntá tí nkexro imá tjuèhe asén kíxin kohya nkehe chrók'uatsínka na mé tsochóntahya ch'án kjuachón jnkochrín. A ntá tí nkexro tjeuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochónta ch'án kjuachón jnkochrín. ²⁶ A ntá tí jnkójín nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkójín sín sich'ena sín xra xíkaha na mé T'aná mé tsjikosáyehe tí jehe sín.

Ch'ín Jesús chrónka ch'án kíxin its'en ch'án

²⁷ Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kíxin sinchekaána ch'án tí nkehe tsona jie o náhí? Kjánchó xra ó k'uinka xíkaha tsona. ²⁸ Jaha It'éni, tjáko_xian tí kjuachaxin kuènte ihníá —ichro ch'án.

Ntá kuínhin sín nixja ijnko nkexro nkajní ntáchro kíxin:

—Ó kjuixin kjuákoxian tí kjuachaxin la ko xíkaha xikjáko_xian inaá.

²⁹ A ntá tí sín tjejóntaxín tsíkinhin sín mé ntáchro sín kíxin kjónta, la ko í so sín ntáchro sín kíxin:

—Ijnko ch'ín ángel nixjehe ch'án —ichro sín.

³⁰ Kjánchó ntáchro ch'ín Jesús kíxin:

—Náhí. Jehya kíxin janhan tí jie chrókuinhan tí nixja ch'án. Náhí. Nixja ch'án kíxin tsinhínrá jahará. ³¹ Ntá jie tsitoxén tí ijíé chojni chjasintajni na mé tí nkexro t'etóan chjasintajni mé ts'axrjehe ch'án tí xra t'etóan ch'án. ³² A ntá tió tsjak'énkánia ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

³³ Mé xíkaha chrónkaxín ch'án kíxin nkexrí ts'enxín ch'án. ³⁴ A ntá kjuátehe tí sín ntiha ntáchro sín kíxin:

—Kuínhinni nchekuáxin sín tí xroon tsíkjin sín ósé chrónka kíxin Cristo la jnkochrín tsjak'e ch'án. ¿Ntá nkekuènté ntáchrúa kíxin tí Xjeen Dios K'óna

Chojni t'ichjánxin tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

³⁵ Ntá ntáchro ch'ín Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen tí xrohi t'inkaséyanxín ntja. A ntá náhí la ó ts'ixin tie. A ntá tí sín ixri tí sítié a mé noehya sín nketí sátsji sín. ³⁶ Títekáonrá tí xrohi tí naxa tjen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'ín Jesús

³⁷ K'uékjasin ch'ín Jesús nchónhya kjuaxroan jié k'uíkonxín kon sín ntá kjónté kuítekakuenhya sín ch'án ³⁸ kixin mé xikaha tsoxiteyá tí nkehe tsintáchro ch'ín Isaías tsíkjin ch'án ósé kixin:

Ìnchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuènte ch'án.†

³⁹ Méxra kuítekakuenhya sín tí ch'ín Jesús éxí tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókiénxínhya sín,

kixin ntá chrókóchjinehya sín tí janhan kixin chrókjuintakitoha sín jína.‡

⁴¹ Xikaha k'uéchrónka ch'ín Isaías imá ósé kixin k'uék'ikon ch'án tí kjuachaxin jié kuènte Jesús ntá k'uéchrónka ch'án nkexrí tsjak'e tí ch'ín Jesús.

⁴² Kjánchó itsjé tí sín judío t'etoan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonhya sín kjuachaxin chrók'uixenhen sín tí ninkoe sín judío. ⁴³ Mé xikaha imá kóxrjínhin sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'ín Jesús mé tsitoexixin ijié chojni

⁴⁴ Ntá itsen nixja ch'ín Jesús ntáchro ch'án kixin:

—Tí títekáonrá tí janhan na mé jehya janhván títekáonrá na mé kjaxin títekáonrá T'aná, mé tí nkexro k'uētuanna k'uinka. ⁴⁵ Éxí tí t'ikonrá tí janhan mé xikaha t'ikonrá tí nkexro k'uētuanna k'uinka. ⁴⁶ A ntá janhan mé xrohi k'uinka chjasintajni kixin tí sín títekaon sín tí janhan ts'ejóhya sín tí sítié a. ⁴⁷ A ntá tí jnkojínrá tinhínrá tí nkehe xrjanka ntá títekákonahyará la jehya janhan sintakjasótiará kixin jehya kixin k'uinka sintakjasóte chojni chjasintajni. Náhí. K'uinka kixin sintakaá chojni. ⁴⁸ A ntá tí títekákonhyará tí janhan la ko títekákonhyará tí tan kuèntana la ó síin nkexrí tsitoexixin ijiará, na mé éxí tí tan xrjanka mé Dios sinchekitoexín ijiará tí yaon tsjixixín chjasintajni. ⁴⁹ Jehya tí nkehe kuèntana tjéxrjanka. Náhí. T'aná na mé tí nkexro k'uētuanna k'uinka mé k'uētuanna nkehe tsoxrjanka la ko nkehe tsjakua. ⁵⁰ A ntá nõna kixin tí nkehe k'uétõan T'aná mé xranjonxín tí kjuachón jnkochrín. Mé xikaha tí nkehe ntáxrjan mé tjéxrjanka kixin T'aná mé k'uētuanna.

13

Ch'ín Jesús kjuínchek'onti ch'án toté tí sín k'uájiko ch'án

¹ A ntá tí yaon xika tí ntóye tsjasin sín tí kia pascua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sátsjichréhe ch'án It'é

† 12:38 Isaías 53.1 ‡ 12:40 Isaías 6.10

ch'án. Xráxín tjuèhé ch'án tí sín kuènte ch'án chjasintajni, a ntá jie tsjakoxin ch'án kixin imá tjuèhe ch'án tí jehe sín.

² A ntá tí ch'ín Tsochren tsík'etuenhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús. ³ Ntá ch'ín Jesús la ó nohe ch'án kixin tsíkixin ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsíkjanjon kjuachaxin ts'etuenhen ch'án kaín xín nkehe. ⁴ Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xámáxin chojni t'ónti k'uínkat'óxin ch'án. ⁵ Ntá kuikja ch'án ijnko nkehe ntá, ntá kjuankixin ch'án kjuínchek'ónti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjujixraká tí tjen ch'ín Pedro, a ntá ntáchro ch'ín Pedro kixin:

—Jaha Ìnchéni la, ¿nkekuènté chrókjuínchek'óntia toténi? —ichro ch'án.

⁷ Ntá kjuátehe ch'ín Jesús ntáchro ch'án kixin:

—Jaha la naxa tiénxinhya tí nkehe tjét'a janhan. Chr'éxin ntá tsiénxian nkekuènté tjét'a tíha —ichro ch'án.

⁸ Ntá ntáchro ch'ín Pedro kixin:

—Jaha la sinchek'óntihya toténi —ichro ch'án.

Ntá ntáchro ch'ín Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'án.

⁹ Ntá kjuátehe ch'ín Simón Pedro ntáchro ch'án kixin:

—Náhi, Ìnchéni. Jehya tí toténi ó chrókjuínchek'óntia. Kjaxin itjani la ko ikjani chrókjuínchek'óntia —ichro ch'án.

¹⁰ Ntá ntáchro ch'ín Jesús inaá kixin:

—Tí sín tsíkjin tsík'ónti la t'ichjánxinhya kuenté sín ts'ónti sín inaá. Náhi. Jehó toté sín ó mé t'ichjánxin naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

¹¹ Mé xikaha ntáchro ch'ín Jesús kixin kénhya sín tjóá sín kixin ó nohe ch'án nkexro sinchekji ch'án.

¹² Ntá tió kjuixin kjuínchek'ónti ch'án toté sín kaín sín ntá xík'inkáya ch'án inaá tí ka kuítsáte ch'án ntá kjuák'etjaxin ch'án tí k'uínkatjenxin ch'án. Ntá ntáchro ch'án kixin:

—¿Á kiénxinrá tí nkehe kjuít'a? ¹³ Jahará la ntáchrorá kixin janhan Maestro kuéntará la ko Ìnchárá. Chaxín ntoá ntáchrorá kixin janhan tíha. ¹⁴ Janhan tí Maestro kuéntará la ko ìnchárá kjuíntak'óntia totará. A ntá jahará kjaxin xikaha chrókjuínchek'óntirá toté kíchuará. ¹⁵ Janhan mé kjuákoxián kixin xikaha chrókjuích'erá éxi kjuít'a janhan. ¹⁶ Ijnko nkehe chaxín tsotjonkará kixin tí sín ch'exón xrá mé t'etōanhya sín éxi t'etōan tí lámoe sín, la ko tí sín k'uáyéhe sín ijnko xrá t'etōanhya sín éxi t'etōan tí sín kjuanjon tí xrá a. ¹⁷ Tí chrókiénxinrá nkehe tíha la ko chrókjuínchexiteyará la chrókócháhará má.

¹⁸ 'Jehya kaín rá xikaha ntáxrjan. Ó nòna kixin nkexro kjuéyá janhan. Kjánchó t'ichjánxin tsoxiteyá tí nkehe tsíkjin sín ósé ntáchro kixin: “Ijnko nkexro tjénekan mé tsjanjonkian.”* ¹⁹ Mé xikaha tjétjonkará senó kixin tió ts'atsínka tíha ntá tsítekáonrá kixin janhan mé tí nkexro xráxín tjen. ²⁰ Ijnko nkehe tjetoan tjétjonkará kixin tí tsjánjonrá kjuachaxin tsitohe tí chojni ichr'an janhan, mé éxi yóhe chrókjuánjonrá kjuachaxin chrókuitohe tí janhan, a ntá tí tsjánjonrá kjuachaxin tsitona janhan mé éxi yóhe chrókjuánjonrá kjuachaxin chrókuitohe tí nkexro k'uetuanna k'uinka —ichro ch'ín Jesús.

* 13:18 Salmo 41.9

Ch'ín Jesús chrónka k'ixin ch'ín Judas sinchekji ch'án
(Mt. 26.20-25; Mr. 14.17-21; Lc. 22.21-23)

²¹ Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án k'ixin:

—Ijnko nkehe tjetooan tsotjonkará k'ixin jnkojínrá tjejórá ntihi mé sinchekjiráni —ichro ch'án.

²² Ntá tí sín k'uájiko ch'án kjuanjíxin komáxin la ko í komáxin k'íchó sín k'ixin noehya sín nkexro tí ntáchro ch'án. ²³ A ntá ijnko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín. ²⁴ Ntá ch'ín Simón Pedro kjuakoxín seña k'uətuənhen ch'án tí í jnko ch'ín a k'ixin:

—Tjanchankíhi ch'án nkexro tíha —ichro ch'án.

²⁵ A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án k'ixin:

—Ìnchéni, ¿nkexro tíha? —ichro ch'án.

²⁶ A ntá kjuátehe ch'ín Jesús ntáche ch'án tí ch'ín a k'ixin:

—Sintakjata it'ò niotja, a ntá tí nkexro tsotjahá tí t'ò niotja a mé tí nkexro a —ichro ch'án.

A ntá mé xikaha kjuínchekjata ch'ín Jesús it'ò niotja ntá chjéhe ch'án tí ch'ín Judas Iscariote, it'é ch'án mé it'in Simón. ²⁷ Ntá k'uáyéhe ch'án tí niotja ntá tuénxín k'uixenhen asén ch'án tí ch'ín Tsochren. Ntá ntáche ch'ín Jesús tí jehe ch'án k'ixin:

—Tí xrá tjinkávan sich'e la jaí tóxakonhan —ichro ch'án.

²⁸ Kjánchó nijnko tí sín tjejóne ntiha kienxínhya sín nkekuènté xikaha ntáchro ch'án. ²⁹ Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín k'ixin ách'e ch'ín Jesús mé k'uətuənhen ch'án tí ch'ín Judas k'ixin ichrén nkehe sátsjik'ena ch'án kuènte tí kia a, o ách'e ichrén nkehe sinchekitonhen ch'án tí sín nò a. ³⁰ Ntá k'uáyéhe ch'ín Judas tí niotja, a ntá k'uaxrjéxin ch'án ntiha. A ntá ó k'uixín tie.

Ijnko nkehe nixin k'uətoan ch'ín Jesús

³¹ A ntá ó kjuixin sátsíkji ch'ín Judas, ntá ntáchro ch'ín Jesús k'ixin:

—A ntá jie tsonoxín tí kjuachaxin jié kuènte tí Xjeen Dios K'óna Chojni la ko tsjakoxín ch'án tí kjuachaxin jié kuènte Dios. ³² Na mé xikaha tí Xjeen Dios K'óna Chojni mé tsjakoxín tí kjuachaxin jié kuènte Dios. A ntá Dios mé tsjakoxín ch'án tí kjuachaxin kuènte Xjeen ch'án la tjoka tsoxiteyá.

³³ Xjeenni, í séhya naxá tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxí yóhe k'uétjanka tí sín judío mé tjonkará kjaxínrá k'ixin: Ninkexró xitjahya tsjiji sín tí sátsjiyá janhan.† ³⁴ Ijnko nkehe nixin tétuanhanrá ijie k'ixin chrótjuèhérá k'ichuárá éxí yóhe tjuahará mé xikaha chrótjuèhérá k'ichuárá. ³⁵ Tí tsotjuèhérá k'ichuárá ntá tsonoxín kaín xín chojni síin chjasintajni k'ixin tinkachónkirá tí janhan —ichro ch'án.

Chrónka ch'ín Jesús k'ixin ch'ín Pedro sinchemá ch'án k'ixin chónhya ch'án tí jehe ch'án

(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús k'ixin:

—Ìnchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án k'ixin:

—Tí nó sátsjiyá xitjahya tsochréhérá jaí. Ntá chr'éxin tsjasánchréhérá ntiha —ichro ch'án.

³⁷ A ntá ntáchro ch'ín Pedro k'ixin:

† 13:33 Juan 7.33

—¿Nkekuènté xitjahya tsochráha tí jaha jaí? Kjónté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákonna jaha? Ijnko nkehe chaxín tsotjonka kixin naxa tsotsjehya tí kochíntoa la ó tsjixin sìnchemána níya kixin chonhyana, tsixrua.

14

Jesús mé ntia sátsjixinni tí tjen It'éni tjen nkaya nkajní

¹ 'Tóxakuanhyará jahará. Títekáonrá Dios la ko kjaxin títekáonrá tí janhan. ² Ntoe T'aná nchónhya nchia síin ts'ejóni. A ntá tí xikahya chrók'uixin la xikahya chrótjonkará. Méxra sátsjiyá sintonyoxian tí chrók'uejóni. ³ A ntá tí sátsjiyá sintonyoxian, ntá tíó tsjixin ntá ts'inka ínaá, ntá sátsjini kixin jahará kjaxin chrók'uejorá ntiha tí tsjak'é janhan. ⁴ Jahará la ó nohará nketí sátsjiyá la ko ó nohará tí ntia a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Ínchéni, noehyani nketí sátsjia jaha. ¿A ntá nkexrí chrókónoheni tí ntia a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí ntia la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jina tsjiji tí tjen T'aná. ⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxínrá ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

—Ínchéni, tìtohéni kixin tsochóxinni It'á. Táhó mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

—Felipe, ósé tjejóni, ¿a ntá naxa tjátsoanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuènté tjanchàna kixin chrókuitoha chrók'uikonrá tí T'aná? ¹⁰ ¿Á títekákonhya jaha kixin janhan jnkokoá tjékian T'aná, la ko T'aná tjen tí tjén janhan? Tí nkehe níxja janhan la jehya kuèntana. Náhí. T'aná tjékian janhan mé tjech'e ch'án tí xra kuènte ch'án. ¹¹ Títekáonrá kixin jnkokoá tjékian T'aná, a ntá T'aná itjen tí tjén janhan. Kjónté kuítekákonhyará xikaha la chrókuítekáonrá kixin tí kjuaxroan jie kjuákoxian k'uikonrá. ¹² Ijnko nkehe chaxín tjonkará kixin tí chaxín tsítekáonrá tí janhan ntá kjaxinrá tsjachará sich'erá xra yóhe tjét'a la ko kjaxin ixra antsí jie tsjachará sich'erá kixin janhan la ó sátsjiyá tí tjen T'aná. ¹³ Kaín nkehe tsjanchatóxixínrá tí nina na mé tsjánjuan kixin xikaha tsjákoxian tí kjuachaxin kuènte T'aná. ¹⁴ Tí chrén nkehe tsjanchatóxixínrá nina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

¹⁵ 'Tí chaxín tjuèhéra tí janhan ntá chrókjuínchexiteyéhéra tí nkehe kuétuanhanrá. ¹⁶ Ntá tsoxrjannóaha T'aná kixin tsochr'án ch'án Nchakuen ch'án kixin tsjinkitsa tí jahará la ko sinchechéhe asánrá la mé ts'ejokoará jnkochrín. ¹⁷ Jehé ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin tjejokoará ch'án la ko ts'ejokoará ch'án jnkochrín. ¹⁸ Janhan na tsitoáhyará nòerá jahóra, na mé tsokjan ínaá kixin ts'ejóni. ¹⁹ A ntá séhya ntá tí sín chjasintajni ts'ikonhya sín tí janhan ínaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjechuán. ²⁰ A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá tjejóni. ²¹ Tí nkexro nohe tí

nkehe tétōan la ko sinchexiteyéhe sín mé xíkaha tsjakoxin sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehe sín la ko kjaxin janhan tsotjuahá sín la ko tsjakoxian nkexrí tjén janhan —ichro ch'ín Jesús.

²² A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Inchéni, ¿nkekuènté jehóni tjákoxian, a ntá tjákoéxinhya tí chojni chjasintajni? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí nkexro tjuèhe tí janhan mé sinchexiteyéhe tí nkehe tétōan. La ko T'aná mé tsotjuèhe tí jehe sín la ntá T'aná la ko janhan ts'ejókoni sín. ²⁴ A ntá tí sín tjuèhya tí janhan la mé nchexiteyéhya sín tí nkehe tjákua. A ntá tí nkehe tjákua tjejotinhínra la jehya kuèntana. Náhí. Kuènte T'aná tí nkexro k'uetuanna k'uinka.

²⁵ Naxá tjejóni la tjetjonkará kaín tíhi. ²⁶ A ntá Nchakuen T'aná tsochr'án ch'án kjuachaxin nina mé tsjinkitsa tí jahará la ko sinchechéhe asánra la ko tsjakohará kaín nkehe la ko sinchexraxinkaonra kaín nkehe xrjanka.

²⁷ 'Kjuaxróxin tsitohá la ko kjuaxróxin kuèntana tsotjahára. Jehya éxí tí kjuaxróxin chrókjuanjon tí sín chjasintajni. Náhí. Chrókóxakuenhya asánra la ko chróchrakonhyará. ²⁸ Ó kuínhínra ntáxrjan kixin sátsjiyá la ko tsokjan janhan ts'ejóni inaá. Tí chaxín tjuéhérá tí janhan ntá chrókócháhará tí kuínhínra kixin sátsjiyá tí tjen T'aná kixin antsí t'etōan ch'án la kánhyó tétōan janhan. ²⁹ Senó tjetjonkará tíhi kixin tió tsonhen tíha la ts'ikonra ntá tsitékáonra jahará.

³⁰ Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuenhen tí sín chjasintajni. A ntá jehe ch'án la ninkehó t'etuannahya tí janhan. ³¹ Kjánchó t'ichjánxin kixin xíkaha tsonhen ntá tí sín chjasintajni mé tsonohe sín kixin tjuahá T'aná la ko nchexiteyáha tí nkehe k'uetuanna ch'án. Ntá jie t'inkatjenra sátsjixínni ntihi.

15

Tí nta t'óna to uva la ko tí chaan nta

¹ Janhan mé éxí yóhe ijnko ntanòna tjechón ita to uva la ko T'aná mé éxí yóhe tí nkexro t'ayakonhen tí nta a. ² Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to. ³ A ntá jahará la kótjuáxinra tí tanná k'uetjonkará senó. ⁴ Tí tsitōéhyará tí janhan ntá kjaxin janhan tsitōahya tí jahará. Mé xíkaha ijnko chaan nta ts'axrjentehe tsjachahya jehó ts'óna to, la ko xíkaha jahóra tsjachahyará sich'erá tí xra kuèntana tí tsitohérá tí janhan.

⁵ Janhan na mé yóhe tí ntanòna, a ntá jahará la tí chaan tí ntanòna tsík'ayanta. Tí nkexro jnkokoá tjenkayáxinkian mé tsjacha ts'óna nchónhya to. A ntá tí tsinkáchónkihya sín tí janhan la ninkehó xra tsjachahya sín sich'e sín. ⁶ A ntá tí nkexro jnkokoáhya tjenkayáxinkian na mé éxí yóhe tí nta ch'ehya xra tsíkóchrínjin sín tsík'itjí sín chrínta tí nonte a tsoxámá ntá tsoxrejo ntá tsoche.

⁷ Ntá tí chaxín tsitōéhyará tsinkachónkirá tí janhan la ko ts'itjányanhyará tí nkehe kjuákohará ntá tsjanchiará ichrén nkehe tjinkáonra la ts'ayéhérá. ⁸ A ntá T'aná la tsochéhe ch'án tí ts'ónará itsjé to. Mé xíkaha tsjakoxinra kixin tinkachónkirá tí janhan. ⁹ Janhan tjuahará tí jahará éxí tjuana T'aná. Chrókónohará kixin tjuahará. ¹⁰ Tí tsitékáonra tí nkehe kuétuannhanra ntá tsonohará kixin tjuahará éxí yóhe kjaxin janhan ntaxiteyá tí nkehe k'uetuanna T'aná ntá kónòna janhan kixin tjuana ch'án.

11 'Mé xikaha tjonkará kaín tíha kixin ntá éxí chàna mé xikaha tsjintaxín tsochéhe asánrá. 12 Tí nkehe kuétuanhanrá la mé tíhi kixin chrótjuèhéra kichuára éxí tjuahará xikaha. 13 Ninkexró chrókóyóhe éxí tí nkexro imá tjuèhe tí sín chóxin ch'án ntá ts'enyákonhen ch'án tí jehe sín. 14 Jahará la chojni choxian tí tsitékáonrá tí nkehe tétuanhanrá. 15 Ntáxrjanhya janhan kixin jahará chojni ch'exón xra kixin tí chojni xikaha ch'exón xra mé noehya sín nkehe tí xra ch'e tí lámoe sín a. Náhí. A ntá jahará la chojni choxian kixin kaín xín nkehe kjuakona T'aná mé kjuákohára. 16 Jehya kixin jahará kjuéyará tí janhan. Náhí. Janhan mé kjuéyá tí jahará kixin tsotjahára xra, a ntá éxí yóhe to xé mé chrók'uaxrje jína tí xra sich'enará kixin chrók'uitjáyanhya. A ntá T'aná mé tsotjáhará ch'án kaín xín nkehe tsjanhexínrá njina. 17 Mé xikaha tétuanhanrá kixin tsotjuèhéra kichuára.

Tí sín chjasintajni nínkakohen sín tí ch'ín Jesús la ko tí sín tinkáchónki ch'án

18 "Tí tsonínkakohanrá tí chojni chjasintajni ntá chrókónohará kixin senó janhan nínkakonna sín. 19 Tí chrókókuèntará chjasintajni ntá tí sín chjasintajni chrótjuáhára sín kixin naxa kjéhyará sín. Kjánchó janhan kjuéyá tí jahará kixin chrók'uaxrjékjanxínrá tí sín sín chjasintajni. A ntá tí sín chjasintajni nínkakohanrá sín kixin jahará jahará kuèntará chjasintajni. 20 Xráxinkáonrá tí nkehe tsítjonkará kixin tí sín ch'ehe lámoe sín xra tjetóxinhya ts'etoan sín.* Éxí yóhe chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuákoḥa sín ntá kjaxin tsitekaon sín tí nkehe naxa tsjákohéra sín. 21 Mé xikaha sit'ahará sín kixin jahará tinkáchónkirá tí janhan la ko jehe sín chónhya sín tí nkexro ichr'ánna k'uinka ntihi.

22 "Tí chrók'uinkahya janhan ntihi chrónixjahya sín ntá chrókuamáhya sín jie. Ntá jie kohya nkerí tsaáxin sín kixin tí jie tinkákjasin sín. 23 Tí sín nínkakonna mé xikaha nínkakohen sín T'aná. 24 Chróchóntahya sín jie tí chrók'uejókianhya sín ntihi chrókjuásinhya janhan kjuaxroan jie éxí tsíkjasinhya ninkexró senó. Ntá jie ó k'uikon sín kaín tí kjuaxroan, a ntá kjónté nínkakonna sín tí janhan la ko nínkakohen sín T'aná kjaxin. 25 Mé xikaha tsonhen kaín tíha kixin ntá tsoxiteyá tí nkehe ntáchro tí ley kuènte sín kixin: "Kohya jie kjuásian janhan ntá kjónté kónínkakonna sín."† 26 A ntá tsi tí nkexro tsjinkítsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuènte T'aná. A ntá jehe ch'án mé tsochrónka nkexrí tjén janhan 27 la ko jahará kjaxinrá tsochronkará nkexrí tjén janhan kixin tí xrankíxixín la k'uéjóni jnkokoá.

16

1 'Kaín tíhi tjétjonkará kixin chrókuítóéhyará tí nkehe kjuákohára. 2 Tí sín judío tsjanjonhya sín kjuachaxin ts'ixenhenrá nínkoé sín la ko tsjixraká tí yaon kixin tí sín ts'óyán sín tí jahará tsontáchro sín kixin xikaha mé tjejóch'e sín xra kuènte Dios, tsixro sín. 3 Mé xikaha sich'e sín kixin chónhya sín T'aná la ko chónhyana sín. 4 A ntá tjonkará kaín tíhi kixin tió tsjixraká tí yaon xikaha tsonhen ntá tsoxráxinkáonrá kixin ó k'uétjonkará senó a.

Tí xra ch'e Nchakuen Dios

'Tí xrankíxixín k'uétjonkahyará tíhi kixin jnkokoá k'uék'ejóni. 5 Ntá jie sátsjiyá tí tjen tí nkexro ichr'ánna k'uinka. Kjánchó nijnkorá tjanchankíhyará nketí sátsjiyá. 6 Ntá kjuixin tjonkará tíha ntá imá t'avará kixin kuínhínrá xikaha xrjanca. 7 A ntá chaxín tí nkehe tjétjonkará kixin íchá jína sátsjiyá kixin jahará jína chrók'uejorá. A ntá tí sáchrókjuíhya ntá chrókuihya tí nkexro

* 15:20 Juan 13.16 † 15:25 Salmo 35.19; 69.4

tsjinkitsará. *A* ntá tí sátsjiyá janhan ntá tsétoan kixin itsi ch'án ntihi. ⁸ *A* ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jie, la ko itjen ijnko ntia ntoá chrókuakja sín la ko Dios mé sinchekitoexín tí jie kjuasin sín. ⁹ Xikaha chóna sín jie kixin tinkáchónkihya sín tí janhan. ¹⁰ *A* ntá tsonohe sín kixin itjen tí ntia ntoá kixin sátsjiyá tí tjen T'aná ntá ts'ikonhyará tí janhan inaá, ¹¹ la ko tsonohe sín kixin Dios sinchekitoexín ijie kixin ó kjuixin kuítóexín ijie tí nkexro t'etoan chjasintajni kixin tsjasóte.

¹² Naxa chonta janhan itsje nkehe chrótjonkará, kjánchó chrókjuachahyará chrókiénxinrá jie. ¹³ *A* ntá tió tsi tí Nchakuen Dios chaxín ntoá ntá jehe tí Nchakuen Dios mé tsjakohará ch'án kaín xín nkehe ntoá. Méxra jehya tí nkehe kuente ch'án tsochrónka ch'án na mé tí nkehe tsinhin ch'án mé tsochrónka ch'án tsjakohará ch'án tí nkehe tsonhen chr'éxin. ¹⁴ Jehe ch'án mé tsjikosàyana ch'án kixin ts'áyéhe ch'án tí nkehe kuéntana ntá tsjakohará ch'án nkehe tíha. ¹⁵ Kaínxín nkehe chóna T'aná na mé kuéntana. Mé xikaha ntáxrjan kixin tí Nchakuen Dios chaxín ntoá mé ts'áyéhe ch'án tí nkehe kuéntana ntá tsjakohará ch'án nkehe tíha.

Senó ts'ává sín ntá chr'éxin tsochéhe sín

¹⁶ 'Ntá í séhya la í ts'ikonhyará tí janhan. La ko kjaxin séhya xik'ikonrá tí janhan inaá kixin sátsjiyá tí tjen T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kichó sín kixin:

—¿Nkexrí t'axrjexín tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án inaá kixin sátsji ch'án tí tjen It'é ch'án?

¹⁸ ¿Nkexrí t'axrjexín tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xikaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan inaá. ¿Á tíha mé tjejtjanchankíhírá kíchuará ní?

²⁰ Tjéjtjonkará ijnko nkehe chaxín kixin imá tsotsjankará la ko ts'avará. *A* ntá tí chojni chjasintajni la tsochéhe sín. *A* ntá jahará ts'avará la ko sintoníhará kjónté chr'éxin tsocháhará má. ²¹ Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. *A* ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni. ²² Mé xikaha jahará ijie t'avará. Ntá xik'ikuán tí jahará inaá ntá imá tsochéhe asánrá la ko tsokohya ninkexró tsakitsajahará tí kjuachéhe tsochontará.

²³ 'Tió tsi tí yaon a ntá tsjanchankínahyará ninkehó. Chaxín tí nkehe tjéjtjonkará kixin T'aná tsotjáhará ch'án kaín nkehe tsjanchatóxixínrá nina.

²⁴ Naxa kjuánchatóxixínhyará ninkehó tí nina. Ntá jie tjanchiará la ts'ayéhérá, a ntá tsjintaxín tsocháhará.

Inchéni Jesucristo mé kjuacha ch'án k'uetōan ch'án, ntá chjasintajni la náhi

²⁵ 'Tí nkehe tjéjtjonkará mé kjuintayóaxián ó. Ntá tsjixraká tí yaon la í ninkehó sintayóaxián na mé ntoá tsotjonkará nkexrí tjen T'aná. ²⁶ *A* ntá tí yaon a mé tsjanchaxínrá nkehe nina. Ntá ntáxrjanhya tíhi kixin tsonixjayákonhanrá tí tjen T'aná ²⁷ kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekáonrá kixin janhan k'uinkaxian tí tjen Dios. ²⁸ K'uaxrjéxian tí tjen T'aná k'uinka chjasintajni. Ntá jie la ó tsitohá chjasintajni ntá sátsjiyá inaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya. ³⁰ Ntá jie tienxínni kixin jaha mé noha kaín xín nkehe la ko t'ichjánxinhya kixin jnkójín nkexro chrókjuanchankíha sín ichrén nkehe. Méxra xíkaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátehe ch'ín Jesús ntáchro ch'án kixin:

—¿Á jie kuítekaonrá ní? ³² Ntá tsi tí yaon na mé jie tíha na ntá tsochakonrá jnkójnkora tsoxíkará sátsjirá ntá tsitonará janhván tsjak'é. Kjánchó jehya janhván tjén. T'aná mé tjékian. ³³ Tjétkonkará kaín tíhi kixin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjónté kjuaxróxinhya tjejorá tjejtjasóterá kjánchó chakonhyará kixin janhan mé ó kjuixin kjuacha tsétoan. A ntá tí chjasintajni la kjuachahya ts'etoan —ichro ch'án.

17

Ch'ín Jesús chrónóehé ch'án It'é ch'án kixin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajní ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan antsí má kjuachaxin kixin kjaxin tí Xjaan chrókjuikosáyehe tí jaha. ² Jaha tsíchjehé kjuachaxin tí Xjaan kixin ts'etuénhen ch'án kaín xín chojni na ntá jehe ch'án tsochjéhe kjuachón jnkochrínín kaín tí sín tsíchjehé ch'án. ³ Tí kjuachón jnkochrínín mé t'axrjexín kixin tsochóxian sín tí jaha tí jnkokoá Dios chaxín tjechón la ko kjaxin tsochóxin sín Jesucristo la mé jaha kuétuénhén ch'án kui ch'án ntihi chjasintajni.

⁴ Ó kjuixin kjuíkosáyaha tí jaha ntihi chjasintajni kjuixinna tí xra chjina sit'a. ⁵ A ntá jie It'éni, chjina jaha tí kjuachaxin jie k'uéchonta janhan tí k'uéjóni jnkokoá naxa k'onahya chjasintajni.

⁶ Ó kjuixin kjuákoḥa tí sín chjina chjasintajni kixin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuákoḥa sín itán la ntá ijie la ó kuítekaon sín. ⁷ Ntá jie ó kjuátsoan sín kixin kaín tí kjuachaxin chonta janhan la jaha tsíkánjuan. ⁸ Kixin ó kjuixin kjuákoḥa sín tí tán chjina jaha, ntá kuítekaon sín, ntá kuénxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

⁹ Janhan mé xrjanóaha kixin chrók'uayakonhén tí jehe sín. Jehya kixin xrjannóaha kixin chrók'uayakonhén kaín tí chojni síin chjasintajni. Náhí. Jehó xrjanóaha kixin chrók'uayakonhén tí sín chjina kixin kuéntá sín. ¹⁰ A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jie kuéntana mé ts'inkaséyanxín tí jehe sín.

¹¹ A ntá jie tsitonahya janhan ntihi chjasintajni. Kjánchó jehe sín naxa tsitohé sín chjasintajni. A ntá jie tsjasán tí tjen jaha. Jaha It'éni imá jina jaha, t'ayakuenxián sín tí kjuachaxin tí ihniá kixin ntá jnkokoá chrókjuenkayáxin sín éxí tí jaha la ko janhan jnkokoá tjenkayáxinni. ¹² A ntá tí naxa k'uéjókian tí jehe sín ntihi chjasintajni la k'uàyakuànxián sín tí kjuachaxin tí ihniá chjina. Nijnko tí jehe sín k'uitjáyanyha sín. A ntá jnkokoá nkexro mé k'uitjáyan mé tí ch'ín xráxín ts'itjáyan kixin xíkaha tsoxiteyá éxí nixja tí xroon tsíkjin sín.

¹³ Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kixin ntá tsochéhe sín éxí yóhe imá chàna. ¹⁴ Janhan mé kjuákoḥa sín itán jaha, a ntá jie tí sín chjasintajni mé nínkakonhen tí jehe sín kixin jehe sín la jehya kuènte chjasintajni éxí kjaxin janhan na janhya kuéntana chjasintajni. ¹⁵ Tjáncháhya kixin chrókuakítsjehé sín chjasintajni.

Náhi. Tjáncháhá kixin chrók'uayakonhén sín kixin chrókjuich'iyehya sín tí Jínahya. ¹⁶ Jehe sín la jehya kuènte chjasintajni éxi yóhe janhan kjaxin janhya kuènte chjasintajni. ¹⁷ Nchetjuáxian sín tí kjuachaxin kuéntá kixin itán jaha mé tí tan chaxín ntoá. ¹⁸ Éxi yóhe jaha kuétuanna k'uinka chjasintajni mé xikaha janhan tétuannhan sín kixin chrók'uejójáxian sín tí sín chjasintajni. ¹⁹ Jehó tí xra kuéntá chrókjuít'a kixin chrókjuinkítsa tí jehe sín, a ntá jehe sín kjaxin chrókjuich'e sín tí xra kuéntá kixin kuínhin sín itán chaxín ntoá.

²⁰ 'Kjánchó jehya kixin xrjanóaha kixin chrókjuinkítsa tí jehó sín. Náhi. Kjaxin xrjanóaha kixin chrókjuinkítsa kaín tí sín tsitekaon sín chr'éxin tsinhin sín tí nkehe tsochrónka tí sín a. ²¹ Mé xikaha xrjanóaha kixin kaín tí jehe sín jnkokoá chrókjuenkayáxin sín éxi jaha It'eni la ko janhan jnkokoá tjenkayáxinni mé xikaha xrjanóaha kixin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín kixin jaha tsíkétuanna k'uinka ntihi. ²² A ntá tí kjuachaxin jié chjina na mé tjaha tí jehe sín kixin ntá kaín sín jnkokoá chrókjuenkayáxin sín éxi yóhe jaha la ko janhan jnkokoá tjenkayáxinni. ²³ Janhan la ko jehe sín jnkokoá chrókjuenkayáxinni éxi jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuèhé tí jehe sín éxi yóhe tjuana tí jaha.

²⁴ Jaha It'eni, tí sín kjuánjuan la tjínkavan kixin tí jehe sín chrók'uejójian sín tí tsjak'é janhan kixin chrók'uikon sín tí kjuachaxin jié chjina; kixin xráxín naxa k'ónahya chjasintajni k'uétjuana jaha. ²⁵ It'eni jaha, imá jina jaha. Kjonté tí sín chjasintajni naxa chónhya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe sín kixin jaha kuétuanna k'uinka. ²⁶ Ó kjuákoha sín kixin nkexro tí jaha la ko xikaha naxa tsjákohe sín, kixin éxi tjuana jaha mé xikaha chrótjuèhe sín kichó sín la ko janhan chrók'uejójian tí jehe sín —mé xikaha chrónóehé ch'ín Jesús tí It'é ch'án.

18

Ch'ín Jesús sákjuíko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)

¹ Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrjexín sín ntiha k'uatòye sín tí tsaka Cedrón. Ntaha tjen ijnko nonte siín nchónhya nta k'uixenhen ch'ín Jesús la ko tí sín k'uájiko ch'án. ² Kjaxin ch'ín Judas tí ch'ín sinchekji tí ch'ín Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'ín Jesús tí sín k'uájiko ch'án a. ³ A ntá ch'ín Judas ó kjuíkao ch'án nchónhya sín soldado la ko iso sín policía kuènte nínko tsík'etuenhen tí sín nchát'á t'etoan la ko tí sin fariseo. Ntá kjuí sín kaín sín xraá sín chica la ko kjuíkao sín xrohi t'inkaséyanxín tí kjuixín sín. ⁴ A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kixin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kixin:

—Tjeyáni tí ch'ín Jesús tsíkjin chjasin Nazaret —ichro sín.

Ntá kjuátehe ch'ín Jesús ntáchro ch'án kixin:

—Janhan tíha —ichro ch'án.

A ntá ch'ín Judas tí ch'ín tsíkjinchekji tí ch'ín Jesús mé koí tjenkákjan ch'án tí jehe sín ntiha. ⁶ A ntá tió kjuátehe ch'ín Jesús kixin jehe ch'án tíha, ntá jehe sín xráchonka sín kjuítsínka sín nonte. ⁷ Ntá xíkjanchankí ch'ín Jesús inaá ntáchro ch'án kixin:

—¿Nkexro xritjéyará? —ichro ch'án.

Ntá xíntáchro sín kixin:

—Tjeyáni tí ch'ín Jesús tsíkjixin chjasin Nazaret —ichro sín.

⁸ Ntá ntáchro ch'ín Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá t̄toherá sátsji tí í so sín xríkian —ichro ch'án.

⁹ Mé xíkaha ntáchro ch'ín Jesús kixin ntá tsoxiteyá tí nkehe tsíntáchro ch'án kixin: “Tí sín kjuanjon T'aná la ninkexró kjuíntak'itjáyanhya.”* ¹⁰ Ntá ch'ín Simón Pedro kuakitsje ch'án tí chica espada chrinkatoxin ch'án kóchrínjin ch'án tatsjon chjina ijnko ch'ín it'ín Malco, mé ijnko ch'ín ch'ehe nchat'á t'etoan xra. ¹¹ Kjánchó ch'ín Jesús ntáche ch'án tí ch'ín Pedro kixin:

—Chr'axenhén t̄joe chica espada méhe. Kjá ntáchrúa kixin tsjasótehyana, kjá ichrúa. Kjánchó T'aná kjuanjon kjuachaxin kixin nchónhya tsjasótena —ichro ch'án.

Ch'ín Jesús kjuák'e nkayakon tí ch'ín t'etuēhen tí sín nchat'á

(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí ch'ín comandante t'etuēhen sín la ko tí sín policia judío kuēnte n̄nko mé itsé sín tí ch'ín Jesús kjuínchenteto sín ch'án.

¹³ A ntá sákjuíko sín ch'án nt̄oe ch'ín Anás ich'ee tí ch'ín Caifás mé tí nkexro tsík'áyéhe xra nchat'á t'etoan tí nánó a. ¹⁴ A ntá tí ch'ín Caifás, jehe ch'án na mé tí nkexro tsíntáche tí sín judío kixin íchá jina kixin jnkokoá chojni chrók'uenyákonhen kaín tí sín chjasén ch'án.†

Ch'ín Pedro kjuínchemá ch'án kixin chóxin ch'án tí ch'ín Jesús

(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko í jnko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijnko a mé chóxin ch'án tí nchat'á t'etoan. Ntá k'uixenko ch'án tí ch'ín Jesús tí nt̄asin nt̄oe tí nchat'á t'etoan. ¹⁶ Kjánchó ch'ín Pedro kuít̄ohe ch'án nt̄ója nt̄asin ó. Ntá tí ch'ín ijnko a chóxin tí nchat'á t'etoan mé k'uaxrje ch'án nt̄asin nixjehe ch'án tí tjan t'ayakonhen tí nt̄ója nt̄asin chrónóehe ch'án tjan ntá xranjon kjuachaxin ntá k'uixenhen ch'ín Pedro kjaxin. ¹⁷ Na ntá tí tjan t'ayakonhen tí nt̄ója nt̄asin kjuanchankíhi tjan tí ch'ín Pedro kixin:

—¿Á jahya kjaxin xríkoa tí ch'ín a? —ichro tjan.

Ntá kjuátehe ch'ín Pedro kixin:

—Náhí, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policia kjuaka sín xrohi ntaha t̄jéjoxin t̄oté sín t̄jéjochjixrohe sín. La ko koí ch'ín Pedro t̄jéchjixrohe ch'án ntiha.

Tí nchat'á t'etoan mé kjuanchankíhi ch'án tí ch'ín Jesús

(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'etoan kjuankixin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuákohe ch'án sín. ²⁰ Ntá kjuátehe ch'ín Jesús ntáchro ch'án kixin:

—Noxín kjuak'é kjuákua, la ntá kaín xín chojni kuínhin sín. Xrácín k'uékjákoxian kaín xín tí n̄nko ntsí la ko tí n̄nko jíé t̄jnkotséxin kaín xín sín judío. Ninkehó nkehe kjuákohya imó. ²¹ ¿Nkekuénté t̄janchankina tí janhan xíkaha? Chrókjuanchankíhí tí sín kuínhin kixin nkexrí kjuákohe sín. Jehe sín mé nohe sín nkehe kjuákohe sín —ichro ch'án.

²² Kjuixin ntáchro ch'ín Jesús tíhi ntá ijnko ch'ín policia kuēnte n̄nko mé t̄jentaxín ch'án ntiha ch̄jehe ch'án nkayakon tí ch'ín Jesús ntáchro ch'án kixin:

* 18:9 Juan 17.12 † 18:14 Juan 11.49-50

—¿Á xikaha jjehe tsjátēhé tí nchat'á t'etōan ní? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí ntoáhya tí nkehe xrjanka ntá chronka nkehe tí ntoáhya. A ntá tí ntoá tí nkehe xrjanka, ¿ntá nkekuènté kixin tjatena? —ichro ch'án.

²⁴ Ntá k'uetōan ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí nchat'á t'etōan.

*Ch'ín Pedro xíkjinchemá ch'án inaá kixin chóxin ch'án tí ch'ín Jesús
(Mt. 26.71-75; Mr. 14.69-72; Lc. 22.58-62)*

²⁵ Ntá ch'ín Simón Pedro mé naxa tjexín toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhí, janhya —ichro ch'án.

²⁶ A ntá ijnko ch'ín ch'ehe tí nchat'á t'etōan xra, na mé tí ch'ín a mé naxa kjéhya ch'án tí ch'ín tsíkóchrínjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uíquān tjekoa ch'án tí huerto ní? —ichro ch'án.

²⁷ Ntá ch'ín Pedro xíkjinchemá ch'án inaá kixin jehya ch'án, ichro ch'án. Ntá xrínahya tuénxín itsje ijnko kochíntōa.

*Ch'ín Jesús kjuák'e nkayakon tí ch'ín Pilato
(Mt. 27.1-2, 11-14; Mr. 15.1-5; Lc. 23.1-5)*

²⁸ Ntá k'uaxrjexín sín ntōe ch'ín Caifás, sákjuíko sín ch'ín Jesús tí palacio t'etōanxín tí ch'ín gobernador. Ntá ó kjuankíxin k'uínkaséyan kjuíji sín ntiha. A ntá tí sín judío la mé í k'uixenhya sín tí palacio kixin tí xikaha chrók'uixenhen sín tí nchia a la chrókuamá sín tí jje síin ntiha la í xitjahya sine sín tí kia pascua, ichro sín. ²⁹ A ntá ch'ín Pilato k'uaxrjexín ch'án tí nchia t'etōanxín ch'án kjuanchankíhi ch'án sín kixin:

—¿Nkehe tí jje chóna tí nkexro i? —ichro ch'án.

³⁰ Ntá kjuátehe sín ntáchro sín kixin:

—Tí chróchóntahya ch'án jje jje la chrókjuíkoahyani ch'án —ichro sín.

³¹ Ntá k'uetōan ch'ín Pilato kixin:

—Sátjikoará ch'án nchekitōexínrá nkerí jje chóna ch'án kixin éxí ntáchro tí ley kuèntará —ichro ch'án.

Ntá kjuátehe tí sín judío ntáchro sín kixin:

—Jeheni chojni judíoni la chóntahyani kjuachaxin ts'óyánni ninkexró —ichro sín.

³² Mé xikaha tsoxiteyá tí nkehe tsíntachro ch'ín Jesús kixin nkexrí ts'enxín ch'án. ³³ Ntá ch'ín Pilato xík'ixenhen ch'án tí nchia t'etōanxín ch'án ntá k'uíyēhe ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etuenhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kixin:

—Tí nkehe tjanchankiná, ¿á jahyá kjuenkayáxian xikaha, o á í jnko nkexro kjuanchia jje kixin tí janhan? —ichro ch'án.

³⁵ Ntá kjuátehe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nchat'á t'etōan mé kjuikaán sín tí jaha. ¿Xá nkehe kjuích'e kixin? —ichro ch'án.

³⁶ Ntá kjuátehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétoan. Náhí. Tí chrókuétoan chjasintajni ntá tí sín xríkian chrókjuanjonko sín tí sín judío

kíxin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kíxin chjasintajni chrókuétoan —ichro ch'án.

³⁷ Ntá ntáchro ch'ín Pilato kíxin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kíxin:

—Janhan tí rey éxí ntáchrua jaha. Tí xra ó kokjina la ko tí xra ó k'uinka chjasintajni kíxin tsoxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

³⁸ Ntá ntáchro ch'ín Pilato kíxin:

—¿Xá nkehe tí nkehe chaxín ntoá, ichrua? —ichro ch'án.

Ch'ín Pilato kjuanjon kjuachaxin kíxin its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sin judío nixjehe ch'án sín ntáchro ch'án kíxin:

—K'úitjáhya ninkehó jie chóna tí nkexro i. ³⁹ Kjánchó jahará la ó kuánhanrá kíxin tí kia pascua tsjánjuan kjuachaxin kíxin ts'atjánta ijnko nkexro tjechjina. ¿Á tjinkáonrá kíxin ts'atjánta tí ch'ín Rey t'etueñhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kíxin:

—Tí ch'ín a la náhi. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'ueṭoan ch'án kíxin tsjate sín tí ch'ín Jesús. ² Ntá tí sín soldado kjuích'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkaya sín ch'án ijnko ka kjátse tié kíxin jehe sín tsjikosáyehe sín ch'án éxí ijnko rey, kjánchó chaxínhya tíha. ³ Ntá kóchjinehe sín tí tjen ch'án ntáchro sín kíxin:

—Isé tsjak'e tsétueñhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etoanxín ch'án inaá nixjehe ch'án tí sín tsíkójnkotsé ntáchro ch'án kíxin:

—Tsjeherá tsakítsjexián ch'án ntihi kíxin tsonohará kíxin k'úitjáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'í la ko tjenkáya ch'án tí ka kjátse tié. Ntá ntáchro ch'ín Pilato kíxin:

—Tsjeherá, ntihi tjen ch'án —ichro ch'án.

⁶ A ntá tió k'uíkon tí sín ncha'tá t'etoan la ko tí sín policia kuènte ninko ntá kjuankíxin sín t'óyako sín ntáchro sín kíxin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'ín Pilato kíxin:

—Jahará tjíkoará ch'án tjaké nkanirá ch'án ntacruz kíxin janhan k'úitjáhya ninkehó jie chóna tí jehe ch'án —ichro ch'án.

⁷ Ntá kjuátehe tí sín judío kíxin:

—Jeheni chojni judío mé chóntani ijnko ley t'etoan kíxin chrók'uen ch'án kíxin ncheyóhe ch'án asén ch'án kíxin Xjeen Díos tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án ⁹ ntá xík'ixenhen ch'án tí nchia t'etoanxín ch'án inaá kjuanchankíhi ch'án tí ch'ín Jesús kíxin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuátehehya ch'án.

¹⁰ Ntá ntáchro ch'ín Pilato kíxin:

—¿Jaha nkekuèté tjàteehya nkehe tjánchánkíha? ¿Á noahya jaha kíxin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kíxin sátsjia kohya nkehe tsonhan? —ichro ch'án.

¹¹ Ntá kjuátehe ch'ín Jesús ntáchro ch'án kíxin:

—Ninkehó kjuachaxin chróchontahya jaha chrókuétoan chrók'uén o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jié jié chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankíxin ch'án kjueyá ch'án nkexrí chrók'ueytoan ch'án kíxin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kíxin:

—Kja tí tsitohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'etuénhen tí nación kuèténi. Tí nkexro ch'éna asén ch'án éxi ijnko rey mé nínkakonhen ch'án tí ch'ín t'etuénhenni —ichro sín.

¹³ Ntá kuínhin ch'ín Pilato tíhi ntá k'ueytoan ch'án kíxin tsakitsje sín tí ch'ín Jesús ntója ntá ch'ín Pilato kjuák'etjaxin ch'án tí silla nchekitoexín ch'án jié, mé nkiva hebreo mé it'ín Gabata, mé t'axrjexín kíxin tjat'o noi jehó xro tsík'óna. ¹⁴ Na mé ó chjina chonkíxin ntá tí tsonjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kíxin:

—Ntíhi itjen tí ch'ín rey kuèntará —ichro ch'án.

¹⁵ Kjánchó jehe sín k'óyako sín ntáchro sín kíxin:

—¡Its'en ch'án! ¡Its'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'ín Pilato kíxin:

—¿Á tjinkáonrá kíxin janhan chrókjuakénkania ijnko ntacruz tí ch'ín rey kuèntará ní? —ichro ch'án.

Kjánchó tí sín nchát'á t'etoan mé kjuátehe sín kíxin:

—Náhí. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkáni sín ch'án ntacruz. Ntá sákjuíko sín ch'án.

Kjuák'enkáni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuíko sín tí ch'ín Jesús kuámá ch'án tí ntacruz tsjak'enkáni ch'án. Ntá kjuíjiko sín ch'án ijnko tjo tikítexín sín Hueso Kja Chojni. A ntá nkiva hebreo mé tikítexín sín Gólgota. ¹⁸ Ntaha mé kjuák'enkáni sín ch'án tí ntacruz. Ntá kjaxin yaá sín nánánko k'uéjónko sín ntá jnkosiné kjuák'e ch'ín Jesús.

¹⁹ Ntá k'ueytoan ch'ín Pilato kíxin tsokjin sín ijnko ntachiso tsjak'enkáni sín ikja tí ntacruz ntáchro kíxin: “Ch'ín Jesús kjuixín ch'án chjasin Nazaret, mé tí ch'ín Rey kuènte tí sín judío”, tsixro. ²⁰ A ntá itsjé tí sín judío mé kjuínchekuáxin sín tí letra tsík'óna kíxin chjino tí chjasin Jerusalén tsíkjak'enkáni sín ch'ín Jesús ntacruz la ko iní nkiva tsíkjin sín, na mé ijnko nkiva la hebreo, la ijnko nkiva la griego, la ijnko nkiva la latín. ²¹ Ntá tí sín nchát'á t'etoan kuènte tí sín judío mé ntáche sín tí ch'ín Pilato kíxin:

—Chrókjinhya jaha xikaha kíxin jehe ch'án mé tí “Ch'ín Rey kuènte tí sín judío.” Náhí. Íchá jina chrókjian jaha kíxin “Jehe ch'án ntáchro ch'án kíxin jehe ch'án mé tí ch'ín Rey kuènte tí sín judío” —ichro sín.

²² Kjánchó kjuátehe ch'ín Pilato kíxin:

—Tí letra kuétoan k'óna la ó k'óna, kjónté xikahó tsitohé —ichro ch'án.

²³ Ntá tí sín soldado tíó tsíkjixin tsíkjak'enkáni sín tí ch'ín Jesús tí ntacruz ntá kuákja sín tí ké ch'án la k'ókikayehe sín jnkoinko ka kuákja sín kanoé sín. La ko kjaxin kuákja sín tí ka kjínjin k'uék'inkáya ch'án. Tí ka mé tsíxronhya ka la me jnkokoá ka tíha. ²⁴ Ntá tí sín soldado kjo sín kíchó sín ntáchro sín kíxin:

—Tsótséchjehyani tí ké ch'án. Íchá jína sich'exínni suerte ntá tsotsjeheni siná nkexro ts'áyéhe tí ka.

Mé xikaha xiteyá éxi ntáchro xroon itén Dios tsíkjin sín ósé ntáchro kixin: “Kjuích'exín sín suerte ntá k'óxikayéhe sín kaná.”* Mé xikaha kjuích'e tí sín soldado.

²⁵ A ntá chjino tí ntacruz kjuák'enkání ch'ín Jesús mé kjuák'e tí ìné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena. ²⁶ A ntá tió k'uíkon ch'ín Jesús kixin itjen tí ìné ch'án la ko chjino tjen tí ch'ín antsí tjuèhé ch'án k'uék'ajiko ch'án, ntá nixjéhe ch'án tí ìné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjéhe ch'ín Jesús tí ch'ín a ntáchro ch'án kixin:

—Tsjehé kixin ntaha itjen ìná —ichro ch'án.

A ntá tí ch'ín a mé k'uáyéhe ch'án tí tjan a sákjuíko ch'án tjan ntøe ch'án k'óna éxi ìné ch'án xikaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjin sín ósé ntá xikaha ntáchro ch'án kixin:

—Ik'uén nta.

²⁹ Ntá ntiha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kjínjin, ntá kjuínchekhriin sín tí tjen ir'va ch'án. ³⁰ Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

³¹ A ntá xikaha yaon ntøye mé tí yaon kia pascua ntá tí sín judío tjinkakon-hya sín kixin tí cuerpo kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jié, ichro sín. Mé xikaha kjuanchehe sín tí ch'ín Pilato kixin ts'etøan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en. ³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús. ³³ Ntá kjuíji sín tí tjen ch'ín Jesús ntá k'uíkon sín kixin ó tsíkjin tsík'en ch'án, ntá í k'óchjenjinhya sín toté ch'án.

³⁴ A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko ìnta. ³⁵ A ntá janhan mé tjékjian tí xroon i mé kjuak'é ntiha k'uíkuån kixin xikaha kónhen ntá ntoá tjéxrjanka kixin jahará kjaxinrá chrókuítekáonrá. ³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin: “K'óchjenjinhya sín ninkehó huésøe ch'án.”† ³⁷ Kjaxin itjen í jnko nketí nixja tí xroon itén Dios tsíkjin sín ósé ntáchro kixin: “Tsokomá sín tí nkexro tsíchr'áte sín chica.”‡

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé ijnko ch'ín kjuixin chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxin ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jéhe

* 19:24 Salmo 22.18 † 19:36 Salmo 34.20 ‡ 19:37 Zacarías 12.10

ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuíko ch'ín José tí cuerpo kuènte ch'ín Jesús. ³⁹ Kjaxin ch'ín Nicodemo, tí ch'ín kjuínixjehé tí ch'ín Jesús ijnko tie a mé kjui ch'án kjuikao ch'án treinta kilo xroan xraxé tjiko xroan mirra la ko xroan áloes. ⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjinjin tsíka tí xroan xraxé a kixin xikaha k'uékinkáchónki tí sín judío k'uékjavá sín chojni tsík'en. ⁴¹ Tí kjuák'enkání ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxráváhya ntiha. ⁴² Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankíxin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankíxín semana ntá tí tjan María Magdalena naxa sítié sákjuí tjan tí tjen tí tòye, ntá k'uíkon tjan kixin ó tsíkjin tí xro tsík'ikjèxin tí tòye a. ² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuèhe ch'ín Jesús, ntá ntáchro tjan kixin:

—Ó tsíkakitsjexín sín tòye tí cuerpo kuènte Ìnchéni ntá noehyani nketí tsíkjak'e sín —ichro tjan.

³ Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a. ⁴ Ntá yóí sín kuinká sín sákjuíko kichó sín. Kjánchó tí ch'ín í jnko antsí tjan kuinká ch'án ntá kánhyó tjan kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a. ⁵ K'uísén ch'án tsjehe ch'án nkaxenhen tí tòye a. A tí ka tsík'ísímá ch'ín Jesús mé naxa tjejó k'uíkon ch'án, kjánchó jehe ch'án k'uixenhya ch'án tí tòye a. ⁶ Ntá kjónté chr'éxin kjuíji ch'ín Simón Pedro ntá k'uixenhen ch'án tí tòye a. Ntá kjaxin k'uíkon ch'án kixin tjejó tí ka tsík'ísímá ch'ín Jesús ⁷ la ko k'uíkon ch'án tí ka tsík'ísímá ikja ch'án na mé tí ka tsíxréya ka la ókjé tjen ka, a ntá tí í so ka na mé ókjé tjejó ka kjaxin. ⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsíkji senó na kjaxin k'uixenhen ch'án tí tòye ntá k'uíkon ch'án tí nkehe tsíkónhen ntá kuítekaon ch'án. ⁹ Kixin naxa k'uékienxínhya sín tí nkehe k'uéchrónka xroon itén Dios kixin t'ichjánxin tsoxechón tí ch'ín Jesús. ¹⁰ A ntá tí sín sátsíkjitsjehe tòye la xíjan sín ntòe sín.

Titàya k'uíkuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuítóhe tjan ntója tí tòye tsjánka tjan. Naxa tsjánka tjan k'uísén tjan tsjehe tjan nkaxenhen tí tòye ¹² ntá xrínahya k'uíkon tjan yaá sín ángel tjejóyá sín ka tjóá tjejótxaxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án. ¹³ A ntá tí sín ángel mé kjuanchankí sín kixin:

—Naná, ¿kuènte tsjánka? —ichro sín.

Ntá kjuátehe tjan ntáchro tjan kixin:

—Sátsíkjiko sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátsoanhya tjan kixin jehe ch'án. ¹⁵ Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuènté tsjánka? ¿Nkexro tjejó? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kja tí jaha sákjuíkoa ch'án ntá jie chroñka nketí sákjuíkoa ch'án kixin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxin tjan nkiva hebreo ntáchro tjan kixin:

—¡Raboni! —ichro tjan. Tíha mé t'axrjexín kixin Maestro.

¹⁷ Ntá ntáchro ch'ín Jesús kixin:

—Tatjántana kixin naxa sájtíhya janhan tí tjen T'aná. Sátjia tjítsjehé tí sín kichiná chénka sín kixin sátsjiyá tí tjen T'aná na mé kjaxin It'ará tí jahará na mé Dios kuéntana la ko kjaxin Dios kuéntará —ichro ch'án.

¹⁸ Ntá tí tjan María Magdalena sákjuíchénka tjan tí sín k'uék'ajiko ch'ín Jesús chroñka tjan kixin xikaha tsík'ikon tjan Ìnchéni. La ko kjaxin chroñka tjan kixin xikaha tsíntáchro ch'án.

Tí sín k'uék'ajiko ch'ín Jesús titàya k'uíkuèn sín ch'án

(Mt. 28.16-20; Mr. 16.14-18; Lc. 24.36-49)

¹⁹ A ntá ó kónjín tí yaon a mé tí yaon xrankixixín semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jina kixin chrakonhen sín tí sín judío. Ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án kjuajna tí sín k'uék'ajiko ch'án ntáchro ch'án kixin:

—Jina tjejorá —ichro ch'án.

²⁰ Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uíkon sín Ìnchéni. ²¹ Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uetuanna k'uinka, a ntá jie la janhan tétuanhan tí jahará —ichro ch'án.

²² Ntá k'uánote ch'án tí jehe sín ntáchro ch'án kixin:

—T'ayéherá Nchakuen Dios. ²³ Tí ts'itjáyahanrá tí jie kjuasin jnkojín chojni ntá xikaha tsjlin tí ijié sín. Ntá tí ts'itjáyahanrá tí jie kjuasin jnkojín chojni ntá naxa kjuínhya tí ijié sín —ichro ch'án.

Ch'ín Tomás k'uíkon ch'án kixin tsíxechón Ìnchéni

²⁴ A ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikitexín sín ch'ín Nohé mé kohya ch'án tí kui ch'ín Jesús. ²⁵ Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uíkonni Ìnchéni —ichro sín.

Kjánchó ntáchro ch'ín Tomás kixin:

—Tí ts'íkónhya janhan tí tsíkjiatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuítekavan? —ichro ch'án.

²⁶ A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jina ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsíkjiatexín chica clavo tjaná la ko xrákoa tjá chr'axénhén chjiana. Chróntáchrohya kixin chaxínhya. Tsítekavan kixin chaxín —ichro ch'án.

²⁸ Ntá kjuátehe ch'ín Tomás ntáchro ch'án kixin:

—¡Inchéni jaha la ko Dios kuèntana! —ichro ch'án.

²⁹ Ntá ntáche ch'ín Jesús tí ch'ín Tomás kíxin:

—Jaha Tomás k'uíkonjian ntá kuítekávan. Ntá antsí náxrjón tjejó tí sín kjónté k'uíkonhya la titekaon sín —ichro ch'án.

Tíhi mé chrónka nkekuènte tsíkjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uíkon tí sín k'uájiko ch'án kjónté chrónkahya tí xroon i kíxin xíkaha kónhen. ³¹ Tí nkehe chrónka tí xroon i ikjian janhan kíxin chrókuítekáonrá jahará kíxin Jesús mé tí Cristo, mé tí Xjeen Dios kíxin ntá kaín ni chróchóntani kjuachón jnkochrín kíxin chrókuítekaonni ch'án.

21

Yato tí sín k'uék'ajiko ch'ín Jesús xrínahya titàya k'uíkon sín ch'án

¹ A ntá chr'éxin tí sín k'uék'ajiko ch'ín Jesús titàya xík'ikon sín tí jehe ch'án inaá chrínta ntayaon Tiberias. Mé xíkaha kónhen ² kíxin jnkokoá k'uéjéjó sín ch'ín Simón Pedro la ko ch'ín Tomás, me tí ch'ín tikítexín sín ch'ín Nóhé, la ko ch'ín Natanael kuixín ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús. ³ Ntá ntáchro ch'ín Simón Pedro kíxin:

—Sátsjitse koche —ichro ch'án.

Ntá kjuátehe sín kíxin:

—Koíni sátsjikoani —ichro sín.

Ntá sákjuí sín k'uit'ótjen sín ijnko ntabarco. Kjánchó ninkehó koche tséhya sín kuenté tie. ⁴ A ntá ó chjina ts'inkaséyan ntá xrínahya titàya k'uíkon sín itjen ch'ín Jesús chrínta ntayaon, kjánchó kjuátsoanhya tí sín k'uék'ajiko ch'án kíxin jehe ch'án. ⁵ Ntá kjuanchankíhi ch'án sín kíxin:

—Jahará ntasoá, ¿á naxa ninkehó koche tsehýará? —ichro ch'án.

Ntá kjuátehe sín ntáchro sín kíxin:

—Naxa ninkehó ko tséhýani —ichro sín.

⁶ Ntá ch'ín Jesús ntáche ch'án sín kíxin:

—Itérá tí nchísén tí nánko chjia chjina tí ntabarco la tsotserá va —ichro ch'án.

Ntá xíkaha kjuích'e sín k'ue sín nchísén ntá í tjachahya sín tsakitsjenkíxin sín ntá tí nchísén kíxin nchónhya koche tjinká. ⁷ A ntá tí ch'ín antsí tjuèhe ch'ín Jesús mé ntáche ch'án tí ch'ín Pedro kíxin:

—¡Inchéni tí méhe! —ichro ch'án.

Ntá kuínhin ch'ín Simón Pedro kíxin Inchéni tíha ntá k'uinkáya ch'án iké ch'án inaá (kíxin tsíkakitsje ch'án iké ch'án) ntá kjuiánki ch'án ntá. ⁸ Tí í so sín k'uék'ajiko ch'ín Jesús mé kjuíji sín tí chrínta ntayaon kjuíkao sín tí ntabarco tinkánkákjéntóxin tí nchísén tjinká koche chrítaón ntá kíxin ijnko ciento metro kjínxin tí chrínta ntá k'uéjéjó sín. ⁹ Ntá kjuíji sín chrínta ntá ntá k'uínkajinxín sín tí ntabarco ntá k'uíkon sín tjeche xrohi síxènkj xrinta ntá chrítaón tí xrinta tjekjen ijnko koche la ko nánko siín niotja. ¹⁰ Ntá kjuanchia ch'ín Jesús ntáchro ch'án kíxin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'uit'ótjen ch'án tí ntabarco kuákja ch'án tí nchísén kuínkánkákjen ch'án xrákao ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a. ¹² Ntá ntáchro ch'ín Jesús kíxin:

—Xrákirá, interá —ichro ch'án.

A ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsoan sín kixin Ìnchéni tíha. ¹³ Ntá kóchjina ch'ín Jesús kuákja ch'án tí niotja chjéhe ch'án tí jehe sín la ko xíkaha xíkjanjon ch'án tí koche.

¹⁴ Tíhi mé nixin k'uíkon tí sín k'uék'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin: —Jaha Simón, xjeen Jonás, ¿á antsí tjuana jaha, a ntá tí í so la kánhyó? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuéntana —ichro ch'án.

¹⁶ Ntá yóxin kjuanchankí ch'ín Jesús inaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuéntana —ichro ch'án.

¹⁷ Ntá nixin kjuanchankí ch'ín Jesús kixin:

—Jaha Simón, xjeen Jonás, ¿á tjínkavan tí janhan? —ichro ch'án.

A ntá k'uává ch'ín Pedro kixin nixin kjuanchankí ch'ín Jesús kixin á tjinkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha kaín xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha t'ayakonhén tí kolélo kuéntana. ¹⁸ Ntá ijnko nkehe chaxín tjetjonka kixin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. A ntá tió tsotáda jaha ntá tsjéntoá tjá ntá í jnko nkexro sintak'inkaya ka la ko sátsjikoa sín tí tóxrjíanhya sáchrókjuia —ichro ch'án.

¹⁹ A ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uíkon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanchankíhi ch'án tí ch'ín Jesús kixin nkexro sinchekji ch'án.† ²¹ Ntá ch'ín Pedro k'uíkon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Ìnchéni, ¿a ntá tí ch'ín i la nkehe tsonhen ch'án a? —ichro ch'án.

²² Ntá kjuátehe ch'ín Jesús kixin:

—Tí tjínkavan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhí. Ó jehí ntáchro ch'án kixin tí tjinkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

* **21:14** Juan 20.19,26 † **21:20** Juan 13.25

²⁴ A ntá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ Naxa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka kaín tí xroon chrók'óna xikaha. Amén. Ó tjen.

Tí xrā kjuích'e tí sín kjueyá ch'ín Jesús

Itsi Nchakuen Dios

¹ Tjuaha jaha Teófilo na tí libro saoxín mé kjiān kaín nkehe kjuako ch'ín Jesús la ko tí xrā kjuích'e ch'án tí xrankíxixín ² hasta tí yaon sákjuí ch'án nkaya nkajní. Ā ntá ti naxā sákjuíhya ch'án nkajní la kjueyá ch'an tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehe ch'án sín la k'uetuēnhen ch'án sín kíxín tsonohe sín nkehe tí xrā chrókjuich'e sín. ³ Tió kjuixin k'uén ch'án ntá kónoxín kíxín tjechón ch'án, k'uíkon tí jehe sín la ko cuarenta yaon mé k'uíkon sín ch'án jnkoyaxón. Itsjé nkehe kjuakoxín ch'án kíxín tsonoexín sín kíxín chaxín tjechón ch'án la ko kjuako ch'án nkexrí tí kjuachaxin kuènte Dios.

⁴ Ti naxā kójnkotséko ch'án tí sín k'uájiko ch'án la jehe ch'án mé k'uetuēnhen ch'án sín kíxín naxā sátsjixinhya sín tí chjasin Jerusalén. Chrónka ch'án kíxín:

—Chróchonhénrā ntihō chrók'uayéhérā tí nkehe tsjanjon T'aná, me tí nkehe kuinhínrā xrjanka janhan. ⁵ Ā ntá chaxín ch'ín Juan ìntá ó kujkítexín ch'án chojni. Ā ntá ijie kánhyó itsjé yaon ntá jahará la Nchakuen Dios la tsikiti-axínrā.

Sákjuí ch'ín Jesús nkaya nkajní

⁶ Ntá ti naxā kójnkotséko sín ch'ín Jesús, kjuanchankíhi sín ch'án kíxín:

—Jaha Ìnchéni, ¿á tsjánjonhya kjuachaxin jaí ts'etōanni chjasénni Israel ínaá? —ichro sín.

⁷ Ntá kjuátehe ch'ín Jesús kíxín:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etōan tíha. ⁸ Ntá itsi tí Nchakuen Dios ntá ts'ayéhérā kjuachaxin sátsjichronkará nkehe tí xrā kjuít'a, mé sátsjirá tsjákohérā kaín sín chjasin Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin nixja ch'ín Jesús ntá xríñahya tinkák'it'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijnko tjuí. Ntá í t'íkonhya sín nkerí kjuíji ch'án. ¹⁰ Ntá naxā tjejókonta sín tí sákjuí ch'ín Jesús nkajní, ā ntá xríñahya titàya k'uíkuèn sín yaá chojni ntoa tjejóyá sín ka tjóá tjejó sín chjinaxón tí tjejó tí jehe sín. ¹¹ Ntá tí sín a mé ntáchro sín kíxín:

—Jahará chojni kjuíxinrā estado Galilea, ¿nkehe tsonhen naxā kontará nkajní? Xíkaha tjejokontará sákjuí Jesús la ko mé xíkaha xiki ch'án ínaá —ichro sín.

Xreyá ch'ín Matías tsjiatéhe lùké ch'ín Judas

¹² Na ntá kjanxin sín tí jnā it'in Olivo na ikjan sín chjasin Jerusalén. Tíha a mé kíñhyó tjen kíxín ó xíkahō k'uetōan tí ley sátsji sín tí yaon t'ok'éhe sín. ¹³ Na ntá kjuíji sín tí chjasin ntiha ntá k'uit'ótjen sín tí yóxin piso tí nchia tsíkjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuènte tí partido cananista, la ko kjaxin ch'ín Judas, savé ch'án mé it'in Jacobo. ¹⁴ Kaín sín kójnkotsé sín ntiha tsonixjehe sín Dios la ko k'uéjoko sín tí kíchó tí ch'ín Jesús la ko tí tjan María, ìné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsíkójnkotsé ntiha. Ntá ntáchro ch'án kixin:

¹⁶ —Kichóni, t'ichjánxin tsoxiteyá éxí nixja xroon itén Dios éxí tsínixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjuikao ch'án tí sín tsotsé ch'ín Jesús. ¹⁷ Jehe ch'án mé kjaxin k'uék'ajikoni la jnkokón xra k'uáyèkoni ch'án. ¹⁸ A ntá jehe ch'án mé sákjuík'enaxín ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjehe tsee ch'án k'uaxrje kaín sintanóe ch'án. ¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrjexín kixin ijnko nonte siín ijni. ²⁰ Tí xroon Salmo mé nixja xikihí:

Tsitohe ntoé ch'án a,
la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyéhe tí xra kuènte ch'án.*

Mé xikaha tsíkjin ch'ín David.

²¹ Tí tjejóni ntihi la siín chojni ó k'uájikoni xráxin tí k'uék'ajikoni Ìnchéni Jesús ²² desde k'uíkonni nkexrí kjuikite ch'ín Juan tí jehe ch'án la ko hasta k'uíkonni sákjuí ch'án nkaya nkajní. Ntá ijie t'ichjánxin tsoxreyá jnkojin tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xikaha chrónka ch'ín Pedro.

²³ Ntá kjuenkayáxin sín tsonoxín yaá chojni mé tí ch'ín José, t'ikon ch'án Barsabás la ko Justo, la ko kjaxin í jnko ch'án it'in Matías. ²⁴ Ntá nixjehe sín Dios la ntáchro sín kixin:

—Ìnchéni jaha mé choxian asén kaín chojni. Tjákohéni nkexro tsonhen tocar xra tí yaá tí nkexro í kónoxín ²⁵ tsjiatéhe xra apóstol kuènte ch'ín Judas. A ntá tí ch'ín Judas mé kuitohe ch'án tí xra kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuích'e sín suerte ntá xrínahya kónhen tocar tí ch'ín Matías, ntá tuénxín tí hora a kuákja ch'án xra k'uéjóko ch'án tí tejnko tí sín kjueyá Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín. ² Xrínahya kuínhin sín ijnko tóvéntó kujxin nkajní. Tí tóvéntó mé éxí ijnko xrínto fuerte chjehe. Kuenté tí nchia tjejóxehen sín mé kóvéntó kjaxin. ³ Ntá xrínahya k'uíkon sín nkehe éxí xrohi nene tsjehe. Ntá tíha xikayehe la k'uéjókjen jnkojnko kja tí jehe sín. ⁴ Na ntá kaín sín k'uáyéhe sín tí Nchakuen Dios ntá kjuankíxin sín nixja sín í jnko nkiva kixin Nchakuen Dios kjuínkítsa sín nixja sín.

⁵ A nta tí yaon a la tí chjasin Jerusalén k'uéjó chojni judío tjinkaon sín sinchexiteyéhe sín tí nkehe tinkáchónki sín, mé tsíkjin sín nkuíxín chjasintajni. ⁶ A ntá jehe sín mé tsikinhin sín tí tóvéntó ntá tsíkóchjina nchónhya chojni. Ntá í noehya sín nkehe chrókjuenkayáxin sín kixin jnkojnko tí jehe sín mé kuínhin sín kixin nixja tí sín a jnkojnko nkívee sín. ⁷ Ntá síxránká sín, chrakon sín ntá jehe sín mé tjo sín kichó sín kixin:

—¿Á jehya kaín tí sín tjejónixja mé tsíkjin sín estado Galilea? ⁸ La ¿nkekuènté tjejótinhinni kixin nixja sín jnkojnko nkíveeni? ⁹ Kixin ntihi mé siín

* **1:20** Salmos 69.25; 109.8

chojni tsíkjiixin chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, ¹⁰ la ko Frigia, la ko Panfilia, la ko Egipto la ko nkuixín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkokjéxín judío, la í so la tinkáchónki sín Dios éxí tí sín judío xíkaha. ¹¹ La kjaxin siín chojni tsíkjiixin Creta, la ko Arabia. Mé xíkaha kaín ni tsíkjiixinni tí chjasin a mé tsíkinhinni tjejónixja tí sín a tí kjuaxroan kuènte Dios jnkoinko nkíveeni —mé xíkaha ichro sín.

¹² Ntá tóxakonhen kaín sín la chrakon sín ntá kjuanchankíhi kichó sín kixin: —¿Nkehe t'axrjexín kaín tíha? —ichro sín.

¹³ A ntá iso sín kjuanoá sín ntáchro sín kixin: —Tsékoan tí sín a —ichro sín.

A ntá ch'ín Pedro chénka tí sín siín

¹⁴ Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kixin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínrá tí nkehe tsoxrjanka. ¹⁵ Tí sín tjejó ntihi la jehya tsékoan sín éxí ntáchrórá, kixin na ntá las nueve nchítjen la kohya nkexro tsékoan. ¹⁶ Tíhi mé tsíchronka ch'ín profeta Joel:

¹⁷ Ntáchro Dios kixin: Itsi ijnko yaon tsjixixín ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuèntana.

La ko tí sín ntasoá mé titàya ts'íkuèn sín tí nkehe tsjákoḥa sín.

La ko tí sín ó táda la kotáchríén sín ts'íkonxín sín kixin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xra la ko tí síchjin kjaxin

la tsochrónka sín tanná.

¹⁹ Ntá janhan mé tsjákoxiān ijnko kjuachrakon nkajní.

A ntá chjasintajni tsjákoxiān kjuaxroan:

mé ts'ixín ijni la ko xrohi la ko itjuí tsík'óna ihnchi.

²⁰ Mé tí yaon la ts'inkaséyanxínhya, ts'óna ts'ixín tie.

A ntá tí nitjó mé ts'óna ijni.

Xíkaha senó tsonhen ntá itsi Ìnchéni.

Tíhi mé ijnko yaon imá jié la imá náxrjón.

²¹ A ntá kaín tí nkexro tsjanchehe ihnié Ìnchéni kixin tsjinkítsa sín mé tsaá sín.* Mé xíkaha tsíchronka ch'ín Joel.

²² Jahará chojni israelita tinhínrá tí nkehe tsoxrjanka. Tí ch'ín Jesús tsíkjiixin chjasin Nazaret mé Dios kjuákoxiān ch'án kixin tsíchr'án ch'án kixin kjuasin ch'án itsjé kjuaxroan jié k'uíkonrá la ko kjuako ch'án kixin Dios tsíchjéhe ch'án kjuachaxin kixin tjinkaon ch'án chrók'uíkonrá. Jahará ó jína nohará kaín tíha. ²³ Kjónté xíkaha k'uíkonrá la jahará itserá ch'án éxí tsíkjenkayáxin Dios ósé. A ntá jahará kjuínchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuák'enkanı sín ch'án ijnko ntacruz.

²⁴ Kjánchó Dios la kjuínchexechón ch'án inaá la kjuatsen ch'án tí kjuatjoté kuènte kjuach'én kixin ntá ti kjuach'én xitjahya ts'etuenhen tí jehe ch'án. ²⁵ A ntá ósé tí ch'ín rey David tsíchronka ch'án kuènte Jesús ntáchro ch'án kixin:

Jaha Ìnchéni t'íkuān kixin jnkochrínxín tjétaón ntia tí xritjak'é janhan.

Jaha mé itjen tjaná chjina kixin chrókohya jié chrókjuásian.

²⁶ Méxra imá chéhe asenná. Ir'va tsjexiān tí nkehe náxrjón.

Ó nōna kixin kohya nkehe ts'atsínka kjónté its'én.

* 2:21 2.17-21 Joel 2.28-32

27 Ó nõna kíxin tí jaha tsítóehya asenná chríkjan tí siín chojni tsík'en. Tsjánjonhya kjuachaxin kíxin tsoxíka ntõna kíxin janhan mé ijnko nkexro t'aha xra jína tjuèhe.

28 Jaha mé kjuákõna tí ntĩa tsjanjon kjuachón. Jaha mé nchechàna kíxin t'ayakonna.†

Mé xíkaha tsíkjin ch'ín David.

29 'Kíchóni títóhéra tsontáxrjan kíxin ch'ín David, tí nkexro k'uaxrjeníxinni mé tsík'en ch'án la ko tsíkixravá ch'án. Ntá naxa noheni nketí tsíxravá ch'án.

30 A ntá ch'ín David mé ijnko nkexro tsíchrónka itén Dios la ó nohe ch'án kíxin chaxín Dios chrónka kíxin ijnko nkexro ts'axrjeníxin ch'án mé ts'õna rey mé ts'etõan éxí jehe ch'án k'uetõan ch'án. 31 Mé xíkaha ch'ín David la ósé ó nohe ch'án nkehe tsonhen la mé chrónka ch'án kíxin tsoxechón Cristo la ko ntáchro ch'án kíxin tí asén ch'án tsítóehya tí siín tí sín tsík'en la ts'itjáyanhya tí cuerpo kuente ch'án. 32 Méxra Dios kjuínchexechón tí ch'ín Jesús, mé k'uíkõni kaín ni la mé chrónkani kíxin chaxín tíha. 33 Ntá ijie Jesús mé sákjuíko ch'án Dios la nàno itja chjina Dios mé tjen ch'án. Ntá tsintáchro It'é ch'án Dios kíxin tsochr'án ch'án tí Nchakuen ch'án. Ntá jie ó kui la ó k'uíkõnrá la ko kuínhínrá nkehe kónhen. 34 Tí ch'ín David la jehya jehe ch'án sákjuí nkaya nkajní, kíxin jehe David ntáchro ch'án kíxin:

Ìnchéni Dios mé ntáche tí Ìnchéni kíxin:

“Tjak'e tjaná chjina ntihó tsétõan,

35 tsjixinjian kaín xín tí sín nínkakõnhan la tsjachahya sín ts'etõan sín kíxin jahvá mé tsétõan.”‡

Mé xíkaha tsíkjin ch'ín David.

36 'Ntá kaín rá chojni israelita chrókõnohará chaxín kíxin jehe tí ch'ín Jesús ó kjuakénkanirá tí ntacruz la Dios mé kjuích'èna Ìnchárá ijie, mé tí Cristo —mé xíkaha chrónka ch'ín Pedro.

37 Ntá ti kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáchro sín kíxin:

—Kíchóni, a ntá jie la ¿nkexrí chrókjuich'eni?

38 Ntá kjuátehe ch'ín Pedro ntáchro ch'án kíxin:

—Chrókuitõhéra tí ijjárá la chrórxáxinkáonrá Dios. Ntá chrókuikitaxínrá ihnié Jesucristo ntá Dios mé tsjakjìinhanrá tí ijjárá ntá jehe ch'án tsjanjon ch'án Nchakuen ch'án ts'ayéhéra. 39 Dios mé sinchekìtonhanrá ch'án tí Nchakuen ch'án ts'ayéhéra jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkõjnko tí nkexro tsjeyá ch'án.

40 Mé xíkaha ntáchro ch'ín Pedro la ko í so nkehe ntáchro ch'án. Nta nixjèhe ch'án sín Ìnaá, ntáchro ch'án kíxin:

—Chrókuitõhéra tí jínahya tjenkayáxin tí chojni siín chjasintajni kíxin jahará me jína chrókuaará.

41 Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mìl chojni kjuankíxin tinkáchónki Ìnchéni Jesús la k'uíto tí sín ó xráxín siín. 42 Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueyá Jesús la kjuínkìtsa sín kjuanjõn sín tí nkehe chrókjõne tí í so sín la ko chjéhe sín Dios kjuasáya la ko kójnkotsé sín kíxin sine sín niõtja xraxinkakonxín sín kíxin ik'uén Ìnchéni.

Mé xíkaha k'uéjó tí sín xrankíxín tinkáchónki Ìnchéni

† 2:28 2.25–28 Salmo 16.8–11 ‡ 2:35 2.34–35 Salmo 110.1

⁴³ La ntá kaín tí í so sín mé chrakon sín kixin tí sín tsíkjeýá Jesús kjuasin sín itsjé kjuaxroan. ⁴⁴ La kaín tí sín tinkáchónki Jesús mé jnkokoá k'uéjó sín la jnkokoá chóna sín tí nkehe sine sín. ⁴⁵ Kjuínchekji sín tí nkehe chóna sín ntá k'óxikayehe sín tí chichaon la chjéhe sín tí sín chóntahya. ⁴⁶ Jnkojnko yaon kójnkotsé sín tí nínko la ntá jnkojnko ntøe sín kjóneko kichó sín. La ko kjóne sín niotja kixin xraxinkakonxín sín kixin ik'uén Ìnchéni la ko kjuaxróxin k'uéjó sín la kohya nkexro kjuínchehnke. ⁴⁷ Kjuanchehe sín kjuasáyé Dios. Ntá kaín chojni k'uéchónthehe sín kjuasáya. A ntá jnkojnko yaon Ìnchéni mé kjueya iso chojni kixin tsotsjé tí sín tsaá.

3

Kuítóhe jína ijnko nkexro xitjahya tji

¹ Ijnko yaon tí ch'ín Pedro la ko ch'ín Juan mé chrin sín sákjui sín tí tjen tí nínko. Mé kjuíji sín las tres kónjín, tí hora mé nixjehe sín Dios. ² Kaín yaon kjuák'e ntiha ijnko ch'ín tsíkokjéxín xitjahya tji. Sátsíkjiko sín ch'án tí nínko la tsíkjak'etjaxín sín ch'án tí ntója puerta mé it'in Ntója Náxrjón. Ntaha tjetjanhak'éhe ch'án chichaon tí sín sít'ixenhen ntiha. ³ Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín nínko, a ntá kjuanchak'éhe ch'án sín chichaon. ⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin:

—Tsjehe ntihi.

⁵ A ntá tí ch'ín a tjetsjehe ch'án jína kixin ách'e ichrén nkehe tsjanjon tí sín a, ichro ch'án. ⁶ A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnié Jesucristo, tí nkexro tsíkjiixin chjasin Nazaret, la t'inkatjen itjia —mé xikaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án. ⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankixin ch'án itji ch'án. Ntá k'uixenko sín ch'án nkaxenhen nínko. Tjetji ch'án la ko chrika ch'án la chjéhe ch'án kjuasáya Dios. ⁹ Na ntá kaín tí chojni siín tí chjasin ntiha la k'uíkon sín kixin ó tji ch'án la ko chjéhe ch'án kjuasáya Dios. ¹⁰ Ntá chrakon sín kixin xikaha tsíkónhen kixin tsíkjatsøan sín kixin jehe tí nkexro kjuák'etjaxín kjuanchak'á ch'án chichaon ntója nínko it'in Ntója Náxrjón.

Nixjehe ch'ín Pedro tí chojni siín tí ntasin Salomón

¹¹ Na tí ch'ín xitjahya tji la mé títoehya ch'án tí ch'ín Pedro la ko ch'ín Juan. Ntá kaín xín tí sín siín ntiha chrakon sín kuinká sín sákjuítsjehe sín tí ntasin kuènte nínko it'in ntasin Salomón kixin ntaha tjejó tí sín a. ¹² Ntá tí k'uíkon ch'ín Pedro xikaha la ntáche ch'án sín kixin:

—Jahará chojni israelita, ¿nkekuènte chrakonrá jahará la ko nkekuènte komáráni? ¿Á tjenkayáxinrá kixin jehóni kjuínchekitoheni jína tí ch'ín i kixin jehóni chóntani kjuachaxin la ko kixin imá tinkáchónkini Dios? ¹³ Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkijkenhenrá ch'án tí sín t'etøan. Ntá tí ch'ín Pilato mé tjinkaon ch'án chrók'uátjánta ch'án tí ch'ín Jesús kjánchó jahará la tjinkákonhyará xikaha. ¹⁴ A ntá jahará chrókjuanchiará chrókuítóhe sáchrókjui tí nkexro tjóá jína asén. A ntá náhí. A ntá jahará mé tjinkáonrá sátsji ijnko chojni chóna nchónhya jie. ¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xikaha k'uíkonni la chrónkani. ¹⁶ Tí kjuachaxién ihnié Jesús mé tinkáchónkini

la ntá tíha mé kuítóexín jína tí nkexro k'uúkonrá la ko choxinrá. Tí ch'ín a mé kuítekaon ch'án ntá kuítóhe ch'án jína. Mé xíkaha ó k'uúkonrá kaín rá.

17 'Kíchóni ó nòna kixin tió jahará la ko tí sín t'etóan k'oyánrá Jesús la ni kónoahyará nkehe kjuich'erá. 18 Ntá ó xiteyá tí nkehe tsíntácho Dios tsínixjāxín tí sín tsíchrónka itén ch'án kixin tí Cristo t'ichjāxín tsjasóte ch'án. 19 Méxra tsitóhérá ijíará ntá xráxinkáonrá Dios ntá jehe ch'án mé ts'óxíka ijíará ntá Ìnchéni mé sinchekitohará ch'án jína. 20 Ntá jehe ch'án mé tsochr'án Jesucristo inaá la xra ó tsi kixin tsaáxinrá. 21 Na ntá ijie la Jesucristo la nkaya nkajní ntahó tsítóhe ch'án hasta tsjasiyóxinjian Dios kaín nkehe éxí tsíntácho ch'án tsínixjāxín ch'án tí sín tsíchrónka itén ch'án ósé. 22 A ntá senó tí ch'ín Moisés tsíchénka tí sín tsík'axrjeníxinni kixin: “Ìnchéni Dios mé tsochr'án ijnko nkexro ts'axrjeníxinrá tsochrónka itén ch'án éxí tsíchr'án ch'án tí janhan. T'ichjāxín tinhínrá kaín tí nkehe tsontácho ch'án. 23 A ntá tí chojni titekakonhya tí nixja tí nkexro a la ts'itjāyan sín la tsítóhe sín tí nación Israel,”* mé xíkaha tsíchrónka ch'ín Moisés.

24 'Kaínxín tí sín tsíchrónka itén Dios kjuankíxixín ch'ín Samuel la ko kaín tí sín kui chr'éxin mé chrónka sín kixin kaín tíha tsonhen xíkaha tí yaon i. 25 Mé tí nkehe tsíntácho Dios tsínixjāxín ch'án tí sín tsíchrónka itén ch'án kixin xíkaha chrók'uayéhérá jahará tí nkehe chrókjuanjon ch'án kixin chrók'uejorá jína. Dios tsík'jich'éna ch'án ijnko pacto mé nixjehe ch'án tí sín tsík'axrjeníxinrá mé tsíntáche ch'án tí ch'ín Abraham kixin: “Kaínxín chojni chjasintajni mé tsoyaonxín sín kixin ijnko nkexro ts'axrjeníxin tí jaha.”† 26 Dios kjuínchexechón ch'án tí Xjeen ch'án la saoxín ichr'án ch'án tí tjejorá jahará israelitará kixin chrókjuintayaonrá ch'án kixin jnkojnko tí jahará chrókuítóhérá tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etóan

1 Ch'ín Pedro la ko ch'ín Juan la naxa tjejonixjehe sín tí sín tsíkójnkotsé ntá xrínahya ikui tí sín nchát'á la ko tí ch'ín t'etuēhen tí sín soldado kuēnte tí njnko la ko tí sín saduceo. 2 Imá kónínkaon sín kixin ch'ín Pedro la ko ch'ín Juan kjuakohe sín tí sín tsíkójnkotsé nkexrí tsoxechón chojni tsík'en kixin xíkaha xechón ch'ín Jesús. 3 Ntá kuínhin sín xíkaha ntá itsé sín tí sín a ntá sákjuíko sín, chr'áxēhen sín ntóechiso. Ntahó k'uéjó sín hasta kóyaon kixin ó ntá kóntó. 4 A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

5 A ntá tí yaon chr'éxin kójnkotsé tí chjasin Jerusalén tí sín t'etóan kuēnte tí sín judío la ko tí sín tjako tí ley. 6 Mé kjaxin ntaha tjen ch'ín Anás, mé jehe ch'an mé tí nchát'á imá t'etóan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchát'á t'etóan. 7 Ntá k'uetoan sín kixin síxrakoa ch'ín Pedro la ko ch'ín Juan. Ntá k'uéjó sín jnkosiné la ntá kjuanchankíhi sín ntácho sín kixin:

—¿Nkexro kjuanjon kjuachaxin o nkexro kjuachaxin ihnié kixin xíkaha ich'erá tí nkehe?

8 Ntá ch'ín Pedro imá chónka ch'án kjuachaxin kuēnte Nchakuen Dios ntá kjuátehe ch'án ntácho ch'án kixin:

—Jahará chojni t'etóan kuēnte chjasin la ko jahará sín táda kuēnte chjasin Israel, 9 jahará mé tjanchankirá kixin nkexrí kuítóhe ijnko chojni níhi jína kixin tjinkáonrá tsonohará. 10 Ntá tinhínrá jína tí nkehe tsochrónkaxínni kixin kaín rá chojni chjasin Israel tsonohará kixin tí ch'ín i itjen ntihi mé kuítóhe

* 3:23 3.22–23 Deuteronomio 18.15,19 † 3:25 Génesis 22.18

ch'án jína kjuachaxién ihnié Jesucristo, tí nkexro tsíkjin chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá. ¹¹ Tí ch'ín Jesús i mé tí xro náxrjónhya kuitoéntará tió kjuich'énará tjat'o ntá mé jie k'óna tí xro tjetóan.* ¹² Kohya í jnko nkexro chóna kjuachaxin chrókuaáxinni kixin kohya í jnko ihnié chojni ntihi chjasintajni chrókuinkáchónkini chrókuaáni —mé xikaha ichro ch'ín Pedro.

¹³ Tí síxreé mé k'uikon sín kixin ch'ín Pedro la ko ch'ín Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etóan ntá kjuátsoan sín kixin tí sín a mé tsík'ajiko ch'ín Jesús. ¹⁴ A ntá tí ch'ín tsíkitohe jína mé ntiha tjejóko sín ch'án. Méxra xitjahya tsjanchia sín jie tsjasóte tí sín a. ¹⁵ Ntá tí síxreé a mé k'uetóan sín kixin tí sín a ts'axrje sín ntója ntá jehó sín k'uejóxenhén sín nchia ikjo sín kichó sín. ¹⁶ Ntá ntáchro sín kixin:

—¿Nkehe chrókjuich'ehe ni tí sín a? Kaínxín tí chojni ntihi chjasin Jerusalén mé ó k'uikon sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha. ¹⁷ Í tjinkakonhyani kixin naxa tsochrónka sín tíha kixin naxa tsinhin chojni. Méxra ts'etóanni kixin í tsochénkahya sín ninkexró tí ihnié Jesús.

¹⁸ Na ntá k'uíyehé sín tí sín a inaá ntá k'uetuénhen sín kixin ninkehó chrónixja sín la ko chrókjuako sín ihnié Jesús, ichro sín. ¹⁹ A ntá ch'ín Pedro la ko ch'ín Juan kjuátehe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará ó chrókjuinchexiteyéhéni tí jehe ch'an? ²⁰ A ntá jehéni la xitjahya tsítóhén tsochrónkani tí nkehe ó k'uikonni la ko tí nkehe kuínhinni —ichro sín.

²¹ A ntá kjónté xikaha kuínhin tí síxreé la jiehe k'uetóan sín ntá kjuanjón sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuich'e sín. ²² Na mé tí ch'ín kuitohe jína kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochrakonhya sín

²³ Ntá tí ch'ín Pedro la ko ch'ín Juan tsíxranjón kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetóan tí sín nchat'á t'etóan la ko tí sín táda. ²⁴ Ntá kjuixin kuínhin tí sín tsíkójnkotsé na ntá kaín sín nixjehe sín Dios la ntáchro sín kixin:

—Ínchéni, jaha mé kjuich'éna nkajni la ko chjasintajni la ko tí ntayaon la ko kaín xín tí nkehe síin. ²⁵ Jaha mé kjuachaxién Nchakuan nixjaxian ch'ín David tí nkexro kjuít'aha xra. Ntáchro ch'án kixin:

¿Nkekuènte kixin kónínkaon kaín tí chojni nación ókjé?

A ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey síin chjasintajni la ko kaín tí sín tí chjasin kójnkotsé sín

nínkakohen sín Ínchéni la ko Cristo.†

Mé xikaha tsíkjin ch'ín David ósé.

²⁷ Mé xikaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsíkójnkotsé sín tí chjasin ntihi kixin kónínkakohen sín tí Xjaan Jesús chónahya jie, mé tí nkexro tsíkjéyá jaha sit'aha xra. ²⁸ Mé xikaha kjuínchexiteyá sín tí nkehe ósé tsíkjenkayáxian kixin t'ichjánxin xikaha tsonhen. ²⁹ A ntá Ínchéni, tsjehé kixin imá jiehe k'uetóan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán. ³⁰ La ko tí kjuachaxián sinchekitoxén jína tí chojni níhi la ko tsjákoxian

* 4:11 Salmo 118.22 † 4:26 4.25-26 Salmo 2.1-2

kjuaxroan kjuachaxiën ihnié tí nkexro Jesús t'aha xra —mé xikaha nixjehe sín Dios nkaya nkajní.

³¹ A ntá tí kjuixin nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankíxin sín chrónka sín itén Dios.

Tí kaín nkehe siín la kaín sín mé kuènte sín

³² La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntáchro kíxin jehó kuènte tí nkehe siín. Náhí. Kaín sín mé kuènte sín. ³³ Tí sín tsíkjejá Jesús mé kaín asén sín chrónkaxín sín kíxin nkexrí xechón Ìnchéni Jesús. Ntá Dios antsí kjuíncheyaon kaín sín. ³⁴ Kohya ninkexró nóaxinhya tjejó ntiha kíxin kaín tí sín chóna nontee sín o ntoe sín kjuínchekji sín. Na ntá tsíkjiào sín tí chichaon ³⁵ chjéhe sín tí sín kjueyá Jesús. A ntá tí sín k'óxikayéhe sín tí chichaon, kuákja tí sín nò. ³⁶ Mé xikaha kjuích'e ijnko ch'ín levita it'in José. Jehé ch'án la tsíkjiín ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axrjexín kíxin tí ch'ín nchechéhe asén chojni. ³⁷ Jehé ch'án a mé kjuínchekji ch'án ijnko nontee ch'án ntá kjuikáo ch'án tí chichaon kjuínchek'áyéhe ch'án tí sín kjueyá Jesús.

5

Ijie kjuasin ch'ín Ananías la ko tjan Safira

¹ A ntá í jnko ch'án mé it'in Ananías, a ntá ichjién ch'án mé it'in Safira, mé jehé sín mé kjuínchekji sín ijnko nontee sín. ² A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjueyá Jesús la kjuanjon ch'án éxí kaín. ³ Ntá ntáchro ch'ín Pedro kíxin:

—Ananías, ¿kuènté chjehé kjuachaxin tí Tsochren kíxin k'uetuenhen asán? Ntá kjuích'iyehé tí Nchakuen Dios kíxin kjuínchemá iso chichaon kjuínchekjixián nontaa. ⁴ ¿Á jehya nontaa tíha? Ntá tió kjuínchekjia la, tí chichaon la, ¿á jehya kuèntá? ¿Kuènte kjuenkayáxian sich'e tíha? Kjuích'iyehé Dios, jehya chojni kjuích'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín. ⁶ Na ntá ikjui iso sín ntasoá la ntá kjuínchek'ísímá sín ika tí cuerpo kuènte ch'án la ntá sákjuíko sín, sákjuíkjává sín.

⁷ Ntá k'uátsínka iní hora ntá kjuíji ichjién ch'ín Ananías k'uíxenhén tjan tí nchia ntaha a. La noehya tjan nkehe tsíkónhen tí ntiha. ⁸ Ntá ch'ín Pedro mé kjuanchankíhi tí tjan a, ntáchro ch'án kíxin:

—Chrónka, ¿á chaxín xikahó kóxixín tí nonte ó kjuínchekjirá? —ichro ch'án.

Ntá kjuátehe tjan kíxin:

—Chaxín xikahó kóxixín.

⁹ Ntá ntáchro ch'ín Pedro kíxin:

—¿Nkekuènte jnkokoá kjuenkayáxinrá kjuích'iyehérá Nchakuen Ìnchéni? Kjá ntáchrorá kohya nkehe chrókónhanrá. Ntihi ó kui tí sín ntasoá sákjuíkjává sín xia na ntá jaí sátsjiko sín tí jaha —mé xikaha ichro ch'ín Pedro.

¹⁰ Ntá tuénxín kjuítsínka tjan Safira toté tí itjen ch'ín Pedro ntá ik'uén tjan. Ntá k'uíxenhén tí sín ntasoá tí nchia a ntá k'uíkon sín kíxin tsíkjiín tsík'en tjan. La ntá sákjuíko sín tí cuerpo kuènte tjan la kjuává sín tjan tí chjinaxón tsíxrává tí xii tjan. ¹¹ Na kaín tí sín kuènte nínko la ko tí í so sín kuínhin tí xikaha tsíkónhen, mé imá chrakon sín.

Itsje kjuaxroan kjuakoxin sín

¹² A ntá tí sín kjueyá Jesús mé kjuakoxin sín nchónhya kjuaxroan tí siín chojni ntiha la ko kaín sín mé kójnkotsé sín tí ntasin it'in Salomón. ¹³ Chrakon iso sín k'uitohya tí jehe sín la kjónté la kaín chojni tjikosáyehe tí jehe sín. ¹⁴ La ntá xrínahya nchónhya chojni ntoa la ko chojni chjin kjuankíxin tinkáchónki sín Ìnchéni. ¹⁵ Ntá itsjé chojni mé kuakitsje sín tí chojni níhi k'uejo sín ntia. Tjejóták'á sín chrítaón cama la ko kania kíxin ts'atsínka ch'ín Pedro ntá kjónté its'ueen ch'án ó ts'atsínka tí tjejó sín mé chrókuítexín sín jína. ¹⁶ Kjaxin tí chjasin chjino mé kjuixin nchónhya chojni ikjui sín chjasin Jerusalén la kjuikao sín tí chojni níhi la ko tí chojni chóna nchakuen tí jínahya. La kaín sín a mé kuítóhe sín jína.

Ch'ín Pedro la ko ch'ín Juan mé chónkíhi sín

¹⁷ Na ntá tí sín nchat'á t'etoan la ko tí sín kuènte tí sín saduceo mé imá kóchjinoxínhin sín. ¹⁸ Na ntá itsé sín tí sín kjueyá Jesús la chr'áxehen sín ntóechiso. ¹⁹ A ntá ijnko ángel kuènte Ìnchéni ikui tí tie a kuakitjehé ch'án ntója ntóechiso ntá kuakitsje ch'án tí sín a. La ntá k'uetuènen ch'án sín kíxin:

²⁰ —Sátjirá nínko la tsjákohérá kaín tí sín ntiha tí tan nixin tsjanjon kjuachón.

²¹ Kjuixin kuínhin sín ntá sákjuí sín ntá tí k'uínkaséyan k'uixehen sín tí nínko kjuako sín.

A ntá tí nchat'á t'etoan la ko tí sín k'uejóko ch'án mé k'uíyehé sín tsojnkotsé kaín tí síxreé, mé tí sín t'etoan kuènte Israel. Na ntá k'uetoan sín kíxin tsoxrakoa tí sín tjejóchjina tsíkjeýá Ìnchéni. ²² A ntá kjuíji tí sín policía tí ntóechiso a ntá k'uitjahya sín tí sín a. La ntá ikjan sín la ²³ ntáchro sín kíxin:

—Kjuíjini ntiha la k'uíkoni tsíkjehe jína ntóechiso a la k'uejó tí sín soldado a ntója. Ntá kuakitjeheni ntóechiso la k'uitjahyani ninkexró tí nkaxehen —ichro sín.

²⁴ Ntá kaín tí nchat'á t'etoan la ko tí ch'ín k'uetuènen tí policía kuènte nínko la ko i so tí sín nchat'á t'etoan mé kuínhin sín ntá ntáchro sín kíxin xá nkexrí chrókónhen chrók'uitjáyan tí xra kuènte tí sín a. ²⁵ Na ntá tuénxín kjuíji ijnko nkexro ntáchro kíxin:

—Tí sín k'uejochjinará jahará mé ó nkaxehen nínko ntaha tjejó sín tjejótjakohe sín chojni —ichro ch'án.

²⁶ La ntá tí ch'ín k'uetuènen tí sín policía mé sákjuíko ch'án tí sín policía la kjuíkajín tí sín tjako. Nínkehó kjuích'ehya tí sín policía tí sín tjako kíxin chrakon sín kíxin ách'e tí sín siín ntiha mé tsjak'e sín xro, ichro sín. ²⁷ Na ntá tió kjuikao sín tí sín a la k'uejó sín nkayakon tí sín t'etoan ntá tí nchat'á t'etoan ntáchro ch'án kíxin:

²⁸ —Jeheni kjuanjonhyani kjuachaxin kíxin tsjákorá ihnié tí nkexro a. ¿A ntá nkehe kjuích'erá jahará? Kuenté chjasin Jerusalén tsíkjákorá. La tjínkáonrá tsékaráni jié kíxin jeheni tsík'óyánni tí ch'ín a —ichro ch'án.

²⁹ A ntá ch'ín Pedro la ko tí sín kjueyá Jesús ntáchro sín kíxin:

—A ntá jeheni t'ichjánxin sinchexiteyéheni Dios senó. A ntá chr'éxin sinchexiteyéheni chojni. ³⁰ Tí Dios tsíkinkáchónki tí sín tsík'axjeníxinni ósé mé kjuínchexechón Jesús, ti nkexro a mé kjuakénkanirá tí ntacruz tsík'oyánrá. ³¹ Ntá ijie tjeko ch'án Dios nkaya nkajní la nánko itja chjina Dios mé tjen ch'án la Dios kjuích'éna ch'án ijnko nkexro t'etoan kíxin sinchekaá ch'án chojni kíxin tí nación Israel chrókjan chrókuinkáchónki sín Dios ntá chrók'uitjáyan tí jié chóna sín. ³² La ko kjaxin jeheni chrónkani kaín tí nkehe k'uíkoni kjuachaxién Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

³³ La ntá tí sín t'etōan a mé kuínhin sín tíha ntá kónínkaon sín la ko tjinkaon sín chrók'óyán sín tí sín a. ³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uetōan ch'án kixin tí sín tsíkjeýá Ìnchéni mé ts'axrje sín ntója intsí, ichro ch'án. ³⁵ Na ntá nixjehe ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuich'eherá tí sín a. ³⁶ Xráxinkáonrá kixin senó kjuák'e ijnko ch'ín it'in Teudas la tónhen asén ch'án kixin imá t'etōan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuèxín tí xra k'uékjich'e sín. ³⁷ Ntá chr'éxín tió xrenájín kaín ihnié chojni k'uéjó na ntá ikjui í jnko ch'ín mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín sín tí sín kjuíchréhe ch'án xíka sín sákjuí sín inaá. ³⁸ Méxra t̄itohérá t̄j̄atéhýará tí jehe sín a. ³⁹ A ntá tí tjejóch'e sín xra kuènte chojni ó la kjaxin ts'itjáyán. ³⁹ A ntá tí chaxín tjako sín kjuachaxién Dios ntá tsjachahýará sinchek'itjáyánrá tíha. Méxra t̄itohérá sín kixin tsjánjonkohýará Dios.

⁴⁰ Na ntá kaín tí síxreé mé kuítekaon sín la ntá k'uíyehé sín tí sín kjueýá Jesús. La ntá kjuate sín la xík'etuenhen sín kixin í tsonixjahya sín ihnié Jesús la ntá kjuanjon sín kjuachaxin kixin sátsji sín. ⁴¹ Ntá tí sín kjueýá Jesús mé k'uaxrjexín sín tí tjejó tí sín t'etōan kjónté xíkaha kónhen sín la chéhe sín kixin Dios kjuanjon kjuachaxin kjuasóte sín kixin tí kjuako sín ihnié Jesús. ⁴² Kuítōehya sín tsjako sín kuènte Jesucristo kaín yaon tí nkaxenhen njnko la ko tí jnkojnko ntōe chojni.

6

Kjueýá sín yato chojni tsjinkitsa

¹ Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nkíva griego mé kónínkakónhen sín tí sín nixja nkíva hebreo. Ntáchro sín kixin tí sín chjin k'án kuènte sín la kánhyó jína k'uáyéhe tí nkehe síxikayehé sine sín jnkojnko yaon, ichro sín. ² Na ntá tí teýó tí sín tsíkjeýá Jesús mé k'uíyehé sín kaín tí sín tinkáchónki Ìnchéni. Ntá nixjehe sín, ntáchro sín kixin:

—Jeheni la jehya jína tsítōheni tí xra tjakoni itén Dios, kixin ntá sit'aharáni xra ts'óxíkayeheni tí nkehe sine tí sín k'án. ³ Méxra jahará kíchó ni tsjéýará yato chojni ntoá tí tjejórá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinchek'áyeheni tí xra a. ⁴ A ntá jeheni la tsonixjeheni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xíkaha ntá jnkokoá kjuenkayáxin sín. La ntá kjueýá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxin kjueýá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehe ch'án mé tsíkjixín ch'án chjasin Antioquía la ósé mé tsíkinkáchónki ch'án ti nkehe tinkáchónki tí sín judío. ⁶ Ntá kjuixín kjueýá sín tí sín a ntá kjuikao sín ti tjejó tí sín tsíkjeýá Ìnchéni. La ntá tí sín a mé nixjehe sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nchat'á judío kjuankíxin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyao ch'án la nchónhya kjuaxroan kjuakoxin ch'án tí siín chojni. ⁹ A ntá iso sín tsíkjin ch'ín tí ninko judío kuente tí sín senó k'uejó esclavo sín tsíkjin sín chjasin Cirene, la ko Alejandría, la ko Cilicia, la ko estado Asia, mé kjuankixin sín ikjo sín ch'ín Esteban. ¹⁰ Kjónté xikaha la kjuachahya sín kixin Nchakuen Dios mé kjuínkítsa tí ch'ín Esteban nixja ch'án. ¹¹ Na ntá jehe sín mé kjuenkehe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín. ¹² Mé xikaha k'uixité kaín chojni la ko tí sín t'etoan kuente ninko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí siín tí síxreé a. ¹³ Kjaxin kjuéyá sín chojni tsochrónka kixin ntoáhya kjuako ch'ín Esteban la ntá chro tí sín a kixin:

—Tí ch'ín a mé títoehya ch'án t'ántaxínhin ch'án tí ninko kuénténi la ko tí ley.

¹⁴ Ó kuínhinni kixin chrónka ch'án kixin tí ch'ín Jesús, tí ch'ín tsíkjin chjasin Nazaret, mé sinchek'itjáyan ch'án tí ninkoeni ntihi la ko tsjitóxinhin ch'án tí nkehe tinkáchónkini mé tí nkehe tsík'etoan ch'ín Moisés —mé xikaha ichro sín.

¹⁵ Ntá tí síxreé la ko kaín tí sín sítjaxin ntiha la komá sín tí ch'ín Esteban la mé k'uikon sín kixin tí kàré ch'án mé éxí ijnko ángel mé xikaha tsjehe tí jehe ch'án.

7

Tí nkehe kjuátehe ch'ín Esteban

¹ A ntá tí sín nchát'á t'etoan kjuanchankíhi sín tí ch'ín Esteban kixin:

—¿Á chaxín kaín tíhi tsíntáchrúa?

² Na ntá jehe ch'án kjuátehe ch'án ntá chro ch'án kixin:

—Kaínrá kichó ni Israel la ko sín táda tinhínrá tí nkehe tsontáxrjan. Dios kuénteni chóna kjuachaxin mé kjuakohe ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxá sátjihya ch'án tsjak'e ch'án nonte Harán. ³ Dios tsíntá chro kixin: “Títohé chjasán la ko kaín tí nkexro kjéhya. Na ntá sátjia tí nonte tsjákohá jaha.”* ⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjejorá ijie. ⁵ Kjánchó ch'ín Abraham la kuákjahya ch'án nít'o nonte hasta ni tí tsjak'e toté ch'án la chónahya ch'án. A ntá chrónka Dios kixin chaxín chr'éxin tió tsjixin ts'en ch'ín Abraham la tí sín ts'axrjeníxin ch'án mé ts'áyéhe sín tíha. Kjónté naxá kohya nijnko xjeen ch'án la mé xikaha ntá chro Inchéni. ⁶ Kjaxin tsíntá chro Dios kixin tí sín ts'axrjeníxin ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó. ⁷ La kjaxin xíntá chro Dios inaá kixin: “Ntá chr'éxin janhan sítakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xikaha ichro Dios. ⁸ Na ntá Dios mé tsíkjo ch'ín Abraham kixin kaín tí chojni ntoa ts'axrjeníxin ch'án mé itsa sín xroye. Na ntá xikaha tió kokjíhi xjeen ch'an Isaac ntá ch'ín Abraham mé chjehe ch'án xjan xroye tió xétjehe xjan ijní yaon. Ntá kjaxin xikaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xikaha kjuích'e ch'án inaá. Ntá tí sín a mé k'óna it'é tí teyó tribu tsík'axrjeníxin tí sín Israel.

⁹ Tí xjeen ch'ín Jacob mé tí sín k'uaxrjeníxinni ósé la jehe sín k'uéchjinóxinhin sín tí kichó sín José ntá kjuínchekji sín ch'án la tí sín k'uena la sákjuiko sín ch'án nó nación Egipto, kjánchó Dios mé kjuínkítsa tí jehe ch'án. ¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios

* 7:3 Génesis 12.1

kjuanjon kjuachaxin kixin imá tsonohe ch'án. Na ntá k'uíkon ch'ín Faraón tí rey kuènte nación Egipto a xikaha tí xra jina kjuích'e ch'ín José ntá kjuanjon ch'án kjuachaxin kixin ts'etoan ch'ín José tí nación Egipto la ko tí ntøe ch'án.

¹¹ 'Na ntá kókjinta xrínahya la náxrjónhya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín. ¹² A ntá tsíkinhin ch'ín Jacob kixin tí nación Egipto mé sítóxi noa trigo ntá k'uetuenhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín. ¹³ Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuakohe ch'án tí ch'ín Faraón tí sín naxa kjéhya ch'án. ¹⁴ La ntá k'uetøan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án. ¹⁵ Mé xikaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha. ¹⁶ Ntá chr'éxin kuakitsjexín sín tòye tí huésøé tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

¹⁷ 'La ntá ó kuichjina tsoxiteyá tí nkehe tsíntáchro Dios tsíkjo ch'ín Abraham ntá tí sín Israel imá kótsjé sín nación Egipto. ¹⁸ A ntá xrínahya í jnko ch'ín rey kjuankixin k'uetøan nación Egipto la k'uéchónhya ch'án tí ch'ín José. ¹⁹ La ntá tí ch'ín rey kjuích'iyehhe ch'án tí sín naxa kjéhyaní la ko kjuínchekjasóte ch'án sín. La tsík'etoan ch'án kixin tí xjan ntoa na ntá kokjíhi mé tsjik'itjí sín xjan kixin its'en xjan. ²⁰ Na ntá tí yaon a tsíkokjíhi ch'ín Moisés ntá imá kóxrjínhin Dios tí xjan a. It'é la ko iné xjan mé k'uéchónta sín xjan iní nitjó koá ntøe sín. ²¹ Ntá chrokjuahya tsjak'emá sín xjan la ntá kjuíkjáka sín xjan. La ntá xjeen tí ch'ín rey kuènte Egipto mé kjuíkkaja tjan xjan la sákjuíko tjan ntøe tjan la kjuínchek'ánkí tjan xjan éxí xjeen tjan xikaha. ²² La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetoan tí nkehe k'uéntáchro ch'án la ko tí nkehe k'uékjich'e ch'án.

²³ 'La ntá tió chóna tí ch'ín Moisés cuarenta nánó ntá tjinkaon ch'án tsjitsjehe ch'án tí sín israelita naxa kjéhya ch'án. ²⁴ Ntaha mé k'uíkon ch'án kixin ijnko chojni Egipto kjuate ijnko chojni naxa kjéhya tí jehe ch'án. Ntá chrókjuinkítsa ch'án tí sín naxa kjéhya ch'án ntá k'óyán ch'án tí ch'ín Egipto a. ²⁵ Kjuenkayáxin ch'án kixin tí sín naxa kjéhya ch'án, mé tí sín israelita, mé tsonoexín sín kixin Dios mé tsíchr'án tí jehe ch'án sinchekaá sín ch'án. Kjánchó tí sín a kjuátsoanhya sín. ²⁶ La ntá í jnko yaon tí ch'ín Moisés k'uíkon ch'án kixin yaá sín israelita tjanjonko kichó sín. La ntá tjinkaon ch'án chrókjuít'oxin ch'án kixin chrokjuanjonhya sín. La ntá chro ch'án kixin: “Jahará jnkokoá kíchuará la, ¿nkekuènté tjanjonrá?”. ²⁷ A ntá tí nkexro chóna tí jie mé kónínkaon ch'án la kótéka ch'án tí ch'ín Moisés. Ntá ntá chro ch'án kixin: “¿Nkexro kjuanjon kjuachaxin kixin jaha k'óna juez kuénténi? ²⁸ ¿Á tjinkávan ts'oyánni kjaxinni éxí k'oyán tí ch'ín Egipto ijna ní?” ²⁹ A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxí ijnko chojni tsíkjixin ókjé. Ntá ntaha tsíkótehe ch'án la ko kjuích'ena ch'án yaá xjan ntoa.

³⁰ 'Na ntá k'uátsínka cuarenta nánó ntá tí nteje chjino jna it'in Sinaí mé xrínahya k'uíkon ch'án ijnko ángel tjenkákjan tí xrohi chríkjan tí ntayoa tjeche. ³¹ Ntá tí ch'ín Moisés la chrakon ch'án kixin xikaha k'uíkon ch'án la ntá kóchjinehe ch'án kixin chrótsjehe ch'án la ntá kuínhin ch'án itén Inchéni ntá chro kixin: ³² “Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob,” mé xikaha ichro Dios. Ntá tí ch'ín Moisés la kjuankixin

chrakon ch'án la síxrànkà ch'án ntá í tjinkakonhya ch'án tsotsjehe ch'án. ³³ Na ntá ntáchro Ìnchéni kixin: “Takítsje tōkātá kixin tí nonte tinkatja la nonte tjóá chóntahya jīe. ³⁴ Ó k'uíkuan kixin tí sín kuèntana mé imá tjeotjasóte sín nación Egipto. La ó kuinhan kixin t'èya sín. La ntá ijie ó k'uinka kixin tsjínkítsa sín. Méxra xrákiá jaha tsétuanhan jaha sátsjia nación Egipto,”† ichro Dios.

³⁵ †Tí sín israelita mé kjuanoá sín tí ch'ín Moisés. Tsíntáchro sín kixin: “¿Nkexro kjuanjon kjuachaxin kixin jaha k'óna juez?” ichro sín. Kjánchó Dios ichr'án ch'án tí ch'ín Moisés kixin ts'etōan ch'án la ko sinchekaá ch'án tí sín israelita kjuachaxin tí ángel k'uíkon ch'án chríkjan tí nta. ³⁶ Ntá tí ch'ín Moisés kuakitsjexín ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí nación Egipto, la ko tí Ntayaon Kjátse, la ko tí nteje k'uáji sín cuarenta nánó. ³⁷ Jehe tí ch'ín Moisés a mé chénka tí sín israelita kixin: “Dios mé tsochr'án ijnko chojni tsoníxja itén Dios ts'axrjeníxin tí sín kichuárá éxí ichr'án ch'án tí janhan. Títekákonhénrá tí jehe ch'án.”‡ ³⁸ Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehe ch'án tí jna Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijie.

³⁹ †A ntá tí sín k'uaxrjeníxinni ósé mé tjinkakonhya sín kixin chrókuitekaon sín la kjuanoá sín tí ch'ín Moisés la ko tjinkaon inaá chrókjan sín nación Egipto. ⁴⁰ †A ntá ntáche sín ch'ín Aarón kixin: “Tjinkaonni sich'éna ijnko dios kixin tsinkáchónkini kixin í noehyani nkehe kónhen tí ch'ín Moisés, tí nkexro kjuínkítsa k'uaxrjexínni nación Egipto.”§ ⁴¹ Ntá kjuínchekjanoya sín ijnko koxintáxjan la ntá k'óyán sín iko kjókehe tí nkehe tsíkjanoya a la imá kóchéhe sín k'uíkon sín tí nkehe tsík'ónaxín tja chojni. ⁴² †A ntá Dios mé kuítóhe tí jehe sín kixin tsinkáchónki sín tí konotsé siín nkajní. Tíhi mé tsíkjin ijnko nkexro k'uéchrónka itén Dios ntáchro xikihi:

Jahará chojni Israel, ¿á k'oyánrá tí iko kjókānará tí janhan tí cuarenta nánó k'uejorá nteje ní?

⁴³ †Kjā nāhí, jehó tí nkehe kjuích'énará mé kjókehérá tí ko a. Kjuíkoará tí ninkōe tí dios Moloc

la ko kjāxin kjuíkoará tí konotsé kuènte dios Renfán.

†A ntá tí nkehe tsíkjich'énará jahará mé xráxinkákonxínrá éxí Dios kuèntará.

Méxra janhan tsakítsjexínrá tí tjejorá la tsétuanhánrá sátsjirá chjasin Babilonia.*

Mé xikaha ntáchro Dios ósé.

⁴⁴ †Naxā k'uéjé tí sín k'uaxrjeníxinni tí nteje la chóna sín ijnko ninko kamantá chóna tí ley tsík'etōan Dios. Tíhi kjuích'éna sín éxí tsík'etuenhen Dios tí ch'ín Moisés kixin sich'éna ch'án kaín nkehe k'uíkon ch'án. ⁴⁵ Ntá tí sín tsík'axrjeníxinni mé k'uáyéhe sín tí ninko kuítōnhen sín. Ntá tí sín kjuíkāo ch'ín Josué mé kjuíkāo sín tí ninko tió kjuacha sín k'uáyéhe sín í jnko nonte kuènte í so chojni kuakitsje Dios, kixin ts'áyéhe tí jehe sín. Mé xikaha kónhen hasta tí yaon kjuankíxin k'uetōan ch'ín David. ⁴⁶ Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sich'éna ch'án ijnko ninko kuènte Dios mé tí Dios k'uékinkáchónki ch'ín Jacob. ⁴⁷ Kjánchó jehe ch'án kjuích'énahya ch'án tí ninko a. Tí ch'ín Salomón mé kjuích'éna. ⁴⁸ Kjánchó Dios nkaya nkajni chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kixin:

⁴⁹ †Janhan Dios nkaya nkajní itjén tétōanxián ntá chjasintajni tjekjen tōtená. ¿Xá nkexéhe tí nchia chrókjuích'énará?

† 7:34 7.30-34 Éxodo 3.1-10 ‡ 7:37 Deuteronomio 18.15,18 § 7:40 Éxodo 32.1 * 7:43 7.42-43 Amós 5.25-27

¿Xá nketí chrókjuak'é chrók'ok'ánaxián?

⁵⁰ ¿Xá jehya tjaná kjuít'ánaxián kaín tí nkehe ní?†

Mé xikaha ichro Dios.

⁵¹ 'A ntá jahará la icha asánrá xráxín títekákonhyará. Jahará tinhínrá kjánchó ich'erá éxí chojni chónhya Dios. Xráxín tjánjonkoará Nchakuen Dios. Jahará mé tóyóhara tí sín tsík'axrjeníxinrá ósé. ⁵² Tí sín tsík'axrjeníxinrá kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kíxin itsi tí nkexro chóntahya jie. A ntá ó kui tí nkexro a ntá jahará kjuínchekjirá ch'án ntá k'óyán sín ch'án. ⁵³ Jahará k'uayéhérá tí nkehe k'ueṭoan Dios senó, mé tí nkehe chrónka tí ángel, la kjónté xikaha kuítékákonhyará —ichro ch'ín Esteban.

Ik'uén ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kíxin nínkakonhen sín ch'án. ⁵⁵ A ntá ch'ín Esteban antsí chóntha ch'án Nchakuen Dios la konta ch'án nkajní k'uíkon ch'án kjuachaxién Dios la ko k'uíkon ch'án kíxin ch'ín Jesús tjexín toté ch'án nánko tja chjina Dios.

⁵⁶ Ntá ntáchro ch'ín Esteban kíxin:

—Tsjeherá kíxin k'uíkuan kíxin xitjehe nkajní la ntaha itjen tí Xjeen Dios K'óna Chojni nánko tja chjina Dios.

⁵⁷ A ntá jehe sín la k'uikjehe sín ntatsjon sín la itsen k'uíxité sín ntá sákjuí sín k'uíxítja sín ch'án ⁵⁸ sákjuíko sín ch'án ikon chjasin ntá ixro chjehe sín ch'án. La tí sín tjanchia jie mé kuakitsje sín iké sín la k'uejo sín toté ijnko ch'ín ntasoá it'in Saulo kíxin ts'ayakonhen ch'án tí ka a. ⁵⁹ La it'e sín xro ntá ch'ín Esteban mé chrónóehe ch'án Inchéni la ntáchro ch'án kíxin:

—Inchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kíxin:

—Inchéni jaha mé tahya kuentá tí jie kjuasin sín.

Mé xikaha ichro ch'án ntá ik'uén ch'án.

8

Ch'ín Saulo chrók'óyán ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xíkayehe sín sákjuí sín nkuíxín estado Judea la ko estado Samaria. A ntá jehó tí sín tsíkjejá Jesús mé kuítóhe sín ntiha. ² Na iso sín imá tinkáchónki Dios mé kjuavá sín ch'ín Esteban la ko tsjánkàma sín ch'án la ko t'avéhe sín ch'án. ³ A ntá tí ch'ín Saulo la kjuankíxin kónínkakonhen ch'án tí sín tinkáchónki Cristo. K'uíxehen ch'án jnkojnko jnkojnko ntəe sín la itsé ch'án tí sín ntoa la ko tí chojni chjin. La ntá kuínkákájen ch'án sín sákjuíko ch'án sín kíxin ts'ejóchjina sín.

Kjuako sín itan jína tí estado Samaria

⁴ A ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuíxín tí sákjuí sín. ⁵ La ijnko ch'ín it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuente Cristo. ⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kíxin ó k'uíkon sín tí kjuaxroan kjuakoxin ch'án. ⁷ Itsjé chojni chóntha nchakuen tí jínahya mé kuítóhe sín jína la tí nchakuen tí jínahya k'óyako

† 7:50 7.49–50 Isaías 66.1–2

k'uaxrjexín tí jehe sín. La nchónhya tí sín chón̄ta chin xitjahya itji la ko tí sín síxenká toté mé kuítóhe sín jína. ⁸ A ntá imá kóchéhe kaín tí sín síin chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinchexroan ch'án. K'uékjich'iyehē ch'án tí sín estado Samaria ntáchro ch'án kixin ijnko chojni imá tjetōan tí jehe ch'án. ¹⁰ La kaín tí sín ntiha k'uejó sín kuínhin sín jína, mé tí chánjan ntsíntsí hasta tí chojni imá táda la k'uéntáchro sín kixin:

—Tí ch'ín i imá chón̄ta ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kixin k'uékjinchexroan ch'án k'uékjich'iyexín ch'án sín itsjé nánó. ¹² Ntá tió kuítekaon sín tí tan jína kjuako ch'ín Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuíkite sín. ¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankixin k'uájiko ch'án tí ch'ín Felipe la imá chrakon ch'án kixin k'uíkon ch'án tí kjuaxroan jié kjuasin tí ch'ín Felipe.

¹⁴ A ntá tí sín apóstol, mé tí sín tsíkitohe chjasin Jerusalén, kuínhin sín kixin itsjé tí sín estado Samaria ó kuítekaon sín itén Dios. Ntá k'uetuenhen sín ch'ín Pedro la ko ch'ín Juan sátsji sín ntiha. ¹⁵ Ntá tió kjuíji sín ntá kjuanchehe sín Dios kixin tí sín ntiha tinkáchónki Cristo chrók'uáyéhe sín Nchakuen Dios ¹⁶ kixin nijnko tí jehe sín ntiha naḡa tsík'áyèhya sín Nchakuen Dios. Jehó tsíkikitexín sín ihnié Ìnchéni Jesús. ¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uíkon ch'án kixin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon ¹⁹ la ntáchro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaón ikja jnkojín chojni ntá chrók'uáyéhe sín Nchakuen Dios —ichro ch'án.

²⁰ Ntá ntáchro ch'ín Pedro kixin:

—Jaha la ko tí ch'íhakoán ts'itjáyankoa kixin tjenkayáxian kixin chrók'uèna tí kjuachaxin kuènte Dios. ²¹ Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán. ²² Méxra tsitohé tí ijíá la chrónóhé Dios kixin ách'e tsjakjìnhan ch'án tí jié tjenkayáxian. ²³ Ó t'íkuan kixin imá chjinoxínhin asán la ko nchónhya jié chonta —ichro ch'ín Pedro.

²⁴ La ntá ch'ín Simón kjuátehe ch'án ntáchro ch'án kixin:

—Nixjehérá Ìnchéni kixin tí janhan kixin chrókónnahya tí janhan éxí tí ntáchrórá —ichro ch'án.

²⁵ Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya ti chjasin ntsíntsí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkjin nación Etiopía

²⁶ A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sátsjia nó sur tsoxeta tí ntia t'inkajinxin chjasin Jerusalén hasta chjasin Gaza —ichro tí ch'ín ángel.

Na ntá tí ntia a mé ijnko ntia t'atsínka nó nteje. ²⁷ Na ntá tí ch'ín Felipe k'uínkatjen sákjuí tí ntia. La ntiha xrínahya xeta ch'án ijnko chojni tsíkjin sín nó nación Etiopía. Jehe ch'án mé ijnko chojni eunuco mé tja ch'án síin ch'íhakoan tí tjan reina Candace t'etuenhen tí nación Etiopía. Jehe ch'án sátsíkji ch'án chjasin Jerusalén xraxinkakonxín ch'án Dios. ²⁸ A ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka

itén Dios. ²⁹ La ntá tí Nchakuen Dios mé k'uetuēnhen tí ch'ín Felipe ntáchro kixin:

—Sátjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuiānxian kixin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjāxin chjinaxón tí tjen ch'án.

³² Na tí xroon itén Dios tjenchekuáxin ch'án mé tíhi:

Jehe ch'án mé sákjuiko sín éxí ijnko kolélo kjuiko sín ts'óyán sín.

La éxí ijnko kolélo tsjánkahya tíó kjínhin sín kaxree va mé xikaha jehe ch'án ninkehó xítjēhaya ir'va ch'án.

³³ K'uikon sín ch'án éxí ijnko chojni chóna jie la ntoáhya kjuínchekjasóte sín ch'án.

Kohya nkexro tsjacha tsochrónka kuēte tí sín chrók'uaxrjeníxin ch'án

kixin jehe ch'án la k'uenxín ch'án chjasintajni.*

Mé xikaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kixin:

—Tsotsenkávan chrónka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xikaha kjuanchankí ch'án.

³⁵ La ntá tí ch'ín Felipe kjuankixin chrónka ch'án kuēte tí nkehe tjenchekuáxin tí ch'ín a la chrónka ch'án tí tan jína kuēte Jesús. ³⁶ A ntá xrínahya kjuíji sín tí tjiá ntā, ntá ntáchro tí ch'ín eunuco kixin:

—Tsjehé tjiá ntā. ¿Á xitjahya chrókuíkítēna? —ichro ch'án.

³⁷ Na ntá ntáchro tí ch'ín Felipe kixin:

—Ti kuítekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kixin:

—Títekavan kixin tí Jesucristo la Xjeen Dios —ichro ch'án.

³⁸ La ntá tí ch'ín tsíkjin Etioipía a k'uetōan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjin Etioipía mé k'uínkajin sín ntá kjuíankí sín ntā la tí ch'ín Felipe kuíkite ch'án tí ch'ín a. ³⁹ La ntá kjuixin k'uaxrjenkí sín ntā la ntá tí Nchakuen Inchéni sátsíkjiko tí ch'ín Felipe ókjé. A ntá k'uíkonhya kichó sín inaá. Ntá kjónté xikaha la tí ch'ín eunuco sákjuí ch'án la antsí chéhe asén ch'án. ⁴⁰ A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Inchéni kixin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo (Hch. 22.6-16; 26.12-18)

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Inchéni Jesús. Méxra sákjuítsjehe ch'án tí ch'ín nchāt'á t'etōan. ² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí nínko chjasin Damasco tsjeyá ch'án tí sín kuákja ntā nixin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén. ³ La ntá

* **8:33** 8.32-33 Isaías 53.7-8

kjuíji ch'án chjinaxón chjasin Damasco, a ntá xrínahya titàya ikui ijnko xrohi t'inkaséyan kuixin nkaya nkajni k'uantatjen ch'án a. ⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kixin:

—Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuátehe, ntáchro kixin:

—Janhan mé Jesús, mé tí nkexro xritjéyá jaha. ⁶ T'àyá sátjia. T'ixenhén tí chjasin Damasco, ntá ntiha mé tsinhín nkehe sich'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró. ⁸ La ntá tuénxín k'uàya ch'ín Saulo ntá kuakitjenki ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuíko sín ch'án chjasin Damasco. ⁹ A ntá ntiha kjuák'e ch'án la iní yaon k'uíkonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uíkuèn ch'án Ìnchéni ntáchro kixin:

—Ananías.

A ntá ch'ín Ananías mé kjuátehe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sátjia tí ntia it'in Ntia Ntoí. Ntá tió tsjasán ntøe ch'ín Judas tjanchankíhí sín á ntahya itjen ijnko ch'ín tsíkjiixin chjasin Tarso me it'in ch'án Saulo. Jehe ch'án mé tjechrónóana ch'án. ¹² A ntá titàya k'uíkuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kixin xik'ikon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhí, tsjihyani kixin ó kuínhinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jína kjuích'ehe ch'án tí sín kuítekaon tí jaha chjasin Jerusalén. ¹⁴ A ntá jie la ó kjui ch'án ntihi kixin tsík'áyéhe ch'án kjuachaxin kuènte nchat'á t'etøan kixin tsotsé ch'án kaín tí sín tinkáchónki ihniá.

¹⁵ Kjánchó Ìnchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakohe ch'án tí sín ókjé nación la ko tí sín rey la ko kjaxin tí sín israelita. ¹⁶ Janhan tsjakohe ch'án kixin nchónhya tsjasóte ch'án kixin tsinkáchónkina ch'án.

¹⁷ A ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uíkuan tí ntia k'uinkaxian, mé k'uetuanna kjuíha kixin sintak'ikuan inaá la ko ts'ayéhé Nchakuen ch'án —ichro tí ch'ín Ananías a.

¹⁸ Ntá tuénxín k'uanotjenxin ikon ch'ín Saulo ijnko nkehe éxí kjøe koche xikaha. Ntá xik'ikon ch'án inaá. La ntá k'uíkatjen ch'án la ko kuikite ch'án.

¹⁹ La ntá chr'éxin ntá kjóne ch'án la ntá ikjan asén ch'án inaá. Ntá kuitøhe ch'án iso yaon k'uéjoko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankixin ch'ín Saulo kjuakoxin ch'án iso njnko Israel kixin Jesús mé Xjeen Dios. ²¹ La kaín tí sín tjejótinhin imá chrakon sín la ntáchro sín kixin:

—¿Á jehya tí ch'ín i tjinkaon sinchek'itjáyan ch'án kaín tí chojni tinkáchónki Jesús chjasin Jerusalén? ¿Á jehya tí xra a kjuixin ch'án ntihi kixin tsotsé ch'án sín la sátsjiko ch'án sín tí tjejó tí sín nchat'á t'etōan? —ichro sín.

²² Kjánchó antsí má fuerte kjuako ch'ín Saulo kixin chaxín tí ch'ín Jesús mé tí Cristo. La tí sín judío k'uéjó chjasin Damasco kjuachahya kjuachaxin sín ch'án.

Kjuachahya tí sín judío chrótsé sín tí ch'ín Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexrí chrók'óyán sín tí ch'ín Saulo. ²⁴ A ntá ó kuínhin ch'án nkehe kjuenkayáxin sín. A ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrjexín ch'án chjasin. ²⁵ A ntá tí sín tinkáchónki Ìnchéni mé kjuak'enkaya sín tí ch'ín Saulo ijnkontaxra jié ijnko tie. Ntá kjuinkajinxin sín tíntaxra tjenkáya tí ch'ín Saulo nóton tí tjat'ō tsík'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

²⁶ Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kixin kuítekakonyha sín kixin á chrókóchaxín kjaxin ch'án tinkáchónki ch'án Ìnchéni. ²⁷ A ntá ch'ín Bernabé mé sákjuíko ch'án tí ch'ín Saulo ti tjejó tí sín apóstol la ntá chrónka ch'án kixin ch'ín Saulo mé tsík'ikon ch'án Ìnchéni tí ntia sákjuí ch'án ntá Ìnchéni mé nixjehe ch'án. Méxra chjasin Damasco k'uékjako ch'án ihnié Ìnchéni la chrakonhya ch'án. ²⁸ Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxién ihnié Ìnchéni Jesús. ²⁹ La ikjo ch'án tí sín judío nixja nkiva griego. A ntá jehe sín la tjinkaon sín chrók'óyán sín tí jehe ch'án. ³⁰ A ntá tí sín kichó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uētuenhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjó sín la antsí má tinkáchónki sín Ìnchéni. K'uéchóna sín kjuasáyé Ìnchéni la ko tí Nchakuen Dios kjuínkítsa sín la ntá antsí má sítinkákótsjé sín.

Ch'ín Eneas kuítóhe ch'án jína

³² Na ntá tí ch'ín Pedro xritsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kichó ni tjejó chjasin Lida. ³³ Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án. ³⁴ Na ntá ntáchro ch'ín Pedro kixin:

—Eneas, Jesucristo mé sintakitōha jína ijie. T'inkatjen tjatsìyan camá —ichro ch'án.

Na ntá ch'ín Eneas tuénxín k'uínkatjen ch'án. ³⁵ La kaín tí sín siín chjasin Lida la ko chjasin Sarón k'uíkon sín kixin kuítóhe ch'án jína la ntá kjaxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkiva griego la mé t'axrjexín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkítsa tjan tí chojni nò. ³⁷ Ntá ijnko yaon imá kónihi tjan ntá ik'uén tjan. La ntá kjuínchek'ónti sín cuérpōé tjan la ntá tí yóxin piso noi kjuák'e sín tjan. ³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni

mé nohe sín kixin ntiha tjen ch'án. Ntá ichr'án sín iyó chojni tsontáche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjen tí cuérpoé tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan. ⁴⁰ A ntá k'uetōan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehe ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'àya.

Ntá kuakitjenki tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjāxin tjan. ⁴¹ A ntá itsé ch'án itja tjan la k'uínkatjen tjan. La ntá k'uíyehē ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan. ⁴² Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni. ⁴³ A ntá ch'ín Pedro kuítóhe ch'án itsjé yaon tí chjasin a la kjuák'e ch'án ntoe ch'ín Simón, ijnko ch'ín nchentá tjoé iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetuēnhen tí sín soldado italiano. ² Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjinkitsa tí sín judío la ko xráxin nixjehe ch'án Dios. ³ La ntá ijnko yaon las tres kónjín titàya k'uíkuèn ch'án ijnko ángel kuènte Dios k'uíxēnhen tí tjen ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhin kixin tí nixjehé ch'án la ko tí jína ch'e tjínkitsa tí sín nòa.

⁵ Ntá jaha tétuēnhén jnkojín chojni sátsji chjasin Jope kixin tsjikakjín sín ch'ín Simón kjaxin it'in ch'án Pedro. ⁶ Itjen ch'án ntoe ijnko ch'ín kjaxin it'in Simón. Tí ch'ín a mé nchentá tjoé iko. Mé tjen ntoe ch'án chjinaxón tí ntayaon a.

⁷ Ntá tió sákjuí tí ángel nixjehe ch'ín Cornelio la ntá jehe ch'an k'uíyehē ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chónthehe sín kjuasáya kichó sín. ⁸ Ntá kjuixin chénka ch'án kaín sín tí nkehe k'uíkon ch'án ntá k'uetuēnhen ch'án sín sátsji sín chjasin Jope.

⁹ Í jnko yaon chr'éxin chjina chonkixin tjejóyá sín ntia chjino chjasin Jope ntá ch'ín Pedro mé k'uit'ótjen ch'án chrítaón nchia kixin ntaha nixjeexín ch'án Dios. ¹⁰ Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titàya k'uíkuèn ch'án nkehe ¹¹ mé k'uíkon ch'án kixin xitjehe nkaya nkajní ntá ntiha k'uínkajinxin ijnko ka jié. Kanoé punté tí ka tjejóte. ¹² Tí nkaxēnhen tí ka a tjinká ko noó toté la ko konche la ko kaín ko xritjaká. ¹³ Ntá kuínhin ch'án nixja ijnko nkexro ntáchro ch'án kixin:

—Pedro, t'àya, t'oyán tí ko a ntá inte.

¹⁴ Ntá ch'ín Pedro kjuátehe ch'án kixin:

—Náhí, Ìnchéni. Nunca nehyani tí nkehe tjuáhya.

¹⁵ Ntá kjuátehe tí tan inaá ntáchro kixin:

—Tí nkehe ó kjuínchetjóá Dios. La ntáchrohya kixin tjuáhya —ichro ch'án.

¹⁶ Xikaha kónhen iní veces ntá tuénxín sákjuí tí ka nkaya nkajní. ¹⁷ Ntá ch'ín Pedro naxa tjenkayáxin ch'án nkehe t'axrjexín tí k'uíkon ch'án la xrinahya ó kui tí sín ichr'án ch'ín Cornelio ntója nchia. Ó tsíkjanckí sín nketí tjen ntoe ch'ín Simón. ¹⁸ Ntá kjuanchankí sín itsen kixin:

—¿Á ntihi tjen ch'ín Simón kjaxin it'in ch'án Pedro?

¹⁹ Naxa tjenkayáxin tí ch'ín Pedro tí nkehe k'uíkon ch'án ntá Nchakuen Dios chrónka kixin:

—Tsjehe ó kui iní sín xritjeyá tí jaha. ²⁰ T'aya t'inkajián sátjikoá tí sín a. Tóxakuanhya jaha, janhan mé kuétuanhan sín ikui sín —ichro Nchakuen Dios.

²¹ Ntá k'uínkajin tí ch'ín Pedro tí tjejó tí sín a ntá ntáchro ch'án kixin:

—Janhan tí nkexro xritjeyará. ¿Nkehe tí tsonhen tjinkáonrá?

²² Ntá kjuátehe sín ntáchro sín kixin:

—K'uetuan tí ch'ín capitán Cornelio ikuini ntihi. Jehe ch'án me ijnko chojni imá jina la ko xraxinkaon ch'án Dios. Kaín tí sín judío tjikosáyehe ch'án la ko tjuèhe sín ch'án. Ijnko ángel kuénte Dios mé nixjehe ch'án chénka ch'án kixin chrók'uíyehe ch'án tí jaha kixin chrókjuia ntoe ch'án la ntá chrókuinhin ch'án tí nkehe tsontáchrúa —mé xikaha chrónka sín.

²³ Na ntá tí ch'ín Pedro kjuanjón kjuachaxin kixin ntahó chrók'ok'éhe sín ti tie a. Ntá kóyaon ntá sákjuíko ch'án sín. Kjaxin iso sín tinkáchónki Ìnchéni tjejó chjasin Jope mé sákjuíkotoxin sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyehe ch'án tí jehe sín kixin tsinhin sín. ²⁵ Ntá tió kjuíji tí ch'ín Pedro ntoe tí ch'ín Cornelio ntá k'uaxrjexín ch'án nchia nixjehe kichó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án. ²⁶ A ntá tí ch'ín Pedro kjuínckek'inkatjen ch'án tí ch'ín a la ntáchro ch'án kixin:

—T'inkatjen. Tjak'exián totá. Janhan mé ijnko chojni éxi tí jaha.

²⁷ A ntá kjuixin ikjo sín la ntá k'uíxenhen sín ntoe ch'án la ntá k'uíkon tí ch'ín Pedro kixin nchónhya chojni tsíkójnkotsé ntiha. ²⁸ Ntá ntáchro ch'án kixin:

—Jahará nohará kixin tí jeheni judíoni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntoe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni. ²⁹ Méxra tió k'uíyanará la tjoka k'uinka. Tjínkavan chrókónona kixin nkekuénte k'uíyanará.

³⁰ Ntá kjuátehe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntoeni kjónehyani la nixjehe Dios. Ntá xrinahya k'uíkonni ijnko chojni chóna iké tjákiní. ³¹ La ntáchro ch'án kixin: “Cornelio, ó kuínhin Dios tí nkehe nixjehe ch'án la ó nohe ch'án kixin imá tjinkítsa jaha tí chojni nòa. ³² Méxra tétuénhén chojni sátsji chjasin Jope kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntoe ijnko ch'ín mé kjaxin it'in Simón nchentá ch'án tjoé iko. Chjino tí ntayaon a itjen ntoe ch'án,” ichro tí ángel. ³³ Méxra xikaha tjoka ichr'ánni sín tsíkjeyá sín tí jaha. Jina k'uinka ntoeni. Ntá ijie ó nohe Dios kixin kaín ni tjinkaonni tsinhinni nkehe tí k'uetuanhan Ìnchéni tsochronka tsinhinni.

Ch'ín Pedro kjuakohé ch'ín Cornelio ntoe ch'án

³⁴ Ntá ntáchro ch'ín Pedro kixin:

—Ijie ó t'ikuán kixin jnkokón t'ikon Dios kaín xín chojni. ³⁵ Tí nkexro kaín nación titekaon la chónthehe kjuasáyé Dios la mé tóxrjinhin ch'án. ³⁶ Dios mé nixjehe ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehe ch'án mé Ìnché ch'án kaín nkehe.

³⁷ Jahará ó nohará jína kaín tí nkehe tsíkónhen nkuíxín tí tjejó tí sín judío mé kjuankíxin estado Galilea tió kjuixin kjuako ch'ín Juan kíxin t'ichjánxín tsikite chojni. ³⁸ Jahará ó nohará kíxin Dios kjuanjón kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkjixín chjasin Nazaret. Ó nohará kíxin tí ch'ín Jesús mé k'uáji ch'án ntiha la tí nkehe jína kjuích'e ch'án kíxin kjuínchekitohe ch'án jína kaín chojni tjasótexín kaín tí kjuachaxién tí jínahya. Mé xíkaha jína kjuích'e ch'án kíxin Dios tjeko tí jehe ch'án. ³⁹ A ntá jeheni mé chaxín k'uíkonní kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkani sín ch'án ijnko ntacruz la k'óyán sín ch'án. ⁴⁰ A ntá Dios kjuínchexechón ch'án tí níxin yaon la kjuanjón ch'án kjuachaxin kíxin k'uíkonní ch'án ínaá. ⁴¹ Jehya kíxin kaín chojni chrók'uikon sín ch'án. Náhí. Jehó tí sín tsíkjejá Dios kíxin ts'ikon chaxín xechón ch'án. Jeheni kjónekoni ch'án la ko k'uíkani ch'án tió xixechón ch'án ínaá. ⁴² K'uetōan ch'án kíxin jeheni tsjakōheni chojni la tsochrónkani kíxin jehe ch'án mé tí nkexro juez sinchekitoexín ijje tí sín tjejóchón la ko tí sín ó tsík'en. ⁴³ Kaín tí sín k'uéchrónka itén Dios mé chrónka sín kíxin jnkojnko tí sín tinkáchónki Jesús mé ts'ókíka ch'án ijje sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. ⁴⁵ Ntá tí sín judío kjuikotoxin ch'ín Pedro la chrakon sín kíxin Dios mé kjuanjón Nchakuen ch'án, kjaxín k'uáyéhe tí sín jehya judío. ⁴⁶ Méxra kuínhin sín nixja sín jnkojnko nkiva ókjé la ko kuínhin sín tjanchehe sín Dios kjuasáya. ⁴⁷ Ntá ntáchro ch'ín Pedro kíxin:

—Jehe sín ó k'uáyéhe sín tí Nchakuen Dios xíkaha jeheni. Ntá chrókjuanjónni kjuachaxin kíxin tsikite sín —ichro ch'án.

⁴⁸ La ntá k'uetōan ch'ín Pedro kíxin tsikite kaín sín kjuachaxién ihnié Jesucristo. Ntá tí sín kuíkite mé kjuanchia sín kíxin chrókuitōhe tí ch'ín Pedro ntiha iso yaon.

11

Nixjehē ch'ín Pedro tí sín tinkáchónki Cristo chjasin Jerusalén

¹ Na ntá tí sín tsíkjejá Ìnchéni la ko kaín tí sín tinkáchónki Ìnchéni k'uéjó estado Judea mé kuínhin sín kíxin tí sín jehya judío ó tinkáchónki sín itén Dios. ² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án. ³ Kjuanchankíhi sín ch'án ntáchro sín kíxin:

—¿Nkekuènté kjuítsjehé tí sín jehya judío, la ko kjóntekoa tí jehe sín? —mé xíkaha kjuanchankí sín.

⁴ Ntá tí ch'ín Pedro kjuankíxin ch'án chrónka ch'án desde tí xrankixíxin kaín nkehe tsíkónhen ch'án. Ntáchro ch'án kíxin:

⁵ —Janhan mé kjuak'é chjasin Jope kjuak'énixjahā Dios. La ntá titàya k'uíkuen ijnko ka jje k'uínkajinxín nkaya nkajní. Kanoé punté tí ka tjejóte la kjuák'e chjino tí tjén. ⁶ Ntá tsjahā jína tí nkehe la k'uíkuan kíxin tí nkaxenhen tí ka tjinká ko noó toté la ko iko nteje la ko konche la ko iko xritjaká. ⁷ La kjaxin kuínhan itén ijnko nkexro nixjana ntáchro ch'án kíxin: “Pedro, t'aya t'oyán tí ko a ntá inte.” ⁸ A ntá kjuátahā kíxin: “Náhí, Ìnchéni. Nunca nehyani tí nkehe tjuáhya.” ⁹ A ntá kjuátehe tí tan kuixín nkaya nkajní a ínaá chrónka kíxin: “Tí nkehe a mé ó kjuínchetjóá Dios. La ntáchrohya kíxin tjuáhya,” ichro ch'án. ¹⁰ Xíkaha kónhen iní veces. Ntá sákjuí kaín tí nkehe a nkaya nkajní ínaá. ¹¹ Ntá xrínahya tuénxín kjuíji iní chojni ntoa tí nchia tjejóni. Tsíkjixín

sín chjasin Cesarea xritjeyá sín tí janhan. ¹² Tí Nchakuen Dios mé k'uetōan kixin sáchrókjuikian sín la chrókóxakonahya. Kjaxin sákjuikian injon tí sín kichó ni tjejó i. Kaínni k'uixenhenni ntōe tí ch'ín a. ¹³ A ntá tí ch'ín ntōe ntiha mé chrónka ch'án kixin k'uikon ch'án ijnko ángel tjexín toté la nixja ntáchro kixin: “Tétuēnhén chojni sátsji chjasin Jope kixin tsjikakjín sín ijnko ch'ín it'in Simón la ko kjaxin it'in ch'án Pedro. ¹⁴ Jehe ch'án mé tsonixjaha ch'án tsochrónka ch'án nkexrí tsaá jaha la ko kaín tí sín kjéhya.” ¹⁵ Ntá kjuankíxian nixjahā sín na ntá ó kui tí Nchakuen Dios k'uáyéhe sín éxí k'uáyéheni tí senó a. ¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'án kixin: “A ntá chaxín ch'ín Juan ìntā ó kuikítexín ch'án chojni, a ntá ijie jahará tsikitiaxínrá tí Nchakuen Dios.” ¹⁷ Éxí xikaha jeheni tió kjuankíxian kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xikaha ijie la kjuanjon Dios tí Nchakuen ch'án k'uáyéhe tí jehe sín kjaxin. ¿Xá nkexro tí janhan kixin chrókjuánjonkian Dios? —ichro ch'ín Pedro.

¹⁸ A ntá tí sín kichó ni tjejó chjasin Jerusalén kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrín —mé xikaha ichro sín.

Tí njnko chjasin Antioquía

¹⁹ Ti kjuixin k'uen ch'ín Esteban ntá kjuankíxian sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakōhe sín tí sín judío nkexrí tjen tí tan jína. A ntá tí sín jehya judío la náhi. ²⁰ A ntá í so sín tinkáchónki Ìnchéni tsíkjixín chjasin Chipre la ko tsíkjixín sín Cirene sákjuí sín chjasin Antioquía. Tió kjuíji sín ntiha mé kjuakōhe sín tí sín jehya judío nkexrí tjen tí tan jína kuènte Ìnchéni Jesucristo. ²¹ Tí kjuachaxin kuènte Ìnchéni mé chóna tí jehe sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'ín Bernabé sákjuí ch'án ntiha. ²³ Ntá tió kjuíji ch'án ntiha ntá k'uikon ch'án kixin Dios imá kjuínkítsa tí sín ntiha kjaxin. Ntá imá kóchéhe asén ch'án. Ntá nixjehē ch'án sín kixin kaín asén sín ts'ejó sín tsinkáchónki sín Ìnchéni. ²⁴ Ch'ín Bernabé la ijnko chojni imá jína asén la antsí chóna ch'án Nchakuen Dios la jína tinkáchónki ch'án; méxra kóchjina nchónhya sín kuinkáchónki sín Ìnchéni.

²⁵ Kjuixin tíha a ntá ch'ín Bernabé sákjuí ch'án chjasin Tarso sákjuíkjeyá ch'an tí ch'ín Saulo. ²⁶ Ntá tió k'uitja ch'án ntá sákjuíko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakōhe sín itsjé chojni. Ntiha chjasin Antioquía kjuankíxian sín kuikítexín sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuíxian sín chjasin Jerusalén la kjuíji sín chjasin Antioquía. ²⁸ Ijnko ch'ín it'in Agabo k'uínkatjen ch'án kjuák'exín toté ch'an tí tsíkójnkotsé tí sín tinkáchónki Jesús la kjuachaxiēn Nchakuen Dios chrónka ch'án kixin tsokjinta nkuíxín ntiha. Tí nkehe chrónka ch'án mé chaxín kónhen tió kjuák'e ch'ín Claudio k'uetōan ch'án. ²⁹ A ntá tí sín tinkáchónki Ìnchéni chjasin Antioquía kjuenkayáxian sín kixin jehe sín tsjinkítsa sín tí sín kichó sín tinkáchónki Ìnchéni estado Judea. La jnkojnko sín kjuanjon sín tí

nkehe chóna sín. ³⁰ Mé xikaha kjuenájín sín chichaon sákjuiko ch'ín Bernabé la ko ch'ín Saulo chjéhe sín tí sín t'ayakonhen nínko estado Judea.

12

Ik'uén ch'ín Jacobo la ko kjuák'echjina ch'ín Pedro

¹ A ntá tí yaon a tí ch'ín rey Herodes mé ntá kjuankíxin ch'án kónínkakonhen ch'án tí sín tinkáchónki Jesús. ² La k'uetōan ch'án kixin tí ch'ín Jacobo ts'enxín ijnko chica espada tjate. Jehe ch'án mé kichó ch'án tí ch'ín Juan a. ³ Ntá k'uikon ch'ín Herodes kixin imá kóchéhe tí sín judío kixin xikaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín niotja chóntahya tí xroan nchek'ánkí niotja. ⁴ Kjuixin itsé ch'ín Herodes tí ch'ín Pedro ntá chr'áxenhén ch'án ntōechiso. Ntá ntiha mé tjejónta noó grupo soldado la mé noó soldado jnkojnko grupo. Kjuenkayáxin ch'ín Herodes kixin tsjixin ts'átsínka tí kia pascua ntá sátsjiko ch'án tí ch'ín Pedro tí siín tí sín israelita kixin ts'ikon kuenté chjasin ntiha kixin nkexrí its'en ch'án. ⁵ Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehe sín Dios kaín asén sín kixin tsjinkitsa Dios tí ch'ín Pedro.

Dios kjuínkitsa ch'ín Pedro k'uaxrjexín ch'án ntōechiso

⁶ Tí tie a mé kjuenkayáxin ch'ín Herodes kixin tsoyaon ntá tsakitsje ch'án ch'ín Pedro sátsjiko ch'án tí siín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntōechiso. ⁷ A ntá xrínahya tuénxín ikui ijnko ángel kuente Ìnchéni, a ntá tí nkaxenhén ntōechiso imá k'uínkaséyan ijnkòyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'uetōan tí ángel ntáchro kixin:

—Tjoka t'áya.

La ntá tí chica cadena tjejóchróntetoxín itja ch'ín Pedro mé k'uánótjen. ⁸ Ntá xík'etōan tí ángel ntáchro kixin:

—T'inkaya iká la tjanka tōkatá.

Ntá kuítekaon ch'ín Pedro la kjatēe xík'etōan tí ángel ntáchro kixin:

—T'ítsate iká ntá chréhe sátsjini —ichro ch'án.

⁹ Ntá ch'ín Pedro chréhe ch'án iton tí ángel a ntá noehya ch'án á chaxín xikaha kónhen tí nkehe kjuích'e tí ángel o náhí. Ntáchro ch'án kixin ách'e ijnko nkehe k'uikonxón ch'án. ¹⁰ Ntá kjuixin k'uátsínka sín tí tjejó tí soldado saoxín la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta chica ijié chjinaxón ntja. La ntá tí puerta chica la jehó xitjehe. Ntá k'uaxrje sín tjejótji sín ijnko ntja la ntá xrínahya tí ángel ó sákjuí la ntá jehó ch'ín Pedro kuítóhe ch'án. ¹¹ A ntá tí ch'ín Pedro kónohe ch'án kixin chaxín kónhen tíha. Ntá ntáchro ch'án kixin:

—Ntá ó noheni kixin chaxín Ìnchéni tsíchr'án tí ángel kuente ch'án kixin sinchekaáni kixin ts'óyánhyani ch'ín Herodes la ko tsōenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntōe ijnko tjan María, ìné ch'ín Juan kjaxin tikítexín sín Marcos. Ntaha tsíkójnkotsé itsjé sín tinkáchónki Ìnchéni tjejónixjehe sín Dios. ¹³ La ntá t'ínka ch'án tí puerta chjinaxón ntja la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha. ¹⁴ A ntá tió kjuátsoan tjan itén ch'ín Pedro ntá k'uitjáyenhén tjan kuakitjeehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'ín Pedro. ¹⁵ Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xíntáchro sín kixin:

—Jehya jehe ch'án. Kjá tí xrintoe ch'án.

¹⁶ A ntá ch'ín Pedro naxa t'ínka ch'án tí ntója puerta la ntá tió kuakitjehe sín la k'uikon sín ch'án ntá chrakon sín. ¹⁷ A ntá kjuakoxin ch'ín Pedro itja ch'án kixin tsotání sín ntá chrónka ch'án kixin Ìnchéni mé kuakitsjexín ch'án ntoechiso. Ntá k'uetōan ch'án ntáchro ch'án kixin:

—Chenkará ch'ín Jacobo la ko kaín kichó ni nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro. ¹⁹ La ntá k'uetōan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetōan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjexín ch'án estado Judea ntá sákjuí ch'án chjasin Cesarea la ntiha kjuák'e ch'án.

Ik'uén ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjtsjehe sín ch'án. Ntaha itjen ijnko ch'ín it'in Blasto k'uáyakonhen ch'án ntōe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etōan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sítixín tí nkehe ine sín. ²¹ Ntá ch'ín Herodes k'uíyehē ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrjón kuènte chojni t'etōan la kjuák'enkáya ch'án ijnko silla kuènte chojni t'etōan. La ntá kjuankíxin ch'án nixjehe ch'án tí sín tsíkójnksé.

²² A ntá tí sín a kjuankíxin k'uèya sín, ntáchro sín kixin:

—Jehya chojni tjenixja. Dios tjenixja —ichro sín.

²³ A ntá tuénxín ijnko ángel kuènte Ìnchéni kjuíncheníhi ch'ín Herodes kixin kjuíncheyóhe ch'án asén ch'án Dios. La ntá kosjntō kjóne nkaya tsee ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixra kuènte sín chjasin Jerusalén la ntá sáxíkji sín chjasin Antioquía la sákjuíko sín ch'ín Juan mé kjaxin tikítexín sín ch'án Marcos.

13

Ch'ín Saulo la ko ch'ín Bernabé sákjuíjkako sín

¹ A ntá tí nínko chjasin Antioquía la siín iso sín nixja sín itén Dios la kjuakohe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etōan estado Galilea, la ko ch'ín Saulo.

² Ijnko yaon la tjejótojnkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xra sich'e sín.

³ Ntá nixjehe sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkojnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uixenhen sín ijnko ntabárcō sákjuí sín ijnko nonte

it'in Chipre. ⁵ Ntá kjuíji sín ijnko puerto it'in Salamina. Ntaha kjuakoxin sín itén Dios tí nínko kuènte tí sín judío. Kjaxin kjuíjiko sín ch'ín Juan kíxin tsjinkitsa ch'án. ⁶ La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kíxin kjaxin ch'án nixja ch'án itén Dios. ⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehé ch'án tí ch'ín Bernabé la ko tí ch'ín Saulo kíxin jehe ch'án tjinkaon ch'án tsinhin ch'án itén Dios. ⁸ A ntá tí ch'ín nchexroan, nkíva griego mé tikítexín sín ch'án Elimas, mé nínkakonhen ch'án tí sín tjako a kíxin tjinkakonhya ch'án kíxin tí ch'ín t'etōan chrókuitekaon ch'án Ìnchéni. ⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan. ¹⁰ Ntáchro ch'án kíxin:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuènte kíxin ch'éna jínahya tí ntia ntoá kuènte Ìnchéni? ¹¹ A ntá ijie la Ìnchéni sintakjasótia. Tsitōha ntakótán iso yaon la ts'ikonhya tí xrohi kuènte yaon —ichro ch'ín Pablo.

Ntá tuénxín tí ch'ín Elimas la k'uíxitie tjen ch'án. La ntá kjueyá ch'án ijnko nkexro tsinkátséhe tja ch'án sátsjiko ch'án kíxin t'ikonhya ch'án. ¹² A ntá xikaha mé k'uíkon tí ch'ín gobernador nkehe kónhen la ntá kjuankíxin tinkáchónki ch'án Ìnchéni kíxin k'uíkon ch'án tí kjuachaxin kuènte Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuíxin sín chjasin Pafos. K'uíxenhen sín ntabárcō sákjuí sín kjuíji sín chjasin Perge estado Panfilia. Ntá ntaha ch'ín Juan* kuitohe tí jehe sín ntá kjan ch'án chjasin Jerusalén. ¹⁴ Ntá sákjuíxin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uíxenhen sín tí nínko Israel na ntaha k'uéjótjaxin sín. ¹⁵ Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'uéchrónka itén Dios ntá tí sín t'etōan kuènte nínko mé k'uíyehé sín tí sín a ntá ntáchro sín kíxin:

—Kíchóni tí chonta nkehe tsochroonka kíxin antsí má tsochéheni la chroonka jie tsinhinni —ichro sín.

¹⁶ Ntá ch'ín Pablo k'uínkatjen ntá kjuakoxin itja ch'án kíxin tsotání sín. Ntá ntáchro ch'án kíxin:

—Chrókuinhínrá jahará chojni israelita la ko kjaxin chrókuinhínrá jahará tsíkíxinrá chjasin ókjé tí chaxín tjinkáonrá nchexiteyéhérá Dios. ¹⁷ Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxin Dios kjuanjon kjuachaxin kíxin chrókótsjé tí jehe sín tí naxā k'uéjō sín chjasin Egipto. Éxí chojni tsíkjixín ókjé k'uéjō sín a ntá chr'éxin ntá kjuachaxién Dios kjuínkítsa sín k'uaxrjexín sín tí nonte ntiha inaá. ¹⁸ Dios kjuínkítsa sín tí cuarenta nánó k'uéjō sín tí nteje. ¹⁹ Ntá chr'éxin kjuínchek'itjāyan ch'án yato nación k'uék'ejó nonte Canaán, kíxin tí sín tsík'axrjeníxinni chrók'uáyéhe tí nonte a. ²⁰ Ntá kaín sín k'uéjō sín ntiha ijnko cuatrocientos cincuenta nánó. K'uék'etōan tí sín juez hasta ikjui tí ch'ín Samuel ijnko ch'ín k'uéchrónka itén Dios. ²¹ Ntá kjuanchia tí sín israelita ijnko ch'ín rey ts'etuenhen sín. Ntá kjueyá Dios tí ch'ín Saúl la k'uetoan ch'án cuarenta nánó. Jehe ch'án it'é ch'án mé ch'ín Cis la k'uaxrjeníxin ch'án ch'ín Benjamín. ²² Ntá chr'éxin Dios kuakitsjehe ch'ín Saul tí xra kjuák'e ch'án ntá k'uáyéhe ch'ín David tí xra rey. Ntá ntáchro Dios kíxin: “Ó k'uítjá ch'ín David,

* 13:13 Hechos 12.25

it'é ch'án mé Isaí. Jehe ch'án mé ijnko chojni nchechàna mé sinchexiteyàna ch'án kaín nkehe tjínkavan". ²³ Ijnko tí chojni k'uaxrjeníxin tí ch'ín David mé Jesús. Tíha la Dios tsíchr'án ch'án kíxin sinchekaá tí sín israelita. Mé xíkaha tsíntáchro ch'án. ²⁴ Naxa tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án kíxin chrókjan sín chróxraxinkaon sín Dios ntá chrokuikite sín. ²⁵ Ntá chjina its'en ch'ín Juan ntá ntáchro ch'án kíxin: "Janhan na jehya tí nkexro tjenkayáxinrá. Náhi. Chr'éxin na itsi í jnko nkexro la chrókósuàna chrókjuasintanka tí correa tokaté ch'án kíxin antsí mé t'etoan tí jehe ch'án la kánhyó t'etoan tí janhan," mé xíkaha tsíntáchro ch'ín Juan.

²⁶ Jahará kíchó ni tsík'axrjeníxinrá ch'ín Abraham tinhínrá la ko kaín rá chojni tsíkjin ikjín nchexiteyéherá Dios, tinhínrá tí tán tsaáxinrá. ²⁷ Méxra tí sín k'uék'ejó sín chjasin Jerusalén la ko tí sín t'etoan ntiha mé kónoehya sín nkexro tí ch'ín Jesús la ko kuienxínhya sín tí nkehe tsíkjin tí sín k'uéchrónka itén Dios senó tió kjuínchekuáxin sín tí xroon tí nkaxenhen nínko jnkojnko tí yaon t'ok'éhe sín. Mé xíkaha jehe sín tió kjuínchekjasóte sín tí ch'ín Jesús la kjuínchexiteyá sín éxi nixja tí xroon a. ²⁸ Ntá k'uitjahya sín ninkehó jie kíxin chrók'uen ch'án ntá kjónté kjuanchehe sín tí ch'ín Pilato kíxin ts'etoan ch'án kíxin its'en ch'án. ²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajínxin sín tí cuerpo kuènte ch'án tí ntacruz ntá kjuavá sín ch'án. ³⁰ A ntá Dios kjuínchexechón tí jehe ch'án inaá. ³¹ A ntá nchónhya yaon k'uíkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjejónixja sín nkexrí kjuako ch'ín Jesús, tjakohe sín kaín chojni.

³² A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjeníxinni ósé. ³³ Mé xíkaha xiteyá k'uáyéheni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'ín Jesús éxi nixja tí xroon yóxin Salmo, ntáchro kíxin: "Jaha mé xjanna. Janhan mé tjahá kjuachón jie."† ³⁴ Ntá tsíntáchro Dios kíxin sinchexechón ch'án tí ch'ín Jesús kíxin tsóxíkahya cuérpoé ch'án. Mé xíkaha chrónka tí xroon itén Dios. Ntáchro kíxin: "Janhan mé sintaxiteyá tí nkehe chaxín tjanka ch'ín David."‡ ³⁵ La ko í jnko Salmo mé ntáchro xíkahi: "Jaha tsjánjonhya kjuachaxin kíxin tsóxíka tí cuérpoé tí nkexro tjóá kjuít'aha xra."§ ³⁶ A ntá ch'ín David kjuínchexiteyá ch'án éxi tsík'etoan Dios tí kjuák'e ch'án ntá kjónté chr'éxin ik'uén ch'án ntá xravá ch'án xíkaha k'uéxravá tí sín tsík'axrjeníxinni la ntá kjónté la xíka ntøe ch'án. ³⁷ A ntá tí cuérpoé tí nkexro kjuínchexechón Dios la kótjehya. ³⁸ Méxra kíchó ni t'ichjánxin tsonohará kíxin nkexrí tsjin ijjará kíxin Jesús mé k'uenyákonhánrá. ³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetoan ch'ín Moisés kjuachahya kótjuáxin tí jie. ⁴⁰ Chrókóxakonhanrá kíxin chrókuànhyará xíkaha éxi tsíkjin tí sín ósé xíkahi:

⁴¹ Tsjehérá jahara chojni titekakonhya. Ijie la tsochrakonrá kíxin nkehe tsonhen

kíxin janhan Dios tsjákoxiàn ijnko nkehe jie ijnko yaon kjánchó tsítekákonhyará kjónté ókjé nkexro chróchrónka.*

⁴² A ntá ch'ín Pablo la ko tí nkexro k'uájiko ch'án k'uaxrjexín sín nkaxenhen tí nínko, a ntá chrónòa tí sín jehya sín judío tsíkokjéxín, kjuanchia sín kíxin í jnko semana tí yaon t'ok'éhe sín la inaá tsochrónka ch'án éxi tí kjuako ch'án.

⁴³ Ntá tí kjuixin xíkaxin sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuínkáchónki sín éxi tí sín judío la

† 13:33 Salmo 2.7 ‡ 13:34 Isaías 55.3 § 13:35 Salmo 16.10 * 13:41 Habacuc 1.5

xraxinkaon sín Dios, la mé imá kóxrjín_hín sín tí nkehe kjuako ch'ín Pablo la ko ch'ín Bernabé la ntá sákjuíchréhe sín. A ntá jehe sín mé k'ue_oan sín kixin antsí jína chrókuinkáchónki sín tí Dios tjuèhe kaín chojni.

⁴⁴ A ntá í jnko semana kjuèxin, tí yaon t'ok'éhe sín la kójnkotsé kaín tí sín siín tí chjasin ntiha kixin tjinkaon sín tsinhin sín itén Dios. ⁴⁵ A ntá k'uíkon tí sín judío a kixin nchónhya chojni tsíkójnkotsé, ntá imá kóchjinoxín_hín sín, ntá kjuankíxin sín k'uántaxín_hín sín tí ch'ín Pablo. ⁴⁶ A ntá ch'ín Pablo la ko ch'ín Bernabé la íchá antsí má chrakonhya sín nixja sín ntáchro sín kixin:

—T'ichjánx_hín senó jahará judíora chrókuinhín_{ra} itén Dios. Kjánchó tjinkákonhyará tsinhín_{ra} tí nkehe jína tsjanjon kjuachón jnkochrín_hín. A ntá ijie la tsítóhárá tí jahara judíora la ntá jeheni la sátsjini tsjakoheni tí sín jehya judío

⁴⁷ xikaha tsík'etoan Ìnchéni. Ntáchro ch'án kixin:

Janhan ichr'an tí jahará éxí xrohi ts'inkaséyanxín kaín nación

kixin sátsjikoará tí tan tsjanjon kjuachón tsaáxin chojni hasta tí antsí má kjín kjuèxin chjasintajni.†

Mé xikaha k'ue_oan Dios.

⁴⁸ A ntá kuín_hín sín sín jehya sín judío tíha la kjuankíxin kóchéhe sín la ntáchro sín kixin tí tan kuènte Ìnchéni la nkehe jína, ichro sín.

La ntá kjuankíxin kuinkáchónki kaín tí sín tsíkítoenxín sín kixin tsochón_{ta} sín kjuachón jnkochrín_hín. ⁴⁹ Ntá xikaha xrankíxin xrako tí itén Ìnchéni nkuíxín tí chjasin ntiha. ⁵⁰ A ntá tí sín judío nixjehe sín iso chojni chjin jína tjet_oan la ko tí chojni ntoa t'etoan tí chjasin ntiha la ntá kjuínchekónínkaon tí sín a la ntá kjuankíxin sín chrók'óyán sín tí ch'ín Pablo la ko tí ch'ín Bernabé ntá sákjuíxin sín chjasin ntiha. ⁵¹ A ntá jehe sín la kótsjénka sín tokaté sín kixin tsoxénjin tí nche chón_{ta} toté sín. Tíha mé kjuakoxín sín kixin ntoáhya kjuenkayáxin tí sín a. A ntá sákjuí tí jehe sín chjasin Iconio. ⁵² Ntá tí sín tinkáchónki Ìnchéni la imá chéhe sín kixin antsí chón_{ta} sín Nchakuen Dios.

14

Ch'ín Pablo la ko ch'ín Bernabé tjejó chjasin Iconio

¹ Ntá kjuíji ch'ín Pablo la ko ch'ín Bernabé tí chjasin Iconio. Ntá k'uíxenhen sín ninkoe tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín. ² A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kixin tsonínkakonhen sín tí sín tjako. ³ A ntá tí sín tjako la isé kuítóhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjín_hín ch'án tí nkehe nixja sín kixin nkexrí tjuèheni Dios la kjuanjon ch'án kjuachaxin tsjasin sín kjuaxroan. ⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjejá Ìnchéni. ⁵ A ntá tí sín judío la ko tí sín jehya judío mé kjuenkayáxinko sín tí sín t'etoan kixin sinchechrakon sín tí sín tsíkjejá Ìnchéni la ko tsochjéhe sín xro. ⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuíxín ntiha. ⁷ La kjaxin ntaha kjuako sín tí tan jína kuènte Ìnchéni.

Chjéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kixin tsíkókjéxín ch'án xitjahya itji ch'án. ⁹ Méxra ó tjetjaxínkoá ch'án ntá kuín_hín ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a

† 13:47 Isaías 42.6; 49.6

ntá kónohe ch'án kixin tí ch'ín antsí tinkáchónki ch'án Ìnchéni kixin tsitōhe ch'án jína. ¹⁰ Ntá jehe ch'án itsen ntáche ch'án tí ch'ín a kixin:

—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án. ¹¹ Ntá kaín tí sín chjasin ntiha k'uikon sín nkehe kjuích'e ch'ín Pablo, ntá kaín sín k'uíyexin sín nkívee sín Licaonia ntáchro sín kixin:

—Dios tsík'óna chojni mé tsíkixín nkajní tjejókoni ntihi —ichro sín.

¹² La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kixin imá nixja ch'án. ¹³ Ntá tí ch'ín nchat'á kuènte tí dios Júpiter mé chóna ch'án nínko tí t'ixenxínni ikon chjasin ntá kjuíkao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kixin tjinkaon sín chrókjuikosáyehé sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a. ¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankíxin sín kótséchje sín iké sín la sákjuíkjiakjan sín tí chojni síin ntiha la t'óyako sín ntáchro sín kixin:

¹⁵ —¿Kuèté kixin tjejoch'era xíkaha? Jeheni chojni éxí tí jahará. Tí xra ó kuini kixin tsochrónkani itén Dios kixin tsitohérá kaín tí nkehe ninkehó sínkíhya la ntá chrókjanrá chrókuinkachónkirã Dios tjechón. Jehe ch'án mé kjuích'éna ch'án nkajní la ko chjasintajni la ko tí ntayaon la ko kaín tí nkehe síin. ¹⁶ Ntá ósé mé kuítóhe Dios chojni kixin jehó ts'aji sín ntje sín. ¹⁷ Kjonté la Dios tjakoxin ch'án kixin jehe ch'án t'etōan ch'án kixin kjuích'éna ch'án kaín nkehe. Jehe ch'án mé t'etōan kixin ts'aniá chrin ntá ts'enkani la jína ts'óneheni, la jehe ch'án tjanjon ch'án nkehe kixin jnkochrín ts'ixin nkehe sineni, la ko jehe ch'án mé nchechéheni ch'án —mé xíkaha ichro ch'ín Pablo.

¹⁸ Kjonté xíkaha ichro tí sín tjako la naxa tjinkaon tí chojni chrokjuikosáyehé sín chrók'óyán sín koxinta chrókjōkehé sín tí sín tjako.

¹⁹ A ntá ikui iso tí sín judío kjuixín sín chjasin Antioquía la ko chjasin Iconio. Nixjehe sín tí sín ntiha kixin tsitōhe sín tí nkehe jehya jína tjako tí sín a ntá kónínkaon sín ntá kjuankíxin chjéhe sín xro tí ch'ín Pablo. La ntá ách'e ó kjuixin tsík'en ch'án ntá kuinkánkákjen sín ch'án sákjuíko sín ch'án ikon chjasin. ²⁰ Ntá tí sín tinkáchónki Ìnchéni mé kójnkotsé sín k'uantatjen sín tí ch'ín Pablo ntá k'uàya ch'án xíkjan ch'án tí chjasin ntiha ínaá. Ntá tí yaon chr'éxin ntá sákjuíko ch'án tí ch'ín Bernabé chjasin Derbe.

²¹ A ntá ó kjuixin chrónka sín tí tan jína la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía. ²² Nkuíxín tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uētoan sín kixin naxa jína chrókuinkáchónki sín Ìnchéni la ntáchro sín kixin tí ts'ixenhenni tí kjuachaxin kuènte Dios t'ichjánxin tsjasóteni. ²³ A ntá ntiha kjueyá sín chojni jnkójnko nínko kixin ts'etuenhen sín tí sín tinkáchónki Jesús kixin jína ts'ejó sín. Ntá nixjehe sín Dios tí naxa kjónehya sín la ntá ntáche sín Ìnchéni kixin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

²⁴ Ntá chr'éxin k'uátsínka sín estado Pisidia la ntá kjuíji sín estado Panfilia.

²⁵ Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia. ²⁶ Ntá ntiha k'uíxénxín sín ntabarco ntá sákjuí sín chjasin Antioquía tí chjasin k'uénixjehe chojni Dios k'uékjanchia sín kixin Dios tsjinkitsa tí sín a sich'e sín tí xra. La ntá ó kjuixin xiteyá. ²⁷ Ntá tió kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuankíxin chrónka ch'ín Pablo nkexrí kjuínkitsa Dios tí jehe sín la ko nkexrí kjuanjon

Dios kjuachaxin tsjakohē sín tí chojni jehya judío kixin kjaxin sín tsitekaon sín Ìnchéni. ²⁸ A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

¹ A ntá iso chojni tsíkixin sín estado Judea ntá kjuíji sín chjasin Antioquía. Ntá kjuankixin sín kjuakohē sín tí sín kichó ni kixin xitjahya tsaáxin sín tí chóntahya sín tí xroye tsík'etoan ch'ín Moisés. ² Ntá tí ch'ín Pablo la ko tí ch'ín Bernabé la ko tí sín judío kjuankixin kjuanjonkoxín sín kichó sín. Ntá áxri ntá kónoxín kixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsonixjehe sín tí sín apóstol la ko tí sín t'etoan ninko kixin nkexrí tsonhen tí xroye tsík'etoan ch'ín Moisés.

³ Tí sín tinkáchónki Ìnchéni chjasin Antioquía mé ichr'án sín tí sín a ntá k'uátsínka sín estado Fenicia la ko estado Samaria la tinkáchrónka sín kixin nkexrí tí sín ókjé jehya sín judío kjuitoxinhin tí k'uékjenkayáxin sín ntá kuákja sín ntje Dios. Ntá kaín tí sín kichó ni imá kóchéhe sín tí kuínhin sín xikaha.

⁴ La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etoan kuènte ninko mé kjuanjon sín kjuachaxin ts'ejó tí sín a. Ntá chrónka sín kixin Dios imá kjuínkítsa tí jehe sín. ⁵ Ntá iso tí sín fariseo ó tsíkitekaon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyéhē sín kaín tí ley —ichro sín.

⁶ Na ntá kaín tí sín apóstol la ko tí sín t'etoan ninko mé kójnkotsé sín kjuenkayáxin sín nkexrí tsonhen kixin xikaha ichro tí sín judío. ⁷ Ntá imá nixjehe kichó sín ntá k'uínkatjen ch'ín Pedro ntáchro ch'án kixin:

—Jahará kichó ni ó nohará nkexrí kixin senó Dios tsíkjejá tí jeheni kixin tsjakohēni kaín tí sín jehya judío kixin tsinhin sín tí tán jína kuènte Cristo kixin kjaxin jehe sín tsitekaon sín. ⁸ Dios mé ó nohe ch'án nkexéhe kaín asén chojni. Kjuakoxin ch'án kixin k'uáyéhē ch'án tí sín jehya judío kixin chjéhe ch'án sín Nchakuen ch'án éxí tí xikaha k'uáyéhēni tí jeheni. ⁹ Dios la t'ikon kaín chojni jnkokón éxí tí jeheni. Ntá kjuínchetjóá ch'án asén sín kixin ó tinkáchónki sín Ìnchéni. ¹⁰ Méxra ¿nkekuènté titekákonhyará tí nkehe kjuích'e Dios la ntá tétuenhénrá chojni sinchexiteyá sín kaín tí nkehe ixra tsitekaon sín? Ni jeheni la ko ni tí sín tsík'axrjeníxinni kjuachahya sín kjuínchexiteyá sín tíha. ¹¹ Náhí. Ó noheni kixin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro.

¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan k'uíkon tí sín jehya sín judío. ¹³ Kjuixin nixja ch'ín Pablo la ko ch'ín Bernabé ntá kjuankixin nixja ch'ín Jacobo, ntáchro ch'án kixin:

—Kichóni, tinhínrá tí nkehe tsoxrjanka. ¹⁴ Ch'ín Simón Pedro chrónka nkexrí kjuakoxin Dios kixin tjuèhe ch'án tí chojni jehya judío la nkexrí kjuéyá Dios iso tí sín kixin tsinkáchónki sín tí jehe ch'án. ¹⁵ Mé xikaha chaxín chrónka tí xroon tsíkjin tí sín k'uéchrónka itén Dios kixin:

¹⁶ Janhan mé tsokjan chr'éxin.

Tió ts'inka ntá sít'ána nixin tí nchia tsík'oya kuènte David la janhan la tsjínkítsa sín ts'etoan sín.

¹⁷ Kixin kjaxin kaín xín chojni mé tsjeyá sín Ìnchéni

la ko kjaxin kaín xín tí sín ókjé nación mé tí sín kótjuáxin nina mé tsinkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuènte ch'án.* Mé xikaha ichro itén Dios

¹⁹ 'Méxra ntáxrjan kixin tí sín jehya judío la t'ichjánxinhya sinchexiteyá sín kuenté tí ley kixin ó kuítóhe sín tí nkehe kuinkáchónki sín senó kixin jína chrókjueyá sín Dios. ²⁰ Méxra tsochr'énhenni sín ijnko xroon la jehó ts'etuenhenni sín kixin chrókjónehya sín tí nto tsíkjokehé chojni tí nkehe tsíkjanoya la ko chróchóntahya sín chojni chjin ókjé la ko chrókjónehya sín tí nto kuènte ko tsíchrínjinhya ikja va la ko chrókjónehya sín ijnié va. ²¹ A ntá jnkojnko chjasin siín nkexro chrónkaxín tí ley kuènte ch'ín Moisés nchekuáxin sín tí nkaxenhen ninko jnkojnko tí yaon t'ok'éhe sín —ichro ch'ín Jacobo.

²² Ntá kaín tí sín tsíkjeýá Ìnchéni la ko tí sín t'etoan kuènte ninko la ko kaín tí í so sín tinkáchónki Ìnchéni kjueyá sín iso chojni tsochr'án sín chjasin Antioquía, mé kjueyá sín ch'ín Judas, tikítexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetooan ntiha. ²³ Ntá ichr'án sín tí xroon sákjuíko tí sín a ntáchro kixin:

“Jeheni chojni tsíkjeýá Ìnchéni la ko chojni t'etoan kuènte ninko ntihi la nixjahaári tí jahará, kichó ni jehya judío, tjejórá chjasin Antioquía la ko estado Siria la ko estado Cilicia. ²⁴ Ó noheni kixin iso chojni tsíkixin chjaséni kjónté k'uéchóntahya sín kjuachaxin la kjuínchexakonhanrá sín kixin ntáchro sín kixin t'ichjánxin itsará tí xroye tsík'etoan ch'ín Moisés. ²⁵ Ntá jnkokoá kjuenkayáxinni tsjeyáni nkexro tjejó ntihi kixin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kixin imá tjuèheni sín. ²⁶ Tí sín a mé ántosen sín kjónté chrók'uenxín sín kixin tí tinkáchónki sín Ìnchéni Jesucristo. ²⁷ Méxra tsochr'ánni ch'ín Judas la ko ch'ín Silas tsjiji sín kixin jehe sín mé tsonixjahaári sín tsochrónkaxín sín kaín tíha. ²⁸ Jína kixin Nchakuen Dios mé kjuínkítsani kjuenkayáxinni kixin jehya chrók'uetuanhanráni ijnko nkehe imá xra. Náhí. Jehó tí nkehe kánhyó xra t'ichjánxin sinchexiteyará mé t'etoanni: ²⁹ chrókjóntehyará tí iko tsíkjokehé chojni tí nkehe tsíkjanoya la ko kjaxin chrókjóntehyará ijnié tí ko a la ko chrókjóntehyará tí nto kuènte tí ko tsíchrínjinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyará kaín tí nkehe t'etoanni la jína ts'ejorá.” Mé xikaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá kójnkotsé tí sín tinkáchónki Jesús ntá kjuanjón sín tí xroon a. ³¹ Ntá tió kjuínchekuáxin tí sín kichó ni tí xroon a ntá imá kóchéhe sín kixin xikaha chrónka tí xroon a. ³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kichó ni kixin tí nkehe nixja sín. ³³ Ntá ntahó k'uéjó sín iso yaon, ntá tió sátsji sín ntá kaín tí sín tinkáchónki Ìnchéni nixjehe sín jína ntá ó xíkjan sín inaá tí tsíkixin sín tí tjejó tí sín tsíchr'án sín. ³⁴ Kjánchó ch'ín Silas kjuenkayáxin ch'án kixin ntahó chrókuítóhe ch'án. ³⁵ A ntá ch'ín Pablo la ko ch'ín Bernabé kuítóhe sín chjasin Antioquía. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankixin tí yóxin viaje

³⁶ A ntá chr'éxin ch'ín Pablo nixjehe ch'án ch'ín Bernabé. Ntáchro ch'án kixin:

* 15:18 15.16–18 Amós 9.11–12

—Sátsjitsjeheni tí sín kíchó ni kaín tí chjasin kjuakoxinni itén Ìnchéni ósé. Tsjitsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tikítexín sín ch'án Marcos. ³⁸ A ntá ch'ín Pablo kóxrjienhya sátsjiko sín tí ch'ín Marcos a kixin jehe ch'án kuítóhe ch'án sín estado Panfilia la kjuínkítsahya ch'án kixin naxa tsonhen tí xra.† ³⁹ Méxra jnkokoáhya kjuenkayáxin sín la ntá xikayehe sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uíxenhén sín ijnko ntabárcə sákjuí sín nonte Chipre. ⁴⁰ A ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxin sákjuí sín. Tí sín kíchó ni ntiha kjuanchehe sín Dios kixin jína ts'ayakonhen sín ch'án la ntá sákjuí sín. ⁴¹ Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni nínko ntiha.

16

Ch'ín Timoteo sákjuíko ch'án ch'ín Pablo la ko ch'ín Silas

¹ Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehe ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego. ² Ntá tí sín kíchó ni tjejó chjasin Listra la ko chjasin Iconio mé nixja sín kixin jína tí ch'ín Timoteo. ³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'ueṭəon ch'án chrókua tí ch'ín Timoteo a tí xroye kixin tsonínkakonhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego. ⁴ Ntá sákjuí sín la kaín tí chjasin k'uátsínka sín la nixjehe sín tí sín kíchó ni la chrónkaxín sín tí nkehe tsík'əṭəon tí sín apóstol la ko tí sín t'əṭəon kuènte nínko chjasin Jerusalén. ⁵ Ntá tí chojni tinkáchónki Ìnchéni mé antsí má ntoá k'uéjó sín la ko jnkojnko yaon sítinkákótsjé sín.

Xrínahya titàya k'uíkuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia. ⁷ Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha. ⁸ Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon. ⁹ Ntá ijnko tie xrínahya titàya k'uíkuèn ch'ín Pablo ijnko ch'ín estado Macedonia kjuák'exín toté ch'án chrónòda ch'án kixin: “T'átsínka Macedonia tsjínkítsani,” ichro ch'án. ¹⁰ Méxra tíha tsík'ikon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxinni kíchó ni ntiha.]

Ch'ín Pablo la ko ch'ín Silas, k'uéjó sín chjasin Filipos

¹¹ Ntá ntaha chjasin Troas k'uíxénxinni ijnko ntabárcə ntá sákjuíni ntoí ijnko nonte ntsí tinkátaón ntə it'in Samotracia. Ntá tí yaon chr'éxin kjuíjini chjasin Neápolis. ¹² Ntá ntiha sákjuíxinni la kjuíjini chjasin Filipos. Tí chjasin a mé k'uéchóna tí sín romano ósé ntá ijnko chjasin antsí má tjeṭəon tí it'ə tí estado Macedonia. Ntaha mé k'uéjóni iso yaon. ¹³ Ntá tí yaon t'ok'éhe sín ntá k'uaxrjéxinni tí chjasin Filipos ntá sákjuíni ijnko chrínta ntarío mé ntiha kuènhén sín tsojnkotsé sín tsonixjehe sín Dios. Mé ntaha k'uéjótjaxinni la kjuankíxinni kjuakoheni iso chojni chjin tsíkójnkotsé ntiha. ¹⁴ Ntá ijnko tí jehe sín mé ijnko tjan it'in tjan Lidia la tsíkjixín tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína

† 15:38 Hechos 13.13

tjetinhin tjan la Ìnchéni mé kjuínkítsa asén tjan kixin tsinhin tjan jína tí nkehe kjuako ch'ín Pablo. ¹⁵ Ntá jehe tjan la ko kaín tí sín tjejó ntøe tjan mé kuíkite sín. Ntá chrónóehe tjan tí ch'ín Pablo ntáchro tjan kixin:

—Tí chaxín tjátsoan kixin chaxín tinkáchónkini Ìnchéni la jína chrókuítóha ntoéni ntihi —ichro tjan.

Ntá kjónté kuitøheni ntiha.

¹⁶ Ntá ijnko yaon sákjuíni tí nó kuènnen sín nixjeexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí inché tjan kixin xíkaha tónohe tjan. ¹⁷ A ntá tí tjan tjarisoá a kjuankíxin tjan tinkáchréhe tjan tí ch'ín Pablo la ko tí jeheni ntá t'eya tjan ntáchro tjan kixin:

—Tí sín i ch'ehe sín xra Dios nkaya nkajni la tjako sín ijnko ntja jína tsaáxin chojni.

¹⁸ Mé xíkaha kjuích'e tjan itsje yaon. Ntá kóchjinhin ch'ín Pablo la nkátjá ch'án nixjehe ch'án tí nchakuen tí jínahya chóna tí jehe tjan, ntáchro ch'án kixin:

—Kjuachaxién ihnié Jesucristo tétuanhán kixin ts'axrjéxian tí jehe tjan —ichro ch'án.

Ntá tuénxín ó k'uaxrjexín tí nchakuen tí jínahya tí jehe tjan.

¹⁹ Na ntá tí inché tí tjan a mé k'uíkon sín nkehe kónhen tjan la ó nohe sín kixin í tsjachahya sín chichaon kuente tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuíko sín tí tjejó tí síxreé nta sin tje toan. ²⁰ Ntá kjuíkaán sín ntaha tí tjejó tí sín juez la ntáchro sín kixin:

—Tí sín i mé sín judío la imá sítjité sín chjaséni. ²¹ Tjako sín tí nkehe kuènyani tsonoheni la tóxrjienhyani sich'eni kixin jeheni mé chojni romanoni.

²² Kaín tí sín ntiha kónínkakonhen sín tí jehe sín. Ntá tí sín juez mé k'uetøan ts'axrjehe sín iké sín ntá ts'ekoxín sín nta sé. ²³ Ntá tió kjuixin k'uékon sín nchónhya ntá chr'áxehen tí sín a ntøechiso ntá k'uetuènen sín tí ch'ín t'ayakonhen ntøechiso kixin jína chrók'uayakonhen sín tí sín a. ²⁴ Ntá tí ch'ín t'ayakonhen ntøechiso mé k'uáyéhe ch'án kjuachaxin ntá chr'áxehen ch'án tí sín a ijnko cuarto chríka ntøechiso kixin ts'axrjehya sín. Ntá chr'áxehen ch'án toté sín tí nta tjejóxrja la ko chica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuente Dios. La tí sín í so tjejóchjina mé tjejótinhin sín kixin xíkaha tjejóch'e sín tjejótsje sín. ²⁶ Ntá xrínahya tjian kuínkí nonte la kjuínchekinkí kuenté tí xrankíxixín ntøechiso ntá tuénxín kaín tí ntója puerta mé xítjehe la ko k'uánótjen tí chica cadena tsíchróntetoxín kaín tí sín tjejóchjina. ²⁷ Ntá tí ch'ín t'ayakonhen ntøechiso mé k'uàya ch'án. Ntá k'uíkon ch'án kixin síxítjehe tí ntója puerta ntøechiso a. Ntá kuakitsje ch'án chica espada ntá chrók'óyán ch'án asén ch'án kixin kjuenkayáxin ch'án kixin ó kjuixin tsíkinká kaín tí sín síchjina, ichro ch'án. ²⁸ Ntá ch'ín Pablo k'uèya ch'án itsen ntáchro ch'án kixin:

—Náhí kohya nkehe ch'ehé asán kixin kaín ni naxa tjejóni ntihyó —ichro ch'án.

²⁹ Ntá tí ch'ín t'ayakonhen ntøechiso kjuanchia kixin ts'ákjen xrohi ntá k'uíxehen ch'án kuínká ch'án la síxrànká ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas. ³⁰ Ntá tuénxín kuakitsjexín ch'án sín ntiha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

³¹ Ntá kjuátøhe sín ntáchro sín kixin:

—Títekávan Ìnchéni Jesucristo la tsaá jaha la ko tí sín tjejó ntoa.

³² Ntá kjuakohé sín tí jehe ch'án a la ko kaín tí sín tjejó ntoe ch'án ti tan kuènte Ìnchéni. ³³ Na kjónté sítié la tí hora a sákjuíko ch'án sín kjuínchek'íjma ch'án tí tsíchrít'ò sín. Ntá tuénxín jehe ch'án la ko kaín xín sín tjejó ntoe ch'án mé kuíkite sín. ³⁴ Na ntá chr'éxín tí jehe ch'án sákjuíko sín ntoe ch'án. Ntá ntiha kjuanjón ch'án nkehe sine sín. Imá chéhe ch'án la ko kaín tí sín ntoe ch'án kixin ó kuítekaon sín Dios.

³⁵ Ntá kóyaon nchítjen ntá tí sín juez k'uetuēhen sín tí sín policía sátsjitsjehe sín tí ch'ín t'ayakonhen ntoechiso kixin chrókjuanjón ch'án kjuachaxin ts'axrje ch'ín Pablo la ko ch'ín Sílas. ³⁶ Ntá tí ch'ín t'ayakonhen ntoechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etōan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policía kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jie chóntani. Náhí. Kjónté la chr'áxenhenni sín ntoechiso. A ntá ijie la ¿á imó chrókuakitsjeni sín ní? Náhí. Tsjijia ti jehe sín tsakitsjeni sín —ichro ch'án.

³⁸ Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano. ³⁹ A ntá sákjuí tí sín juez ntá chrónòehé sín tí ch'ín Pablo la ko ch'ín Sílas kixin tsonínkakónhya sín kixin xíkaha kónhen sín ntá k'uaxrjexín sín ntiha ntá chrónò a tí sín a sátxixin sín tí chjasin ntiha. ⁴⁰ Ntá ch'ín Pablo la ko ch'ín Sílas tió k'uaxrjexín sín tí ntoechiso ntá kjuíji sín ntoe tí tjan Lidia. Ntá tió kjuixin sákjuítsjehe sín tí sín kíchó ni la kjuínchechéhe sín ntá sákjuíxin sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Sílas la k'uátsínka sín chjasin Anfípólis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío. ² A ntá ch'ín Pablo sákjuí ch'án nínko éxí kuēnhen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios. ³ Kjuako ch'án kixin tí nkexro Cristo mé t'ichjánxin its'en la ko chr'éxín tsoxechón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsinhínra jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Sílas. Ntá kjaxin kuítekaon itsjé tí sín griego xraxínkaon Dios a la ko kjaxin nchónhya chojni chjin tjetoan kuítekaon. ⁵ A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntia. Ntá kaín sín k'uíxité sín la kjuínchexakonhen sín tí sín síin chjasén sín. Ntá itsjé sín k'uíxenhenn sín ntoe ijnko ch'ín it'in Jasón kjueyá sín ch'ín Pablo la ko ch'ín Sílas kixin tjínkaon sín sáchrókjuíkohe sín tí sín a tí sín t'etōan. ⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuínkánkákjen sín sákjuíko sín tí síin tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín i mé kjuínchexakonhen chojni kuenté chjasintajni. La ntá ó kjui sín chjasénni ntihi kjaxin. ⁷ La ntá tí ch'ín Jasón a mé kjuanjón ch'án kjuachaxin kixin tí sín a mé ts'ejó sín ntoe ch'án. Kaín sín titekakonhya sín tí ley kuènte tí ch'ín romano t'etōan. Ntáchro sín kixin itjen í jnko nkexro antsí má t'etōan, ntá tíha mé Jesús —ichro sín.

⁸ Ntá tió kuínhin kaín tí sín tsíkójnksé la ko tí síxreé ntá k'uíxité sín kónínkaon sín. ⁹ Ntá ch'ín Jasón la ko tí sín tjejóko ch'án kjuenka sín ntá tí síxreé kuítóhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kichó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uíxenhén sín tí nínkoé tí sín judío. ¹¹ A ntá tí sín judío ntiha la antsí má jína asén sín, ntá tí sín chjasin Tesalónica la náhi. Antsí má kóxrjínhin sín tsinhin sín tí itén Dios la jnkoinko yaon kjuínchekuáxin sín tí xroon chóna itén Dios kixin tsonhe sín á chaxín ntoá xíkaha tí ntáchro tí sín a. ¹² Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetooan mé kuítekaon la ko kjaxin tí chojni ntoa. ¹³ A ntá tí sín judío chjasin Tesalónica konohe sín kixin ch'ín Pablo mé kjuakoxín itén Dios chjasin Berea inaá. Ntá sákjuí sín ntiha a ntá kjuínchekóninkaon tí sín a. ¹⁴ A ntá tí sín kichó ni tinkáchónki Inchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítóhe sín tí chjasin Berea. ¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uetooan ch'ín Pablo kixin tsochrónka sín kixin tjoka chrókóxonhen tí ch'ín Silas la ko tí ch'ín Timoteo tsjiji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kixin k'uíkon ch'án kixin tí chjasin ntiha siín nchónhya tí nkehe tsíkjanoya. ¹⁷ Ntá tí nínko ntiha kjuakohe ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakoxén ch'án tí chojni siín ntiha. ¹⁸ La iso tí sín kjuínchekuáxin tí xroon kuénte tí chojni it'in epicúreo la ko iso tí sín kjuínchekuáxin tí xroon kuénte tí chojni it'in estoico kjuankixin nixjehe sín tí ch'ín Pablo. Iso sín ntáchro sín kixin:

—¿Nkekuénté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'án kuénte í jnko dios.

Mé xíkaha ichro sín kixin kjuako ch'ín Pablo tí tán jína kuénte Jesús la ko kjuako ch'án kixin Jesús kjónté k'uén ntá xechón. ¹⁹ Ntá sákjuíko sín ch'ín Pablo ijnko tjo it'in Areópago. Ntiha mé kuénhen sín tójnksé sín kixin tjenkayáxixín sín. Ntá nixjehe sín tí ch'ín Pablo, ntáchro sín kixin:

—Tjinkaonni tsochrónka tí nkehe nixin kjuíkoa. ²⁰ Itsjé tí nkehe ókjé tjetjákua la tjinkaonni tsonoheni nkehe t'axrjexín kaín tíha —ichro sín.

²¹ Ntá kaín tí sín chjasin Atenas la ko tí sín tsíkjixin ókjé tjejó ntiha mé tóxrjénhya sín í jnko xra, jehí tóxrjínhin sín chrókuinhin sín la ko chrónixja sín ijnko nkehe nixin.

²² Ntá ch'ín Pablo k'uínkatjen ch'án kjuák'exín toté ch'án tí siín tí jehe sín chrítaón tí Tjo Areópago. Ntá ntáchro ch'án kixin:

—Jahará tjejorá chjasin Atenas tinhírrá. Janhan ó k'uíkuan kixin jahará la itsjé dios tinkachónkirá. ²³ Ntá tí kjuak'é ntiha k'uájia la k'uíkuan itsjé tí nketí tjásixírrá culto ntá k'uitja ijnko altar ts'ínixín kixin: “Ntihi xraxinkakonxínni ijnko Dios naxa chónhyani”. Méxra tí Dios xráxinkáonrá kjónté naxa chonhyará mé tí Dios a mé tjákohará.

²⁴ Tí Dios mé kjuích'éna ch'án chjasintajni la ko kaín nkehe siín chjasintajni. Jehe ch'án mé inché nkajní la ko chjasintajni. La tjexenhya ch'án ijnko nínko tsíkjich'énoxín chojni tja. ²⁵ La t'ichjánxienhya ch'án kixin chojni chrókjuinkitsa

tí jehe ch'án kixin jehe ch'án mé chjéhe kjuachón kaín chojni la ko tjanjon ch'án xrinto la ko kaín nkehe sín.

²⁶ 'Kaín tí nación k'uaxrjenixin jnkokoá chojni kixin chrók'uejó sín nkuíxin chjasintajni. Kjaxin chrónka Dios nkesá la ko nketí ts'ejó chojni. ²⁷ Méxra jeheni t'ichjánxin tsjeyáni Dios kixin ntá tsienxinni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án. ²⁸ Jehe ch'án tjejóchónxinni ch'án la ko nchekinkíni ch'án la jehe ch'án t'ayakonhenni ch'án. Mé xikaha tsintáchro jnko ch'ín chjasánrá ósé kixin: "Jeheni mé naxa kjéhya Dios." ²⁹ Jeheni mé naxa kjéhyani Dios méxra xitjahya tsjenkayáxinni kixin sich'énani Dios chica oro o chica plata o xro kixin éxí tsíkjenkayáxin chojni kixin sich'éna sín dios kuènte sín. ³⁰ Senó Dios kónínkakhonhya ch'án kixin ó nohe ch'án kixin naxa chónhya sín ch'án. Ntá ijie t'etuenhen Dios kaín xín chojni sín chjasintajni tsokjan sín la tsinkáchónki sín tí jehe ch'án. ³¹ Dios tsíkjayá ijnko yaon sinchekitoexín ijíé chojni chjasintajni. Tsíkjayá ch'án ijnko chojni la kjuakoxin kaín kjuachaxin kixin tí nkexro kjónté tsík'en la xechón inaá —ichro ch'ín Pablo.

³² Na ntá tió kuínhin sín kixin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kixin:

—Chr'éxin tsinhinni inaá tí nkehe ntáchrúa —ichro sín.

³³ Ntá ch'ín Pablo kuitohe ch'án tí jehe sín. ³⁴ Na ntá iso sín kjuíchréhe sín ch'ín Pablo la kjuankixin tinkáchónki sín Ìnchéni. Ijnko tí sín tinkáchónki a mé it'in ch'án Dionisio mé ijnko tí sóxreé kjuínchekitoexín ijíé chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankixin sín tinkáchónki sín Ìnchéni.

18

Sákjuí ch'ín Pablo chjasin Corinto

¹ Ntá kjuixin tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto. ² Ntiha mé xéta ch'án ijnko ch'ín judío it'in Aquila. Jehe ch'án mé tsíkjixin ch'án estado Ponto la séhya jehe ch'án la ko ichjién ch'án Priscila mé kjuíxin sín nación Italia kixin t'ichjánxin ts'axrjexín sín ntiha kixin tí ch'ín t'etóan mé it'in Claudio k'uetóan ch'án kixin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín. ³ Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuitoeko kichó sín kixin jnkokoá sich'e sín tí xra a. ⁴ Ntá jnkojnko tí yaon t'ok'éhe sín sákjuí ch'ín Pablo tí nínko nixjehe ch'án tí sín judío la ko tí sín jehya judío kixin tjinkaon ch'án kixin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuíxin sín estado Macedonia ntá ch'ín Pablo kjuák'e xra ó kjuako ch'án itén Dios kixin tsonohe tí sín judío kixin Jesús mé tí nkexro Cristo. ⁶ Ntá tí sín judío mé kjuankixin kónínkakhonhen sín tí ch'ín Pablo la imá k'uántaxínhin sín ch'án. Ntá jehe ch'án k'ótsjenka ch'án iké ch'án kixin kjuakoxin ch'án kixin xikaha tsjasóte sín. Ntá ntáchro ch'án kixin:

—A ntá ijie la jahará kjuéyará tí jié ts'itjayanxínrá. A ntá janhan la í chontahya jié kixin ó kjuákochará tí tán jína, a ntá kuítékákonhyará. A ntá ijie la íchá jína sátsjia tsjákoḥa tí sín jehya judío —ichro ch'án.

⁷ Ntá k'uaxrjexín ch'án nínko ntá sákjuí ch'án ntóe ijnko chojni mé it'in Justo mé jehe ch'án xraxinkaon ch'án Dios. Ntóe ch'án mé chjinaxón nínko. ⁸ Ntá ch'ín Crispo, ijnko nkexro t'etóan kuènte nínko, la ko kaín tí sín tjejó ntóe ch'án, mé kjuankixin sín kuítekaon sín Ìnchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuankixin sín kuítekaon sín Ìnchéni

la kuíkite sín. ⁹ Ntá ijnko tie titàya k'uíkuèn ch'ín Pablo Ìnchéni nixjehe ch'án ntáchro kixin:

—Chrakonhya tjàkua itan kuèntana. Tìtoéhya tsochronka ¹⁰ kixin janhan tzejóko kichó ni kixin ninkexró kohya nkehe sit'aha. Kixin janhan la chonta itsjé chojni tí chjasin ntihi tinkáchónki tí janhan.

¹¹ Méxra ch'ín Pablo mé kuítóhe ch'án ijnko nánó ko t'o ntiha chjasin Corinto, kjuakohe ch'án sín itén Dios.

¹² A ntá tí yaon k'uetōan ch'ín Galión estado Acaya, ntá itsjé tí sín judío kóninkakonhen sín tí ch'ín Pablo. Ntá itsé sín ch'án sákjuiko sín ch'án tí tzejó tí sín t'etōan. ¹³ A ntá ntáche sín tí ch'ín t'etōan kixin:

—A ntá tí nkexro i ixri ch'án tjachroe ch'án chojni kixin ókjé nkexrí chrókuinkáchónki sín Dios la ko tsitekakonhya sín tí nkehe t'etōan tí ley.

¹⁴ Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kixin:

—Tí chaxín ijnko jje jje kjuasin tí ch'ín i ntá kjónté chrókuinhan tí nkehe ntáchrórà jahará judíorá. ¹⁵ A ntá jehi tjanjónxinrá tí nkehe nixjará la ko ihnié chojni la ko tí ley tinkachónkirá. Méxra jahórá chrókuinchekitōexínrá tíha kixin janhan tjínkakonhya ts'óna juez sintakitoaxian kuènte tí nkehe a —ichro ch'án.

¹⁶ Ntá k'uetōan ch'án kixin sátsjixín sín ntiha. ¹⁷ Ntá tí sín griego la kónínkaon sín la itsé sín tí ch'ín Sóstenes tí ch'ín t'etōan kuènte tí nínko judío, la ntahó kjuatexín sín ch'án. Jehe ch'ín Galión a la mé kjónté k'uíkon ch'án la ántosén ch'án.

Ch'ín Pablo xíkjan ch'án chjasin Antioquía ntá sákjuí ch'án nixin viaje

¹⁸ A ntá ch'ín Pablo kuítóhe ch'án chjasin Corinto itsjé yaon ntá nixjehe ch'án tí sín kichó ni ntiha ntá k'uíxenhén ch'án ntabárcō sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxa k'uíxenhya ch'án ntabárcō ínaá la ikjín ch'án mòlōé kixin xíkaha kjuakoxín ch'án kixin kjuínchexiteyá ch'án tí nkehe chrónka ch'án.

¹⁹ Ntá tío kjuíji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sín judío tsíkójnkotsé ntiha. ²⁰ Ntá jehe sín chrónòa sín kixin chrókuítóhe ch'án isé ntiha, kjánchó jehe ch'án la chrohya ch'án. ²¹ Ntá tuénxín nixjehe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan ínaá tsotsjahá tí jahará tí naxa tjinkaon Dios —ichro ch'án.

Ntá kuítóhe ch'án sín ntá k'uíxenhén ch'án ntabárcō sákjuíxin ch'án chjasin Éfeso. ²² Ntá tío kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Ìnchéni ntiha. Ntá tuénxín xíkjan ch'án chjasin Antioquía. ²³ Ntá kuítóhe ch'án ntiha itsjé yaon ntá xíkji ch'án ínaá ntá xík'atsínka ch'án itsjé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ijnko ch'ín judío it'in Apolos ikui chjasin Éfeso mé tsíkjiixin ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios. ²⁵ Jehe ch'án ó xrakohe ch'án ntje Ìnchéni ntá imá tóxrjínhín ch'án nixja ch'án la ko tsjako jína kuènte ch'ín Jesús. Kjánchó jehó nohe ch'án nkexrí kuíkite chojni ch'ín Juan. ²⁶ A ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tío kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naxa noehya ch'án kuènte ntje Dios. ²⁷ Ntá

tjinkaon ch'ín Apolos sátsji ch'án estado Acaya. Ntá tí sín kíchó ni kjuínkítsa sín ch'án la ikjin sín ijnko xroon chr'énhen sín tí sín tinkáchónki Ìnchéni tjejó ntiha kíxin jína tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohē ch'án tí sín tsíkjinkítsa Dios tsíkitekaoon sín ch'án. ²⁸ Ntá kjuakohē sín ch'án kaín chojni kíxin ntoáhya ch'e tí sín judío, la xitjahya tsontácho sín náhí. Kjuakohē ch'án sín kíxin tí xroon itén Dios chrónka kíxin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxá itjen ch'ín Apolos tí chjasin Corinto ntá ch'ín Pablo k'uat sínka ch'án nchónhya chjasin chrík'á jna la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios. ² Ntá kjuanchankíhi ch'án sín kíxin:

—¿Á k'uayéhérá Nchakuen Dios tió kuinkachónkirá Ìnchéni? —ichro ch'án. Ntá kjuátehe sín kíxin:

—Náhí, kíenhyani á tjen Nchakuen Dios —ichro sín.

³ Ntá kjuanchankí ch'ín Pablo kíxin:

—¿Nkexro kjuachaxién kuíkítará? —ichro ch'án.

Ntá kjuátehe sín kíxin:

—Éxí kjuako ch'ín Juan kuíkiteni —ichro sín.

⁴ Ntá ntácho ch'ín Pablo kíxin:

—Ch'ín Juan mé kuíkíte ch'án chojni kíxin chrókjan sín chrókuinkáchónki sín Dios la ko kjuako ch'án kíxin chrókuitekaoon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhin sín xikaha ntá kuíkíte sín kjuachaxién ihnié Ìnchéni Jesús. ⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uáyehē sín ntá kjuankíxin sín nixja sín itsje nkíva ókjé la ko kjuankíxin sín kjuako sín tí nkehe kjuanjon Dios. ⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án njnko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuènte Dios. ⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jína kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoxin ch'án kaín yaon. ¹⁰ Mé xikaha kjuák'e ch'án kjuako ch'án iyó nánó, ntá kaín tí sín k'uéjó ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío. ¹¹ Ntá Dios antsí má kjuakoxin kjuaxroan jíe kíxin tí nixja ch'ín Pablo. ¹² Ntá itsje chojni kjuikao sín pañitoé sín la ko iké sín kuákóxin ch'ín Pablo ntá sákjuíko sín kjuínchekakóxin sín tí sín níhi ntá kuítóhe sín jína la ko kjaxin nchakuen tí jínahya k'uaxrjexin tí jehe sín.

¹³ A ntá iso tí sín judío ixri sín ntácho sín tónohe sín tsakitsje sín nchakuen tí jínahya ch'iyehe sín chojni mé tjinkaon sín tí kjuachaxién ihnié Jesús. La ntá ntáche sín tí nchakuen tí jínahya kíxin:

—Kjuachaxién ihnié tí Jesús tjako tí ch'ín Pablo t'etoanxínni kíxin jaha nchakuen jínahya sátxíxian ntihi —ichro sín.

¹⁴ Mé xikaha k'uékjich'e tí yato xjeen ijnko ch'ín judío it'in Esceva mé ijnko nchat'á t'etoan. ¹⁵ Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntácho kíxin:

—Chóxinni nkexro ch'ín Jesús la ko ó noheni nkexro ch'ín Pablo. **A** ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuíncheníhi ch'án kaín sín la imá kjeté sín. Ntá k'uaxrjexín sín ntōe sín tjóchín sín la ko síchrít'ō cuérpōé sín. ¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsikónhen la imá chrakon sín. Imá jié tí kjuachaxin ihnié Ìnchéni Jesús, ichro sín.

¹⁸ Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya. ¹⁹ Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xra ntá kjuaka sín tí libro a la k'uíkon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín. ²⁰ Ntá tí itén Ìnchéni sítinkák'ánkí la tjakoxin kixin chaxin chóna kjuachaxin.

²¹ Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma. ²² Ntá ichr'án ch'án iyó tí sín tjinkítsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuítóhe ch'án estado Asia iso yaon.

Kónínkaon k'uixité chojni chjasin Éfeso

²³ Ntá itsjé chojni chjasin Éfeso kónínkaon sín la k'uixité sín kixin kóxrjiénhya sín tí itén Ìnchéni. ²⁴ Kixin ntiha mé itjen ijnko ch'ín it'in ch'án Demetrio. Kjuích'éna ch'án nkehe chica plata tsjehe éxí njnko kuènte tí dios Diana la nchónhya chichaon kjuacha ch'án la ko tí sín kjuích'eko ch'án xra. ²⁵ Ntá kójnkotséko sín í so sín jnkokón tí xra ch'e sín. Ntá ntáchro ch'án kixin:

—Jahará nohará kixin tí xra ch'eni la tjachani jína la náxrjón tjejóni. ²⁶ Kjánchó ó k'uíkonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsíkjanoya mé jehya Dios. Kjánchó jehya chjasin Éfeso ó. Náhi, nkuíxín estado Asia kuítekaon chojni. ²⁷ Imá tóxakonhenni kixin tí xra ch'eni ts'itjayan la kjaxin tóxakonhenni tsontáchro sín kixin chónkó tí njnkōe tí dios Diana imá jié la ko ts'itjayan tí kjuachaxin kuènte tjan. Ntá í tsitekakonhya sín tí kjuachaxin kuènte tjan nkuíxín estado Asia la ko kuenté chjasintajni —ichro ch'ín Demetrio.

²⁸ Ntá tí kuínhin sín xikaha la imá kónínkaon sín ntá k'uèya sín ntáchro sín kixin:

—Ts'itjayanhya tí dios Diana kuènte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'ín Gayo la ko tí ch'ín Aristarco mé iyó sín tsíkjiexín sín Macedonia. Ntá kuinkánkákjen sín kuikao sín tí nchia jié tójnkotséxin sín xráxín. ³⁰ Ntá ch'ín Pablo tjinkaon ch'án chrók'uixenhen ch'án tí nchia kixin tsonixjehe ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a. ³¹ Kjaxin iso tí síxreé kuènte tí estado Asia mé chóxin sín ch'ín Pablo, ntá k'ueŋoan sín kixin tsochénka chojni tí ch'ín Pablo kixin chrókjuiatéhya ch'án tí sín sín ntiha. ³² **A** ntá iso tí sín tsíkójnkotsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xra tsíkójnkotséxin sín kixin nínkaon sín. ³³ La iso sín judío chénka sín ijnko ch'ín it'in Alejandro nkerí xra kjuixin sín kixin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kixin tsotání

sín ntá tsonixjaxin ch'án tí sín judío tsinhin kaín chojni. ³⁴ Ntá tió kjuátsōan tí sín tsíkójnkotsé kixin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyanhya tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uetōan ch'án tsotáni sín. Ntá ntáchro ch'án kixin:

—Chojni chjasén Éfeso tinhínrá. Kuenté chjasintajni nohe sín kixin tí sín chjasin ntihi mé t'ayakonhen sín tí nínko kuènte tí dios Diana. Tí retrato kuènte tjan mé tsíkixin nkaya nkajní. ³⁶ Kohya nkexro tsontáchro kixin chaxínhya tíha. Méxra tánírá. Tjenkayáxinrá jína nkehe chrókjuich'erá. ³⁷ Jahará kjuíkoará tí sín a ntihi la kjánchó k'uántaxíenhya sín tí nínkoeni la ko k'uántaxíenhya sín tí tjan santo kuénténi. ³⁸ Méxra ch'ín Demetrio la ko tí sín ch'eko ch'án xra la tí tjanchia sín jie jnkójn nkexro la síin juez sinchekitōexín. Méxra tsochrónka sín tí tjen tí ch'ín juez kixin jnkójnko sín la chrókuítōexín tí jie chóna sín. ³⁹ Ntá tí síin ijnko nkehe tsjanchará ntá t'ichjánxin tsojnkotsérá la ntoá chrókuítōexín. ⁴⁰ Tóxakonhenni kixin kjá tí sín t'etōan ts'ekani sín jie kixin jehya jína k'uíxiténi kóninkaonni. Noehyani nkehe tsjatēheni kixin tí tsjanchankí sín nkekuènte k'uíxiténi, tsixro sín.

⁴¹ La ntá k'uetōan ch'án kixin sátsji sín kixin ó kjuixin tí kójnkotsé sín.

20

Sátsji ch'ín Pablo estado Macedonia la ko estado Grecia

¹ Ntá ti kjuixin k'uíxité sín, a ntá ch'ín Pablo k'uíyehē kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjehē kíchó sín ntá sáxíkji ch'án nó estado Macedonia. ² Ntá nkuíxín k'uátsínka ch'án la kjuínchechéhe ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuíji ch'án estado Grecia. ³ Ntiha kuítóhe ch'án iní nitjó ntá chrók'uixenhen ch'án ijnko ntabárcō ntá sáchrókjuí ch'án estado Siria. Ntá kónohe ch'án kixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia. ⁴ Ntá tí sín sákjuíko ch'ín Pablo mé tí ch'ín Sópater mé jehe ch'án tsíkjixin ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkjixin sín chjasin Tesalónica, la ko ch'ín Gayo tsíkjixin ch'án chjasin Derbe, la ko kjaxin sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkjixin sín estado Asia. ⁵ Ntá tí sín kíchó ni a mé kuítónxin sín ntia ntá tjejóchónhen sín tí jeheni chjasin Troas. ⁶ Kjuixin k'uátsínka tí kia tió kjóne sín niotja chóntahya tí xroan t'ánkixin niotja, ntá k'uíxenhenni ijnko ntabárcō k'uaxrjexínni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuítónxin sín ntia. A ntá ntiha kuítóheni yato yaon.

Ch'ín Pablo sákjuí chjasin Troas

⁷ Ntá tí yaon xrankíxixín semana ntá kójnkotséni kixin tsochrít'ō niotja tsoxraxinkakonxínni Ìnchéni. Ntá ch'ín Pablo nixjehē ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxin, ntá antsí má sé tí nkehe chrónka ch'án la naxa tjenixja ch'án k'áxrótjen. ⁸ Tí tsíkójnkotsé sín a mé ijnko piso noi la ntiha mé síche nchónhya xrohi. ⁹ Ntá ntiha itjen ijnko ch'ín ntasoá it'in ch'án Eutico mé tjetjaxin ch'án chrítaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkíhi ch'án kotáchrin. A ntá xrínahya tsík'ajua ch'án ntá tsík'anótjenxin ch'án tí ventana tí níxin piso ntiha ntá sákjuíkjatsen sín ch'án la ó tsíkjixin tsík'en ch'án.

10 Ntá ch'ín Pablo k'uínkajin ch'án ntá kjuítsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kíchó ni kixin:

—Chrakonhyará tsík'enhya ch'án, tjechón ch'án —ichro ch'an.

11 Ntá ch'ín Pablo k'uit'ótjen ch'án inaá tí k'uínkajinxin ch'án kixin ntiha ts'óxikayehe ch'án niotja sine sín tsoxraxinkakonxin sín Ìnchéni. Ntá naxa tjenixja ch'án hasta k'uínkaséyan a ntá sákjuí ch'án. 12 Ntá tí ch'ín ntasoá tsík'anótjen sákjuiko sín la tjechón ch'án kohya nkehe xéhe ch'án ntá kaín sín imá kóchéhe sín.

Sákjuixin ch'ín Pablo chjasin Troas kjuíji ch'án chjasin Mileto

13 Jeheni mé kuítónxinni ntia saoxín la k'uíxenhenni ijnko ntabárcō sákjuíni nó chjasin Asón kixin ntiha tsoxetani ch'ín Pablo éxí tsíntáchro ch'án kixin tjinkaon ch'án sátsjixín ch'án toté ch'án ntiha. 14 Ntá ó xetani tí jehe ch'án chjasin Asón ntá k'uíxenhén ch'án tí ntabárcō kjaxin ch'án ntá sákjuíkoni ch'án nó chjasin Mitilene. 15 Ntá tí sákjuixinni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjuíjini chjasin Samos. Ntá inaá k'uíxenhenni tí ntabárcō ntá sákjuíni chjasin Trogilio ntá ntiha k'ok'éheni. Ntá xík'ixenhenni ntabárcō inaá ntá tí yaon chr'éxin kjuíjini chjasin Mileto. 16 Mé xíkaha kjuích'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuíji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

Nixjehe ch'ín Pablo tí sín t'etuenhen ninko chjasin Éfeso

17 Tí itjen ch'ín Pablo tí chjasin Mileto k'uíyehé ch'án tí sín t'etuenhen tí ninko chjasin Éfeso. 18 Ntá tió kui sín ntá ntáchro ch'án kixin:

—Tí jahará la ó nohará nkexrí kjuak'é la ko kjuákua desde tí yaon xrankíxixín k'uinka estado Asia. 19 Ó nohará kixin kaín tí yaon k'uéjóni la kaín asenná kjuít'aha xra Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyánna sín. 20 Janhan la kuítóahya kjuákua kaín tí nkehe jina t'ichjánxin tsonohará. Mé xíkaha kjuákua tió kójnkotsérá la ko xíkaha kjuíkjákuaxian jnkojnko ntōará. 21 Kjuákoha kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo. 22 Ntá ijie sátsjiyá chjasin Jerusalén kixin Nchakuen Dios k'uétuanna la í nonahya nkehe tsonna ntiha. 23 Ntá jehó nòna kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena. 24 Kaín tíha la tóxakonahya. Kjonté chrókjuasótexián la ninkehó sínkíhyana la janhan la chàna kixin tí xra chonta la chrókjuíntaxín la chrókjuíntaxiteyá tí xra chjina Ìnchéni Jesús kixin tsjàkua tí tan jina nkexrí tjuèhe Dios chojni.

25 'Ntá jie ó nòna kixin tí jahará kjuákohará kjuachaxin kuènte Dios la nijnkorá ts'ikonhyará tí janhan inaá. 26 Méxra tinhínra ijie kixin í jehya jiena kixin jnkojínra chrók'uitjayanra. 27 Kixin ó kjuákua kaín tí nkehe tjinkaon Dios kixin tsonohará la í t'itjayanhya ninkehó. 28 Méxra xráxinkáonra ts'ejorá jnkojina la ts'ayakonhénra kaín tí sín tinkáchónki Ìnchéni kixin Nchakuen Dios mé tjáhará tí xra pastor kixin ts'ayakonhénra tí sín kuènte tí ninkōe ch'án k'uénaxín ch'án tí ijnié ch'án. 29 Ó nòna tió sátsjia ntá itsji í so chojni éxí kolóbo jiehe tsotjinkaon sinchek'itjayan tí sín tinkáchónki Ìnchéni. 30 La ntá kjonté jahará la isorá tjejorá ntihi tsjankíxinra tsjàkorá kjuach'ia chrínkí chrókjuákohérá kichuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya. 31 Méxra chróxráxinkáonra kixin chjina iní

nánó kjuak'é kjuákohará nchakotjin la ko tie la kuitoahya kjuintaxraxinkávan hasta kjuíncheníhi asenná nixjahará jnkojnko tí jahará.

³² 'A nta jie la jahará kichó ni tjetjáncháha Dios kixin t'ayakuanxínra ch'án tí itén ch'án kixin tjuahará ch'án. Jehe ch'án imá chóna kjuachaxin tsjinkitsará ntá ts'ayéhérá kaín tí nkehe tjinkaon ch'án tsochjéhe ch'án kaín tí chojni tsikótjóa. ³³ Janhan mé kjuakéhya asenná chichakoen chojni o iké jnkojín chojni. ³⁴ Náhí. Jahará ó nohará jína kixin janhan na mé tjaná kjuít'axián xra kjuácha k'uénaxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian. ³⁵ Méxra kjuàkuaxínra xikaha sich'erá xra kixin jína tsjinkitsará tí chojni chónahya. Xráxinkáonra kixin tsintáchro Ìnchéni Jesús kixin: "Ántsi tsochéheni kixin tí nkehe chrókjuanjonni, a ntá kánhyó tsochéheni kixin tí nkehe chrók'uáyéheni."

³⁶ Ntá kjuixin ntáchro ch'ín Pablo xikaha ntá jehe ch'an la ko kaín sin k'uéjoxin toch'in sín ntá nixjehé sín Dios. ³⁷ Ntá kaín sín tsjánka sín la ko kjóa sín ch'án la ko tséhe sín tja ch'an. ³⁸ Imá k'uává sín kixin chrónka ch'án kixin í ts'ikonhya sín ch'án inaá. Ntá sákjuíkotoxin sín ch'án nó tí tjen tí ntabarco sátsjiko ch'án.

21

Sákjuí tí ch'ín Pablo nó chjasin Jerusalén

¹ A ntá tió kuitoheni tí sín kichó ni ntá k'uixenhenni ntabarco la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara. ² Tí chjasin Pátara la mé ntiha k'uitjani ijnko ntabarco sátsji nó estado Fenicia. Ntá k'uixenhenni tí ntabarco a ntá sákjuíni. ³ Ntá tió k'uátsínkani la k'uíkoni tí nonte Chipre itjani ikjon kuitohe ntá k'uatsínkani estado Siria. Ntá tí ntabarco la ts'atsínka tsitohe tí nkehe tjinká tí puerto chjasin Tiro, la jeheni la nachrohe sákjuíni tí chjasin a. ⁴ Ntá ntiha k'uitjani tí sín tinkáchónki Ìnchéni a ntá ntiha kuitohékoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'ín Pablo kixin sáchrókjuihya ch'án chjasin Jerusalén. ⁵ Ntá kjuixin k'uátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíkotoxiníni tí k'uaxrjentani ikon chjasin ntá sákjuíni chrínta ntayaon. K'uéjoxinni toch'inni nixjeheni Dios ⁶ ntá tuénxín nixjeheni sín jnkojína ntá tséhe tja kichó ni. Ntá k'uixenhenni tí ntabarco, a ntá jehe sín ikjan sín ntoe sín.

⁷ Ntahó chjasin Tiro kjuixixín tí k'uixenhenni tí ntabarco ntá kjuíjini chjasin Tolemaida. Ntiha kjuínixjeheni tí sín kichó ni tinkáchónki Ìnchéni. Ntá ntiha k'uéjókoni sín ijnko yaon. ⁸ Ntá tí yaon chr'éxin sákjuíxinni ntiha ntá kjuíjini chjasin Cesarea. Ntá ntiha sákjuíni ntoe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yatoxin tjinkitsa tí sín kjueyá Ìnchéni. A ntá jeheni mé kuitoheni ntiha. ⁹ Tí ch'ín Felipe a mé chóna ch'án noó xjeen ch'án chjin naxa tóteehya sín. Tí xjeen ch'án a mé chrónkaxín sín tí itén Dios. ¹⁰ Ntá ntaha k'uéjókoni sín itsjé yaon ntá ikjuí ijnko ch'ín nixja itén Dios it'ín Agabo, tsíkjin ch'án estado Judea. ¹¹ Ikjuí ch'án kjuinixjehé ch'án tí jeheni la ntá kuákja ch'án tí tjoa t'ínkat'óxin ch'ín Pablo na ntá kjuínchentetoxín toté ch'án la ko itja ch'án ntá ntáchro ch'án kixin:

—Tí Nchakuen Dios mé ntáchro kixin mé xikaha chjasin Jerusalén tí sín judío sinchenteto sín ìnché tí tjoa sinchek'áyéhe sín ch'án tí sín jehya judío —ichro ch'án.

12 Ntá kjuixin kuínhinni tíha ntá jeheni la ko tí sín chjasin Cesarea chrónóeheni tí ch'ín Pablo kixin sáchrókjuihya ch'án tí chjasin Jerusalén. 13 Ntá kjuátehe ch'ín Pablo kixin:

—¿Nkekuènté tsjankará la ko nkekuènté nchek'ávaráni? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxian chjasin Jerusalén tí tinkáchónkia Ìnchéni —ichro ch'án.

14 Ntá kjuachahyani nixjeheni ch'án ntá kuítóheni ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

15 Ntá kjuixin tíha ntá kóyaxínhinni ntá sákjuíni nó chjasin Jerusalén. 16 Ntá sákjuíkoni iso tí sín tinkáchónki Ìnchéni tsíkijixin chjasin Cesarea. Sákjuíkoni sín ntóe ijnko ch'ín tsíkijixin Chipre it'in ch'án Mnasón. Jehe ch'án mé óse tinkáchónki ch'án Ìnchéni. Ntá kjuanjon ch'án nketí kuítóheni.

Ch'ín Pablo sákjuítsjehe tí ch'ín Jacobo

17 Tió kjuíjini chjasin Jerusalén ntá tí sín kichó ni tinkáchónki Ìnchéni mé kjuanjon sín kjuachaxin k'uéjóni la chéhe sín. 18 Ntá tí yaon chr'éxin ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etóan kuènte nínko. 19 Ntá ch'ín Pablo kjuixin nixjehe ch'án sín ntá tuénxín chrónka ch'án kaín tí xra kjuích'e Dios tió kjuakohe ch'án tí sín jehya sín judío. 20 Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kichóni, jaha k'uíkuan kixin siín itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxin tsítóehyani tí ley. 21 Ntá tsíkinhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uetóan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxi k'uékinkáchónkini óse. 22 ¿Ntá nkehe chrókjuich'eni? Kixin tió tsinhin sín kixin kjuihá la tsojnkotsé nchónhya sín. 23 Méxra íchá jína jaha sinchexiteyá tíhi. Ntíhi tjejó noó sín t'ichjánxin sinchexiteyá sín tí nkehe chénka sín Dios. 24 Jaha sáchrókjuíkoa sín la chrókótjóá jaha la ko jehe sín. La ko kjaxin chrókjuènka tsokjín sín ntá tsonoexín tí sín judío kixin chaxínhya tí nkehe tsíkinhin sín la ko tsonoexín sín kixin kjaxian jaha nchexiteyéhe tí ley. 25 A ntá tí sín jehya judío tsíkitekaoon Ìnchéni la ikjinni ijnko xroon ó chr'énhenni sín. K'uetuénhenni sín kixin sinehya sín tí nto tsíkjokehe chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí nínko

26 Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóá asén sín. Ntá kjuixin ntá k'uixenhen ch'án tí nínko kixin tsochrónka ch'án kixin ó kjuixin kjuínchexiteyá ch'an tí nkehe k'uituenhen ch'án. Tíhi mé t'axrjexín kixin jnkojnko sín tsjikao sín nkehe tsjanjon sín.

27 Ó chjina chróxétja tí yato yaon ntá iso tí sín judío tsíkijixin estado Asia mé tsík'ikon sín ch'ín Pablo nkaxenhen tí nínko. Ntá kjuínchekóninkaon sín kaín chojni chjasin ntiha ntá itsé sín tí ch'ín Pablo. 28 Ntá k'uèya sín ntáchro sín kixin:

—Káinrá chojni chjasin Israel tsjínkĩtsaráni kixin tsotséni tí ch'ín i. Jehe ch'án mé ixri nkuíxín xritjakohé ch'án chojni nkehe jehya jína kuènte chjasénni, la ko titekakonhya ch'án tí ley kuènte Moisés, la ko titekakonhya ch'án nínkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí nínko tjóá —ichro sín.

²⁹ Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkji_xin chjasín Éfeso. Kjuénkayáxin sín kixin ch'ín Pablo la kjá tsíkji_ko ch'án tí ch'ín a nkaxenhen n_inko.

³⁰ Ntá kuenté tí chjasin a kónínkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkákjenxín sín ch'án nkaxenhen n_inko la kuakitsje sín ch'án ntója ntá tuénxín k'uíkjehe sín tí puerta n_inko. ³¹ Ntá tjinkaon sín chrók'óyán sín ch'án ntá ijnko ch'ín comandante k'uetuenhen itsé tí sín soldado romano kuínhin ch'án kixin kuenté tí chjasin Jerusalén k'uíxité nínkaon sín. ³² Ntá tí ch'ín comandante sákjuíko ch'án iso sín soldado la ko tí sín k'uetuenhen tí soldado a la kuinká sín sákjuí sín tí siín tí chojni. Ntá tió k'uíkon tí sín a kixin ó kjuíji tí ch'ín comandante la ko tí sín soldado a ntá kuitohe sín, í kjuatehya sín ch'ín Pablo. ³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetuan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án. ³⁴ A ntá tí chojni tsíkójn_kotsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuente xikaha kjuích'e sín kixin k'uíxité sín. Ntá k'uetuan ch'án kixin tí sín soldado sátsjiko sín tí ch'ín Pablo tí cuartel siín tí sín soldado. ³⁵ La ntá tió kjuíjiko sín ch'án tí t'it'ótjenx_in sín tí nchia a ntá t'ichjánx_in kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín. ³⁶ Kaín tí chojni chréhe nóton t'èya sín ntáchro sín kixin:

—Chrók'uen ch'án —ichro sín.

Ch'ín Pablo chrónka nkayakon chojni kixin chóntahya ch'án jie

³⁷ Ntá tió sáchrókjuíko sín ch'ín Pablo tí nkaxenhen tí cuartel kuente tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jína tsonixjahani jaha intsí? —ichro ch'án.

Ntá kjuátehe tí ch'ín comandante ntáchro ch'án kixin:

—¿Jaha la á noha nixja griego? ³⁸ Méxra ¿á jehya jaha tí chojni tsíkji_xin Egipto kjuínchenínkaon chojni la ko sákjuíko nteje tí noó mil chojni tsíkjàya? —ichro ch'án.

³⁹ Ntá kjuátehe ch'ín Pablo ntáchro ch'án kixin:

—Náhí, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkji_xin ijnko chjasin imá tjetoan. A ntá ijie xrjannóaha kixin tsjánjuan kjuachaxin tsonixjahá tí chojni —ichro ch'án.

⁴⁰ Ntá tí ch'ín comandante kjuanjon kjuachaxin ntá ch'ín Pablo kjuák'exin toté ch'án tí tjen escalera ntá tja ch'án ó kjuakox_in ch'án kixin tsotání sín. Ntá tání sín ntá kjuankíxin nixjax_in ch'án nkiva hebreo. Ntáchro ch'án kixin:

22

¹ —Jahará kichó ni la ko chojni it'é xjan tinhínra nkehe tí tsoxrjanka kixin chontahya jie —ichro ch'án.

² Ntá kuínhin sín kixin nixjax_in ch'án nkiva hebreo ntá antsí má tání sín. Ntá ntáchro ch'ín Pablo inaá kixin:

³ —Janhan mé ijnko chojni judío tsíkokjínaxián chjasin Tarso estado Cilicia. K'uankíxian ntihi chjasin Jerusalén la kjuintakuáxian tí nkehe kjuako tí ch'ín Gamaliel la titekavan tí ley tsíkinkáchónki tí sín tsík'axrjeníxinni ósé. Tjínkavan chrókjuít'aha Dios xra kaín asenná éxí tjínkáonrá jahará ch'erá tí yaon ijie.

⁴ Ti senó k'uénínkakonhan chrók'oyán tí sín tinkáchónki Ìnchéni kjuintanteto chojni ntoa la ko chojni chjin kixin chrók'uejóchjina sín. ⁵ A ntá tí sín nchat'á

t'etōan la ko kaín tí sín táda t'ayakonhen n̄inko la mé nohe sín kaín tíha kíxin jehe sín mé kjuanjon sín xroon ts'áyéhe tí sín kíchó ni judío tjejó chjasin Damasco. Ntá sákjuia nó ntiha kíxin chrókjuíkjéyá tí sín tinkáchónki Ìnchéni kíxin chrótse sín ntá chrókjuíkian sín ntihi Jerusalén chrokjuasóte sín.

Ch'ín Pablo chrónka nkexrí kjuankíxin tinkáchónkí ch'án Ìnchéni (Hch. 9.1–9; 26.12–18)

⁶ A ntá tió kjuasán chjina chjasin Damasco chjina chonkíxin ntá xrínahya k'uinkáséyan jnkontatjén tí tjén ijnko xrohi imá t'inkaséyan kuix̄in nkajní. ⁷ Ntá kjuachr'ítsinka nonte ntá tuénxín kuinhan itén ijnko nkexro nixjana ntáchro kíxin: “Saulo, Saulo, ¿nkekuènté ninkákonna xritjéyá tí janhan?” ⁸ Ntá kjuánchánkiá kíxin: “¿Xá nkexro jaha?” Ntá kjuátehe ch'án ntáchro ch'án kíxin: “Janhan mé tí nkexro Jesús tsíkjīxin chjasin Nazaret, mé tí nkexro xritjéyá.” ⁹ La ntá tí sín k'uájikian mé k'uikon sín tí xrohi la chrakon sín kjánchó kuíenhya sín itén tí nkexro nixjana. ¹⁰ Ntá kjuánchánkiá kíxin: “¿Xá nkehe tsonhen tjinkávan s̄it'aha jaha?” Ntá kjuátehe ch'án ntáchro kíxin: “T'aya sátjia t'ixenhén chjasin Damasco ntá ntiha tsochrónka sín kaín nkehe s̄ich'e.” ¹¹ Ntá tí xrohi a mé k'uixenka ikuān ntá í xitjahya t'íkuān. Ntá tí sín chríkjan mé kuinkátséna sín sákjuíkian sín chjasin Damasco.

¹² Ntá ntaha kjuák'e ijnko ch'ín it'in Ananías ijnko chojni jina kjuínchexiteyéhe ch'án tí ley kuènte ch'ín Moisés. Kaín tí sín judío siín chjasin Damasco tjikosáyehe sín tí jehe ch'án. ¹³ Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kíxin: “Kíchóni Saulo, ijie la ts'ayéhe kjuachaxin ts'ikuan ínaá.” Ntá ó jina t'íkuān. ¹⁴ Ntá tuénxín ntáchro ch'án ínaá kíxin: “Tí Dios kuinkáchónki tí sín tsík'axrjeníxinni la ó tsíkjeýá ch'án tí jaha kíxin tsonoha nkehe tjinkaon ch'án la ko kíxin ts'ikuan tí nkexro jina la ko tsinhín tan k'uaxrjexín ir'va ch'án. ¹⁵ Jaha mé tsochrónka tí nkehe k'uíkuan la ko tí nkehe kuínhín tsinhin kaín tí chojni chjasintajni. ¹⁶ A ntá jie la í choénhya má. T'aya la tsikitiaxián ihnié Ìnchéni kíxin mé ts'ímáxin ijíá,” ichro ch'ín Ananías.

Pablo chrónka kíxin Dios ichr'án ch'án tsjakohe tí sín jehya sín judío

¹⁷ Na ntá tió xíkjan chjasin Jerusalén ntá sákjuia n̄inko tsonixjahā Dios ntá titàya k'uikuèn ¹⁸ Ìnchéni ntáchro ch'án kíxin: “Tjoka ts'axrjéxian chjasin Jerusalén kíxin tsitekakuenhya sín tí nkehe tjákua mé tí tan kuèntana.” ¹⁹ Ntá janhan ntátjan ch'án kíxin: “Ìnchéni, jehe sín ó nohe sín kíxin senó k'uék'atsínka kaín tí n̄inko la k'uétse tí sín tinkáchónki tí jaha la sákjuíkian sín ntōechiso k'uékon sín. ²⁰ Tió k'óyán sín tí ch'ín Esteban tí nkexro k'uékjit'aha x̄ra, k'uénixja tí tan kuènta ntá janhan kjaxin tjéntaxián ntiha la janhan ntáxrjan kíxin ó nchoxon its'en ch'án la k'uáyakonhan tí iké tí sín kjuàya.” ²¹ Ntá Ìnchéni xínixja ínaá, ntáchro ch'án kíxin: “Tétuānhan jaha kíxin sátsja chjasin kjín kíxin tsjākohé tí chojni jehya judío.”

Ntá tí ch'ín comandante k'uáyéhe tí ch'ín Pablo kíxin tsjasóte ch'án

²² Ntá tí sín tsíkójnkotsé mé kuínhin sín kaín tíha ntá kjuankíxin k'uèya sín ntáchro sín kíxin:

—Its'en ch'án, í tsjak'echónhya ch'án —ichro sín.

²³ Nax̄a t'ixratáhya sín t'óyako sín ntá tótsjénka sín iké sín la ko kuákja sín nche it'e sín. ²⁴ Ntá tí ch'ín comandante mé k'uētuenhen ch'án tí sín soldado a kíxin sátsjiko sín ch'ín Pablo nkaxenhen tí cuartel kuènte sín. Ntá ntiha k'uētōan ch'án kíxin tsjatexín sín ch'án chikoté ntá tsonoexín tí ch'ín comandante nkekuènte imá t'óyako sín nínkakonhen sín tí jehe ch'án. ²⁵ Ntá

kjuixin kjuínchenteto sín ch'án kixin tsjate sín ch'án ntá nixjehe ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxa kjuéyáhyará nkerí jie chonta? —ichro ch'án.

²⁶ Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kixin:

—¿Nkehe sich'e jaha kixin tí nkexro i mé ijnko chojni romano?

²⁷ Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátehe ch'ín Pablo kixin chaxín jehe ch'án.

²⁸ Ntá ntáchro tí ch'ín comandante kixin:

—¿A ntá nkexrí kixin janhan nchónhya chichaon kjuènka kixin ts'ónana chojni romano?

A ntá ntáchro ch'ín Pablo kixin:

—Janhan na chojni ntiha tsíkokjínaxián.

²⁹ Na ntá tí sín soldado chrókuate ch'ín Pablo mé kuínhin sín kixin ch'ín Pablo ijnko chojni romano ntá kuitohe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsíkjinchenteto ch'án.

Ch'ín Pablo nixjehe ch'án tí sín t'etoan kuènte tí sín judío

³⁰ A ntá tí kóyaon ntá tí ch'ín comandante a mé tjinkaon ch'án tsonohe ch'án nkehe tí jie chrók'ueka tí sín judío tí ch'ín Pablo. Ntá kjuasintanka ch'án chica cadena tsíchróntetoxín tja tí ch'ín Pablo ntá k'uetōan ch'án kixin tsojnkotsé kain tí nchat'á t'etoan la ko tí sín t'etoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí siín tí jehe sín.

23

¹ Ntá ch'ín Pablo komá tí sín t'etoan kuènte sín judío ntá ntáchro ch'án kixin: —Kíchóni, tí k'uékjak'é hasta ijie la Dios tjetsjehe kixin ijnko kjuaxrexinkaon jina chonta —ichro ch'án.

² Ntá tí ch'ín Ananías tí ch'ín nchat'á t'etoan mé k'uetuenhen ch'án tí sín chjino tjejó tí tjen ch'ín Pablo tsochjehe sín ir'va ch'án. ³ Ntá kjuátehe ch'ín Pablo kixin:

—Dios mé sinchekjasóte ti jaha kixin ntoáhya kjuich'e. Tjetjaxian méhe kixin tsjéyá nkehe tí jie chonta éxí nixja tí ley. A ntá ¿nkekuènte kuítekákonhya tí ley, la kuétoan kixin ts'ékonna? —ichro ch'án.

⁴ A ntá tí sín siín ntiha ntáchro sín kixin:

—¿Á xikaha ts'antaxínhín tí nchat'á t'etoan kuènte Dios?

⁵ Ntá kjuátehe ch'ín Pablo ntáchro ch'án kixin:

—Kíchóni, kjuatsoanhya janhan kixin jehe ch'án mé tí nchat'á t'etoan. Ntáchro tí xroon itén Dios kixin: “Chrók'uantaxíenhya tí chojni t'etuenhen chjasán”^{*} —ichro ch'án.

⁶ Ntá ch'ín Pablo mé kónohe ch'án kixin iso chojni siín ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kixin janhan mé tinkachónkia kixin tsoxechón chojni tsík'en.

* 23:5 Éxodo 22.28

7 Ntá kjuixin ntáchro ch'án tíha ntá tí sín fariseo la ko tí sín saduceo mé kjuankíxin sín ikjo kichó sín ntá xíkaha jnkokónhya kjuenkayáxin tí sín tsíkójnkotsé ntiha. 8 Kíxin tí sín saduceo a mé ntáchro sín kíxin tsoxechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín kaín tí nkehe a. 9 Ntá kaín sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kíxin:

—Tí ch'ín i, kohya ninkehó nkehe jínahya kjuích'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

10 Ntá imá sítjité sín nínkaon sín. Ntá tí ch'ín comandante a mé tóxakonhen ch'án kíxin chrókjuinchekuen sín tí ch'ín Pablo ntá k'uetuēhen ch'án tí sín soldado a kíxin sátsjikakjín sín ch'án la tsíkao sín ch'án inaá tí cuartel kuènte tí sín soldado.

11 A ntá tí tie a na ntá xrinahya titàya k'uikuēn ch'ín Pablo Ìnchéni nixja ch'án, ntáchro kíxin:

—Chrakonhya Pablo kíxin éxí chronka tanná chjasin Jerusalén la mé xíkaha tsochronka chjasin Roma.

Kjuenkayáxin sín chrók'óyán sín tí ch'ín Pablo

12 Ntá tí yaon chr'éxin a ntá iso tí sín judío a mé kjuenkayáxin sín kíxin ts'óyán sín tí ch'ín Pablo. Ntá k'uákjenxin sín ihnié Dios chaxín tsoxiteyá la sinehya sín la ko ts'ihya sín ninkehó tí naxa ts'óyánhya sín ch'án. 13 Chjina cuarenta sín kjuenkayáxin sín kíxin xíkaha sich'e sín. 14 Ntá sákjuíchenka sín tí sín nchat'á t'etoan la ko tí sín t'etuēhen kuènte tí sín judío la ntáche sín kíxin:

—K'uákjenxinni ihnié Dios kíxin chaxín tsoxiteyá kíxin í sinehyani ninkehó tí naxa ts'óyánhyani tí ch'ín Pablo. 15 Méxra ntá jahará la ko í so tí sín t'etuēhen tí sín judío tsontácherá tí ch'ín comandante a kíxin tsjikao sín tí ch'ín Pablo ntihi tí tjejorá ntóye nchítjen kíxin antsí má tsjanchankíhírá ch'án nkehe siná á chaxín tí jie t'íká ch'án. A ntá jeheni senó ts'ejóchónhenni tí tsjixín ch'án ntá ts'óyánni ch'án kíxin í tsjihya ch'án ntihi —ichro sín.

16 Ntá tí xjeen tí kjave tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uixenhen ch'án cuartel kuènte tí sín soldado kíxin tsochronka ch'án nkehe tí tjo sín kuínhin ch'án. 17 La ntá ch'ín Pablo mé k'uíyehē ch'án ijnko tí sín capitán la ntáchro ch'án kíxin:

—Sátsjioa tí ch'ín ntasoá ti tjen tí ch'ín comandante kíxin tjinkaon ch'án tsochronka ch'án nkehe —ichro ch'án.

18 Ntá tí ch'ín capitán a mé sákjuíko ch'án ti tjen tí ch'ín comandante ntá ntáchro tí ch'ín capitán a kíxin:

—A ntá tí ch'ín Pablo tjechjina mé k'uíyeheni ch'án kíxin tsjikaoni tí ch'ín ntasoá ntihi kíxin tjinkaon ch'án tsonixjaha jaha —ichro ch'án.

19 Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kíxin:

—¿Nkehe tí tjinkávan tsochronka? —ichro ch'án.

20 Ntá ntáchro tí ch'ín ntasoá a kíxin:

—Iso tí sín judío mé kjuenkayáxin sín kíxin tsjanahaha sín kíxin ntóye nchítjen sátsjioa ch'ín Pablo tí tsojnkotsé tí sín judío t'etoan. Sit'ayaha sín tsontáchro sín kíxin tjinkaon sín tsjanchankíhi sín ch'ín Pablo tí nkehe antsí má xra. 21 A ntá jaha la chrókuítekákonhya kíxin chjina cuarenta chojni tjejóchónhen sín imó la k'uákjenxin sín ihnié Dios kíxin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsonohe sín nkehe tsixrua jaha —ichro ch'án.

22 A ntá tí ch'ín comandante a mé nixjehe ch'án tí tí ch'ín ntasoá la k'uetōan ch'án kíxin:

—Tsochenkahya ninkexró kixin xikaha kjuíchronka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uiyehē ch'án yaá tí sín capitán a ntá k'uetōan ch'án kixin tsoyaxínhin sín sátsjiko sín iyó ciento sín soldado sátsjixin toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án. ²⁴ La ko k'uituenhen sín sinchekamá sín kokate tsjiták'á ch'ín Pablo la ts'ayakonhen sín ch'án jina kixin kohya nkehe tsonhen kixin tsjiji ch'án tí tjen ch'ín Félix, tí ch'ín gobernador. ²⁵ Ntá tí ch'ín comandante ikjin ch'án ijnko xroon a, ntáchro kixin:

²⁶ “Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jina, nixjaha. ²⁷ Tí sín judío a mé itsé sín tí ch'ín i kixin chrók'óyán sín ch'án. Ntá tió kónona kixin ijnko chojni romano tí jehe ch'án la ntá sákjuíkian sín soldado kjuíntakaá ch'án. ²⁸ Tjínkavan tsonona nkekuente kixin nínkakohen sín ch'án. Ntá sákjuíkian ch'án tí tsíkójnksé tí sín judío. ²⁹ Ntá kónoxín kixin nínkakuénxín sín ch'án kixin tí ley kuente sín kjuínchexiteyáhya ch'án, ichro sín. Jehya jie jie tsíkjasin ch'án kixin chrók'óyán sín ch'án o chrókjuak'echjina sín ch'án. ³⁰ Ntá ó kuínhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kixin chrókjuiji sín tí tjen jaha chrókjuá sín kixin nkekuente nínkakohen sín ch'án. Kjuasáyá. Ó tjen.”

³¹ Ntá tí sín soldado a mé kjuínchexiteyá sín éxí k'uituenhen sín a ntá sákjuíko sín tí ch'ín Pablo tí tie a chjasin Antípatris. ³² Ntá tí yaon chr'éxin tí sín soldado xrixín toté ó a mé xíkjan sín tí cuartel kuente sín. Ntá tí sín k'uejókjen kokate a mé naxa sákjuíko sín tí ch'ín Pablo. ³³ Ntá tió kjuíji sín tí chjasin Cesarea ntá tí sín soldado a mé kjuanjon sín tí xroon a chjéhe sín tí ch'ín gobernador la ko kjaxin kjuínchek'áyéhe sín ch'án tí ch'ín Pablo. ³⁴ Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkjixin tí ch'ín a. ³⁵ Ntá ntáchro ch'án kixin:

—Ntá tsinhan nkehe tsixro tí sín itsji ts'eka jie.

Ntá k'uetuēnhen ch'án tí sín soldado a kixin ts'áyakonhen sín tí ch'ín Pablo tí nchia kuente ch'ín Herodes.

24

Ch'ín Pablo nixjehe ch'án ch'ín Félix chrónka ch'án kixin kjuasinhya ch'án jie

¹ Ntá k'uatínsinka in'ó yaon, ntá ch'ín Ananías, tí nchat'á imá t'etoan, kjuíji ch'án chjasin Cesarea. Kjaxin kuikao ch'án iso tí sín t'etoan kuente nínko a la ko ijnko ch'ín abogado it'in Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuente ch'ín Pablo. ² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankíxin ch'án nixjehe ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjejóni la kjuasáyá kixin imá noha kjuíncheyóxian tí nación kuenteni. ³ Kjuasáyá jaha Félix. Imá jina jaha kixin k'uíyéheni kaín tíha. ⁴ Tjínkakhya sintak'itjáyahan nchónhya tiempo la xrjanóaha kixin chrókjuak'é chrókuinhín intsikoá tí nkehe tsoxrjanka. ⁵ A ntá ijie ó k'uitjani kixin tí ch'ín i mé éxí ijnko chin t'óxíka kuenté chjasintajni kixin ch'iyehē ch'án tí sín judío ntá xíka sín. Jehe ch'án mé t'etoan ch'án tí sín tinkáchónki tí ch'ín tsíkjixin chjasin Nazaret. ⁶ Jehe ch'án mé kjaxin chrókjuínchekjita ch'án tí nínko. A ntá itséni ch'án ntá chrókjuínchekitoexínni tí ijie ch'án éxí t'etoan tí ley kuenteni. ⁷ A ntá tí ch'ín comandante Lisias

kjuixrónkáxin ch'án kuikao ch'án nchónhya sín soldado la kuakitsje sín tí ch'ín Pablo. ⁸ Ntá k'uetōan ch'án kixin tí sín tjanchia jie chrókuitsjehe sín tí jaha kixin jaha chrókjuanchankíhí ch'án kixin chrókónoha jína nkexéhe tí jie chrókjuinchekjasótexín sín ch'án —ichro tí ch'ín Tértulo.

⁹ Ntá ntáchro kaín tí sín judío siín ntiha kixin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheni kixin tsonixjahani tsochrónkani kixin kohya jie kjuasinni kixin ó noheni kixin jaha la juez kuente tí nación ntihi la nchónhya nánó tētoan.

¹¹ Jaha la kjaxin ó chrókónoha kixin na ntá teyó yaon kjujini chjasin Jerusalén kixin ntaha tsoxráxinkakonxínni Dios. ¹² Kónoxínhya kixin nijnko nkexro chrókjuachaxinni, la ko kjuínchexakuenhyani ninkexró nínko la ko ni tí nínko ntsí la ko ninketó chjasin. ¹³ Tí sín i la xitjahya tsontáchro sín kixin xikaha tí jie kjuasinni. ¹⁴ Janhan chaxín xrjanka kixin t'ahā xrā tí Dios k'uékinkáchónki tí sín tsík'axrjeníxinni mé yóhe tí ntia nixin. A ntá jehe sín ntáchro sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín tí xroon kuente ley la ko tinkáchónkia kaín tí nkehe k'uénixja tí sín k'uéchrónka itén Dios. ¹⁵ Kjaxín tinkáchónkia tí Dios tinkáchónki tí jehe sín kixin tjéchonhan kixin Dios sinchexechón kaín chojni jína la ko kaín chojni jínahya kjaxin. ¹⁶ Méxra tóxakonna kixin tjóá chrókjuak'é kixin chrókjuanchahya Dios jie la ko kjaxin chojni chrókjuanchahya jie.

¹⁷ Nta kjuixin k'uatsínka iso nánó ixrini ókjé ntá kjujini chjasénni kixin tsjanjonni chichaon la ko kjaxin tsochjéheni Dios nkehe. ¹⁸ Méxra mé xikaha tjenni nkaxenhen nínko nta iso sín judío tsíkjixin estado Asia ó xetani ntiha. Ntá kjuínchetjóáni asénni la tsjéhya chojni k'uíkon la kohya chojni kjuánjonkoni. ¹⁹ A ntá tí sín a mé t'ichjánxin chrókui sín ntihi kixin chrókjuanchia sín jie tí nínkakonna sín. ²⁰ A ntá tí náhi la tí sín tjejó ntihi chróchrónka sín kixin nkehe tí jie k'uitjaxín sín tió kjuák'eni tí tjejó tí sín t'etōan kuente tí sín judío. ²¹ Kjá tí tsontáchro sín kixin náxrjónhya ijnko nkehe itsen k'uèya ntáxrjan kixin: “Ijie sinchekitoexinrá jiēna kixin sinchekjasótenará kixin janhan tinkáchónkia kixin tsoxechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jína kónohe ch'án kixin nkexrí tí ntia nixin. Ntá kjuínchekitoexínhya ch'án ijje ch'ín Pablo. Ntáchro ch'án kixin:

—Tsjijia tí ch'ín comandante Lisias ntá tsochrónka ch'án nkekuente tí jie tjanchiará ntá tsonóna —ichro ch'án.

²³ Ntá k'uetuenhen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxin ntá kjujiko ch'ín Félix tjan Drusila ichjién ch'án, mé ijnko tjan judía. Ntá k'uetōan ch'án kixin tsjik'íyēhe sín tí ch'ín Pablo kixin tsochrónka ch'án nkexrí tinkáchónki chojni Jesucristo. ²⁵ A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etuenhen chojni asén sín kixin ch'ehya sín tí jínahya la ko nkexrí Dios sinchekitoexín ijje chojni tí tsjixixín. Ntá ch'ín Félix kuínhin ch'án xikaha ntá chrakon ch'án, ntáchro ch'án kixin:

—A ntá jie la sátjia. Ntá ts'íyaha tió chonta tiempo —ichro ch'án.

²⁶ A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyēhe ch'án tí ch'ín Pablo kixin tsonixjehe ch'án. ²⁷ Ntá xikahó kónhen hasta k'uátsínka iyó nánó ntá tí ch'ín Félix kuítóhe ch'án tí xrā gobernador la ntá

í jnko ch'ín it'ín Porcio Festo mé k'uixenhen ch'án tí xra a ínaá. A ntá ch'ín Félix mé kuítóhe ch'án tí ch'ín Pablo tjechjina ch'án kixin tjinkaon ch'án chrókjuinchexiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

¹ Ntá tí ch'ín Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén. ² Ntiha tí sín nchat'á t'etoan la ko tí sín judío imá tjettoan mé kjuanchia sín kixin tsjasóte ch'ín Pablo. ³ Kjuanchia sín kixin xra ó chrók'uettoan ch'án kixin chrókjuí ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntja ts'óyán sín tí ch'ín Pablo. ⁴ Kjánchó ch'ín Festo kjuátehe ch'an ntáchro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'ín Pablo la tjechjina ch'án chjasin Cesarea la xitjahya ts'etoan ch'án kixin tsjixrakoa.

⁵ Ntá ntáchro ch'án kixin:

—Tí chojni tjettoan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jina tsjanchia sín jie —ichro tí ch'ín Festo.

⁶ Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea ínaa. Ntá tí yaon chr'éxin a kjuák'etjaxin ch'án tí tjet'etoanxín ch'án ntá k'uettoan ch'án kixin tsjikakjín sín tí ch'ín Pablo. ⁷ Ntá tió k'uixenhen ch'ín Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie. ⁸ A ntá tí ch'ín Pablo a chrónka ch'án kixin kjuasinhya ch'án jie. Ntáchro ch'án kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuènte tí sín judío la ko jehya chrókuitekakonhyani tí ninko la ko jehya chrókuitekakonhyani tí ch'ín gobernador romano.

⁹ A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntáchro ch'án kixin:

—¿Á tjinkávan sátsjia chjasin Jerusalén kixin ntaha janhan chrókjuíntakitoxián nkehe tí jie chonta jaha? —ichro ch'án.

¹⁰ Ntá kjuátehe ch'ín Pablo kixin:

—Náhí, jeheni ó ntihi tjenni tí t'etoanxín tí sín gobierno romano la jina chrókjuínchekitoexián ijiéni kixin jaha la ó noha kixin ninkehó ijie kjuích'ehyani tí sín judío. ¹¹ Kja tí chaxín kjuásian ichrén jie jie chrók'uénxian la chrakonhyana kjónté chrók'uén. A ntá tí chaxínhya xikaha t'ekana sín jie la ninkexró chóntahya kjuachaxin chrók'uettoan sáchrókjuikoni tí jehe sín. A ntá tjánchiá kixin jehe tí ch'ín imá t'etoan mé sinchekitoexín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkitsa ch'án ntá ntáchro ch'án kixin:

—Jaha mé tjanchia kixin tí ch'ín imá t'etoan sinchekitoexín ch'án ijiá. Méxra tétuanhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uátsínka iso yaon ntá tí ch'ín rey Agripa la ko tjan Berenice kjuíji sín chjasin Cesarea kixin tsonixjehe sín tí ch'ín Festo. ¹⁴ Ntá ntiha mé kuítóhe sín itsjé yaon ntá ch'ín Festo a mé chénka ch'án tí ch'ín rey nkehe kuènte tí ch'ín Pablo. Ntáchro ch'án kixin:

—Ntihi itjen ijnko ch'ín tjechjina tsíkítóhe ch'ín Félix. ¹⁵ A ntá tió kjuak'e chjasin Jerusalén ntá tí sín nchat'á t'etoan la ko tí sín t'etuénhen tí sín judío a

mé kjuíjtsjehe sín tí janhan ntá kjuanchia sín jie kuènte ch'ín Pablo. Kjuanchia sín kixin chrók'óyánni tí jehe ch'án. ¹⁶ Ntá janhan kjuátaha kixin: Jeheni chojni t'etoan kuènte sín romano mé kuènyani ts'etoanni its'en ninkexró tí naxa tsochjinahya tí ch'ín kjuasin jie kixin tsontácho ch'án á chaxín tí jie tjanchia sín o náhi. ¹⁷ Ntá tí sín judío kui ntihi ntá chuanhya má. Kjonté tí yaon chr'éxin kjuak'étjaxian tí ntákitoxián ijie chojni la kuétoan kixin síxrahoa tí ch'ín Pablo. ¹⁸ A ntá tí sín kóchjina kohya ninkehó ichro sín kuènte tí jehe ch'án éxi kjuenkayáxian janhan chróntácho sín. ¹⁹ Jehó nínkakuenxín sín ch'án kixin tí nkehe tinkáchónki ch'án la ko nínkakuenxín sín ch'án kixin tí nkexro it'ín Jesús mé ik'uén ch'án ntá jie ntácho ch'ín Pablo kixin tjechón ch'án inaá. ²⁰ Janhan la nonahya nkexrí tsitoxín tí ijie ch'án ntá kjuánchánkíha tí ch'ín Pablo á tjinkaon ch'án sátsji ch'án chjasin Jerusalén kixin ntaha tsitoxin tí jie ch'án. ²¹ A ntá jehe ch'án tsíkjanhia ch'án kixin tí ch'ín imá t'etoan mé chrókjuinchekitoxín ch'án ijie ch'án. Ntá kuétoan janhan kixin naxa ntihyó tsjak'echjina ch'án tsononajia janhan nkesá tsétuanhan ch'án sátsji ch'án ntiha —ichro ch'án.

²² A ntá ch'ín Agripa ntáche ch'an tí ch'ín Festo kixin:

—Kjaxian janhan tjínkavan tsinhan tí nkehe tsochrónka tí ch'ín a.

Ntá kjuátehe ch'ín Festo ntácho ch'án kixin:

—Ntóye tsinhín nkehe tsochrónka ch'án.

²³ Ntá tí yaon chr'éxin tí ch'ín Agripa la ko tí tjan Berenice kjuíji sín la k'uixenhen sín la ko tí sín soldado t'etoan tsíkjikao sín, la ko k'uixenko sín iso chojni tjetooan kuènte chjasin ntiha. Ntá k'uetooan ch'ín Festo kixin tsjixrahoa tí ch'ín Pablo. ²⁴ Ntá ntácho ch'ín Festo kixin:

—Jaha ch'ín rey Agripa tinhín la ko tinhínrá kaín rá tsíkójnkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuítóehya sín, tjanchana sín kixin chrók'uen ch'án. ²⁵ A ntá tónhenni kixin kohya jie jie kjuasin ch'án kixin chrók'uen ch'án. Kjánchó jehe ch'án mé tsíkjanhia ch'án kixin tí ch'ín imá t'etoan chrókjuinchekitoxín ijie ch'án. Ntá kjuenkayáxian kixin tsétuanhan ch'án sátsji ch'án ntiha. ²⁶ Nonahya nkehe chaxín tsokjian ts'áyéhe tí ch'ín t'etoan. Ntá jie kuétoan kjuikakjín sín ch'án kjuikao sín ch'án tí tjejóni ntihi kixin tjetooan kixin jaha ch'ín Agripa la ko kaín rá tjejorá ntihi tsjanchankíhírá ch'án kixin mé tsonóna janhan nkehe tsokjian. ²⁷ Méxra náxrjónhya chróchr'an ijnko tí chojni tjechjina naxa nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochrónka —ichro ch'án.

Ntá tí ch'ín Pablo mé kjuaya tja ch'án ntá kjuankixin nixja ch'án, ntácho ch'án xikihi:

² —Chána kixin tsonixja nkayakuan tí jaha rey Agripa tsoxrjanka kaín tí jie t'ekana tí sín judío. ³ Ó noheni kixin jaha la ó noha jína kuènte tí ley la ko tí nkehe tinkáchónki tí sín judío, la ko jaha noha nkehe tí kjuachaxín sín kichó sín. Méxra xrjannóaha kixin tjak'etinhín jína.

Chrónka ch'ín Pablo nkexrí kjuák'e ch'án tí ósé

⁴ Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána. ⁵ Kjaxin jehe sín la ó nohe sín la kjá jína chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuènte tí nkehe tinkáchónkini. ⁶ Ntá ijie

sinchekitoexián jiēna kixin nínkaon tí sín judío a kixin tjéchonhan kixin Dios mé sinchexechón chojni inaá xikaha tsíchénka ch'án tí sín tsík'axrjeníxinni. ⁷ Tí teyó tribu tsík'axrjeníxin ch'ín Israel mé tjejóchónhen sín kixin ts'ikon sín tsoxiteyá tí nkehe tsíchronka Dios. Méxra xraxinkaon sín Dios nchakotjin la ko tie. Méxra mé xikaha tjéchonhan, jaha rey Agripa, la mé xikaha nínkakonna tí sín judío ijie. ⁸ ¿Á títekákonhyará jahará kixin Dios sinchexechón chojni tsík'en?

Ch'ín Pablo k'uénínkakonhen ch'án tí chojni tinkáchónki Ìnchéni

⁹ Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsikjixin chjasin Nazaret. ¹⁰ Mé xikaha kjaxin k'uékjit'a chjasin Jerusalén. Tí sín nchat'á t'etoan mé kjuanjon sín kjuachaxin kixin janhan tsochr'áxanhan ntoechiso nchónhya tí sín tinkáchónki Ìnchéni. Ntá tió k'oyán sín tí sín a mé janhan la ntáxrjan kixin ó nchoxon xikaha kónhen. ¹¹ Nchónhya veces kjuíntakjasóte tí sín tinkáchónki Ìnchéni kixin chrókuítóhe sín tí nkehe tinkáchónki sín. Mé xikaha k'uékjit'a kaín xín nínko kixin imá k'uénínkakonhan tí jehe sín la xikaha k'uájichráha sín kjónté sátsíkji sín chjasin ókjé.

*Chrónka ch'ín Pablo nkexrí kuinkáchónki ch'án Ìnchéni
(Hch. 9.1–19; 22.6–16)*

¹² Méxra xra ó sákjuia janhan chjasin Damasco. Tí sín nchat'á t'etoan mé ó kjuanjon sín kjuachaxin kixin xikaha t'aha sín xra. ¹³ A ntá tí ntia a jaha rey chrókónoha kixin chonkixin k'uíkuan éxi ijnko xrohi t'inkaséyan kuixin nkaya nkajni antsí má fuerte la kánhyó fuerte tí xrohi kuènte yaon la tí t'inkaséyan mé k'uantatjen tí janhan la ko tí sín xrikian. ¹⁴ Ntá kaín ni kjuítsínkani nonte ntá xrínahya kuinhan nixja ijnko nkexro mé nkiva hebreo nixjaxin ch'án. Ntáchro tí nkexro a kixin: “Saulo, Saulo, ¿nkekuènte nínkakónna xritjéyá tí janhan? Jahvá nchekjasóte asán kixin tjanjonkoa tí janhan. Éxi yóhe ijnko koxinta kónínkaon va tí chriáte sín va chica yo mé xikaha jaha.” ¹⁵ Ntá kjuánchánkiá kixin: “¿Xá nkexro jaha?” Ntá tí nkexro me kjuátehe kixin: “Janhan mé Jesús mé tí nkexro chréhé jaha. ¹⁶ Ijie t'aya jaha, tjak'exián totá. Janhan kjuánjuan kjuachaxin kixin k'uíkuan tí janhan ijie kixin jaha sich'ena xra. Janhan kjuéyá tí jaha kixin tsochénka chojni kixin k'uíkuan tí janhan la ko tsochronka tí nkehe tsjákohá inaá tí xik'ikuan tí janhan inaá. ¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tétóan satsjia. ¹⁸ Méxra tétóan sátsjia tí tjejó tí jehe sín kixin takítjenkia ikon sín kixin í ts'ajihya sín ntia sítié la ts'aji sín ntia t'inkaséyan la ko tsochóntahya tí jínahya kjuachaxién ts'etuēnhen tí jehe sín. Jehe sín mé tsinkáchónki sín tí janhan. Ntá janhan ts'áyáha sín la tsjin ijie sín la ko tsitonhen sín tí nkehe ts'áyéhe kaín tí sín tsíkjinchetjóá Dios,” ichro Ìnchéni.

Ch'ín Pablo kuítekaon ch'án tí nkehe tsík'ikon ch'án

¹⁹ Mé xikaha jaha rey Agripa kjuíntaxiteyáha tí nkehe k'uíkuan kuixin nkaya nkajni. ²⁰ Saoxín kjuákoḥa tí sín siín chjasin Damasco, la ntá chr'éxin chjasin Jerusalén, la ko kuenté tí estado Judea ntá kjaxin kjuákoḥa tí sín jehya judío. Kjuákoḥa sín kixin chrókuítóhe sín ijie sín, la chrókan sín chrókuinkáchónki sín Dios, la ko chrókjuákoḥin sín xra jina kixin chaxín ó kjuítóxinhin sín tí nkehe tinkáchónki sín. ²¹ Mé xikaha tí xra tséxinna tí sín judío a nkaxenhen nínko la tjinkaon sín chrók'oyánna sín. ²² Ntá kjuasáyé Dios kjuínkítsana la ntoá itjén ijie tjákoḥa kaín chojni ntsíntsi la ko chojni ihyé la ninkehó k'uantaxiánhya kuènte tí nkehe tsíchronka tí sín tsíchronka itén Dios la ko tí nkehe tsíchronka ch'ín Moisés tsonhen, ²³ kixin t'ichjánxin its'en Cristo

la ko tsoxechón ch'án inaá. Tí itén ch'án éxí ijnko xrohi ts'inkaséyanxín tí sín siín ntihi la ko tí sín siín í so nación kixin tsaáxin sín.

Ch'ín Pablo nixjehe ch'án ch'ín Agripa kixin chrókuinkáchónki ch'án Ìnchéni

²⁴ Mé xikaha ichro ch'ín Pablo kixin kohya jie kjuasin ch'án ntá tí ch'ín Festo mé itsen k'uèya ch'án kixin:

—Pablo jaha la kjá tsík'ixikján. Imá tsíkjinchekuáxian mé xikaha tsíkólókoxián —ichro ch'án.

²⁵ Ntá kjuátehe ch'ín Pablo kixin:

—Jehya tsík'ixikjánna. Jaha Festo imá tjuaha. A ntá tí nkehe ntáxrjan la ijnko nkehe jína la ijnko nkehe chaxín. ²⁶ Ntihi itjen tí ch'ín rey Agripa. Jehé ch'án mé jína nohe ch'án kaín tí nkehe a. Méxra tjenixjaha ch'án jnkojína kixin ó nòna kixin jehe ch'án ó nohe ch'an kaín nkehe kónhen kixin jehya ijnko nkehe imó kónhen tíha. ²⁷ Jaha, rey Agripa, ¿á títekávan tí nkehe tsíkjako tí sín tsíchrónka itén Dios ósé? Janhan la ó nòna kixin títekávan jaha.

²⁸ Ntá kjuátehe ch'ín Agripa ntáchro ch'án kixin:

—Ó antsíkoá chrokuacha chrókuachróna kixin chrók'ónana cristiano —ichro ch'án.

²⁹ Ntá ntáchro ch'ín Pablo kixin:

—Ntáxrjan kixin á isé tsoxrjanka o á séhya la Dios mé tjinkaon kixin jehya jahvá chrókuinkachónkia ch'an. Náhí. Kjaxin tjinkaon ch'án kixin kaín nkexro tjejótinhin chrók'óna sín éxí tí janhan kjánchó xikahya chróchóna sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxaxin ntiha. ³¹ Ntá kaín sín k'uaxrjenta sín la ikjo sín kichó sín. Ntáchro sín kixin:

—Kohya jie tsíkjasin tí ch'ín a kixin chrók'uenxín ch'án la ko chrókjuak'echjinaxín ch'án ntóechiso.

³² Ntá tí ch'ín Agripa ntáche ch'án tí ch'ín Festo kixin:

—Ó nchoxon chrókjuánjuan kjuachaxin sáchrókjui tí ch'ín a tí jehe ch'án chrókjuanchahya ch'án kixin tí ch'ín imá t'etoan sinchekitoxén ijíé ch'án —mé xikaha ichro tí ch'ín Agripa.

27

Ch'ín Pablo sákjuí ch'án chjasin Roma

¹ Ntá k'uetoan sín sátsjini nación Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'in Julio. Jehé ch'án me ijnko policía kuènte tí ch'ín t'etoan Augusto César. ² Ntá k'uixenhenni ijnko ntabárcō tsíkjixín nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjixín chjasin Tesalónica nó estado Macedonia.

³ A ntá tí yaon chr'éxin mé kjuíjini ti puerto chjasin Sidón. Ntá ch'ín Julio mé ikjo jnkojína ch'ín Pablo ntá chjéhe ch'án kjuachaxin kixin sátsjitsjehe ch'án tí chojni chóxin ch'án ntiha kixin tsjinkitsa sín ch'án. ⁴ Ntá chr'éxin sákjuixinni chjasin Sidón. Ntá kjuíjini ijnko isla it'in Chipre la nó tja kjonni kuítóhe tíha la imá chjéhe xrintō. ⁵ Ntá k'uatòyeni tí ntayaon chjinaxón chjasin Cilicia la ko Panfilia la ntá kjuíjini chjasin Mira estado Licia.

⁶ A ntá ntiha tí ch'ín capitán, tí ch'ín k'uetoenhen tí sín soldado a, mé k'uitja ch'án í jnko ntabárcō tsíkjixín nó chjasin Alejandría sátsji nó nación Italia. Ntá ntáchro ch'án kixin tíha sátsjikoni kixin tsjijini ntiha. ⁷ Nchónhya yaon kjuíjixinni kixin imá iyó la imá xra kjuíjini chjino chjasin Gnido. Ntá naxa chjéhe xrintō tsankā ntá k'uátsínkani chjinaxón Salmón ntá kuinkátjixinni chjino tí isla Creta. ⁸ Ntá xikahó imá xra k'uátsínkani chjinó chrínta ntá kjuíjini ijnko chjasin it'in Puertos Jína chjino chjasin Lasea.

⁹ Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárcō chrítaón ntayaon kixin ó kóchjina tí nchakuen kin. Méxra ch'ín Pablo nixjehe tí sín a. ¹⁰ Ntáchro ch'án kixin:

—Tinhínrá tí nkehe tsoxrjanka. T'íkuan kixin nchónhya kjuachrakon tsonhen. Sinchek'itjáyanni tí ntabárcō a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuente tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárcō la ko tí nkehe chrónka tí inché tí ntabárcō a ntá tí nkehe ntáchro ch'ín Pablo la náhí. ¹² Jehya jina kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jina sátsjixínni ntiha kixin ákué xitjahya chrókjuijini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatsínkajia tí nchakuen kin.

Tí xrinto chjéhe chrítaón ntayaon

¹³ Ntá kjuankixin chjehe xrinto kjuixin nó sur kjánchó kánhyó fuerte ntá kjuenkayáxin sín kixin kjá jina sátsjini.

Ntá sákjuixínni ntiha kjánchó kjónté naxa sákjuíni chjinaxón tí chrínta tí isla Creta a. ¹⁴ A ntá chr'éxin ikjuí ijnko xrinto kjuixin noroeste k'uintaté tí ntabárcō. ¹⁵ La kjuankixin xrinto sákjuíko tí ntabárcō kixin tsjachahyani sátsjini tí sítjixin tí xrinto a. Ntá t'ichjánxin kuítóheni sákjuíko xrinto tí ntabárcō tjejóxenhenni. ¹⁶ Ntá k'uátsínkani chjino ijnko isla ntsí it'in Clauda kixin ntiha mé kánhyó tjian chjéhe xrinto. Ntá imá xra k'uitjianni tí ntabárcō ntsí t'etenixín nóton ntabárcō jié. ¹⁷ Ntá kjuixin kjuínchek'it'ótjen sín tí ntabárcō ntsí ntá imá chrakon sín ntá kjuínchenteto sín tí ntabárcō jié kixin kohya nkehe tsonhen. Kjaxin tóxakonhen sín chrakon sín tsíkjine nchesen tí ntabárcō tí tsjiji sín tí it'in Sirte. Ntá kuakjinjin sín tí ka chóna ntabárcō ntá kuítóhe sín sátsjiko xrinto. ¹⁸ Ntá tí yaon chr'éxin ntá naxa imá tjian chjéhe xrinto. Ntá ik'ue sín tí nkehe sítjinká tí ntabárcō a chrínta ntayaon kixin kánhyó tsoye. ¹⁹ A ntá tí yaon nixin a mé itjani ó kuakitsjexínni tí nkehe kuente tí ntabárcō. ²⁰ Isé k'uíkonhyani yaon la k'uíkonhyani konotsé kixin imá tjian chjéhe xrinto la ko kjaxin ó k'uitjáyenhenni kaín tí tjenkayáxinni kixin naxa chrókuaáni.

²¹ Ntá ó k'uátsínka itsjé yaon kjónehyani ntá k'uínkatjen ch'ín Pablo nixjehe ch'án kaín tí sín tjejóxenhenni ntabárcō a ntáchro ch'án kixin:

—Chrókuítekáonrá tí nkehe xrjanka kixin chrókuítóheni tí estado Creta ntá chrók'uitjáyenhanyi tí nkehe tjinká tí ntabárcō a. ²² A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárcō la ts'itjayan. ²³ Ntá tí tie a mé k'uíkuan ijnko ángel tsíchr'án Dios tinkachónkia la ko t'aha xra. ²⁴ A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'etoan la kjaxin Dios la tsjinkitsa jaha la ko tí sín tjejókoa kixin ts'enhya sín.” ²⁵ Méxra chróchrakonhyará jahará kixin tí Dios tinkachónkia la chaxín nchexiteyá tíha, éxí tsíntáchro tí ángel. ²⁶ Kjónté ó jehí t'ichjánxin sátsjikoni xrinto ijnko nonte jnkosiné ntayaon —ichro ch'án.

²⁷ Kjuixin k'uátsínka iyó semana ntá ijnko tie ntá kjuíjini ijnko ntayaon it'in Adria ntá sákjuíko tí ntabárcō ijnko lado la í jnko lado ti xrinto. Ntá chjino k'áxrótjen ntá tí sín tjiko ntabárcō mé ó kónohe sín kixin ó chjina kjuixraká sín ijnko nonte xamá. ²⁸ Ntá kjuáchroa sín tí nkekjaín ninkaxín tí ntá mé chóna treinta y seis metro ninkaxín. Ntá sákjuíni kjínhya la ó xíkjachroa sín la veintisiete metro ó ninkaxín. ²⁹ Imá chrakon sín kixin ts'itjatōn tí ntabárcō itjo ntá kjuinkajin sín noó chica gancho tí nóton tí ntabárcō a kixin ntahó tsochónhen tí ntabárcō hasta chrók'uinkaséyan. ³⁰ Ntá tí sín tjiko ntabárcō

kjuenkayáxin sín sáchrókjui sín ntá kjuankíxin kjuinkajin sín tí ntabárc̣o ntsí chrítaón ntá éxi tjinkaon sín chrókjuinkajin sín tí gancho chóna tí kja ntabárc̣o.

³¹ A ntá ch'ín Pablo ntáche tí ch'ín capitán la ko kaín tí sín soldado kíxin:

—A ntá tí tsitohya tí sín i ntihi nkaxenhen ntabárc̣o ntá xitjahya tsaára —ichro ch'án.

³² Ntá tí sín soldado a mé kóchrínjint'õ sín tí hno kuente ntabárc̣o ntsí tsitohya sín tsjiankí nta.

³³ Ntá chjina t'inkaséyan a ntá ch'ín Pablo nixjehe ch'án kaín tí sín siín ntiha ntáchro ch'an kíxin chrókjóné sín ichrén nkehe. Ntáchro ch'án kíxin:

—Ó k'uátsínka iyó semana k'uejóchrinhyará la ko kjóntehyará. ³⁴ Tinhínra t'ichjánxin chrókjónterá ichrén nkehe tí tjinkáonra tsaára kíxin ntihi la kohya nkexro ts'itjáyan la nijnko tí kaxihi chóna kjará ts'itjáyan.

³⁵ Ntá xikaha ichro ch'ín Pablo ntá kuákja ch'án ijnko nioṭja a la ntiha tí tjejó kaín sín ntá kjuanchia ch'án kjuasáyé Dios ntá kóchrít'õ ch'án ntá kjuankíxin kjóné ch'án. ³⁶ Ntá kóchéhe sín kaín sín kjuankíxin kjóné sín kjaxin. ³⁷ Kaínni tsík'ixenhenni ntabárc̣o mé iyó ciento setenta y seis chojni. ³⁸ Ntá kjuixin kjóné sín la kókjehe sín ntá ik'ue sín tí noa trigo a tjinká tí ntabárc̣o a chrínkí tí ntayaon a kíxin kánhyó tsoye tí ntabárc̣o a.

Tí ntabárc̣o kjuixin k'uániánkí nta

³⁹ A ntá ó k'uínkaséyan, a ntá tí sín tjiko ntabárc̣o la kjuátsoanhya sín tí nonte ntá k'uíkon sín ijnko chrínta nta. Ntáchro sín kíxin ákué tsjachahya sín sátsjiko sín tí ntabárc̣o ntiha. ⁴⁰ Ntá kóchrínjint'õ sín tí hno síchroéxin tí gancho kíxin ntaho tsitohya chrínkí ntayaon. Ntá kjuínchentá sín tí nkehe tjikoxín sín tí ntabárc̣o a. Ntá kjuínchek'it'ótjen sín tí ka tjiko nkayakon tí ntabárc̣o. A ntá tí ntabárc̣o kjuankíxin sákjuí chrínta nta. ⁴¹ Xrínahya kjuíji ntabárc̣o tí iyó kójnkojiéxin ntayaon ntá ntiha kjuíkjiat'ó tí kja tí ntabárc̣o tí nchesen siín ntiha. Ntá í xitjahya nchekinkí ninkehó, a ntá nóton tí ntabárc̣o kjuankíxin síxíka kíxin imá sítji chjehe nta a. ⁴² Ntá tí sín soldado a mé tjinkaon sín chrók'óyan sín tí sín tjejóchjina kíxin tjinkakonhya sín kíxin ninkexró sáchrókjui ókjé. ⁴³ A ntá tí ch'ín t'etuenhen tí sín soldado a mé tjinkakonhya ch'án kíxin its'en ch'ín Pablo ntá kjuanjonhya ch'án kjuachaxin. Íchá k'uetōan ch'án kíxin tí sín jína tjitaón nta la senó sátsji sín kíxin tsjiji nonte xámá ⁴⁴ la ko tí sín noehya tsjitaón nta a mé sátsjiko sín tí ntatabla o it'õ tí ntabárc̣o. Ntá xikaha kaín ni kjuíjini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kíxin tí isla la mé nchek'in sín Malta. ² A ntá tí sín chjasin ntiha mé imá jína kjuínkítsa sín kaín ni la kjuaka sín ijnko xrohi jié kíxin imá kin kíxin sít'aniá chrin. Ntá k'uèya sín kíxin tsochjinani kaín ni tsochjixroheni. ³ A ntá ch'ín Pablo mé sákjuíkakja ch'án í so njo tsíxámá ntá kjuasinkáte ch'án tí xrohi a. Ntá xrínahya k'uaxrjenkíxin ijnko konche tí xrohi a kíxin imá sóa ntá xrínahya k'uísímá itja ch'ín Pablo. ⁴ Ntá tí sín chjasin ntiha mé k'uíkon sín tí konche kjítjjanítjen itja ch'án ntá ikjo sín kichó sín. Ntáchro sín kíxin:

—Kjá tí ch'ín a la ijnko chojni tsíkjàya a kíxin kjónté kuaá ch'án k'uénxinhya ch'án ntayaon la Dios la í tjinkakonhya kíxin naxa tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi kíxin ntiha ts'anótjen tí konche, ntá jehe ch'an la kohya nkehe kónhen ch'án. ⁶ Ntá kaín sín tjejóchónhen sín kíxin ách'e ts'atjoyé itja ch'án o ách'e its'en ch'án. Ntá kjuixin k'uejóchónhen sín isé la k'uíkon sín kíxin kohya nkehe kónhen ch'án ntá

kjuítóxin sín tí nkehe kjuenkayáxin sín la ntáchro sín kixin jehe ch'án mé ijnko dios tíha, ichro sín.

⁷ Ntá chjino tí k'uejóni a mé itjen nontee ijnko ch'ín t'etoan kuente isla me it'in Publio. Mé jína kjuanjón ch'án kjuachaxin k'uejóni ntoe ch'án la kjuanjón ch'an nkehe kjóneni iní yaon. ⁸ Ntá it'é tí ch'ín Publio a mé tjetsínka ch'án kixin níhi ch'án chóna ch'án sóa la ko chinjni. Ntá ch'ín Pablo sákjuítsjehe ch'án la kjuixin nixjehe ch'án Dios, ntá kjuák'etja itja ch'án tí ch'ín a ntá kuítóhe ch'án jína. ⁹ Mé xikaha kjaxin kóchjina í so tí sín níhi siín tí isla ntá kaín sín kuítóhe sín jína. ¹⁰ Na ntá imá kjuikosáyehe sín ch'án. A ntá chr'éxin tió kjuixin k'uixenhenni ntabárcō inaá ntá kjuanjón sín kaín nkehe t'ichjánxinhinni sátsjikoni.

Kjuíji ch'ín Pablo chjasin Roma

¹¹ Ntá k'uátsínka iní nitjó tjejóni tí isla ntá k'uixenhenni ijnko ntabárcō mé ntahó tsíkitohe k'uátsinkajia tí nchakuen kin. Tí ntabárcō a mé tsíkixin chjasin Alejandría la ko mé chóna nkehe tsíkjanoya chóna ihnié dios Cástor la ko Pólux. ¹² Ntá sákjuíni ntá kjuíjini puerto chjasin Siracusa la ntaha kuítóheni iní yaon. ¹³ Ntá xík'ixenhenni tí ntabárcō la k'uatsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjehe xrintō kjuixin nó sur, ntá yaon yóxin ntá kjuíjini chjasin Puteoli. ¹⁴ Ntá ntiha xetani iso kichó ni, a ntá tjinkaon sín ts'ejókoni sín ntiha. Ntá k'uejókoni sín ijnko semana ntá chr'éxin sákjuíni chjasin Roma. ¹⁵ Ntá tí sín kichó ni chjasin Roma la ó nohe sín kixin tsijini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. ¹⁶ Ntá tió kjuíji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuítóhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

¹⁷ Ntá k'uátsínka iní yaon ntá tí ch'ín Pablo a mé k'uíyehē ch'án kaín tí sín judío tjeoan kuente chjasin Roma. Ntá tió kjuixin kójnkotsé kaín sín ntá ntáchro ch'án kixin:

—Kichóni, kohya ninkehó jie kjuásian kixin chrókónínkakonna tí sín judío la jehya kixin ninkakonxian tí nkehe k'uékinkáchónki tí sín tsík'axrjeníxinni. A ntá kjónté itséna sín kjuak'e chjina sín tí janhan chjasin Jerusalén la ko kjuínchekjasótena tí sín romano a. ¹⁸ Ntá k'uitjahya sín ninkehó jie chonta. Ntá tjinkaon sín chrók'uatjántana sín kixin k'uitjahya sín ninkehó jie chrók'uénxian. ¹⁹ A ntá tí sín judío a mé imá kónínkaon sín tjanchia sín jie. Ntá t'ichjánxin tsjanchiani kixin tí ch'ín César mé chrókjuinchekitōexín ch'án nkehe tí jie chóntani, kjónté chóntahyani ninkehó jie ts'eka tí sín tí nación kuénténi. ²⁰ Méxrā k'uíyāhará kixin tjinkaonni ts'íkuan tí jahará la ko tsonixjāharáni kixin tinkáchónkini tí nkexro tjejóchónhen kaín tí sín israelita mé xikaha t'ikonrá kixin tjechrontetoxínni cadena ntihi.

²¹ Ntá ntáchro sín kixin:

—K'uáyèhyani ninkehó xroon chrókjuixin Judea kuente tí jaha la ko kuihya nijnko tí sín kichó ni judío chróntáchro sín ichrén nkehe jínahya tsík'ich'e. ²² Tjinkaonni chrókuinhinni nkexrí tjenkayáxian kixin ó noheni kixin itsje chjasin t'ántaxínhin sín tí nkehe nixin tjákua —mé xikaha ichro sín.

²³ Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuente Dios. Nixjehe ch'án sín kixin chrókuitekaon sín tí nkehe kjuako ch'ín Jesús, la chrónkaxín ch'án kixin nkexrí

nixja tí ley kuènte ch'ín Moisés la ko tí tsíkjin tí sín profeta ósé. ²⁴ Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekakonhya sín. ²⁵ Ntá jnkokoáhya kjuenkayáxin tí jehe sín la iso sín tjinkaon sín kixin sáchrókjui sín, ntá ch'ín Pablo mé ntáchro ch'án kixin:

—Ntoá nixja tí nkehe chénka Nchakuen Dios tí sín tsik'axrjeníxinni ósé chrónkaxín ch'ín profeta Isaías ntáchro kixin:

²⁶ Sátjia nixjehé tí chojni a

kixin jehe sín kjónté tjejótinhin sín la tienxínhya sín,
la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha
la ntatsjon sín la tsík'ikjehe

la ikon sín la tsíchr'áto

kixin t'ikonxínhya sín

kixin tinhín sín la tjinkakonhya sín chrókuienxín sín,
la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá janhan
chrókuintakitohá sín jína.*

Mé xikaha tsíkjin ch'ín Isaías. ²⁸ Méxra chrókónohará jahará kixin ijie tí sín jehya judío me ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xikaha ichro ch'ín Pablo ntá tí sín judío sákjuí sín la tinkákjo sín kichó sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjó tí sín kjuíjitsjehe ch'án. ³¹ La kjuako ch'án tí kjuachaxin kuènte Dios la ko kjuako ch'án kuènte Ìnchéni Jesucristo. La kohya ninkexró k'uínkákonhen tió kjuako ch'án. Ó tjen.

* 28:27 28.26–27 Isaias 6.9-10

Tí xroon ikjin ch'ín Pablo chr'énhen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'ahá xra Jesucristo mé kjian tí xroon i. Kjueyána Dios kixin sít'ahá ch'án xra tsjàkua tí tan jína tsaáxinni.

² Tíha mé tsintáchro Dios senó kixin tsoxiteyá éxí nixja tí xroon nixjxin tí sín tsíchronka itén ch'án ósé. ³ Tí tan a mé chrónka nkexrí tjen Ìnchéni Jesucristo Xjeen Dios. Jehe ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David. ⁴ Tí kjuachaxin jíé mé kjuakoxin kixin jehe ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tjetóan. ⁵ Kjuasáyé Jesucristo k'uáyéheni kjuachaxin kixin sich'eheni ch'án xra sátsjichronkaxinni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrótjuèhe sín ch'án. ⁶ Jahará k'uék'ejorá éxí tjejó tí jehe sín, a ntá jie la kjueyará Dios kixin chrókuítekáoaná Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuàhará Dios la kjueyará ch'án kixin tjóá chrók'uejórá. Kjuasáyé It'éni Dios la ko Ìnchéni Jesucristo kixin kjuanjon ch'án kjuaxróxin k'uayéhérá.

Ch'ín Pablo tjinkaon chrókjuitsjehe ch'án chjasin Roma

⁸ Xrankíxixín kjuachaxién Jesucristo tjánchàxian Dios kjuasáya kixin jahará ó kuítekáoaná ch'án la ko nkuíxín chjasintajni nixja sín nkexrí tinkáchónkirá ch'án. ⁹ Dios, tí nkexro t'ahá xra kaín asenná xrjanka tí tan jína kuènte Xjeen ch'án, mé nohe ch'án kixin xráxín xráxinkavan tí jahará tió nixjahá ch'án. ¹⁰ Xráxín tjáncháha Dios kixin tí chrókjuanjon ch'án kjuachaxin la chrókjuasántsjahará. ¹¹ Kixin tjínkavan chrókjuasántsjahará tí jahará kixin chrókjuínkítsa tí jahará kixin chrók'uitjará jína nkexrí chrók'uejórá ntoá. ¹² Me xíkaha tsocháhará la ko tsochána kixin jnkokoá tinkáchónkini Ìnchéni, jahará la ko janhan.

¹³ Kíchóni, tjínkavan chrókónohará kixin nchónhya veces tjínkavan chrókjuasántsjahará kjánchó naxa xitjahya tsjasán. Tjínkavan chrókjuasán kixin chrókjuít'a xra kuènte Ìnchéni kixin chrókjuachani nchónhya chojni chrókuínkáchónki Dios éxí kjuít'a xra í so chjasin naxa chónhya sín Dios. ¹⁴ T'ichjánxin tsjàkoha kaín chojni, á chojni griego o á chojni jehya griego o á chojni nohe o á chojni noehya. ¹⁵ Mé xíkaha xra ó tjéchonhan chrókjuasán chrókjuákohará tí tan tsaáxinrá tí jahará tjejórá chjasin Roma.

Tí kjuachaxin kuènte tí tan jína

¹⁶ Tósuánahya xrjanka tí evangelio kixin táha ijnko tan jína kixin chóna kjuachaxin kuènte Dios chrókuaáxin kaín xín tí chojni chrókuitekaon, mé saoxín tí sín judío la ko kjaxin tí sín jehya judío. ¹⁷ Kixin tí tan jína kuènte Dios tjakuexin tí jeheni kixin chrókótjuáxin ijéni kixin tinkáchónkini ch'án la jehó ch'án tinkáchónkini. Exí ntáchro xroon itén Dios kixin: “Tí nkexro kótjóá kixin kuítekaon sín Dios mé táhó ts'ejóchónxin sín.”*

Tí jie tjasin chojni

¹⁸ Dios tjen nkaya nkajní mé tsonínkakonhen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'ínkákónhen kixin

* 1:17 Habacuc 2.4

chrókónohe sín tí nkehe jína chaxín. ¹⁹ Jehe sín ó nohe sín jína nkexrí tjen Dios kixin jehe ch'án kjuakuexín ch'án tí jehe sín. ²⁰ Tí kjuachaxin kuènte Dios kjónté t'ikonhyani la kjánchó noexínni kixin tí nkehe kjuích'éna ch'án. Kixin tí naxa k'ónahya chjasintajni kónoxín kixin jehó ch'án mé Dios t'etoan la ko chóna ch'án kjuachaxin jnkochrín. La ntá tí sín jínahya xitjahya tsontáchro sín kixin k'uénoehya sín. ²¹ Kjónté nohe sín kixin xikaha itjen Dios la tjikosáyehya sín ch'án la ko ní tjanchehya sín ch'án kjuasáya. Tjenkayáxin sín tí nkehe ninkehó sínkíhya kixin jínahya asén sín la tí sítié ó kuítóhe sín. ²² Kjónté ntáchro sín kixin imá nohe sín kjánchó imá lontí sín kixin antsí kjuasin sín jie. ²³ A ntá ó kjuixin kjuinkí sín tí nkehe tinkáchónki sín la ko kuítékakonhya sín tí kjuachaxién Dios itjen jnkochrín, t'enhya. A ntá ijie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko iko chóna noó toté.

²⁴ A ntá xikaha Dios kuítóhe ch'án tí jehe sín kixin chrókjuich'e sín tí nkehe jínahya tjenkayáxin sín ntá xikaha ch'e sín ijnko nkehe chrókósuèxin sín ch'ehe kichó sín ²⁵ kixin kuítékakonhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuích'éna sín dios kuènte sín tí nkehe tsíkjach'éna Dios. A ntá tí nkexro kjuích'éna tí nkehe la titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe síin mé kuènte ch'án. Amén.

²⁶ La ntá xikaha kjuích'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuèxin sín chrókjuich'e sín. Kjónté tí chojni chjin la kuítóhe sín tí ichjin sín la ntá kjuích'éna sín asén sín chojni ntoa. ²⁷ A ntá kjaxin xikaha tí chojni ntoa kuítóhe sín chróchóna sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'ehe kichó sín jnkokón ntoa sín. Mé xikaha mé tí cuerpo kuènte sín mé tsjasótexín sín tí jie kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítóhe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'ehya sín. ²⁹ Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóna sín itsjé nkehe, la ko imá tjasin sín jie, la ko jehe sín chjinóxínhin sín, la ko tjinkaon sín chrók'óyán sín kichó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia. ³⁰ T'ántaxínhin sín kichó sín la ko nínkakonhen sín Dios, la ko jehó sín chrók'uetóan sín, la ko nchehnke sín, la ko jehó sín ch'éna sín nkehe jínahya tjasixín chojni jie, la ko tjikosáyehya sín it'é sín la ko ìné sín. ³¹ Tienxínhya sín la nchexiteyáhya sín nkehe nixja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichrén jie kjuasinhin kichó sín, la ko tikonóehya kichó sín. ³² Jehe sín ó nohe sín jína kixin nkexrí k'uetóan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naxa tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitoexín ch'án tí jie tjasin chojni

¹ Mé xikaha jahará xitjahya tsontáchrorá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexrí chrókjuasótexínrá kjaxin kixin jahará jnkokón jie tjásinrá. ² Ó noheni kixin ntoá sinchekitoexín Dios tí jie kjuasin chojni kixin sinchekjasóte ch'án tí sín xikaha tjasin jie. ³ A ntá jahará la tékará jie í so chojni ntá jahará kjaxin

la xikaha jnkokón jie tjásinrá. ¿Á tjenkayáxinrá kixin tsjachará tsinkeherá tí sinchekjasótiará Dios ní? ⁴ ¿Á kjonieherá tí kjuaxróxin tsjéjehya tjanjon Dios kixin tjechónhen ch'án naxa ninkakuanhyará ch'án? A ntá jahará la kuiénxinhyará kixin Dios tjuàhará kixin tjinkaon ch'án chrókujitohérá tí nkehe jínahya tjenkayáxinrá. ⁵ Kjánchó jahará imá icha asánrá, tjinkákonhyará chrókujitohérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótexínrá tí yaon tsjixixín tió tsonoxín kixin sinchekjasóte Dios chojni. ⁶ Jehe ch'án mé tsjenkehe ch'án jnkojnko chojni nkehe tí xra tsíkijich'e sín. ⁷ Tsjanjon ch'án kjuachón ts'áyéhe tí sín tjejá sín tí nkehe náxrjón la ko tí kjuachaxin ts'itjáyanyha la ko xráxín kjuích'e xra jína. ⁸ A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhi, la íchá má kóxrjínhin sín kjuích'e sín tí nkehe jínahya. ⁹ Mé xikaha tsjasóte sín la ko kjuaxróxinhya tsonhen kaín tí sín kjuích'e tí nkehe jínahya, mé senó tí sín judío la ko kjaxin tí sín jehya judío. ¹⁰ A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuích'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínki. ¹² Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótexín sín. ¹³ Jehya tí sín ó chrókuinhón tí ley la ó chrókótjuáxin ijíe sín. Náhi. Tí sín sinchexiteyéhe sín tí nkehe k'uetōan Dios mé tsotjuáxin ijíe sín. ¹⁴ A ntá tí sín jehya judío chóntahya sín tí ley t'etuenhen sín la ntá tió jehó sín chrókjuinchexiteyéhe sín éxi nixja tí ley la jehí jehó sín t'etuenhen asén sín. ¹⁵ Kixin tí kjuínchexiteyá sín ch'e sín tí nkehe jína mé tjakoxin sín kixin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhi. ¹⁶ Itsi tí yaon la Dios mé sinchekitōexín kjuachaxin Inchéni Jesucristo kaín nkehe imó kjuích'e chojni éxi nixja tí tan jína tjákua janhan.

Tí sín judío la ko tí ley tsíkjin ch'ín Moisés

¹⁷ A ntá jahará ntáchrórá kixin jahará judíorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios. ¹⁸ Ó nohará tí nkehe tjinkaon Dios la ko tí ley ó kjuakohará kixin chrókjuéyará tí nkehe jína. ¹⁹ Ihnkerá kixin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sítié, ichrorá. ²⁰ Ntáchrórá kixin nohará tsjákohérá tí sín noehya la ko tsjínkitsará tí sín tienxínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá. ²¹ Jahará tjákohérá í so chojni, a ntá jahará, ¿nkekuènté tjákoéhyará asánrá xikaha? Jahará tjákohérá chojni kixin chrókueéhya sín, a ntá jahará la, ¿nkekuènté teerá? ²² Ntáchrórá kixin xitjahya tsochónta chojni yaá chojni chjin, a ntá jahará la, ¿nkekuènté xikaha ch'erá? Ntáchrórá kixin titekákonhyará tí nkehe tsíkjanōya, kjánchó jahará, ¿nkekuènté teerá tí nkehe tjete siín nkaxenhen ninko? ²³ Nchehnkerá kixin chontará tí ley, a ntá jahará chontahyará kjuasáyé Dios kixin kjuínchexiteyéhyará éxi k'uetōan tí ley. ²⁴ Ntoá ntáchro tí xroon itén Dios kixin: “Tí sín jehya judío la t'ántaxínhin sín Dios kixin tí ijíará.”

²⁵ A ntá tí chaxín kjuínchexiteyará tí ley tsíkjin ch'ín Moisés la ntá jehya chónkó tsíkará xroye. A ntá tí kjuínchexiteyéhyará tí ley la éxi tsíkahyará ninkehó xroye. ²⁶ A ntá tí sín tsíkahya xroye kjánchó titekaon sín nkexrí t'etōan tí ley la tjejó sín éxi ó tsíka sín xroye kjónté chaxínhya chónta sín. ²⁷ A ntá tí nkexro kuáhya xroye tí cuerpo chónta kjánchó nchexiteyéhe tí ley, mé jehe sín tsjanchia sín jie tí jahará kixin jahará kúitekákonhyará kjónté chontará tí xroon

nixja tí ley la ko kjónté ó tsíkará xroye. ²⁸ A ntá tí xíkaha la chaxínhya judío jahará kixin ó ntója ó chontará xroye la chaxínhya tsíkará xroye kixin chrítaón cuéporá ó, chontará. ²⁹ A ntá tí chojni chaxín judío la t'ichjánxin chróchónta sín xroye nkaya asén sín. Jehya tí ley chrók'uetóan xíkaha chrókonhen. Náhi. Táha la Nchakuen Dios. Jehya kixin chojni chrókóxrjínhin kixin ó nchoxon. Náhi. Dios mé tsqxrjínhin kixin nchoxon tíha.

3

¹ ¿A ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye? ² Chaxín xíkaha jína kixin Dios kjuanjon tí itén ch'án saoxín k'uáyéhe tí sín judío kixin chrókjuinchexiteyá sín. ³ A ntá ¿nkehe tsonhen tí jnkójín tí jehe sín chrókjuinchexiteyáhya sín? Kjónté xíkaha chrókjuich'e sín la, ¿á chrókuítóhe Dios chrókjuinchexiteyáhya ch'án tí nkehe tsíntáchro ch'an? ⁴ Kjá náhi. Dios la sinchexiteyá kaín nkehe tsíntáchro ch'án kjónté kaín chojni chrókjuich'ia. Ntáchro xroon itén Dios kixin:

Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie.*

⁵ Tí jie chóntani mé tjakoxin kixin Dios mé nohe nkexrí sinchekitoexín ch'án ijíé chojni. ¿A ntá nkehe chróchroni? ¿A ntoáhya chrókjuich'e Dios kixin chrókjuinchekjasóteni ní? (A ntá janhan nixja éxí nixja chojni ó.) ⁶ Kjá náhi. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitoexín ch'án ijíé chojni chjasintajni?

⁷ A ntá tí chrókjuínkítsa tí kjuach'ia kuéntana kixin chrókónoaxínrá tí nkehe chaxín kuénte Dios, ¿a ntá nkekuénte ts'ékaráni jie kixin janhan mé ijnko chojni chóna jie? ⁸ Tí xíkaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xíkaha ichro iso chojni t'ekani jie kixin xíkaha tjakoni, ichro sín. Tí sín a chrókjuasóte sín kixin xíkaha ichro sín.

Kaínni chóntani jie

⁹ ¿Ntá nkexrí? Jeheni judíoni la, ¿á antsí má tjetóanni, a ntá tí sín í so la, á náhi? Kjá náhi. Kixin kaín ni chojni judíoni la ko tí sín jehya judío mé kaín ni kjuínchexiteyéheni tí jie kjuasinni. ¹⁰ Ntáchro tí xroon itén Dios kixin: Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,

Kohya ninkexró chrókjueyá Dios.

¹² Kaín chojni k'uék'aji sín tí ntia jínahya la ko kaín chojni jnkokón k'uáji sín ntoáhya,

kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxí tòye tsíxrankehe tsíxravá chojni

kixin tí nejen chojni ch'iyaxín.

La tí veneno kuénte konche chóna ir'va chojni.‡

¹⁴ Tí ir'va chojni tsíkaón nkehe jínahya la ko kjuanínkaon.§

¹⁵ Xritinká sín kixin tjinkaon sín chrók'óyán sín chojni.

¹⁶ Tí ntia k'uáji sín tió xíkaha kjuich'e sín mé kjuínchek'itjáyan sín kaín kjuaxróxin k'uéchóna ókjé chojni.

¹⁷ Chónhya sín tí ntia tjanjon kjuaxróxin*

¹⁸ kixin kjuenkayáxinhya sín chróchrakonhen sín Dios.†

Mé xíkaha ntáchro itén Dios.

* **3:4** Salmo 51.4 † **3:12** 3.10-12 Salmo 14.1-3, Salmo 53.1-3 ‡ **3:13** Salmi 5.9, 140.3 § **3:14** Salmo 10.7 * **3:17** Isaías 59.7-8 † **3:18** Salmo 36.1

¹⁹ Ó noheni kixin kaín tí nkehe nixja tí xroon chóna tí ley mé k'uetuennen kaín tí sín tinkáchónki tí ley kixin ntá kaín chojni chjasintajni chrótání sín kixin kaín chojni tsjasóte kixin Dios mé sinchekitoexín ijié kaín chojni. ²⁰ Kixin ninkexró chrókjuacha chrókótjuáxin ijié sín kixin chrókjuinchexiteyéhe sín tí nkehe t'etōan tí ley. Tí ley la jehó ch'e xra tsonoexínni kixin chóntani jié.

Tsaáxinni kixin tinkáchónkini Cristo

²¹ A ntá jehya tí ley chrókuaáxinni. La ntá ó kónoxín nkexrí Dios tsaáxinní la kjaxin tí xroon chóna ley la ko tí nkehe nixja tí sín profeta la ó nixja xikaha.

²² Tsotjuáxin ijiéni kixin titekaonni Jesucristo kixin kaín chojni chrókuaáxin tí tsitekaon sín tí jehe ch'án kixin t'ikon ch'án kixin jnkokón tsjehe kaín chojni.

²³ Kixin kaín xín chojni kjuasin jié la k'uáyèhya sín tí kjuachaxin chrókuaáxin sín. ²⁴ A ntá kjuasáyé Dios kixin k'uenyákonhenni Cristo Jesús la kótjuáxin ijiéni. ²⁵ Dios mé ichr'án ch'án Cristo, kuámá ijiéni, k'uenyákonhenni ch'án kixin chrókuinkáchónkini ch'án ntá chrókuaáxinni. Mé xikaha kjuích'e Dios kixin kjuakoxin ch'án kixin ntoá kjuenkayáxin ch'án kixin kónínkakhonya ch'án kjónté nchónhya jié tsíkjasinni senó. ²⁶ Xikaha kónhen kjuakoxin Dios kixin jína ch'án ijié la naxa tjechónhen ch'án sinchetjóá ch'án ijié tí sín kuítekaon Jesús.

²⁷ A ntá ¿nkekuènté chrókjuinchehnkeni? Xitjahya sinchehnke chojni nkayakon Dios kixin jehya kixin kjuínchexiteyéheni tí nkehe k'uetōan tí ley ntá chrókuaáxinni. Náhí. Kixin Ìnchéni kuítekaonni ntá kuaáni. ²⁸ Mé xikaha ó noheni kixin tsotjuáxin ijiéni tí tsitekaonni Dios kixin Dios tahya cuenta á kjuínchexiteyéheni tí nkehe k'uetōan tí ley.

²⁹ ¿Xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío. ³⁰ Kixin kohya í jnko Dios la jehe ch'án sinchetjóá ch'án ijiéni kixin tinkáchónkini ch'an la tahya ch'an cuenta á chóntani xroye o náhí. ³¹ A ntá tí tinkáchónkini Ìnchéni, la ¿á í chrókjuinchexiteyáhyani tí ley? Kjá náhí. Íchá antsí má jína chrókjuinchexiteyéheni tí ley.

4

Tí kjuakoxin ch'ín Abraham

¹ ¿Nkehe tsixroni kixin nkehe k'uitja ch'ín Abraham, tí nkexro k'uaxrjeníxinni ósé? ² Ntá ch'ín Abraham tí chrókótjuáxin ijié ch'án kixin tí xra kjuích'e ch'án ntá chrókóhnke ch'án, kjónté jehya nkayakon Dios. ³ A ntá ntáchro xroon itén Dios kixin: “Ch'ín Abraham kuítekaon Dios ntá táhó kuaáxin ch'án la ko kótjuáxin ijié ch'án.”* ⁴ Jnkojín chojni kjuích'e xra la jehya k'uáyéhekoá ch'án tí chichaon. Náhí. Táha la tí xra kjuích'e ch'án mé kjuacha ch'án. ⁵ A ntá kjónté jnkojín chojni kjuích'ehya ninkehó xra ntá chrókuítekaon ch'án Dios a ntá Dios la sinchetjóá ch'án kjónté tí nkexro chóna jié, kixin tí kuítekaon ch'án Dios la táhó mé kuaáxin ch'án. ⁶ Mé kjaxin tsintáchro ch'ín David kixin náxrjón tí nkexro kótjóá kixin Dios kuáhya kuentá nkerí jié tsíkjasin ch'án. ⁷ Ntáchro ch'ín David kixin:

Náxrjón tjejó tí nkexro kjuíncheyaon Dios kjónté jínahya kjuích'e sín la kjuakjinn ch'án ijié sín.

⁸ Náxrjón tjejó tí nkexro kixin Ìnchéni kuáhya ch'án kuentá tí jié k'uéchóna sín.†

⁹ ¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chóntahya xroye? Ó chrónkani kixin Dios la kuikonóehé tí ch'ín Abraham kixin kuítekaon tí jehe ch'án la táhó mé kótjuáxin ijié ch'án.‡ ¹⁰ ¿A ntá nkesá

* 4:3 Génesis 15.6 † 4:8 4.7-8 Salmo 32.1-2 ‡ 4:9 Génesis 15.6

tsíkjincheyaon Dios tí ch'ín Abraham? ¿Á ó tsíka ch'án xroye o naxa náhí? Kjá naxa náhí. Senó tsíkjincheyaon Dios tí jehe ch'án. ¹¹ Ntá chr'éxin ch'ín Abraham ikuá ch'án tí xroye éxí ijnko sello kjuakoxin Dios kixin ó kótjuáxin ch'án kixin kuinkáchónki ch'án Dios. Kixin ntá xikaha ts'óna ch'ín Abraham xjeen kaín chojni tinkáchónki Dios, kjónté chojni tsíkahya xroye. Ntá kjaxin jehe sín la Dios sinchetjóá ijié sín. ¹² La ko jehe ch'ín Abraham mé ts'axrjeníxin ch'án kaín tí sín tsíka xroye kixin ntá chrókuinkáchónki sín éxí kuinkáchónki tí jehe ch'án kjónté naxa tsíkahya ch'án xroye.

Tí nkehe tsíntácho Dios la tsoxiteyá kixin tinkáchónki sín tí jehe ch'án

¹³ Dios tsíntáche ch'ín Abraham kixin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya kixin kuítekaon ch'án tí ley. Náhí. Ts'áyéhe ch'án tíha kixin kuítekaon ch'án Dios la ntá Dios mé kjuínchetjóá ijié ch'án. ¹⁴ A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xikaha la ko tí nkehe tsíntácho Dios la kjá ninkehó sínkíhya tí xikaha. ¹⁵ Kixin tí ley la tjikao kixin tsjasótéxin chojni, a ntá tí chrókókohya ley la chrókókohya nkehe chrókjuanchia jie.

¹⁶ Méxra tí nkehe tsíntácho Dios la kjuasáyé ch'án tsjanjon ch'án kixin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhí. Kjaxin tí sín tsitekaon éxí kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni. ¹⁷ Éxí nixja xroon itén Dios kixin: “Janhan kjuánjuan kjuachaxin kixin jaha ts'óna it'é nchónhya chojni chjasintajni.”§ Mé xikaha tjetsjehe Dios kixin jína kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etōan ch'án kixin ts'óna tí nkehe naxa kohya.

¹⁸ Kjónté k'uéchóntahya ch'ín Abraham xjeen ch'án la kuítekaon ch'án la chónhen ch'án kixin ts'óna ch'án it'é nchónhya chojni éxí tsíchronka Dios kixin xikaha nchónhya chojni ts'axrjeníxin ch'án. ¹⁹ Ch'ín Abraham k'uéchónta ch'án chjina ijnko ciento nánó la kjánchó k'uítjáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kixin naxa chróchónta sín xjeen sín. ²⁰ Ch'ín Abraham la kóxakuenhya ch'án la ko chrakonhya ch'án kixin tí nkehe tsjanjon Dios. Náhí. Íchá antsí má kuinkáchónki ch'án Dios la ko kjuanchehe ch'án kjuasáyé Dios. ²¹ Ó nohe ch'ín Abraham kixin Dios chóna kjuachaxin sinchexiteyá kaín nkehe tsíntácho ch'án. ²² Dios k'uíkon kixin jehe ch'ín Abraham kuítekaon ch'án ntá Dios kjuínchetjóá ijié ch'án.

²³ La jehya kixin tsík'óna tí xroon kixin tí ch'ín Abraham ó. ²⁴ Náhí. Tsíkjin sín xroon kixin kjaxin jeheni chrókótjuáxin ijiéni kixin tsitekaonni Dios. Tíhi mé tí nkexro kjuínchexechón Ìnchéni Jesucristo. ²⁵ Jehe ch'án mé k'uenyákonhenni ch'án kixin tí jie chóntani. Ntá xechón ch'án ínaá kixin tsotjuáxin ijiéni kixin ó kuítekaonni tí jehe ch'án.

5

Kótjuáxin tí jie chóntani

¹ Kótjuáxin tí jie chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo. ² Kjuasáyé Cristo kixin jína tsochjineheni Dios kixin tinkáchónkini ch'án ntá ts'áyéheni kjuachaxin kuénte ch'án. Ntá tí kjuachaxin la jína tsjinkitsa kixin jína ts'ejóni la ko

§ 4:17 Génesis 17.5

tsochéhēni ts'ejóchónhēni kixin ntá tsjintaxín ts'áyéhēni tí kjuachaxin jié kuēnte Dios. ³ Kjaxin jehya táhó. Náhí. Kjaxin tsochéhēni kjónté nchónhya nkehe tsonhēni kixin ó nohēni kixin xikaha tsonhēni kixin ntá ts'itjani tsonínkakhēni. ⁴ A ntá tí xikaha jína chrók'uejóni ntá tsjachani kixin jína ts'ejóchónhēni. ⁵ A ntá tí tjejóchónhēni la tósuèhyani kixin Dios imá tjuèhēni ch'án la tí Nchakuen ch'án kjuanjón ch'án mé nchechéhē asénni.

⁶ Tí jehóni xitjahya chrókuaáni. A ntá tíó ikui Cristo la k'uenyákhēni ch'án kixin tí jié chóntani. ⁷ Kjá ninkexró chróntáchro chrók'uenyákhēn sín í jnko chojni kjónté ijnko chojni imá jína tjuèhe kíchó. Kohya nkexro xikaha chrókjuich'e. ⁸ A ntá Dios mé kjuakoxin kixin imá tjuèhēni ch'án kixin kjónté naxá chóntani jié la Cristo k'uenyákhēni. ⁹ A ntá Dios mé kjuínchetjuáxin ch'án ijíeni kixin Cristo k'uenyákhēni ch'án ntá ó nohēni kixin jehe ch'án tsaáxinni ch'án kaín tí nkehe chrókjuasótéxinni. ¹⁰ Kjónté naxá k'uenínkakhēni Dios la jehe ch'án mé kjuanjón ch'án kjuaxróxin kixin k'uenyákhēni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án. ¹¹ La jehya chrókótíhó. Kjaxin tsochéhēni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxinni kjuaxróxin tí tjen Dios.

Adán la ko Cristo

¹² Mé xikaha ó jnko nkexro kjuasin jié ntá k'uíxin jié kuénté chjasintajni. Mé xikaha kjuankíxin k'uén chojni ntá kaín chojni kjuankíxin k'uén kixin kaín sín kjuasin sín jié. ¹³ Kixin ósé la k'uékohya ley ntá ó xráxin k'uíxin jié chjasintajni kjánchó naxá kohya ley chrókjuanchia jié chrókjuasótéxín sín. ¹⁴ Desde kjuák'e ch'ín Adán hasta kjuák'e ch'ín Moisés la k'uéchóna kjuachaxin tí kjuach'én kixin tí jié kjuasin sín mé k'uenxín sín. Kjánchó tí jié kjuasin sín la yóehya tí nkehe kjuích'e ch'ín Adán, kuítékakhēni ch'án tí nkehe k'uetóan Dios. Ntá ch'ín Adán yóhē tsotsjehe éxí tí nkexro tsí chr'éxin.

¹⁵ Ntá tí jié kjuasin ch'ín Adán la xitjahya chrókóyóhē tí nkehe tsjanjón Dios kixin tí jié kjuasin jnkokoá chojni la ntá nchónhya chojni k'uenxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jína tíha kixin tsaáxin nchónhya chojni. ¹⁶ A ntá tí jié kjuasin jnkokoá chojni la tóyóehya tí nkehe tsjanjón Dios tsaáxinni. Kixin tí jié kjuankíxin kjuasótéxín chojni kixin kjuasin jnkokoá chojni jié. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jié chóntani kjónté nchónhya jié kjuasin chojni. ¹⁷ Tí kjuach'én la k'uéchóna kjuachaxin kixin tí jié kjuankíxín kjuasin jnkokoá chojni. A ntá kjuasáyé Dios kjuínchetjóá ch'án tí jié chóntani la ntá antsí tsochóntani kjuachaxin ts'ejóni jína kixin k'uenyákhēni jnkokoá nkexro, mé Cristo tíha.

¹⁸ A ntá tí jié kjuasin ch'ín Adán la ntá kaín chojni kjuasin sín jié chrokjuasótéxín sín. A ntá ijie la Cristo mé kótjuáxin ijíé kaín chojni kixin tí jína ch'án k'uenyákhēni ch'án. ¹⁹ Mé xikaha kuítékakhēni jnkokoá chojni, mé Adán tíha, ntá nchónhya chojni kjuasin jié. A ntá jnkokoá nkexro jína kuítékaon kjuakoxin, mé Cristo tíha, a ntá nchónhya chojni tsaáxin tí jehe ch'án kjónté k'uéchóna sín jié.

²⁰ Ikui tí ley kuínhin sín ntá kónoxín kixin íchá antsí kjuasin sín jié. A ntá antsí k'uíxin jié la kjónté xikaha la antsí má kuikonóhēni Dios kixin jehe ch'án tsjinkítsani ch'án tsaáxinni. ²¹ Mé xikaha tí jié k'uíxin k'uéchóna kjuachaxin kjuikao kjuach'én chrók'uenxinni. A ntá kjuasáyé Dios kjaxin antsí má chóna ch'án kjuachaxin sinchetjóá ch'án tí ijíeni la ko tsjanjón ch'án

kjuachón jnkochrínín kixin Ìnchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jië ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jië kixin ntá Dios naxa chrókjuakoxin ch'án kixin chrókuikonóeheni ch'án? ² Kjá náhí. A ntá jeheni la éxí chojni tsík'en chrokjuahya tsjasin jië. ¿A ntá nkekuènte naxa chrókjuasinni jië ínaá? ³ ¿Á noahyará jahará kixin tí kuíkiteni kixin tinkáchónkini Cristo la yóhë k'uénkoni ch'án? ⁴ Tí kuíkiteni la éxí yóhë xravákoni Cristo la ko tsík'enkoni ch'án kixin ntá ó xechónni ntá chrók'ujini ijnko ntja nixin mé xíkaha Cristo xechónxin ch'án tí kjuachaxin jié chóna tí It'é ch'án.

⁵ Kixin tí chaxín k'uénxinni éxí ik'uén tí jehe ch'án la ntá kjaxin tsoxechónni éxí xechón tí jehe ch'án. ⁶ Ó noheni kixin nkexrí k'uejóni senó mé táha mé k'uénxín Cristo kjuák'enkánixín ch'án ntacruz kixin ntá chrók'uitjáyanxín kaín tí jië k'uékjasinni kixin ijie í chrókjuinchexiteyèhyani tí jië. ⁷ Tí nkexro ó k'uén la ntá ó kuítóhe tí jië. ⁸ A ntá jeheni tí k'uénxinni Cristo la ó noheni kixin ts'ejókoni tí jehe ch'án. ⁹ Kixin ó noheni kixin Cristo jnkokoá vez xechón ch'án a ntá í ts'enhya ch'án ínaá kixin tí kjuach'én í chónahya kjuachaxin kixin naxa ts'óyán tí jehe ch'án. ¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijieni. Ntá xechón ch'án ijie kixin tsjak'eko ch'án Dios. ¹¹ A ntá kjaxin jahará chrókjuenkayáxinrá kixin ik'uénrá, xítjahya tsjásinrá jië kixin ntá ijie la xíxechonrá chrókjuich'eherá xra Dios kixin tinkachónkirá Cristo Jesús, mé Ìnchéni tíha.

¹² Méxra chrókuítóéhyará kixin chrókjan tí jië chrók'uetuèhen tí cuérporá ínaá kixin tí jië chrók'uetoan kixin chrókjuinchexiteyéhérá tí nkehe tjenkayáxinrá. ¹³ Tjánjonhyará tí cuérporá kixin chrók'óna nkehe chrókjuásixínrá jië. A ntá íchá jína chróchjehérá asánrá Dios éxí ijnko chojni tsík'en ó xíxechón ínaá. Chjehérá Dios tí cuérporá ts'óna ijnko nkehe sich'exín ch'án xra jína. ¹⁴ Kixin tí jië la í chónahya kjuachaxin ts'etuèhen tí jahará. Jehya tí ley ts'etoan ijie. Náhi, jehó kjuasáyé Dios.

Kjuíncheyóexin ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jië kixin í t'etuèhyani tí ley? Kjá náhí. Kjuasáyé Dios tsaáxinni la kjá í chrókjuasinhanyi jië. ¹⁶ Jahará ó nohará jína kixin tí sich'eheeni ijnko lámō xra la tsitekakönhenni ch'án la tí xíkaha la t'ichjánxin ch'eheeni xra tí lámō la t'ichjánxin sinchexiteyèhëni ch'án. Mé xíkaha tónhen tí naxa sinchexiteyèhëni tí jië la táha mé ts'énxinni. A ntá tí tsitekaonni Dios la mé chrók'uejóni jnkojína. ¹⁷ Jahará la ósé k'uékjásinrá jië, a ntá ijie kjuasáyé Dios kuíkonóahará ch'án kixin kaín asánrá kuítekáonrá tí nkehe xrakohará. ¹⁸ A ntá ó kuítóhérá tí k'uékjinchexiteyéhérá tí jië. A ntá ijie ó kjuánjonrá asánrá kixin sich'erá xra jína kuènte Ìnchéni. ¹⁹ A ntá jie nixja éxí ijnko chojni ó kixin jahará la tiénxinyará jína tí nkehe i. A ntá xíkaha tí senó kjuinchexiteyéhérá tí nkehe ntoáhya la ko jínahya kixin sich'erá tí nkehe jínahya. A ntá ijie la xíkaha chrókjuánjonrá tí cuérpo kuéntará kixin chrókjuich'exínrá tí xra jína éxí tjinkaon Dios kixin ntá jehe ch'án chrókjuinchetjóará ch'án.

²⁰ A ntá tí jahará tió naxa kjuinchexiteyéhérá tí jië la ntá xítjahya sich'erá tí xra jína ntoá. ²¹ ¿A ntá nkehe chrókjuachará kixin xíkaha kjuich'erá tí nkehe chrókósuáxinrá ó? Ntá xíkaha kjuéyará tí nkehe ts'énxínrá ó. ²² Na ntá ijie ó kjuin tí nkehe k'uék'etuəhanrá k'uékjásinxínrá jië. A ntá ijie

ch'eherá xrā Dios. Táha la tsjinkitsa kixin ts'ejoxinrá jína kixin ntá tsjixixín tsotjuáxinrá ts'ayéhérá kjuachón jnkochríchín. ²³ A ntá tí chrókuasinni jie la chrókuachani kixin éxí chrók'uenni ó. A ntá tí nkehe chrókjuinchekitonhenni Dios la kjuachón jnkochríchín kixin tinkáchónkini Ìnchéni Cristo Jesús.

7

Kjuíncheyóexin ch'ín Pablo kuènte tí sín tsíkótehe

¹ Kíchóni, jahará ó choxinrá tí ley la ó nohará kixin tí ley chóna kjuachaxin ts'etuenhen tí chojni naxā tjejóchón ó. ² Tíha mé ts'axrjexín éxí ijnko chojni chjin tsíkótehe la tí xii tjan chóna kjuachaxin ts'etuenhen tjan kixin naxā tjechón ch'án. A ntá tió tsík'en tí xii la ntá tí tjachjin la ó kuitohe tí k'uék'etuenhen ch'án tjan. ³ A ntá tí jehe tjan chrókuakja í jnko chojni ntoa tí naxā tjechón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuitohe tí k'uék'etuenhen ch'án tjan la jína tsotehe tjan í jnko chojni ntoa la jehya jie tíha.

⁴ Mé xikaha jahará kichó ni mé k'uenyákonhenni Cristo la ntá jahará la éxí tsík'enrá kixin í t'etuanhyará tí ley la éxí chrókuákjára í jnko xiará la mé xikaha tinkachónkirá Cristo. Cristo mé xechón ch'án inaá kixin ntá jína chrókjuich'ehe ni xrā Dios. ⁵ Tió naxā k'uékjasinni jie a ntá tí ley chrókjuich'e xrā kixin chrókjuasinhanyi jie, a ntá íchá antsí má kjuasixinni jie tí cuerpo kuénteni, la táha mé kjuixín tí ts'enxinni. ⁶ A ntá ijie la éxí yóhe ik'uenni, a ntá tí ley chónahya kjuachaxin naxā ts'etuenhenni. A ntá ijie í kohya nkehe t'inkákonhen kixin jína sich'ehe ni xrā Dios kixin k'ónani ijnko chojni nixín kixin tí Nchakuen Dios k'uáyeheni. A ntá í t'etuenhyani tí ley ntaxin tsík'óna.

Tí jie naxā chonta

⁷ A ntá tí xikaha la, ¿nkehe chróchroni? Kixin tí ley la, ¿á jie táha ní? Kja náhi. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kixin tí nkehe ókjé chrókjuakéhya asenná tí chróchrónkahya tí ley kixin chrókjuakéhya asenná tí nkehe ókjé. ⁸ A ntá tió kónona tí ley a ntá tí jie antsí kjuacha k'uetōan. La ntá k'uixín kaín nkehe ntáchro asenná. A ntá tí chrókohya ley la chrókónoxínhya tí jie chrók'uenxian. ⁹ A ntá tí ósé la nonahya nkehe tí ley. A ntá tió nóna nkehe tí ley, a ntá antsí kjuásian jie la ntá ó nóna kixin tí jie kjuásian me ts'énxian. ¹⁰ Mé xikaha kónhen kixin tí ley chrókjuanjon kjuachón ntá kjuikao tí ts'enxinni. ¹¹ Ntá tí jie mé kjuacha k'uetōan kixin sintaxiteyáhya tí ley. A ntá tí ley mé kjuanchia jie ts'énxian.

¹² Mé xikaha tí ley la chaxín jína la ko tí nkehe t'etōan Dios la kjaxín jína. ¹³ Mé xikaha tí nkehe jína la ¿á táha chrók'uenxian? Kja náhi. Tí jie kjuásian mé ts'énxian. Mé xikaha kjuakoxín tí nkehe jie kixin tsonoxín tí jie kixin tí ley la jína. Mé xikaha kjuakoxín tí ley kixin tí jie tjasin chojni mé imá jínahya tíha.

¹⁴ Ó noheni kixin tí ley la kuènte Dios tíha. A ntá janhan la kjuintaxiteyáha tí ntáchro asenná kixin tí jie kjuacha k'uetuanna. ¹⁵ A ntá tí janhan la tí nkehe tjet'a la kjaxín naxā tjanxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a. ¹⁶ A ntá tí nkehe tjínkakhonhya chrókjuít'a la tíha me it'a la mé xikaha tjátsoanxián kixin tí ley la jína. ¹⁷ A ntá jehya janhan it'a tíha. Náhi tí jie chonta mé ch'e tíha. ¹⁸ Kixin janhan ó nóna kixin tí ntáchro asenná la kohya nkehe jína chrókjuít'a. Tjínkavan chrókjuintaxiteyá tí nkehe jína kjánchó tjachahya sit'a tíha. ¹⁹ T'ahya tí nkehe jína chrókjuít'a. Tí nkehe jínahya tjínkakhonhya chrókjuít'a mé it'a. ²⁰ A ntá tí it'a tí nkehe jínahya tjínkakhonhya chrókjuít'a la ntá jehya janhan it'a tíha. Náhi. Tí jie chonta mé ich'e tíha.

²¹ Tónòna tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya. ²² Kjónté xíkaha la tóxrjìnna chrókjuíntaxiteyáha tí ley kuènte Dios. ²³ T'íkuañ kíxin tí nkehe ntáchro asenná mé t'ínkákonhen tí nkehe tjínkavan chrókjuít'a. A ntá ti jie chonta mé éxí tjéchjinaxián tíha.

²⁴ Nòna tí janhan. ¿Xá nkexro chrókjuatsen tí jie chóna tí cuerpo kuèntana chrók'uénxiñ? ²⁵ Kjuasáya tjaha Dios kíxin ikui Ìnchéni Jesucristo kuaáxinni. Mé xíkaha tí janhan la it'ona tjenkayáxiñ kíxin chrókjuíntaxiteyáha Dios a ntá tí t'ona mé ntáchro asenná chrókjuíntaxiteyáha tí nkehe kuènte tí jie.

8

Tjejóchónxinni Nchakuen Dios

¹ A ntá ijie tí sín tinkáchónki Cristo Jesús la kohya jie chrókjuasótexín sín. Jehé sín í tjínkakonhya nchexiteyá sín xíkaha ntáchro asén sín. Jehó tjinkaon sín sinchexiteyéhe sín Nchakuen Dios. ² Kíxin tí nkehe t'etóan Nchakuen Dios mé tjanjon kjuachón kíxin tinkáchónkini Cristo Jesús. Tíha mé kjuatsen tí nkehe kuènte jie chrók'uenxínni. ³ A ntá Dios kjuích'e tí nkehe kjuachahya kjuích'e tí ley kuènte ch'ín Moisés kíxin jeheni kjuachahyani chrókjuinchexiteyéheni tíha. A ntá Dios mé ichr'án ch'án Xjeen ch'án k'óna éxí chojni. La xrā ó kui ch'án k'uenyákonhen ch'án tí ijíeni kaín ni ntihi chjasintajni la kjuatsen ch'án tí jie chrók'uitjáyaxínni. ⁴ Mé xíkaha kónhen kíxin ntá jeheni jína chrókjuinchexiteyéheni tí nkehe t'etóan tí ley la chrókjuinchexiteyéhyani tí nkehe ntáchro asénni ó. Náhí. Chrókjuinchexiteyéheni tí nkehe ntáchro Nchakuen Dios.

⁵ A ntá tí sín tjinkaon nchexiteyéhe tí nkehe ntáchro asén sín ntá táhó tjenkayáxin sín. A ntá tí sín tjinkaon nchexiteyéhe Nchakuen Dios la ntá xritjeyá sín tí nkehe kuènte Nchakuen Dios. ⁶ A ntá tí sín tóxakonhen tí nkehe ntáchro asén sín la táhó ts'enxín sín. A ntá tí sín tóxakonhen tí nkehe kuènte Nchakuen Dios la tsochóntaxín sín kjuachón la ko kjuaxróxin. ⁷ A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kíxin tjínkakonhya sín la ko titekakonhya sín tí ley. ⁸ Tí sín tóxrjínhin sín tí nkehe ntáchro asén sín ó la xitjahya sinchexitéhe sín Dios.

⁹ A ntá jahará la nchexiteyéhyará tí nkehe ntáchro asánrá. Náhí. Jahará nchexiteyéhéra Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo. ¹⁰ A ntá tí Cristo tjejókoará tí jahará la tí asánrá la tjechón kíxin Dios kuíkonóahará, kjuínchetjóá ch'án tí ijíará, kjánchó tí cuerpo la éxí tsík'en kíxin tí jie chontará. ¹¹ A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjéhe ch'án kjuachón nixín tí cuerpo kuèntará kjónté chóna jie kíxin tí Nchakuen Dios chontará jahará.

¹² Mé xíkaha kíchó ni, ó chóntani nkehe sinchexiteyéheni, kjánchó í chrókjuenkayáxinhyani tí nkehe ntáchro asénni. ¹³ A ntá jahará tí chrók'uejorá éxí ntáchro asánrá la tíha la mé chrók'uénxínni. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínni.

¹⁴ Kaín tí nkexro t'etuenhen Nchakuen Dios la mé ó k'óna xjeen Dios. ¹⁵ Ntá Nchakuen Dios ó k'uayéhéra jahará la jehya tí nchakuen tí nkehe k'uék'etuanhanrá ósé kíxin chróchrakonrá. Náhí. Ntá tí Nchakuen chóna la k'ónaxínni xjeen Dios. A ntá tí Nchakuen ch'án nchexraxinkaonni tsontáchroni kíxin: "It'eni Dios kuèntá tí jeheni." ¹⁶ Tí Nchakuen Dios tónoexín nchakuenni kíxin k'ónani xjeen Dios. ¹⁷ A ntá ó k'ónani xjeen ch'án la kjaxin

tsjanjon ch'án tí nkehe ts'áyéheni éxí tsintáchro ch'án ósé. Mé ts'áyèkoni Cristo tí nkehe tsjanjon Dios. Tí chaxín tsjasóteni éxí Cristo kjuasóte ntá chr'éxin ts'ejókoni ch'án kjuaxróxin.

Tí kjuachaxin jié itsi chr'éxin

¹⁸ A ntá ijie la tóxakuenhyani kjónté nkehe ts'atsínkani tsjasótexínni kixin tíha la ninkehó sínkíhya kixin tíha la xitjahya tóyóhe tí nkehe ts'áyéheni chr'éxin kixin antsí má jína náxrjón tíha. ¹⁹ Tí nkehe tsík'óna tjejóchónhen kixin ts'ikon tí sín tsík'óna xjeen Dios. ²⁰ Kjónté kaín nkehe tsík'óna síin la ts'itjáyán tíha la jehya kixin xíkaha tjinkaon tí nkehe tsík'óna. Náhi. Jehí xíkaha tsík'etōan Dios. Ntá tjejóchónhen kaín nkehe tsík'jich'éna Dios ²¹ kixin chróchóna kjuachaxin chrók'uitjáyánhya. Ntá náxrjón ts'ixin kaín nkehe éxí náxrjón ts'ejó tí sín tsík'óna xjeen Dios. ²² Ó noheni kixin kaín tí nkehe kjuích'éna Dios la naxa tsjasóte éxí yóhe tjetéxin ijnko chojni nchekokjíhi xjeen. ²³ A ntá jehya jehó tí nkehe tsík'óna t'ikon chojni chrókjoté. Náhi. Kjaxin jeheni tjasóteni kjónté chótani Nchakuen Dios kixin tí Nchakuen Dios la mé tí nkehe xrankíxixín kuákjani la naxa ts'áyéheni inaá tí nkehe naxa tsjanjon Dios. Tjejótasóteni la ko tjejóchónhenni kixin tsjintaxín ts'ónani xjeen Dios la ko ts'áyéheni tí cuerpo chónhya ts'en. ²⁴ Mé ó kuaáxinni la naxa tjejóchónhenni tí nkehe t'ikonhyani. Tí k'uíkōni tí nkehe tjejóchónhenni ntá t'ichjánxinhya chrók'uejóchónhenni. Tí nkehe ó t'ikōni la t'ichjánxinhya chrók'uejóchónhenni naxa chrók'uikōni inaá. ²⁵ A ntá tí chónhenni tí nkehe naxa t'ikonhyani la ntá t'ichjánxin tsonínkakōnyani tsochónhenni.

²⁶ Mé kjaxin xíkaha tí Nchakuen Dios tjinkitsani tí noehyani nkexrí tsonixjeheni Dios kixin chaxín noehyani tsonixjeheni ch'án éxí chrónixjani. A ntá tí Nchakuen Dios tjinkitsa nixjaxin ch'án tí jeheni kjónté noehyani nkexrí tsochrónóaxinni éxí tjinkaon ch'án. ²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxí tjinkaon Dios la nixjaxin ch'án tí sín tinkáchónki Dios.

²⁸ Ó noheni kixin Dios la k'uetōan kaín nkehe chrók'uaxrje jína kixin tí sín tjuèhe ch'án kixin tsík'jeyá ch'án sín kixin xíkaha tjinkaon ch'án. ²⁹ Tí sín tsík'jeyá Dios ósé la ntá tsík'íyehé ch'án kixin ts'óna sín éxí tí Xjeen ch'án kixin ntá tí Xjeen ch'án mé ts'etūenhen nchónhya tí sín kíchó ch'án. ³⁰ Mé xíkaha tí sín tsík'jeyá Dios ósé mé kjaxin k'uíyehé ch'án sín la ko tí sín k'uíyehé ch'án la kjuínchetjóa ch'án ijie sín la ntá tí sín kjuínchetjóa ch'án ijie la kjuanjon ch'án kjuachaxin kuènte ch'án tsochóna sín.

³¹ ¿A ntá nkehe chróchroni tí xíkaha? Tí Dios tjuèhe tí jeheni, ¿a ntá nkexro chrókjuacha chrókónínkakōnhen tí jeheni? ³² Kixin Dios la kjiakuènhya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án. ³³ ¿Nkexro chrókjuacha chrókjuanchia jié chrókónínkakōnhen tí sín kjueyá Dios? Kixin Dios la ó kjuínchetjóa ijie tí sín a. ³⁴ ¿Nkexro chrókjuinchekjásóte tí jehe sín? Kixin Cristo la ó k'uenyákonhen sín la kjaxin xechón ch'án inaá la itjen ch'án tí tja chjina Dios tjen nkaya nkajní la tjechronò ch'án kixin kaín tí jeheni. ³⁵ ¿Xá nkexro chrókuakitsjeheni tí tjuèheni Cristo? Kjónté ichrén nkehe chrókónhenni la ko chrókónínkakōnhen chojni tí jeheni la ko kjónté chrók'uenxínni kjinta la ko chróchóntahyani ikéni o kjónté tí kjuaxikaon chrók'uenxínni la chrókuítōehya ch'án tí jeheni. ³⁶ Éxí ntáchro xroon itén Dios kixin:

Tí tinkáchónkini tí jaha la síin kjuaxikaon kaín yaon chrók'uenxínni.

Chrók'óyánni sín éxí t'óyán sín kolélo tí matanza.*

* 8:36 Salmo 44.22

³⁷ Kaín tíha la antsí chrókjuachaxinni kixin kjuachaxiэн tí nkexro tjuèheni.
³⁸ Ó noheni kixin ninkehó nkehe tsjachahya tsakitsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxiэн tí jínahya, o kjónté tí nkehe sítonhen ijie, o tí nkehe tsonhen chr'éxin, ³⁹ o kjónté tí nkehe síin nkaya nkajní, o tí nkehe imá ninka síin chjasintajni, o íjnko nkehe kjuích'éna Dios. Mé kohya nijnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Inchéni Jesucristo.

9

Dios kjueyá tí sín Israel

¹ Ntoá xrjanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxín. ² Imá t'ává asenná la ko náxrjónhya tjèn ³ kixin tjínkavan kjónté chrók'uitjáyaxinna tí tinkachónkia Cristo kixin ntá jína chrókuinkáchónki Cristo tí sín kíchiná naxa kjéhyana. ⁴ Jehe sín mé tsík'axrjenixin sín tí sín Israel la Dios k'uáyéhe sín éxí xjeen ch'án la ko Dios chónthehe tí jehe sín la kjuanjon kjuachaxiэн ch'án la kjaxin k'uáyéhe sín tí nkehe k'uetóan Dios la ko ti ley tsíkjín ch'ín Moisés la ko k'uáyéhe sín kjuachaxin ts'etóan sín kixin nkehe tí xra tsonhen nkaxenhen ninko la ko k'uáyéhe sín tí nkehe tsíntácho Dios. ⁵ Tsík'axrjenixin sín tí sín tsík'axrjenixinni ósé la kjaxin Cristo tsík'axrjenixin tí sín israelita tió k'óna ch'án chojni. Jehe ch'án mé Dios kuénte kaín nkehe la tinkáchónkini ch'án jnkochrixin. Amén.

⁶ A ntá tí nkehe chrókuakja tí sín Israel kjuanjon Dios la jehya kixin chróxiteyáhya tíha. Náhí. Kixin jehya kaín tí sín tsík'axrjenixin tí sín israelita mé chrók'óna sín chojni chjasin Israel. ⁷ Kixin kénhya tí sín k'uaxrjenixin ch'ín Abraham chrók'óna xjeen ch'án. Dios mé tsíntáche ch'ín Abraham kixin: “Tí sín ts'óna kjéhya jaha mé ts'axrjenixin sín ti ch'ín Isaac.”* ⁸ Tíhi mé tienxínni kixin ninkexró xitjahya ts'óna xjeen Dios kixin tí tsík'axrjenixin sín chojni ó. Náhí. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjenixin sín ch'án. ⁹ Tí nkehe tsíchenka Dios tí ch'ín Abraham mé tíhi: “Itsi ijnko yaon mé tjan Sara sich'éna tjan ijnko xjan.”†

¹⁰ A ntá jehya táhó. Náhí. Kjaxin tí yaá chánjan tsík'jich'éna tjan Rebeca mé chóna jnkokoá it'é xjan mé it'in Isaac, mé tsík'axrjenixinni ch'án. ¹¹ A ntá tí xjan la naxa kokjéhya xjan la ninkehó nkehe jína o jínahya kjuích'e xjan. Ntá kjuakoxin Dios kixin chóna ch'án kjuachaxin éxí tsíkjenkayáxian ch'án tsjeyá ch'án nkexro ts'íyehé ch'án la tahya ch'án kuentá nkehe tí xra kjuích'e sín. ¹² Ntá kjónté la ntá chenka ch'án tí tjan Rebeca kixin: “Tí ch'ín saó mé sich'ehe xra tí ch'ín tsoyo.”‡ ¹³ Mé kjaxin xikaha ichro xroon itén Dios kixin: “Tjuaha Jacob, a ntá Esaú la náhi.”§

¹⁴ ¿A ntá nkehe chróchroni? ¿Á ntoáhya tjenkayáxian Dios? Kjá náhi. ¹⁵ Kixin tsíntáche Dios tí ch'ín Moisés kixin: “Tsojtjuaha tí nkexro tjínkavan tsojtjuaha la ko tsíkonóaha tí nkexro tjínkavan tsíkonóaha.”* ¹⁶ Jehya éxí tjínkaon chojni o jehya kixin tí nkehe ch'e chojni. Náhí. Ó jehí Dios tsíkiikonóehé ti jehe sín. ¹⁷ Tí ntácho xroon itén Dios mé nixjehe Dios tí ch'ín rey Egipto kixin: “Kjuánjuan kjuachaxin kixin jaha k'óna rey kixin tjínkavan chrókjuákoxian kjuachaxin kuéntana kixin ntá kuenté chjasintajni chrókónohe la chrókuitekaon tí nina.”† ¹⁸ Mé xikaha tí tjínkaon Dios tsíkonóehé ch'án chojni la tsíkonóehé ch'án, a ntá tí nkexro tjínkakonhya ch'án tsíkonóehé ch'án la tsíkonóehé ch'án.

* 9:7 Génesis 21.12 † 9:9 Génesis 18.10 ‡ 9:12 Génesis 25.23 § 9:13 Malaquías 1.2-3 * 9:15 Éxodo 33.19 † 9:17 Éxodo 9.16

¹⁹ **A** ntá tsontáchrórá kixin: “**A** ntá tí xikaha la, ¿nkekuènté t'eka Dios chojni jie? ¿Nkexro chrókjuacha chrókjuanjonko tí nkehe t'etöan Dios?” ²⁰ ¿Xá nkexro tí jahará kixin chróntácherá Dios xikaha? ¿Á ti chí tsík'óna nchetje chróntáche tí ìnché chí kixin: “¿Nkekuènté xikaha kjuích'énani?” chróchro. ²¹ **A** ntá kjaxin tí nkexro ch'éna chí mé chóna kjuachaxin tjinkaon sich'éna ch'án tí nkehe tóxrjínhìn ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhya.

²² Tjinkaon Dios chrókjuakoxìn ch'án tí kjuachaxin kuènte ch'án chrókjuincheckjasóte ch'án chojni la kjónté xikaha kónhen la kjuacha ch'án kónínkakonhya ch'án la kuikonóehé ch'án tí sín chrókjuincheckjasóte ch'án kixin chrókjuincheck'itjáyan ch'án sín. ²³ Mé xikaha kjuích'e ch'án kjuakoxìn ch'án tí kjuachaxin imá jié chóna ch'án kixin jehe ch'án kuikonóeheni ch'án kixin xikaha tsíkjenkayáxin ch'án ósé kixin náxrjón chrók'uejókoni tí jehe ch'án. ²⁴ Mé xikaha Dios tsíkjejá ch'án iso tí sín judío la ko iso tí sín jehya judío. ²⁵ Mé xikaha ntáchro tí xroon tsíkjin ch'ín Oseas kixin:

Tí sín jehya chjasenná la mé sintak'ian chjasenná.

La tí sín k'uétjuahya mé tsotjuaha sín ijie.‡

²⁶ Tí chjasin ntiha tsíntáchro ch'án kixin: “Jahará jehya chjasenná”,

a ntá ijie sintak'ian xjeen Dios tjechón.§

Mé xikaha ichro itén Dios. ²⁷ Kjjaxin nixja ch'ín Isaías kuènte tí sín israelita tsíntáchro ch'án kixin: “Nchónhya chojni ts'axrjeníxin tí sín Israel éxí tí nchónhya nchesen síín ntayaon kjánchó tsjéhya tí jehe sín tsjacha sín tsaá sín.

²⁸ Ntá tjoka tsonhen tí nkehe tsíntáchro Ìnchéni sinchexiteyá ch'án.”* ²⁹ Ntá kjjaxin ch'ín Isaías tsíntáchro ch'án ósé kixin:

Tí Ìnchéni chóna kaín kjuachaxin kuítóehya chrók'uitjáyan kaín tí sín k'uaxrjeníxin Israel éxí k'uitjáyan tí sín chjasin Sodoma la ko Gomorra.†

Tí sín judío la ko tí tan jína

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijíé sín ntá kjónté la k'uitja sín kixin tsotjóá ijíé sín kixin tinkáchónki sín Cristo.

³¹ **A** ntá tí sín israelita chrókjuinchexiteyéhe sín ley kixin chrókótuáxin ijíé sín kjánchó kjuachahya sín kjuínchexiteyéhe sín tíha. ³² ¿**A** ntá nkekuènté kixin xikaha k'uitjahya sín nkexrí chrókuinkáchónki sín Dios? Kixin kjueyáhya sín nkexrí chrókjuinchetjóá ch'án ijíé sín kixin tinkáchónki sín ch'án. Jehó tí xrá kjuích'e sín chrókuaáxin sín, ichro sín. La méxrá xikaha tjen tí xró kóténkixin sín. ³³ Mé xikaha chronkaxín xroon itén Dios kixin:

Mé xikaha kjuaké tí xró chjasin Jerusalén mé tí xró tsóténkixin sín la ko tí tjó ts'ánótjenxin sín.

A ntá tí sín chrókuitekaon tí jehe la chrókósuèhya sín.‡

10

¹ Kíchóni, kaín asenná níxjaha Dios kixin tjínkavan kixin tí sín israelita chrókuaá sín. ² Janhan ntáxrjan kixin tí sín israelita imá tjinkaon sín chrókjuich'ehe sín xrá Dios kjánchó chaxínhya kixin jehe sín la tienxínhya sín.

³ Kjjaxin noehya sín kixin nkexrí chrókjuinchetjóá Dios tí ijíé sín. **A** ntá jehó sín xritjejá sín nkexrí chrókótjóá sín la tjínkakonhya sín chrókjuinchexiteyéhe sín Dios. ⁴ **A** ntá Cristo mé kjuínchexiteyá kaín nixja tí ley. **A** ntá ijie kaín tí sín kuítekaon tí jehe ch'án mé sinchetjóá ch'án ijíé sín.

‡ 9:25 Oseas 2.23 § 9:26 Oseas 1.10 * 9:28 Isaías 10.22-23 † 9:29 Isaías 1.9 ‡ 9:33 Salmo 118.22

⁵ A ntá tí chrókótjóá ijíé sín kixin tí ley la ch'ín Moisés mé tsíkjin ch'án xikihi: “Tí nkexro chrókjuinchexiteyéhe kaín tí ley la táhó chrókuaáxin sín.”* ⁶ A ntá tí chrókjuínchetjóá Dios tí ijíeni kixin tí tinkáchónkini ch'án ó mé ntáchro xikihi: “Ntáchrohýará kixin, ¿Xá nkexro sáchrókjuí nkaya nkajní? (Tí xikaha la t'axrjexín kixin naḡa chrókui Cristo.) ⁷ La ko ntáchrohýará kixin: ¿Xá nkexro chrók'uinkajin tí imá ninka?” (Mé t'axrjexín tíha kixin chrókjuíkkajín sín Cristo chrók'uaxrjetaón ch'án kixin itjen ch'án tí síin tí sín tsík'en, ichro sín.) ⁸ ¿A ntá nkehe ichro? Ntáchro kixin: “Ítén Dios la chjinaxón tjen tí tjejorá kixin ó nohará la ko xraxinkaon asánrá.”† Tí tan a mé tí nkehe tinkáchónkini kjuakoni. ⁹ Tí ir'va tsontáchromian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá. ¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchromian kixin choxian Jesucristo ntá sinchekaá ch'án tí jaha.

¹¹ Ntáchro xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”‡ ¹² Dios la t'íkon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. ¹³ Mé xikaha ntáchro xroon itén Dios kixin: “Kaín tí sín tjanchaxín nkehe ihnié Ìnchéni la tsaá sín.”§ ¹⁴ ¿A ntá nkexrí chrókjuanchehe sín ch'án kixin chrókjuinkítsa ch'án sín tí naḡa kuítekakonhya sín ch'án? ¿A ntá nkexrí chrókuitekaon sín tí jehe ch'án tí naḡa kuíenhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakohé sín tí itan a? ¹⁵ ¿La nkexrí chrókjuichronka sín tí tan tí kohya nkexro ichr'án sín sátsji? Éxí ntáchro xroon chóna itén Dios kixin: “Náxrjón tí sín xrichronka itan jína.”*

¹⁶ Kjánchó kénhya sín titekaon sín tí itan tsaáxinni. Tsíntáchro ch'ín Isaías kixin: “Ìnchéni ¿xá nkexro ó kuítekaon tí tan xrichronkani?”† ¹⁷ Méxra t'ichjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

¹⁸ A ntá tjánchánkía kixin: ¿Á kuíenhya sín tí tan? Kjá ó kuínhin sín. Ntáchro xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni. Tí nkehe nixja sín la ó kjuixraká hasta kjuèxin chjasintajni.”‡

¹⁹ Ntá tjánchánkía inaá: ¿Xá tí sín Israel la naḡa kíenxínhya sín ní? Senó ntáchro ch'ín Moisés kixin:

Ijnko chjasin jehya chjasin kuèntana la tsoninkákonhénra sín kixin injko chjasin tjinkakonhya tsinhin la tsoninkákonhénra sín. §

²⁰ Ntá ntáchro ch'ín Isaías kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

²¹ La ko nixja ch'ín Isaías kuènte tí sín israelita kixin: “Kuenté yaon k'uíyaha injko chjasin síin chojni titekakonhya sín la ko jiehe sín.”†

11

Tí sín Israel tsíkjeyá Dios

¹ A ntá ijie tjánchánkía kixin: ¿Dios la á kuítóhe ch'án tí sín Israel? Kjá náhí, kixin janhan kjaxian israelitana la t'ikiníninna ch'ín Abraham la ko k'uaxrjeníninna ch'ín Benjamín. ² Kixin ósé tsíkjeyá Dios tí sín israelita kixin

* 10:5 Levítico 18.5 † 10:8 Deuteronomio 30.12-14 ‡ 10:11 Isaías 28.16 § 10:13 Joel 2.32

* 10:15 Isaías 53.1 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21

* 10:20 Isaías 65.1 † 10:21 Isaías 65.2

ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehē ch'án Dios tjanchia ch'án jie kuènte tí sín Israel? Mé ntáchro xikihi: ³ “Inchéni, jehe sín k'óyán sín tí sín chrónka itán la ko k'óxíka sín tí altar kuéntá ntá jehóni kuítóheni tjechónni la tjinkaon sín kjáxin chrók'óyán sín tí jeheni.”* ⁴ A ntá Dios kjuátehe ch'án kixin: “Naxa kuítóhe yato mil chojni kuítekaon sín tí janhan kjuíxienhya sín toch'in sín tí nkehe tsíkjanoya Baal.”† ⁵ Ntá kjáxin xikaha ijie naxa kuítóhe iso tí sín naxa tinkáchónki Dios. Kjuasáyé Dios kixin kuikonóehē ch'án tí sín la tsíkjeyá ch'án kixin tsaá iso ti jehe sín. ⁶ Mé xikaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuaáxin sín. Náhi. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

⁷ A ntá tí xikaha la, ¿nkexrí? Tí sín israelita la k'uitjahya sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín í so a la icha asén sín la kuítekakonyha sín. ⁸ Éxí ntáchro xroon itén Dios kixin: “Dios kjuanjonyha kjuachaxin chrókienxín tí sín a la ko mé kjáxin xikaha naxa sítonhen tí yaon ijie. La kjuanjonyha ch'án kjuachaxin kixin chrók'uikon sín la ko chrókienxín sín.”‡ ⁹ Kjáxin tsintáchro ch'ín David kixin:

Tí kia tjasin sín mé tjasixín sín jie,
tsjasótexín sín.

¹⁰ Tí ikon sín ts'ikonxínhya sín kixin ts'óna sín ntakótán
ntá tí jie kuènte sín mé jnkochrín yámá sín. §

Tsaá tí sín jehya sín judío

¹¹ A ntá ijie tjánchánkiá: Tí sín judío la tí kjuasin sín jie la ¿á ó naá kuítóexón Dios tí jehe sín? Kjá náhi. Tió kuítekakonyha tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín. ¹² A ntá tí jie kjuasin tí sín judío, a ntá kuítóhe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. A ntá tí nkehe ntoáhya kjuích'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuítekaon sín Cristo la antsí má náxrjón tíha.

¹³ Chonta iso nkehe chrókuinhírá jahará jehya judíorá kixin Dios mé chr'ánna kixin tsjakohá tí sín jehya judío la antsí tjetóan tí xra kuènte Inchéni chrókjuít'a. ¹⁴ Tjínkavan kixin tí sín chjasenná chrókóchjinoxínhin sín kixin jahará tinkachónkirá Dios kixin ntá chrókjuacha chrókuaá iso tí jehe sín. ¹⁵ Kuítóhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuítekaon tí sín judío kjáxin la yóhe éxí chróxechón chojni tsík'en tí jehe sín. ¹⁶ Tí chrókjuinchetjóá Dios tí niotja xrankíxixín chrók'óna tí ich'o la ntá kuenté tí ch'o chrókjuinchetjóá ch'án. A ntá kjáxin tí chrókjuinchetjóá ch'án tí nuèé ijnko nta la kjáxin kaín tí chaon tí nta chrókjuinchetjóá ch'án.

¹⁷ Ntá isó tí sín judío la éxí iso chaon tí nta olivo mé xikaha tsíchrinjin la ntá jahará la éxí ijnko chaon nta olivo nteje tsík'óna injerto mé xikaha ts'ejóchónxin tí nta chaon tí tronco tí nta olivo jína xráxin tjechón.

¹⁸ Ntáchrohyará kixin tí chaon tí nta la antsí jína. Íchá jína tsontáchorrá kixin jehya tí nta t'etuenhen ti nuèé nta. Náhi. Tí nuèé mé tsjinkítsa tí nta mé xikaha tí jahará.

* 11:3 1 Reyes 19.10, 14 † 11:4 1 Reyes 19.18 ‡ 11:8 Deuteronomio 29.4; Isaías 29.10 § 11:10 Salmo 69.22-23

¹⁹ Ntá jahará tsontáchrórá kixin: “A ntá tí chaon tí nta la tsíchrinjin kixin ntá jeheni tsítóheni lùké tí nta chaon tsíchrinjin”. ²⁰ Tíha la chaxín. Kjánchó chrínjin kixin kuítekakonhya Dios. A ntá jahará la tjejorá ntiha kixin tinkachónkirá Dios. A ntá chrokjuinchehnkehyará. Íchá jína chróchrakonrá. ²¹ Kixin Dios la kuikonóehya ch'án tí nta chaon kuènte tí nta tronco la ntá mé xikaha kjaxin tí jahará la tsikonóahyará ch'án. ²² Tsjehérá kixin Dios la imá jína kjánchó kjaxin sinchekjasóte ch'án tí sín titekakonhya. A ntá jína ch'án la kjuínkítsa ch'án tí jahará. Kjánchó chrók'uejorá jnkójina éxí tjinkaon tí jehe ch'án. A ntá tí náhí la chaxín jahará la tsítóhará ch'án. ²³ A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco ínaá kixin jehe ch'án la imá chóna ch'án kjuachaxin kixin xikaha sich'e ch'án. ²⁴ A ntá jahará jehya judíorá mé tsíkóchrínjinrá ch'án nta olivo nteje. A ntá antsí má xra tsotséxin tí nta olivo jína. A ntá tí sín judío la nta chaon kuènte tí tronco nta olivo jína la antsí xrahya tsjatsuenhen tsotséxin kichó ínaá kixin ó nta chaon kuènte.

Tí tsjixixín ntá tsaáxin tí sín Israel

²⁵ Kíchóni, tjínkavan tsonohará tí nkehe jehó Dios nohe kixin sinchehnkehyará jahórá kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon. ²⁶ Tió xikaha tsonhen ntá kaín tí sín Israel tsaá sín kixin tí xroon itén Dios ntáchró kixin: Tí nkexro sinchekaáni mé tsixín ch'án chjasin Jerusalén la tsjatsen ch'án tí jje kuènte tí sín tsík'axrjeníxin ch'ín Jacob.

²⁷ Tíhi mé kjuachaxin nixin kuèntana ts'áyéhe tí jehe sín kixin janhan mé kjuatsíyan ijie sín.*

²⁸ Xikaha kixin tí tan nixin tsaáxinni ntá tí sín judío mé tsonínkakonhen sín Dios kixin ntá jahará ts'ayéhérá tí nkehe kuènte Dios. Kjánchó Dios naxa tjuèhe tí jehe sín judío kixin jehe ch'án tsíkjejá ch'án tí sín tsík'axrjeníxin tí jehe sín. ²⁹ Kixin tí kaín nkehe kjuanjón Dios la tsakitsjehya ch'án la ko tsítóehya ch'án tí sín tsík'íyehé ch'án. ³⁰ Senó la jahará k'uékítekákonyará Dios a ntá ijie la tí sín judío titekakonhya sín. A ntá jahará la kjónté la kuikonóahará Dios. ³¹ Mé xikaha jehe sín kuítekakonhya sín Dios la ntá kjónté xikaha la jehe ch'án tsikonóehé tí jehe sín éxí kuikonóahará ch'án. ³² Kixin Dios la kuítóhe ch'án kaín chojni kixin chrókjuasin sín jje kixin ntá tsjakoxín ch'án tí kjuachaxin kuènte ch'án kixin sinchetjóá ch'án kaín sín kjónté chojni chóna jje.

³³ A ntá tí kjuachaxin kuènte Dios la imá jíe la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntja kuènte ch'án. ³⁴ Ntáchró xroon itén Dios kixin: “¿Xá nkexro chrókienxín nkexrí tjenkayáxin Ìnchéni la xá nkexro chrókjuinkítsa chrókjuakohe tí jehe ch'án? ³⁵ ¿Xá nkexro kjuanjón nkehe senó k'uáyéhe Dios a ntá ijie tjinkaon chrók'uáyéhe ínaá?”† ³⁶ Kixin kaín nkehe la tixín tí tje Dios kixin kaín nkehe la kjuích'éna ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

12

Chjehérá cuérporá Dios kixin sinchetjóá ch'án

¹ Mé xikaha kichó ni, xrjanóahará kixin Dios ó kuikonóahará ch'án ntá jahará chróchjehérá cuérporá Dios éxí ijnko nkehe tjechón kixin jehe ch'án ó kjuíntatjóará ch'án la mé xikaha chrókóxrínjin ch'án. Tíhi mé ijnko nkehe

* **11:27** Salmo 14.7, Isaías 59.20 † **11:35** Isaías 40.13-14

ntoá t'ichjánxin chróchjéheni ch'án. ² Chrokóxrjíanhyará tí nkehe siín chjasin-tajni. Náhí. Chrókónixin tí nkehe tjenkayáxinrá kixin jína chrókjuenkayáxinrá. Xikaha ntá chrókónohará kixin nkexrí tjinkaon Dios kixin ntoá chrók'uejorá éxí tóxrjínhin ch'án.

³ Kjuasáyé Dios kjuanjon ch'án tí xra tjét'aha ch'án. Mé xikaha nixjahará kaín rá kixin chrókjuenkayáxinhyará kixin imá tjetoanrá. Náhí. Chrókjuenkayáxinrá jína éxí tí kjuachaxin tjáhará Dios éxí nkexrí tinkachónkirá ch'án. ⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xra chrókjuich'e. ⁵ Mé kjaxin xikaha tí jeheni kjónté nchónhyani la ts'ónani jnkokoá cuerpo kuènte Cristo. Mé xikaha jnkokoá chrókjuenkayáxinni kixin ó k'ónani jnkokoá cuerpo.

⁶ Dios kjuanjon nchónhya clase xra éxí tjinkaon ch'án chróchjéhe ch'án jnkoinjo chojni tí xra. Ntá t'ichjánxin jína sich'eni tí xra kjuanjon ch'án. A ntá tí kjuanjon ch'án kjuachaxin kixin tsochronkaxinni tí tan kuènte ch'án ntá t'ichjánxin sich'eni tí xra éxí titekaonni ch'án. ⁷ A ntá tí kjuanjon ch'án xra tsjinkitsani í jnko nkexro ntá t'ichjánxin jína sich'eni tí xra a. A ntá tí nkexro tsík'áyéhe kjuachaxin tsjako la t'ichjánxin jehó tí xra a chrókjuako. ⁸ Tí nkexro tsík'áyéhe kjuachaxin nchexraxinkaon í jnko nkexro la kaín asén chrókjuich'e ch'án tí xra a. A ntá tí nkexro tsjanjon ichrén nkehe la chrókójiehya chrókjuanjon ch'án. A ntá tí nkexro t'etoan la jína chrókjuich'e ch'án xra la ko tí nkexro chrókjuinkitsa tí sín chóntahya la kjuaxróxin chrókjuinkitsa sín.

Tí nkehe chrókjuich'e tí sín tinkáchónki Cristo

⁹ Kaín asánrá chrótjuèherá kichuára. Chrókjuitoherá tí nkehe jínahya tjenkayáxinrá la chrókjuenkayáxinrá tí nkehe jína. ¹⁰ Chrótjuèherá kichuára la ko chaxin chrókjuikosáyehérá kichuára.

¹¹ Chrókósáhyará la chrókjuich'eherá Ìnchéni xra kaín asánrá.

¹² Chrókócháhará kixin tjejóchonhérrá la chrókóninkákonhyará kjónté chrókjuasótiará. Chrókjuitoéhyará chrónixjehérá Dios.

¹³ Chrókjuinkitsará tí sín tinkáchónki Ìnchéni tí chóntahya sín nkehe sine sín. Chjehérá kjuachaxin ts'ejó tí sín tsjijinixjahará sín.

¹⁴ Nixjehérá Dios la tsjanchehérá ch'án kixin sincheyaon ch'án tí sín chonkíhará. Tjanchehérá Dios tsjinkitsa tí jehe sín la jehya kixin chrókóninkákonhérrá sín.

¹⁵ Tócháhakoará tí sín tjejóchéhe sín la ko tí tjejótsjanka sín la koírá chrótsjankará.

¹⁶ Kjuaxróxin chrók'uejorá. Chrókjuinchehnkehýará. Náhí. Chrókóyóhará éxí tí sín nòa. Chrókjuinchehnkehýará kixin nohará.

¹⁷ Chrókjuich'ehýará jínahya tí sín kjuít'ahará ichrén nkehe jínahya. Náhí. Íchá jína chrókjuákoxinrá nkehe jína kixin chrók'uikon kaín chojni.

¹⁸ Chrókjuéyará jnkójina chrók'uejórá. Exí nkexrí chrókjuachará la kjuaxróxin chrók'uejorá kaín rá. ¹⁹ Tjuahará kichó ni, la chrókjuinchekjásótehyará jahórá tí sín ichrén nkehe kjuít'ahará. Náhí. Títoherá kixin Dios sinchekjasóte tí sín a. Ntáchro xroon itén Dios kixin: “Ixra kuèntana sjntakitoaxián tíha. Janhan tsjénkahá tí sín a, ichro Ìnchéni.”* ²⁰ Kjaxin ntáchro xroon itén Dios kixin: “Tí sín nínkakonhan t'énxín sín kjinta la chróchjéhe sín nkehe chrókjóné sín la tí t'énxín sín ntá la kjaxin chróchjéhe sín nkehe chrók'ui sín. Mé xikaha chrókjuich'e kixin chrókósuèhe sín kixin tí nkehe kjuich'e sín.”† ²¹ Chrókjuitoéhyará kixin chrókjuacha tí nkehe jínahya chrók'uetuanhanrá. Náhí. Chrókjuich'erá tí nkehe jína kixin chrókjuachahya tí nkehe jínahya chrók'uetóan.

* 12:19 Deuteronomio 32.35 † 12:20 Proverbios 25.21-22

13

¹ Kaín chojni t'ichjánxin sinchexiteyéhe sín tí gobierno kixin tí kjuachaxin chóna sín la Dios tsíkjanjon kixin kohya nijnko gobierno chrók'uejó tí jehya kjuachaxién Dios. ² Mé xikaha tí sín tjanjonko tí sín t'etōan la kjaxin nínkakohen sín tí nkehe k'ueōan Dios. A ntá tí sín xikaha ch'e la mé jehe sín tjejá sín jie tsjasótexín sín. ³ A ntá tí sín gobierno t'etōan la sinchekjasótēhya sín tí nkexro titekaon ch'e nkehe jína. Náhí. Tsonínkakohen sín tí nkexro ch'e tí jínahya. Tí tjinkáonrá tsonínkakuanhyará sín la chrók'uejorá jnkójina. Chrókjuinchexiteyéherá sín kixin chrókónínkakuanhyará sín. ⁴ Kixin Dios k'ueōan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhí. Chóna sín kjuachaxin sinchekjasótiará sín kixin jehe sín la Dios k'ueōan tjejó sín tí xra a kixin sinchekjasóte sín tí sín jínahya tjenkayáxin. ⁵ Mé xikaha t'ichjánxin sinchexiteyéherá tí gobierno la jehya jehí kixin chrókjuinchekjasótiahýará sín. Náhí. Ó jehí jahará chróxráinkáonrá kixin t'ichjánxin sinchexiteyéherá sín. ⁶ La kjaxin jehya táhó. Náhí. T'ichjánxin chrókjuenkehéherá gobierno tí chichaon kuente tí xra ch'erá tjanchia sín kixin tí gobierno la Dios k'ueōan tjejó sín t'etōan sín.

⁷ Kjaxin chrókjuenkehéherá kaín chojni tjasikéherá. Tí nkexro síká kuente xra la chrókjuenká sín kuente tí xra, la tí nkexro síká ichrén nkehe nchekji ntá tíha kjaxin chrókjuenká sín, la kjaxin chrókjuíkosáyehéherá tí sín t'etōan. ⁸ Kjaxin chrókjuasikéhyará ninkexró. T'ichjánxin chrótjuèherá kíchuará kixin tí nkexro tjuèhe kíchó la mé xikaha kjuínchexiteyá tí nkehe k'ueōan tí ley. ⁹ Kixin ntáchro tí mandamiento kixin: “Tjakéhya asánrá í jnko chojni chjin la ko t'oyánhyará kíchuará la ko tēhyará la nixjahýará kjuach'ia kuente í jnko chojni. La ko tjaké hya asánrá nkehe ókjé.”* Kaín tíha la ko í so nkehe t'etōan Dios mé tienxinni t'axrjexín kixin: “Chrótjuèheni kíchó ni éxí tjuèxín asénni.” ¹⁰ Tí chojni tjuèhe kíchó la ninkehó nkehe jínahya sich'ehe kíchó. Mé xikaha chrótjuèhe kíchuará la mé xikaha mé chróxiteyá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejótshēheni chrók'uajuahyani. Tí nkexro tsaáxinni la í séhya itsi ch'án ijie, a ntá tí kjuankíxinni kuítekaonni itén ch'án la ísé tsixín ch'án. ¹² A ntá tí tie la í séhya tsjak'e kixin ó tsi tí t'inkáséyan la chrókuítóheni tí nkehe ch'eni kuente sítié la chróchóntani kjuachaxin kuente Nchakuen Dios kixin tsjinkítsa ts'ajini tí t'inkáséyan, éxí ijnko soldado t'inkáyate ch'án ka tsík'óna chica kixin kohya nkehe tsonhen ch'án. ¹³ Chrók'uejóni jnkójina éxí nkexrí chrók'uajini chaxín ntoá tí t'inkáséyan a. Chrókjuasinhyani kia chrókjuanjōnxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjueyáhyani kjuanínkaon la ko chrókóchjinoxíenhyani. ¹⁴ A ntá jahará tákjárá tí kjuachaxin kuente Inchéni Jesucristo tsjinkítsará la tíha mé éxí chrók'uínkayará nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjóntahýará kíchuará

¹ A ntá kjónté ijnko chojni kánhyó tinkáchónki Inchéni la chrók'uejokoará ch'án la ko chrókjóntahýará ch'án kjónté kánhyó nohe ch'án. ² A ntá iso sín chaxín nohe sín la tjinkaon sín chrókjóne sín kaín nkehe. A ntá tí sín kánhyó

* 13:9 Éxodo 20.13–15, 17; Deuteronomio 5.17–19, 21; Levítico 19.18

tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín. ³ Tí nkexro chrókjóné kaín nkehe chrókjoniehya tí nkexro tjinkaon chrókjónéhya nkehe. A ntá tí sín chrókjónéhya nkehe chrókjontahya sín tí sín chrókjóné sín kaín nkehe kixin kjónté xíkaha la Dios tsakja tí jehe sín. ⁴ ¿Xá nkexro jaha kixin chrókjóné tí nkexro ch'ehe xra í jnko nkexro? Tíha la xra kuènte tí lámogé ch'án tsontáchro á jína kjuích'e ch'án xra o náhí. A ntá kjá tsjak'e ch'án jína kixin Ìnchéni chóna ch'án kjuachaxin tsjinkítsa ch'án tsjak'e tí ch'ín a jína.

⁵ Iso sín tjenkayáxin sín kixin imá tjetooan ijnko yaon a ntá í jnko yaon la náhí. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín. ⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xíkaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xíkaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xíkaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kixin jehóni chrók'uejóni la ko jehya jehí chrók'uenni. ⁸ Tí tjejóni la tjejóni kixin sich'ehe ni xra Ìnchéni la kjónté its'enni la kuènte ch'án tí jeheni. Méxra kjónté chrók'uejóchónni o kjónté chrók'uenni la kuènte ch'án tí jeheni. ⁹ Méxra xíkaha ntá Cristo la ik'uén ch'án la ko xechón ch'án inaá kixin k'óna ch'án Ìnchéni tí sín tsík'en la ko tí sín tjejóchón.

¹⁰ A ntá jahará la, ¿nkekuènte tjóntará tí kichuárá o nkekuènte chontehyará kaín sín kjuasáya? Kixin kaín ni tsochjinani tí tjen Dios kixin tsontáchro ch'án á jína xra kjuích'eni o náhí. ¹¹ Ntáchro xroon itén Dios kixin:

Méxra janhan takjénxian asenná, ichro Ìnchéni, kixin tí tjèn la ts'ejóxin toch'in kaín chojni

kixin kaín chojni la tsjanchia sín kjuasáya kixin janhan mé Dios kuènte sín.*

¹² Mé xíkaha jnkojnkonni chrókónoheni kixin tsochenkani Dios nkexrí kjuích'eni.

Tjachruehyará kichuárá

¹³ Méxra chrókjónéhya kichuárá. Íchá jína kixin ninkehó nkehe chrókjuích'ehyará kixin ntá tí sín kichó ni chrókjuasinxinhya sín jie kixin tí chrókjuasin sín jie ntá xíkaha chrók'uitjáyaxín tí tinkáchónki sín Ìnchéni.

¹⁴ Janhan tinkáchónkia Ìnchéni Jesús la ntá xíkaha ó nòna kixin kohya ninkehó nkehe jehí tjuáhya. A ntá ijnko nkexro tjenkayáxin kixin jehya nkehe jína tíha ntá chaxín tjuáhya tí nkehe kixin xíkaha tjenkayáxin ch'án. ¹⁵ Tí tjenkayáxin tí kichuá kixin tí nkehe inte la ntoáhya a ntá tí xíkaha ch'e la tjuèhya tí kichuá. Kixin jehya tí nkehe chrókjóné ó chrókjuínchek'itjáyaxián tí kichuá kixin Cristo k'uenyákonhen ch'án kjaxin. ¹⁶ Chrókjuích'ehyará nkehe jínahya kixin ntá xíkaha chrók'uántaxínhín sín tí nkehe jína tinkáchónkirá. ¹⁷ Kixin tí kjuachaxién Dios la jehya tí nkehe chrokjóneni o tí nkehe chrok'uini. Náhí. Tí tjen tí kjuachaxién Dios la chrók'uejóni jnkojína la ko kjuaxróxin chrók'uejóni la ko chrókóchéheni kixin chóntani Nchakuen Dios. ¹⁸ Tí nkexro ch'ehe Cristo xra mé chrókjuínchek'éhe Dios la ko chrókjuínchek'éhe chojni.

¹⁹ Mé xíkaha chrókjueyáni kaín tí nkehe tjikao kjuaxróxin kixin ntá tsjinkítsani tí sín kichó ni kixin ntá kjaxin sín antsí chrókuínkáchónki sín Ìnchéni. ²⁰ Chrókjuínchek'itjáyaxinhya tí xra kuènte Dios kixin tí nkehe chrókjónterá ó kixin kaín nkehe chrókjónterá la ó tsíkjinchetjóá Dios. Tí jínahya

* 14:11 Isaías 45.23

la tí chrókjóneni ókjé nkehe ntá xíkaha la í so chojni chrók'uitjáyanxín tí nkehe tinkáchónki sín. ²¹ Ntá íchá jína chrókjóntehyará into la ko chrók'uihyará vino la ko ninkehó nkehe chrókjuich'ehyará tí xíkaha chrókjuasixín jie kíchuará. ²² Tí nkehe tinkáchónkirá la jahórá chrókónohará kíxin Dios la tjetsjehe ch'án. A ntá jína tsjak'e tí nkexro tí chrókjuasixínnya ch'án jie tí nkehe tjenkayáxin ch'án. ²³ A ntá tí nkexro ine nkehe la tjenkayáxin sín kíxin tsjasixín sín jie ntá chaxín xíkaha yámá sín jie kíxin kénhya asén sín kjóne sín tí nkehe. La tió kénhya asén sín tjenkayáxin sín la ó kjuasin sín jie.

15

Nchechéhérá kíchuará la jehya jahórá

¹ Tí antsí tinkáchónkini Ìnchéni ntá chrókjuinkítsani tí sín kánhyó tinkáchónki tí jehe ch'án la chrókjuich'ehyani tí nkehe chrókóchèxinni jehóni. ² Kjaxin kaín ni chrókjuinchechéheni kíchó ni kíxin chrók'uejó sín jína la ko kíxin antsí chrókuinkáchónki sín Ìnchéni. ³ Kíxin kjaxin Cristo kjuich'ehya ch'án tí nkehe chrókóchèxin ch'án jehó ch'án. Náhí. Kjuínchexiteyá ch'án éxí ntáchro xroon itén Dios kíxin: “K'uinka kjuasótexinna kaín tí kjuanínkaon chóna tí sín nínkakohen Dios.”* ⁴ Kaín nkehe chrónka xroon itén Dios senó la tsíkjin sín ósé kíxin chrókónoheni kíxin ntá chrók'uejóchónhenni la chrókónínkakohenyani kíxin tíha mé nchechéheni. ⁵ Dios, mé tí nkexro tjinkítsani la ko nchechéheni, la kjaxin tsjinkítsa ch'án tí jahará kíxin ts'ejorá jnkojína la ko jnkokón tsjenkayáxinkoará kíchuará kíxin xíkaha kjuakoxin Cristo Jesús. ⁶ Kíxin kaín ni jnkokoá chrók'uákjenxinni Dios la chrókjuancheheni kjuasáyé ch'án mé jehe ch'án mé It'é Ìnchéni Jesucristo.

Tí tan jína xrakehé tí sín jehya judío

⁷ Chrókjuánjonrá kjuachaxin ts'ejó í so chojni la chrótjuèherá sín kíxin éxí Cristo tsík'áyéhe ch'án tí jahará mé xíkaha tsjikosáyehérá Dios. ⁸ Janhan jína chróntáxrjan kíxin Cristo ikui sich'ehe xra tí sín judío kíxin tsoxiteyá tí nkehe tsíchenka Dios tí sín tsík'axrjeníxinni ósé kíxin xíkaha tsjakoxin kíxin Dios la jína ch'án la sinchexiteyá ch'án tí nkehe tsíntáchro ch'án. ⁹ La kjaxin ikui ch'án kíxin kjónté tí sín jehya sín judío la chrokjuanchehe sín kjuasáyé Dios kíxin kuikonóehe ch'án sín éxí chrónka tí xroon itén Dios kíxin: Janhan la ko tí sín tjejó ókjé nación mé tsjancheheni kjuasáyé Dios la ko tsotsjeni himno kíxin ts'ákjenxinni ihnié ch'án.†

¹⁰ Kjaxin ntáchro í jnko parte xroon itén Dios ínaá kíxin:

Tsocháhákoará kaín tí sín kuénté Dios.‡

¹¹ Kjaxin ntáchro xroon itén Dios ínaá kíxin:

Tjanchehérá kjuasáyé ìnchéni Dios kaín rá kjónté jehya judiorá

mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkjin kíxin:

Ts'axrjeníxin ch'ín Isaí ijnko nkexro

la ts'etuenhen ch'án kaín tí sín jehya judío,

a ntá tí sín a mé tsinkáchónki sín tí nkexro a.*

Mé xíkaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehe ch'án nchechéheni ch'án la tjanjon ch'án kjuaxróxin ts'ejóni kíxin titekaonni tí jehe ch'án kíxin ntá ts'ánkí tí kjuachéhe tjejóchónhenni kjuachaxién Nchakuen ch'án.

* **15:3** Salmo 69.9 † **15:9** 2 Samuel 22.50; Salmo 18.49 ‡ **15:10** Deuteronomio 32.43 § **15:11**

Salmo 117.1 * **15:12** Isaías 11.10

¹⁴ Kíchóni, chaxín tónòna kixin jahará la jína tjejorá la kaín xín kjuaxrexinkaon jína tjenkayáxinrá la nohará tsjínkítsará chénkará kíchuará. ¹⁵ La kjónté xíkaha la chrakonhya ikjian tí xroon i chr'anhánrá xrjanka kaín tí nkehe kixin chrók'uitjáyanhyará chróxráxinkaonrá kaín nkehe. Mé xíkaha it'a tí xrá kixin kjuasáyé Dios kjuanjon ch'án tí xrá. ¹⁶ Kixin sít'ahá Jesucristo xrá tsotjanka tí sín jehya judío tí itén Dios. Tí xrá mé tjákua tí tan jína tsaáxin chojni kixin ntá janhan tsjánjuan tí sín jehya judío ts'áyéhe Dios éxí ijnko nkehe tsoxrjínhin ch'án kixin Nchakuen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xíkaha siín kjuachaxin tsochána kixin t'ahá xrá Dios. ¹⁸ Chrokjuahya tsohnke tsontáxrjan í jnko nkehe. Jehó tsoxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xíkaha kuítekaon sín kixin tí itan kjuákua la ko tí nkehe jína kjuít'a. ¹⁹ Kixin tí kjuachaxién Dios mé kjuákoxian tí kjuásian kjuaxroan la ko kjuákoxian tí kjuachaxin kuènte Nchakuen Dios. Mé xíkaha kjuintaxíxin kjuákua tí tan jína tsaáxin chojni Cristo xrankíxixín chjasin Jerusalén la nkuíxín chjinaxón ntiha la hasta estado Ilírico. ²⁰ Mé xíkaha tjínkavan tsjínkákua tí tan tsaáxinni tí chjasin naxá tienhyé sín ihnié Cristo kixin tí janhan tjínkakonhya tsjínxónkáxian tí xrá kuènte í jnko chojni xráxín tjech'e xrá. ²¹ Íchá jína éxí ntáchro xroon itén Dios kixin:

Chrókuinhin tí sín naxá kienhyé sín tí tan kuènte ti jehe ch'án.

La ko chrókienxín tí sín naxá kienhyé tí tan kuènte ch'án.†

Ch'ín Pablo tjenkayáxin ch'án sátsji ch'án chjasin Roma

²² Nchónhya veces tjínkavan chrókjuasántsjahá tí jahará kjánchó naxá xitjahya kjuasán ntiha. ²³ Kjánchó ijie la ó kjuixinna tí xrá nkuíxín tí tjèn ntihi. Ntá itsjé nánó tjínkavan chrókjuasántsjahá tí jahará ²⁴ a ntá ijie ts'atsínka tsonixjahará tí sátsjia nación España. Ntá tsochána ts'íkuan tí jahará ntá tsjixin ntá chr'éxin tjínkavan kixin jahará tsjínkítsará tí sátsjia. ²⁵ A ntá ijie la sátsjiya chjasin Jerusalén, sátsjikian tí nkehe tsjínkítsa tí sín kíchó ni ntiha. ²⁶ Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'énnen sín tí sín kíchó ni ntiha tsochjéhe tí sín nõa tjejó chjasin Jerusalén. ²⁷ Jehe sín kóxrjínhin sich'e sín xíkaha kixin tí sín judío tinkáchónki Cristo kjuínkítsa tí jehe sín tsonohe sín itén Dios. Ntá ijie la jehe sín chrókjuinkítsa sín ínaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni. ²⁸ A ntá tió tsjixin tí xrá la ts'áyéhe sín tí chichaon la ntá janhan sátsjia España la ts'atsínkua tsonixjahará. ²⁹ Ó nõna kixin tió sátsjia la Cristo mé imá sincheyaoon ch'án tí janhan la ko tí jahará.

³⁰ Kíchóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèheni kíchó ni mé xrjannóahará kixin jnkokoá chrókjuenkayáxinni kixin tí xrá tjét'a la ko chrónixjehérá Dios kixin tí janhan. ³¹ Tjanchehérá Dios kixin tsjínkítsa ch'án tí janhan kixin kohya nkehe tsonna kixin kaín tí sín titekakonhya Dios siín chjasin Judea. La ko tjanchiará kixin jína sátsjikian tí nkehe tsjínkítsa tí sín kíchó ni tjejó chjasin Jerusalén kixin jína chrók'uáyéhe sín. ³² Ntá tí tjínkaon Dios la tsochána tsjasán ti tjejorá jahará la ko kjuaxróxin tsjak'é tí tsjasántsjahará. ³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehé ch'án tí sín chóxin ch'án

† 15:21 Isaías 52.15

¹ Tétuānhanrá tsjínkĩtsará tí tjan kíchó ni Febe ch'e tjan xra nĩnko chjasin Cencrea ² mé tjanjonrá kjuachaxin tsjak'e tjan kjuachaxiēn ihnié Ìnchéni éxí ch'eherá í so sín kíchó ni tinkáchónki Ìnchéni. Tsjínkĩtsará tjan ichrén nkehe t'ichjánxinhin tjan kixin jehe tjan kjaxin kjuínkĩtsa tjan nchónhya chojni la kjaxin kjuínkĩtsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuích'ekoni xra kixin kjaxin sín mé ch'ehe sín Cristo xra. ⁴ Jehe sín chrók'uenxín sín kixin kjuínkĩtsana sín tí janhan mé xikaha tjahā sín kjuasáya la jehya janhván, kjaxin kaín sín kíchó ni nĩnkoé tí sín jehya judío. ⁵ Nixjehérá kjaxin kaín kíchó ni tóchjina ntoe tjan Priscila la ko ch'ín Aquila. Nixjehérá tí ch'ín choxian jina Epeneto mé jehe ch'án la saoxín kuítekaon ch'án Cristo estado Acaya. ⁶ Nixjehérá tjan María kixin kjaxin tjan kjuích'e tjan xra tí tjejorá ntiha. ⁷ Kjaxin nixjehérá tí sín tsíkjixin chjasenná mé ch'ín Andrónico la ko ch'ín Junias. Tí k'uíkjenā ntoechiso la kjaxin tí jehe sín k'uikjehe sín. Kjaxin kaín tí í so sín apóstol la tjikosáyehe sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tjuahā tinkáchónki Ìnchéni. ⁹ Nixjehérá ch'ín Urbano kixin jnkokoá kjuít'akian ch'án xra kuēnte Jesucristo la ko nixjehérá tí ch'ín choxian Estaquis. ¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo. ¹¹ Kjaxin nixjehérá tí ch'ín kjéhya Herodión la ko kjaxin nixjehérá kaín tí sín kjéhya ch'ín Narciso kixin kjaxin sín tinkáchónki sín Ìnchéni. ¹² Nixjehérá tjan Trifena la ko tjan Trifosa. Kjaxin jehe sín kjuích'e sín xra kuēnte Ìnchéni la ko nixjehérá kjaxin tí tjan kíchó ni Pérsida. Kjaxin kjuínkĩtsa tjan kjuích'e tjan xra kuēnte Ìnchéni. ¹³ Kjaxin nixjehérá ch'ín Rufo, ijnko chojni tsíkjeýā Ìnchéni la ko nixjehérá tí ìné ch'án kjaxin kixin kjaxin tjan kjuínkĩtsa tjan tí janhan la éxí naná k'uíkuan tí jehe tjan. ¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kíchó ni tjejóko tí jehe sín ntiha. ¹⁵ Nixjehérá kjaxin ch'ín Filólogo la ko tjan Julia la ko ch'ín Nereo la ko tí tjan kíchó ch'án la ko ch'ín Olimpas la ko kaín tí sín kíchó ni tinkáchónki Ìnchéni tjejóko sín ntiha.

¹⁶ Kjaxin tsehérá tja kíchuará kjuachaxin ihnié Ìnchéni. Kaín tí sín nĩnko kuēnte Cristo ntihi xraxinkaon sín tí jahará la nixjahará sín.

¹⁷ Kíchóni, xrjanóahará kixin chrótsjehérá nkexro tí sín tjixrónkáxin chrók'óxíka tí sín jnkokoá tinkáchónki Ìnchéni. Jehe sín titekakonhya sín tí itén Dios kjuákohará k'uitjará. Tí xikaha ch'e sín la chrók'uaxrjekjanxínrá ntiha. ¹⁸ Tí nkexro xikaha ch'e la jehya Ìnchéni Jesucristo ch'ehe xra. Náhi. Jehí tjinkaon sín chrókjuixrónkáxin sín la nixja sín tí nkehe náxrjón ó la xikaha ch'iehe sín asén tí chojni naxā noehya. ¹⁹ Kaín chojni ó nohe kixin jahará la ó kuítekaonrá Ìnchéni. Mé xikaha chàna tí janhan la tjínkavan chrókóxakonhanrá chrókjuích'erá xra jina. Jehya kixin chrókjuích'erá nkehe jínahya. ²⁰ Tí Dios tjanjon kjuaxróxin mé tjoka tsinkátja Satanás, í ts'etueñhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetōan ch'ín Pablo la kjaxin nixjahará kjuachaxiēn Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntøe ch'án la ko kaín tí sín kuènte n̄inko tójnkotsé ntøe ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kichó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjinkitsa ch'án kixin jína chrók'uejorá éxí chrónka tí tan jína tsaáxinni la ko éxí kjuakoni kuènte Jesucristo. Tíha mé chaxín chrónka éxí Dios k'ueṭoan nchenoheni ch'án tí nkehe ninkexró k'uénoehya desde k'óna chjasintajni. ²⁶ A ntá ijie kaín ni tsonoexínni nkexrí nixja xroon ikjin tí sín profeta kixin nkexrí k'ueṭoan Dios itjen jnkochrín. Ntá kaín nkehe k'uénoehya ninkexró a ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokóá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Ìnchéni Jesucristo jnkochrín. Amén. Ó tjen.

Tí xroon saoxín ikjin ch'ín Pablo chr'énhen ch'án tí sín tinkáchónki Cristo siín chjasin Corinto

Ch'ín Pablo mé ikjin ch'án xroon ichr'án ch'án tí nínko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókjuít'aha ch'án xra. Janhan la ko kichó ni Sóstenes mé ² ikjinni tí xroon i chr'ánhanráni tí jahará tójnkotsérá nínko chjasin Corinto. Ó kjuínchetjóára Ìnchéni Jesucristo na mé kjueyára Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kaín xín tí sín tjanchehe sín ìnchéni Jesucristo kixin chrókjuinkitsa ch'án sín, tíha mé Ìnché sín la ko Ìnchéni. ³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochrínín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuènte ch'án ntá xikaha antsí jína nohará chrónkaxínrá kixin nkexrí tinkachónkirá Ìnchéni la ko kjaxin antsí jína tiénxinrá kaín nkehe chaxín ntoá. ⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá. ⁷ Ntá jahará ó chontará kaín xín tí kjuachaxin kuènte Nchakuen Dios, la í ninkehó t'itjáyankíhya tí kjuachaxin kuènte ch'án k'uayéhérá nachrohe tjejochonhénrá tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kixin tsjtoéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án. ⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsíkjeyará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrjanóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoará kichuára. ¹¹ Kichóni, ó kuínhan tí nkehe chrónka tí sín kjéhya ch'ín Cloé kixin siín kjuanínkaon tí tjejorá tójnkotsérá ntiha. ¹² Na mé ntáxrjan kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin chréhérá Cristo. ¹³ ¿Xá nkekjaín Cristo siín kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitexínrá tí nina ní? ¹⁴ Tjáncháha Dios kjuasáya kixin nijnko tí jahará kuíkitiahyará ntiha. Jehó ch'ín Crispo la ko ch'ín Gayo mé kuíkite janhan. ¹⁵ Na mé nijnkorá xitjahya tsontáchrórá kixin nina kuíkitexínrá. ¹⁶ Kjaxin jehó kuíkite tí ch'ín Estéfnas la ko tí sín kjéhya ch'án. Xráxinkakonhya á kuíkite í so sín o náhi. ¹⁷ Kixin tí xra chjina Cristo jehya kixin chrókuíkite chojni. Náhi. Tí xra chjina Ìnchéni kixin tsoxrjankaxián tí tan tsaáxinni. Tjínkakonhya kixin chrókjuákoxián palabra náxrjón noi kixin

xikaha chrókjuàkua ntá chrókjuíntamá tí kjuachaxin jié kónoxín tí k'uénxin Ìnchéni Jesús tí ntacruz, kjuák'enkáni ch'án, k'uenyákonhenni ch'án.

Cristo mé tjakoxin tí kjuachaxién Dios la ko tjakoxin ch'án kixin imá nohe Dios

¹⁸ Chronkaxínni kixin k'uenyákonhenni Cristo tí ntacruz. A ntá tí tsinhin tí sín xráxín ts'itjáyan ntá ts'ikon sín tíha éxí nkehe chónkó. A ntá kaín ni chojni kuaáni mé t'ikonni kixin kjuachaxin jié tíha. ¹⁹ Mé xikaha ntáchro xroon itén Dios tsíkjin sín ósé kixin Dios mé sinchek'itjáyan tí nkehe tjenkayáxin tí sín imá nohe, la ko tsítqenta ch'án tí nkehe ntáchro tí sín imá tienxín sín.*

²⁰ ¿Mé nkehe tsonhen ntáchro sín kixin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe siín chjasintajni ó. A ntá Dios mé t'ikon ch'án kixin lontj sín kixin xikaha ichro sín.

²¹ Kixin Dios antsí nohe ntá xikaha kuítóehya ch'án kixin kjuachaxin kuènte sín ó chrókjuacha sín chróchóxixín sín ch'án. Ntá kóxrjínhin Dios chrókjueyá ch'án chrókjuincheakaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jié, ichro sín. A ntá tí sín nkiva griego mé xritjeyá sín kixin antsí chrókónohe sín, ichro sín. ²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjakoxinni. Chrónkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijnko nkehe chrókósuèhèni chrókuinkáchónkini tíha, ichro sín. A ntá tí sín jehya judío ntáchro sín kixin chojni lontj tí jeheni kixin xikaha tinkáchónkini, ichro sín. ²⁴ A ntá tí sín kjueyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhenni ch'án. Mé xikaha tjakoxin Dios tí kjuachaxin jié la ko tí kjuaxrexinkaon jína kuènte ch'án. ²⁵ Ntá jehe sín ntáchro sín kixin éxí ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjaxin ntáchro sín kixin jiéhya tí kjuachaxin chóna Dios. A ntá tí sín antsí má chóna kjuachaxin ntihi chjasintajni kjónté la tóyóehya sín Dios kixin antsí chóna ch'án kjuachaxin t'etoan ch'án. ²⁶ Kíchóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxí t'ikon tí sín chjasintajni la kjónté kjueyará Dios tí jahará. La ko tsjéhyará imá kuétoanrá la ko tsjéhyará k'uaxrjeníxinrá tí sín imá k'uék'etoan. ²⁷ Ntá kjónté Dios mé kjueyá iso tí sín noehya éxí t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá nohe ntihi chjasintajni. La ko kjaxin kjueyá Dios iso tí sín chóntahya kjuachaxin éxí t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá chóna kjuachaxin ntihi chjasintajni. ²⁸ Dios mé kjueyá ch'án iso tí sín t'etoanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuinчек'itjáyan ch'án kjuachaxién tí sín jehó chrók'ueotoan. ²⁹ Méxra xikaha ninkexró tsjachahya sinchehnke tí tjen Dios. ³⁰ A ntá tí kjuachaxin kuènte Dios mé tinkáchónkirá Cristo Jesús, a ntá chóntaxínni Cristo kjuaxrexinkaon jína, la ko tí kjuachaxin kuènte ch'án kóxíka tí jiè kuènteni, la ko tí kjuachaxin kuènte ch'án sinchetjuáxinni ch'án, la ko tí ijnié ch'án k'uénaxínni ch'án. ³¹ Mé xikaha éxí chrónka tí xroon tsíkjin sín ósé ntáchro kixin: “Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kixin imá t'etoan tí kjuachaxin kuènte Dios.”†

* **1:19** Isaías 29.14 † **1:31** Jeremías 9.23

2

Ch'ín Pablo mé tjako ch'án kixin Jesucristo kjuák'enkáni ch'án ntacruz

¹ Kíchóni, tió kjuasán ntiha chjasánrá níxjāhará chrókjuákoahará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá. ² Kíxin tió k'uéjóni jnkokoá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz. ³ K'uéjóni jnkokoá ntiha la ntá jahará ó nohará kixin janhan kjuak'é éxí chrókjuachahya kixin síxrankana, chràkonna. ⁴ Tí kjuankíxian níxjāhará la ko xrjankaxián tí tan tsaáxin chojni, la tjínkakhonhya chrókjuáchruáxinrá tí nkehe náxrjón níxja chojni tsíkonohe má. Náhi. Tió kjuákohará kónoxín kixin tjékian Nchakuen Dios la ko kónoxín tí kjuachaxin jié kuènte ch'án, ⁵ kixin jehya kjuaxrexinkaon kuènte chojni tsíkonohe má chrókuinkachónkirá. Náhi. Tí kjuachaxin kuènte Dios mé chrókuinkachónkirá.

Nchakuen Dios mé tsöchóxixinni ch'án

⁶ Kjánchó tió tjáqohá tí sín chaxín ó nohe sín tinkáchónki Ìnchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etōan chjasintajni, na mé tí kjuachaxin kuènte sín la tjoka ts'itjáyan. ⁷ Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án náxa k'ónahya chjasintajni kixin nkexrí tsaáxinni. ⁸ Nijnko tí sín t'etōan chjasintajni kienxínhya sín tí nkehe tsíkjenkayáxin Dios. A ntá tí chrókienxín sín tíha la ntá chrókjuák'enkanihya sín Ìnchéni tjetoan tí ntacruz. ⁹ Éxí ntáchro xroon itén Dios tsíkjin sín ósé kixin: Náxa k'uíkonhya chojni la ko náxa kienhya chojni, la ko náxa kjuenkayáxinhya chojni

kixin nkexrí siín kaín xín nkehe kjuích'éna Dios ts'áyéhe tí sín tjuèhe ch'án.*

¹⁰ A ntá Dios mé nchenoexinni kaín tíha kixin chóntani Nchakuen ch'án. Na mé tí Nchakuen Dios mé tjetsjehe kixin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

¹¹ Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén. Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe. ¹² A ntá jehya tí nchakuen chojni chjasintajni k'uáyéheñi. Náhi. Tí Nchakuen kujxin tí tjen Dios mé k'uáyéheñi kixin ntá tsonoexinni kixin kaín xín nkehe kjuínchekitonhenni Dios. ¹³ Kjaxin jeheni chrónkani tíhi, a ntá jehya chronkaxinni tí nkehe tsíkonohe chojni ó. Náhi. Tí Nchakuen Dios mé nchenoexinni nkexrí tsjakōexinni tí sín chóna Nchakuen ch'án.

¹⁴ Kjánchó tí sín náxa chóntahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxí lóco t'ikon sín kaín tíha kixin jehó tí sín chóna Nchakuen Dios mé tsjacha sín tsienxín sín tíha. ¹⁵ A ntá tí nkexro chóna Nchakuen Dios mé chrókjuacha chrókonohe nkexrí siín kaín xín nkehe. Kjánchó tí nkexró chóntahya Nchakuen Dios tsjachahya tsjanchia jié tí jehé ch'án. ¹⁶ Méxra ntáchro xroon itén Dios kixin: ¿Xá ninkexró chrókonohe kixin nkexrí tjenkayáxin Ìnchéni kixin chrókjuacha sín chrókjuakohe sín ch'án inaá?† Kjánchó jeheni la ó chóntani tí kjuaxrexinkaon kuènte Cristo.

3

Tí sín jnkokoá kjuích'ehe sín Dios xra

* 2:9 Isaías 64.4 † 2:16 Isaías 40.13

1 Mé xikaha, kichó ni, kjuachahya janhan chróníxjahará éxí chojni t'etuenhen asén sín Nchakuen Dios. Náhi. Éxí chojni naxa nchexiteyéhe sín tí nkehe ntáchro asén sín, na mé éxí xjan ntsíntsí na ntá kjuankíxin kuinkáchónki Cristo mé xikaha tí jahará. 2 Janhan na kjuákoáxinrá nkehe xrahya éxí yóhe ijnko xjanhnté tí jahará naxa nchekakí ìné tsjen kíxin naxa xitjahya sine nkehe cha. Mé xikaha tí jahará naxa xitjahya sinterá nkehe cha 3 kíxin naxa éxí chojni ó nchexiteyéhérá tí nkehe ntáchro asánrá kíxin tí naxa síin kjuachjinoxínhin la ko síin kjuanínkaon la ko jnkokoáhya tjenkayáxinrá, la mé tjejoch'erá éxí ch'e kaín xín chojni chjasintajni. 4 Isorá ntáchrorá kíxin chréhérá tí janhan Pablo, la ko í sorá ntáchrorá kíxin chréhérá tí ch'ín Apolos. Na mé éxí chojni chjasintajni ó tjenkayáxinrá.

5 ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkachónkirá Ìnchéni kíxin janhan kjuákoahará. Jnkojnkoní kjuích'eni tí xra kjuanjon Ìnchéni. 6 Janhan kuènka, a ntá ch'ín Apolos ìnta kjuáka ch'án, a ntá Dios la mé kjuínchek'ánkí ch'án tí nkehe a. 7 Méxra tí nkexro k'uenkaxin la ko tí nkexro tjáka ntá la kánhyó tjetóan kíxin Dios mé chóna kaín kjuachaxin la jehe ch'án nchek'ánkí kaín nkehe síin. 8 A ntá tí sín t'enka la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuích'e sín. 9 Méxra jeheni mé jnkokoá ch'ehe ni Dios xra, a ntá jahará mé éxí tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án. 10 Janhan mé tí maestro ch'éna nchia kíxin Dios kjuanjon kjuachaxin tsjaké tí xro xrankíxixín, a ntá í jnko nkexro sich'éna nchia chrítaón tí xro a. A ntá jnkojnko nkexro t'ichjánxin ntoá chrókjuich'éna sín nchia chrítaón tí xro a, 11 kíxin kohya ninkexró tsjacha tsjak'e í jnko xro xrankíxixín tí nchia a kíxin táha la ó tsíkjin tsík'óna, kíxin Jesucristo tíha. 12 A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xro náxrjón tjehe, la ko inta tabla, la ko kanj, la ko ntaxro. 13 Na mé tsonoxín nkehe tí xra kjuích'e jnkojnko chojni tió tsi tí yaon tsjixixín. Kíxin tí yaon a mé tsi xrohi. A ntá tí xrohi mé tsjakoxin nkexéhe tí xra tsoche la ko nkexéhe tí xra tsochehya. 14 A ntá tí jnkojn chojni kjuích'éna ijnko nchia tsochehya la mé tsjacha ch'án tí xra kjuích'e ch'án. 15 A ntá tí chróche tí nchia kjuích'éna ijnko chojni, ntá chrók'uitjayan kuenté. A ntá tí nkexro kjuích'éna nchia la tsaá éxí yóhe chrókuinkéhe ch'án xrohi.

16 ¿Á noahyará kíxin jahará kaín rá na mé ijnko ninkoe Dios la ko Nchakuen Dios mé chóna asánrá? 17 A ntá jnkojn nkexro tjinkaon ts'óxíka tí ninkoe Dios na mé Dios mé sinchek'itjayan tí nkexro xikaha sich'e kíxin tí ninkoe Dios la tjóá tíha. A ntá tí ninko a mé jahará tíha.

18 Ninkexró chrókjuenkayáxin kíxin imá nohe. Tí jnkojínrá tónhen asánrá kíxin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kíxin ntá chrók'uitjará chrók'ónará ijnko chojni chaxín nohe. 19 Tí nkehe nohe tí chojni chjasintajni la mé ijnko nkehe lontj t'íkon Dios. A ntá ntáchro tí xroon itén Dios tsíkjin sín ósé kíxin: “Tí nkehe tsík'itjá sín ch'iyaxín sín la tíha mé tsokjan ts'enxín sín.”* 20 La ko kjaxin ntáchro xroon itén Dios kíxin: “Ìnchéni la ó nohe ch'án kíxin kaín nkehe tjenkayáxin tí sín ntáchro sín kíxin imá nohe sín la mé ijnko kjuaxrexinkaon lontj tíha, ichro Dios.”† 21 Méxra chrókjuinchehnkehýará jahará kíxin chréhérá ijnko chojni imá nohe, kíxin kaín xín nkehe síin la kuéntará jahará, 22 mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxin, la kaín

* 3:19 Job 5.13 † 3:20 Salmo 94.11

la kuèntará tí jahará. ²³ A ntá jahará la Cristo mé t'ayakonhanrá. Kíxin Cristo la jehe ch'án la mé kuènte Dios.

4

Tí xra kjuích'e tí sín kjueyá Ìnchéni

¹ Jahará chrók'uikonrá tí jeheni éxí chojni ch'ehó Cristo xra k'uáyéheni tí xra tjakoni tí nkehe kuènte Dios ninkexró k'uénoehya. ² A ntá ijnko chojni k'uáyéhe xra ts'etōan chrókjuakoxin kíxin jína ch'án la ko jína ch'e ch'án xra. ³ A ntá janhan tóxakonnahya tí nkehe chróntáchrórá jahará chrókjuanchiará jie tí janhan kíxin tí xra t'aha Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná. ⁴ Kjánchó janhan tjenkayáxinhya kíxin chonta jie. Kjánchó jehya xikaha tsontáxrjan kíxin Dios t'ikon kíxin chontahya jie janhan. Náhi. Jehe Ìnchéni mé tsotsjehe ch'án nkehe tí jie chonta janhan. ⁵ Méxra naxa kjuixrakáhya yaon chrókjuinchekitōexínrá ichrén jie. Chonhénrá tí tsi Ìnchéni kíxin jehe ch'án mé sinchenoxín ch'án kaín tí nkehe símá ti sítié, la ko sinchenoxín ch'án kaín xín nkehe imó tjenkayáxixín asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kíchóni, nixjahará tí nkehe i kíxin jína chrók'uejorá jahará ntá xikaha kjuintayóaxian éxí ch'ín Apolos la ko éxí janhan kíxin chrók'uitjará kíxin chrókjuenkayáxínrá jehó tí nkehe tsíkjin sín ósé, kíxin nijnko nkexro chrókjuinchehnkehya kíxin chréhe sín ijnko chojni, a ntá tsochóntehya sín kjuasáyé tí í jnko chojni. ⁷ ¿Méxra nkexro ntáchro kíxin jahará antsí tjetōanrá? ¿Xá nkehe chontará naxa kjuanjonhya Dios kíxin? Tí kjuanjon Dios kaín nkehe chontará, ¿ntá nkekuènte nchehnkerá kíxin jahórá tsíkjéyará tíha?

⁸ Jahará tónhanrá kíxin imá rícorá. Na mé chaxín chontará kaín xín nkehe tjenkayáxínrá. Ntá jie tónhen asánrá éxí ijnko rey, la í t'ichjánxianhyará ninkehó tí jeheni kíxin naxa chrókjuinkítsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'uetōanni. ⁹ Ntá tónhen asenná kíxin jeheni chojni kjueyá Ìnchéni mé kjuanjon Dios kíxin jeheni chrókjuixixín chrók'uejóni éxí chojni kuitōnhenni kíxin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin. ¹⁰ A ntá jeheni tinkáchónkini Cristo, a ntá xikaha t'ikon sín tí jeheni éxí chojni lōnti. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté naxa jie jeheni t'énxínni kjinta, la ko t'énxínni ntá, la ko chóntahyani ikéni, la ko nínkakōnhenni chojni, la ko chóntahyani nkerí ts'ejóni. ¹² La ko tóxrjéni kíxin itjani ch'exínni xra. A ntá tió t'ántaxínhinni sín la tjancheheni Dios kíxin sincheyaon ch'án tí jehe sín. La ko tió chónkíhi sín tí jeheni la tónínkakuenhyani sín. ¹³ Tió t'ántaxínhinni sín la jnkojína tjateheni tí jehe sín. T'ikon sín tí jeheni éxí chjínínó ntili chjasintajni, na mé éxí ijnko nkehe ninkehó sínkíhya la ko mé xikaha naxa sítōnhen tí yaon jie.

¹⁴ Ikjian tíhi na jehya kíxin chrókjuintasuàhará. Náhi. Tjínkavan chrókjuintaxráxinkáonrá kíxin éxí xjanna t'íkuan tí jahará, tjuahará. ¹⁵ Kjónté chróchontará ite mil chojni chrókjuakōhará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonrá Cristo Jesús kíxin kjuákohará tí tan jína tsaáxinni. ¹⁶ Mé xikaha xrjanóahará kíxin chrókjuakōxínrá éxí tí janhan.

¹⁷ Méxra kuétuanhan tí ch'ín Timoteo kixin tsjiji ch'án ntiha. Na mé éxi xjanna t'íkuān tí jehe ch'án, tjuaha ch'án, kixin kjuákoħa ch'án ntá kuítekaon ch'án Ìnchéni ntá xráxín jína ch'e ch'án xra. Ntá tsjiji ch'án sintaxraxinkáonrá ch'án nkexrí tjákoħian tí ntje Cristo éxi xráxín tjákua kaín xín nínko t'atsínka tí janhan. ¹⁸ Ntá iso tí jahará imá ihnkerá kixin tjenkayáxinrá kixin chaxínhya chrókjuasántsahará. ¹⁹ A ntá tjoka chrókjuasántsahará tí chaxín xikaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuinhan. Náhi. Na mé ts'íkuān á chaxín chóna sín kjuachaxin kixin xikaha nixja sín. ²⁰ A ntá tí kjuachaxién Dios la jehya tí nkehe tsonixjani ó. Náhi. Tí tjákoħinni la tí kjuachaxién Dios. ²¹ ¿Nkehe tjinkáonrá tí jahará, kixin á chrókjuasán chrókjuintakjasótiar? o ¿á tjinkáonrá kixin jnkojína chrókjuasán?

5

Tsitoxín ijnko jie tjachehe kichó chojni

¹ ¿Á chaxín tsík'ikon sín kixin tí tjejorá ntiha la ijnkorá mé chontará nájoanrá éxi ichjiánrá? Tíha mé ijnko jie jié, la mé kjónté tí sín chónhya Dios la xikahya ch'e sín. ² A ntá kjónté xikaha tsíkónhen la imá ihnkerá. Íchá jína imá chrók'uavará. A ntá tí xikaha ch'e ijnko chojni ntá chrókuétueñhénrá ch'án sáchrókjui ch'án, chrók'uejokoahyará ch'án ntiha. ³ A ntá ntáxrjan janhan kjónté tjenhya cuerpo kuéntana tí tjejorá ntiha la tí tjenkayáxian la ntaha tjèn éxi chrókjuak'é janhan, ntá t'akjénxian ihnié Ìnchéni Jesucristo la ntáxrjan kixin ó kjuixin kjuenkayáxian kixin nkexrí chrókjuasóte tí ch'ín xikaha tsík'ich'e. ⁴ Tió tsojnksérá kaín rá ntiha la éxi koyá tsjak'é ntiha la kjánchó nchakuenná ó la ko koí tí kjuachaxién Ìnchéni Jesús ts'ejókoará ntiha. ⁵ A ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuènte ch'án. Ntá tió tsokjan Ìnchéni mé tsaá asén ch'án.

⁶ Jahará chrókjuinchehnkehýará kixin tí nkehe tsíkónhen ntiha. ¿Á noahyará nkehe ntáchro sín, kixin tí ch'o a mé tjiko intsíkoá tí xroan nchek'ánki niotja, ntá kjónté la tsosán kaín tí ch'o? ⁷ Méxra chrókuakítsjerá ntója kaín tí xroan ntaxin nchek'ánki niotja, kixin ntá jahará ts'ejorá éxi niotja tsík'óna ch'o nixin tsík'ikohya xroan nchek'ánki niotja. Éxi niotja ine sín tí yaon pascua, mé jahará tíha. Kixin jehe Cristo, éxi ijnko kolélo t'óyan sín tí yaon pascua, mé k'uenyákonhenni ch'án. ⁸ A ntá chrókjuasinni tí kia a la kaín asénni chrórxaxinkaonni, tíha la éxi tí niotja chóntahya xroan nchek'ánkixin. La jehya kixin chrókjuasinni tí kia naxa chróchóntani kjuanínkaon kixin táha la yóħe tí xroan ntaxin nchek'ánki tí niotja a.

⁹ A ntá íjnko xroon chr'anhánrá k'uéntáxrjan kixin ninkehó chrók'uítóhyará tí sín tjasin jie chóna chojni chjin ókjé. ¹⁰ Ntá jehya kixin kuétuanhanrá kixin chrók'uítóhyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhi. Tí xikaha chrókjuich'erá la t'ichjánxin chrók'uaxrjéxinrá tí chjasintajni. ¹¹ Méxra ó kuétuanhanrá kixin chrók'uítóhyará ninkehó jnkojín chojni ntáchro sín kixin kichó ni tí jehe sín, ntá naxa tjasin sín tí jie chóna sín chojni chjin ókjé, la ko tjinkaon sin jehó sín tsochóna sin itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjóntekoahyará sín. ¹² Jehya xrana chrókjuintakitoaxián tí ijié tí sín jehya kuènte nínko ntiha. A ntá tí xra kuéntará jahará kixin chrókjuinchekitoxínrá tí ijié tí sín kichó ni tójnksé

ninko ntiha. ¹³ A ntá Dios mé sinchekitoexín ch'án ijié tí sín jehya kuènte ninko. Méxra, takítsjekjanxinrá tí ch'ín jínahya kjuasin jie tí tjejorá ntiha.

6

Chrókjuikjanahya sín jie nkayakon tí ch'ín juez tinkáchónkihya Ìnchéni

¹ A ntá jnkójínrá chrókjuánjonkoará kíchuará chrókjuikjanahyará jie nkayakon tí ch'ín juez tinkáchónkihya Ìnchéni. Íchá jína chrókjuirá chróchenkará tí sín tinkáchónki Dios. ² ¿Á noahyará kixin tí sín tinkáchónki Ìnchéni mé sinchekitoexín sín ijié kaín xín chojni chjasintajni? A ntá xikaha sinchekitoexínrá ijié kaín xín chojni chjasintajni, ¿ntá nkekuènte tsjachahyará sinchekitoexínrá kjónté ijnko jie ntsí? ³ ¿Á noahyará jahará kixin kjónté tí sín ángel tsotsjeheni nkehe tí xra kjuích'e sín? A ntá ijnko nkehe intsí ntihyó, la ¿á xitjahya chrókjuásiyóxinrá? ⁴ A ntá xikaha chrókjuánjonkoará kíchuará, ¿ntá nkekuènte tjíkjanchiará jie nkayakon tí sín tikiínxinhya kuènte ninko? ⁵ Ntáxrjan xikaha kixin chrókjuíntasuàhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijié kichó ni? ⁶ Jahará jnkokoá kíchuará ntá tjanjonrá, la ko kjaxin sátjíkjanchará jie nkayakon tí ch'ín juez tinkáchónkihya Ìnchéni.

⁷ Kjónté ijnko jie ntsí ntá imá tjanjonkoáxinrá kíchuará; tíha mé t'óna ijnko jie jie. Íchá jína chrókóninkákonhyará kixin tí nkehe jínahya kjuít'ahará sín. Íchá jína chrókuiítóhéra sín kjónté tsaáhará sín. ⁸ Kjánchó kjaxin jahará ntoáhya tjejoch'era kixin kjónté jnkokoá kíchuará la teeherá sín.

⁹ ¿Á noahyará kixin tí sín jínahya ch'e la ts'áyèhya sín kjuachaxin kuènte Dios? Chrókuiítóéhyará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ò chjin, t'ò ntoa, la ko tí sín jnkokón ntoa sín tóxrjínhin kichó sín, ¹⁰ la ko tí xichee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyèhya sín kjuachaxin kuènte Dios. ¹¹ Xikaha k'uéjorá isorá senó. Ntá jie ó k'uíjmárá, kjuínchetjóará Dios, ntá ó xíka ijiará kjuachaxin ihnié Ìnchéni Jesucristo la ko kjuachaxin kuènte Nchakuen Dios.

Tí cuerpo ó tsíkótjóá

¹² Siín kjuachaxin kaín nkehe chrókjuít'a, kjánchó iso nkehe la ó chónkó. Siín kjuachaxin kaín nkehe chrókjuít'a, kjánchó chrókuiítóahya ninkehó nkehe chrók'uetuanna. ¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjáyan yóí tíha. A ntá k'ónahya tí cuerpo kuènteni kixin chrókjuasixinni jie. Náhí. Tí cuerpo kuènteni mé k'óna kixin tsochjéxinni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni. ¹⁴ Méxra Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kixin jnkójnko cuerpo kuéntará mé it'ò tí cuerpo kuènte Cristo? ¿Á chrókjuít'a janhan kixin it'ò tí cuerpo kuènte Cristo chrók'óna it'ò cuerpo kuènte ijnko chojni chjin ch'iyehé nchónhya chojni ntoa? Méxra kjá nahí. ¹⁶ ¿Á noahyará kixin tió ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín chrók'óna sín jnkokoá cuerpo? Kixin ntáchro xroon itén Dios kixin: “Yóí sín la ts'óna sín jnkokoá

chojni.”* ¹⁷ A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

¹⁸ Méxra chrókuítóhéra chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín. ¹⁹ ¿Á noahyará kixin jnkojnko cuerpo kuèntará mé éxí ijnko nínko itjen Nchakuen Dios kjuanjón ch'án k'uayéhé, la ko chontará tí Nchakuen ch'án tjóá? Jahará la jehya ìché tí cuerpo kuèntará ²⁰ kixin jahará la tjete k'uénaxínrá Dios. Méxra chjeéxinrá kjuasáyé Dios tí cuerpo kuèntará la ko tí nchakónrá kixin yóí la kuènte Dios.

7

Chenka ch'án tí sín tsíkótehe kixin nkexrí chrók'uejó sín

¹ A ntá jie tsjataha tí nkehe tsíkinrá kjuanchankínará, na mé ntáxrjan kixin chaxín chrókójína kixin tí chojni ntoa chrókuakjahya ichjién. ² Kjánchó tí xíkaha imá tjinkaon sín tsochóna sín itsjé chojni chjin tjasinko sín jie, la íchá jína jnkojnko chojni ntoa chróchóna jnkojnko ichjién kuènte la ko jnkojnko chojni chjin chróchóna jnkojnko xì kuènte. ³ Tí chojni ntoa la ko tí chojni chjin chrókjuinchexiteyéhe sín kíchó sín. ⁴ Tí chojni chjin jehya ìché tí cuerpo kuènte tjan, na mé kuènte xì tjan. Ntá kjaxin xíkaha tí chojni ntoa la jehya ìché tí cuerpo kuènte ch'án, na mé kuènte ichjién ch'án. ⁵ Chrókjuincheniéhyará kichuárá, jehí jnkokoá chrókjuenkayáxinrá yóírá kixin tsochonteherá iso yaon kixin ntá kaín asánrá chrónixjehérá Dios. Ntá tsjixin ntá chrókóchjineherá kichuárá inaá kixin chrókjuítóéhyará kixin ch'ín Tsochren chrókjuacha chrókjuachroerá ch'án chrókjuásínrá jie.

⁶ Kaín tíhi tjonkara kixin tsonohará kixin síin kjuachaxin xíkaha na kjánchó jehya kixin xíkaha tétuanhanrá. ⁷ A ntá janhan ntáxrjan kixin chrókójína kixin kaín rá chojni ntoará chrókóyóhará éxí tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxa tóteehya la ko tí chojni tsíkók'án na ntátjan sín kixin chrókójína kixin xíkahó chrók'uejó sín chrókóteehya sín éxí tí janhan xíkaha. ⁹ Kjánchó tí chrókjuachahya sín tí tjak'e asén kíchó sín, naxa chrókjuasin sín jie, ntá íchá jína chrókótehe sín kixin jehya jína kixin jnkochrín chrókjuak'ó asén sín.

¹⁰ A ntá jahará ó tsíkixin tsíkóthahará, la tétuanhanrá tíhi: a ntá jehya kixin kjuachaxin kuèntana tétuanxínrá. Náhi. Kjuachaxin kuènte Ìnchéni mé tétuanxínrá kixin tí chojni chjin chrókjuákehya xì. ¹¹ A ntá tí chrókjuákehé ijnko chojni chjin tí xì, ntá xíkahó chrókuitohe tjan jehó tjan la ko chrókójína chrókóyóxin, chrókjuìnhin tí kjuanínkaon kixin tí kjuákehé kíchó sín. Kjaxin xíkaha tí chojni ntoa la chrókjuákehya tí ichjién.

¹² A ntá tí nkehe tétuanhan tí í so sín jaí la kuèntana janhvàn, jehya kuènte Ìnchéni, kixin tí tjen ijnko ch'ín kíchó ni chóna ch'án ichjién ch'án tinkáchónkihya Ìnchéni, na kjónté naxa tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. ¹³ La ko tí tjen ijnko tjan kíchó ni chóna xì tjan tinkáchónkihya Ìnchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. ¹⁴ Kixin tí xì tjan tinkáchónkihya Ìnchéni ntá jie ó kótjóá ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá

* 6:16 Génesis 2.24

tjan kixin tí xì tjan mé tinkáchónki Dios. A ntá tí xikahya, la tí xjeen sín chrókótjuáhya, na ntá jie la mé ó kótjóá tí xjeen sín. ¹⁵ A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehe kichó sín, la ája nohe sín tjákehe kichó sín, kixin Dios tjinkaon kixin kjuaxróxin chrók'uejorá. ¹⁶ Jahará chojni chjinrá, ¿nkexrí chrókónohará kixin nkexrí chrókuaá xiará? La ko jahará chojni ntoará, ¿nkexrí chrókónohará kixin nkexrí chrókuaá ichjiánrá?

¹⁷ A ntá jnkojnko chojni chrók'uejó sín éxí tsíkjanjon Ìnchéni kjuachaxin tsík'áyéhe sín, la ko éxí tí k'uejó sín tió k'uíyehé sín Dios, kjánchó chrókuítóehya sín tí jehe ch'án. Mé xikaha tétuanhan kaín tí njnko. ¹⁸ Tí chrók'uíyehé Dios ijnko ch'ín chóna xroye, ntá xikahó chrókuítóhe ch'án. A ntá tí chrók'uíyehé Dios ijnko ch'ín chónahya tí xroye a, ntá kjónté chrókuahya ch'án tí xroye a. ¹⁹ Na mé tjetuanhya á chóna chojni tí xroye o á chónahya chojni tí xroye. Na mé tí nkehe tjetuan kixin chrókjuinchexiteyéheni tí nkehe k'uetuan Dios. ²⁰ Chrók'uejóni jnkojnkoní éxí k'uejóni tí k'uíyeheni Dios. ²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuákjá tíha. ²² Kixin tí nkexro kjuích'exón xra tió k'uíyehé Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uítuenhya tió k'uíyehé Ìnchéni la mé jie mé ch'ehe ch'án xra Cristo. ²³ Dios imá tjehe k'uénaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna ìnchará. ²⁴ Méxra kichó ni, éxí k'uejorá tió k'uíyahará Dios kixin tsinkachónkirá ch'án, la xikahó naxa chrók'uejorá jie kixin chontará Ìnchéni tsjinkitsa.

²⁵ A ntá tí chojni naxa tóteehya sin na mé janhan chontahya nkehe kuente Ìnchéni chrókuétuanhan sín. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kixin kuikonóna Ìnchéni. ²⁶ Mé xikaha tónna kixin chrókójina kixin jnkojnko chojni chrókuítóhe sín éxí tjejó sín chrókóteehya sín, kixin ijie la kjuaxróxinhya tjejóni. ²⁷ A ntá tí chontará ichjiánrá ntá chrókjuákeéhyará tjan. A ntá tí chontahyará ichjiánrá ntá íchá jina chrókjuéyáhyará. ²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsíkótehe la tsochóna sín kjuaxikaon, mé xikaha janhan chrókjuínkitsa sín kixin chróchónahya sín kjuaxikaon.

²⁹ Mé xikaha tjétjonkará kichó ni kixin tsjéhya yaon naxa t'itjáyan tsokjan Ìnchéni. Mé xikaha tí chojni ntoa chóna ichjién sín, la antsí tjetuan saoxín chróxaxinkaon sín Ìnchéni, la ntá chr'éxin chrótjuèhe sín ichjién sín. ³⁰ A ntá tí sín tsjánka la chrók'uejó sín éxí chrótsjánkahya sín. La ko tí sín chéhe la chrók'uejó sín éxí chèhya sín. La ko tí sín t'ena nkehe la chrók'uejó sín éxí chónahya sín tí nkehe tsík'ena sín. ³¹ La ko tí sín kjuacha nkehe siín chjasintajni la chrók'uejó sín éxí ninkehó chróchónahya sín, kixin kaín nkehe t'ikonni chjasintajni ntihi mé tjoka tsjeje.

³² Tjínkakonhya kixin jahará chrókóxakonhanrá. Tí ch'ín ntoa chónahya ichjin antsí má tóxakonhen tí xra kuente Ìnchéni chrókjuinchexiteyéhe ch'án tí nkehe tóxrjinhin Ìnchéni. ³³ A ntá tí ch'ín tsíkótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án. ³⁴ Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuente Ìnchéni kixin tjinkaon tjan kixin Dios sinchetjóá tí cuerpo kuente tjan la ko tí asén tjan. A ntá tí tjan tsíkótehe mé

tóxakonhen tjan tí nkehe síin chjasintajni kixin xikaha sinchechéhe tjan xii tjan.

³⁵ Tjéjtjonkará tíhi kixin tjínkavan kixin jína chrók'uejorá, jehya kixin xikaha chrókuétuanhanrá. Náhi. Tjínkavan kixin kjuasáya chrók'uejorá jnkójina la jehó Ìnchéni chrókjuich'eherá xra.

³⁶ A ntá jnkójínrá tjenkayáxinrá kixin chrókójina chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsotehe tjan na mé jehya jie. ³⁷ A ntá jnkójínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha. ³⁸ Mé xikaha tí títóhéra xjaanrá chjin kixin tsotehe tjan la ó nchoxon. La ko kjaxin tí tjinkakonhya tjan kixin chrókótohe tjan na mé antsí jína tíha.

³⁹ Tí tjan tsíkótehe mé k'uituénxín tjan kjuachaxin tí ley kixin tsjak'eko tjan tí xii tí naxa tjechón ch'án. A ntá tí chrók'uen ch'án ntá tsochóna tjan kjuachaxin tsotehe tjan ínaá tí nkexro tsoxrjínhin tjan, kjánchó jehó ijnko nkexro tinkáchónki Ìnchéni mé chrókótehe tjan. ⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuènte Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsoxrjanka kuènte ti ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kixin tí chrók'uitjani má ntá chrókóhnkeni má. Antsí tjetoan chrótuèheni kichó ni kixin xikaha antsí chrókuinkáchónkini Ìnchéni. ² Tí jnkójín nkexro ntáchro kixin nohe ch'án, na mé chaxínhya tíha la naxa t'itjáyán tí nkehe chrókónohe ch'án. ³ A ntá jnkójín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuánhya ninkehó ntihi chjasintajni, la ko ó noheni kixin jnkokoá Dios tjen. ⁵ A ntá síin nkehe nchek'in sín díos nkaya nkajní la ko chjasintajni na, kjánchó tí xikaha la kjá chrók'uixin itsjé díos la ko itsjé ìché sín. ⁶ A ntá jeheni chóntani jnkokoá Dios na mé It'éni tíha, la jehe ch'án mé kjuích'éna ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe síin la kjuích'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuènenhén sín kuináchónki sín tí nkehe tsíkjanoya, a ntá jie tíó ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko díos, kixin naxa noehya sín má, ntá ntáchro sín kixin ó kuámá sín tí jie kuènte tí nkehe tsíkjanoya. ⁸ Ó noheni chaxín kixin jehya kixin chrókóxrjínhin Dios tí jeheni kixin tí nkehe jína chrókjóneni. Náhi. Jehya kixin chrók'uejóxinni jína kixin tí nkehe chrókjóneni na ko tí nkehe chrókjónehyani. ⁹ Méxra títóéhyará kixin tí kjuachaxin chontará sinterá kaín xín nkehe mé xikaha chrókjuachroe ijnko chojni kichó ni naxa noehya jína tinkáchónki Ìnchéni ntá tíha chrókjuasixín sín jie. ¹⁰ A ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko ninkoe nkehe tsíkjanoya, ntá tí chojni kichó ni naxa noehya jína ntá chrók'uikon sín xikaha ntá kjaxin jehe sín tsotjinkaon sín sine sín tí nkehe tsíkjokehe chojni ijnko díos chaxínhya. ¹¹ A ntá jahará ó nohará jína ntá xikaha tjejoch'erá itsará sínchek'itjáyánrá tí kichó ni

na_xa noehya jína tinkáchónki Ìnchéni kíxin Cristo k'uenyákonhen tí jehe ch'án kjaxin. ¹² Méxra tí xikaha chrókjuich'erá la chrókjuásinhínra jie tí sín kíchó ni na_xa tinkáchónkihya sín Ìnchéni jína, na mé xikaha kjaxin chrókjuásinra jie chrókuitekákuenhyará Cristo. ¹³ Méxra tí xikaha chrókjuasixín jie ijnko kíchó ni kíxin tí nkehe chrókjóneni, ntá íchá jína chrókjónehyani nto ínaá kíxin xikahya ntá chrókjuichroexín tí sín kíchó ni ntá chrókjuasixín sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kíxin janhan la chonta kjuachaxin kíxin ijnko apóstol tsíkjeýá Ìnchéni kíxin janhan k'uíquán ch'án. Jahará mé tjáko_xinra tí xra kjuít'a kuènte Ìnchéni. ² Iso sín ntáchro sín kíxin tjátsoanhyana sín kíxin ijnko apóstol tsíkjeýá Ìnchéni. Ntá jahará kaín rá mé chrókjuátsoanra tí janhan kíxin tí kuítekáonra kuinkachónkirá Ìnchéni mé xikaha tjáko_xinra kíxin chaxín janhan tsíkjeýána ch'án.

³ Méxra janhan jína chrókjuátaha tí sín xritjontana, chróntáxrjan kíxin: ⁴ Janhan chonta kaín kjuachaxin chrók'uayáha nkehe chrókjone la ko chrók'uaia. ⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxí chóna tí í so sín tsíkjeýá Ìnchéni, la ko tí sín kíchó Ìnchéni, la ko éxí chóna ch'ín Pedro. ⁶ ¿Á tjenkayáxinra kíxin ch'ín Bernabé la ko janhan jehóni chóntahyani kjuachaxin tsítóheni tí xra sich'exínni tjani? ⁷ ¿Nkexro ch'e xra soldado ntá chichákoen ch'án ó chrókuicháxinhin? Nkexro k'uēnka nta to uva ntá kjónehya ch'án to? ¿La ko nkexro t'ayakonhen kolélo ntá k'uíhya tí tsjen t'énhen sín va? ⁸ Ntáchrohyará kíxin janhvàn kjuenkayáxian tíha kíxin kjaxin xroon tsíkjin ch'ín Moisés xikaha nixja. ⁹ Méxra kjaxin ntáchro tí xroon tsíkjin ch'ín Moisés óse kíxin: “Chrókjuéjójyáhyará kamposa ir'va koxinta tí tsinkátja va noatrigo tió tsónkéhe sín noa.”* Tíha mé t'axrjexín kíxin jehya koxinta ó tóxakonhen Dios. ¹⁰ Náhi. Tóxakonhen ch'án kíxin tí jeheni. Méxra xikaha nixja tí xroon kíxin chrók'uejóxinni jína. A ntá tí nkexro kjuínchentá nche la ko tí nkexro tsónkéhe noa, yóí sín la chróchónhen sín chrók'uayéhe sín tí nkehe k'óna. ¹¹ A ntá tí k'uēnkani tí itén Dios asánra, la kjá chróchóntani kjuachaxin chrókjuanchaharáni ichrén nkehe t'ichjánxinhinni. ¹² A ntá tí xikaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uayéheni nkehe.

Kjonté chóntani kjuachaxin xikaha la kjuanchahyani nkehe, kjonté kánhyó náxrjón k'uejóni kíxin tjinkakonhyani chrókjuanchiani nkehe chrók'uichjánxinhinni kíxin ách'e xikaha ntá chrók'uinkákonhen tí itén Cristo chrókjuakoni. ¹³ Jahará ó nohará kíxin tí sín ch'e xra kùente njnko mé ntaha xránjon nkehe ine sín. La ko tí sín t'óyáxin sín ko tí altar tsochjéhe sín Dios kjaxin ine sín tí ntoe tí ko t'óyáxin sín ntiha. ¹⁴ Méxra xikaha kjaxin k'uetōan Ìnchéni kíxin tí sín ch'e tí xra ó chrónka sín tí tan tsaáxinni na mé tí xra a chrók'uaxrjenixin tí nkehe chrókjóne sín. ¹⁵ Kjonté janhan siín kjuachaxin xikaha chrókjuít'a, la xikahya kjuít'a la ko kjaxin xikahya ikjian tí xroon i kíxin jahará chróchjinará ichrén nkehe. Náhi. Kjonté chrók'uénxian kjinta chrókjuáncháhyará nkehe kíxin tjínkakonhya kíxin ninkexró chrókuakitsjena tí kjuachéhe chonta.

¹⁶ Jehya kíxin chro_kjuíntahnke chrókjuákuaa tí tan tsaáxinni. Náhi. Janhan na ó jehí sit'a tí xra a. Nòa tí janhan tí chrókjuákohya tí tan jína chrókuaáxin chojni.

* 9:9 Deuteronomio 25.4

17 **A** ntá tí janhván tjínkavan chrókjuàkua la xikahó chrókjuacha janhan. **A** ntá tí tjàkua itén Dios kixin xikaha kuítuanna ntá xikahó ntaxiteyá tí xra chjina Dios. 18 ¿**A** ntá nkehe chrókjuacha janhan? Tíha mé chrókjuacha janhan kixin chrókóchàna má kixin chrókjuàkua tí itan tsaáxinni la ninkehó chrókjuánchàhya chrókjuacha la ntá tí xikaha la chrókuákjaáhya tí kjuachaxin tí chrókjuàkua.

19 Méxra kohya nkexro t'etuanna. Kjánchó ó jehí chrókjuít'aha kaín xín chojni xra kixin xikaha antsí tsjé chojni chrókjuacha janhan kixin chrókuitekaon sín Cristo. 20 Ti tjèn tí síin tí sín judío ntayóha éxi jehe sín xikaha janhan kixin xikaha chrókjuacha jnkojín sín chrókuitekaon sín. Na mé t'axrjexín kixin tí chrókjuacha iso tí sín nchexiteyéhe tí ley k'uetōan ch'ín Moisés, la t'ichjánxin kixin kjaxin janhan chrókjuíntaxiteyá tí ley kjónté janhan la xikahya t'etuanna tí ley. 21 **A** ntá tí chrókjuacha jnkojín tí sín nchexiteyéhya tí nkehe k'uetōan ch'ín Moisés la ntayóha éxi tí jehe sín xikaha janhan kjaxin, kjónté chaxín t'etuanna tí nkehe k'uetōan Dios méxra ntaxiteyá tí nkehe k'uetōan Cristo. 22 Tió tjèn tí síin tí sín tienxínhya jína, ntá kjaxin janhan t'óna éxi tí jehe sín kixin xikaha chrókjuacha jnkojín tí jehe sín chrókuitekaon sín. Méxra ntayóha éxi kaín xín chojni xikaha janhan kixin xikaha chrókjuacha janhan kixin chrókuaá iso tí jehe sín. 23 Mé xikaha kaín tíha tjét'a kixin chrókuinhin sín tí tan chrókuaáxin sín la ko kjaxinna antsí má chrókjuíntayaonna Dios.

24 Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsjtonhen nkehe. **A** ntá jahará xikaha chrókuinkará kixin chrók'uayéhérá tí nkehe chrókuítonhanrá. 25 Tí sín tinkáko kichó sín na mé jína t'ayakonhen sín asén sín, títohe sín kaín xín nkehe chrókjuich'ehe sín dañó kixin tjínkaon sín chrókjuacha sín, chrók'uáyéhe sín kjónté ijnko corona tsík'óna kayoa ó tjoka tsoxámá. Kjánchó jeheni ch'eni xra kuènte Inchéni kixin ntá ts'áyéhéni ijnko nkehe chónhya tsoxámá. 26 **A** ntá janhan jehya éxi ijnko chojni t'ikonhya chrókuinka. Jehya éxi xrintō ó chrókjuánjonkian. 27 Náhí. Janhan tjánjonkian tí cuerpo kuèntana, tétuanhan kixin jína chrókjuínchexiteyàna kixin tóxakonna kixin chrókjuásian ichrén jie ntá janhan chrókjuachahya kjónté senó kjuákoḡa itsjé chojni.

10

Tí nkehe t'etōan ch'án kuènte tí nkehe tsíkjanoya

1 Tjínkavan janhan kixin chrókónohará kichó ni kixin tí sín k'uaxrjeníxinni ósé, kaín sín k'uixinkánkí sín chrínkí tí tjuj, la ko kaín sín k'uátōye sín Ntayaon Kjátse, 2 la ko kaín sín k'uéchréhe sín ch'ín Moisés éxi yóhe chrókuikite sín kixin jnkokoá k'uéjō sín tí tjen tí tjuj la ko tí ntayaon la ko kjuínchexiteyéhe sín ch'án kixin jehe ch'án k'uék'etōan ch'án. 3 La ko kaín sín kjóne sín jnkokón nkehe kujxin nkaya nkajní 4 la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuíncheyaon Dios, na mé tí tjo a la mé t'axrjexín kixin Cristo tíha. 5 Kjánchó itsjé tí jehe sín kjuínchechèhya sín Dios, méxra kónínkaon ch'án la tí nteje ó k'uénxin tí sín a.

6 Kaínxín tíha kónhen kixin chróxaxinkakonxinni jeheni, chróntáchrohya asénni chrókjuich'eni tí nkehe jínahya éxi kjuích'e tí jehe sín. 7 Méxra chrókuinkachónkihyará jahará nkehe tsíkjanoya éxi k'uékinkáchónki iso tí jehe sín, éxi ntáchro tí xroon itén Dios tsíkjin sín ósé kixin: “Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín”.* 8 Méxra chrókjuasinkohyani jie chojni chjin ókjé éxi kjuích'e iso jehe sín ntá ik'uén sín, ventitres mil sín, jnkokoá yaon.† 9 Kjaxin chrókjuínchekóninkakonhyani

* 10:7 Éxodo 32.6 † 10:8 Números 25.6-9

Ìnchéni éxí kjuích'e sín ntá ik'uén sín kixin kjónehe sín konche,‡ 10 la ko chrók'uántaxíenhyani Dios éxí k'uántaxínhìn tí jehe sín ntá tí ángel kuènte kjuach'én mé kui k'óyán sín. §

11 Kaín tíha kónhen tí sín k'uaxrjeníxinni ósé kixin chrókónoexínni la ko k'óna xroon chrónka xíkaha kixin nchexraxinkaoonni tí jeheni tjejóni jie kixin í séhya tsjixixín tsjeje chjasintajni. 12 A ntá tí nkexro ntáchro kixin ntoá tjen na chrókóxakonhen kixin chrókjuichroehya. 13 Jahará naṣa k'uatsínkahyará ninkehó nkehe tí chrókjuachahya chojni chrókónhen. Méxra jahará chróxráxinkáonrá Dios kixin jehe ch'án chrókuítóehya ch'án tí jahará kixin chrók'uatsínkará nkehe imá xra chrókjuachahyará. Méxra tí itsi ichrén nkehe tsonhanrá la Dios tsjinkítsará ch'án kixin chrókjuachará chrók'uatsínkará tí nkehe chrókónhanrá.

14 Méxra tjuahará jahará kíchó ni, la ntá ntáxrjan kixin chrókuítóhérá tí nkehe tsíkjanoya. 15 Nixjahará jahará kixin jahará chojni ó tienxín. Méxra jahóra chrokJuenkayáxinrá kixin á jína tí nkehe ntáxrjan. 16 Tí tjanchiani kjuasáya kixin tí nkehe it'ini na mé kaín ni jnkokoá tjakoṣínni tí ijnié Cristo ó k'úitji. La ko tió tóchrít'oni tí niotja ineni, na mé kaín ni jnkokoá tjakoṣínni tí cuerpo kuènte Cristo. 17 Kjónté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuènte Cristo.

18 Chrókónohará nkexrí ch'e tí sín chjasin Israel, na mé ine sín tí ko tsíkjokehe sín Dios ntá xíkaha tjakoṣín sín kixin xíkaha tinkáchónki sín. 19 Ntáxrjanhya kixin tí nkehe tsíkjanoya la chóna kjuachaxin, la ko ntáxrjanhya kixin tí nto tsíkjokehe sín tí nkehe tsíkjanoya la antsí chóna kjuachaxin. 20 Náhí. Ntáxrjan kixin tí nkehe tjanjon tí sín chónhya Dios na mé tjokehe sín tí nchakuen tí jínahya la jehya Dios tjokehe sín tíha. Méxra janhan tjínkakonhya kixin xíkaha chrókjuich'erá jahará chróxráxinkáonrá tí nchakuen tí jínahya. 21 Tí its'ini tí nkehe xraxinkakonxínni ijnié Ìnchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrók'uini. Tí sineni tí nkehe xraxinkakonxínni tí cuerpo kuènte Ìnchéni ntá kjaxin tí chrókjóneni tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrókjóneni tí nkehe. 22 ¿A jína chrókjuinchekóninkaonni Ìnchéni ní? ¿Á jeheni antsí chóntani kjuachaxin la ntá jehe ch'án la náhi ní?

Chóntani kaín kjuachaxin kaín xín nkehe na kjónté antsí tjeoan tsotjuèheni kíchó ni

23 Siín kjuachaxin ichrén nkehe chrókjuich'eni. Kjánchó jehya kixin kaín nkehe la jína. Siín kjuachaxin ichrén nkehe chrókjuich'eni na kjánchó kénhya nkehe chrókjuinkítsa chrókónoheni tí nkehe kuènte Dios. 24 Chrókjuéyáhyará tí nkehe chrók'uejóxinrá jína jahóra. Náhí. Kjaxin chrókjuéyará tí nkehe chrók'uejóxin jína í so chojni.

25 Chrókjónterá kaín nto sítóxin la chrókjuanchankíhyará ninkehó kixin tí xíkaha ntá ntoáhya chrókjuenkayáxinrá, 26 kixin kuenté chjasintajni la kaín xín nkehe siín la kuènte Ìnchéni.

27 A ntá jnkojín chojni tinkáchónkihya Ìnchéni chrók'uíyáhará sín kixin chrókjóntekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó. 28 Kjánchó tí chróntáchro jnkojín sín kixin tí nto la ó tsíkjokehe sín ijnko nkehe tsíkjanoya, ichro sín, ntá tí xíkaha la chrókjóntehyará jahará, chrókóxakonhanrá kixin ntoáhya chrókjuenkayáxin tí nkexro chrónka xíkaha.

‡ 10:9 Números 21.5-6 § 10:10 Números 16.41-49

²⁹ Méxra ntáxrjan tíhi kixin tjínkakhonhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankìnará kixin nkekuènte chrókóxakonhanrá nkehe chrókjuenkayáxin ókjé chojni kixin tí kjuachaxin chontará. ³⁰ Tí tjáncháha Dios kjuasáya kixin tí nkehe inè, ¿ntá nkekuènte kixin chrókjontana chojni kixin kuènte kjonè? ³¹ Tí chrókjónterà nkehe la ko chrók'uirá nkehe la ko ichrén xra chrókjuich'erá la chrókjuákoxinrá kixin Dios kjuínkìtsará. ³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni ninkoe Dios. ³³ Janhan mé tjéyá kixin kaín xín xra tjét'a chrókóxrjínhin kaín xín chojni, na mé jehya kixin tjéyá kixin janhvàn chrókjuak'é jína. Náhí. Kjaxin tjínkavan kixin chrókuaáxin í so chojni.

11

¹ Chrókjuákoxinrá jahará éxí kjuákoxiàn janhan kixin janhan mé kjuákoxiàn éxí kjuákoxin Cristo.

Jína chrók'uejó tí chojni chjin tió tójnkotsé chojni

² Kíchóni, chàna kixin xráxin xráxinkáonrá tí janhan la ko nchexiteyéhérá tí nkehe kjuákohará. ³ A ntá tjínkavan kixin chrókíénxinrá kixin Cristo t'etuèhen jnkójnko chojni ntoa, la ko kjaxin xikaha jnkójnko chojni ntoa mé t'etuèhen tí ichjién, la ko kjaxin xikaha Dios mé t'etuèhen Cristo. ⁴ A ntá tí jnkójín chojni ntoa xrasixín kachjinke ch'án tí tjenixjehe ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjákoxin ch'án kixin chóntehya ch'án kjuasáyé tí Inchéni t'etuèhen ch'án. ⁵ A ntá ijnko chojni chjin tjóchin kja tjan tí tjenixjehe tjan Dios la o tjóchin kja tjan tí tjechronka tjan iten Dios, mé xikaha tjákoxin tjan kixin chóntehya tjan kjuasáyé tí xii tjan. Mé tóyóhe éxí tsíkjin tjan xikaha. ⁶ A ntá tí chojni chjin tjínkakhonhya kixin chrók'uiáxin kja tjan nkehe mé chrókjin tjan. Kjánchó tí chrókósuèhe tjan chrókjin tjan, ntá chrók'uiáxin kja tjan tóte tió tójnkotsérá. ⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxí retratgé Dios la ko t'inkaséyanxín ch'án tí kjuachaxin kuènte Dios. A ntá tí chojni chjin mé t'inkaséyanxín tjan tí kjuachaxin kuènte tí xii tjan. ⁸ Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhí. Tí chojni chjin mé k'uaxrjeníxin tí chojni ntoa. ⁹ Chaxín k'ónahya tí chojni ntoa kixin jehó tsjak'e ch'án. Náhí. Tí chojni chjin mé k'óna kixin tsjak'ekotoxin ch'án. ¹⁰ Ntá t'ichjánxin kixin tí chojni chjin ts'iaxin kja sín tóte chrókjuákoxin sín kixin t'ítuèhen sín kixin xikaha ts'ikon tí sín ángel. ¹¹ Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkítsa tí chojni chjin la ko tí chojni chjin chrókjuinkítsa tí chojni ntoa. ¹² Kixin chaxín tí chojni chjin na tí chojni ntoa k'uaxrjeníxin. A ntá jie tí chojni chjin na mé t'axrjeníxin tí chojni ntoa. A ntá kaín ni k'uaxrjeníxinni Dios.

¹³ Jahará nkechorá, ¿á ó nchoxon kixin ijnko chojni chjin tjóchin kja tjan chrónixjehe tjan Dios? ¹⁴ Jahórá chrókónohará kixin chrókósuèhe tí chojni ntoa chóna kaxihi kjinjin. ¹⁵ A ntá tí chojni chjin chóna kaxihi kjinjin la mé ntoá tíha kixin ó kuituènxin tjan kixin tsochóna tjan kaxihi tjan kjinjin kixin tsotjóchinhya kja tjan. ¹⁶ A ntá tí tjan jnkójín nkexro titekakhonhya tíha xikaha ntá chrókónohará kixin jeheni la ko kaín xín tí sín ninkoe Dios la xikahó kuènhenni.

Ntoáhya kjóne sín tí niotja xraxinkakonxín sín Inchéni

¹⁷ Méxra tí nkehe tjékjian la mé ijnko nkehe tóxrjinnahya tjejoch'erá. Tió tójnkotsérá ntiha la ijnko nkehe jína chrókjuich'erá. A ntá náhi la ijnko

nkehe jínahya tjejoch'erá. ¹⁸ Na mé saoxín na mé ntáchro sín kixin tió tójnkotsérá la jnkokoáhya tjenkayáxinrá. Ntáxrjan kixin ách'e chaxín xikaha tjejorá. ¹⁹ ¿Xá t'ichjánxin kixin chrók'uaxrjentará kixin chrókónoexínni kixin nkexro chaxín tinkáchónki Ìnchéni la ko nkexro tí náhí? ²⁰ Méxra tí xikaha jnkokoáhya tjenkayáxinrá ntá tió tójnkotsérá chrókjónterá niotja la chaxínhya xraxinkákonxínrá Ìnchéni tí xikaha. ²¹ Kixin tió sinterá la senó isorá tjejonterá tí nkehe tsíkjasánkoará, la isorá la kjónté naxa t'énxinrá kjinta, la í sorá la tsíkókoanrá. ²² ¿Á chontahyará nchia ntóar? Ntahó chrókjóntexínrá la ko chrók'uíxinrá nkehe. Mé xikaha chontahyará kjuasáyé tí ninkoe Dios la ko nchesuèhérá tí sín nòa chóntahya ninkehó. ¿Nkehe tsontáxrjan? ¿Á tsontáxrjan kixin jína tjejoch'erá? Kjá náhí. Jehya jína tjejoch'erá.

Jína chrórxaxinkakonxínni Ìnchéni

(Mt. 26.26-29; Mr. 14.22-25; Lc. 22.14-20)

²³ Kixin Ìnchéni mé chjina ch'án tí nkehe kjuákohará: kixin tí tie tsíkóxi ch'án na mé jehe ch'án kuákja ch'án tí niotja ²⁴ ntá kjuixin kjuanchia ch'án kjuasáya ntá kóchrít'o ch'án tí niotja ntá ntáchro ch'án kixin: “Tíhi mé ntona xránjon its'en kixin jína ts'ejóxin tí jahará. Méxra xikaha sich'erá kixin tsoxraxinkákonxínrá tí janhan”, ichro ch'án. ²⁵ La ko kjaxin xikaha tió kjuixin kjóne sín ntá kuákja ch'án tí vaso la ntáchro ch'án kixin: “Tíhi mé tjakoxin kixin chaxín tsoxiteyá ijnko nkehe nixin kuènte Dios kixin ts'ítji jnina. Tió its'irá tíhi mé tsoxraxinkákonxínrá tí janhan”, mé chro ch'án. ²⁶ Kixin tí interá tí niotja la it'irá tí inté to uva mé xikaha tjejotjakoxinrá kixin xikaha k'uénxin Ìnchéni. Mé xikaha tsjakoxinrá tsjixrakájia yaon tsokjan ch'án.

Ntoá chrókjóneni tí niotja kuènte Ìnchéni

²⁷ A ntá jnkojín nkexro chjini chrókjóne sín tí niotja la ko chrók'ui sín tí inté to uva xraxinkakonxínni Ìnchéni, mé xikaha chrókjuasin sín jie chrókjuikosáyehya sín tí cuerpo la ko tí ijnié Ìnchéni. ²⁸ Méxra jnkojnkonni chrókjuenkayáxinni senó kixin á chóntahyani jie na ntá chrókjóneni tí niotja la ko chrók'uini tí inté to uva. ²⁹ A ntá tí xikaha chjini chrókjóneni la ko chjini chrók'uini la chaxínhya chrórxaxinkakonxínni tí cuerpo kuènte Ìnchéni la mé tí xikaha chrókjuich'eni la chrókjuasótexínni tíha. ³⁰ Mé xikaha itsjérá níhará la ko itsjérá tsankahyará la ko jnkojínrá k'uénrá. ³¹ A ntá tí chrókjuatsóanni nkexrí tjen asénni jeheni ntá Ìnchéni t'ichjánxienhya chrókjuinчекjasóteni ch'án. ³² A ntá kjónté chrókjuinчекjasóteni Ìnchéni ntá chrók'uitjani chrókjuinчекxiteyéheni ch'án, ntá chrókjuasótehyani éxí tsjasóte tí í so chojni chjasintajni.

³³ Méxra kichó ni, tió tójnkotsérá sinterá la chróchonhénnrá chrókui tí í so sín ntá chrókjóntekoará sín jnkokoá. ³⁴ A ntá tí nkexro ik'uén kjinta la íchá jína senó chrókjónexín nkehe ntóe ó kixin ntá chrókjuinчекjasótehyará Dios kixin xikaha ntoáhya tójnkotsérá. A ntá tí í so nkehe la tsjásiyóxian janhan tió tsjasántsjahará.

12

Nchakuen Dios mé chjéhe kjuachaxin jnkojnko chojni

¹ Kichóni, tjínkavan kixin tsonohará jína kixin nkexrí siín tí kjuachaxin tjanjon Nchakuen Dios t'áyéhe jnkojnko chojni.

² Jahará ó nohará jína kixin tió naxa kuinkachónkehyará Ìnchéni na mé kuinkachréhérá tí nkehe tsíkjanoya nixjahya. ³ Méxra chrókónohará kixin

nijnko nkexro nixjāxin kjuachaxin Nchākuen Dios tsjacha ts'ántaxínhin Jesús, la ko nijnko nkexro tsjacha tsontáchro sín kixin Jesús mé Ìnché sín tí nixjāxinhya sín tí kjuachaxin Nchākuen Dios.

⁴ A ntá nchónhya xrā kuènte kjuachaxin Nchākuen Dios siín la kjánchó jnkokoá Nchākuen Dios mé tjetjanjon. ⁵ La ko siín nchónhya nkexrí sich'ehe ni xrā Ìnchéni, kjánchó Ìnchéni la ójnkó nkexro tíha. ⁶ La ko nchónhya nkehe t'axrjexín tí xrā ch'e jnkojnko chojni la kjánchó jnkokoá Dios tjetjanjon tí kjuachaxin ch'exínni xrā kaín ni. ⁷ Jnkojnko chojni mé kuitonhen kixin chrókjuakoxin kjuachaxin kuènte Nchākuen Dios kixin xikaha chrókjuinkitsa kichó. ⁸ Iso chojni mé ts'áyéhe kjuachaxin tsonixja sín kjuaxrexinkaon jína kixin tjinkitsa Nchākuen Dios, la ko í so chojni ts'áyéhe kjuachaxin tsochrónka ijnko nkehe kuènte Dios noehya tí í so sín kixin Nchākuen Dios mé tjinkitsa sín tsonixja sín. ⁹ La ko í so chojni mé ts'áyéhe kjuachaxin antsí tsinkáchónki Dios kixin Nchākuen Dios mé tjinkitsa. La ko í so chojni mé ts'áyéhe kjuachaxin sinchekitohe chojni jína. ¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsōanxín á kjuachaxin kuènte Nchākuen Dios ó á kjuachaxin kuènte ijnko nchākuen jínahya chronkaxín ijnko chojni, la ko í so chojni mé ts'áyéhe kjuachaxin kixin ijnko nkiva ókjé naxā k'uitjahya sín tsonixjāxin sín ijnko nkehe kuènte Dios, la ko í so chojni mé ts'áyéhe kjuachaxin tsochronkaxín nkexrí t'axrjexín tí nkehe ókjé nkiva tsíchronka tí í jnko chojni. ¹¹ Kjánchó kaín tíha jnkokoá Nchākuen Dios mé tjinkitsa, na mé k'uáyéhe jnkojnko chojni jnkojnko kjuachaxin éxi tjinkaon tí Nchākuen Dios nkerí xrā chrókjuich'e sín.

Kaínni k'ónani jnkokoá cuerpo kuènte Cristo

¹² Cristo la éxi yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Ìnchéni Cristo la ójnkó tí jehe ch'án. ¹³ Kaínni kjónté chojni judío la kjónté chojni jehya judío, la kjónté chojni ch'exón xrā, la kjónté chojni t'ítuenhya, kaín ni na mé jnkokoáxón Nchākuen Dios kuíkitexínni, na kaín ni k'ónani jnkokoá cuerpo kuènte Cristo, na mé éxi jnkokoá nkehe ik'uíni kaín ni na mé k'uáyéheni tí jnkokoá Nchākuen Dios.

¹⁴ Kixin tí cuerpo kuènteni la jehya jnkokoá parte chóna. Náhi. Itsjé parte chóna tí cuerpo. ¹⁵ Tí chróntáchro tí toteni kixin: “Jehya itja tí jeheni na mé jehya jeheni kuènte tí cuerpo”, na mé chaxínhya tíha kixin ó jehe cuerpo kuènte. ¹⁶ Kjaxin tí chróntáchro ijnko ntatsjoni kixin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kixin ó jehe cuerpo kuènte. ¹⁷ Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni? ¹⁸ A ntá Dios kjuanjon ch'án kjuachaxin nkexrí ch'e xrā jnkojnko nkehe kuènte cuerpo kuènteni kixin jehe ch'án nkexrí tjinkaon ch'án kóxrjínhin ch'án. ¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? ²⁰ Kjánchó jie nchónhya parte chóna tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kixin: “T'ichjánxienhyani tí jaha”, la ko kjaxin tí kjani xitjahya tsontáche tí toteni kixin: “T'ichjánxinnahya tí jaha.” ²² Náhi. Tí nkehe kuènte tí cuerpo tónhenni kixin tjetuanhya na mé kjónté antsí má t'ichjánxin ²³ la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe

náxrjónhya la antsí tóxakonhenni kixin tsonoxínhya. ²⁴ A ntá tí nkehe náxrjón na mé t'ichjánxienhya ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni ²⁵ kixin ninkehó xitjahya chróxikeyehe tí cuerpo kixin kaín tí nkehe la jnkokón tjinkítsa kichó. ²⁶ Tió tsíkóníhi ijnko parte kuènte tí cuerpo la kaín tí í so parte la kjaxin tjoté; la ko tió tjikosáyehe sín ijnko parte la kuenté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. ²⁸ Méxra Dios kjueyá ch'án chojni sich'ehe ch'án xra kuènte ninko, na mé saxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko nixin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so chojni chjéhe ch'án kjuachaxin antsí tjinkítsa kichó, la ko kjaxin kjueyá ch'án í so chojni chjéhe ch'án kjuachaxin ts'etóan xra kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjaxin sín í jnko nkiva. ²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan, ³⁰ la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkiva ókjé, la ko kénhya chojni chóna kjuachaxin tsochronkaxín sín nkexrí t'axrjexín tí nkehe chrónka tí sín nixjaxin ijnko nkiva ókjé. Chaxín kjá náhi. ³¹ Méxra tjéyará tí kjuachaxin antsí jína chrótjáhará Dios. Ntá jie tsjákohará ijnko ntia antsí jína chrók'uejorá.

13

Chrótjuèheni kichó ni

¹ Tí chrónixja nkivee chojni ó la ko kjaxin chrónixja éxi nixja tí sín ángel, ntá naxa chrótjuahya kichó ni la ó chónkó tíha la mé éxi chrókóyóna chica tsjánka ó la ko éxi ijnko chica platillo nchevékjan sín ó, kixin ninkehó són chóntahya. ² La ko tí chrónixja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónóna kaín nkehe, la ko antsí chrókuinkachónkia Dios ntá chrókjuacha chróntátjan ijnko jna sáchrókjui ókjé, kjónté tí xikaha ntá naxa chrótjuahya kichó ni, ntá ninkehó sínkíhya tí janhan. ³ Tí chrókjuintakitonhan tí sín nda kaín nkehe chonta, la ko tí chrókjuánjuan kjuachaxin kixin chróchena kuenténa, kjónté tí xikaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjinoxíenhyani, la ko sinchehnkehyani, la ko tsohnkehyani, ⁵ la ko ch'ehyani ninkehó nkehe náxrjónhya, la ko tjeyáhyani nkehe kuènteni ó, la ko tsonínkakonhyani tjoka, la ko tsochóntahyani kjuanínkaon isé, ⁶ la ko kjaxin tsochéhyani tió í jnko chojni tjasin jie. Náhi. Chrókóchéheni tió ijnko nkehe jína sítóhnen. ⁷ Tí tjuèheni kichó ni la kjónté kaín nkehe chrókjuasótexínni la chrókuitekaonni kixin jína sín la ko naxa chrok'uejóchónhenni chrókónínkakonhyani.

⁸ Tí tjuèheni kichó ni la jnkochrínxín tsjak'e ts'itjáyanhya. A ntá itsi ijnko yaon í t'ichjánxinhya tsochrónka chojni itén Dios, la ko tsókohya kjuachaxin tsonixjaxin chojni ókjé nkiva, la ko tsókohya kjuachaxin tsonohe chojni

má. ⁹ Naxa t'itjáyan tí nkehe chrókónoheni la ko naxa t'itjáyan tí nkehe chróchronkaxínni. ¹⁰ A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyan.

¹¹ Tió naxa chánjan janhan k'uéníxja éxi chánjan la ko k'uékjenkayáxian éxi chánjan. Ntá kóntetona ntá kujtoha tí nkehe kuènte chánjan. ¹² Méxra éxi ijnko xrosenta t'ikonxínhyani jína jie, ntá tsi ijnko yaon chr'éxin ntá ts'ikonxínni jína kaín nkehe. Ijie naxa t'itjáyan tí nkehe chrókónona; ntá tsi ijnko yaon tsonona jína kaín xín nkehe éxi xikaha kjaxin Dios chóxin ch'án tí janhan. ¹³ Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kíchó. A ntá iní nkehe siín, la kjánchó antsí má t'ichjánxin tsotjuèheni kíchó ni.

14

Tí nixjaxin chojni ókjé nkiva

¹ Chrókóxakonhanrá kíxin chrótjuèhéra kichuára la ko kjaxin chrókjuéyará kíxin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios. ² Méxra, tí nkexro nixjaxin ijnko nkiva ókjé mé nixjehe sín Dios ó la ntá chojni la náhi, kíxin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín. ³ A ntá tí nkexro chronkaxín ijnko nkiva tienxín tí í so sín ijnko nkehe kuènte Dios mé nixjehe chojni ntá xikaha tjinkitsa tí í so sín kíxin antsí chrók'uitja sín nkehe kuènte Dios la ko chrókóchéhe sín. ⁴ A ntá tí nkexro nixjaxin ijnko nkiva ókjé la mé tjinkitsa jehó ch'án antsí tsonohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkitsa tí sín kuènte nínko kíxin antsí chrók'uitja sín nkehe kuènte Dios.

⁵ Tjínkavan kíxin kaín rá chróchontará kjuachaxin chrónixjaxinrá ijnko nkiva ókjé. Kjánchó antsí tjetooan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetooan chrónixjaxinrá ókjé nkiva tí noahyará tsochronkaxinrá nkexrí t'axrjexín tí nkehe chróchronkará kíxin chrókuinhin kaín tí sín tinkáchónki Inchéni kíxin antsí chrók'uitja sín nkehe kuènte Dios. ⁶ A ntá kíchó ni, tí chrókjuasántsahará chrónixjaáxinrá ijnko nkiva ókjé la ó chónkó tíha. Íchá jína chrónixjaáxinrá ijnko nkiva tiénxinrá chróxrjankaxián ijnko nkehe kjuínchenona Dios la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókjuákoáxinrá ókjé nkehe nixin.

⁷ Kíxin kjaxin tí ison flauta la ko tí isón arpa, tí jnkokónhya chróntáchro jnkojnko són, ntá chrókjuachahyani chrókjuatsqanni nkehe tí ntáchro tí són a.

⁸ La ko éxi yóhe tí siín guerra, tjanjonko kíchó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókjuikjanjonko kíchó sín. ⁹ Kjaxin xikaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchorá? Mé xikaha tjejonixjará éxi chjehe xrínto ó. ¹⁰ Chaxín siín itsjé nkiva chjasintajni la ko kaín nkiva la siín chojni tienxín sín. ¹¹ Kjánchó tí chrókianxinhya janhan tí nkehe tsontáchro ijnko nkexro, ntá tí nkexro a ts'ikon tí janhan éxi ijnko nkexro tsíkjin ókjé la ko kjaxin janhan ts'ikuán tí jehe ch'án éxi ijnko nkexro tsíkjin ókjé. ¹² Méxra jahará imá tjinkáonrá chrók'uayéhéra ijnko xra kuènte Nchakuen Dios, ntá chrókójina chrókjuéyará tí xra chrókjuinkitsa tí í so sín kuènte nínko kíxin antsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkiva ókjé la chrókjuanchehe Dios kíxin chrókjuinkitsa chróchronkaxín ch'án nkexrí t'axrjexín tí tan a. ¹⁴ Kíxin tí

tsonixjaxian Dios ijnko nkiva ókjé, ntá tí nchakuenná ó mé tjenixjehe Dios, la ntá tí kjuaxrexinkaon kuèntana la ókjé tjen. ¹⁵ A ntá tí xikaha, ¿nkehe chrókjuít'a? Íchá jína chrónixjaxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan. ¹⁶ Kíxin tí tsochjeéxinrá kjuasáya Dios nchakuanrá ó ntá tjejótinhin í so chojni, ¿ntá nkexrí kíxin tí sín naxa kienxínhya sín tí nkehe nixjeherá Dios chróntáchro sín “Amén, ó nchoxon”? ¹⁷ Kjónté imá náxrjón tí chrókjuancheherá Dios kjuasáya la ntá chrókienxínhya tí sín tjejótinhin, ntá chrokuinkítsahya kíxin chrók'uitja sín nkehe kuènte Dios. ¹⁸ Tjáncháha Dios kjuasáya kíxin antsí chonta janhan kjuachaxin tsonixjaxian ókjé nkiva, la ntá jahará la kánhyó nixjará xikaha. ¹⁹ Kjánchó tió tójnkotsé chojni kichó ni la mé ntáxrjan kíxin antsí tjínkavan chrónixja janhan kjónté in'ó palabra ó tienxín sín kíxin xikaha chrókjuákuaxian sín, la ntá kánhyó chrókójina kjónté ite mil palabra chrónixjaxian ijnko nkiva ókjé tienxínhya chojni.

²⁰ Kíchóni, chrókjuenkayáxinhyará éxi chánjan. Kjánchó chrók'uejorá éxi chánjan naxa noehya nkehe jínahya. A ntá chrókjuenkayáxinrá éxi chojni nteto. ²¹ Tí xroon tsíkjín sín ósé nkexrí k'uetōan Dios mé ntáchro kíxin: “Janhan tsonixjaxian ókjé nkiva la ko itén chojni ókjé kíxin tsinhin tí nación Israel na kjónté tsitekakonhya sín, xikaha ichro Ìnchéni.”* ²² A ntá tí kjuachaxin tsonixjaxin chojni ókjé nkiva mé xránjon kíxin chrókjuakoxin chojni chrókuinhin tí sín tinkáchónkihya Ìnchéni, jehya kíxin t'ichjánxin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kíxin chrókjuakoxin chojni chrókuinhin tí sín tinkáchónki Ìnchéni, jehya kíxin chrókuinhin tí sín tinkáchónkihya Ìnchéni. ²³ A ntá tió tójnkotsérá kaín rá tinkáchónkirá Ìnchéni, a ntá kaín rá chrónixjaxinrá ókjé nkiva, ntá tí chrók'uixenhen nchia ijnko chojni naxa kuènhya sín xikaha, o chrók'uixenhen nchia ijnko chojni naxa tinkáchónkihya Ìnchéni ntá chrókuinhin sín xikaha la kjá tsontáchro sín kíxin ó k'uixikjánrá. ²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnchéni, o chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chrórxaxinkaon sín tí jie chóna sín ntá chrókuítóhe sín kaín jie chóna sín. ²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontáchro sín kíxin chaxín tjejókoará Dios.

Ntoá chrókjuich'eni kaín xín nkehe tió tójnkotséni

²⁶ A ntá kichó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuàkorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkiva ókjé, la ko isorá chróchronkaxinrá nkexrí t'axrjexín tí nkehe nixjaxin tí í so sín ókjé nkiva. Kjánchó kaín tíha tsonhen kíxin tí sín kuènte nínko chrók'uitja sín nkehe kuènte Dios. ²⁷ A ntá tí chrónixjaxin sín ijnko nkiva ókjé na mé yaá o iy'a chojni chrónixja sín la ko chrók'uixinkí chojni tsonixja, la ko t'ichjánxin kíxin jnkójín nkexro nohe tsochronkaxín nkexrí t'axrjexín tí nkehe nixja sín. ²⁸ A ntá tí kohya ninkexro tí nínko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjaxinnya sín ókjé nkiva tí tjejótójnkotsé sín, na mé chrónixjehe sín asén sín ó la ko chrónixjehe sín Dios ó. ²⁹ Tjánjonrá kjuachaxin kíxin tsonixja yaá o y'a chojni k'uáyéhe sín kjuachaxin tsochronka sín nkehe kjuínchenohe sín Dios. A ntá tí sín tjejótinhin

* 14:21 Isaías 28.11-12

mé chrókjueñkayáxin sín á ó nchoxón tí nkehe kuínhin sín. ³⁰ A ntá tí xrinahya chrókjueñchenohe Dios iñko nkehe iñko nkexro tjetjāxin ntá chróchronka ch'án tíha. A ntá tí nkexro senó kjuankíxin chrónka nkehe la chróchónhen ch'án chrónixjahya ch'án. ³¹ Ó nchoxon jñkojñkorá chróchronkará nkehe tjáhará Dios kíxin xikaha kaín rá chrók'uitjárá la ko chrókócháhará. ³² A ntá tí nkexro k'uáyéhe kjuachaxin tsochronka nkehe kjuínchenohe Dios kjāxin t'ichjánxin chróchónhen tsochronkaxín í jñko nkexro. ³³ Kíxin Dios tjanjon tí kjuaxróxin, a ntá tjinkakonhya ch'án kíxin yóxinhya chrók'uejóni.

Tió tójkotsé chojni kíchó ni tinkáchónki Ìnchéni ³⁴ chrónixjahya tí chojni chjin jñkosiné servicio. Kohya kjuachaxin xikaha, na mé chrókjueñchexiteyéhe sín tí sín ntoa éxí t'etoan tí ley kuènte Dios. ³⁵ Tí tjinkaon sín tsonohe sín nkehe na mé chrókjueñchankíhi sín xii sín tió tjiji sín ntōe sín. Náxrijónhya chrónixja iñko chojni chjin nkehe jñkosiné servicio.

³⁶ Chrókónohará kíxin tí itén Dios xrankíxixínhya tí tjejorá la ko jehya jahorá k'uayéhérá tíha. ³⁷ A ntá tí tjen jñkojín nkexro tjenkayáxin kíxin nixja itén Dios o tjenkayáxin kíxin tí Nchakuen Dios tjinkítsa tí jehe ch'án ntá chrókónohe ch'án kíxin tí nkehe tjékjian mé iñko nkehe tsík'etoan Ìnchéni. ³⁸ A ntá tí nkexro titekakonhya tíhi na ntá jahará chrókuitekákuénhyará ch'án kjāxin.

³⁹ Méxra kíchó ni, chrókjueyárá kíxin chrók'uayéhérá kjuachaxin chróchronkará nkehe kjuínchenohará Dios la ko chrókuitoherá tsonixjāxin chojni ókjé nkíva. ⁴⁰ Kjánchó kaín xín nkehe la jñkojína la ko kjuasáya chrókónhen.

15

Tsíxechón Cristo

¹ A ntá jie kíchó ni, tjínkavan chróxraxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína. ² Kjāxin tí nkehe kjuákohará mé kuaáxinrá, tí titoéhyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Saoxín, kjuákohará tí nkehe k'uayáha kíxin Cristo k'uenyákonhen ijiéni, na mé xikaha kjuínchexiteyá ch'án tí nkehe ntáchro tí xroon itén Dios ⁴ la ko tsíkjavá sín ch'án la ko tsíxechón ch'án tí níxin yaon éxí ntáchro tí xroon itén Dios. ⁵ Ntá k'uíkon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uíkon sín tí jehe ch'án. ⁶ A ntá chr'éxin chjina quinientos chojni kíchó ni jñkokoá k'uéjé sín k'uíkon sín ch'án. A ntá jie itsjé tí sín a naxa tjejó sín, a ntá jñkojín sín na ó tsík'en sín. ⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol inaá.

⁸ A ntá kjuixixín janhan k'uíkuān Ìnchéni éxí iñko xjan naxa xetjahya yaon chrókokjíhi. ⁹ Kjánchó janhan kánhyó tjetōan la mé tóyóehya tí í so sín tsíkjejá Ìnchéni la ko tōsuāna chrók'óna iñko nkexro ch'ehe xra Ìnchéni kíxin janhan mé k'uénínkakhonhan tí sín nñkōe Dios. ¹⁰ Kjónté jínahya kjuít'a la kjuasáyé Dios la ko kjuachaxin kuènte ch'án mé kjuítóxinhin tí kjuenkayáxian, na mé chónkóhya kuíkonóna ch'án, kíxin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhi. Dios kjuínkítsana ch'án kjuít'a xra. ¹¹ Kjánchó tjetuanhya á janhan o á jehe sín kjuako sín, kíxin xikaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kíxin Cristo la xechón, ¿ntá nkekuènte ntáchrorá jñkojínrá kíxin tsoxechónhya chojni tsík'en? ¹³ Tí chrókóchaxín tí nkehe ntáchrorá kíxin tsoxechónhya chojni tsík'en, ntá kjāxin chróxechónhya Cristo. ¹⁴ A ntá tí

chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá. ¹⁵ A ntá tí chaxínhya xíkaha tsíkónhen, la jeheni la ijnko chojni ntoáhya chrónka kuènté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en ¹⁶ kixin tí chróxechónhya tí chojni tsík'en, ntá kjaxin Cristo chróxechónhya ch'án. ¹⁷ A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kixin naxa chrókjuínhya tí ijjará. ¹⁸ La ko tí chrókóchaxín tíha ntá chrók'uitjáyán tí sín kuítekaon Cristo ik'uén sín. ¹⁹ Méxra tí chrókuinkáchónkini Cristo kixin chrókjuinkítsa ch'án tí jeheni chjasintajni ntíhyó, ntá kohya chojni chrókóyóhe tí jeheni, imá chrókónòeni chrók'uejóni kaín ni.

²⁰ Kjánchó náhi, la chaxín ó xechón Cristo. Jehe ch'án éxí tí nkehe tsík'óna saxín kixin jehe ch'án saxín xechón ch'án. ²¹ Méxra jnkokoá chojni ntoa kjuankíxin kjuasin jie, ntá kjuankíxin k'uén kaín xín chojni chjasintajni, la ko kjaxin jnkokoá chojni ntoa xechón, ntá xíkaha tsoxechón kaín chojni tsík'en. ²² Kixin tí jie kjuasin ch'ín Adán ntá kaín xín chojni sít'enxín sín. A ntá Cristo la kaín ni tsochóntaxínni kjuachón. ²³ Jnkojnkoní éxí tsoñhenni tocar, na mé saxín xechón Cristo, a ntá chr'éxin tíó tsokjan ch'án ntá tsoxechónni kaín ni kuítekaonni tí jehe ch'án. ²⁴ A ntá ó tsi yaon tsjixixín ntá sinchek'itjáyán Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kixin ts'áyéhe It'é ch'án Dios. ²⁵ Na mé t'ichjánxin ts'etóan Cristo tsjixrakájia tí yaon tsjachahya tí sín nínkakonhen ch'án. ²⁶ A ntá tí nkehe tsjixixín ts'itjáyán la mé tí kjuach'én. ²⁷ A ntá Dios kjuanjon kjuachaxin kixin kaín nkehe sínn mé chrók'uetuēnhen Cristo.* Kjánchó tíó xíkaha ntáchro tí xroon itén Dios tsíkjin sín ósé kixin kaín xín nkehe mé ts'etuēnhen ch'án, ntá ó noheni jína kixin jehya kixin Dios la chrók'uituēnhen ch'án inaá. Náhi. Jehe ch'án mé chjéhe Xjeen ch'án kaín kjuachaxin ts'etuēnhen ch'án kaín xín nkehe. ²⁸ A ntá tíó tsjixín tsjacha Cristo ts'etuēnhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuēnhen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuènte xíkaha ch'e sín tí titekakonhya sín kixin tí sín tsík'en tsoxechón sín inaá?

³⁰ A ntá tí xíkaha, ¿nkekuènte kixin kaín yaon kjuaxróxinhya tjejóni nínkakonhenni chojni? ³¹ A ntá kichó ni, kaín yaon sínn kjuachrakon chrók'uèn janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo. ³² Kjonté kónínkakonna chojni chjasin Éfeso éxí iko jiehe la kjonté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xíkaha la ó nchoxon tí nkehe ntáchro tí sín titekakonhya Ìnchéni kixin chrókjóné sín la ko chrók'ui sín kixin ijie la o ntóye chrók'uen sín.

³³ Chrókuitóéhyará chrokjuit'áyahará sín. Éxí ntáchro sín kixin: “Tí chrók'uejókotoxínni chojni jínahya ntá chrók'uitjáyán tí nkehe jína tjenkayáxinni.” ³⁴ Chrókjanrá ntja jína ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kixin chrókósuàhará.

Nkexrí tsoxechón tí sín tsík'en

³⁵ Kjá jnkojínrá tsjanchankìnará kixin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochóna sín?” ³⁶ Lontirá tjanchankìnará xíkaha. Tí noatje t'enkanı nonte t'ichjánxin its'en ts'itjáyán kixin tsjak'echón tí nkehe ts'ayan. ³⁷ Tí nkehe t'enkanı la jehya tí ka a. Náhi. Tí nkehe t'enkanı la

* 15:27 Salmo 8.6

noatrigo o í jnko tje. ³⁸ Kjánchó Dios kjuanjon kjuachaxin kixin jnkojnko nta ts'óna éxí tjinkaon ch'án, la ko jnkojnko nta tsochóna tje kuènte. ³⁹ A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte koche. ⁴⁰ Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko. ⁴² Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyanhya. ⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chónahya kjuachaxin, la ntá tí nkehe tsoxechón la ijnko nkehe tsochóna kjuachaxin. ⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochóna kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochóna kjuachaxin kuènte Nchakuen Dios.

⁴⁵ A ntá éxí ntáchro tí xroon itén Dios kixin: “Tí chojni ntoa k'óna saoxín mé ch'ín Adán tíha mé k'uáyéhe ch'án kjuachón ó.”† A ntá tí ó kjuixixín ikui í jnko ch'ín éxí yóhe Adán, kjánchó jehe ch'án mé chóna ch'án nchakuen tjanjon kjuachón. ⁴⁶ Kjánchó jehya saoxín k'óna tí cuerpo antsí chóna kjuachaxin kuènte Nchakuen Dios. Náhí. Saoxín k'óna cuerpo kuènte chojni chjasintajni ó, la ntá chr'éxin k'óna cuerpo antsí chóna kjuachaxin kuènte Nchakuen Dios. ⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kuixín ch'án. ⁴⁸ Tí cuerpo siín chjasintajni mé yóhe tí cuerpo k'uéchóna tí nkexro tsík'óna nche. A ntá tí cuerpo siín nkaya nkajní mé yóhe tí cuerpo chóna tí nkexro kuixín nkaya nkajní. ⁴⁹ Éxí senó tóyóhēni tí nkexro k'óna nche, ntá xikaha chr'éxin tsoyóhēni tí nkexro kuixín nkaya nkajní.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhe tí nkehe tsjejeje. ⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani. ⁵² A ntá xrínahya titàya tjejóni ntá éxí chróchr'áton konni la ko chrókuakitjenkīni konni xikaha tió tsjixixín tsinhinni tsontáchro trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani. ⁵³ A ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en. ⁵⁴ A ntá tió tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xikaha na ntá tsoxiteyá éxí nixja tí xroon itén Dios ntáchro kixin: “Tsjachahya tí kjuach'én la mé tsjacha tí kjuachón.”‡ ⁵⁵ “Jaha kjuach'én, ¿kjá tí kjuachaxin kuènta kixin chrókjuacha jaha? Jaha kjuach'én, ¿kjá tí kjuachaxin kuènta kixin chrók'oyánni?”§ ⁵⁶ Tí jie tjasinni mé kuixín tí ts'enni. A ntá tí ley k'uetoan ósé antsí k'uixixín jie. ⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

† 15:45 Génesis 2.7 ‡ 15:54 Isaías 25.8 § 15:55 Oseas 13.14

⁵⁸ A ntá jahará kichó ni, imá tjuahará. Chrókuitoéhyará tinkachónkirá Ìnchéni. Jnkochrínín chrókuich'ehérá Ìnchéni xra antsí jína kixin ó nohará jahará kixin tí xra ch'eheni Ìnchéni jehya chónkó tíha.

16

Tí ofrenda tjenájín sín tsochr'énhen sín tí sín tjejó chjasin Jerusalén

¹ A ntá tí chichaon tjenájínrá kixin tsjínkítará tí sín kichó ni tinkachónki Ìnchéni na mé chrókuich'erá éxí kuétuanhan tí sín nínko estado Galacia. ² Jnkojnko domingo jnkojnkorá chrókuakitsjenteherá nkerí síká chichaon kjuachará tí semana kjuich'erá xra kixin t'ichjánxinhya chrókjuasánjia janhan ntá chrókjuénájínrá chichaon. ³ A ntá tíó tsjasán janhan tsétuanhan tí sín tsjéyará kixin sátsji sín chjasin Jerusalén, na ntá tsokjian xroon tsjikoxín sín tí chichaon tsíkjenájínrá tsjikaán tí sín kichó ni ntiha. ⁴ A ntá tí chrókójina kjaxin janhan sáchrókjuiyá, a ntá sáchrókjuíkián tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxín ts'atsínka janhan estado Macedonia ntá chr'éxin tsjasán ntiha chjasin Corinto. ⁶ Ach'e ntahó chrókuítóna chrók'uatínkajia nchakuen kin. A ntá jahará chrókuínkítará tí janhan tíó sátsjia ókjé chr'éxin. ⁷ Méxra tjínkakonhya chrók'uatínkoá chrótsjahará ó. Náhí. Tjínkavan chrókuítóna iso yaon tí tjejorá ntiha tí Ìnchéni chrókjuanjón kjuachaxin. ⁸ Kjánchó tsitóna chjasin Éfeso tsjixrakájia yaon Pentecostés, ⁹ kixin ntihi antsí chonta kjuachaxin chrókjuít'a xra kuente Ìnchéni la ko jína chrókónhen tí xra kjónté nchónhya chojni nínkakonna.

¹⁰ A ntá tí tsjiji ch'ín Timoteo ntiha la antsí jína chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xra éxí janhan. ¹¹ Kaín tí jahará chróchontehérá ch'án kjuasáya. Tjínkítará ch'án kixin jína itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² A ntá tí kichó ni Apolos la imá xrjanóaha ch'án kixin kjaxin chrókjuijiko ch'án tí í so kichó ni, kjánchó tjínkakonhya ch'án jie. Chr'éxin tsjiji ch'án tíó ts'íxranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuitoéhyará tí tinkachónkirá Ìnchéni. ¹⁴ Kaín nkehe chrókuich'erá la koí chróttjuèhérá kíchuará.

¹⁵ Na ntá kichó ni, ó nohará kixin tí sín kjéhya ch'ín Estéfanos saoxín kuínkáchónki sín tí tan tsaáxin chojni tí estado Acaya, la ko jehe sín kuákja sín xra a tjínkítara sín tí sín kichó ni tinkachónki Ìnchéni. ¹⁶ Tjínkavan kixin chrókjuínchexitéyéhérá tí sín tjínkítara éxí tí jehe sín la ko kaín tí sín ch'e xra. ¹⁷ Chána kixin ó kui ch'ín Estéfanos la ko ch'ín Fortunato la ko ch'ín Acaico, kixin jahará kjónté tjejohyará. ¹⁸ A ntá jehe sín kjuínchechéhe sín asenná éxí kjuínchecháhará sín. Chróchontehérá kjuasáyé chojni xíkaha.

¹⁹ Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntóe sín ima xraxinkaon sín tí jahará kixin tinkachónkirá Ìnchéni. ²⁰ Kaín tí sín kichó ni ntihi xraxinkaon sín tí jahará. Nixjehérá kíchuará kaín rá tsehérá tja kíchuará jnkojína.

²¹ Janhan Pablo xráxinkavan tí jahará ikjian xroon chr'anhánrá la tjaná kjinxian tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

²³ A ntá kjuasáyé Ìnchéni Jesucristo mé sintayaonrá ch'án. ²⁴ Tjuahará kaín rá kíxin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énhen ch'án tí ninko chjasin Corinto

¹ Janhan Pablo mé kjueyána Dios kixin sít'ahá Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará ninko Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya. ² Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehe It'éni mé tikonóheheni ch'án la ko xráxin nchechéheni ch'án. ⁴ Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxí yóhe jehe ch'án kjuínchechéhe ch'án tí jeheni. ⁵ Mé xíkaha tjejótjasóteni éxí yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án. ⁶ Tjejótjasóteni kixin tí jahará chrókóchàxinrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxí tjasóteni jeheni. ⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhe Dios tí jeheni kaín ni.

⁸ Kichóni, tjinkaonni kixin chrókónohará kixin nkexrí imá kjuasóteni tí k'uéjóni tí estado Asia. Imá náxrjónhya kjuasóteni la chrókjuachahyani, la k'uitjáyenheni tí tjenkayáxinni kixin chrók'uaxrjexínni ntiha naxá chrók'uejóhónni. ⁹ Ó kónoheni kixin chrók'uenxínni ntiha. Mé xíkaha kónheni kixin chrókónoexínni kixin tí jehóni la chrókjuachahyani tíha. Náhí. Chrókuinkáchónkini Dios, mé tí nkexro nchexechón chojni tsík'en. ¹⁰ Jehe Dios mé kjuínchekaáni ch'án la ko naxá sinchekaáni ch'án kixin tí nthónhya nkehe chrók'uenxínni. Méxra ó noheni kixin chaxín jehe ch'án sinchekaáni ch'án ¹¹ tí tjínkĩtsaráni tjancheherá Dios kixin tsjinkĩtsani ch'án. A ntá tí tsjé chojni chrókjuanchehe Dios kixin tsjinkĩtsani ch'án ntá chr'éxin itsjé chojni tsjanchehe sín ch'án kjuasáyé kixin xíkaha jehe ch'án kjuínkĩtsani ch'án.

Nkekuènte sákjuíhya ch'ín Pablo tí chjasin Corinto

¹² Chéheni kixin noheni kixin ntoá k'uéjóni ntihi chjasintajni kjuích'iyehyani chojni, mé xíkaha k'uéjókoaráni. Ntá jehya kjuachaxin kuènteni kjuachaxínni xíkaha. Náhí. Kjuachaxin kuènte Dios mé kjuínkĩtsani kixin xíkaha k'uéjóni. ¹³ Tió chr'ánhanráni xroon, kjinhyani nkehe chrókiénxinhyará. Náhí. Jehó tí nkehe chrókjuínchekuáxinrá chrókiénxinrá. Tjéchonhan kixin chrókiénxinrá jína. ¹⁴ A ntá ó tinkakiénxinrá ntsí kixin tió tsokjan Ìnchéni Jesús tsocháhará kixin xíkaha kjuakoharáni jeheni la ko kjaxin tsochéheni kixin jahará kuítékáonrá.

¹⁵ Mé xíkaha kjuenkayáxian kixin saoxín chrókjuasántsjahará tí jahará kixin chrókócháhará kixin yáya chrókjuasántsjahará. ¹⁶ Kjuenkayáxian janhan chrókjuasántsjahará saoxín tió sáchrókjuia estado Macedonia la ko chrókjuasántsjahará inaá tió chrókjanxian ntiha. Mé xíkaha chrókjuínkĩtsarána tió sáchrókjuiyá janhan estado Judea. ¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko

chrókjuasánhya? ¹⁸ Méxra tjetsjehe Dios kixin xikahya kjuáteheni tí jahará kixin chrókjuijini la ko chrókjuijihyani. ¹⁹ Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuakoxian janhan tí k'uéjóni ntiha, mé xikahya k'uéchronka ch'án, kjuích'iyahya ch'án ninkehó. Náhí. Kaín nkehe tjakoni kuènte Cristo la chaxín tíha. ²⁰ Kixin kaín nkehe tsíchronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni “Amén, ó nchoxon” kixin tí kjuachaxin kuènte Cristo Jesús. ²¹ A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehe ch'án mé kjueyáni ch'án. ²² Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochóna asénni senó kixin tsonoxínni kixin chaxín ts'áyéheni nkehe chr'éxin.

²³ A ntá tí naxa kjuasánhya janhan chjasánra Corinto éxí kjuenkayáxian la tjetsjehe Dios kixin tjínkakhonhya kixin chrókóxakonhanrá tí chrókjuéntuáhará tí jahará inaá. ²⁴ Jehya kixin chrókuétuanhánra kixin nkexrí chrókuinkachónkirá Inchéni kixin ó nõna kixin ntoá tinkachónkirá ch'án. Ó jehí tjinkaonni chrókuinkítsaráni kixin antsí má chrókócháhará.

2

¹ Mé xikaha kjuenkayáxian kixin chrókjuasánhya janhan ntiha inaá tí naxa xrásinra kjuanínkaon. ² A ntá tí naxa chrókjuintak'ávára, za ntá nkexro chrókjuinchechàna inaá tí chrókjuinchechànahyará jahará kixin janhan kjuintak'ávára? ³ Mé xikaha ikjian tí xroon chr'anhánra senó kixin tjínkakhonhya chrókjuasán chrókjuinchekóxakonnará inaá. Náhí. Jahará chrókjuinchechànará. Méxra ó nõna kixin tí chrókóchána janhan ntá chrókócháhará kaín rá. ⁴ Kjánchó tió ikjian tí xroon a chr'anhánra senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánra kixin chrókjuintak'ávára. Náhí. Ikjian tí xroon chr'anhánra kixin chrókónoxínra kixin imá tjuahará tí jahará.

Ch'ín Pablo chrókjuinchek'itjáyenhen ch'án tí jie kjuasin tí nkexro a

⁵ A ntá tí nkexro kjuínchexakonna la jehya janhvàn kóxakonna. Náhí. Kaínra kóxakonhanrá. Kjánchó tjínkakhonhya tjetóxin tsontáxrjan tíha. ⁶ Na mé it-sjé tí jahará nixjehérá ch'án kóyakoterá ch'án kixin chrókjuasinhya ch'án jie xikaha la táhó la ó tjen. ⁷ Ntá jie chrók'uitjáyanhanrá tí jie kjuasin ch'án, chrókjuínkítsará ch'án, kixin tí náhí la ts'itjáyanxín ch'án tí kjuancheníhi. ⁸ Méxra xrjanóahará kixin chrókjuakoxínra inaá kixin chaxín tjuèhéra ch'án. ⁹ Mé xikaha senó ikjian xroon chr'anhánra kuènte tí kjuanínkaon chontará kixin tsononaxian á chrókjuínchexiteyànará kaín nkehe chrókuétuanhánra. ¹⁰ A ntá tí sinchek'itjáyenhenrá ijnko chojni ichrén jie kjuasin ch'án ntá janhan kjaxian sintak'itjáyanhan ch'án tí jie kjuasin ch'án. Méxra tí chaxín k'ué ichrén jie chrókjuintak'itjáyanhan ijnko chojni la ó kjuixin kjuintak'itjáyanhan ch'án tí jie a kixin chrók'uejorá jnkójina. Kjaxin xikaha tjetsjehe Cristo, ¹¹ kixin ntá tí ch'ín Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

¹² A ntá tió kjuasán tí chjasin Troas chrókjuàkua tí tan jina kuènte Cristo la antsí xránjon kjuachaxin kixin chrókónhen xra kuènte Inchéni. ¹³ Kjánchó náxrjónhya tjen asenná kixin k'uitjahya tí kichó ni Tito. Ntá tuénxín níxjaha tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochóna sín kjuachaxin kuènte Cristo

¹⁴ Kjuasáyé Dios kixin xráxín jehe ch'án tjinkitsani ch'án ntá tjachani kixin chóntani tí kjuachaxin kuènte Cristo Jesús. Ntá kaín nketí sáchrókjuini mé tjakoxinni tí tan kuènte ch'án éxí ijnko nkehe xraxé náxrjón chrókóxrjínhín kaín xín chojni. ¹⁵ Kaínni la éxí yóhe tí xraxé náxrjón kuènte chjincó chrókjuanjon Cristo chrók'uáyéhe Dios kixin tíha mé chrókónoexín tí sín tsaá la ko kjaxin chrókónoexín tí sín ts'itjáyan. ¹⁶ Tí sín ts'itjáyan mé tókaxraxéhe sín éxí ts'enxín sín tí xraxé a. A ntá tí sín tsaá mé tóxrjínhín sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? ¹⁷ A ntá jeheni mé xrinchekjihyani nkexrí nixja itén Dios éxí ch'e nchónhya chojni chrókjuacha sín chichaon. Náhi. Kaín asenni tjakoni itén Dios kixin kjueyáni ch'án sich'ehehni Cristo xra, la ko tjetsjehe ch'án tí xra tjejóh'eni.

3

Tí pacto nixin

¹ A ntá xikaha ntáchroni, ¿á tjenkayáxinrá kixin kjuankíxinni tsochronkani inaá kixin jína tí jeheni, o á t'ichjánxín kixin chrókjuujikoni xroon kixin tsonoxínrá kixin jína tjakoni? ¿Xá t'ichjánxín kixin chrókjuanchaharáni ijnko xroon tsochronka kixin jína tjakoni? ¿Xá t'ichjánxín kixin chrókjuanchaharáni ijnko xroon tsochronka kixin jína tí jeheni éxí ch'e í so sín? ² Náhi. T'ichjánxienhyani nijnko xroon kixin jahará mé éxí yóhe ijnko xroon tsíkjinni xrikoni chróchóxin la ko chrókjuinchekuáxin kaín xín chojni tsonoxín sín kixin jeheni mé ch'ehehni Cristo xra. ³ T'ikon sín noxín kixin tí jahará mé éxí yóhe ijnko xroon tsíkjin Ìnchéni Cristo xrikoni nchekuáxin chojni. Kjánchó jehya ntáhní tsíkjinxín ch'án. Náhi. Kjuanjon ch'án Nchakuen ch'án tjechón chontará la kjaxin jehya xrotabla tsíkjin ch'án. Náhi. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjinkitsani Cristo. ⁵ Jehya kixin ó jehí chróchóntani kjuachaxin kixin chrókjuich'eni xra. Náhi. Kaín tí xra ch'eni na Dios tjetjanjon kjuachaxin. ⁶ Jehe ch'án mé kjuanjon ch'án kjuachaxin kixin chrókjuich'ehehni ch'án xra tsochenkani chojni tí tan nixin kui. Tíha jehya ijnko nkehe tsíkjin chojni chrókjuinchehiteyéhéni. Náhi. Tíha mé kjuachaxin kjuanjon Nchakuen Dios kixin sinchexiteyéhéni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákini tsjehe ikon ch'án.* Kjánchó tí t'inkaséyan kjuankíxin ó tinkák'anka. Méxra tí xikaha tí ley tjanjon kjuach'éni mé kuikao ijnko t'inkaséyan imá náxrjón. ⁸ ¿á chrókójehya kixin antsí má t'inkaséyan kuikao tí tan nixin kuixín kjuachaxin Nchakuen Dios? ⁹ Méxra xikaha tí ley k'uéchónta kjuachaxin jíe kjónté ntáchro kixin its'en chojni, a ntá antsí má jína tí tan chrónka Dios kixin tsotjuáxin tí jie chóntani. ¹⁰ Méxra tí kjuachaxin k'uéchónta tí ley k'uék'etóan ósé la ninkehó tóyóehya tí kjuachaxin jie tjen jie. ¹¹ A ntá tí k'uéchónta kjuachaxin tí nkehe séhyó ntá tinkákjeje, a ntá antsí má chónta kjuachaxin tí nkehe tsjak'e jnkochrín.

¹² Mé xikaha tí nkehe tsjejehya tjejóchónhenni ntá chrakonhyani chronkaxínni kaín tíha. ¹³ Ch'ehyani éxí kjuich'e ch'ín Moisés k'uikjèxin ch'án ka ikon ch'án kixin tsonohya tí sín israelita kixin ó tinkákjeje tí t'inkaséyan chónta ch'án. ¹⁴ Kjánchó jehe sín naxa kienxínhya sín la ko naxa xikaha tjejó sín ijie tió nchekuáxin sín tí nkehe k'uítuenhen sín ósé kixin tí ka naxa t'inkákonhen tí chrókienxín sín kixin naxa kjuìnhyá tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a. ¹⁵ A ntá kjónté jie tió nchekuáxin sín

* 3:7 Éxodo 34.29-35

tí xroon tsíkjin ch'ín Moisés la tjejó sín éxí naxa t'inkákonhen tí ka a kixin tienxínhya sín. ¹⁶ A ntá tió ijnko chojni tsjankíxin tsinkáchónki Ìnchéni ntá tí ka t'inkákonhen la tsjin. ¹⁷ A ntá Ìnchéni mé Nchakuen Dios tíha. A ntá tí tjen Nchakuen kuènte Ìnchéni Dios la ntiha kohya nkehe ts'inkákonhen. ¹⁸ A ntá jeheni kaín ni kohya nkehe t'inkákonhen ikonni la mé tjejóni éxí xrosenta tjákini tí kjuachaxin kuènte Ìnchéni, na mé tinkák'ixitóxin tí kjuaxrexinkaon kuènténi kixin antsí chrókóyóhèni éxí tí jehe ch'án kixin antsí tsochóntani tí kjuachaxin kuènte ch'án, kixin Ìnchéni, na tí Nchakuen a, mé xikaha ch'e xra.

4

¹ Méxra xikaha chrókóxrjéhyani chrókjuich'eni tí xra kjuanjon Dios kixin jehe ch'án kuikonóehèni ch'án. ² Ó kuítóhèni kaín nkehe imó la ko kaín nkehe chrókósuèxinni, la ko ch'iyehyani kichó ni, la ko tjitoxienhyani itén Dios. Náhi. Jehí tí nkehe ntoá chrónkani. A ntá xikaha chrókónoexín kaín xín chojni kixin ntoá tjejóni éxí tjinkaon Dios. ³ A ntá jeheni mé tjakoni tí itan tsaáxinni, kjánchó iso sín kjónté xikaha tinhin sín mé tienxínhya sín kixin xráxín jehe sín la ts'itjáyan sín. ⁴ A ntá jehe sín kuítekakonyha sín, a ntá tí dios kuènte chjasintajni mé kjuínchek'ikonhya sín kixin chrókiénxínhya sín, kixin ntá chrók'uikonhya sín tí t'inkaséyan kuènte tí tan kuènte Cristo, mé tí nkexro chóna kjuachaxin, a ntá jehe ch'án la mé yóhe éxí tsjehe Dios. ⁵ Tió tjakoni na mé jehya tjakoni kixin jeheni chrókuitekáonrá. Náhi. Chronkaxínni kixin chrókuitekáonrá Jesucristo mé Ìnchéni la ko chrónkani kixin jeheni mé t'aharáni xra tsjinkitsani tí jahará kixin tjuahará Jesús. ⁶ Na mé jehe Dios k'uetóan kixin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asènni kixin chrókjuachani chrókónohèni nkexrí tjen tí kjuachaxin jíe kuènte Dios t'inkaséyanxín Ìnchéni Jesucristo.

Nkexrí chrók'uejóni kixin tinkáchónkini Ìnchéni

⁷ A ntá tí cuerpo kuènteni la yóhe ijnko ch'í tsík'óna nchetje tjinká nkehe tjete, mé xikaha ts'ikon sín kixin tí kjuachaxin jíe chónani la kuixín tí tjen Dios kixin jehya kuènteni tíha. ⁸ Chónani nchónhya kjuaxikaon la kjónté tsjachahya tí kjuaxikaon a. Imá tóxakohenni la kjónté títoehyani tinkáchónkini ch'án. ⁹ Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékonni kjuítsínkani kjánchó kjuínchek'itjáyanhyani sín. ¹⁰ Kjónté nketí sátjini xráxín chrók'uenxínni éxí k'uénxín Ìnchéni Jesús, kixin xikaha tjakoxínni tí kjuachón chóna ch'án. ¹¹ Méxra jeheni naxa tjejóchónni la xráxín síin kjuaxikaon kixin chrók'uenxínni kixin tinkáchónkini Jesús kixin kjaxin xikaha chrókjuakoxínni tí kjuachón chóna ch'án kjónté chrók'uen tí cuerpo chónani. ¹² Kjónté xikaha chrók'uenxínni, a ntá jahará tsochontará kjuachón.

¹³ Éxí ntáchro tí xroon itén Dios tsíkjin sín ósé kixin: “Kuítekavan ntá xikaha xrjanka.”* A ntá kjaxin jeheni kuítekaonni ntá xikaha chrónkani. ¹⁴ A ntá ó nohèni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. ¹⁵ Kaín tíha kónhen kixin jahará jína chrók'uejoxinrá. La ko kjaxin xikaha nchónhyará chrók'uayéhérá tí kjuasáyé Dios, ntá antsí tsje chojni ts'ejóni tsjanchehèni Dios kjuasáyé kixin tí kjuachaxin jíe chóna ch'án.

¹⁶ Méxra chrókóxrjéhyani kjónté tinkákjeje tí cuerpo chónani kixin ó nohèni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuènténi. ¹⁷ A ntá tí nkehe tjasótéxinni tí tjejóni ntihi jie mé tíha la tjoka

* 4:13 Salmo 116.10

ts'atsínka la ts'áyèxinni ijnko nkehe imá jié la ko í tsjejehya tíha. ¹⁸ Ntá chrókomáhyani tí nkehe síin chjasintajni ntihyó. Náhí. Chrókjueyáni tí nkehe naxa t'ikonhyéni kixin tí nkehe t'ikonxínni ikonni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

5

¹ A ntá ó noheni kixin tió tsjeje tí cuerpo chóntani na mé yóhe éxi ijnko nchia tjoka tsjeje, a ntá Dios mé kjuích'ena jnkojnko nchia nixin ts'itjáyanyha jnkochríxín nkaya nkajní kixin jehya tja chojni kjuích'énaxín tíha. ² Tí naxa chóntani cuerpoéni ntihi la náxrjónhya tjejóni tjinkaonni tí ókjé cuerpo tsochóntani nkaya nkajní ³ kixin táha ts'inkáyani éxi ijnko ka, ntá xitjahya chrókótjóchínni. ⁴ Tí naxa tjejóchónxinni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuítøkoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyan tí chrók'uenxínni la ntá chrókuakjani tí kjuachón nixin. ⁵ Dios mé kjuenkayáxin ch'án kixin xikaha sinchekítònheni ch'án ntá kjuínchekítònheni ch'án tí Nchakuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

⁶ Mé xikaha xráxín ó noheni kixin tí naxa tjejóni ntihi naxa chóntani cuerpoéni ntá naxa tjejókohyani Ìnchéni. ⁷ A ntá jeheni tjejóni tinkáchónkini ch'án kjónté t'ikonhyani ch'án. ⁸ Kjánchó jeheni na imá chéheni tjinkaonni chrókuítøheni tí cuerpoéni chóntani jie kixin sáchrókjuini tí tjen Ìnchéni, chrók'uejókoni ch'án ntiha. ⁹ Méxra xikaha tjinkaonni chrókjuinchechéheni Ìnchéni kjónté naxa chróchóntani cuerpoéni ntihi la o í chróchóntahyani, la naxa chrókuinkáchónkini ch'án. ¹⁰ Kixin kaín ni t'ichjánxin tsochjineheni Cristo tí tjen ch'án t'etøan ch'án kixin nkehe ts'áyéheni jnkojnkonni kixin nkerí xra kjuích'eni á jína o náhí tí naxa k'uéchóntani cuerpoéni ntihi chjasintajni.

Tí tan tjanjon kjuaxróxin

¹¹ Méxra xikaha noheni chróchrakonheni tí kjuachaxin jie kuente Ìnchéni ntá tóxakonheni tjakøheni chojni kixin chrókuinkáchónki sín ch'án. Ó nohe Dios kixin nkexrí tjejóni la ko tjinkaonni kixin kjaxinrá chrókónohará. ¹² Jehya kixin chrótjonkará inaá kixin jína ch'eni xra. Náhí. Jehí ntáchroni kixin síin nkehe chrókócháxinrá kixin tí jeheni ntoá chrónkani kixin chrókónohará nkexrí chrókjuátøherá tí sín imá nchehnke sín kixin imá náxrjón nixja sín a ntá xraxinkakonhya sín tí jie chóna asén sín. ¹³ A ntá tí lóconi na mé tíha kixin tjinkaonni chrókjuich'eheheni Dios xra. A ntá tí jehya lóco tí jeheni la mé jehí tjinkaonni chrókjuinkítsani tí jahará. ¹⁴ Kixin Cristo la imá tjuèhe kaín xín chojni ntá t'etuenheni ch'án kixin ó noheni jína kixin jehó ch'án k'uenyákonheni ch'án tí ijyéni kaín ni kixin éxi kjaxinni ik'uénni kaín ni kixin jehe ch'án k'uenyákonheni ch'án. ¹⁵ Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuèteni chrókjuinchexiteyéheni. Náhí. Chrókjuínchexiteyéheni ch'án kixin k'uenyákonheni ch'án la ko xechón ch'án inaá kixin tsaáxinni ch'án. ¹⁶ A ntá jie jeheni tjenkayáxinhyani éxi tjenkayáxin chojni chjasintajni ó. Kjánchó senó k'uéchóxinni Cristo kixin nkexrí kjuák'e ch'án chjasintajni ó, a ntá jie la xikahya t'ikonni ch'án. ¹⁷ Méxra tí nkexro tinkáchónki Cristo mé k'óna ijnko chojni nixin. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

¹⁸ Kaín tíha mé tí xra kjuích'e Dios. Jehe ch'án mé kjuanjon ch'án kjuaxróxin kixin jína chrók'uejókoni ch'án kixin k'uenyákonheni Cristo. Ntá jie jeheni

k'uáyéheni tí xra tsochénkani í so chojni kixin kjuaxróxin chrók'uejóko sín ch'án. ¹⁹ A ntá ó noheni kixin Dios ichr'án Cristo k'uenyákonhenni ch'án, ntá xikaha Dios tjinkaon kixin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chóna chojni, a ntá jeheni k'uáyéheni tí xra tsjakoni itén ch'án. ²⁰ Ntá jeheni kjuachaxin kuente Cristo chronkaxinni kixin Dios chrónóaxinrá ch'án tí jeheni. Mé xikaha tí kjuachaxin kuente Cristo chrónóaxinráni kixin kjuaxróxin chrók'uejokoará Dios. ²¹ A ntá Cristo la ninkehó jie kjuasinhya ch'án, ntá ijieni k'uénxin ch'án. Kjánchó Dios k'uíkon kixin éxí tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6

¹ Ntá kaín ni jnkokoá ch'ehe ni Dios xra, ntá chrónóaharáni kixin chrók'uitóehará tí kjuasáyé Dios kjuakuaxinrá ch'án. ² Kixin ntáchro xroon itén Dios kixin:

A ntá tí yaon kóxrjinhin Dios kuínhin ch'án tí nkehe chronòa chojni;

Tí yaon tsaáxin chojni mé kjuínkítsa ch'án tí jehe sín.*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

³ Ch'ehe ni ninkehó nkehe jínahya kixin ntá chrók'uantaxinhin sín tí xra tjejóch'eni. ⁴ Náhí. Kaín nkehe ch'eni tjakoxinni kixin ch'ehe ni Dios xra. Na mé tjachani tóninkakonhyani kjónté nchónhya nkehe tjasótexinni, la kjónté ichrén nkehe t'ichjánxinhinni, la kjónté ichrén kjuaxikaon síin. ⁵ Na mé k'uékoni, la k'uejóchjinani, la nchónhya k'uixite chojni kóninkakonhenni sín, la ko tí xra kjuích'eni la imá xra. Kjaxin k'uájuhyanani la ko kjónehyanani. ⁶ Tjakoxinni kixin tjóá tjenkayáxinni, la ko tjakoxinni kixin ó noheni tí nkehe chaxín, la ko tjakoxinni kixin tóninkakonhyani, la ko tjakoxinni kixin ch'eni tí jína. La ko chóntani Nchakuen Dios, la ko kaín asénni tjuèheni kichó ni, ⁷ la ko chrónkani tí tan ntoá kuente Dios, la ko tjakoxinni kixin chóntani tí kjuachaxin kuente ch'án. Ntoá tjejóni ntá xikaha tsjachani ntá kohya nkehe tsonhenni. ⁸ Iso sín náxrjón nixjehe sín tí jeheni la ko iso sín náxrjónhya nixjehe sín, la ko iso sín jína nixja sín nkexrí tjejóni la ko iso sín t'ántaxinhinni sín. Iso sín t'ikon sín tí jeheni éxí chojni ch'ia la ko iso sín ntáchro sín kixin jeheni chojni ntoá chrónka. ⁹ Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín. ¹⁰ T'aváni la kjónté xraxinkaonni kixin Inchéni t'ayakonhenni la chéheni. Éxí nòani jeheni na kjónté chénkani itsjé chojni tí itén Dios tsaáxin sín éxí chróchjeheni sín ijnko nkehe imá tjete xikaha. Éxí chóntahyanani ninkehó nkehe la kjónté la kaín nkehe chóntani.

¹¹ Kichóni tjejórá chjasin Corinto, ntoá chrónkani nixjaharáni la ninkehó t'ayaharáni la mé kaín asénni tjuahará. ¹² Jehya jeheni chrók'uitjáyan kixin chrótjuahará. Náhí. Jahóra t'itjáyan kixin chrótjuéhérá tí jeheni. ¹³ Janhan xrjanóahará éxí ijnko it'é xjan chrónóehé tí xjeen ch'án kixin kjaxinrá kaín asánrá chrótjuéhérá tí jeheni éxí tjuèheni tí jahará.

Jeheni mé éxí ninkoe Dios tjechón

¹⁴ Chrók'uitohará tí sín tinkáchónkihya Inchéni kixin tíha mé éxí yóhe ijnko yunta, jnkokónhya koxinta. ¿La ko nkexrí chrók'óyóhe ijnko chojni ó kótjóá la ko ijnko chojni naxa náhí? ¿La ko nkexrí chrók'óyóhe tí t'inkáséyan la ko tí sítié?

¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kichó ijnko chojni tinkáchónki Cristo la ko ijnko chojni tinkáchónkihya.

* 6:2 Isaias 49.8

16 Xitjahya chrók'uito tí n̄inkoe Dios la ko tí nkehe tsíkjanoya. Kíxin jeheni mé tí n̄inkoe Dios tjechón, kíxin jehe ch'án tsíntáchro ch'án kíxin:

Ntaha tsjak'é la ko xritjak'é tí tjejó tí jehe sín,
 a ntá janhan mé ts'óna Dios kuènte sín
 la ko jehe sín mé ts'óna chjasin kuèntana.†

17 Méxra xikaha kjaxin ntáchro Ìnchéni kíxin:
 T'axrjekjanxínrá tí jehe sín na ókjé tjejórá;
 tsehyará tí nkehe tjuáhya.

A ntá janhan mé ts'ayáha tí jahará.‡

18 Ntá janhan mé ts'óna It'ará,
 a ntá jahará ts'ónará xjanna ntoa la ko xjanna chjin,
 ichro Ìnchéni Dios chóna kaín kjuachaxin.§

7

1 Mé xixaha kíchó ni, tí nkehe i mé tsíntáchro Dios tsjanjon ch'án. Méxra t'ichjánx̄in kíxin tjóá chrók'uejóni, chrókuítóheni kaín nkehe chrókuinchekj̄ita tí cuérp̄oéni la ko tí asénni. Ntá chrókóxakönhenni chróchrakönhenni Dios la t'ichjánx̄in chrókjuancheheni ch'án chrókjuinchetjóáni ch'án kíxin jehó ch'án chrókuinkáchónkini.

Tí sín Corinto kjuitox̄inhin sín ntje sín

2 Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuích'iyehyani ninkexró. 3 Jehya ntáchroni tíhi kíxin chrókuékará jie. Náhi. Ó nohará kíxin ósé chrónkani kíxin kaín asénni tjuèheni tí jahará kíxin jnkokoá chrók'uejóni la ko jnkokoá chrók'uenni. 4 Janhan la imá tjikosáyahará tí jahará la ko imá chàna kíxin jína tjejórá. Kjónté kaín nkexrí tjejórtjasóteni na imá chàna.

5 A ntá tió kjuíjini estado Macedonia la xitjahya chrók'ok'éheni kíxin nkuíx̄in siín chojni nínkakönhenni la ko kóxakonhen asénni. 6 Kjánchó Dios na mé tí nkexro nchechéhe asén kaín tí sín tsíkóxrjé mé kjuínchechéhe ch'án asénni kíxin ó kjuíji ch'ín Tito. 7 Ntá jehya kíxin tí kjuíji ch'án ó chrókóchéx̄inni. Náhi. Chéheni kíxin jahará kjuínchechéhérá ch'án. Chrónka ch'án kíxin imá tjinkáonrá chrók'uíkonrá tí janhan la ko chrónka ch'án kíxin tóxakonhanrá kíxin tí jie kjuásínrá la ko kjaxin tóxakonhanrá chrókjuích'erá tí nkehe kuétuanhanrá. Mé kuínhan kaín tíha ntá antsí má kóchàna.

8 Kjuíntak'ávárá kíxin tí xroon kjian chr'anhánrá la kjónté la ntá jie í tóxakonnahya. Na mé senó kóxakonna ntá k'uíkuān kíxin tí xroon kjuíntaxakonhanrá kjánchó kánhyó isé tíha. 9 Ntá jie chàna, kjánchó jehya kíxin tí nkehe kjuíntak'ávárá. Náhi. Chàna kíxin tí kjuat'ává a ntá ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjínhin ch'án. Méxra xikaha jeheni la ninkehó nkehe jínahya kjuít'aharáni. 10 A ntá tí kjuat'ává kjuacha chojni ntá sinchechéhe sín Dios kíxin kjuítóx̄inhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuítóehya tí nkehe kuènte chjasintajni mé t'ává sín kíxin táhó ts'enx̄in sín. 11 A ntá jahará kjuachará k'uátsínkará tí kjuat'ává éxí kóxrjínhin Dios, a ntá jie kónohará kíxin jína tjejórá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuinchekónínkaonrá la ko kjaxin kjuínchechrakonrá. Ntá chr'éxin ntá tjinkáonrá chrók'uikonrá tí janhan. Ntá kjuínchekj̄asóterá tí nkexro kjuasin jie. Kaín tíha kjuákoxinrá kíxin chontahyará ninkehó jie tí

† 6:16 Levítico 26.12, Ezequiel 37.27 ‡ 6:17 Isaías 52.11 § 6:18 Oseas 1.10

nkehe tsíkónhen. ¹² A ntá tí nkehe kjian la jehya kíxin kjuenkayáxian janhan kuènte tí ch'ín kjuasin jie, la ko jehya kíxin kjuenkayáxian janhan kuènte tí ch'ín k'uává ó. Náhi. Íchá jína kíxin jahará chrókjuákoxinrá nkayakon Dios kíxin imá tóxakonhanrá kíxin jeheni xikaha k'uetqanni. ¹³ Mé xikaha kjuich'erá ntá kóchéheni.

Kjánchó antsí má kóchéheni kíxin k'uikonni kíxin kóchéhe ch'ín Tito kíxin jahará kaín rá kjuínkĩsará kíxin kjuaxróxin kjuák'e ch'án ntiha. ¹⁴ Janhan k'uetjanka tí ch'ín Tito kíxin chàna kíxin tí jahará la jehya kjuach'ia tíha la kósuànahya. Náhi. Kaín nkehe k'uetjonkará la chaxín la ko kjaxin kaín nkehe k'uentátjan ch'ín Tito la chaxín kíxin chéheni kíxin kuítekáonrá. ¹⁵ A ntá jie antsí tjuahará ch'án kíxin xráxinkaon ch'án kíxin nkexrí jína kuítekáonrá la ko nkexrí imá kjuikosáyehérá ch'án kjuánjonrá kjuachaxin kuítóhe ch'án ntiha. ¹⁶ Ntá imá chàna kíxin ó nòna kíxin jahará sìnchexiteyànará.

8

Antsí má chrókjuínkĩtsa sìn kíchó sìn

¹ Ntá jie kíchó ni, tjinkaonni chrókónohará kíxin nkexrí tí sìn tinkáchónki Ìnchéni tójnkotsé sìn estado Macedonia kjuákoxin sìn nkexrí tí kjuasáyé Dios. ² Kjónté nchónhya nkehe tsíkónhen sìn la kjónté la kóchéhe sìn; la ko kjónté nòna sìn la antsí má kjuínkĩtsa sìn tí sìn í so éxí chojni chóna itsjé chichaon xikaha kjuich'e sìn. ³ Chaxín k'uikuau kíxin kjuanjon sìn éxí tí nkehe chóna sìn la ko antsí má xíkjanjon sìn inaá kíxin xikaha kjuenkayáxian sìn. ⁴ Nchónhya chrónóehé sìn tí jeheni kíxin chrókjuanjonni kjuachaxin kíxin chrókjuínkĩtsa sìn tí sìn kíchó ni tinkáchónki Dios. ⁵ Na mé antsí má kjuanjon sìn la xikahya kjuenkayáxinni kíxin xikaha chrókjuanjon sìn, na mé senó kuínkáchónki sìn Ìnchéni, ntá kjuixin ntá kjuínchexiteyéhe sìn tí jeheni éxí tóxrjínhin Dios. ⁶ Méxra chrónóeheni tí ch'ín Tito kíxin chrókjuenájín ch'án chichaon tí tójnkotsérá ntiha éxí kjuankíxin ch'án senó. ⁷ A ntá jahará la tjákoxinrá jína kíxin antsí tinkáchónkirá Ìnchéni, la ko antsí k'uitjará chronkaxínrá itén Dios, la ko antsí k'uitjará nkehe kuènte Dios, la ko antsí chontará kjuachéhe, la ko antsí tjuèhérá tí jeheni. Méxra xikaha antsí chrókjuákoxinrá tí xra jína chrókjuínkĩtsará tí sìn kíchó ni.

⁸ Jehya ntáxrjan tíhi kíxin chrókuétuanhanrá xikaha. Náhi. Jehí tjínkavan chrókónohará nkexrí jína kjuich'e tí í so sìn kíxin kjaxinrá chrókjuákoxinrá kíxin tjuèhérá kíchuará. ⁹ Kíxin ó nohará nkexrí tí kjuasáyé Ìnchéni Jesucristo kíxin k'uéríko ch'án la ntá kónòna ch'án kíxin imá tjuèhe ch'án tí jahará kíxin tí kónóaxin ch'án mé jahará kóríkóxinrá.

¹⁰ Méxra tsotjonkará tí nkehe tjenkayáxian janhan kuènte tí xra i kíxin jahará tí nánó k'uátsínka kjuankíxinrá kjuínkĩtsará kjuánjonrá nkehe, la mé jehya kíxin ó jehí kjuínkĩtsará sìn. Náhi. Kjaxin imá kócháhará kíxin kjuínkĩtsará sìn. ¹¹ A ntá jie chrókjuintaxín chrókjuánjonrá éxí tí chrókjuachará chrókjuánjonrá éxí xrankíxixín tsíkateherá tsjínkĩtsará tsjánjonrá nkehe. ¹² Mé xikaha tí chaxín tjinkaon jnkójin chojni chrókjuanjon sìn nkehe, ntá tsoxrjínhin Dios tí tjanjon sìn tí nkehe chóna sìn. Dios la tjanchahya ch'án tí nkehe chóntahya chojni.

¹³ Jehya kíxin xikaha tí í so sìn chrók'uejó sìn jína kíxin tí nkehe kjuínkĩtsará sìn la ntá jahará chrók'uitjáyan nkehe t'ichjánxinhanrá. Náhi. ¹⁴ Chrókójína chrókóyóhe chróchontará nkehe jnkokón. A ntá jie jahará chontará tí nkehe chóntahya tí í so sìn. A ntá í jnko yaon jehe sìn tsochóna sìn tí nkehe tsochontahyará. Chrókjuínkĩtsará tí sìn chóntahya kíxin chróchontará nkehe

jnkokón. ¹⁵ Éxí ntáchro xroon itén Dios kixin: “Tí sín kjuenájin sín nchónhya la mé xèhya sín ninkehó, la ko tí sín kjuenájin sín tsjéhya na mé kjónté tsjéhya la kjuacha tí nkehe kuicháxinhin kjuenájin sín.”*

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxí tóxakonna kixin tí jahará. ¹⁷ Ntá kóxrjínhin ch'án tí nkehe k'uetuenhenni ch'án, la ntá kjaxin jehe ch'án kóxakonhen ch'án kixin á jína tjejorá, ntá jehe ch'án tjinkaon ch'án chrókjuijitsjehe ch'án tí jahará.

¹⁸ Kjaxin k'uetoanni sátsjikotoxin tí ch'ín Tito í jnko kichó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xra jína tjech'e ch'án tjako ch'án tí tan tsaáxinni. ¹⁹ La ko kjaxin tí sín kaín tí njnko ntihi kjueyá sín tí nkexro kichó ni kixin sátsjikotoxin ch'án tí jeheni tí xra sátsjikoni tí chichaon tsjikénhenni tí sín nò. Na mé tí xra ch'eni kixin xikaha tsjikosáyeheni Ìnchéni la ko xikaha tjakoxinni kixin tjinkaonni chrókjuinkitsani sín. ²⁰ Tjinkaonni kixin tsokohya nkexro chrók'uántaxínhin kixin tí chichaon xrenájin kjuíjijikoni. ²¹ Méxra tjinkaonni chrókjuich'eni tí nkehe ntoá, jehya jehó tí nkehe chrókóxrjínhin Ìnchéni. Náhí. Kjaxin tjinkaonni kixin chrók'uikon chojni kixin jína tjejóch'eni.

²² La ko kjaxin k'uetuenhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuakoxin ch'án kixin chéhe ch'án chrókjuínkítsa ch'án kixin itsjé xra kjuích'e ch'án. A ntá jie antsí má chrókjuich'e ch'án xra kixin chóxin ch'án tí jahará. ²³ A ntá jnkojín sín tsjanchankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjinkítsa ch'án tí janhan kixin xikaha tjinkítsa ch'án tí jahará. A ntá tí tsjanchankí sín kixin nkehe tí xra ch'e tí í so kichó ni ntá chenkará sín kixin tí sín kaín njnko k'uetoan sín kixin sátsji sín ntiha kixin mé xikaha tsjikosáyehé sín Cristo. ²⁴ Méxra chrókjuákoxinrá kixin chaxín tjuèhérá kichuárá kixin tsonohe tí sín kichó ni í so njnko la ko kjaxin tsonohe sín kixin chaxín chéheni kixin tí jahará.

9

Tí chichaon xrenájin tsjinkítsa tí sín kichó ni

¹ A ntá tí xrenájin chichaon kixin tsjínkítsará tí sín kichó ni tinkáchónki Ìnchéni, la t'ichjánxienhya tsokjian xroon tsochr'anhánrá ² kixin xráxín kónòna kixin jahará tjinkáonrá chrókjuínkítsará, na mé xikaha chàna la tjanka tí sín tjejó estado Macedonia kixin jahará chojni estado Acaya desde tí nánó k'uátsínka xráxín tjejorá tjinkáonrá chrókjuínkítsará. A ntá antsí tsjé sín estado Macedonia tjinkaon sín chrókjuinkítsa sín kixin jahará xikaha kjuákoxinrá nkexrí tjinkáonrá chrókjuínkítsará. ³ A ntá ichr'an tí sín kichó ni kixin tjínkavan kixin tsontáchrohya sín kixin chaxínhya tí nkehe jína ntátjan sín senó. Mé xikaha jahará chrókóyaxínhanrá chrókjuínkítsará tí sín kichó ni éxí ntátjan sín senó. ⁴ Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonrá ntá chrókósuèheni tí jeheni kixin imá chóxinni kichó ni la ko kjá chrókósuàhará kjaxinrá. ⁵ Méxra xikaha tóna kixin t'ichjánxin tsontátjan tí sín kichó ni kixin sátsji sín tsitónxin sín ntja tsjijitsjehe sín tí jahará senó tsjinkítsa sín kixin tsjenájinrá tí chichaon tsintáchrórá senó kixin chrókjuánjonrá. A ntá chrókóyaxínhanrá kixin chrókjuánjonrá tí chichaon éxí ijnko nkehe chaxín tjinkáonrá chrókjuánjonrá la jehya éxí ijnko nkehe chrókjuanchaharáni afuerza.

* 8:15 Éxodo 16.18

⁶ Xŕaxinkáonrá ḱixin tí nkexro k'uenka tsjéhya na mé tsjéhya tsotjá. A ntá tí nkexro k'uenka itsjé mé tsotjá itsjé. ⁷ Méxra jnkojnko chojni chrókjuanjon tí nkehe kjuenkayáxixin sín asén sín. Na mé tjinkakonhya Dios ḱixin kénhya asénni chróchjéheni ch'án nkehe, ḱixin Dios mé tjuèhe ch'án tí nkexro chéhe tjanjon nkehe. ⁸ A ntá Dios chóna kaín kjuachaxin jié ntá tsotjáhará ch'án kaín nkehe t'ichjánxinhanrá ḱixin tsochontará nkehe tsochjehérá í so chojni chóntahya ḱixin xikaha sich'erá kaín xra jína. ⁹ Éxí ntáchro tí xroon itén Dios ḱixin:

Tí nkexro t'óxikayéhe ch'án itsjé nkehe nchekitonhen ch'án tí sín nòna na mé nunca tsjejehya tí xra jína ch'e ch'án.*

¹⁰ Dios mé tjanjon noatje ḱixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinchek'ánkí ch'án tí nkehe ts'énkará la ko jehe ch'án sinchek'ánkí ch'án tí xra jína tjejoch'erá. ¹¹ A ntá tsochontará kaín nkehe tjete ḱixin ntá antsí tsjachará tsjínkitsará tí í so sín kichó ni. A ntá xikaha tsjijikenhenni sín tí nkehe tsochjehérá tí sín kichó ni ntá tsjanchehe sín Dios kjuasáya. ¹² Ḱixin xikaha chrókjuínkitsará tí sín kichó ni na jehya ḱixin chrók'uáyéhe sín tí nkehe t'ichjánxinhin sín ó, la mé kjaxin chróchjéhe sín Dios kjuasáya. ¹³ Mé xikaha tsjanchehe sín Dios kjuasáya ḱixin tí nkehe kjuánjonrá kjuáoxinrá ḱixin nchexiteyéhérá tí tan kuènte Cristo. Kjaxin tsjikosáyehe sín Dios ḱixin tí í so nkehe kjuánjonrá k'uáyéhe sín la ko tí nkehe k'uáyéhe í so chojni. ¹⁴ La ko jehe sín tsjanchehe sín Dios ḱixin tsjínkitsa ch'án tí jahará ḱixin jehe sín tjuahará sín ḱixin t'ikon sín ḱixin tjáoxinrá ḱixin tí kjuasáyé Dios chontará. ¹⁵ Tjancheheni Dios kjuasáya ḱixin kjuínchekitonhenni ch'án ijnko nkehe imá jié tsaáxinni la tsjachahyani tsochronkaxínni kaín tíha.

10

Kjuachaxin chóna ch'ín Pablo ḱixin tsík'óna ch'án apóstol

¹ Janhan Pablo tió xrjanóahará nkehe la jnkojína xrjanóahará la mé tjáoxian éxí toxrjínhin Cristo. Ntáchorá ḱixin tió tjèn tí tjejorá ntiha la tósuàna, a ntá tí kjín tjèn la imá jièna, ichrorá. ² Méxra xrjanóahará ḱixin tí tsjasántsahará tjínkakonhya ḱixin chrókjuínchekóninkáonráni ḱixin ntá tsonínkakonhánrá jnkojínrá ḱixin tsékaráni jié ḱixin ixria éxí chojni chjasintajni ó, tsixrorá. A ntá xra ó tsjasán tsjentuáha tí jehe sín. ³ Chaxín tjejóni éxí chojni ó, na kjánchó tió tjanjonni la tjanjonhyani éxí tjanjon chojni chjasintajni. ⁴ Ḱixin tí nkehe xraáni tjanjonxinni jehya nkehe kuènte chjasintajni. Náhí. Táha la kjuachaxin kuènte Dios la tíha mé tsjacha sinchek'itjáyan kaín kjuachaxin kuènte tí Jínahya. ⁵ Na mé tsjachani sinchek'itjáyanni tí nkehe ntoáhya tjenkayáxin chojni la ko kaín nkehe ncheknkexín sín t'inkákonhen ḱixin chrókóchóxin chojni Dios. A ntá kjuachaxin kuènte Cristo tjáoheni kaín chojni ḱixin ntá tsítóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án ⁶ la ko tjejóchónhenni sinchekjasóteni kaín tí sín ntiha naxa tjinkakonhya sín chrókjuínchexiteyá sín tí tsjixin tsonoheni ḱixin á chaxín tsjachará sinchexiteyará jína.

⁷ A ntá jahará tékaráni jié ḱixin tí nkehe t'ikonrá ó. A ntá tí nkexro tjenkayáxin ḱixin chaxín ch'ehe Cristo xra la mé kjaxin chrókjuátsoan ḱixin kjaxinni jeheni la ch'eheni Cristo xra. ⁸ A ntá tí chrókjuíntahnkena ntsí ḱixin tí kjuachaxin chonta janhan ntá chrókósuànahya ḱixin Ìnchéni kjuanjon tí kjuachaxin ḱixin chrókjuínkitsa tí jahará ḱixin antsí chrók'uitjará kuènte Dios, la mé jehya ḱixin chrókjuíntak'itjáyanrá. ⁹ Tjínkakonhya ḱixin

* 9:9 Salmo 112.9

chrókjuintachrakonxínrá tí xroon chr'anhánrá. ¹⁰ Kíxin ntáchro sín kixin ixra la ko jēhe tí nkehe ikjian janhan, a ntá tí chrókjuak'é ntiha la jienahya la ko kánhyó chonta janhan kjuachaxin tí nixja janhan. ¹¹ Kjánchó tí nkexro xikaha ntáchro chrókónohe ch'án kixin jnkokón nixja janhan éxí nixja tí xroon tsíkjian kjónté ikjín tjèn la ko kjónté tí chrók'uejóni ntiha.

¹² Tjinkakonhyani chrókjuenkayáxinni kixin chrókóyóhēni tí í so sín ntáchro sín kixin jina tí jehe sín. Jehe sín mé lontj sín kixin ncheyóhē sín asén sín í so chojni. ¹³ A ntá jeheni la chrókjuinchehnkexínhyani ijnko xra jehya xra kuēnteni. Dios mé kjuako nketí sich'eni xra la kjuanjōn ch'án kjuachaxin kixin kjuíjini kjuích'eni xra tí tjejorá chjasin Corinto. ¹⁴ Jehya kixin chróchóntahyani kjuachaxin chrók'ueṭuṭanhanráni. Tí chaxín jehya jeheni saoxín kjuíjini tí tjejorá ntá xikaha chróchóntahyani kjuachaxin. Ntá náhí, kixin jeheni saoxín kjuíjini ntiha kjuakoharáni itan kuēnte Cristo. ¹⁵ Chrókjuinchehnkexínhyani ijnko xra kjuích'e ókjé chojni éxí xra chrókjuich'eni jeheni. Náhí. Tjinkaonni kixin antsí chrók'uitjará tsinkachónkirá Ìnchéni ntá xikaha la antsí chrókjuinkitsani tí jahará kixin jehó tí xra k'uáyéhēni tjejóh'eni. ¹⁶ Kjaxin tjinkaonni chrókjuakoni tí itén Ìnchéni chrókuaáxin chojni í so chjasin sáchrókjuini la ko kjaxin chrókjuinchehnkexínhyani tí xra chrókjuich'e ókjé chojni.

¹⁷ A ntá jnkojín sín tjinkaon sín chrókjuinchehnke sín ntá jehó chróntáchro sín kixin kjuachaxin Ìnchéni mé chóna sín.* ¹⁸ Kíxin tóxrjénhya Dios ijnko nkexro jehó chróntáchro kixin jina ch'án. Náhí. Ìnchéni mé tsontáchro ch'án nkexro chaxín jina.

11

Ch'ín Pablo la ko tí sín chaxínhya apóstol

¹ Tjínkavan chrókuinhínrá ntsí tí lontina. ¿Á chrókjuachará chrókuinhínrá nkehe tsontáxrjan? ² Janhan tjínkakonhya kixin í jnko nkexro chrókuinkachónkirá. Kjaxin xikaha tjínkakonhya Dios. Ó ikjuá Cristo kixin chrókuakja ch'án tí jahará. Tjínkavan chrókjuánjuan tí jahará chrókuakja tí jehe ch'án éxí yóhē ijnko tjan tjarisoá chrókótehe jnkokoá xii. ³ Tóxakonna kixin éxí tí konche tí kjuach'ia xriko ntá kjuích'iyehē tjan Eva, ntá xikaha kjaxinrá jahará tsitohérá sit'ayahará ókjé chojni ntá tsitohérá tí nkexrí kaín asánrá tinkachónkirá Cristo. ⁴ A ntá jahará cháhará tjanjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxí tí chronkaxíni jeheni, la ko kjaxin cháhará k'uayéhérá ókjé nchakuen jehya tí Nchakuen Dios k'uayéhérá sao, la ko cháhará chrókuítekáonrá ijnko nkehe ókjé chrókuaáxinrá jehya éxí tí nkehe kuítekáonrá senó. ⁵ Ó nòna kixin chaxínhya ninkehó sínkíhyana janhan, a ntá antsí sínkí tí sín chréhérá jahará, ichrorá. ⁶ Kjónté kánhyó náxrjón níxja janhan la jehya kixin kánhyó chrókónona chrókjuakua. A ntá tjákoáxinrá jahará tíhi kixin kaín nkehe t'a.

⁷ ¿Á ntoáhya kjuít'a janhan xrjankaxián tí tan tsaáxinni kixin ninkehó kjuáncháhya chrókjuacha la ko éxí ijnko chojni nòe kjuak'é janhan kixin tjínkavan chrókjuínkitsará chrók'uitjará? ⁸ Tí sín í so njnko kjuínkitsana sín kjuanjōn sín chichaon k'uayáha kixin tsjak'é tsjakohará jahará. ⁹ Tí kjuak'é tí tjejorá jahará la kjónté t'itjayan nkehe la ninkexró kjuáncháhya nkehe. Jehó tí sín kichó ni kjuíxin estado Macedonia kjuíkao sín tí nkehe t'ichjánxinna. Méxra tjínkakonhya kixin chrótjahará xra tí jahará la ko xikaha naxa tjet'a

* 10:17 Jeremías 9.24

jie. ¹⁰ Xikaha chaxín choxian tí tan chaxín ntoá kuènte Cristo, a ntá ko-hya ninkexró nkuíxín estado Acaya tsjacha tsakitsjena tí kjuachéhe chonta.

¹¹ ¿Nkekuènte xikaha ntáxrjan? ¿Á xikaha ntáxrjan kixin tjuahyará tí jahará ní? Náhi. Dios la ó nohe kixin imá tjuahará.

¹² Kjánchó ó jehí tsjintaxín xikaha sit'a kixin tjínkaxonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjákua la ko tí nkehe tjako sín. ¹³ Kjánchó jehe sín ijnko apóstol chaxínhya mé ch'ia sín ncheyóhó sín éxí chojni kjuéyá Cristo. ¹⁴ Jehya ijnko kjuachakon tíha kixin kjaxin ch'ín Tsochren kjaxin xikaha ncheyóhe ch'án éxí ijnko ángel kuènte tí t'inkaséyan. ¹⁵ Méxra xikaha kjaxin kuènnen tí sín ch'ehe tí Jínahya xra mé ncheyóhe sín tí sín jína. Ntá tsjixixín mé tsjasótexín sín tí xra jínahya kjuích'e sín.

Kjuasóte ch'ín Pablo kixin apóstol tí jehe ch'án

¹⁶ Ntáxrjan inaá kixin nijnkorá chrókjuenkayáxinrá kixin lócona. Kjánchó tí xikaha tjenkayáxinrá la tjtóhérá tsonixja janhan éxí lócona kixin kjaxinna jína chrókjuintahnke ntsí. ¹⁷ Tí xikaha ntahnkexián la jehya kjuachaxin kuènte Ìnchéni ntáxrjanxian tíha. Náhi. Jehí éxí ijnko chojni lóco nixja. ¹⁸ A ntá nchónhya chojni síin nchehnkexín sín tí nkehe nohe sín a ntá jie la kjaxin janhan sintahnke. ¹⁹ Kixin jahará ntáchrorá kixin imá nohará ntá cháhará tjejó tí sín lóco. ²⁰ Kixin tjánjonrá kjuachaxin t'etuanhanrá sín la nchexiteyéhérá sín la ko takitsjahará sín tí nkehe chontará la ko ch'éna asén sín éxí ìché sín tí jahará, la ntá kjoniehýará sín la ko tjate sín nkaya ikonrá. ²¹ Kjónté chrókósuána tsontáxrjan kixin jeheni la kánhyó jiehe k'uetuanhanráni.

Kjánchó tí nkehe nchehnkexín sín la janhan ntahnkexián kjaxinna, kjónté ntáxrjan tíhi éxí ijnko chojni lóco. ²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'ín Abraham? Kjaxin janhan k'uaxrjeníxian ch'án. ²³ Ch'ehe sín Cristo xra kjánchó janhan la antsí má la jehe sín la kénhyó, kjónté ntáxrjan tíhi éxí ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntóechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uíxin kjuaxikaon kixin chrók'uén. ²⁴ In'ó veces tí sín judío kjuatena sín la ko treinta y nueve tí kjuatjoté. ²⁵ Níya kjuatexinna sín inta la ko í jnko vez kjuak'e sín xro. Níya k'uániánkí ntabarco ntá ntá ijnko yaon la ko ijnko tie tjenkataván ntayaon. ²⁶ K'uájia má, k'uíkuan kjuaxikaon chrók'uénxian tí ntario la ko chrók'óyanna tí xichee la ko chrók'óyanna tí sín chjasenná la ko tí sín tsikjixin ókjé. K'uíkuan kjuaxikaon tí chjasin jie la ko tí nteje la ko tí ntayaon la ko chrók'óyanna tí sín chaxínhya tinkáchónki Ìnchéni. ²⁷ Kóxrjéna kixin tí xra kjuít'a la ko itsjé nkehe náxrjónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntá la ko itsjé yaon kjonéhya ninkehó la ko kókinna la ko chontahya kaná.

²⁸ Kjónté kaín tíha la ko í so nkehe kónna la mé jnkojnko yaon imá tóxakonna kixin kaín tí sín tójnkotsé sín kaín tí nínko. ²⁹ ¿Á tjen jnkójnra níhará? A ntá tí xikaha la koína éxí nína. ¿Á tjen jnkójnra kjuásinra jie? A ntá tí xikaha la kjaxin tóxakonna. ³⁰ Tí chrókjuintahnkexian nkehe la mé tjínkavan kixin jehó chrókjuákoxian kixin kánhyó jie. ³¹ Dios, It'é Ìnchéni Jesucristo, na mé tí nkexro chróxraxinkaonni jnkochrín mé ó nohe ch'án kixin chaxín tí nkehe ntáxrjan. ³² Ntá tí kjuak'é chjasin Damasco la mé tí ch'ín gobernador kjuích'ehe ch'ín rey Aretas xra mé k'uetuenhen ch'án tí sín soldado kixin tsochónhen sín tí ntója tí chjasin kixin chrótséna sín chrókjuak'échjina.

³³ Kjánchó síin nkexro k'uínkajinxinna ijnko ntaxra ijnko ventana tí tját'o k'uantatjen chjasin la mé xíkaha kuaána, tséhyana sín.*

12

Tí nkehe k'uíkon ch'ín Pablo

¹ Ninkehó tsjachahya tí nkehe tsoxrjanka kuèntana ó. Íchá jína tsoxrjanka tí nkehe k'uíkuan la ko tí nkehe kjuínchenona Ìnchéni. ² Choxian ijnko nkexro tinkáchónki Cristo. A ntá k'uátsínka catorce nánó sátsíkji ch'án tí níxin nkajní. Nonahya á sátsíkjiko ch'án cuerpo kuènte ch'án o asén ch'án ó. Jehó Dios mé nohe. ³ Méxra ó nòna kixin xíkaha sátsíkji ch'án la ntá nonahya á koí cuerpo kuènte ch'án o asén ch'án ó. Jehó Dios mé nohe. ⁴ A ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka. ⁵ Jína chrókujuintahnkexián kixin xíkaha kónhen tí nkexro a. A ntá tí chrókujuintahnkexián kixin kjuachaxin kuèntana la jehya jína tíha. Íchá jína chrókuákoxian kixin janhvàn la chontahya kjuachaxin. ⁶ Tí chrókujuintahnkexián tí nkehe kònna la chrókólócohyana kixin chaxín tí nkehe chróxrjanka. Kjánchó xíkahya t'a kixin tjínkakhonhya kixin xíkaha chrókujenkayáxin chojni kixin antsí jína janhan. Náhí. Tjínkavan kixin tí xra t'íkon sín la ko tí nkehe tinhin sín mé chrókujenkayáxin sín kixin á jína tí janhan, tsixro sín.

⁷ Méxra chrókujuintahnkexinhya ntá xíkaha xránjon kjuachaxin kixin chrók'uayáha ijnko kjuatjoté éxi ijnko ch'i kuikjiáte cuerpo kuèntana mé ijnko nkehe tsík'etuenhen ch'ín Tsochren ikui kjuínchekjoténa. ⁸ Iní veces xrjanóaha Ìnchéni kixin chrókuatsen ch'án tí kjuatjoté chonta. ⁹ Kjánchó ntáchro Ìnchéni kixin jehó tí kjuachaxiэн ch'án chrókuachaxian janhan. Kixin tí kjuachaxiэн ch'án antsí tsjakoexín chojni fuértehya. Méxra ntá chàna kixin fuértehyana kixin ntá xíkaha tsjakoexian tí kjuachaxin kuènte Cristo. ¹⁰ Méxra chàna kjónté fuértehyana la ko kjónté t'ántaxina sín la ko kjónté t'ichjánxinna nkehe la ko kjónté chónkina sín chrók'óyanna sín la ko kjónté síin kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

Tóxakonhen ch'ín Pablo kixin tí sín tjejó nínko chjasin Corinto

¹¹ ¿Á lócona kixin xíkaha xrjanka? Kjánchó jahará kuítekákonhyará ntá xíkaha xrjanka. Jahará chróchronkará xíkaha kixin jína janhan. Jehya kixin kánhyó sínkina la ntá tí sín chréhérá la antsí sínkí sín. Náhí. Kjónté janhan la chaxín ninkehó sínkíhyana. ¹² Kjuásian itsjé kjuaxroan jié la jína kjuak'é kónínkakhonhya kjuákoxian kixin chaxín janhan ijnko nkexro tsíkjejá Ìnchéni. ¹³ ¿Xá k'uíkuan tí jahará éxi kánhyó sínkírá a ntá tí í so nínko la antsí sínkí sín kixin tí kjuasán janhan la ninkehó xra tjaáhyará? A ntá tí xíkaha ntoáhya kjuít'a la tóninkákonhyará.

¹⁴ A ntá ijie ó yaxinna tí níxin vez chrókjuasántsjahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéyá janhan la mé jahará kixin jahará éxi yóhe xjanna t'íkuán. Méxra tí sín it'é xjan chrókjuenájín sín chichaon chrók'uayakuénxín sín xjeen sín. Jehya xra kuènte tí xjan chrókjuenájín xjan chichaon chrók'uayakuénxín sín tí it'é xjan. ¹⁵ Tóxakonnahya kjónté chrókujuintakjeje kaín nkehe chonta janhan o kjónté chrók'ueñxian kixin tí jahará la jína chrók'uejorá. A ntá janhan imá tjuahará la kjánchó éxi tona janhan kixin jahará kánhyó tjuèherá tí janhan.

* 11:33 Hechos 9.23-25

¹⁶ Méxra kjónté janhan tjaáhyará ninkehó xra la kjónté xikaha ntáchrora kixin kjuít'ayahará, ichrora. ¹⁷ ¿Xá kjuít'ayahará kixin jnkójín sín ichr'an kjuíjitsjehe sín tí jahará? ¹⁸ Kjuáncháha tí ch'ín Tito kixin tsjijitsjehe ch'án tí jahará la ko kjaxin kuétuanhan tí í jnko kichó ni sátsjikotoxin ch'án. ¿Á kjuít'ayahará ch'ín Tito ní? ¿Á chaxínhya jína k'uéjóni yóini ntiha kixin jnkokón Nchakuen Dios chóntani?

¹⁹ ¿Á tjenkayáxinrá kixin xikaha kjuáteheni kixin chóntani jie ní? Kjánchó xikahya. Dios tjetsjehe kixin nixjani éxí chojni tinkáchónki Cristo. Kíchóni tjuahará la kaín tíha ntáxrjan kixin tjínkavan kixin antsí chrókuinkachónkirá Ìnchéni. ²⁰ Tóxakonna kixin tió tsjasántsjahará la tsóxrjinnahya nkexrí tjejorá la ko kjaxinrá tsóxrjánhyará tí nkehe tsontáxrjan. Tóxakonna kixin naxa ts'ixin kjuáninkaon la ko naxa ts'ixin kjuachjinoxínhin la ko tsóninkákonhénná kíchuára la ko chrókuétóanrá jahórá la ko naxa tsinkachónkirá kjuach'ia la ko naxa ts'ántaxínhínrá kíchuára la ko naxa chontará kjuahnke la ko jnkokoáhya tsjenkayáxinrá. ²¹ Tóxakonna kixin tió tsjasántsjahará inaá la tí Dios kuéntana mé sinchesuàna tí tjejorá la ntá imá tsotsjanka kixin itsjérá tsíkjasinrá jie tí ósé la naxa titoéhyará tí nkehe tjuáhya ch'erá la ko naxa titoéhyará chontará chojni chjin ókjé tjásinkoará jie la ko titoéhyará kaín tí í so nkehe jínahya k'uékjich'erá ósé.

13

Nchexraxinkaon ch'án sín la ko tsjixixín nixja ch'án

¹ A ntá jie la níyaxín tsjasántsjahará. A ntá tí kaín nkehe tjinkáonrá tsonòna la mé chróchrónka yaá o iy'á chojni tsík'ikonxín kon sín tí nkehe tsíkónhen. ² Nixjaha tí sín tsíkjasin jie ósé, la ko nixjahará kaín rá kixin kjónté ikjín tjèn la inaá nixjahará éxí nixja tí kjuak'e k'uéjóni tí iyó kjuasántsjahará kixin tió tsjasán inaá la í tsíkonóahya tí sín kjuasin jie. ³ Jahará tjinkáonrá tsinhínrá á chaxín níxjaxian kjuachaxin kuènte Cristo. Jehya kixin Cristo tsjachahya tsjakoxin ch'án tí kjuachaxièn ch'án tí tjejorá ntiha. Náhí. Chaxín tjakoxin ch'án tí kjuachaxin chónta ch'án tí tjejorá ntiha. ⁴ Chaxín tí k'uénxin ch'án tí ntacruz la mé éxí chóntahya ch'án kjuachaxin. Kjánchó ijie tjechónxin ch'án tí kjuachaxin kuènte Dios. Kjaxinni jeheni éxí kjuák'e ch'án k'uéchóntahyani kjuachaxin la ntá ijie tinkáchónkini tí jehe ch'án la tjejóchónxinni tí kjuachaxin kuènte Dios kixin jína tsjinkítsani tí jahará.

⁵ Jahará chrókjuenkayáxinrá á nchoxon tjejorá, á kaín asánrá tinkachónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxín tinkachónkirá o náhí. ⁶ Kjaxin tjínkavan chrókónohará kixin jeheni la jehya chojni chaxínhya tinkáchónki Ìnchéni. ⁷ Nixjeheni Dios kixin chrókuítóehya ch'án tí jahará kixin ninkehó nkehe jínahya chrókjuich'erá. Jehya kixin chrókjuakoxinni kixin jína tí jeheni. Náhí. Jehí tjinkaonni kixin jahará chrókjuich'erá nkehe jína. Ántosenni kjónté tsóntáchro sín kixin chóntani jie. ⁸ Ninkehó nkehe chrókjuich'eni kixin chrókjuinchek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín. ⁹ Méxra chrókóchéheni tí t'ichjánxinhya imá chrók'ueñoanni, tí chaxín jína chrók'uejorá. Ntá naxa tsonixjeheni Dios kixin chrókjuixraká chrók'uejorá ntoá. ¹⁰ Mé xikaha ikjian tíhi senó naxa tsjasántsjahýará ntiha kixin ntá tió tsjasán la ts'ichjánxinhya naxa sinchekóninkáonrána tsónixjaxian tí kjuachaxin chonta janhan. Kixin Ìnchéni mé chjna tí kjuachaxin jehya kixin chrókjuintak'itjáyanná. Náhí. Kjuanjon ch'án tíha kixin jahará antsí chrókuinkachónkirá Ìnchéni.

¹¹ Na ntá kichó ni, chrókócháhará. Tjéyará kixin jina chrók'uejorá. Chrókjuinchechéhérá kichuárá la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án. ¹² Nixjehérá kichuárá jnkójina la tsehérá tja kichuárá. ¹³ A ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkĩtsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí nínko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjuéyána la ko jehya chojni ichr'ánna. Náhí. Kjuéyána Jesucristo la ko It'éni Dios, mé tí nkexro kjuínchexechón Jesús. ² Janhan la ko kaín tí sín kíchó ni tjejókoni ntihi ikjinni tí xroon ts'áyéhe tí nínko siín estado Galacia. ³ Tjancheheni It'éni Dios la ko Ìnchéni Jesucristo kjuasáyé ch'án chrókjuíncheyaonrá ch'án la ko chrók'uayéhérá tí kjuaxróxin kuènte ch'án. ⁴ Jesucristo mé k'uenyákonhen ch'án ijíeni ntá kuaáxinni la mé ijie tsjachahya tí nkehe jínahya siín chjasintajni tsjachroeni mé xíkaha tjinkaon It'éni Dios. ⁵ Tjánháha Dios kjuasáya jnkochrínín mé xíkaha tsoxiteyá. Amén.

Kohya í jnko tan tsaáxinni

⁶ Janhan tóxakonna kíxin jahará imá tjoka tinkakítóhérá Dios kjuéyará kjuasáyé Cristo. Jahará la tjoka ó kjuankíxinrá chréhérá ókjé tan chrókuaáxinrá. ⁷ A ntá chaxínhya xíkaha. Kohya í jnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuítóxinhin sín tí tan chrókuaáxinni kuènte Cristo. ⁸ A ntá tí jnkojín nkexro chrókjuakohará ókjé tan chrókuaáxinrá yóehya tí nkehe ó kjuakoni la tí xíkaha la Dios mé sinchekjasóte tí sín kíxin xíkaha sich'e sín, kjónté á janhan o ijnko ángel chrókjuixín nkaya nkajní. ⁹ Senó xrjanka la inaá tsoxrjanka kíxin jnkojín nkexro chrókjuako ijnko tan ókjé tsaáxinrá yóehya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kíxin chrókóxrjínhin chojni tí xrá t'a. Náhí. Tjínkavan kíxin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijnko nkexro ch'ehe xrá Cristo.

Ch'ín Pablo k'óna ijnko chojni tjako itén Dios

¹¹ Jahará kíchó ni chrókónohará kíxin tí tan tjàkua tsaáxinni mé jehya ijnko nkehe kjuenkayáxin chojni ó. ¹² Jehya chojni chjina tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhínrá nkexrí k'uékjak'é tió naxa k'uéchráha tí sín judío. Ó nohará kíxin k'uéchonkíha tí sín tinkáchónki Ìnchéni la ko tjínkavan chrókjuíntak'itjayan sín.* ¹⁴ Tí naxa k'uék'ájikian tí sín judío la antsí má k'uénóna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekavan tí nkehe k'uék'etoan tí sín tsík'axrjeníxinni. ¹⁵ Kjánchó Dios kjuéyána kjónté naxa tókjínahya la kjuasáyé ch'án kjuéyána ch'án kíxin xíkaha kóxrjínhin ch'án. ¹⁶ Kjuínchenóna ch'án nkexrí tjen tí Xjeen ch'án kíxin tsjakoqha tí sín jehya judío tí tan tsaáxinni. Tió kjuéyána Dios la ninkexró kjuakonahya. ¹⁷ La ko kjaxin kjuítsjàhya janhan tí sín tsík'óna apóstol siín chjasin Jerusalén. Náhí. Janhván tuénxín sákjuia chjasin Arabia, a ntá chr'éxin ikjan tí chjasin Damasco.

¹⁸ Á ntá iní nánó chr'éxin na ntá sákjuiyá chjasin Jerusalén kíxin tsochoxian ch'ín Pedro la ntá ntiha mé kjuák'ekjan ch'án quince yaon. ¹⁹ Kjánchó k'uíkónhya tí í so sín apóstol. Jehó k'uíkuan ch'ín Jacobo kíchó Ìnchéni. ²⁰ Ó tjetsjehe Dios kíxin tí nkehe ikjian la mé chaxín tíha.

* 1:13 Hechos 8.3; 22.4-5; 26.9-11

²¹ A ntá chr'éxin ntá sákjuia nó estado Siria la ko Cilicia. ²² A ntá tí sín kíchó ni tinkáchónki Cristo tjejó estado Judea la naxa tjatsoanhyana sín. ²³ A ntá ó kuínhón sín kixin tí nkexro k'uéchréhe sín chrók'óyan sín la ntá ijie mé tjako tí tan chrókjuinçek'itjáyan ch'án. ²⁴ A ntá ijie tjanchia sín kjuasáya kixin janhan ó tinkáchónkia Ìnchéni.

2

Tí iso sín kjueyá Jesús k'uáyéhe sín ch'ín Pablo

¹ La ntá catorce nánó chr'éxin ntá sákjuiyá chjasin Jerusalén inaá la sákjuíkian ch'ín Bernabé la ko kjaxin ch'ín Tito. ² Sákjuiyá ntiha kixin Dios kjuínchenóna kixin sáchrókjuiyá. Ntiha chjasin Jerusalén la kójnkotsékoni tí sín t'etoan nínko ntiha la ntá xrjankaxián nkexrí tí tan tsaáxinni tjákoḥa tí sín jehya judío. Mé xikaha kjuít'a kixin janhan tjínkavan jnkokoá chrókjuenkayáxinni kixin ntá tí xra kjuít'a la jehya chrókóchónkó. ³ A ntá kjónté tí ch'ín Tito kjuák'ekjan ch'án la jehe ch'án mé griego ch'án la k'uetuanhya sín kixin chrókua ch'án xroye. ⁴ A ntá iso tí sín kíchó ni chaxínhya tinkáchónki Ìnchéni k'uéjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuènte Cristo chóna kjuachaxin. A ntá jehe sín tjinkaon sín kixin chrókjuinchexiteyéhéni inaá tí nkehe k'uék'etoan tí ley. ⁵ A ntá tahyani kuenté nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etoan kjuakonahya sín ninkehó. A ntá jeheni la tahyani kuentá á chojni t'etoan o náhí kixin Dios la jnkokón t'íkon ch'án kaín chojni. ⁷ A ntá kjuátsoan sín kixin Dios ó chjina tí xra tjákoḥa tí sín jehya judío tí tan jina éxí yóhe tsíchjéhe Dios xra ch'ín Pedro tjákoḥe ch'án tí sín judío. ⁸ Tí Dios tsík'etuñhen ch'ín Pedro ts'óna apóstol tsjákoḥe ch'án tí sín judío la ko kjaxin tsík'etuanna ch'án ts'óna apóstol tsjákoḥa tí sín jehya judío.

⁹ Méxra ch'ín Jacobo la ko ch'ín Pedro la ko ch'ín Juan, mé tí sín t'etoan kuènte nínko, mé kjuátsoan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xra la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjákoḥeni tí sín jehya judío la jehe sín nachrohe tsjákoḥe sín tí sín judío. ¹⁰ Jehó k'uetuan sín kixin tsoxraxinkaonni la ko tsotjuèheni tí sín nòla la xráxín tóxakonhenni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquía

¹¹ A ntá tió kjuíji ch'ín Pedro chjasin Antioquía la kjuentuáha ch'án kixin ntoáhya kjuích'e ch'án. ¹² Senó k'uékjineko ch'án iso chojni kjónté jehya sín judío. Ntá ikui iso sín kuixín tí tjen ch'ín Jacobo. A ntá kjuankixin k'uaxrjenta ch'án la kuítóhe kjónekohya ch'án tí sín jehya judío a. Xikaha kjuích'e ch'án kixin chrakonhen tí sín kui kixin tí sín neko ch'án naxa tsíkahya sín xroye. ¹³ Tí iso sín kíchó ni judío kjaxin kuítekakonhen sín tí ch'ín Pedro kjónté ntoáhya kjuenkayáxín ch'án. Kjaxin ch'ín Bernabé la kjuacha kjuachroe sín ch'án kixin tí nkehe ntoáhya kjuích'e sín. ¹⁴ A ntá tió k'uíkuñ kixin tí nkehe kjuakoxín sín la tóyóehya tí chrónka tí tan jina tsaáxinni tjako sín la ntá níxjaha tí ch'ín Pedro nkayakon kaín tí sín tsíkójnkotsé. Ntáxrjan kixin: “Jaha mé ijnko chojni judío la kjónté itjen éxí jehya ijnko chojni judío. ¿A ntá kuènte tétuñhén tí sín jehya judío kixin chrók'uejó sín éxí chrókóyóhe tí sín judío?”

Tí sín judío la ko tí sín jehya judío la jnkokón tsaá sín kixin chóna sín fe

¹⁵ Jeheni la k'uaxrjeníxinni chojni judío desde tí kokjéxinni la jeheni na chónahyani jie éxí tí í so chojni chónhya Dios. ¹⁶ Kjónté xikaha la ó noheni kixin tsotjuáxinhya ijie chojni tí nkehe tsík'etoan ch'ín Moisés. Jehó tí sín tinkáchónki

Jesucristo mé tsotjóá ijié sín. Méxra kjaxinni tinkáchónkini Jesucristo kixin tjinkaonni sinchetjóá ch'án ijiéni kixin titekaonni ch'án. Méxra ninkexró tsjachahya tsotjuáxin ijié sín kixin chrókuinchexiteyéhe sín tí nkehe t'etoan tí ley.

¹⁷ Tí tjinkaonni tinkáchónkini Cristo kixin tsotjuáxin ijiéni, a ntá jeheni kjaxin xraxinkaonni kixin ó kjuasinni jie. A ntá í jehya Cristo k'uetoan kixin chrókjuasinni jie. Kjá chaxín náhí. ¹⁸ Tí kuítóheni tí ley la ntá naxa chrókjanni chrókuinkáchónkini tí ley inaá la tíha la ó jie kuènteni tíha. ¹⁹ A ntá tí ley la kjuanchia jie k'uénxian. A ntá ijie la tjéchuán kixin tinkachónkia Dios. ²⁰ Janhan la ó tsík'en kixin ó k'uénkian Cristo. A ntá ijie la janhya tjéchuán. Cristo mé tjechónxin tí janhan. La ntá jie la tjéchonxian tí cuerpo chonta kixin tinkachónkia tí Xjeen Dios kixin jehe ch'án la tjuana ch'án la k'uenyákonhenni ch'án. ²¹ Tjínkakhonhya tsjanoá tí kjuasáyé Dios. Tí chrókótjuáxin ijié chojni tí ley tsík'etoan ch'ín Moisés, a ntá ó chónkó ik'uén Cristo tí xikaha.

3

Tí ley o tí fe

¹ Jahará kichó ni gálatas imá lontirá. ¿Nkexro kjuít'ayahará? Kixin tí nkehe kjuákoahará mé kuinhínrá kixin Cristo k'uénxín tí ntacruz k'uenyákonhenni ch'án. ² Jnkokoá nkehe tjínkavan chrókjuateherá. ¿Á k'uayèxínrá Nchakuen Dios kixin kuítekáonrá tí nkehe tsík'etoan ch'ín Moisés o á k'uayèxínrá Nchakuen Dios kixin kuítekáonrá tí tan chrónkani kuinhínrá? ³ Imá lontirá jahará. Tí kjuankíxixínrá la kuítekáonrá kjuachaxién Nchakuen Dios. A ntá jie la tjínkáonrá jahóra sinchekjintaxínrá tí xra. ⁴ ¿Á chónkó kaín tí nkehe tsík'atsínkará? Kjá chrókjuinkitsa chrókjuich'e xra tíha. Jehya chónkó tí nkehe kjuasótiaxínrá. ⁵ ¿Nkekuènté kjuanjon Dios tí Nchakuen ch'án la ko kjuasin ch'án kjuaxroan k'uíkonrá? Jehya k'uayèxínrá tíha kixin kuítekáonrá tí nkehe tsík'etoan tí ley. Náhí. K'uayèxínrá tí nkehe kixin kuinkachónkirá tí tan kuinhínrá.

⁶ Ch'ín Abraham kuítekaon tí nkehe k'uetoan Dios ntá Dios k'uíkon kixin jína ch'án. ⁷ Méxra chrókónohará jahará kixin tí sín chaxín tikínixin sín ch'ín Abraham a mé tí sín a chaxín tinkáchónki Dios. ⁸ Tí xroon itén Dios mé chrónka kixin tí sín jehya judío mé sinchetjóá Dios ijié sín kixin tsinkáchónki sín ch'án. Mé xikaha Dios mé chénka ch'ín Abraham ósé tí tan jína, ntáchro ch'án kixin: “Ijnko nkexro ts'axrjeníxin tí jaha mé tsoyaonxín kaín nación.”* ⁹ Mé xikaha kjaxin kaín sín tinkáchónki Dios mé tsoyaon sín jnkokón éxí kóyaon ch'ín Abraham kixin kuítekaon ch'án.

¹⁰ Kaín sín jehó tinkáchónki tí nkehe tsík'etoan ch'ín Moisés la tsjasóte sín kixin ntáchro xroon itén Dios kixin: “Tsjasóte kaín tí sín tsjachahya sinchexiteyéhe tí nkehe tsík'etoan tí xroon chónka ley.”† ¹¹ Ntá ó ntoá ntáchro kixin kohya nkexro tsotjuáxin ijié sín tí tsitekaon sín tí ley. Xroon itén Dios ntáchro kixin: “Tí nkexro tsíkótjóá la tjejóchónxin sín kixin tinkáchónki sín Dios.”‡ ¹² Ntá tí chrókuinkáchónkini tí ley tsík'etoan ch'ín Moisés la chrókuinkáchónkihyani Cristo. Ntáchro xroon itén Dios kixin: “Tí nkexro sinchexiteyá tí ley la táhó chrók'uejóchónxin sín.”§

¹³ A ntá Cristo kjuatsen ch'án kaín tí chrókjuasótexinni tí ley. Tí náhí la chrókjuasóteni kixin chrókjuachahyani sinchexiteyéheni tí ley. Jehe ch'án kjuenka ch'án tí ijiéni kixin k'uenyákonhenni ch'án. Ntáchro xroon itén Dios kixin: “Kaín tí chojni chónka jie ts'ejótjian sín injnko nta ntá its'en la mé xikaha

* 3:8 Génesis 12.3 † 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5

k'uáyéhe sín tí kjuanínkaon kuènte Dios.”* Mé xíkaha k'uíkon sín tí ch'ín Jesús. ¹⁴ Mé xíkaha kónhen kixin ntá tí nkehe chénka Dios tí ch'ín Abraham senó mé ts'áyéhe tí sín jehya judío kixin kjuachaxién Cristo Jesús. Ntá xíkaha kaín ni ts'áyéhe ní Nchakuen Dios kixin tinkáchónkini ch'án mé xíkaha tsíntáchro ch'án.

Tí ley la ko tí nkehe kjuanjon Dios

¹⁵ Kíchóni, tíhi mé sɪntayóaxian kuènte chojni ó. Tió ijnko chojni ch'éna ijnko xroon tsochónta firma kuènte sín la ntá xitjahya ts'óxíka í jnko nkexro la xitjahya í jnko nkexro sich'éna í so nkehe. ¹⁶ A ntá Dios mé tsíkjo ch'án tí ch'ín Abraham kixin tsjanjon ch'án nkehe ts'áyéhe tí nkexro ts'axrjeníxin ch'án. Tí xroon itén Dios ntáchrohya kixin kaín nkexro ts'axrjeníxin ch'ín Abraham chrók'uáyéhe tíha. Náhí. Ntáchro kixin ts'áyéhe jnkokoá nkexro ts'axrjeníxin ch'án la mé Cristo tíha.† ¹⁷ Méxra xrxanka tíhi. Dios chénka tí ch'ín Abraham ijnko nkehe chaxín la tsoxiteyá tíha kixin éxí yóhe ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uéchrónka ch'ín Moisés. La ntá kjónté xíkaha la xitjahya tsoxíka tí nkehe tsíchrónka Dios o tsontáchro chojni kixin tjetoanhya tí nkehe tsíntáchro ch'án.‡ ¹⁸ Tí chrókjuanjon Dios nkehe kixin chrókjuinchexiteyáni tí nkehe k'uetoan tí ley la ntá tí nkehe tsíntáchro Dios senó mé chróxiteyáhya. A ntá Dios mé tsíchénka ch'ín Abraham kixin sinchekitonhen ch'ín Abraham tí nkehe kjuasáyé ch'án.

¹⁹ ¿A ntá xíkaha la nkehe tsonhen tí ley tsík'etoan ch'ín Moisés? Chr'éxin kjuanjon Dios tí ley kixin tsonoexínni nkehe tí jie tjasinni. K'uetoan Dios sinchexiteyéhe chojni tí nkehe tsík'etoan ch'ín Moisés tsijia tí nkexro ts'axrjeníxin ch'ín Abraham, mé tí nkexro kjueyá Dios kixin xíkaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án. ²⁰ A ntá tí nixjehe Dios tí ch'ín Abraham la jehó ch'án la ko jehó Dios la méxra t'ichjánxinhya í jnko nkexro.

Tí xra kuènte tí ley

²¹ ¿A ntá á chrók'uaxrjexín kixin tí ley tsík'etoan ch'ín Moisés chrókjuanjonko tí nkehe tsjanjon Dios? Kjá náhí. Tí chrók'uixin ijnko ley chrókjuanjon kjuachón la ntá chrókótjuáxin ijieni tí chrókuitekaonni tí nkehe t'etoan tí ley. ²² A ntá tsíntáchro xroon itén Dios kixin tí jie mé t'etuennen kaín xín chojni kixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchrónka Dios.

²³ A ntá tí naxa kuihya Cristo la ntá tí ley la k'uetuennen kaín ni la k'uejóchónhenni kixin chrókónoxín tí nkehe chrókuinkáchónkini. ²⁴ Tí ley la éxí ijnko maestro kuènte chánjan k'uetoan. A ntá jie ikui Cristo la jehe ch'án mé kótjuáxinni ch'án kixin titekaonni ch'án. ²⁵ A ntá ijie ó titekaonni Cristo la í nchexiteyèhyani kaín tí nkehe t'etoan tí ley.

²⁶ A ntá jahará ó k'onará xjeen Dios kixin ó tinkáchónkirá Jesucristo. ²⁷ Kaínra kuíkítiaxínra kjuachaxién Cristo mé xíkaha jehe ch'án kótjuáxinra ch'án. ²⁸ A ntá jehya tjetoan á chojni judío o á chojni jehya judío o á chojni ch'exón xra o á chojni t'etoan o á chojni ntoá o á chojni chjin. Kaínni la ó k'onani jnkokoá kixin tinkáchónkini Cristo. ²⁹ A ntá tí tinkáchónkini Cristo chaxín la ntá tí xíkaha ó chaxín tsík'axrjeníxinni ch'ín Abraham la ts'áyéhe ní tí nkehe tsíchrónka Dios.

4

¹ Mé xíkaha ntáxrjan tíhi. A ntá ijnko chánjan tió chrók'uen tí it'é ntá chrókuitoeko tí nkehe kuènte tí it'é la jehe ch'án la tóyóhó ijnko nkexro ch'exón

* 3:13 Deuteronomio 21.23 † 3:16 Génesis 12.7 ‡ 3:17 Éxodo 12.40

xra kixin tí jehe la xitjahya t'etoan xra kjónté chaxín kuènte ch'án kaín tí nkehe a. ² Siín nkexro t'ayakonhen ch'án la t'etoan tí xra kuènte ch'án tsjixrakájia tí yaon tsíntáchro tí it'é. ³ Mé xikaha kónhen tí jeheni. Kixin tí naxa k'uéchánjanni la kuítekaonni kaín tí nkehe kuènte chjasintajni. ⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxin ch'án ijnko chojni chjin. La kjuínchexiteyá ch'án kaín tí nkehe tsík'etoan tí ley kuènte Moisés. ⁵ Ikui ch'án xikaha kixin tsaáxinni ch'án kjónté senó k'uék'etuñhenni tí ley. A ntá jie la chrók'uáyéhe Dios tí jeheni éxí xjeen ch'án.

⁶ A ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochónta asénni la tí Nchakuen ch'án mé t'èyaxín: "It'éni jaha mé kuéntá tí jeheni." ⁷ Méxra xikaha jahará la jehya ijnko nkexro ch'exón xra. Náhi. Jahará mé xjeen Dios. Jahará mé xjeen ch'án la jehe ch'án tjinkaon sinchekitonhanrá tí nkehe kuènte ch'án kixin tinkachónkirá Cristo.

Ch'ín Pablo tóxakonhen ch'án kixin tí sín tinkáchónki Ìnchéni

⁸ Ósé la jahará k'uéchonhyará Dios la kjuínchexiteyéhérá tí dios chaxínhya. ⁹ A ntá ijie la ó choxínrá Dios, o íchá jína chróntáchroni kixin Dios la ó chóxin ch'án tí jahará. A ntá jehya jína kixin naxa chrókuinkachónkirá inaá tí nkehe chóntahya kjuachaxin la ko tí nkehe chónkó kixin tí xikaha naxa chrókjuínchexiteyéhérá tí nkehe tinkáchónki chojni. ¹⁰ A ntá jahará la tjásinrá kia ichrén tí yaon la ko tí nitjó la ko tí yaon kia tí nánó. ¹¹ Imá tóxakonna kixin á chónkó tí xra kjuít'a kjuákohará.

¹² Kíchóni, xrjanóahará kixin chrókóyóhará éxí tí janhan kixin janhan mé tóyóhe éxí k'uejorá senó kixin t'etuñhyani tí ley. Janhan la tékahyará ninkehó jie. ¹³ Ó nohará kixin tió saxín kjuákohará tí tan tsaáxinni la k'uétsankahyana kixin k'uénina k'uéchonta ijnko chin k'uékjínchekjoténa. ¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxí chrók'uayéhérá ijnko ángel kuènte Dios o éxí chrók'uayéhérá jehe Ìnchéni Jesucristo mé xikaha kjuak'é jína ntiha. ¹⁵ ¿Nkehe kónhen tí kjuachéhe k'uéchontará? Kixin ntáxrjan kixin jína tí jahará kixin tjinkáonrá kjónté ikonrá chrókuakítsjerá chróchjinará tí janhan. ¹⁶ A ntá ijie la, ¿á ninkákònnará jehó kixin kuinhínrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuítóhérá tí jeheni kixin ntá tjinkaon sín kixin jahará chróchréhérá tí jehe sín. ¹⁸ Jína chrókótjinkáonrá tí í so sín kjánchó ntoá chrókjuenkayáxinrá kixin jehya tí chrókjuak'é tí tjejorá ó chrókuítekáonrá jína. ¹⁹ T'ikonna tí jahará éxí xjeenni. Ijie la imá kjuíncheníhi asenná kixin tóxakonna tí jahará. Éxí yóhe ijnko iné xjan tsjoté tjan tió sinchekokjíhi tjan xjeen tjan mé xikaha janhan la naxa tsjasótena kixin tjínkavan kixin Cristo chrókjuínchetjóá tí jahará. ²⁰ Chrókójina ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

²¹ A ntá jie chonkará nkehe. Jahará naxa tjinkáonrá chrókjuínchexiteyéhérá tí ley tsík'etoan ch'ín Moisés la ¿á kuiénhyará nkehe chro tí ley? ²² Ntáchro kixin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuñhya.* ²³ Tí xjeen tjan ch'exón xra kokjíhi ch'án éxí tokjíhi chojni ó.

* 4:22 Génesis 16.15; 21.2

A ntá tí xjeen tí tjan t'ítuenhya la mé ó kokjíhi ch'án kixin tsoxiteyá tí nkehe tsintáchro Dios. ²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etoan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxí chojni ch'exón xra tí jehe sín kixin t'ítuenhen sín. ²⁵ Mé xikaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kixin tí chjasin la ko tí sín tjejó ntiha la mé t'ítuenhen sín la ko kaín xjeen sín. ²⁶ A ntá tí chjasin Jerusalén itjen nkaya nkajni la mé t'ítuenhya. Náhi. Mé jeheni la kuènteni tíha. ²⁷ Ntáchro xroon itén Dios kixin: Jaha chojni chjin chontahya chánjan kjónté chrokócháha. Jaha k'uikonhya ninkehó kjuatjoté kixin kjuinçekokjéhya xjan la kjónté chrokócháha.

Tí tjan kuítsinkehe na mé nchónhya ìnté tjan ts'ikon tjan, a ntá tí tjan kjuák'eko xii tjan la kánhyó ts'ikon.†

²⁸ Kíchóni jeheni la éxí yóhèni ch'ín Isaac kixin kaín ni la xjeen Dios kixin xikaha tsintáchro ch'án. ²⁹ A ntá éxí senó tí xjan kokjíhi éxí tokjíhi chojni ó la jehe ch'án k'uéchónkíhi ch'án tí xjan kokjéxín kjuachaxién Nchakuen Dios. Mé xikaha kjaxin sitónhen jie. ³⁰ A ntá ntáchro tí xroon itén Dios kixin: “Tétuènhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsitónhen tí xjeen tí tjan t'ítuenhya.”‡ ³¹ Méxra kichó ni, kaín ni la jehya xjeen ijnko tjan ch'exón xra. Náhi. Jeheni mé xjeen tí tjan t'ítuenhya.

5

Jína chrók'uejorá kixin kuaáxinrá

¹ Cristo mé kuaáxinni la ntá ó tí ley la t'etuènyani. Méxra jína chrók'uayakonhénra tí nkehe kuaáxinrá la í chrókjanhyará chrók'ónará chojni t'ítuenhen ínaá.

² Tinhíra, janhan Pablo mé ntáxrjan kixin tí chrókuará tí xroye a ntá ó chónkó chrókuinkachónkirá Cristo. ³ Tjínkavan tsoxrjanka ínaá kixin tí jnkojín nkexro ita tí xroye la jehe ch'án mé t'ichjánxin sinchexiteyéhe ch'án kaín tí ley tsíkjín ch'ín Moisés. ⁴ A nta jahará la xritjéyará tsotjuáxin ijjará kixin sinchexiteyéhéra tí ley la ntá ó kuítóhéra Cristo la ko ó kuítóhéra tí kjuasáyé Dios tjuahará. ⁵ A ntá jeheni la tinkáchónkini Cristo la chóntani Nchakuen Dios la ntá tjejóchónhenni kixin tsjintaxín tsotjóá ijieni. ⁶ Jeheni mé tinkáchónkini Jesucristo la ntá kánhyó tjetooan tí xroye. Antsí tjetooan chrókuinkáchónkini Ìnchéni la ntá tí tinkáchónkini Ìnchéni la chrótjuèhèni kichó ni.

⁷ Jahará la jína kjuankíxinrá tinkachónkirá Ìnchéni. ¿A ntá nkexro k'ueŋtoan kixin chrókuítóhéra tí nkehe chaxín? ⁸ Jehya nkehe kuènte Dios tí tjejóch'era méhe. Méxra jehe ch'án la kjueyará ch'án. ⁹ Ntáchro sín kixin tí ch'o t'óna niotja tsjiko intsíkoá tí xroan nchek'ánkí niotja, a ntá ts'ánkí kaín tí ch'o. ¹⁰ A ntá janhan tinkachónkia Ìnchéni la ko ó nòna kixin jahará kjaxin tinkachónkirá ch'án la kjá í chrókuenkayáxinhyará í jnko nkehe. A ntá Dios mé sinchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

¹¹ Kíchóni, tí naxa chrókuétoan chrókua chojni xroye la ntá tí sín judío chrókónínkakonnahya sín. Tí xikaha la chrók'uántaxiènyha sín tí tan jína chrónka nkexrí k'uènxín Cristo tí ntacruz. ¹² Méxra tí sín ntaxakonhanrá la t'etoan sín itsará xroye la íchá jína naá chrók'uátsínkó chrókóchrít'o sín kaín.

¹³ Jahará kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhi. Chrókuinkitsani kichó ni la ko chrótjuèhèni kichó ni. ¹⁴ Mé xikaha tí ley mé t'axrjéxín kixin:

† 4:27 Isaías 54.1 ‡ 4:30 Génesis 21.10

“Chrótjuèhérá kíchuára éxí tjuèxinrá asánrá.”* 15 A ntá tí chrókjóntehérá kíchuára la ko chrókjónterá kíchuára la ntá chrókóxakonhanrá kíxin tí xíkaha la chrókuinçek'itjáyanrá kíchuára.

Tí jie chrókuasin chojni la ko tí nkehe t'etoan Nchakuen Dios

16 A ntá ntáxrjan kíxin chrók'uejorá éxí tjinkaon Nchakuen Dios, a ntá chrókuéyáhyará tí nkehe jínahya chrókjuenkayáxinrá. 17 A ntá tí nkehe jínahya tjenkayáxinrá la tjanjonko Nchakuen Dios kíxin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kíchó. Méxra jahará la xitjahya ch'erá tí nkehe tjinkáonrá chrókuich'erá. 18 A ntá tí Nchakuen Dios tjetjinkitsará, a ntá jehya tí ley t'etuanhanrá jie.

19 Xrahya ts'ikonna tí jie tjasin chojni jínahya tjenkayáxin. Mé tíha la tí sín tjasinko jie chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin, 20 la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni nínkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjinkaon jehó tsochóna itsjé nkehe, la ko tí chojni tjinkaon ts'axrjenta, la ko tí chojni t'óxika kíchó, 21 la ko tí chojni chjinoxínhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóhe xíkaha. Na mé éxí yóhe senó mé k'uétjonkará la ko ijie la xíkaha tjetjonkará inaá kíxin tí nkexro xíkaha tinkákjasin jie mé xitjahya ts'áyéhe sín tí kjuachaxin kuènte Dios.

22 A ntá tió chóntani Nchakuen Dios ntá tsotjuèheni kíchó ni, la ko tsochéheni, la ko kjuaxróxin ts'ejóni, la ko tsochónhenni tsonínkakonhyani, la ko jnkójina ts'ejókoni kíchó ni, la ko nchexiteyáni jnkójina. 23 La ko tsohnkehyan, la ko ts'etuenhenni asénni kíxin tsjasinhyani jie. Kohya nijnko ley chrókuinçekjasóteni kíxin tí jína chrók'uejóni xíkaha. 24 Mé tí chojni tinkáchónki Jesucristo la kaín jie k'uéchóna sín la ko tí jínahya k'uékjenkayáxin sín la ó kjuenka Ìnchéni kjuák'enkáni ch'án ntacruz. 25 A ntá tí tjejókoní Nchakuen Dios t'ichjánxin tsítóheni kíxin Nchakuen Dios ts'etuenhenni.

26 Méxra chrókuinčeknkehyan la ko chrókuachaxinhyani kíchó ni la ko chrókóchjinoxíenhyani.

6

Tjinkitsará kíchuára

1 Kíchóni, a ntá tí chrók'uíkonrá jnkójín nkexro kjuasin ichrén jie a ntá tí jahará tí chaxín chontará Nchakuen Dios la chrókuéntuéhérá sín la chrókuínkitsará sín. A ntá jnkójina chrónixjehérá sín, a ntá jahará la chrókóxakonhanrá kíxin xíkahya chrókónhanrá chrókuásinrá jie kjaxin. 2 Tsjínkitsará kíchuára kíxin jóhya tsamará tí nkehe ye. Kíxin tí xíkaha la ó chrókuinčekxiteyáni tí nkehe t'etoan Cristo.

3 Ntá jnkójín nkexro ntáchro kíxin imá tjetotan tí jehe ch'án la chaxínhya tíha la jehó ch'iyéhe asén. 4 Jnkójnko chojni chróxraxinkaon á nchoxon tjenkayáxin la chrókónohe kíxin ó nchoxon la jehya jehó chrókuikosáyehe asén. Náhi. Chrókuikosáyehe í so chojni. 5 Kíxin jnkójnko chojni yámá tí jie kuènte.

6 Tí nkexro xrakohe tí tan jína la chrókuinkitsa sín chrókjuanjon sín nkehe chrók'uáyéhe tí nkexro tjako.

7 Sich'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá. 8 Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí

* 5:14 Levítico 19.18

kjuachón jnkochrín ts'áyéhe sín. ⁹ Mé xíkaha chrókóxrjéhyani chrókjuich'eni kaín nkehe jína kixin tí tsoxrjéhyani la ntá chaxín tsjixraká tí yaon tsjachani ts'áyéhe ni tí nkehe jína. ¹⁰ Méxra xíkaha xráxín chrókjuich'eni nkehe jína la antsí t'ichjánxín chrókjuinkítsani tí sín kichó ni tinkáchónki Ìnchéni.

Ch'ín Pablo nchexraxinkaon tí sín ntiha la ko kjuixixín nixja ch'án

¹¹ Tsjehérá kixin imá ihyé tí letra tjékjinxian tjaná. ¹² Tí sín tjinkaon ts'etuánhanrá kixin chrókuará xroye la jehí tjinkaon sín tsjikosáyehé sín chojni la tjinkakonhya sín kixin chrókjuasótexín sín tí ntacruz kuènte Cristo. ¹³ Kjónté tí sín tsíka xroye la nchexiteyáhya sín kaín tí nkehe t'etóan tí ley. A ntá tjinkaon sín kixin chrókuará xroye kixin ntá kjaxin sín tsohnke sín kixin tsontáchro sín kixin jahará kjaxinrá tjinkáonrá tsochontará xroye tí cuerpo kuèntará. ¹⁴ A ntá janhan mé tóxrjínahya sñtahnke ninkehó. Íchá jína chróntáxrjan kixin Cristo k'uenyákonhenni. A ntá xíkaha k'uénxín Cristo tí ntacruz la ntá tí nkehe k'uék'etóan kuènte chjasintajni la kjaxin k'uitjáyán la ko janhan kjaxin kuitóhā tí nkehe kuènte chjasintajni. ¹⁵ La ntá ninkehó sínkíhya á tsíka chojni xroye o náhi. Tí nkehe sínkí la chrók'ónani ijnko chojni nixin. ¹⁶ A ntá tí sín ts'áyéhe kjuaxróxin kixin kuikonóehé Dios tí jehe sín la mé kaín tí sín kuítekaon tí nkehe t'etóan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkakonhya kixin chrók'uekana jie ninkexró. Janhan mé chaxín chonta tí tsíkatsqenxín tsíchrit'ó cuerpo kuèntana kixin kjuasótexinna kixin kjuít'ahā xra Ìnchéni Jesús.

¹⁸ Kichóni tjáncháha Ìnchéni Jesucristo kixin kjuasáyé ch'án chrókjuincheyaon ch'án kaín rá. Mé xíkaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí nínko chjasin Éfeso

¹ Janhan Pablo tsíkjeýána Jesucristo kixin xíkaha tjinkaon Dios tsjàkua itén ch'án. Janhan mé ikjian tí xroon chr'anhánra tí jahará tjejorá chjasin Éfeso tinkachónkirá Dios la ko titekáonra Cristo Jesús. ² Tjétjáncháha It'eni Dios la ko Ìnchéni Jesucristo kixin kjuasáyé ch'án chrókjuintayaonra ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xíkaha jehe ch'án mé kjuíncheyaonni ch'án kixin kaín nkehe jína tixín nkaya nkajní kjuanjon ch'án. ⁴ Dios mé kjueyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án. ⁵ Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xíkaha tsíkjenkayáxin ch'án kixin xíkaha kóxrjínhin ch'án. ⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án. ⁷ Imá tjuèhe Dios tí jeheni la xíkaha kuaáxinni ijnié tí Xjeen ch'án k'uítji la xíkaha tsjixín kaín ijieni. ⁸ Dios kjuakoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuiénxinni jína la ko kjuanjon ch'án kjuaxrexinkaon jína. ⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjínhin ch'án tsoxiteyá. ¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjon kjuachaxin kixin Jesucristo ts'etuenhen ch'án kaín xín nkehe siín nkaya nkajní la ko chjasintajni.

¹¹ Dios kjueyáni kixin chrókuinkáchónkini Cristo la ntá xíkaha chrók'uáyéheni tí nkehe tsík'áyéhe ch'án. Kaín tíha la mé xíkaha tsonhen éxí tóxrjínhin Dios. ¹² Mé xíkaha kjuích'e ch'án kixin ntá jeheni kuítekaonni Cristo saoxín chrók'uejóni chrókjuancheheni kjuasáya Dios kixin tí kjuachaxin jie chóna ch'án. ¹³ A ntá kjaxin jahará ó kuinhínra tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xíkaha ó xiteyá tí nkehe tsíntáchro ch'án. ¹⁴ Tí Nchakuen Dios kuítónhenni mé kjuínchenoexinni Dios kixin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xíkaha kaín ni tsjancheheni kjuasáyé ch'án kixin tí kjuachaxin jie chóna ch'án.

Ch'ín Pablo kjuanchehe Dios kixin antsí chrókónohe tí sín tinkáchónki Ìnchéni

¹⁵ Méxra ó kuínhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios. ¹⁶ Ntá janhan nunca tituahya nixjahá Dios tjáncháha kjuasáya kixin ó tinkachónkirá ch'án. ¹⁷ Tjéníxjahá Dios, mé jehe ch'án mé ichr'án Ìnchéni Jesucristo, mé It'eni imá tjetoan la tjétjáncháha ch'án kixin tsotjáhará ch'án kjuaxrexinkaon jína kuènte Nchakuen ch'án kixin ntá antsí chrókuiénxinra jína tí nkehe kuènte ch'án kixin ntá antsí má chróchoxínra ch'án. ¹⁸ Kjaxin tjétjáncháha Dios kixin tsjinkitsa ch'án tsjanjon ch'án ijnko kjuaxrexinkaon jína kixin ntá tsonohará ts'ejochonhérra

kixin xikaha kjueyará ch'án. La ko tsonohará kixin imá tjetōan tí nkehe sinchekitonhenni ch'án kixin jeheni mé tinkáchónkini ch'án. ¹⁹ La ko kjaxin tjetjáncháha Dios tsinkitsará ch'án tsonohará kixin tí kjuachaxin kuente ch'án mé ijnko nkehe imá jié noehyani nketí kjuèxín. Tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chóntani la ko tí kjuachaxin imá jié kjuakoxin ch'án ²⁰ tió kjuínchexechón ch'án Cristo. Ntá Cristo sákjuí kjuák'etjaxin ch'án tja chjina tí It'é ch'án itjen nkaya nkajní. ²¹ Mé xikaha kjuanjon Dios kjuachaxin kixin Cristo ts'etuenhen ch'án kaín xín gobierno la ko kaín tí sín t'etōan. Ijie tjet'etuenhen ch'án kaín xín nkehe siín chjasintajni la ko chr'éxin ts'etōan ch'án kjaxin. ²² Cristo k'uáyéhe ch'án kjuachaxin ts'etuenhen kaín xín nkehe siín. Jehe ch'án mé ts'etuenhen kaín tí sín k'óna ninkoé ch'án. ²³ Tí ninko mé éxí tí cuerpo kuente ch'án la jehó ch'án mé t'etuenhen ch'án. Jehó ch'án mé kuente ch'án kaín xín nkehe siín.

2

Kuaáxinni kjuachaxién Dios

¹ La ntá ijie Dios mé kjuínchekitonhanrá tí kjuachón jnkochrín kixin tinkachónkirá Cristo. Senó la jahará la éxí tsík'enrá kixin tí jínahya k'uékjich'erá la ko tí jie k'uékjasinrá. ² Mé xikaha k'uéchréhérá éxí sitónhen chjasintajni. K'uékjinchexiteyéherá éxí tóxrjínhin tí nchakuen jínahya t'etuenhen tí xrintō la ko t'etuenhen kaín xín tí chojni titekakuenhya Dios. ³ Kaínni xikaha k'uék'ejóni tí ósé a naxa kjuínchexiteyéheni tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchóntani. A ntá tí naxa xikahó chrókjuich'eni la Dios imá chrókjuinchekjasóteni éxí tsjasóte tí í so sín. ⁴ A ntá Dios mé imá kuikonóeheni ch'án la ko imá tjuèheni ch'án. ⁵ La ntá kjuanjon ch'án tí kjuachón éxí chóna Cristo. Jeheni la éxí chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxinrá ch'án. ⁶ Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajní. ⁷ Mé xikaha kjuích'e ch'án kjuakoxin ch'án la naxa tjetjakoxin ch'án kixin tjuèheni ch'án la ko kjuínkitsani ch'án kixin tinkáchónkini Cristo Jesús. ⁸ Kjuasáyé Dios kixin kuaáxinrá ch'án kixin tinkachónkirá ch'án kixin táha la jehya jahórá k'uitjará tíha. Náhi. Táha la mé kjuasáyé Dios kixin tjáhará ch'án. ⁹ Kixin jehya ichrén nkehe jína kjuích'eni kixin chrókjuinchehnkexínni. ¹⁰ Dios mé kjuích'éna tí jeheni ntá chr'éxin kjuínkítsa ch'án kixin tsinkáchónkini Cristo Jesús, kixin ntá chrókjuich'eni tí xra jína kixin xikaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

¹¹ Méxra jahará la jehya chojni judiórá. Mé tí sín judío ntak'inrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuente sín, mé nchek'in sín asén sín tí chojni chóna xroye. ¹² Xráxinkáonrá kixin tí senó la k'úechonhyará Cristo. Jahará la jehya kuente tí nación Israel la xikaha k'úechonhyará tí nkehe tsík'etōan Dios la ko tí nkehe tsintáchro ch'án tsjanjon ch'án. Mé xikaha k'uék'ejorá la k'úechonhyará Dios la k'úechoénhyará kixin chrókuaará. ¹³ La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'uíti ijnié ch'án. ¹⁴ Jehe Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókjuenkayáxin sín kixin k'óna éxí jnkokoá chjasin. Cristo k'óxika ch'án tí kjuanínkaon éxí ijnko tjat'ō k'uinkákonhen. ¹⁵ Jehe ch'án kjuasóte ch'án, la kjuatsen ch'án tí ley. Tí iyó chjasin k'uéjó kjuích'éna ch'án jnkokoá chjasin nixin kixin tinkáchónki sín

ch'án. Mé xikaha kjuanjon ch'án kjuaxróxin. ¹⁶ Mé xikaha k'uenyákonhenni ch'án k'uenxín ch'án tí ntacruz la kjuakjìn ch'án tí kjuanínkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxi jnkokoá cuerpo kuènte ch'án.

¹⁷ Cristo mé ikui la kjuakohe ch'án kaín chojni tí tan jína kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uéjé. ¹⁸ A ntá kjuachaxin kuènte Cristo la kaín ni kjónté jeheni o í so chojni mé tsochjineheni It'eni Dios kixin jnkokoá k'uáyéheni Nchakuen ch'án. ¹⁹ A ntá jahará la í tóyóahyará chojni tsíkjinín ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án. ²⁰ Jahará la mé tsík'ónará ijnko nchia tjat'o jíe k'óna chrítaón tí xro k'uejo tí sín kjueyá Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xro imá t'etoan kuènte tí tjat'o a. ²¹ Tí xrankíxixín mé Cristo la chrítaón k'óna kuenté nchia la tinkák'ánkí tí nchia kixin jína tsjak'e, ntá tsjixraká kixin ts'óna ijnko nínko tjóá kuènte Ìnchéni. ²² Mé xikaha jahará tinkachónkirá Cristo la tsojnkotsérá kaín rá ts'óna éxi ijnko nchia kuènte Dios la ntaha tsjak'exenhen tí Nchakuen ch'án.

3

Ch'ín Pablo k'uáyéhe ch'án tí xra tsjakohe ch'án tí sín jehya judío tí tan jína

¹ Mé xikaha janhan Pablo mé tjéchinaxián tí tjákua itén Cristo Jesús kixin jína ts'ejorá kjónté jehya chojni judío tí jahará. ² Chrókónohará kixin kjuasáyé Dios kjuanjon ch'án tí xra k'uayáha kixin tsjakoará. ³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijnko xroon kánhyó tsjé nixja k'uayéherá. ⁴ Tió sijnchekuáxinrá tíha ntá tsonohará kixin ó nóna tí nkehe kuènte Cristo ninkexró k'uénoehya. ⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xra la ko tí sín chrónka itén ch'án. ⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxi ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

⁷ Janhan k'uékítekakonhya, a ntá jie kjuasáyé Dios kjuanjon ch'án tí xra i sít'a kixin tsjákua tí itén ch'án kixin tí kjuachaxin kuènte ch'án. ⁸ Janhan mé kánhyó tjetoan kixin janhan la imá intsína la kaín tí í so sín tsíkjinchetjóá Dios la antsí tjetoan sín. Kjónté la Dios mé kjuínchekitonna tí xra imá tjetoan kixin tsotjanka tí sín jehya sín judío tí tan jína nkexrí imá tjetoan tí nkehe kuènte Cristo. ⁹ La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuích'éna ch'án kaín xín nkehe. ¹⁰ Mé xikaha kónhen kixin ntá tí sín kuènte nínko tsjakuexin sín kaín xín tí sín t'etoan nkaya nkajní kixin tsonohe sín kixin xikaha kaín nkehe jína tsíkjenkayáxin Dios. ¹¹ Kaín tíha kjuích'e Dios éxi tsíkjenkayáxin ch'án ntá Ìnchéni Jesucristo la ó kjuínchexiteyá tíha. ¹² Kjuasáyé Cristo ntá ó chóntani kjuachaxin tsochjineheni Dios kixin tinkáchónkini ch'án. ¹³ Méxra xrjanóahará kixin chrókuítóéhyará chrókuinkachónkirá ch'án kjónté tjétjasótena kixin kaín tíha kónhen kixin jahará chrók'uejoxinrá jína.

Cristo imá tjuèheni

14 Méxra xikaha tjak'éxian tóch'ian nkayakon It'é Ìnchéni Jesucristo. 15 Mé tsík'áyéhe ihnié Dios kaín xín chojni tinkáchónki ch'án mé tí sín siín nkaya nkajní la ko tí sín siín chjasintajni. 16 Tjáncháha It'eni kixin tsjanjon kjuachaxin kuènte ch'án ts'ayéhérá kjuachaxién Nchakuen ch'án 17 kixin Cristo chróchónta asánrá kixin tinkachónkirá ch'án la ntá ntoá chrók'uejorá éxí ijnko nta tsíkji nuèe ninka la chrótjuèhérá kichuárá. 18 Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kjinxin la ko ninkaxín la ko ntetoxín kixin nkexrí tjuèheni Cristo. 19 Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxínni kaín tíha. A ntá tí jehe ch'án chrókjuinkitsani ch'án la antsí chrókuiénxínni tí kjuachaxin kuènte ch'án.

20 Ijie la chjéheni kjuasáya Dios kixin jehe ch'án chóna kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkitsa tí jeheni. 21 Kjuasáyé Dios itjen jnkochrín kixin Cristo Jesús kjuínchekaá ch'án tí ninko, mé xikaha ó xiteyá jnkochrín. Amén.

4

Jína chrók'uejókoni kichó ni kixin chóntani Nchakuen Dios

1 Janhan mé tjechjinaxián tí xra kuènte Ìnchéni. Méxra xrjanóahará kixin jína chrók'uejorá kixin xikaha Dios tsíkjeýá tí jahará. 2 Méxra chrókjuínchehnkehýará la ko chrókójiáhyará la ko chrókójínará chrókóninkákonhyará la ko chrótjuèhérá kichuárá. 3 Méxra jína chrók'uejokoará kichuárá kixin chrókjuinkitsa Nchakuen Dios kjuaxróxin chrók'uejorá la ko jnkokoá chrókjuenkayáxinrá. 4 Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kixin jnkokoá nkehe ts'ejóchónhenni. 5 Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni. 6 Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

7 Jnkojnkonni k'uáyéhéni kjuachaxin sich'ehe ni Dios xra kixin xikaha kjuanjon Cristo. 8 Méxra xikaha nixja xroon itén Dios kixin: “Jehe ch'án sákjuí ch'án nkaya nkajní la ko sákjuíko ch'án tí sín tjejóchjina, la ntá kjuínchekitonhen ch'án chojni jnkojnko kjuachaxin kuènte ch'án.”*

9 ¿Ntá nkexrí t'axrjexín kixin sákjuí ch'án? Tíhi mé t'axrjexín kixin jehe ch'án mé senó k'uínkajinxín ch'án nkaya nkajní la kjuák'e ch'án chjasintajni. 10 Jehe ch'án mé k'uínkajinxín ntiha mé ntá jie sákíkjí ch'án tí nkajní imá noi. La ntá tjet'etuenhen ch'án kaín xín nkehe. 11 Jehe ch'án mé kjuínchekitonhen ch'án ijnko kjuachaxin jnkojnko chojni. Kjuéyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjuéyá ch'án í so sín ts'óna pastor la ko í so sín tsjako sín itén ch'án. 12 Mé xikaha tí xra k'uáyéhe tí sín kjuéyá ch'án kixin sich'ehe sín ch'án xra kixin ntá ts'ánkí tí sín k'óna tí cuerpo kuènte Cristo. 13 Ntá xikaha kaín ni jnkokoá tsinkáchónkini tí Xjeen Dios la ko tsochóxinni ch'án jína kixin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo. 14 Méxra chrók'ónahyani éxí xjan ntsíntsí. Tí xjanntsí la xrahya tsjinkí kjuaxrexinkaon éxí ijnko nkehe sákjuíko xrinto xikaha kixin sich'iyehé sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroeni sín í jnko ntia ntoáhya kixin chrok'uitjáyenhenni Cristo

* 4:8 Salmo 68.18

ntá chrókjuasinni jię. ¹⁵ A ntá íchá jína chrónixjani tí nkehe chaxín ntoá la kaín asénni chrótjuèheni kichó ni ntá xikaha chrókónoheni kixin xikaha tjinkaon Cristo. Jehe ch'án mé tí kja t'etuenhen tí cuerpo kuènte ch'án. ¹⁶ A ntá kjuachaxién Cristo kuenté tí cuerpo, tí ch'e xra jnkokón la tjinkitsa kuenté. Ntá jnkojnkoni jína ch'eni xra la mé xikaha ts'ánkí tí xra kuènte ch'án la mé jína chrótjuèheni kichó ni.

Tí kjuachaxin nixin kuènte Cristo

¹⁷ Tíhi mé ntáxrjan la ko tétuanhanrá kjuachaxién ihnié Inchéni. Ijie la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha. ¹⁸ Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios. ¹⁹ Ó tsíkjinchek'itjáyan sín tí kjuaxrexinkaon kuènte sín la í tósuèhya sín chrókjuasin sín jię. Imá tóxrjínhin sín chrókjuich'e sín kaín nkehe jínahya. ²⁰ A ntá jahará xikahya xrakohará tí nkehe kjuako Cristo, ²¹ tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án. ²² Méxra títòhéré tí kjuaxrexinkaonntaxin k'uékjenkayáxinrá ósé k'uék'ejorá mé ijnko nkehe jínahya naxa t'ayahará. ²³ Jahará t'ichjánxin kixin chrókónixin tí kjuaxrexinkaon kuéntará la ko tí nchakuanrá. ²⁴ Méxra chrókuákjára tí kjuaxrexinkaon nixin kjuích'éna Dios xikaha tjinkaon ch'án la ntá chrókjuákoxinrá ijnko ntja jína ntoá.

²⁵ Méxra chrókuítòhéré tí kjuach'ia. Méxra jnkojnkora chrónixjehérá kichuára ntoá kixin kaín ni tsík'ónani jnkokoá cuerpo.

²⁶ Tí chrókóninkáonrá la chrókjuásinhyará jię la chrókóninkákonhyará kuenté yaon. ²⁷ Chrókuítòéhyará kixin Tsochren chrókjuít'ayahará.

²⁸ Tí jnkójínrá kuera la títòhéré kjuachee. Íchá jína kixin itjára chrókjuích'exínrá xra kixin tsochontará chichaon sinchekitònhenrá jnkójín nkexro t'ichjánxinhin.

²⁹ Nixjahyará tí nkehe náxrjónhya. Nixjará ijnko tan jína kixin tsjinkitsará ts'ánkí kjuaxrexinkaon kuènte kichuára la xikaha tsjinkitsará tí sín tjejótinhin. ³⁰ Nchek'ávahyará tí Nchakuen Dios kixin tíha mé k'uayéxinrá éxí ijnko xroye kixin tsonoaxínrá kixin jahará mé tinkachónkirá Dios la ko tsochonhénrá tí yaon itsi ch'án ntá tsjintaxín tsaará.

³¹ Títòhéré tí kjuanínkaon chontará la ko títòhéré tí nkehe ntoáhya tjenkayáxinrá la ko títòhéré tí kjuanoton la ko kaín nkehe jínahya. ³² A ntá chrókójínará chrókuíkonóehérá kichuára. Sinchek'itjáyenhenrá ijié kichuára kixin Dios kjuatsen tí jię chontará kixin tinkachónkirá Cristo.

5

Jína chrók'uejó tí sín k'óna xjeen Dios

¹ Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxí kjuákoxin tí jehe ch'án. ² Chrótjuèhérá kichuára éxí Cristo tjuèhe tí jeheni kixin jehe ch'án la k'uenyákonhenni ch'án, éxí yóhe ijnko kolélo xikaha kjokehę sín Dios la kóchéhe Dios k'uáyéhe ch'án tí xraxé náxrjón.

³ Ntá jahará mé tsík'ónará chojni kuènte Dios la ntá chrónixjahyará kuènte í jnko chojni chjin ókjé chrókjuásinkoará jię la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará. ⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuènte Cristo tíha. Íchá jína antsí má chrókjuancheherá Dios kjuasáya. ⁵ Ó nohará kixin tí nkexro tjasinko jię í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e

asén sín tí itsjé nkehe chróchóna sín la mé tíha ó yóhe tí nkexro tinkáchónki nkehe tsíkjanoya xíkaha. Mé tí nkexro xíkaha ch'e mé tsjachahya ts'ixenhen tí tjet'etoan Cristo la ko Dios. ⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xíkaha ntá itsi tí kjuanínkaon kuènte Dios la tsjasóte tí sín titekakuenhya sín tí jehe ch'án. ⁷ Méxra chrók'uítohyará tí sín xíkaha ch'e.

⁸ Senó la k'uék'ájirá ntia sítié. A ntá ijie ó k'onará chojni kuènte Ìnchéni la ó xritjeorá tí ntia t'inkaséyan kuènte ch'án. Méxra tjenkayáxinrá jína éxí tí sín xritjejó tí ntia t'inkaséyan. ⁹ Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá. ¹⁰ Tóxakonhanrá chrókjuich'erá tí nkehe tóxrjínhin Ìnchéni. ¹¹ Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjákoxinrá tí xra tí itjen tí t'inkaséyan. ¹² Chrókósuèheni chrónixjani kuènte tí nkehe imó ch'e tí sín jínahya. ¹³ Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe. ¹⁴ Mé xíkaha ntáchro xíkahi:

T'aya jaha tjéchrian t'inkatjenxian tí síin tí sín tsík'en.

Cristo mé tjetjoka xrohi.

¹⁵ Méxra imá chrókóxakonhanrá jnkójina chrók'uejorá. Jehya éxí tí sín noehya chrók'uejorá. Náhi. Chrók'uejorá éxí ijnko chojni nohe má. ¹⁶ Chrókóxakonhanrá chrókjuich'erá xra tí jie kixin itsi ijnko yaon jínahya xitjahya sich'erá xra. ¹⁷ Chrókólontjhyará. Chrókóxakonhanrá chrókuiénxinrá tí nkehe tóxrjínhin Ìnchéni. ¹⁸ Chrókókoanhyará kixin tíha mé chrók'uitjáyaxínrá. Íchá jína chrókjuánjonrá kjuachaxin chrók'uetuanhanrá Nchakuen Dios. ¹⁹ Chrónixjexínrá kichuára tí salmo la ko tí himno la ko chrótsjerá la xíkaha kaín asánrá chrókjuancheherá kjuasáyé Ìnchéni. ²⁰ Jnkochrín chjehérá kjuasáya It'eni Dios kixin kaín nkehe kjuanjon ch'án la ko chrókjuanchaxínrá kjuasáya kjuachaxién ihnié Ìnchéni Jesucristo.

Jína chrók'uejókoní tí sín kjéhyani kixin tinkáchónkini Ìnchéni

²¹ Titekákonhénrá kichuára kixin ó tinkachónkirá Ìnchéni. ²² Tí chojni chjin chrókjuinchexiteyéhe xì sín éxí nchexiteyéhe sín Ìnchéni. ²³ Tí chojni ntoa chóna kjuachaxin ts'etuènen ichjién éxí Cristo mé ikja t'etuènen tí nínko. Kjaxin jehe ch'án kjuínchekaá ch'án tí nínko, mé tí cuérpóé ch'án. ²⁴ Méxra éxí tí nínko nchexiteyéhe Cristo mé xíkaha kjaxin tí chojni chjin chrókjuinchexiteyéhe tí xì.

²⁵ Tí chojni ntoa chrótjuèhe tí ichjién kixin éxí Cristo la tjuèhe tí nínko la k'uenyákonhen ch'án. ²⁶ Mé xíkaha kjuích'e Cristo kixin sinchetjóá ch'án tí nínko mé kjuínchetjuáxin ch'án tí ntá kuíkitexín sín kjuachaxién itén ch'án. ²⁷ Ntá tsjanjon ch'án tí jeheni éxí ijnko nínko imá jína chóntahya jje la ko chóntahya ninkehó nkehe náxrjónhya, mé ijnko nínko tjóá la ko ntoá. ²⁸ Mé xíkaha tí chojni ntoa chrótjuèhe tí ichjién sín éxí tjuèxín ch'án cuérpóé ch'án. Tí nkexro tjuèhe ichjién mé kjaxin tjuèhe asén ch'án. ²⁹ Kohya ninkexró nínkakohen tí cuerpo kuènte. Kaín chojni la ine sín la t'ayakonhen sín cuérpóé sín la mé xíkaha Cristo t'ayakonhen tí nínko. ³⁰ Kaínni mé k'onani cuerpo kuènte ch'án. Jeheni mé ntøe ch'án la ko huésóé ch'án. ³¹ Ntáchro kixin: "Méxra ijnko chojni ntoa mé tsítóhe it'é la ko ìné kixin tsakja ichjién la yóí sín mé ts'óna éxí jnkokoá chojni."* ³² Tíhi mé ijnko nkehe imá jíé tienxínhya ninkexró. Mé janhan xrjanka kuènte Cristo la tíha mé nínkoé ch'án. ³³ Méxra kjaxin

* 5:31 Génesis 2.24

tjéxrjanka kixin chojni ntoa t'ichjánxin tsotjuèhe ichjién sín éxi tjuèxín asén sín la tí chojni chjin chróchóntehe sín kjuasáya tí xii sín.

6

¹ Jahará chánjanrá la t'ichjánxin sìnchexiteyéhérá it'ará la ko ìnará kixin tjuèherá Ìnchéni kixin tí xikaha mé jína. ² Tí nkehe saoxín tsík'ítuenhenni kixin chrókuitekaonni ntá chrókjuanjon Dios nkehe mé tíhi: “Chrókjuíkosáyehérá it'ará la ko ìnará ³ kixin mé náxrjón chrók'uejorá la isé chrók'uejorá ntihi chjasintajni.”*

⁴ Jahará it'é xjan la chrókjuincheKónínkakonhyará tí xjaanrá. Íchá jína kixin sìncheK'ánkíxinrá xjaanrá ijnko kjuaxrexinkaon jína kixin ts'ánkíxin xjan tsinkáchónki xjan Ìnchéni.

⁵ Jahará chojni ch'e xra mé chrókuíteKákonhénrá tí lámoará ntihi chjasintajni la chróchontehérá sín kjuasáya. Sích'eherá sín xra éxi ch'eherá xra Ìnchéni Cristo.

⁶ Chrókjuich'erá xra jína la jehya kixin tí tjejó sín tjejótsjehe sín kixin ntá xikahó ntá jína chrók'uejoxinrá. Náhi. Éxi ch'eherá xra Cristo kaín asánrá sích'erá xra kixin mé xikaha tóxrjínhin Dios. ⁷ Kaín asánrá chrókjuich'erá xra éxi ch'eherá xra Ìnchéni la jehya éxi chojni ó chrókjuich'eherá xra. ⁸ Ó nohará kixin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kixin nkexrí tí xra jína kjuích'e sín.

⁹ Tí jahará chojni lamó mé jnkojína chrókuétuènhénrá tí sín t'ahará xra la séchrókóninkákonhénrá sín. Xráxinkáonrá kixin jahará la ko jehe sín mé jnkokón chrókjuincheXiteyéhérá Ìnchéni itjen nkaya nkajní kixin kaín chojni la jnkokón t'ikon ch'án.

Tí nkehe tjinkítsa t'ayakonhen tí sín tinkáchónki Ìnchéni

¹⁰ A ntá jie kichó ni, nchefuerte asánrá kixin tjejókoni Ìnchéni la tjeToan tí kjuachaxin kuènte ch'án. ¹¹ Chrókuaáxinrá kaín tí kjuachaxin tsjanjon Dios kixin ntá xikaha jína chrók'uejorá la chrókjuít'ayahyará Tsochren. ¹² Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya siín chjasintajni. Tíha mé tjinkaon chrók'ueToan tí chjasintajni sítié. ¹³ Méxra chrókuákjára kaín tí kjuachaxin kjuanjon Dios kixin ntá chrókjuachará tí itsi tí yaon jínahya ntá tí xikaha chrókjuich'erá la chr'éxin la jína chrók'uejorá. ¹⁴ Nchefuerte asánrá. Jína chrók'uejorá. ChrókuíteKáonrá tí itan chaxín kixin tí nkehe ntoá mé chrók'uayakonhanrá. ¹⁵ Méxra listo chrók'uejorá sátsjichronkará tí tan tjanjon kjuaxróxin. ¹⁶ La antsí tjeToan chrókuinkachónkirá Ìnchéni. Tíha mé chrok'uinkákonhen tí chica flecha tsochr'án Tsochren. ¹⁷ Tí chrókuaáxinrá la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios. ¹⁸ La ko kjaxin chrókuítóéhyará chrónixjehérá Dios la jnkochríxín chrókjuanchehérá ch'án kaín nkehe t'ichjánxinhanrá la chrokjuanchatóxixinrá Nchakuen ch'án. Chrók'uejotsjehérá la chrókjuanchiará kixin tsjinkítsa Dios kaín tí sín tinkáchónki ch'án. ¹⁹ Chrónóehérá ch'án kixin kjaxin janhan tsjinkítsana ch'án tsjanjon ch'án tí tan t'ichjánxin tsoníxja janhan kixin ntá janhan antsí jína chrónixja kixin ntá tsinhin sín tí nkehe ninkexró k'uénoehya kixin nkexrí tjen tí itén ch'án tsaáxin chojni. ²⁰ Dios mé ichr'ánna tsqxrjanka tí itén ch'án, mé

* 6:3 Éxodo 20.12; Deuteronomio 5.16

xikaha tjechjinaxián ijie. Nixjehérá ch'án kixin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kichóni Tíquico, tí nkexro imá tjuèheni la ko xráxín ch'ehe xra Ìnchéni mé tsochenkará ch'án tí jahará nkexrí tjeñ la ko nkexrí tí xra tjet'a. ²² Mé xikaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xikaha chrókócháhará.

²³ Tjáncháha It'eni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsotjuèhe kichó sín la ko tsinkáchónki sín ch'án. ²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí sín siín chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'ehe ni xra Jesucristo, mé ikjinni tí xroon i chr'anhánrá kaín tí jahará kichó ni tinkachónkirá Cristo Jesús tjejórá chjasin Filipos la ko tí sín t'etōan kuènte nínko ntiha. ² Tjanchiani kixin It'eni Dios la ko Inchéni Jesucristo kjuasáyé ch'án imá chrókjuincheyaonrá ch'án la ko chrók'uayéhérá kjuaxróxin.

Ch'ín Pablo tjechrónóhe ch'án Dios kixin tí sín tinkáchónki Jesús ntiha

³ A ntá tió xráxinkavan tí jahará la imá tjaḡa Dios kjuasáya ⁴ la ko níxjaḡa Dios la imá chàna tjáncháḡa ch'án kixin tsjinkitsa ch'án kaín tí jahará. ⁵ Jahará la kjuínkitsará tió kjuàkua tí tan jina tí saoxín kuinhínrá itén Dios la naḡa tjejotjinkitsará ijie. ⁶ Ó nòna chaxín kixin xikaha Dios ó kjuankixin ch'án ch'e ch'án xra jina kixin kuitekáonrá mé xikaha naḡa tsjintaxín sich'e ch'án tsjixrakájia tí yaon tsokjan Jesucristo. ⁷ Jina kixin tjenkayáxian kuènte kaín tí jahará. Méxra xikaha imá tjuahará. Jahará la ko janhan la jnkokón kjuachaxin k'uáyéhe ni la kjónté janhan tjéchjina o itjén tí tjejó tí sín t'etōan tjéxrjanka kixin jina tí tan tsaáxinni. ⁸ Dios la ó nohe kixin imá tjínkavan chrók'uíkuan kaín tí jahará kixin éxi tjuàxinrá Cristo. ⁹ Tjáncháḡa Dios kixin tsjinkitsa ch'án tí jahará kixin antsí má chrótjuéhérá ch'án la ko chrók'uánkí tí kjuaxrexinkaon kuèntará kixin antsí chrókuiénxinrá kaín nkehe. ¹⁰ La ntá chrókónohará chrókuákjára tí nkehe jina. A ntá tí xikaha chrókjuich'erá la jina tjóá chrók'uejórá la ko kohya nkehe chrókjuanchia jie tió tsokjan Jesucristo. ¹¹ Méxra jahará chrókjuich'erá xra jina éxi ijnko nkehe jina chrók'óna kixin kjuasáyé Jesucristo la ntá xikaha la chrókjuíkosáyehérá Dios.

A ntá janhan la tjéchonxian Cristo

¹² Kichóni tjínkavan tsonohará kixin tí nkehe kjuasótexinna la kjuínkitsa kixin kuínhin chojni tí itén Dios tsaáxinni. ¹³ Kaínxín tí chojni siín palacio la ko kaín tí í so sín mé nohe sín kixin tjéchjinaxián kixin tinkachónkia Jesucristo. ¹⁴ A ntá tí tjéchjina la itsjé tí sín kichó ni antsí má kóxrjínhin sín tjako sín itén Inchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinoxínhin sín kixin tjínkaon sín chrókjuachaxinna sín. A ntá í so sín tjako itén ch'án kixin tjínkaon sín jina chrókjuinkitsana sín. ¹⁶ Kjánchó iso sín tjínkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjínkaon sín chrók'uekana sín antsí má jie kixin naḡa tjéchjina. ¹⁷ La í so sín nixja sín kuènte Cristo kixin tjuèhe sín ch'án la ko tjuana sín la ó nohe sín kixin ntihi tjén kixin tsóxrjanka tí itan tsaáxinni. ¹⁸ Kjánchó ántosenná kjónté á chaxín kaín asén sín tjako sín o náhi, la imá chàna kixin chrónka sín tí tan jina kuènte Cristo la antsí má chéhe asenná.

¹⁹ Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyará jahará tjejónixjehérá Dios la ko tí Nchakuen Jesucristo mé tjetjinkitsana. ²⁰ Jina tjéchonhan kixin Dios la tsítóehya tí janhan kixin ichrén nkehe jínahya chrókóna. Tjínkavan tsochonta kjuachaxin kixin jina tsonixja kaín asenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoxín sín kixin Cristo imá chóna kjuachaxin kjónté

á naxa tjéchuān o á ó tsík'ena. ²¹ Kíxin janhan na Cristo tjéchonxian la ntá kjónté ts'énxian xikaha la mé chrókjuácha. ²² A ntá tí naxa tsjak'é naxa tjéchuān ntá naxa jína sít'aha Ìnchéni xra. Nonahya nkehe tí chrókuákjaá, á chrók'uén o á chrókjuak'échuān. ²³ Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékian Cristo. A ntá janhan la ntáxrjan kíxin íchá jína tíha. ²⁴ Kjánchó t'ichjánxin naxa chrókjuak'é kíxin naxa chrókjuínkítsa tí jahará. ²⁵ Méxra ó nòna kíxin naxa tsitona tí tjejorá kíxin chrókjuínkítsa tí jahará kíxin ntá antsí chrókónohará la chrókócháhará kíxin jína chrókuinkachónkirá Ìnchéni. ²⁶ Ntá tió tsjasán janhan ts'ejóni inaá la imá tsocháhará la tsjancheherá kjuasáyé Jesucristo.

²⁷ A ntá jahará chrókjuákoxinrá chrók'uejorá jína éxí ntácho tí tan kjuakoxin Ìnchéni Cristo. Mé xikaha tí tsjasántsahará o náhi la tjínkavan chrókuinhan kíxin naxa imá tinkachónkirá Cristo la ko jnkokoá tjenkayáxinrá la ko jnkokoá tjejoch'erá xra tjàkorá tí itan jína tsaáxinni. ²⁸ Chrókuítóéhyará kíxin tí sín nínkakonhanrá chrókjuintachakonrá sín. Tí xikaha chróchrakonhyará la chrókónoexín sín kíxin ts'itjáyan sín, a ntá chrókónoxín kíxin jahará mé chaxín tsaará. Tíha mé Dios tsjinkítsará. ²⁹ Ó kuitonhanrá tí kjuachaxin kíxin tsinkachónkirá Jesucristo la ko kjaxin kuitonhanrá kjuachaxin tsjasótiaxínrá kíxin jahará mé tinkachónkirá ch'án. ³⁰ Jahará la ko janhan jnkokón ch'eni xra. Jahará ó k'uíkonrá senó nkexrí kjuít'a xra la ó kuinhínrá ijie kíxin naxa tjét'a xra kjónté nínkakonna sín.

2

Kuítóhe Jesús tí kjuachaxin chrók'uetōan ch'án ntá ijie imá tjetoan ch'án

¹ Tí chaxín tí Cristo nchexraxinkaonrá la tí chaxín Cristo tjuàhará ch'án nchecháhará ch'án la tí chaxín tí Nchakuen ch'án xrikoará la tí chaxín nohará kíxin tikonóahará ch'án ² la nchecháhará kíxin jnkokoá chrók'uejokoará kíchuará la ko jnkokoá chrótjuèhéra kíchuará la ko jnkokoá chrókjuenkayáxin nchakuanrá la ko jnkokoá xra chrókjuich'erá. ³ Chrókjuenkayáxinhyará chrókuétoanrá la ko chrókjuinchehnkehyará. Náhi. Chrók'ónará chojni t'etōanhya. Chrók'uikonrá éxí antsí tjetoan tí í so sín, a ntá kánhyó tjetoan tí jahará. ⁴ Ninkexró chrókjuéyá tí nkehe kuènte jehó. Náhi. Chrókjuéyará tí nkehe chrókjuinkítsa tí í so chojni.

⁵ Jahará chrókjuenkayáxinrá éxí kjuenkayáxin Cristo Jesús. ⁶ Jehe ch'án chóna ch'án kaín kjuachaxin kuènte Dios la kjónté xikaha la tjínkakonhya ch'án chrókjuincheyóhe ch'án éxí Dios. ⁷ A ntá kuítóhe ch'án ntáha tí kjuachaxin k'uéchóna ch'án la k'óna ch'án ijnko chojni ntoa chjasintajni la ko kjuích'e ch'án xra. ⁸ La éxí ijnko chojni k'uetōanhya kjuák'e ch'án la kjuínchexiteyéhe ch'án Dios kaín asén ch'án kíxin ik'uén ch'án, mé k'uénxin ch'án tí ntacruz. ⁹ Méxra Dios imá kjuikosáyehe tí jehe ch'án la ko kjuínchek'in ch'án ijnko ihnié imá tjetoan. ¹⁰ Kíxin ntá tsinhin kaín chojni tí ihnié Jesús ntá ts'ejóxin toh'in sín, mé tí sín siín nkaya nkajní la ko ti sín siín chjasintajni la ko tí chojni siín chrínki nche. ¹¹ La ko kaín xín chojni tsochrónka sín kíxin Jesucristo mé Ìnché sín mé xikaha tsjikosáyehe sín It'eni Dios.

Tí sín tinkáchónki Cristo tóyóhe éxí xrohi t'inkaséyanxín chjasintajni

¹² Jahará kíchó ni imá tjuàhará la xráxin kjuínchexiteyànará tí k'uék'ejóni. A ntá ijie la chrókjuínchexiteyànará kjónté ikjín tjén. Chrókuítóéhyará tí nkehe tsjanjon kjuachón la chrók'uayakonhénrá jnkójina ¹³ kíxin Dios ntaxraxinkaonrá sích'erá tí nkehe jína tjínkaon ch'án.

¹⁴ Kaín xra ch'erá la chrókóninkákuénhyará kichuára la ko chrókjóntahyará kichuára ¹⁵ kixin tsokohya ninkexró tsonáchro kixin jahará la chontará jie. Kixin jahará la mé tí xjeen Dios chróchontahyará jie, la tjejorá tí síin tí sín jínahya tjasin jie. Na ntá jahará chrók'uinkaséyanxín tí jehe sín éxí tí konotsé t'inkaséyanxín tí chjasintajni sítié. ¹⁶ Méxra jahará chrók'uayakonhénra jína tí tan tjanjon kjuachón. Tí xikaha chrókjuinche xiteyará jnkojína ntá tió tsi Cristo tsochéhe asenná kixin xikaha xra tjejoch'erá kixin ntá tsonóna kixin jehya ó chónkó kjuak'ékjit'a xra. ¹⁷ Kjonté chrók'uénxian la éxí nkehe chrókjuanchatóxixínra Dios chrók'uikonrá tí janhan. Mé xikaha chrókjuintaxín tí nkehe chróchjehé ch'án kixin tinkachónkirá ch'án, la ntá mé janhan mé tsochána la ko tjínkavan kixin kaín rá xikaha chrók'uayéhé kjuachéhe. ¹⁸ Méxra chrókócháhará jahará kjaxin la chrók'uayéhé éxí tí kjuachéhe chonta.

Ch'ín Timoteo la ko ch'ín Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'ín Timoteo tsjijitsjehe ch'án tí jahará kixin ntá tsochána tsinhan nkexrí tjejorá. ²⁰ Kohya í jnko nkexro chrókjuenkayáxin éxí tí janhan la ko chrókóxakonhen kixin jahará chrók'uejorá jína. ²¹ Kaín tí í so sín tjejá sín tí nkehe tóxrjínhin sín ó la jehya tí nkehe tóxrjínhin Jesucristo. ²² A ntá jahará ó nohará kixin ch'ín Timoteo ó kjuakoxin ch'án kixin jína asén ch'án kixin jehe ch'án kjuít'akian ch'án xra kjuakoni tí tan jína. Éxí ijnko xjanna xikaha kjuínkítsana ch'án. ²³ Mé xikaha tjínkavan tsochr'an ch'án tsjijitsjehe ch'án tí jahará tió tsonóna nkexrí tsji tí xra kuéntana. ²⁴ La ko kjaxin chonhan kixin Ìnchéni tsjinkítsana kixin tjoka tsjasán kjaxinna.

²⁵ A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehe ch'án mé jnkokoá ch'ekoni ch'án xra kjonté ninkakonhenni chojni. Jahará k'uéchr'anrá ch'án ntihi kixin jehe ch'án tsjinkítsana ch'án kaín nkehe tjínkavan. ²⁶ Imá tóxakonhen ch'án tsjijitsjehe ch'án tí jahará kixin ó nohe ch'án kixin tsíkinhínra kixin k'uéníhi ch'án. ²⁷ Chaxín k'uéníhi ch'án ó mero chrók'uen ch'án, a ntá Dios kuikonóehe tí jehe ch'án kjánchó jehya jehó ch'án, kjaxin kuikonóna Dios tí janhan kixin kánhyó chrók'uavá. ²⁸ Méxra tjínkavan tsochr'an ch'án kixin ó nóna kixin tsocháhará ts'ikonrá ch'án inaá la ko xikaha janhan í kánhyó chrók'uavá. ²⁹ Imá chrókócháhará chrókjuiji ch'án kixin jehe ch'án mé ijnko kichó ni tinkáchónki Ìnchéni la ko chrókjuikosáyehé ch'án éxí chrókjuikosáyehé kaín tí í so sín éxí jehe ch'án. ³⁰ Jehe ch'án ó mero chrók'uenxín ch'án tí ch'ehe ch'án xra Cristo. Mé síin kjuaxikaon chrók'uenxín ch'án kixin jehe ch'án kjuínkítsana ch'án kixin jahará xitjahya ts'inkará tsjinkítsará tí janhan.

3

Tí nkehe chaxín sínkí

¹ A ntá ijie, kichó ni, chrókócháhará kixin jahará la kuènte Ìnchéni. A ntá tí janhan la xrahya tsokjatee tsokjian tí nkehe ó kjian kixin tíha la chrókjuinkítsa tí jahará. ² Chróchontará cuidado ti sín ch'e jínahya éxí konia la tóchrít'o sín cuérpoé sín. ³ A ntá tí chojni chaxín chóna xroye la mé tí jeheni kixin jeheni chaxín xraxinkakonxíni Dios kjuachaxién Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpoéni chrókóchrínjinni. ⁴ A ntá janhan kjaxin jína chróntáxrjan kixin chrókóchrít'o tí cuérpoé chojni. Ninkexró antsí chróchóna kjuachaxin kixin chrókuitekaon tí nkehe a. ⁵ Janhan mé tsíkana xroye tí k'uéchonta ijní

yaon la ko janhan mé tikiñixian tí sín israelita la tsík'axrjeníxinna tí sín tsík'axrjeníxin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkachónkia tí ley éxí tinkáchónki tí sín fariseo. ⁶ A ntá imá k'uénínkakonhan k'uéchonkíha tí sín tinkáchónki Jesús la ko imá kjuintaxiteyáha tí ley la kohya ninkexró tsontácho kíxin chaxínhya tíha. ⁷ Ntá kaín tíha la tí ósé k'uékjenkayáxian janhan kíxin sínkí tíha, a ntá ijie la tinkachónkia Cristo la ntá tí nkehe k'uékóxrjìna k'uékjìt'a la ntá jie la ninkehó sínkíhya. ⁸ La kjaxin kaín xín nkehe t'íkuàn éxí chónkó tíha kíxin antsí má tjetooan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuintak'itjáyán kíxin ijie ó tinkachónkia Cristo la kaín xín tí nkehe k'uéchonta la t'íkuàn éxí chjínínó ó kíxin ntá xíkaha jína chrókjuak'ékian Cristo. ⁹ Chrókóchàna kíxin jnkokoá chrók'uejókoni ch'án. Tjéyáhya kíxin tí ley chrókjuinixín ijiéni tí chrókjuinchexiteyéheni. Náhí. Tinkachónkia Cristo la tsaáxinni kíxin Dios la tsjakjìn tí ijiéni kíxin tinkáchónkini ch'án. ¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tió xechón ch'án la ko tjínkavan tsjasótexinna éxí kjuasóte ch'án la ko kjónté chrók'uénna éxí k'uénxin ch'án ¹¹ kíxin ntá tjínkavan tsjácha tsoxechónna ínaá.

Ch'ín Pablo tjinkaon chrókjuacha ch'án

¹² Ntáxrjanhya kíxin kjuácha kaín tíha la ko ntáxrjanhya kíxin imá ntoá tjén. Kjánchó janhan tjínkavan tsjácha kaín tíha kíxin Cristo Jesús mé kjueyána ch'án senó xíkaha. ¹³ Kíchóni, ntáxrjanhya kíxin janhván kjuácha tíha. Náhí. Janhan mé ts'itjáyanna kaín xín tí nkehe ó kuítóhe senó la t'ichjánxin kaín asenná tjichráha tí nkehe naxa t'itjáyán tsjácha. ¹⁴ Kíxin xíkaha ntá chrókjuácha chrók'uayáha kaín tí nkehe jína tsjanjon Dios. Jehe ch'án la sinchexiteyá kaín tíha kíxin tinkachónkia Jesucristo.

¹⁵ Kaínni tí tinkáchónkini Jesús kaín asénni la méxra xíkaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kíxin ntoáhya tíha. ¹⁶ A ntá t'ichjánxin chrók'uejóni éxí tí nkehe ó kjuachani.

¹⁷ Kíchóni, chrók'uejorá éxí kjuak'é janhan la ko chrótsjehérá nkexrí tjejó tí í so chojni tjejóch'e éxí kjuakoni kíxin xíkaha kjuakoharáni tí jahará. ¹⁸ Nchónhya xrjankaxián senó la ntá xrjanka ínaá la imá tsjanka kíxin síin nchónhya sín tjejó sín éxí nínkakonhen sín tí Cristo k'uénxin ntacruz. ¹⁹ Tí sín a mé ts'itjáyán sín. Tí dios kuénte sín la mé tí nkehe ntácho asén sín ó la ko tjinkaon sín chrókjuinchehnkexín sín tí nkehe chrókósuèxin sín. Jehó tjenkayáxin sín tí nkehe síin chjasintajni ó. ²⁰ A ntá jeheni kaín ni la mé chojni kuénte nkajní la tjejóchónhenni kíxin ts'inkajinxin nkaya nkajní tí nkexro tsaáxinni, mé Ìnchéni Jesucristo. ²¹ Ntá jehe ch'án mé tsjinkí ch'án tí cuerpo náxrjónhya chóntani kíxin ntá tí cuerpo chóntani tsoyóhe éxí tí cuerpo náxrjón chónta ch'án. Tíha mé tsoxiteyá kjuachaxién ch'án jié kíxin ó chónta ch'án kjuachaxin ts'etuñhen ch'án kaín xín nkehe.

4

Jnkochríxín chrókócháhará kíxin tinkachónkirá Ìnchéni

¹ Jahará kíchó ni imá tjuahará la ko imá tjínkavan chrókjuasántsahará tí jahará kíxin jahará imá nchechànará kíxin jahará mé éxí ijnko nkehe ó kjuácha. Méxra jína chrók'uejorá chrókuinkachónkirá Ìnchéni kíxin tjuahará kíchó ni.

² Xrjanóaha tjan Evodia la ko tjan Síntique kíxin jnkokoá chrókjuenkayáxin sín kíxin jehe sín la jnkokoá kíchó sín kíxin tinkáchónki sín Ìnchéni. ³ Jaha la

jína k'uéjóni kjuích'eni xra, méxra xrjanóaha tjínkítsa tí sín chjin kíchó ni kixin jnkokoá chrókjuenkayáxin sín. Jehé sín kjaxin kjuích'e sín xra tió kjuakoni tí tan jína tsaáxinni. Koí tí ch'ín Clemente la ko í so sín kjuích'ekoni xra. Tí ihnié sín la ó ts'ínixín ts'ínixín ihnie chojni tsaá.

⁴ Nchechéhérá asánrá jnkochrín kixin tjejókoará Ìnchéni. Ínaá kjatee xrjanka nchechéhérá asánrá. ⁵ Kaín chojni chrókónohe kixin jahará la chojni jínará. Chróxráxinkáonrá kixin í séhya tsokjan Ìnchéni.

⁶ Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjaxin chrókjuancheherá ch'án kjuasáya. ⁷ A ntá jehé ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuénte ch'án kixin imá ijié tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuanhanrá kíchó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xikaha tjenkayáxinrá kaín xín tí nkehe náxrjón la ko tí nkehe tóxrjínhin Dios.

⁹ Chrókjuich'erá kaín tí nkehe kjuákohará la ko tí nkehe kuínhínrá xrjanka la ko tí nkehe kuétuanhánrá la ko tí nkehe k'uíkonrá kjuít'a, mé kaín tíha chrókjuínchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkítsa sín tí ch'ín Pablo

¹⁰ Ìnchéni imá nchechána kixin jahará xráxinkáonrá tí janhan ínaá. Ntáxrjanhya kixin tsík'itjáyanhanrá tí janhan kixin jahará xitjahya k'uékjínkítsará tí janhan. ¹¹ Jehya kixin ntáxrjan tíha kixin imá t'ichjánxinna kixin janhan na ó kuánna kjuaxróxin tjén kjónté tí nkehe chonta ó. ¹² Janhan ó kuánna tjén kjónté nóana la ko kjaxin ó kuánna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántosénna. ¹³ Kaín xra tsjácha sít'a kixin Cristo tsjinkítsana. ¹⁴ Kjánchó jahará jína kjuích'erá kixin kjuínkítsará kjuánjonrá nkehe t'ichjánxinna.

¹⁵ Tió sákjuíxian estado Macedonia la kjuankíxian kjuàkua tí tan tsaáxinni ínaá la jahóra tí nínko chjasin Filipos ichr'anrá chichaon k'uayáha kixin cháhará kjuákohará itén Dios. ¹⁶ Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuínkítsará tí nkehe k'uichjánxinna ntiha. ¹⁷ La jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará antsí má chrókjuích'erá tí nkehe tjinkaon Dios kixin ntá antsí chrókjuachará. ¹⁸ Ó k'uayáha kaín nkehe tsíkánjonrá la antsí itsjé chonta. Ó k'uayáha tí nkehe tsíchr'anrá mé tí nkehe kuíkao ch'ín Epafrodito, la kaín tíha la ó tsjácha. Tíha la éxí yóhe ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjínhin ch'án. ¹⁹ Tí Dios kuéntana mé tsotjáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjete la tsjanjon ch'án kixin jahará la tinkáchónkirá Cristo Jesús. ²⁰ Kjuasáyé It'eni Dios jnkochrín. Mé xikaha tsoxiteyá. Amén.

Tsjixixín nixja ch'ín Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kíchó ni tjejókoni ntihi nixjahará sín. ²² Kjaxin kaín tí sín tinkáchónki Dios la ko tí sín ch'ehe xra tí ch'ín t'etqan romano mé nixjahará sín. ²³ Tjáncháha kixin Ìnchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énnen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjeýána Jesucristo t'ahá ch'án xra kixin xikaha tjinkaon Dios, la ko kichó ni Timoteo ² mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tjejórá chjasin Colosas. Kjuasáyé It'éni Dios chrókjuintayaonrá kixin kjuaxróxin chrók'uejórá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochrín tjancheheni kjuasáya Dios la ko tjanchiani kixin chrókjuinkitsa ch'án tí jahará mé jehe ch'án It'é Inchéni Jesucristo. ⁴ Ó kuínhinni kixin jína tinkachónkirá Inchéni Jesucristo la ko tjuèhéra kaín tí sín ó tsíkjinchetjóá Dios. ⁵ Mé xikaha tjejochonhérrá kixin ts'ayéhérrá tí nkehe chóna Dios tjen nkaya nkajní. Jahará la xikaha tjejochonhérrá kixin tjejotinhínrrá tí tan chaxín kuènte Dios tsaáxinni. ⁶ Tí tan i mé kuínhin chojni la itsjé sín tinkáki tekaon sín la tinkák'ánkí tí kjuachaxin kuènte Dios kuenté chjasintajni. Mé xikaha kónhen tió kuínhínrrá la ko kuítekáonrá kixin chaxín tjuahará Dios. ⁷ Tíhi mé kjuakohará kichó ni Epafras. Jehe ch'án la jnkokoá kjuích'ekoni ch'án xra kixin jehe ch'án la jína ch'ehe ch'án xra Cristo kixin xikaha tjinkitsa ch'án tí jahará. ⁸ Jehe ch'án mé kui ch'án ntihi chrónka ch'án nkexrí tjuèhérrá kichuárá kixin Nchakuen Dios tjinkitsa tí jahará.

⁹ Méxra xikaha tí yaon tió kuínhinni nkexrí tjejórá la títoehyani tjancheheni Dios kixin tsjinkitsa tí jahará kixin tsonohará jína nkexrí tóxrjínhin ch'án la ko tjanchiani kixin tsjanjon ch'án kjuachaxin kixin tsiénxinrá kaín nkehe kuènte ch'án. ¹⁰ Tjancheheni ch'án kixin jína chrók'uejórá kixin tinkachónkirá Inchéni la ko chrókuítóéhyará chrókjuich'era éxí tóxrjínhin tí jehe ch'án. Ntá jína chrókjuachará chrókjuich'era xra kuènte ch'án la ntá chrókónohará jína nkexrí tjen Dios. ¹¹ Tjanchiani kixin jehe ch'án chrókjuinkitsa kixin chrók'uejórá fuerte kixin tí kjuachaxin jié kuènte ch'án kixin ntá chrókjuachará la kjónté ichrén nkehe chrókónhanrá la chrókóninkákonhyará. ¹² La ko chrókócháhará chróchjehérrá kjuasáya It'éni Dios kixin kjuanjon ch'án kjuachaxin kixin ts'áyéheni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án. ¹³ Jehe ch'án mé kuakitsjekjanxinni ch'án tí sítié la ntá kjuanjon ch'án kjuachaxin ts'ejóni tí t'etōan tí Xjeen ch'án, tjuèhe ch'án. ¹⁴ Jehe ch'án kjuínchekaáni ch'án kixin k'uenyákonhenni ch'án la tí ijnié ch'án mé kjuenka ch'án tí ijieni.

Kjuaxróxin ts'ejókoni Dios kixin k'uenyákonhenni Cristo

¹⁵ Éxí tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxin tjen tí naxa t'ónahya ninkehó. ¹⁶ Kjuachaxién tí jehe ch'án kjuích'éanaxín Dios kaín tí nkehe siín nkajní la ko chjasintajni la ko kaín tí nkehe naxa t'ikonhyani la ko tí nkehe ó t'ikonni. Kjaxin kaín tí sín ángel t'etōan la ko chóna kjuachaxin la mé jehe ch'án kjuích'éna ch'án kixin sich'ehe sín ch'án xra. ¹⁷ Cristo la ó xráxin tjen kjónté naxa t'ónahya ninkehó la jehe ch'án t'ayakonhen ch'án kaín nkehe siín kixin tí kjuachaxin kuènte ch'án. ¹⁸ La kjaxin jehe Cristo mé tí kja t'etuenhen tí cuerpo mé tíha mé tí nínko. Jehe ch'án senó xechón ch'án kixin jehe ch'án mé ts'etuenhen ch'án kaín nkehe siín. ¹⁹ Dios tjinkaon chróchjéhe ch'án tí Xjeen ch'án kjuachaxin éxí

tí kjuachaxin chóna tí jehe ch'án. ²⁰ Kjaxin tjinkaon Dios kixin kjuachaxiën Cristo chrók'uixin kjuaxróxin nkuíxín mé chjasintajni la ko nkaya nkajni. Mé xikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

²¹ Jahará la ósé ikjín k'uék'ejorá la k'uéninkákonhénra Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios ²² kixin k'uenyákonhánra Cristo, kjuasóte tí cuérpóe ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahyará ninkehó jie. ²³ Méxra xikaha chrókuítóéhyará chrókuinkachónkirá Inchéni la ko chrókuítóéhyará tí nkehe tjejochonhénra kixin ó kuinhénra tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjínkítsa xrjanka xikaha.

Ch'ín Pablo ch'e ch'án xra kuènte nínko

²⁴ Méxra ijie la tjasótexinna kixin tí jahará la chàna kixin xikaha mé tsjintaxín tjasóte janhan kixin tí nkehe t'itjáyán tí naxa chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpóe ch'án. ²⁵ Mé xikaha Dios kjuéyána kixin sít'a xra kuènte nínko kixin xikaha tí xra k'uetuanna ch'án kixin ntá jína chrók'uejoxínra tí jahará kixin chrókjuintaxín chróxrjankaxián tí itan kuènte Dios. ²⁶ Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án. ²⁷ Dios tjinkaon chrókjuinchenohe tí jehe sín tí nkehe tjemá náxrjón tjeje ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénra ts'ayéhérá tí kjuachaxin jie kuènte ch'án.

²⁸ Jeheni mé chronkaxínni nkehe kuènte Cristo la nchexraxinkaonni kaín chojni la ko tjakoheni sín kixin chrókuiénxín sín jína. Ntá jnkojnko sín chrók'uánkí kjuaxrexinkaon kuènte sín kixin tinkáchónki sín ch'án. ²⁹ Méxra xikaha tí xra it'a la kaín asenná it'a xra tí kjuachaxiën chjina Cristo.

2

¹ Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'íkonhya tí janhan. ² Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuèhe sín kichó sín. Mé xikaha chrók'uánkí kjuaxrexinkaon kuènte sín chrókuiénxín sín jína kixin ntá chrókónohe sín tí nkehe ninkexró k'uénoehya kuènte It'éni Dios, mé Cristo tíha. ³ Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe. ⁴ Kaín tíha xrjanka kixin ntá ninkexró chrókjuít'ayahyará tí jahará kixin tí náxrjón chrónixja sín ó. ⁵ Kjónté tjenhya tí cuerpo kuéntana tí tjejorá la ntá nchakuenná la mé tjen ntiha kixin xráxinkavan tí jahará la chàna kixin t'íkuán kixin jína tjejorá naxa tinkachónkirá Cristo.

⁶ Méxra xikaha kuinkachónkirá Inchéni Jesucristo la mé xikaha jnkokoá chrókjuenkayáxinkoará tí jehe ch'án. ⁷ Éxí ijnko nta tsíkji nuèe nínka mé xikaha chrókuinkachónkirá tí jehe ch'án éxí kjuakohará ch'án la ko chrókjuanchehérá Dios kjuasáya jnkochrín.

Cristo tjanjon ijnko ntia nixin

⁸ Chrókuítóéhyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhí. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

⁹ Kaínxín kjuachaxin chóna Dios mé chóna Cristo kjónté k'óna ch'án chojni.
¹⁰ La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuēnhen ch'án kaín nkehe síin la ko t'etuēnhen ch'án kaín nchakuen t'etoan. ¹¹ Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jnko xroye k'uayéhérá kjánchó jehya tí xroye kuènte tí cuerpo. Náhi. Kjuakjiin ch'án tí jie k'uékóxrjínhanrá la kjuíntakaárá ch'án, mé tíha mé tí xroye kjuanjon Cristo. ¹² Tí kuíkiterá jahará mé xikaha éxi xravákoárá Cristo. Ntá ó xechón tí jehe ch'án la kjaxinrá xechónrá kixin ó kuítekáonrá tí kjuachaxin kuènte Dios kixin Cristo la ó xechón ch'án ínaá. ¹³ Jahará ósé la éxi tsík'en asánrá k'uék'ejorá kixin tí jie k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxi xechónrá kixin Cristo kjuatsen tí jie chontará. ¹⁴ Mé Dios kjuatsen ch'án kaín tí nkehe tsík'etoan ch'án ósé kjuachahyani nchexiteyáni la ko kjuatsen ch'án kaín tí jie k'uéchóntani kixin Cristo kjuák'enkáni ch'án tí ntacruz la xikaha kjuatsenxin ch'án tíha. ¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchóna tí nchakuen jínahya kixin jehe ch'án kjuínchesuèhe ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe síin nkaya nkajní

¹⁶ Méxra ninkexró chrókjontahyará kixin tí nkehe chrókjónterá o tí nkehe chrók'uirá o á tjíkosáyehérá tí yaon kia o tí nitjó nixin o tí yaon t'ok'éheni. ¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. ¹⁸ Méxra chrókuítóéhyará kixin ninkexró chróntáchro sín kixin ts'itjáyanrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxi kotáchríen sín t'íkonxín sín la nchehnke sín kixin tí nkehe t'axrjeníxin kja sín ó. ¹⁹ A ntá jehe sín la chaxínhya tinkáchónki sín Cristo kixin jehe ch'án mé tí kja t'etuēnhen kaín ni la jehe ch'án mé ch'éna ch'án jnkokoá cuerpo kuènte ch'án kaín ni la nchek'ánki ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

²⁰ A ntá jahará la ó k'uénkoará Cristo la kuítóhérá tí nkehe k'uék'etoan kuènte chjasintajni ó. ¿A ntá nkekuènté naxa tjejorá éxi tí chojni síin chjasintajni chrókuínchexiteyará tí nkehe t'etoan sín? ²¹ Mé xikaha t'etoan sín kixin jahará chrótsehyará tíha la chrókjóntehyará tí nkehe la chrókuákjáhyará nkehe. ²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjeníxin ikja chojni ó. ²³ Chaxín kixin jehe sín ntáchro sín kixin jína xikaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpóé sín, kjánchó kaín tí nkehe ch'e sín xikaha la chónkó kixin tjinkítsahya kixin chrókuítóhe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxra chrókuéyará tí nkehe síin nkaya nkajní kixin Cristo la ntiha tjetjaxin ch'án tí tja chjina Dios. ² Chrókuenkayáxinrá tí nkehe síin nkaya nkajní. Chrókuenkayáxinhyará tí nkehe síin chjasintajni. ³ Kixin jahará la ó ik'uenrá la ntá ijie la Cristo la ko Dios chónthehe tí kjuachón kuéntará. ⁴ Jehe Cristo mé chontaxínrá kjuachón jahará la tió tsokjan tí jehe ch'án ntá kjaxinrá ts'ejókoará ch'án ntá ts'íkonrá tí kjuachaxin jie kuènte ch'án.

Tí ntia ntaxin la ko tí ntia nixin

⁵ A ntá chrókuítóhérá kaín tí jie tjenkayáxinrá chjasintajni. Ninkexró chrókuasinko jie chojni chjin ókjé, la ninkexró chrókuich'e nkehe jínahya, la ko ninkexró chrókuich'e ninkehó tí nkehe ntáchro asén sín, la ko

kjaxin chrókóxrjienhya sín chróchónta sín itsjé nkehe kixin tíha mé yóhe tí chróxraxinkaon sín tí nkehe tsíkjanoya. ⁶ Méxra tí nkexro titekakonhya tí nkehe t'etoan Dios la tsonínkakonhen Dios tí jehe sín la sinchekjasóte sín ch'án. ⁷ Mé xikaha k'uékjich'erá jahará tí ósé. ⁸ Méxra ijie chrókuítóhéra kaín tí kjuanínkaon la ko tí nkehe tjak'e asánra la ko tí nkehe jínahya la ko tí t'antaxínhínra kíchuára la ko tí nkehe jínahya t'axrjexín ir'vará. ⁹ Chrókjuich'iyéhyará kíchuára kixin ósé xikaha k'uékjich'erá a ntá jie la ó chrókuítóhéra kaín tí nkehe ntaxin k'uékjich'erá. ¹⁰ A ntá jie la ó tsik'onará ijnko chojni nixin. Dios tinkánchetjóára ch'án kixin ts'onará éxí tí jehe ch'án kixin jehe ch'án kjuích'éna ch'án tí jahará. Mé xikaha chrókjuixraká chróchoxínra tí jehe ch'án jína. ¹¹ Jehya tjetooan á chojni judío o náhi o á chojni tsíka xroye o náhi o á chojni tsíkjin kjin o náhi o á chojni noehya o á chojni ch'exón xra o á chojni t'etoan. Tí nkehe tjetooan la tinkáchónkini Cristo la jehó ch'án t'etuénhen kaín nkehe.

¹² Dios la tjuèhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'onará ijnko chojni nixin la chrókuíkonóghéra kíchuára la jína chrók'uejorá la ko chrókjuínchehnkehýará la ko chrókójiahýará la ko chrókóninkákonhyará. ¹³ Chrókóninkákuénhyará kíchuára la chrók'uitjáyanhanrá ichrén jie kjuasinhanrá í jnko chojni kixin Cristo la k'uitjáyenhen ch'án tí jie kjuásínra la kjaxin jahará la xikaha chrókjuich'erá. ¹⁴ Mé xikaha chrótjuèhéra kíchuára la jnkokoá chrókjuenkayáxinra. ¹⁵ Tí kjuaxróxin kuente Cristo mé chrók'uetuénhen asánra kixin xikaha kjuenkayáxin Dios k'uíyahará ch'án kixin chrók'onará jnkokoá cuerpo kuente ch'án mé xikaha chrókjuancheherá ch'án kjuasáya.

¹⁶ Tí tan kuente Cristo jnkochrín chróchónta asánra. Mé xikaha chrókjuákohéra kíchuára la chrókjuínchechéhéra kíchuára kaín kjuaxrexinkaon jína. Chrótsjerá salmo la ko himno la ko canto kuente Dios la chrókjuancheherá Dios kjuasáya kaín asánra. ¹⁷ Kaín xra chrókjuich'erá la ko tí nkehe chróntáchrora la kaín táha chrókjuanchaxínra ihnié Ìnchéni Jesús la chrókjuanchehéra kjuasáya It'eni Dios kjuachaxién Jesucristo.

Jnkójina chrók'uejóko kíchó tí sín tinkáchónki Cristo

¹⁸ Jahará chojni chjin la chrókjuínchexiteyéhéra tí xiyará kixin mé t'ichjánxin xikaha chrókjuich'erá kixin tinkachónkirá Ìnchéni. ¹⁹ Jahará chojni ntoa la chrótjuèhéra tí ichjiánra la chrókóninkákuénhyará tí jehe tjan. ²⁰ Jahará chánjanra la chrókjuínchexiteyéhéra it'ára la ko inára kaín nkehe chrók'uetooan sín kixin xikaha mé tóxrjínhin Ìnchéni. ²¹ Jahará it'é xjan la chrókjuínchekónínkakonhyará tí xjaanra kixin tí xikaha la chrókjuínchek'ávahýará tí jehe xjan. ²² Jahará chojni ch'exón xra chrókjuínchexiteyéhéra tí lámooará ntihi chjasintajni. Jehya kixin tí tjejótsjehe sín ó chrókjuich'erá xra kixin ntá jína chrók'uejoxínra. Náhi. Kaín asánra chrókjuich'erá xra kixin ó nohará kixin xikaha ch'eherá Ìnchéni xra. ²³ Kaín nkehe chrókjuich'erá la kaín asánra chrókjuich'erá xra éxí chrókjuich'eherá xra Ìnchéni la jehya kixin éxí chojni ó chrókjuich'eherá xra. ²⁴ Ó nohará kixin Ìnchéni la sintakítónhanra tí nkehe chónra ch'án kixin jahará ch'eherá Cristo xra la jehe ch'án mé chaxín Ìnchéni. ²⁵ A ntá tí sín ch'e tí jínahya tsjacha sín tí nkehe jínahya kjuích'e sín kixin Dios la tikonóehya ninkexró ch'e tí nkehe jínahya.

4

¹ Méxra jahará lámorá la jína chrónixjehérá tí sín t'ahará xra. Chróxráinkáonrá kixin kjaxinrá jahará chontará ijnko Dios tjen nkaya nkajní.

² Chrókuítóéhyará nixjehérá Dios la ko chrókuanchehérá ch'án kjuasáya.

³ Kjaxin tjanchehérá ch'án tsjinkítsa tí jeheni kixin tsjanjon Ìnchéni kjuachaxin chrókuinhin chojni tsochrónkaxínni tí itén Cristo. Tí xra k'uénoehya ninkexró mé tjéchjinaxián jie. ⁴ Tsjanchehérá Dios kixin tsjinkítsa ch'án tí janhan kixin chrókianxian jína chrókuàkua éxí tjinkaon Dios.

⁵ A ntá jahará la jína chrókuákohérá itén Dios tí sín naxa tinkáchónkihya Ìnchéni kixin kánhyó tiempo siín kixin tsjàkorá. ⁶ Chrónixjehérá sín jnkojína kixin chrókóxrjínhin sín la chrókónohará chrókuáteherá nkexrí tsixro jnko-jnko chojni.

Kjuixin nixja ch'ín Pablo

⁷ Kíchóni Tíquico, mé ijnko nkexro jína tjinkítsa tí janhan ch'ehe Ìnchéni xra, mé tsjiji ch'án tsochrónka ch'án nkexrí tjén janhan. ⁸ Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará. ⁹ Jehe ch'án la ko kjaxin ch'ín Onésimo mé tjuèheni kíchó ni la ko jehe ch'án mé kjaxin jína ch'e ch'án xra, la mé tsjjitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sítónhen tí tjejóni ntihi.

¹⁰ Ch'ín Aristarco mé jnkokoá tjechjinakian ch'án ntóechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhérrá tí ch'ín Marcos tí tsjjitsjehe ch'án tí jahará la chjehérá ch'án kjuachaxin tsjak'e ch'án jína. ¹¹ Kjaxin nixjahará ch'ín Jesús, kjaxin tikítexín sín ch'án Justo. Jehó tí sín a mé sín judío tinkáchónki Cristo, a ntá ijie tjinkítsa sín tí xra tjét'a la chrónkaxín sín nkehe kuènte tí kjuachaxin kuènte Dios. La tí sín a mé imá kjuínchechàna sín tí janhan. ¹² Ch'ín Epafra nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánrá. Jehe ch'án jnkochrín chrónóehé ch'án Dios tjinkaon ch'án kixin káin asánrá chrókuinkachónkirá Dios éxí tjinkaon ch'án. ¹³ Ó nòna kixin ch'ín Epafra la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis. ¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kíchó ni tjejó chjasin Laodicea la kjaxin nixjehérá tjan Ninfas la ko tí sín tójnkoaté ntóe tjan. ¹⁶ Tió tsjixin sinchekuáxinrá tí xroon tsíkiji tí tjejorá ntiha la ichr'anrá xroon sátsji sinchekuáxin tí sín tjejó ninko chjasin Laodicea la ko kjaxin sinchekuáxinrá tí xroon tsíkijihí tí jehe sín tió tsjiji tí xroon tí tjejorá. ¹⁷ Kjaxin chenkará ch'ín Arquipo kixin chrókuinchexiteyá ch'án jína tí xra tsíkjanjon Ìnchéni sich'e ch'án.

¹⁸ Janhan Pablo tjaná kjinxian tí palabra nixjahará. Jahará chróxráinkáonrá kixin janhan la tjéchjina la Dios mé chrókuintayaonrá. Amén. Ó tjen.

Xroon saoxín ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni ninko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. Kjuasáyé It'éni Dios la ko Ìchéni chrók'uejorá.

Tí sín ókjé chjasin mé kjuíncheyóhe sín tí sín Tesalónica

² Jnkoyaxón chjéheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkitsa ch'án tí jahará. ³ Tió nixjehe ni It'éni Dios xraxinkaonni kixin kaín asánrá kuítekáonrá Ìnchéni, a ntá tjejoch'erá xra la ko imá tjuèhéra kichuára ntá jnkokoá tjejochonhénra tsokjan Ìnchéni Jesucristo. ⁴ Kichóni jahará, imá tjuahará Dios la ó noheni kixin jehe ch'án tsíkjeýará ch'án tí jahará. ⁵ Na mé xikaha tió kjuíjini chjasánra kjuakoharáni tí tan jína nixin tsaáxinni chrónkani na jehya iténi ó. Náhí. Kjaxin kjuachaxièn Nchakuen Dios kjuakoxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jína kixin nkexrí k'uejóni tí tjejorá kixin xikaha chrók'uejorá chrókjuakoxinra.

⁶ Mé xikaha kjuíncheyóhéra tí jeheni la ko kjuíncheyóhéra tí Ìnchéni Jesucristo. A ntá tió kuínhínra tí itén Dios ntá kaín asánra kuinkachónkirá Ìnchéni la ko kócháhará kixin tí Nchakuen Dios mé t'etuenhen asánra kjónté nchónhya nkehe k'uatínkará. ⁷ Mé xikaha kjuákuexinra kaín tí sín tinkáchónki Ìnchéni ntiha estado Macedonia la ko tí sín estado Acaya. ⁸ Jahará kjuakoxinra tí itén Dios la jehya jehó estado Macedonia la ko tí estado Acaya kjuakoxinra. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya í jnko nkehe naxa chróchronkani, ⁹ kixin ijie jehe sín mé tjejóchronka sín kixin nkexrí kjuíjini chjasánra a ntá kaín rá kjuánjonra kjuachaxin k'uejóni la ko kuítekáonra tí itén Dios kjuakoharáni la ntá kuitohéra kaín tí nkehe tsíkjanoya kixin ntá kjuankixinra kuinkachónkirá Dios tjechón chaxín. ¹⁰ La ko kjaxin tjejóchronka sín kixin jahará tjejochonhénra tsokjanxin nkaya nkajní tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasótexínhyani tí nkehe jínahya chrókjuasótexínni itsi.

2

Tí xra tsíkjih'e ch'ín Pablo tí chjasin Tesalónica

¹ Kónohará kaín rá kichó ni kixin jehya chónkó kjuíjini chjasánra. ² Ó kónohará kixin senó tí sín chjasin Filipos k'uekjinchekjasóteni sín la ko k'uek'ántaxínhinni sín. Kjánchó Dios mé kjuínkita ntá chrakonhyani kjuakoharáni tí tan tsaáxinni kuènte Dios kjónté imá k'ueínkakonhenni sín. ³ Kónohará kixin jehya ntoáhya kjuakoharáni la ko jehya ijnko nkehe náxrxónhya kjuakoni la ko kjuít'ayahyaráni ninkehó. ⁴ Náhí. Dios mé kjueya ch'án tí jeheni kixin chrókjuakoni tí tan tsaáxinni, mé xikaha ntoá tjakoni. Jehya kixin chojni ó nchechéheni. Náhí. Nchechéheni Dios tí nkexro nohe nkehe tónhen aséni. ⁵ Ó nohará kixin kjuích'iyaxínhyani itan imá náxrxón kixin xikaha chrókuakitsjexínni chichaon chrókjuachani. Náhí. Dios la ó nohe ch'án

kíxin xikahya kjuích'eni. ⁶ Tjeyáhyani kíxin chojni chrókjuikosáyeheni sín la á jahará la o í so chojni. Náhi, xikahya ch'eni, kjónté chóntani kjuachaxin chrók'uetuanhanráni kíxin chrókjuánjonrá nkehe chrók'uáyéheni kíxin jeheni ch'eheni xra Cristo. ⁷ Jnkójina k'uénixjaharáni k'uék'ejóni. Éxí yóhe ijnko iné xjan t'àyakonhen xjeen kíxin ts'ánkí xjan mé xikaha jeheni k'uàyakonhanráni tí jahará. ⁸ Imá tjuàhará ntá jehya jehó tí itén Dios chrókjuakoharáni. Náhi. Kjónté chrók'uenxínni tí tjakoharáni kíxin xikaha imá tjuahará. ⁹ Kíchóni, chróxraxinkáonrá kíxin tió k'uéjóni chjasánrá la mé nchónhya xra kjuích'eni nchakotjin la ko tie ntá kjuachani chichaon k'uénaxínni nkehe sineni kíxin tjinkakonhyani kíxin chrótjáharáni xra chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kíxin chaxín jína k'uéjokoaráni jahará chojni tinkáchónki Ìnchéni. Nijnko nkexro ts'ekahyani jie kíxin ichrén nkehe jínahya chrókjuich'eni. ¹¹ Jahará ó nohará kíxin kjuakoharáni la ko kjuínchechéheni tí jahará jnkójnkorá éxí ch'e ijnko it'é xjan tjuèhe xjeen ch'án. ¹² La ko k'uetuanhanráni kíxin jína chrók'uejorá éxí tjinkaon Dios chrók'uejó tí sín tinkáchónki ch'án kíxin jehe ch'án ó k'uíyahará ch'án kíxin chrók'uayéherá tí kjuachaxin kuènte ch'án.

¹³ Méxra jnkochrín tjancheheni Dios kjuasáya kíxin tió kuínhínrá tí tan jína kuènte ch'án kjuakoharáni na ntá kjuátsoanrá kíxin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxitóxin ntíjará. ¹⁴ Mé xikaha jahará kíchó ni kjuasótiará kónínkakonhanrá tí sín chjasánrá éxí yóhe kónhen tí sín kuènte Dios tinkáchónki Ìnchéni Cristo Jesús tí estado Judea kíxin tió kjuankíxin kuinkáchónki sín Ìnchéni ntá tí sín judío chjasén sín mé kjuankíxin sín kónínkakonhen sín chrók'óyán sín. ¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuích'e sín la kónínkakonhen sín kaín chojni. A ntá Dios la kóxrjénhya ch'án kíxin xikaha kjuích'e sín. ¹⁶ A ntá tjinkaonni kíxin chrókjuakoheni tí sín jehya judío tí tan jína chrókuaáxin sín a ntá tí sín judío tjinkakonhya sín chrókjuakoni. Na mé xikaha imá nchek'ánkí sín tí jie kuènte sín. A ntá xikaha kjuích'e sín ntá Dios sinchekjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kíchóni, tió kuítóheni tí jahará a ntá kjónté ókjé k'uéjóni la k'uéxraxinkaonni kaín asénni tí jahará la ko imá tjinkaonni chrókjuijitsjeheni tí jahará inaá. ¹⁸ Na mé xikaha janhan Pablo itsjé veces mé tjínkavan chrókjuasántsjaḡa tí jahará, a ntá tí ch'ín Tsochren mé k'uínkakónna ntá xitjahya tsjasán. ¹⁹ ¿Nkehe tsonhen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochèxínni tió tsi Ìnchéni Jesucristo kíxin kuítekáonrá ch'án. ²⁰ Méxra jahará mé kóchèxinni kíxin kuítekáonrá.

3

¹ Ntá imá kóxakonhenni. Ntá kjuenkayáxinni kíxin chrókójina jehóni chrókuítóheni chjasin Atenas ² na ntá ichr'ánni tí kíchó ni Timoteo a tsji-jitsjehe ch'án tí jahará kíxin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kíxin sintaxraxinkaonrá ch'án tí itén Ìnchéni la ko sinchechéhe ch'án asánrá ³ kíxin tsoxrjéhya asánrá má kíxin tí kjuaxróxinhya tjejot'atsínkará. Kíxin xikaha ó nohará kíxin t'ichjánxin tsjasótéxínni tí xra kuènte Ìnchéni. ⁴ Naḡa k'uéjóni jnkokoá ntiha la ó tjonkara kíxin kaín ni kjuaxróxinhya tsonhenni tsjasóteni.

A ntá jie la ó nohará kixin chaxín xikaha kónhen. ⁵ Méxra imá kóxakonna ntá ichr'an kichó ni Timoteo kjujitsjehe ch'án nkexrí tjejorá, á naxa tinkachónkirá Ìnchéni o ách'e ch'ín Tsochren chrókjuachroerá chrókuìtohéra tí ntje Ìnchéni a ntá chrókóchónkó kaín tí xra kjuich'eni kjuakoharáni.

⁶ Na ntá ó kjanxin ch'ín Timoteo chjasánrá Tesalónica chrónka ch'án kixin jína tjejorá naxa tinkachónkirá Ìnchéni, la ko naxa tjejorá tjuèhéra kichuára la ko chrónka ch'án kixin xraxinkáonrá tí jeheni tjinkáonrá chrókjuijitsjeheni tí jahará. Kjaxin jeheni xikaha tjinkaonni chrók'uikonni tí jahará. ⁷ Mé xikaha kichó ni tjejót'atsínkani kjuaxróxinhya ntihi na ntá kjónté kóchéhe asénni kuínhinni kixin kaín asánrá naxa tinkachónkirá Ìnchéni. ⁸ A ntá kuínhinni xikaha kixin jína tjejorá naxa tinkachónkirá Ìnchéni Jesús a ntá antsí kóchéheni. ⁹ Ntá imá tsjancheheni Dios kjuasáya kixin xikaha imá chéhe asénni kixin tí jahará tinkachónkirá ch'án. ¹⁰ Tie la ko nchakotjin chronóeheni Dios kixin tsjanjon ch'án kjuachaxin tsjijitsjeheni tí jahará inaá kixin naxa t'itjayan iso nkehe chrókjuakoharáni naxa chrók'uitjára nkexrí jína chrókuinkachónkirá Ìnchéni.

¹¹ Tjejótjancheheni T'eni Dios la ko Ìnchéni Jesucristo kixin chrókjuinkitsani ch'án chrókjuijitsjeheni tí jahará ¹² la ko tjancheheni Ìnchéni kixin chrókjuinkitsa ch'án tí jahará kixin antsí má chrótjuèhéra kichuára la ko chrótjuèhéra kaín xín chojni éxí yóhe tjuàhará. ¹³ Tjancheheni ch'án kixin sintaxraxinkaonrá ch'án kixin kaín asánrá chrókuitekáonrá ch'án kixin ntá tsochóntahya asánrá ninkehó jie nkayakon It'eni Dios tíó tsokjan Ìnchéni Jesús tsikao ch'án kaín tí sín ó tsikótjóá.

4

Nkexrí tóxrjinhin Dios chrók'uejóni

¹ Jahará kichó ni chronóaharáni la kontaxraxinkaonráni tí kjuachaxin ihnié Ìnchéni Jesús kixin jína chrók'uejorá tinkachónkirá Ìnchéni éxí tjejoch'erá jie kixin éxí kjuakoharáni. Mé xikaha jína sinchechéhéra Dios.

² Ó nohará tí nkehe kjuakuaxinráni kjuachaxin kuente Ìnchéni Jesús. ³ Tí nkehe tjinkaon Dios kixin jína tjóá chrók'uejorá la ko chrókjuásinkoahyará jie í jnko chojni chjin ókjé. ⁴ Jnkojkorá chrókónohará chróchontará jnkojnko ichjiánrá la ko jína chrók'uejorá chrótjuèhéra kichuára. ⁵ Jehya kixin chrókjuakéra asánrá tí nkehe jínahya chrókjuich'erá éxí ch'e tí chojni chónhya Dios. ⁶ Nijnkorá chrókjuich'iyehéra ichjién kichuára xikaha kixin Ìnchéni mé imá sinchekjasóte ch'án tí chojni xikaha sich'e mé xikaha kjuíntaxraxinkaonráni senó. ⁷ Dios mé k'uíyeheni ch'án kixin jína chrók'uejóni, jehya kixin naxa chrókjuasinni jie. ⁸ A ntá tí sín chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhí. Chóntehya sín kjuasáyé Dios, tí nkexro kjuanjon tí Nchakuen chóntani.

⁹ A ntá tí tjuèhéra kichuára la í t'ichjánxinhya naxa chrókjinni tsochronkani kixin nkexrí chrótjuèhéra kichuára kixin jehe Dios mé tjetjakohará ch'án nkexrí chrótjuèhéra kichuára. ¹⁰ Xrácín xikaha tjejoch'erá tjuèhéra kaín tí sín kichó ni tjejót estado Macedonia. Kjánchó chronóaharáni kichó ni kixin antsí má chrótjuèhéra kichuára. ¹¹ Tóxakonhanrá kixin kjuaxróxin chrók'uejorá. Jnkojkorá nohará nketí xra chrókjuich'exínrá tjára éxí k'uetuanhanráni. ¹² Na mé xikaha chrók'uikonni tí sín chónhya Dios ntá chróchóntahará sín kjuasáya la ko chrók'uitjayanhya ninkehó nkehe chrókuicháxinhanrá.

Itsi Ìnchéni Jesús

¹³ Kíchóni, tǵínkavan kǵxin chrókónohará nkehe tsonhen tí sín tsík'en. Na mé tǵínkavan kǵxin kánhyó chrótsjankàmará sín chrókóyóahyará tí sín tinkáchónkihya sín Ìnchéni naxa chóenhya sín kǵxin chróxechón sín inaá. ¹⁴ Kuítekaonni kǵxin ik'uén Ìnchéni Jesús la ko xechón ch'án inaá la ko kǵxin titekaonni kǵxin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani ti jahará tí nkehe kjuako Ìnchéni kǵxin tí naxa tjejóchónni tió tsi ch'án na kjónté naxa tsitónxinhanyi ntia, naxa tsochónhenni tí sín tsík'en. ¹⁶ Jehe Ìnchéni mé ts'inkajinxin ch'án nkaya nkajní la ko itsen tsonixja ch'án kǵxin tí kjuachaxin jié kuènte ch'án la ko ts'èya tí ángel t'etōan la ko tsontáchro tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. ¹⁷ A ntá chr'éxin kaín xínni tjejóchónni la ko kaín xín tí sín tsíxechón mé jnkokoa tsochrìnni kǵxin tí kjuachaxin jié kuènte Ìnchéni. A ntá xríkjan tjuí tsoxetani ch'án. Mé xíkaha ts'ejókoni ch'án jnkochrìxín. ¹⁸ Méxra xíkaha chrókjuínchechéhérá kíchuárá tí tan i kǵxin xíkaha tsonhen tió tsokjan Ìnchéni.

5

¹ A ntá tí yaon tsonhen tíhi kíchó ni t'ichjánxinhya naxa tsokjinni í jnko nkehe tsinhínrá. ² Jahará ó nohará jína kǵxin titàya itsi tí yaon tsokjan Ìnchéni éxí yóhe chrókui ijnko xíchee tí tie a. ³ Ts'ejó sín itsjo sín kǵxin ijie kjuaxróxin tjejó sín kaín sín la ko ninkehó nkehe tsonhen sín. Ntá xrínahya titàya itsi tí kjuaxikaon jié la ko kjuachrakon mé ts'itjáyanxín tí kjuachón chróchónta sín éxí yóhe ijnko tjan tjejá xrínahya titàya tsjankǵxin ts'óntáki tjan kǵxin sinchekokjíhi tjan xjeen tjan na mé jehe tjan xitjahya tsontáchro tjan “Náhí”, mé xíkaha jehe sín chóntahya sín nkerí tsaáxin sín. ⁴ Ntá jahará kíchó ni sítiéhya tjejorá ntá chróchrakonhyará tí yaon itsi Ìnchéni. Tí náhi chróchrakonrá éxí chrókui ijnko xíchee chrókjuintachrakonrá. ⁵ Ntá jie kaín rá mé tjejorá tí ntia t'inkáséyan. Jeheni la jehya tjejóni tí ntia sítié a. ⁶ Méxra xíkaha chrók'uejójuahyani éxí tjejójua tí sín í so na mé chrók'uejótsheni chrókjuenkayáxinni jína. ⁷ A ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a. ⁸ A ntá jeheni na tjejóni tí ntia t'inkáséyan t'ichjánxin kǵxin jína chrók'uejóni chrókjuasinhanyi jié. Chrókuinkáchónkini Ìnchéni la ko chrótjuèhenni ch'án. Ntá jeheni na Ìnchéni ts'ayakonhenni ch'án tsaáxinni ch'án éxí tí ch'ín soldado t'inkáya ka tsík'óna chica kǵxin kohya nkehe tsonhen ntakuin ch'án. La ko chrók'uejóchónhenni itsi Ìnchéni tsaáxinni ch'án na mé éxí tí ch'ín soldado a xrasín ch'án nkehe tsík'óna chica t'ayakonhen kja ch'án kǵxin kohya nkehe tsonhen kja ch'án. ⁹ Kjueyáhya Dios tí jeheni kǵxin chrókjuínchekjasóteni ch'án. Náhí. Kjueyá ch'án tí jeheni kǵxin chrókuaáxinni Ìnchéni Jesucristo. ¹⁰ Jehe Jesucristo mé k'uenyákonhenni ch'án kǵxin chrók'uejókoni ch'án jnkochrìxín kjónté naxa tjejóchónni o kjónté ó tsík'enni tió tsokjan ch'án. ¹¹ Méxra xíkaha chrókjuínchechéhérá kíchuárá la ko chrókjuínkitsará kíchuárá kǵxin jína chrók'uejó sín éxí xráxín tjejoch'erá.

Ch'ín Pablo mé nhexraxinkaon ch'án tí sín tinkáchónki Cristo

¹² Kíchóni chronoàharáni kǵxin chróchontehérá kjuasáyé tí sín tjejóch'e sín xra kuènte Dios ntiha tjejótjitaón sín ntia chrónka sín itén Ìnchéni. ¹³ Na mé chróchontehérá sín kjuasáya la ko chrótjuèhérá sín má kǵxin tí xra tjejóch'e sín. A ntá jahará kaín rá jnkojína chrók'uejokoará kíchuárá.

¹⁴ Méxra tétuanhanrání kíchó ni kǵxin chrókjuéntuéhérá tí sín tjinkakonhya sich'e sín xra la ko chrókjuínchechéhérá asén tí sín kóxrjé asén sín la

ko chrókjuínkĩsará tí sín naxá noehya sín jína la ko chrókóninkákuénhyará ninkexró.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejtjenkayáxinrá.

¹⁶ Méxra nchechéhérá asánrá jnkochrín. ¹⁷ Chrókuítóéhyará chrónixjehérá Dios jnkochrín. ¹⁸ Kjónté ichrén nkehe chrókónhanrá la chróchjehérá Dios kjuasáya kixin xikaha mé tjinkaon ch'án chrókjuákoxinrá kixin tinkachónkirá Ìnchéni Cristo Jesús.

¹⁹ T'ók'ankahyará tí xrohi t'inkáséyanxín Nchakuen Dios. ²⁰ Chonteherá kjuasáyé nkehe tjako tí sín kíchó ni chronkaxín sín kjuachaxin kuènte Nchakuen Dios. ²¹ Chrótsjehérá jína tí nkehe tjejóch'e sín. A ntá tí jína na chrókuítekáonrá. ²² Chrókuítóhérá kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'àyakonhen ch'án nchakuanrá la ko asánrá la ko cuerpo kuèntará kixin tsochóntahya ninkehó jie tió tsi Ìnchéni Jesucristo. ²⁴ Dios tí nkexro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehé ch'án sín la ko tjanchehe ch'án Dios kixin chrókjuincheyáon tí jehe sín

²⁵ Kíchóni chrónóehérá Dios kixin tsjinkĩtsani ch'án kaín ni.

²⁶ La ko nixjehérá kaín xín tí sín kíchó ni ntiha tsehérá tja sín.

²⁷ T'etoanxínni tí kjuachaxin kuènte Ìnchéni kixin nchekuáxinrá tí xroon chr'anhánrá tshinhi kaín xín tí sín kíchó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nínko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. ² Kjuasáyé It'éni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoexín ch'án tí ijé chojni tió tsokjan Ìnchéni Cristo

³ Kichóni chrókjuancheheni Dios kjuasáya jnkochrín kixin tí jahará. Na mé jína xikaha chrókjuich'eni kixin tinkák'ánkí tí tinkachónkirá Ìnchéni Jesús la ko tinkák'ánkí tí tjuèhéra kichuárá tjejorá ntiha. ⁴ Ntá chéheni chenkani tí sín kichó ni kaín tí nínkoe Dios kixin naxá tjákoxinrá kixin naxá tinkachónkirá Ìnchéni kjónté síin chojni nínkakonhanrá la ko kjónté t'atsínkará itsjé kjuaxróxinhya. ⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xikaha tjejotjasótexínrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie. ⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajní tsikao ch'án kaín tí sín ángel t'etoan kuènte ch'án na mé tsikao ch'án xrohi nene. ⁸ Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína kuènte Ìnchéni Jesucristo chrókuaáxin sín. ⁹ A ntá tí sín kuítekakonhya mé tsjasóte sín jnkochrín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etoanxín ch'án. ¹⁰ Xikaha tsonhen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuènte ch'án. Mé xikaha kjaxinrá jahará kixin ó kuítekáonrá tí nkehe kjuakoharáni.

¹¹ Mé xikaha jnkochrín tjancheheni Dios kixin jína chrók'uejorá éxi tjinkaon ch'án chrók'uejó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkitsará ch'án kixin chrókjuachará ch'erá kaín tí xra jína tjinkáonrá chrókjuich'erá kixin tinkachónkirá ch'án. ¹² Mé xikaha kaín xínrá tsjikosáyehérá tí ihnié Ìnchéni Jesucristo la ko jehe ch'án mé kjaxin tsjikosáyahará ch'án kixin tinkachónkirá ch'án. Mé xikaha kjuasáyé Dios la ko Ìnchéni Jesucristo kixin kuikonóeheni ch'án.

2

Tsonoxín ijnko ch'ín jínahya

¹ Kichóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni ² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkójín nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxi jeheni tsíkjanjonni chrónka kixin xikaha tsonhen. ³ Títóéhyará kixin jnkójín nkexro chrókjuít'ayahará

xikaha. Naxa tsihya tí yaon ntá senó itsjé chojni tsonínkakohen sín Dios, la ko tsonoxín ijnko ch'ín jínahya chóna jie, na ntá tíha mé tsjasóte jnkochrín. ⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxin ch'án nkaxenhen tí ninkoe Dios kixin jehe ch'án mé sich'ena asén ch'án éxí Dios tí jehe ch'án.

⁵ ¿Á xráxinkákonhyará kixin xikaha k'uéxrjanka senó tí naxa k'uéjóni jnkokoá? ⁶ Ntá jahará ó nohará nkehe tí kjuachaxin naxa chónthe kixin naxa tjexrakáhya tí yaon tsonoxín tí ch'ín jínahya. ⁷ Ntá jie imó ch'e xra tí kjuachaxin jínahya. Kjóté naxa t'itjayan kixin sáchrókjuí tí nkexro chónthe. ⁸ A ntá tí ch'ín jínahya tsonoxín ch'án. Ntá tió tsi Ìnchéni Jesús ntá tí itén ch'án ts'axrjexín ir'va ch'án ó mé ts'enxín tí jínahya a kixin mé xikaha sinchek'itjayanxín ch'án tí jínahya tí kjuachaxin jié tsikao ch'án. ⁹ Méxra tí ch'ín jínahya mé tsikao ch'án tí kjuachaxin kuente ch'ín Tsochren la mé xikaha tsochóna ch'án kjuachaxin jié tsjakoxin ch'án sich'iyaxín ch'án tsjasin ch'án kjuaxroan ntoáhya. ¹⁰ Mé xikaha kaín nkehe jínahya sich'iyexín ch'án tí sín xráxín ts'itjayan sín kixin chrohya sín chrókuitekaon sín tí tan chaxín ntoá chrókuaáxin sín. ¹¹ Méxra tsítóhe Dios tí jehe sín kixin tsitekaon sín kaín nkehe chaxínhya ¹² kixin ntá tsjasóte kaín tí sín kuítékakonyha sín tí tan chaxín chrókuaáxin sín na mé antsí kóxrjínhin sín chrókjuasín sin jie tsjasótexín sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsikjeyá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuítékáonrá. ¹⁴ Méxra xikaha k'uíyahará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jié kuente Ìnchéni Jesucristo.

¹⁵ Mé xikaha kichó ni, jína chrók'uejorá chrók'uitjayanhyará tí nkehe kjuakoharáni tió k'uéjóni jnkokoá la ko tí nkehe chrónka tí xroon ikjinni k'uayéhérá. ¹⁶ Ntá Ìnchéni Jesucristo la ko It'eni Dios na mé tí nkexro kjuasáyé ch'án tjuèhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni ¹⁷ na mé sinchechéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kixin tsjinkitsa kaín ni

¹ Méxra kjuixixín chrónóaharáni kichó ni kixin chrókjuancheherá Dios kixin chrókjuinkitsa ch'án tí jeheni kixin tjoka sáchrókjuikjakoni itén Ìnchéni nkuíxín kixin ntá tsinhin chojni la tsjikosáyehe sín ch'án éxí yóhe kuítékáonrá jahará. ² Kjaxin nixjehérá Dios kixin chrókjuinkitsani ch'án kixin kohya nkehe chrókónhenni tí siín chojni jínahya nínkakohenni kixin kénhya sín tinkáchónki Ìnchéni. ³ Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkitsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá. ⁴ Ó noheni kixin Ìnchéni la tsjinkitsa ch'án tí jahará kixin naxa sich'erá xra éxí k'uetuanhanráni. ⁵ Ìnchéni tsjinkitsará ch'án tsonohará kixin Dios la tjuahará ch'án la ko tsjinkitsará ch'án kixin chrókóninkákonhyará éxí kónínkakonyha Cristo.

T'ichjánxin chrókjuich'eni xra

⁶ Kíchóni t'etoanxínni tí kjuachaxin ihnié Ìnchéni Jesucristo kíxin chrók'uaxrjekjanxínrá tí sín kíchó ni tjinkakonhya sich'e xra la ko xrihya sín éxí kjuakoharáni. ⁷ Ó nohará kíxin nkexrí chrók'uejorá chrókjuákoxinrá éxí k'uéjé tí jeheni kíxin tí k'uéjékoaráni la jehya kíxin kjuích'ehyani xra. ⁸ Jehya kíxin kjóneni niotjé jnkójín nkexro ntá chrókjuenkahyani. Náhí. Kóxakonhenni nchakotjin la ko tie kjuích'eni xra kíxin ninkehó chóntiaxinhyani tí jahará kíxin chrókjuánjonrá tí nkehe chrókjóneni. Náhí. ⁹ Kjónté chóniani kjuachaxin chrókjuanchaharáni kíxin chrókjuínkĩsará tí jeheni kjánchó jeheni na kjuích'eni xra kjuákoxinni kíxin xikaha jahará chrókjuích'erá xra. ¹⁰ Kíxin tí naxa k'uéjóni jnkokoá ntiha k'uetqanni kíxin: Tí nkexro tjinkakonhya ch'e xra la kjaxin chrókjonehya. ¹¹ Ó kuínhinni kíxin tjejorá jnkójínrá ninkehó xra ch'ehyará a ntá kjuach'ia ó xríkoará. ¹² A ntá tí kjuachaxién Ìnchéni Jesucristo t'etoanxínni la ko chrónóexinni tí sín a kíxin chrókóninkakonhya sín chrókjuích'e sín xra kíxin chrókjuacha sín chichaon chrók'uite tí nkehe chrókjone sín.

¹³ Ntá jahará kíchó ni, chrókóxrjéhyará chrókjuích'erá tí nkehe jína. ¹⁴ A ntá tí tjen jnkójín nkexro titekakonhya tí nkehe t'etoanxínni tí xroon i la tsjehérá jína nkexro tíha la ntá chrók'uitohyará ch'án la ntá chrókósuèhe ch'án. ¹⁵ Kjánchó jehya kíxin chrókjuánjonkoará ch'án. Náhí. Chrókjuínchexraxinkáonrá ch'án jnkójína éxí ijnko chojni kíchó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochrín kjónté ichrén nkehe chrók'uatsínkará. Jehé ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xikaha chrókjuátsoanxínrá tí letra kaín carta tsíkjan.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi. ² Ikjian tí xroon chr'anhan jaha Timoteo. T'íkuan éxí xjanna tí jaha kixin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókuikonóaha ch'án kixin kjuaxróxin tsjak'e jaha.

Chrókjuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxí xrxannóaha tió sákjuia estado Macedonia la mé jaha chrókuitoaha tí chjasin Éfeso la ntaha chrókuétuénhén iso tí sín ntiha kixin chrókjuakohya sín tí nkehe ntoáhya. ⁴ La ko chrókuétuénhén sín kixin chrókuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkitsahya kixin sinchexiteyéhéni Dios kixin tinkáchónkini ch'án.

⁵ Tí nkehe tjinkaonni la chrótjuèheni kichó ni kaín ni kixin ó kótjóá asénni la ko ó noheni kixin jína tjenkayáxinni la ko kaín asénni tinkáchónkini Cristo. ⁶ Iso sín la kjuíchròde sín kixin itjo tí nkehe chónkó. ⁷ Tjinkaon sín chrók'óna sín maestro chrókjuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jína tí chrokjuakoni éxí tjinkaon Dios. ⁹ Ó noheni kixin tí sín tjasinhya jie t'ichjánxienhya sín tí ley tsík'etoan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jie la ko tí sín chóntahya kjuasáyé Dios la ko tí sín t'óyán it'é la ko iné sín la ko kaín tí sín tjàya. ¹⁰ La ko tí sín tjasinko jie ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakohen tí nkehe jína tjakoni. ¹¹ Tí nkehe tjakoni mé chaxín tí tan jína sinchekaá chojni la tí Dios tjetoan mé k'uetuanna kixin tsjàkua tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo kixin imá kjuínkitsana ch'án la ko k'uíkon ch'án kixin jína sít'aha ch'án xra ntá chjina ch'án tí xra i. ¹³ Mé xikaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkíha sín la ko chrók'oyán sín. Kjónté la Dios imá kuikonóehe ch'án tí janhan kixin ó nohe ch'án kixin k'uékinkachónkihya janhan tí jehe ch'án la ko k'uénonahya nkehe tí xra k'uékjit'a. ¹⁴ Méxra Ìnchéni antsí má kjuíncheyaonna kixin ntá kjuanjon ch'án kjuachaxin kixin tsinkachónkia ch'án la ko tsotjuaha ch'án. Mé xikaha kaín ni chóntani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ni chrókuitekaonni. Ikui Jesucristo chjasintajni kixin sinchekaá ch'án tí sín kjuasin jie. Ntá janhan mé antsí má kjuásian jie.

¹⁶ Kjónté xikaha kjuít'a la Dios antsí má kuikonóana ch'án tí janhan kixin xikaha kjuakoxin Jesucristo kixin kónínkakonyha ch'án. Mé xikaha tsjàkuaxian kaín nkexro tsitekaon tí jehe ch'án kixin tsochóna sín kjuachón jnkochrín.

¹⁷ Ntá jnkochrín tsochónteheni kjuasáyé tí Rey t'etoan. Jehe ch'án mé ijnko

nkexro xráxín tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxí xjanna t'íkuan tí jaha, la kaín tí xra i tjaha kixin tsjanjonkoa tí jínahya la tsjacha kixin tinkachónkia jína Ìnchéni la ko tjenkayáxian tí nkehe jína. Mé xikaha sinchexiteyá tí nkehe kuínhín senó kixin tí sín kichó ni chrónkaxín ihnié Dios. ¹⁹ Í so sín la kjuenkayáxinhya sín tí jína ntá kjuíchròe sín kuítóhe sín tí nkehe tinkachónki sín. ²⁰ Mé xikaha kónhen ch'ín Himeneo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xikaha ts'itja sín kixin í ts'ántaxíenhya sín Dios.

2

Nkexrí chrónixjeheni Dios

¹ A ntá saoxín la xrjanóaha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkitsa ch'án kaín xín chojni. ² Chrókjuanchia sín kixin Dios imá chrókjuinkitsa ch'án kaín tí sín t'etòan la ko tí sín gobierno kixin ntá kjuaxróxin ts'ejóni la ko sinchexiteyéhéni Dios la ko ntoá ts'ejóni. ³ Xikaha mé imá jína la tóxrjínhin Dios, mé tí nkexro tsaáxinni. ⁴ Jehé ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsonohe chojni tí nkehe chaxín ntoá. ⁵ Mé itjen jnkokoáxón Dios la ko itjen jnkokoáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasintajni. ⁶ Jehé Jesucristo mé k'uenyákonhenni kaín xinni, kjuenkayákonhen ch'án ijiéni kixin tsaáxinni ch'án. Táha mé xiteyá tí tsíntáchro Dios ósé kixin xikaha tsonhen ch'án. ⁷ Méxra tí xra mé kjueyána Dios kixin tsjíkjakohá tí sín jehya judío kixin tsinkáchónki sín Jesucristo la ko tsonohe sín tí nkehe chaxín. Janhan mé tinkachónkia Cristo la xrjanka tí nkehe chaxín mé t'ayahya.

⁸ Méxra tjínkavan kixin kaín tí sín ntoa mé chrónixjehé sín Dios la chrókjuaya sín tja sín la chrókótjóa asén sín la ko chrókóninkakonhya sín la ko chrókjuéhya sín kjuanínkaon. ⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxihi sín nkehe tjete xroxrjo náxrjón la ko chrók'uitsahya sín ika imá tjete. ¹⁰ Íchá jína kixin tí chojni chjin chrókjuich'e sín tí xra jína éxí chrókjuich'e kaín tí sín tsíkjinchetjóa Dios. ¹¹ Tí chojni chjin t'ichjánxin chrókuinhin sín itén Dios la chrónixjahya sín la ko chrók'uetòanhya sín. ¹² A ntá janhan tjánjonhya kjuachaxin kixin chojni chjin chrókjuako tí nchónhya chojni síin la ko tjánjonhya kjuachaxin chrók'uetuénhen sín chojni ntoa. Jehé sín la tání sín chrók'uejó sín ¹³ kixin saoxín la Dios kjuíchéna ch'án tí ch'ín Adán la ntá chr'éxin kjuíchéna ch'án tjan Eva. ¹⁴ A ntá ch'ín Adán la ninkexró kjuích'iyehya ch'án. Náhí. Tí tjachjin mé tsíkitekakonhen tjan tí nkexro tsíkijich'iyehé tjan ntá xikaha xrankíxixín k'uúxin jie. ¹⁵ A ntá tí chojni chjin la kjónté xikaha kjuích'e sín la Dios sinchekaá sín tí jína ts'ayakonhen sín xjeen sín la tí chaxín tinkachónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejó tí sín t'etuenhen tí ninko

¹ Ijnko nkehe chaxín tjonka. Tí nkexro tjinkaon sich'e xra kuènte ninko mé imá jína xra tjinkaon ch'án. ² Tí ch'ín chrók'uetòan mé ntoá chrókjuak'e ch'án kixin kohya nkexro chrók'ueka ch'án jie la ko kjaxin chróchóna ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchóna ch'án kjuasáyé ch'án la ko kjaxin

jína chrónixjehe ch'án tí nkexro tjiji ntøe la ko kjaxin chrókónohe ch'án tí nkehe chrókjuako ch'án. ³ La ko kjaxin chrókókoanhya ch'án la ko chrókjuehya ch'án kjuanínkaon la ko kjaxin chrókóxrjienhya ch'án kixin chrókjuacha ch'án nchónhya chichaon. A ntá chrókójiehya ch'án la ko kjuaxróxin chrókjuak'e ch'án la ko chrókóxrjienhya ch'án chróchónta ch'án itsjé chichaon. ⁴ Jehe ch'án mé kjaxin jína chrók'uetuēnhen ch'án tí sín tjejó ntøe ch'án la ko chrókjuentuēhe ch'án xjeen ch'án kixin tsitekaon xjan la tsjikosáyehe xjan it'é xjan. ⁵ Tí tsjachahya ch'án ts'etuēnhen ch'án tí sín tjejó ntøe ch'án la ¿ntá nkexrí chrók'uetøan ch'án tí ninko kuēnte Dios? ⁶ Íchá jína kixin jehya ijnko nkexro na ntá k'uixenhen chrókjuako kixin tí nkexro na ntá k'uixenhen la imá chrókjuinchehnke ch'án la ntá chrókjuasin ch'án jie éxí kjuasin ch'ín Tsochren ijie senó. ⁷ Kjaxin t'ichjánxin kixin kaín xín tí sín naxa tinkáchónkihya Inchéni mé tsochónta sín kjuasáyé tí ch'ín t'etøan a. Tí náhí la ts'eka sín ch'án jie ntá tí xikaha la ch'ín Tsochren tsjacha tsjachrøe tí ch'ín a ntá tsjasin ch'án jie.

Nkexrí chrók'uejó tí sín tsjinkitsa tí xra kuēnte ninko

⁸ Kjaxin tí sín diácono ch'e xra kuēnte ninko la kjaxin ntoá chrók'uejó sín kixin chróchóntehe sín kjuasáyé chojni. Kjaxin t'ichjánxin kixin chrókjuinchehiteyá sín tí nkehe ntáchro sín la ko chrókókoanhya sín la ko kjaxin chróchóntiaxinhya sín itsjé chichaon chrókjuacha sín. ⁹ T'ichjánxin chrókónohe sín jína tí nkehe tinkáchónki sín kixin jehe sín chróxraxinkaon sín á nchoxon tí xra ch'e sín. ¹⁰ Saoxín chrótsjehe kaín chojni á ninkehó jie chóntahya tí nkexro la ntá tí chaxín jína jehe ch'án la ninkehó jie chóntahya ch'án ntá jína ts'ixenhen ch'án tí xra kuēnte ninko. ¹¹ La ko kjaxin tí chojni chjin mé chrók'uejó sín jína kixin chróchónta sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchehiteyá sín kaín nkehe. ¹² Tí sín diácono la mé chróchónta sín jnkokoá ichjién sín la jína chrók'uetuēnhen sín xjeen sín la ko jína chrók'uetøan sín ntøe sín. ¹³ T'ichjánxin ijnko xra jína sich'e sín kixin ntá tsjacha sín ts'áyéhe sín ijnko nkehe jína tsjanjon inchéni la ko kjaxin tsøsuèhya sín tsochrónka sín nkexrí tinkáchónki sín Cristo Jesús.

Dios mé kjuínchenoheni tí nkehe k'uékiénxínhyani

¹⁴ Tjínkavan tjoka chrókjuasántsjahe tí jaha kjánchó senó tsokjian tí xroon i. ¹⁵ A ntá tí tsøxrjenna isé ntá kjónté tsonoha nkexrí chrók'uejó tí sín naxa kjéhya Dios mé tí sín t'óna ninkøe Dios tjechón. Jeheni kaín ni mé tjejó'tayakonhenni tí tan chaxín ntoá. ¹⁶ Ninkexró chróntáchrohya kixin chaxínhya tí nkehe tinkáchónkini mé ijnko nkehe imá jie tíha la ninkexró k'uénoehya tí senó a.

Dios mé ikui k'óna chojni;

ikui ch'án kjuakoxin ch'án kjuachaxién Nchakuen Dios chónta ch'án kixin jína tí jehe ch'án.

La ntá tí sín ángel mé k'uíkon sín ch'án

la kuenté chjasintajni mé ó kuínhin sín nkehe chrónka ch'án

ntá itsjé sín kuítekaon sín ch'án.

Ntá Dios k'uáyéhe tí jehe ch'án nkaya nkajní.

4

Tí sín kuítóhe tinkáchónkihya Cristo

¹ A ntá ntáchro Nchakuen Dios kixin tí chjina tsjeje chjasintajni mé iso sín mé tsítóhe sín í tsinkáchónkihya sín Inchéni la ntá tsitekaon sín nchakuen tí jínahya sich'iyehe sín la ko tsitekaon sín tí nkehe tjako tí sín demonio.

² Mé tsinhin sín tí nkehe tjako tí chojni tjuáhya la ch'ia sín. Kjónté imá

tsjasin sín jië la í tsosuèhya sín kixin éxí tsíchján tí tjenkayáxixín sín la í tjenkayáxinhya sín jína. ³ Jehe sín mé tjinkakonhya sín kixin chrókótehe chojni la ko kjaxin tjinkakonhya sín kixin chrókjóneni nto. A ntá jeheni ó noheni kixin Dios mé kjuích'éna ch'án kaín xín nkehe ineni la tjinkaon ch'án kixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni. ⁴ Méxra kaín xín tí nkehe kjuích'éna Dios la jína la kohya nkehe chróntáchroni kixin jehya jína sineni. Chrókjuancheheni Dios kjuasáya la ntá jína chrókjóneni ⁵ kixin tió tsoxraxinkaonni itén Dios la tsonixjeheni ch'án la ntá sincheyaon ch'án tí nkehe sineni.

Ijnko chojni jína ch'ehe xra Jesucristo

⁶ Jaha tjácohé tí sín kichó ni kaín tí nkehe i la ntá xikaha imá jína sich'ehé xra Jesucristo la ko antsí tsjinkitsa ch'án ts'ánkí kjuaxrexinkaon kuéntá tí tinkáchónkia tí tan kuénté ch'án la ko naxa tjákua tí nkehe jína ó xrákoha. ⁷ Jaha mé tahya kuénté tí cuento chónkó la ko tí nkehe ntoáhya tinkáchónki iso sín. A ntá jaha la chrókuitoéhya chrókuinkachónkia Dios. ⁸ Tí chojni tsítán la jína tíha kjánchó antsí má tjetoan chróxraxinkaonni Dios. Tíha la tsjinkitsa kixin jína xritjéjóni ijie la ko kjaxin tsjinkitsa kixin ts'áyéheni kjuachón jnkochrín xín tió tsokjan Inchéni. ⁹ Kaín tíhi mé chaxín la kaín chojni chrókuitekaon. ¹⁰ Mé xikaha kjónté t'ántaxínhinni chojni la jína ch'eni tí xra i kixin tinkáchónkini Dios tjechón. Jehe ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'ichjánxín tsétoan la ko tsjákua. ¹² Jaha chrókuitoéhya kixin chrokjuaoná sín kjónté naxa ntasoyá. Chrókuákoxián tí sín tinkáchónki Inchéni nkexrí chrónixja sín la ko nkexrí ntoá chrók'uejó sín la ko nkexrí chrótuèhe sín Dios la ko nkexrí chrókuitekaon sín Inchéni la ko nkexrí tjóá chrók'uejó sín. ¹³ Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sinchexraxinkávan kaín tí sín kichó ni la ko tjácohé sín. ¹⁴ Sinchek'itjáyanhya tí kjuachaxién Dios k'uayéhé tió tí sín t'etóan kuénte ninko kjuachaxién Dios k'uejotja tja sín chrítaón ikjá.

¹⁵ Chrókóxakonhan chrókuinchehiteyá kaín tíha kixin kaín chojni tsotsjehe sín kixin jína noha. ¹⁶ Chrókuenkayáxian jína tí nkehe tjákua kixin jína chrókuak'e jaha, chrókuinchehiteyá kaín nkehe la ntá tí xikaha sich'e la tsaá jaha la ko tí sín tjejótinhin tjákua la tsaá sín kjaxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó táda. Náhí íchá jína chrónixjehé sín jnkójina éxí chrónixjehé it'á. La kjaxin tí sín ntasoá chrónixjehé sín éxí chrónixjehé kichuá mero. ² A ntá tí sín ó nána la mé chrónixjehé sín éxí chrónixjehé iná xikaha. Kjaxin tí sín tjarisoá mé jnkójina chrónixjehé sín éxí chrónixjehé kichuá mero la kjaxin chróchóntehé sín kjuasáya.

³ La ko kjaxin chrókuínkitsa tí síchjin tsíkók'án la ko nchekitonhén sín nkehe sine sín tí chaxín kohya nkexro tsjinkitsa sín. ⁴ A ntá tí chojni chjin tsíkók'án chóna xjeen o chóna ìnté, a ntá tí jehe sín mé chrók'uitja sín chrókuinkitsa sín kixin sine tí sín kjéhya sín. Tíha mé chrókuenkaxin sín tí it'é, ìné sín kixin kjuínchek'ánkí sín, kixin xikaha mé jína tóxrjínhin Dios. ⁵ Tí tjan chaxín tsíkók'án na jehó tjan tjan mé jehó Dios tinkáchónki tjan la imá chrónógehe tjan Dios tie la ko nchakotjin. ⁶ A ntá tí sín tsíkók'án ixri sín tjasin sín jië la kjónté tjejóchón sín la éxí tsík'en sín xikaha tjejó sín. ⁷ Tétuénhén tí sín kixin sinchexiteyá sín kaín tíha kixin tsókohya nkexro tsjanchia jië. ⁸ A ntá tí nkexro

tóxakuenhya kixin tí sín naxa kjéhya la ko kjaxin tóxakuenhya kixin tí sín tjejó ntoe ch'án mé xikahó tjakoxin kixin ninkehó tinkáchónkihya ch'án Dios. Mé xikaha antsí chóna ch'án jie a ntá tí sín tinkáchónkihya Ìnchéni la kénhyó.

⁹ Tí ts'ínixín ihnié tí sín tsíkók'án la chrók'uínixín jehó tí sín chóna sesenta nánó la ko tí sín k'uéchóna sín jnkokoá xii. ¹⁰ Kjaxin chrókjuakoxin tjan kixin jína ch'e tjan xra la ko chrókjuakoxin tjan kixin jína kjuínchek'ánkí xjeen tjan la ko kjaxin jína nixjehe tjan tí nkexro tjiji ntoe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkítsa tjan tí sín níhi la ko í so xra jína kjuích'e tjan.

¹¹ A ntá chrók'uénixínhya ihnié tí sín tsíkók'án naxa tsjéhya nánó chóna kixin tsontácho asén sín kixin í jnko chojni ntoa tsotehe sín inaá la ntá tsítóhe sín ixra kuente Cristo. ¹² Ntá xikaha tsjasin sín jie kixin sinchexiteyáhya sín tí nkehe tsintácho sín. ¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jína tí xikaha chrónixja sín. ¹⁴ Méxra tí sín tsíkók'án naxa tjarisoá sín la íchá jína chrókótehe sín chróchóna sín xjeen sín la ko chrók'uàyakonhen sín ntoe sín. A ntá tí xikaha la tí sín nínkakonhan la chrókjontahya sín tí jaha. ¹⁵ A ntá iso tí sín tsíkók'án ó kuitohe sín tinkáchónki sín Ìnchéni kixin ch'ín Tsochren tsíkjachróde sín.

¹⁶ A ntá jnkojín chojni tinkáchónki Cristo ts'ikon sín kixin tsíkók'án tí síchjin kjéhya sín ntá t'ichjánxin tsjinkítsa sín kixin sine tí sín a kixin tsochóntiahya sín tí nínko tsjinkítsa. Méxra jehó tí sín chaxín tsíkók'án chónahya ninkexró tsjinkítsa mé chrókjuinkítsa tí nínko.

¹⁷ Tí nkexro jína t'etoan xra kuente nínko la jehe sín chrókjuacha sín la ko kjaxin antsí chrókjuikosáyehe chojni tí sín chaxín xra ó tjejóchronkaxín sín la ko tjako sín. ¹⁸ Kixin xroon itén Dios mé ntácho kixin: “Chrók'uéjójáhyará kamposa ir'va tí koxinta tjejóch'e xra”, la ko kjaxin ntácho kixin: “Tí sín ch'e xra la síin kjuachaxin chrókjuacha sín.”*

¹⁹ Chrókuahya kuenté jnkojín nkexro tsjikao kjuach'ia t'eka jie tí nkexro t'etoan xra kuente nínko. T'ichjánxin tsonoxín yaá o iy'á sín tsochrónka kixin chaxín chóna jie tí nkexro a. ²⁰ Chrókjuéntuéhé tí sín tjasin jie nkayakon kaín sín kixin ntá tsinhin tí í so sín kixin tsochrakon sín, í tsjasinhya sín jie.

²¹ Tétuanxian kjuachaxién Dios la ko Ìnchéni Jesucristo la ko tí sín ángel kjueyá ch'án kixin jnkokón tsjéntuéhé kaín chojni la ko jnkokón tétuénhén sín kaín tí nkehe xrjanka. ²² Chrókjuéyáhya chjini jnkojín sín kixin ts'etoan sín xra kuente nínko kixin tí chróchóna sín jie la kjaxin jaha chrókuamá tí jie. A ntá jaha chrókuítóhé kaín nkehe jínahya.

²³ Jaha la jnkoyaxón tóniha tjoté tsaa. Jehya ìnta ó chrók'uia. Kjaxin intsi xranvino chrók'uia ntá chrókuítóaxián jína.

²⁴ Tí ijie jnkojín chojni la t'ikonni noxín tí naxa kuitoexínhya ijie sín. A ntá í so sín nóxinhya tjasin sín jie kjánchó tió tsjixixín la tsonoxín tí jie tjasin sín.

²⁵ Mé xikaha kjaxin ó t'ikonni kixin iso chojni imá ch'e sín tí xra jína. A ntá í so sín kjónté t'ikonhyani la xitjahya tsjak'emá sín tí nkehe jína ch'e sín.

6

¹ Tí sín ch'exín xra mé t'ichjánxin tsochóntehe sín kjuasáya tí lamo kuente sín, kixin ntá tí í so sín la ts'ántaxiéhya sín ihnié Dios la ko ts'ántaxiéhya sín tí nkehe tjakoni. ² A ntá tí sín ch'exín xra la chóna sín lámoe sín tinkáchónki Cristo la mé chrókuítóehya sín tsjikosáyehe sín tí lamo kixin jnkokoá kichó

* 5:18 Deuteronomio 25.4, Mateo 10.10; Lucas 10.7

sín. La mé antsí jína chrókjuinkitsa sín kixin ó nohe sín kixin tjinkitsa sín ijnko nkexro tinkáchónki Cristo la chrótjuèhe sín kichó sín. Jaha mé tjákehé sín kaín tíha.

Tí nkehe tinkáchónkini tsochèxinni

³ Iso sín tjako tí nkehe jehó sín tjenkayáxin sín la tóyóghya tí nkehe jína kjuako Ìnchéni Jesucristo la ko jehya tí nkehe tinkáchónkini. ⁴ Ó jehí nchehnke sín la nínkehó noehya sín. Tí ntoáhya nixja sín la tíha mé éxí ijnko chin chóna sín la tíha mé tjiñin tí kjuachjinoxínhin la ko tjanjonko kichó sín la ko t'ántaxínhin sín kichó sín la ko chóntehya sín kichó sín kjuasáya. ⁵ Mé tí sín la náxrjónhya tjenkayáxin sín la jnkochrín tjanjonko kichó sín la noehya sín tí nkehe chaxín. Mé tjenkayáxin sín kixin tinkáchónki sín Ìnchéni kixin xikaha chrókjuacha sín nchónhya chichaon, ichro sín. Jaha la chrókuítoghé tí sín xikaha ch'e. ⁶ Tí tinkáchónkini Ìnchéni la ijnko nkehe imá tjetoan la ko tjete tíha a ntá kjuaxróxin chrók'uejóni kjónté tí nkehe chóntani ó. ⁷ A ntá tí kokjihin la ninkehó kuikohyani tí kuini chjasintajni la kjaxin tió ts'enni la ninkehó nkehe xitjahya sátsjikoni. ⁸ A ntá tí chóntani nkehe sineni la ko chóntani ikéni la kjónté táhó la chrókóchéheni. ⁹ A ntá tí sín tjinkaon sín imá chrókóríko sín mé tí sín a mé tsjichròe sín la lontí sín kixin xikaha tjenkayáxin sín, la mé ts'itjáyanxín sín tíha. ¹⁰ Tí imá tjuèheni chichaon la tíha mé nuèé kaín nkehe jínahya. Jnkójín chojni imá tjinkaon sín tsochóna sín chichaon ntá tsjichròe sín tsítóhe sín tsinkáchónki Ìnchéni la tíha mé imá sinchekjasótexín sín asén sín.

Jína tí nkehe tinkáchónkini

¹¹ Jaha mé tinkachónké Dios la títóhé kaín tí nkehe i. Chrókjuak'e ntoá la ko kaín asán chróxráxinkávan Dios la ko chrókuinkachónkia ch'án la ko chrótjuéhé kichua la ko chrókónínkákonhya tjoka la ko chrókjuinchehnkehya asán. ¹² Tjanjonkoa kaín nkehe jehya tí jína la ko kaín asán tinkachónkia Ìnchéni kixin ntá chrókjuacha chrók'uayéhé tí kjuachón jnkochrín kixin mé xikaha k'uíyaha Dios tí jaha. Jaha la ó tsíchronka kixin tinkachónkia Ìnchéni la ó kuínhin la ko k'uíkon nchónhya chojni. ¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé tétuanhan ¹⁴ kixin sinchexiteyá kaín tí nkehe t'etóan Dios kixin í chrókjuínkíhya tí nkehe chrókuinkachónkia la ntá tsokohya ninkexró ts'eka jie tió tsjixrakájia tí yaon tsokjan Ìnchéni Jesucristo. ¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chóna ch'án kjuachaxin ts'etóan ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Ìnché kaín chojni. ¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsochjina tí tjen ch'án. Nínkexró k'uíkonhya tí jehe ch'án la ko nínkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chóna ch'án kjuachaxin ts'etóan jnkochrín. Amén.

¹⁷ Tí sín chóna itsjé nkehe chjasintajni mé tétuenhén sín kixin sinchehnkehya sín la ko tétuenhén sín kixin tsochóntiáxinhya sín tí nkehe chóna sín kixin jnkochrínhya tsochóna sín tíha. Íchá jína chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xikaha tjinkaon ch'án tsochéheni. ¹⁸ Tétuenhén sín kixin chrókjuich'e sín tí nkehe jína kixin tí chaxín chrókóríko sín la chrókjuinkitsa sín kichó sín la chrók'óxikayéhe sín tí nkehe chóna sín. ¹⁹ Mé xikaha chrókjuacha sín tí nkehe tjete kixin chr'éxin la jína chrók'uejó sín kixin chrókjuacha chróchóna sín tí kjuachón jnkochrín.

Kjuixixín k'uituenhen ch'ín Timoteo

²⁰ Jaha Timoteo t'ayakonhén tí xra la tiénhya tí nkehe ntoáhya nixja chojni. Ntáchro sín kixin imá nohe sín kjánchó chaxínhya tíha. ²¹ Iso sín ó xikaha ntáchro sín kixin imá nohe sín la ntá kjuíchròe sín í tinkáchónkihya sin Ìnchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'énnen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo mé kjueyána Jesucristo t'ahá ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochóna chojni kjuachón jnkochrixin tí tsinkáchónki sín Jesucristo. ² Ikjian tí xroon i chr'anhan jaha kichó ni Timoteo. T'ikuán éxi xjanna tí jaha mé imá tjuaha. Kjuasáyé It'eni Dios la ko Ìnchéni Jesucristo chrókuintayavan ch'án la ko chrókuikonòaha ch'án la ko chrótjáha ch'án kjuaxróxin.

Chróchronka ch'án kixin tinkáchónki ch'án Jesucristo

³ Xráinkavan tí jaha tió níxjaha Dios nchakotjin la ko tie la ko tjétjáncháha kjuasáyé Dios kixin imá tinkachónkia ch'án. Jehe ch'án mé t'ahá xra kaín asenná éxi xikaha mé k'uékjich'e tí sín tsík'axrjenixinna. ⁴ Xráinkavan jnkochrixin nkexrí tsjanka la tjínkavan kixin chrótsjaha tí jaha inaá kixin tsochéhe asenná. ⁵ Ó nòna kixin kaín asán tinkachónkia Jesucristo. Kjaxin náchria tjan Loida la ko iná tjan Eunice mé saoxín kuinkáchónki sín Ìnchéni Jesús la ntá ó nòna kixin kjá kjaxin jaha xikaha tinkachónkia ch'án.

⁶ A ntá ijie ntaxráxinkávan kixin chrók'uitjáyanhya tí kjuachaxiэн Dios kjuanjon ch'án k'uayéhé tió kjuaké tjaná chrítaón tí jaha. ⁷ Dios la kjuanjonhya Nchakuen ch'án kixin tsochrakonni. Náhí. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni. ⁸ Chrókósuàhya chróchronka kixin tinkachónkia Ìnchéni la ko kjaxin chrókósuàhya chróchronka kixin janhan tjéchjinaxiэн tí xrjanka itén ch'án. Kjónté la íchá jína chrókjuasótexiэн tí tjàkua tí tan tsaáxinni kixin tí kjuachaxin kuènte Dios ó k'uayéhé. ⁹ Jehe Dios mé kuaáxinni la ko kjueyá ch'án tí jeheni kixin jína chrók'uejóni. La jehya tí xra jína kjuích'eni ntá chrókuaáxinni. Náhí. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxa xrankixínnya chjasintajni mé tsíkjenkayáxin ch'án tíha kixin jehe ch'án mé imá tjuèheni ch'án. ¹⁰ Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyan ch'án tí kjuachaxin k'uéchóna tí kjuach'én kixin kjuacha ch'án xechón ch'án inaá. Chronkaxin itén ch'án nkexrí tsaáxinni ntá ó kónoexinni kixin tí kjuachón kjuakoxin ch'án mé xitjahya ts'itjáyan.

¹¹ Dios mé k'uetuanna sátsjixrjanka itén ch'án la ko kjueyána ch'án tsjákoħa tí sín jehya sín judío tí tan jína. ¹² Mé xikaha tjétjasótexinna kaín tí nkehe i la kjónté tósuànahya kixin ó choxian jína tí nkexro tinkachónkia. Mé ó nòna kixin chóna ch'án kjuachaxin ts'àyakonhenni ch'án tsjixrakájia tí yaon tsokjan ch'án. Méxra janhan tjaha ch'án asenná kixin ts'ayakonhen ch'án.

¹³ T'itjáyanhya tjàkua kaín nkehe jína ó kjuakoha. Naxa títekávan la ko tjuèhé kichuára kixin tinkachónkia Cristo Jesús. ¹⁴ Kjuachaxiэн tí Nchakuen Dios chóntani jnkojnkoni mé t'àyakonhén jína tí tan tjàkua kjuíntakitonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehe sín kuitona sín la ko kjaxin tí ch'ín Figelo la ko ch'ín Hermógenes. ¹⁶ Tjáncháha Ìnchéni kixin imá tsikonóehé ch'án tí sín tjejó ntoe tí ch'ín Onesíforo kixin jehe ch'án mé imá kjuínkítsana ch'án la ko kósuèhya ch'án ikui ch'án kjónté tjéchjina. ¹⁷ Tí nantá

kjuíji ch'án chjasin Roma ntá kuítóehya ch'án kjueyána ch'án hasta k'uitjana. ¹⁸ Tjáncháha Ìnchéni kixin tí yaon itsi ch'án ntá chrókuikonóehē ch'án tí ch'ín a kixin jaha ó noha jina kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóexin ch'ín Pablo kixin jeheni éxi yóhē ijnko soldado jina kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjinkítsa kixin tinkáchónkini ch'án. ² Tí nkehe kuínhín kjuàkua nkayakon nchónhya chojni mé xíkaha chjehé tí xra tí sín jina choxian jina ch'e xra kixin ntá jehe sín mé xíkaha chrókjuakohē sín í so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jina kuènte Jesucristo. ⁴ Kohya nijnko soldado jina ch'e xra chrók'uixenhen ókjé xra kixin t'ichjánxin jnkojínxón xra sich'e ch'án kixin éxi tjinkaon tí nkexro t'etuēnhen ch'án. ⁵ Mé xíkaha éxi yóhē ijnko nkexro tsotsítán. Ntá tsjachahya ts'áyehē ch'án nijnko nkehe tí sinchexiteyèhya ch'án tí sín t'etoan. ⁶ La éxi yóhē ijnko nkexro ch'e xra nonte ntá chóna ch'án kjuachaxin saoxín tsakja ch'án tí nkehe ts'óna. ⁷ Chrórxaxinkávan jina kaín tí nkehe xrjanka la ìnchéni mé tsjinkítsa tsiénxian kaín nkehe.

⁸ Xráxinkávan kixin Jesucristo la ó xechón ch'án. Jehe ch'án mé k'uaxrjeníxin ch'án ch'ín rey David. Tíha mé tí tan jina tsaáxinni tjétjàkua. ⁹ Tí tan tjéxrjanka mé tjasótexinna. Tíha mé tjéchrontetoxínna cadena éxi ijnko chojni tsíkjàya la kjónté tí itén Dios la jehya tjechrontetoxín cadena. ¹⁰ Méxra kjónté nchónhya t'atsínka tí janhan la ntaxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochrín kixin tinkáchónki sín Jesucristo.

¹¹ Tíhi mé chaxín:

Tí jehe ch'án k'uénxinni ch'án a ntá chr'éxin ts'ejókoni ch'án.

¹² La tí tsjasótexínni tí jehe ch'án la ntá kjaxin ts'áyehēni kjuachaxin kuènte ch'án ts'etoanni.

A ntá tí chrókjuinchemáni tí jehe ch'án na ntá kjaxin ch'án la xíkaha sich'e ch'án.

¹³ Kjónté nchexiteyèhyani ch'án la jehe ch'án tjenchexiteyá ch'án kixin Dios la xitjahya sich'ia ch'án.

Chrókjuich'eni tí xra jina

¹⁴ Nchexraxinkávan sín kaín tí nkehe i. Dios tjetsjehe tétuēnhén sín kixin chrókuítóhe sín tí nixja sín tjanjonxin sín kixin ó chónkó tíha la ninkehó sínkíhya. Tí xíkaha ch'e sín la sinchek'itjáyán sín tí sín tjejótinhin. ¹⁵ Sich'e xra jina kixin tsóxrjínhin Dios tí xra tjech'e a. Ntoá chrókjuàkua tí tan jina chaxín kixin ntá chrók'uichjánxinhya chrókósuàha. ¹⁶ La títóhé tí nkehe náxrjónhya la ko chónkó nixja iso sín kixin tí sín nixja xíkaha la antsí tsinkák'ánkí tí nkehe jínahya nixja sín. ¹⁷ Tí nkehe jehya jina tjako sín mé éxi yóhē ijnko iton sóa sítinkáchr'enka. Mé xíkaha tjako tí ch'ín Himeneo la ko ch'ín Fileto. ¹⁸ Jehe sín mé ó kjuixin kuítóhe sín tí ntia ntoá la ntáchro sín kixin ó kjuixin k'uátsínka tí tsoxechón chojni. Ntá xíkaha ch'iyehē sín tí í so sín la tsjitóxinhin sín tí nkehe tinkáchónki sín. ¹⁹ Kjánchó tí sín tinkáchónki Dios éxi yóhē tí xro xrankíxixín tjàt'ò xitjahya tsoxíka la chóna éxi ijnko sello tí itén Dios ntáchro kixin: “Ìnchéni mé tjatsoan ch'án tí chojni kuènté ch'án”,* la kjaxin ntáchro kixin: “Kaín tí

* 2:19 Números 16.5; Juan 10.14

sín tinkáchónki Cristo mé t'ichjánxin chrókuítóhe sín kaín nkehe jínahya," mé xikaha ichro itén Dios.

²⁰ Ijnko nchia jié kuènte tí sín rico la siín vaso tsík'óna chica oro la ko vaso tsík'óna chica plata. La kjaxin siín nkehe tsík'óna ntachiso la ko nkehe tsík'óna nchetje. Iso la xra ó tsík'óna kuènte tí xra tjetuan la í so la tsík'óna kuènte tí xra tjetuanhya. ²¹ A ntá ijnko chojni chrókuítóhe kaín jié chrókóyóhe éxi ijnko vaso tjóá jína kixin chrókuicháxinhin Ìnchéni. A ntá tí nkexro xikaha chrókjuich'ehya tí nkehe jínahya kixin chrókuicháxinhin Ìnchéni tí xra jína.

²² Títóhé kaín tí nkehe jehya tí jína tóxrjínhin í so tí sín ntasoá a. Chrókjuak'e tí ntja ntoá la ko kaín asán chrókuinkachónkia Cristo la ko chrótjuèhé kaín chojni la ko kjuaxróxin chrók'uejokoa kaín sín. Mé xikaha chrók'uejó kaín xín tí sín kótjóá asén mé kaín tí sín tinkáchónki Ìnchéni. ²³ Jaha chrókuahya kuènté tí sín lontj tjenkayáxinhya jína kixin jaha ó noha kixin xrahya chrókjuanjonko kichó sín. ²⁴ A ntá ninkexro ch'ehe xra Ìnchéni chrókjuanjonko kichó sín kixin jína chrókjuinkitsa kichó sín. Chrókónohe sín kaín nkehe jína chrókjuako sín la ko chrókónínkakuenhya sín kichó sín. ²⁵ Kaín asén sín jnkojína chrónixjehe sín tí sín titekakonhya kixin chróchónhen sín kixin Dios chrókjuinkitsa tí sín a chrók'uixinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín ²⁶ kixin t'ichjánxin chrókónohe sín nkexrí chrókuaáxin sín kixin ch'ín Tsochren tjinkaon chrókjuich'iyehé sín ntá chrókjuasin sín jié.

3

Nkexrí ts'ejó tí chojni chjasintajni tí yaon tsjixixín

¹ T'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni. ² Tí sín chjasintajni tsinkáchónkihya Ìnchéni mé imá chrók'uetuan sín jehó la ko imá tsoxrjínhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó dios. ³ Tsojtjuèhya sín kichó sín la ko tsikonóehya kichó sín la ko tsjonta sín kichó sín la ko ninkexró tsochrakuenhya sín la ántosén sín tsjasin sín jié, la ko imá tsojjehe sín la ko imá tsonínkakonhen sín kaín nkehe jína. ⁴ Jehé sín mé sinchekji kichó sín la ko tsjenkayáxinhya sín jína la ko sinchehnke sín. Tsojtjinkaon sín tsjeyá sín tí nkehe ntáchro asén sín ó a ntá tsjeyáhya sín Dios. ⁵ Jehé sín la éxi chojni tinkáchónki Dios xikaha ts'ejó sín. Kjánchó chaxínhya. Tsinkáchónkihya sín tí kjuachaxin kuènte Dios chaxín ntoá.

Méxra jaha la chrókuankíehya tí chojni ch'e xikaha. ⁶ Iso tí sín a mé ixri sín t'ixenhen ntóe ókjé chojni la ch'iyehé sín tí chojni chjin lontj tjasin jié la nchexiteyèhe sín kaín tí ntáchro asén sín. ⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá. ⁸ A ntá éxi yóhe tí sín k'uékjinchexroan mé ch'ín Janes la ko ch'ín Jambres mé k'uénínkakonhen sín ch'ín Moisés mé xikaha tí sín tjako ijie nínkakonhen sín tí nkehe chaxín ntoá. Imá jínahya tí kjuaxrexinkaon kuènte sín la ko titekakonhya sín tí nkehe chaxín tinkáchónkini. ⁹ Kjánchó tsjachahya sín sich'ia sin isé kixin kaín chojni tsonohe kixin tí sín a mé lontj sín kixin éxi xikaha tsikónhen tí yaá sín k'uékónínkakonhen ch'ín Moisés.

Tí nkehe kjuixixín k'uetuèhen ch'ín Pablo tí ch'ín Timoteo

¹⁰ A ntá jaha mé ó kuitekávan tí nkehe kjuakua. Ó noha nkexrí kjuak'é janhan la ko ó noha tí xra kjuít'a janhan. Ó noha nkexrí tinkáchónkia Ìnchéni la ko noha kixin tjokahya kónínkavan la ko noha nkexrí tjuaha chojni. Ó

noha kixin kjónté kónínkaon chojni la kujtoahya tí xra a ¹¹ kjónté chónkina sín la ko kjuasótena. Ó noha nkehe kónna tí chjasin Antioquia la ko Iconio la ko Listra. Chrók'óyánna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna. ¹² Kaínxín tí sín tjinkaon tjóá chrók'u'ejó sín nchexiteyéhé Cristo Jesús la t'ichjánxín tsjasóte sín. ¹³ A ntá tí sín jínahya la ko tí sín ixri ch'ia sín mé ts'óna sín antsí jínahya. Jehe sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'uitjá la ko tí nkehe ó kuítekáván. Jaha la ó noha tí nkexro kjuakoha. ¹⁵ Jaha la desde xjanntsia k'uitjá nkexrí nixja xroon itén Dios la tíha mé tónoexínni kixin Cristo Jesús tsaáxinni kixin tinkáchónkini ch'án. ¹⁶ Ntá kuenté xroon Biblia kjuachaxién Nchakuen Dios kjuínkítsa tí nkexro ikjin la tíha mé jína tsoxrácuexinni tí nkehe chaxín la ko tíha mé jína tsjentuéheni la ko tsjinkítsani tsonoheni nkexrí chrók'uejóni ntoá ¹⁷ kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

4

¹ Kjuachaxién Dios la ko Ìnchéni Jesucristo, tí nkexro itsi éxí ijnko rey la sinchekitoexín ijé kaín chojni tjejóhón la ko tí chojni tsík'en, ² mé tétuanhan chrókjuákua itén Dios kaín asán kjónté á chrókuinhin sín o náhí. Nixjehé sín jnkojína kixin tsitekaon sín la ko tjéntuéhé sín jnkojína. Chrókóninkákonhya chrókjuákohé sín. ³ Itsi ijnko yaon ntá tsotjinkakonhya sín tsinhin sín tí nkehe jína. A ntá sinchexiteyéhé sín tí nkehe ntáchro asén sín ó. Tsjeyá sín nchónhya maestro tsjakohé sín jehó tí nkehe tóxrjínhin sín chrókuinhin sín. ⁴ Méxra tsítóhe sín tí nkehe chaxín ntoá la ntá itsa sín kuénté kaín nkehe chaxínhya. ⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókjuákohé chojni itén Dios tsaáxinni mé xikaha sinchexiteyá jína tí xra chonta.

⁶ Ntá janhan ó kjuixraká tí hora tsjasótena la ko ó kjuixraká tí hora its'èn. ⁷ Ó kjuánjonkian jína kaín tí nkehe jínahya la ko ó kjuixinna tí xra kuéntana la ko kujtoahya jína kuinkachónkia Ìnchéni. ⁸ A ntá ijie la tí nkehe tsitonna mé tjechónhen kixin jína kjuak'é ntihi. Tíha mé tsjanjon Ìnchéni tí yaon itsi ch'án. Jehe ch'án mé ijnko juez jína. Jehya kixin janhván tsákjaá tí nkehe tsjanjon ch'án. Náhí, kjaxin kaín tí nkexro kuítekaon sin ch'án la ko chéhe sín tjejóhónhen sín tió tsi ch'án.

Ch'ín Pablo k'uetóan tsjijitsjehe sín ch'án

⁹ Jaha chrókóxakonhan tjoka chrók'uinkatsjehé tí janhan ¹⁰ kixin ch'ín Demas la kuítóhe ch'án tí janhan kixin imá kóxrjínhin ch'án tí nkehe kuénte chjasintajni. Satsíkji ch'án chjasin Tesalónica. Ch'ín Crescente mé satsíkji ch'án chjasin Galacia a ntá ch'ín Tito satsíkji ch'án chjasin Dalmacia. ¹¹ Jehó ch'ín Lucas naxa tjékian ch'án. Tjékjéyá ch'ín Marcos la tsjúkuana ch'án ntihi kixin jehe ch'án mé jína tsjinkítsa ch'án tí xra chonta ntihi. ¹² A ntá ch'ín Tíquico mé kuétuanhan ch'án satsji ch'án chjasin Éfeso. ¹³ Tió ts'inka ts'inkakuana tí ka t'ítsate kuítóha chjasin Troas ntoé ch'ín Carpo la ko kjaxin ts'inkakuana tí libro kuéntana la ko koí tí tjoé iko tsík'óna xroon.

¹⁴ Tí ch'ín Alejandro tí ch'ín ch'e xra chica mé nchónhya nkehe jínahya kjuích'ena ch'án. Kjánchó Ìnchéni mé tsjenkehe ch'án kaín nkehe kjuích'e ch'án. ¹⁵ Jaha mé tóxakonhan kixin tí jehe ch'án kixin imá nínkakonhen ch'án tí nkehe tjakoni.

¹⁶ A ntá tí saoxín k'uèya tí síxree tí kjuia tí tjejó sín la ninkexró kjuinkĩtsahyana. Kaín sín me kuítõna sín janhván. Kjónté xikaha la tjáncháha Dios kixin chrókuahya ch'án kuèntá kixin xikaha kjuích'e sín. ¹⁷ Kjánchó Ìnchéni mé chaxín kjuínkĩtsana ch'án la kjuanjon ch'án kjuachaxin kixin tsjachana naxa jína tsjàkua itén ch'án. Ntá kuínhin kaín tí sín jehya judío. A ntá Ìnchéni kjuínkĩtsana kixin kjónehyaana koxra. ¹⁸ Ìnchéni mé tsjinkĩtsana kixin naxa tsonnahya kaín nkehe jínahya. Jehé ch'án mé ts'ayakonna ch'án ts'ixanhan tí tjet'etõan ch'án nkaya nkajní. Kjuasáyé ch'án kixin xikaha jnkochrín tsoxiteyá. Amén.

Ch'ín Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín siín ntõe ch'ín Onesíforo. ²⁰ Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kixin kóníhi ch'án. ²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kíchó ni ntihi nixjaha sín jnkojína.

²² Ìnchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí ch'ín Tito

Ch'ín Pablo nixjehé tí ch'ín Tito

¹ Janhan Pablo mé t'ahá xrá Dios la ko tsíkjeýána Jesucristo kixin tsjákoḥa tí í so sín tsíkjeýá Dios kjaxin kixin ts'itja sín tsonohe sín kixin nkexrí chrókuinkáchónki sín tí nkehe chaxín. ² Ntá ts'ejóchónhen sín tsochónta sín kjuachón jnkochrín. Dios la xitjahya sich'ia la kaín tí nkehe tsíchrónka ch'án ósé tí naxá k'ónahya chjasintajni la mé xíkaha tsonhen. ³ Ntá tí yaon tsíntácho Dios la mé jie ó xiteyá la ntá kónoxín tí tan kuènte ch'án. A ntá Dios tí nkexro tsaáxinni mé k'uetōan kixin sít'ahá ch'án xrá tsjákuá itén ch'án. ⁴ Ikjian tí xroon i chr'anhan jaha Tito. T'íkuan éxí chaxín xjanna tí jaha kixin yóini tinkáchónkini Jesús. Kjuasáyé It'eni Dios la ko Jesucristo tí nkexro tsaáxinni, chrókuikónóḥa ch'án la ko chrótjáha ch'án kjuaxróxin.

Tí xrá sich'e tí ch'ín Tito chjasin Creta

⁵ Kujtoḥa jaha tí isla Creta kixin jaha chrókuétuēnhén tí sín siín ntiha kixin nkexrí chrók'uejó sín la ko chrókónoxín nkexro ts'etōan kuènte jnkojnko nínko jnkojnko chjasin éxí tí kuétuanhan jaha. ⁶ T'ichjánxin kixin tí nkexro ts'etōan xrá kuènte nínko la jína chrókjuak'e kixin kohya nkexro chrók'ueka jie, la ko chróchónta jnkokoá ichjién la ko tí xjeen sín chrókuinkáchónki Inchéni kixin tsokohya nkexro chrókjuanchia jie kixin jehya tí jína tjejóch'e sín, la ko kjaxin chrókójieḥya sín. ⁷ Mé xíkaha tí nkexro ts'áyéḥe tí xrá ts'etōan xrá kuènte nínko mé ts'etōan nkexrí tsonhen xrá kuènte Dios la ntá t'ichjánxin ijnko nkexro tsjenkayáxin jína, chrókjuasinhya jie. La chrókjuinchehnkehya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjeýá kjuanínkaon la ko chrókóxrjienhya sín chrókjuich'ia sín ntá chrókjuacha sín chichaon. ⁸ Kjaxin jína chrókjuak'e ch'án kixin tí tsjiji ijnko nkexro ntōe ch'án chrókjuanjon ch'án kjuachaxin chrókjuak'e tí nkexro a. La ko jína chrókjuak'e ch'án la ko jína chrókjuenkayáxin ch'án kixin ijnko nkexro ó tsíkjinchetjóá Dios la ko chróchónta ch'án kjuasáyé ch'án. ⁹ Kjaxin t'ichjánxin chrókuítóehya ch'án tí tan jína xrákoḥe ch'án kixin ntá jína tsjákoḥe ch'án í so chojni tí nkehe ntoá la kjónté nkexro tjinkakonhya tsinhin la jína chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxí lontj sín mé xíkaha ch'iyehé sín chojni. ¹¹ Tí sín a la chrók'uíkjeḥeni ir'va sín kixin tjachróde sín nchónhya chojni kixin tjako sín tí nkehe jehya jína kixin chrókjuich'ia sín chrókjuacha sín nchónhya chichaon.

¹² Ijnko ch'ín kuènte chjasin Creta la mé tsíchrónka ch'án nkexrí tjejó tí sín chjasén ch'án. Ntácho ch'án kixin: “Kaín tí chojni chjasénni mé imá ch'ia sín la ko imá jieḥe sín la ko imá kóchjinka sín la ko séhe sín”, mé xíkaha chrónka ch'án. ¹³ Tí nkehé tsíchrónka ch'án mé chaxín ntoá. Méxra antsí fuerte chrókjuéntuéhé sín kixin ntá jína chrók'uejó sín chróxaxinkaon sín Dios. ¹⁴ Nixjehé sín kixin chrókuahya sín kuénté kaín tí nkehe tsík'axrjeníxin kja tí sín judío tjako la ko chrókuitekakonhya sín tí nkehe t'etōan tí sín nínkakohen tí nkehe chaxín.

¹⁵ Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. A ntá tí nkexro titekakonhya la tjuáhya kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín mé tjuáhya. ¹⁶ Ntácho sín kixin chóxin sín Dios a ntá tí t'ikonni nkexrí ch'e sín

ó noexínni ḱixin chaxínhya tíha la ch'ia sín. Jehe sín mé ntoáhya tjenkayáxin sín la ko jiehe sín la ko titekakonhya sín. A ntá tí xikaha ch'e sín la, ¿nkexrí chrókjuich'e sín tí xra jína?

2

Chrókjuako ch'ín Tito tí tan chaxín

¹ A ntá jaha chrókjuàkua éxí tí chrónka tí tan jína chaxín. ² Tjákohé tí sín ó táda ḱixin chrókókoanhya sín la ko jína chrók'uejó sín la ko chróchónta sín kjuasáyé sín la ko chróchónta sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kíchó sín la ko chrókónínkakonhya sín kjónté tsjasóte sín. ³ A ntá kjaxin xikaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxin sín ijnko kjuaxrexinkaon jína ⁴ ḱixin xikaha chrókjuakuexin sín tí chojni chjin tjarisoá a ḱixin chrótjuèhe sín xì sín la ko chrótjuèhe sín xjeen sín ⁵ la ko chrókjuich'e sín xra jína la ko ntoá chrókjuenkayáxin sín la ko jína chrók'uàyakonhen sín nchia ntoé sín la ko chrókójína sín la ko chrókuitekakonhen sín xì sín. Tí xikaha chrókjuich'e sín chrókjuinchexiteyá sín la kohya nkexro chrók'uántaxínhin tí itén Dios tinkáchónkini.

⁶ Kjaxin xikaha chrókjuinchexraxinkávan tí sín ntasoá ḱixin jína chrók'uejó sín chróchónta sín kjuasáyé sín. ⁷ Jaha mé chrókjuákoéxian sín kaín nkehe jína la ko chrókjuákohé sín ḱixin ntoá chrók'uejó sín. ⁸ Jaha la chrónixja tí nkehe jína ḱixin kohya nkexró chrók'uántaxín la ntá xikaha chrókósuèhe tí sín nínkaon la ntá kohya nkehe jínahya chróntáchro sín kuènte tí jeheni.

⁹ Tétuènhén tí sín xrich'exón xra ḱixin chrókjuinchexiteyéhe sín tí lamo kuènte sín la ko chrókójína sín la ko chrónixjankiehya sín tí nkexro ch'ehe sín xra ¹⁰ la ko kjaxin chrókueéhya sín ḱixin jehya ijnko chojni chee tí jehe sín. Ntá kaín chojni chrók'uikon sín ḱixin tjakoxin sín ḱixin náxrjón tí itén Dios chrókuaáxinni.

¹¹ Ḱixin Dios mé kjuakoxin ch'án ḱixin nkexrí tjuèheni ch'án ḱixin jehe ch'án mé tsaáxin kaín chojni. ¹² Kjuasáyé Dios mé tjakoheni ch'án ḱixin chrókuítóheni kaín nkehe jie la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios. ¹³ Kjaxin chrók'uejóni jína ḱixin chrókóchéheni chrók'uejóchónhenni tí yaon kjuachaxién Dios jie itsi Dios la ko Jesucristo tí nkexro tsaáxinni. ¹⁴ A ntá jehe ch'án mé k'uenyákonhenni ch'án ḱixin tjinkaon ch'án tsaáxinni ch'án ḱixin tsotjuáxin kaín jie chóntani ḱixin ntá jeheni mé ts'ónani ijnko chojni sich'ehe ch'án xra la ko tsóxrjínhinni sich'eni kaín xra jína tjinkaon ch'án.

¹⁵ Tíhi mé chrókjuàkua la ko chrókjuinchexraxinkávan sín la ko chrókuétuènhén sín kjuachaxién Dios. Chrókuítóéhya ḱixin ninkexró chrókókjoniéhya tí nkehe tjakua jaha.

3

Jína chrók'uejó tí sín tinkáchónki Cristo

¹ Chrókjuinchexraxinkávan sín ḱixin sinchexiteyéhe sín tí gobierno la ko tsitekaon sín ichrén xra ts'etóan tí síxreé ḱixin chrókjuich'e sín kaín xra jína ts'etóan tí sín a. ² La ko chrók'uántaxiényhya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxin sín ḱixin jehya ijnko chojni nchehnke la chrókjuikosáyehe sín kaín chojni.

³ Jeheni kjaxin ósé k'uélontini la ko k'uékitekakonhyani Dios. Chjini k'uék'ajini la k'uékóxrjínhinni kaín nkehe jínahya. La ko jehya jína k'uék'ejóni

la ko k'uéchóntani kjuachjinoxínhin la ko k'uéchjinoxíenhenni í so chojni. ⁴ A ntá tí Dios tsaáxinni mé kjuakuexinni ch'án kixin jína ch'án la ko tjuèhe ch'án kaín chojni. ⁵ Jehé ch'án kuaáxinni ch'án la jehya kixin ichrén xra jína chrókjuich'eheni ch'án. Náhi, ó jehí kuikonóeheni ch'án la ntá kjuínchekaáni ch'án la ko kjuínchetjóáni ch'án. Ntá kokjínini nixin kixin tí Nchakuen ch'án la mé k'uáyèxinni kjuachón nixin. ⁶ Kjuasáyé Jesucristo tí nkexro tsaáxinni ntá kjuínchekitonhenni Dios Nchakuen ch'án kixin tsochóntani kjuachaxin kuènté ch'án. ⁷ A ntá xikaha kjuasáyé ch'án kjuínchetjóáni ch'án kixin ntá tjejóchónhenni tí kjuachón jnkochrín tsjanjon ch'án.

⁸ Kaín tíha mé chaxín. Tjínkavan kixin jaha chrókuétoan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkítsa kaín chojni. ⁹ A ntá jaha mé títóhé tí sín tjachaxin kichó sín lontí sín la ko títóhé tí nkehe tinkáchónki sín kuènte tí sín tsík'axrjenixin sín la ko títóhé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chónthya.

¹⁰ Jnkójín nkexro tjinkaon tsjixrónkáxin tí tójkotsé nínko ntiha la nixjehé ch'án jnkójína senó la ko yóxin inaá ntá tí titekakonhya ch'án ntá títóhé sátsji ch'án ¹¹ kixin ó noha kixin tí chojni xikaha a mé ntoáhya tjenkayáxin sín kixin jehó sín nchek'ánki sín ijje sín.

Tí nkehe k'uetóan ch'ín Pablo

¹² Tí tsétuanhan ch'ín Artemas la ko ch'ín Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasín Nicópolis kixin ntiha tsjak'é ts'atsínkajia tí nchakuen kin. ¹³ Jína chrókjuínkítsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanhya tí t'ichjánxinhin sín. ¹⁴ Ntá tí sín í so chrók'uitja sín nkexrí sich'e sín tí xra jína la ko chrókjuinkítsa sín kichó sín ichrén nkehe t'ichjánxinhin sín kixin chrókjuakoxin sín kixin jína tjejó sín.

Ó kjuixixín nixja ch'ín Pablo

¹⁵ Kaín tí nkexro tjékian janhan ntihi nixjahá sín jnkójína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyaonrá ch'án kaín rá. Amén. Ó tjen.

TÍ xroon chr'énhen ch'ín Pablo tí ch'ín Filemón

Ch'ín Pablo nixjehe ch'ín Filemón

¹ Janhan Pablo tjéchiinaxián tí xra kuènte Cristo Jesús tjékjian tí xroon i la kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóch'eni xra kuènte Dios. ² Kjaxin chrókuinhin kaín tí sín tinkáchónki Ìnchéni tójnkotsé ntõa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxí tí jeheni. ³ Kjuasáyé It'éni Dios la ko Ìnchéni Jesucristo chrókjuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xráxín tjáncháha kjuasáyé Dios tí xráxinkavan tí jaha tí nixjaha Dios ⁵ kixin ó kuínhan kixin imá tinkachónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios. ⁶ Tjáncháha Dios kixin tsjinkitsa ch'án tí sín kuítekaon tió kjuákohe sín kixin ntá tsienxín sín jína nkexrí kaín tí nkehe chóntani kixin kjuíncheyaonni Cristo Jesús. ⁷ Imá chàna kixin ó nõna kixin jaha kichó ni imá tjuèhé tí sín kichuá ntiha la ko imá kjuínchechéhé asén tí sín tinkáchónki Ìnchéni.

Ch'ín Pablo chrónóehe tí ch'ín Filemón kixin tsikonóehe ch'án tí ch'ín Onésimo

⁸ Janhan na kjueyána Jesucristo t'aha ch'án xra méxra chonta kjuachaxin tsétuanhan jaha tí nkehe chrókuich'e. ⁹ A ntá íchá jína jehó xrjannóaha tsitékavan kixin jaha tjuèhé tí janhan. Janhan Pablo mé ó tádana la ko tjéchiinaxián tí xra kuènte Jesucristo. ¹⁰ Méxra xrjannóaha tsjinkitsa tí ch'ín Onésimo. Jehé ch'án mé t'íkuan éxí xjanna kixin kjuankixin ch'án tsinkáchónki ch'án Jesucristo tí tjéchiinakian ch'án ntihi.

¹¹ A ntá tí ósé ch'ín Onésimo mé kjuít'ahya xra jína. A ntá ijie ó nõna kixin imá jína sit'aha ch'án xra tí jaha la ko jína sich'ena ch'án xra kjaxin. ¹² Ntá ijie tsétuanhan ch'án tsjiji ch'án tí tjen jaha inaá. Chrótjuèhé ch'án éxí chrótjuèhé tí janhan. ¹³ Janhan tjínkavan chrókuitonakian ch'án ntihi kixin chrókuinkitsana ch'án chrínkí tí chrókuak'e jaha kixin tjéchiinaxián tí itén Jesucristo. ¹⁴ Kjánchó tjínkakhonya tsjáncháha xikaha tí tjínkakhonya jaha. Jehya kixin jaha chrókuinkitsani kixin chrókuétuanhan xikaha. Náhí. Jehí tjínkaonni éxí jaha tóxrjínhan chrókuich'e. ¹⁵ Tí ch'ín Onésimo kuítóha ch'án iso yaon a ntá jie la tsochonta ch'án jnkochrín. ¹⁶ Ijie la jehya éxí ijnko chojni tsík'íná chrók'uikuan ch'án. Náhí. Ntá jie la éxí ijnko nkexro ch'e xra antsí jína mé éxí ijnko kichua chrótjuèhé ch'án. Janhan na tjuaha ch'án kjánchó tí jaha la antsí má chrótjuèhé ch'án. Jehya éxí chojni ó chrók'uikuan ch'án. Náhí. Chrók'uikuan ch'án éxí ijnko kichua kuènte Ìnchéni.

¹⁷ Méxra tí chaxín t'íkuan tí janhan éxí kichó ni jnkokoá tinkáchónkini Ìnchéni ntá chrók'uayéhé ch'án éxí chrók'uayéhé tí janhan. ¹⁸ A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha. ¹⁹ Janhan Pablo mé tjaná kjinxián tí xroon i na mé janhan tsjénkaha tíha. A ntá janhan tjínkakhonya chrókjuintaxraxinkávan tí jaha kixin kaín tí nkehe tjasikana tí janhan kixin kjuákohá jaha. ²⁰ Méxra kichó ni tsotsenkávan sich'e tí nkehe tjáncháha chaxín tinkachónkia Ìnchéni. Mé xikaha sinchechéhé asenná kixin jaha mé kichó ni tinkachónki Cristo.

²¹ Méxra ikjian tí xroon i chr'anhan kixin ó nõna kixin jaha la sinchexiteyá tíha la ko ó nõna kixin jaha la sich'e antsí má que tí nkehe tjáncháha jaha.

²² Kjaxin tjáncháha kixin tjéyá ijnko nchia tsjak'é. Tjéchnhan kixin jahará la nixjehérá Dios la ntá Dios chrókjuanjon kjuachaxin kixin chrókjuasántsahará.

Kjuixixín nixja ch'ín Pablo

²³ Kjaxin ch'ín Epafra mé nixjahará ch'án jnkojína. Jehe ch'án mé tjéchnakian ch'án jnkokoá tí ntóéchiso ntihi kixin kjaxin tinkáchónki ch'án Cristo Jesús. ²⁴ Ch'in Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkojína. Jehe sín mé tjinkitsana sín tí xra.

²⁵ Tjéjtáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsík'axrjeníxinni nchónhya veces kixin nchónhya nkexrí chrókienxín sín, nixjaxin ch'án tí sín k'uechrónka tí itén ch'án. ² A ntá jie tió tsjixixín Dios nixjaxin ch'án tí Xjeen ch'án, na mé Dios kjuich'éna ch'án kaín xín nkehe siín kixin kjuachaxién tí Xjeen ch'án, mé tí nkexro k'uáyéhe kaín xín nkehe. ³ Jehe ch'án mé t'inkaséyanxín ch'án tí kjuachaxin kuénte Dios, la ko jehe ch'án mé kjaxin éxí tsjehe Dios xikaha tsjehe tí jehe ch'án. Jehe ch'án t'aykonhen ch'án kaín xín nkehe siín kixin tí kjuachaxin jie chóna tí tan nixja ch'án. A ntá kjuixin kjuínchetjóá ch'án tí jie chónani, ntá sákjuí ch'án kjuák'etjaxin ch'án tí tja chjina It'é ch'án tí tjen ch'án t'etoan ch'án nkaya nkajní.

Tí Xjeen Dios imá t'etoan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuenhen tí sín ángel, kixin tsík'áyéhe ch'án tí kjuachaxin kuénte It'é ch'án, a ntá imá t'etoan ch'án, a ntá tí jehe sín la náhí. ⁵ Méxra Dios ntáchehya nijnko ángel kixin:

Jaha mé Xjanna,
janhan mé kjuít'ána tí jaha ijie.
la ko kjaxin ntáchrohya Dios kuénte nijnko ángel kixin:
Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokoá Xjeen Dios chjasintajni, ntá ntáchro Dios kixin:
Kaín tí sín ángel kuénte Dios chrókjuikosáyehe tí jehe ch'án.†

⁷ A ntá ntáchro Dios kuénte tí sín ángel kixin:
Tí sín ángel ch'éna ch'án éxí xrinto kixin nchakuen sín ó,
la ko tí sín ch'ehe ch'án xra la ch'éna ch'án éxí xrohinene.‡

⁸ A ntá ntáche ch'án tí Xjeen ch'án kixin:
Tí trono kuéntá itjen jnkochrín, jaha Dios,
la mé jaha mé ijnko nkexro t'etoan jína.

⁹ Jaha tóxrjínhan tí nkehe jína, a ntá ninkákonhén tí nkehe jínahya.
Mé xikaha tí Dios tsíkjejá jaha, la Dios kuéntá kjuíntacháha má,
a ntá tí í so sín k'uájikoa la kánhyó.§

¹⁰ Kjaxin ntáchro kixin:
Jaha Inchéni, tí xrankíxixín kjuich'éna chjasintajni,
la ko jaha kjuich'éna nkajní.

¹¹ Táha mé ts'itjáyan, a ntá jaha la tsjak'e jnkochrín.
Kaín tíha tsontaxín éxí iké chojni,

¹² éxí ijnko iké chojni xikaha tsoxrat'o,
ts'ixinkí éxí ijnko iké chojni.

A ntá jaha la ts'ixitóxinhya jnkochrín tsjak'e,
a ntá tí kjuachón chonta jaha la nunca tsjejehya.*

¹³ Dios la ntáchehya nijnko tí sín ángel kuénte ch'án kixin chrók'uejó sín tja ch'án chjina ntahó chrók'ueño sín, tsjixinjian kaín xín tí sín ninkakonhen sín la chrókjuachahya sín chrók'ueño sín.† ¹⁴ Kaín tí sín ángel mé nchakuen sín ó

* 1:5 Salmo 2.7; 2 Samuel 7.14; 1 Crónicas 17.13 † 1:6 Deuteronomio 32.43 ‡ 1:7 Salmo 104.4
§ 1:9 1.8-9 Salmo 45.6-7 * 1:12 1.10-12 Salmo 102.25-27 † 1:13 Salmo 110.1

mé ch'ehe Dios xra mé k'uítuenhen sín tsjinkjtsa tí sín ts'áyéhe kjuachaxin tsaá sín.

2

Chrókjoniehyani tí nkehe tsaáxinni

¹ Mé xikaha chrókjuenkayáxinni jína tí nkehe ó kuínhinni kixin chrókuítóehyani tí ntia ó kuákjani. ² A ntá tí tan tsíchrónka tí sín ángel ósé la mé tsíkónoxín kixin chaxín tíha. A ntá tí sín kuítekakonhya sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín. ³ ¿Xá nkexrí chrókuaáni tí chrókuaahyani kuentá tí nkehe jie chrókuaáxinni? Jehe Ìnchéni tsíchrónka ch'án saoxín nkexrí chrókuaáxinni, a ntá chr'éxin tí sín tsíkinhin mé kjuakohé sín tí jeheni. ⁴ Méxra Dios kjuakoxin ch'án kjuaxroan jie la ko kjuachaxin jie kixin chaxín tíha, la ko noexínni kaín tí kjuachaxiэн Nchakuen ch'án tsík'áyéheni éxi tjinkaon ch'án tsjanjon ch'án.

Jesucristo k'óna ch'án chojni

⁵ Dios la tsíchjéhya tí sín ángel kjuachaxin kixin chrók'uetöan chjasintajni chr'éxin éxi tí jie tjeónixjani. ⁶ Náhí. Éxi nixja xroon itén Dios chronkaxín kixin: ¿Xá nkexéhe tí chojni a, jaha It'éni Dios, kixin imá xráxinkávan tí jehe ch'án?

¿Xá nkexro tíha kixin imá tóxakonhan kixin tí jehe ch'án?

⁷ Jaha tsíkjich'éna ch'án éxi ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin, a ntá jie la imá kjuikosáyehé ch'án;

⁸ la jaha tsíchjehé ch'án kjuachaxin kixin kaín nkehe ts'etuenhen ch'án.*

Mé xikaha ntáchro tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuítóehya ninkehó nkehe chrókuitekakuenhya ch'án. Kjánchó naxa t'ikonhyani kixin á kaín nkehe titekakonhen ch'án. ⁹ Kjánchó ó noheni kixin Jesús la tsíkjich'éna Dios éxi chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuèhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhe ch'án kjuachaxin náxrjón la ko Dios tjikosáyehé tí jehe ch'án kixin tí kjuasóte ch'án, ik'uén ch'án.

¹⁰ Kaín nkehe síin la kuènte Dios la ko tjejó kixin tí kjuachaxin kuènte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjeen ch'án tí t'inkaséyan. Méxra Dios kjuanjón Ìnchéni Jesucristo kixin tsjasóte ch'án kixin ntá jína kjuakoxin ch'án kixin ntá jehe ch'án tsaáxinni ch'án. ¹¹ Kaín tí sín tsíkótjóá la ko tí nkexro kjuínchetjóá na mé chóna jnkokoá It'é. Méxra tí Xjeen Dios tósuèhya ch'án tsontáchro ch'án kixin kichó ch'án tí jehe sín. ¹² Éxi ntáchro tí xroon itén Dios kixin:

Tsochénkani tí sín kichó ni kixin nkexro tí jaha,

tsjikosáyahani tsotsjeni himno tí tójnkotsékoni tí sín kichó ni.†

¹³ Kjaxin ntáchro kixin:

Janhan titekavan Dios.‡

La ko kjaxin ntáchro inaá kixin:

Ntíhi tjékian tí xjeen Dios tsíkjanjon ch'án tsík'ayáha.§

¹⁴ A ntá tí xjeen chojni mé jnkokoá kichó la k'óna nto la ko ijni; la kjaxin ch'ín Jesús xikaha tsík'óna ch'án nto la ko ijni kixin jína its'en ch'án kixin jína sinchek'itjáyan ch'án tí nkexro chóna kjuachaxin t'óyan chojni, na mé t'axrjexín kixin diablo tíha, ¹⁵ mé xikaha chrókjuinchekaá ch'án kaín tí sín

* 2:8 2.6-8 Salmo 8.4-6 † 2:12 Salmo 22.22 ‡ 2:13 Isaías 8.17,18 § 2:13 Isaías 8.17,18

chrakonhen sín tí kjuach'en, tjejó sín éxí t'ítuenhen sín kaín yaon tjejó sín. ¹⁶ Kjaxin kuihya ch'án kixin chrókjuinkitsa ch'án tí sín ángel. Náhi. Ikui ch'án kixin tsjinkitsa ch'án tí sín tsík'axrjenixin ch'ín Abraham. ¹⁷ A ntá t'ichjánxin chrókóyóhe ch'án éxí tí sín kichó ch'án kixin jína chrók'óna ch'án nchat'á t'etoan kuente Dios la chrókuiikonóeheni ch'án, ntá jína tsjatsen ch'án ijje kaín chojni kixin k'uenyákonhenni ch'án. ¹⁸ Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí Jínahya kixin chrókjuasinhya sín jie.

3

Antsí tjetoan ch'ín Jesús, a ntá ch'ín Moisés la kánhyó

¹ A ntá kichó ni, jahará la tsíkótjóará, la mé Dios tsík'iyahará ch'án kixin ts'ónará xjeen ch'án, a ntá chróxraxinkáonrá jína Cristo Jesús na mé jehe ch'án mé tí apóstol la ko tí nchat'á t'etoan kuente tí nkehe tinkáchónkini. ² Tí ch'ín Jesús jína kuítekakonhen ch'án Dios, mé tí nkexro tsík'jeyá ch'án sich'ehe ch'án xra, éxí kjaxin ch'ín Moisés jína kjuích'e ch'án xra k'uáyakonhen ch'án ntøe Dios. ³ Dios antsí kjuikosáyehe tí ch'ín Jesús, a ntá ch'ín Moisés la kénhyó, éxí antsí tjikosáyehe sín tí nkexro kjuích'ena ijnko nchia, a ntá tí nchia la kénhyó tjikosáyehe sín. ⁴ Jnkojnko nchia k'óna kixin siín nkexro kjuích'ena, kjánchó Dios mé kjuích'ena kaín nkehe siín. ⁵ Ch'ín Moisés jína kjuích'e ch'án xra k'uáyakonhen ch'án tí nchia kuente Dios. Tí xra kjuích'e ch'án mé k'uénixja ch'án kuente tí nkehe tsontáchro Dios chr'éxin. ⁶ A ntá Cristo la mé Xjeen Dios tí jehe ch'án, ntá kjuínchexiteyá ch'án jína la t'ayakonhen ch'án tí nchia kuente Dios, la tíha mé jeheni, kixin tí tsítóehyani ch'án la naxa tsinkáchónkini ch'án ntá tsóchéheni kixin tí nkehe tjejóchónhenni.

Ts'ok'éheni tí tjen Dios

⁷ Mé xikaha éxí ntáchro Nchakuen Dios nixja xroon itén Dios kixin:

A ntá jie tí chrókuinhínrá tí nkehe ntáchro Dios,

⁸ chrókjuích'ehyará éxí kjuích'e tí sín ósé kuítekakonhya sín Dios tí yaon kjuích'ehe sín prueba Dios tí nteje.

⁹ A ntá ntaha tí sín tsík'axrjenixinrá ósé kjuích'ena sín prueba, kjónté cuarenta nánó k'uíkon sín tí xra kjuít'a.

¹⁰ Méxra kónínkakonhan tí chojni a, ntáxrjan kixin: “Xrácín xrichoe asén sín, tjinkakonhya sín tsochóxin sín ntjaná.”

¹¹ Méxra kónínkakonhan tí jehe sín, ntátjan sín

kixin chaxín tsoxiteyá kixin ts'ixenhya sín ts'ok'éhe sín tí tjén janhan.*

¹² Kichóni, chrókóxakonhanrá kixin chrókókohya nijnko tí jahará chróchontará asánrá jínahya chrókuitóherá Dios tjechón chrókuítekákuenhyará tí jehe ch'án.

¹³ Chrókjuínchechéherá kichuárá jnkojnko yaon naxa tjen tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójiáhará. ¹⁴ A ntá tí chrók'uejóni jnkójina hasta tsjixixín éxí kuinkáchónkini tí xrankixixín, ntá siín kjuachaxin ts'ejókoni Cristo.

¹⁵ Mé xikaha ntáchro kixin:

A ntá jie tí chrókuinhínrá jahará tí nkehe ntáchro Dios,

chrókjuích'ehyará éxí kjuích'e tí sín ósé kuítekakonhya sín Dios.†

¹⁶ ¿A ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsíkakitsjexín ch'ín Moisés tí nación Egipto? ¹⁷ ¿A ntá nkexro tí kónínkakonhen Dios tí cuarenta nánó? ¿Á jehya tí sín kjuasin jie k'uénxin

* **3:11** 3.7-11 Salmo 95.7-11 † **3:15** Salmo 95.7-8

nteje? ¹⁸ ¿A ntá nkexro ntáche Dios kixin chaxín tsoxiteyá kixin ts'ixenhya sín ts'ok'éhe sín tí tjen tí jehe ch'án? ¿Á Jehya tí sín kuítekakahya? ¹⁹ A ntá ó noheni kixin kjuachahya sín k'uixenhen sín kixin kuítekakahya sín.

4

¹ Méxra, tsíntáchro Dios kixin tsjanjon ch'án kjuachaxin ts'ixenhenni ts'ok'éheni tí tjen ch'án, a ntá tóxakohenni kixin ách'e jnkojín tí jahará chrókjuachahyará chrók'uixenhenrá ntiha. ² Kixin kjaxin jeheni kuínhinni itén ch'án tsaáxinni éxí kuínhin tí jehe sín, kjánchó tí jehe sín la ninkehó kjuínkĩtsahya sín tí tan jína kuínhin sín, kixin kjónté kuínhin sín tí tan na kuítekakahya sín. ³ A ntá jeheni kuítekaonni, ntá ts'ixenhenni ts'ok'éheni ntaha, éxí tsíntáchro Dios kixin:

Méxra kóninkakohñan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjén janhan.*

Kixin Dios la tió kjuixinhin ch'án xra kjuích'éna ch'án chjasintajni ntá kjuák'e ch'án k'ok'éhe ch'án. ⁴ Mé xíkaha í jnko nketí nixja tí xroon itén Dios chrónka kuènte tí yaon yaotoxin ntáchro kixin:

Kjuixinhin Dios kaín xra ntá kjuák'e ch'án k'ok'éhe ch'án tí yaon yaotoxin.†

⁵ A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjáyan jnkojín chojni chrók'uixenhen sín chrók'ok'éhe sín. A ntá tí sín saoxín kuínhin tí tan chrókuaáxin sín la k'uixenhya sín kixin kuítekakahya sín tí tan a. ⁷ Méxra Dios tsíkjeýá ch'án í jnko yaon, mé tí yaon jie, a ntá chr'éxin nixjaxin ch'án tí nkehe tsíchronka ch'ín David éxí ntáchro tí xroon itén Dios kixin:

A ntá jie tí tsinhínrá tí nkehe ntáchro Dios, chrókjuínchexiteyará.§

⁸ Kixin tí chrókjuanjon ch'ín Josué kjuachaxin kixin chrók'ok'éhe tí sín israelita,* ntá Dios la í chrónixjahya ch'án kuènte í jnko yaon. ⁹ A ntá naxa tjechónhen tí ts'ok'éhe tí sín tinkáchónki Dios; ¹⁰ kixin tí nkexro ts'ixenhen ts'ok'éhe tí tjen Dios tsíkjininhin ch'án tí xra kuènte ch'án éxí yóhe kjaxin Dios kjuixinhin ch'án tí xra kuènte ch'án ntá kjuák'e ch'án k'ok'éhe ch'án. ¹¹ T'ichjánxin kixin kaín asénni chrókjueyáni nkexrí chrók'uixenhenni chrók'ok'éheni, kixin chrókóyóehyani éxí tí sín kuítekakahya.

¹² Kixin tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí ninka asén chojni la ko nchakuen chojni hasta tí nkaya asén chojni. Tíha mé nchexraxinkaon chojni kaín nkehe tjenkayáxin sín la ko kaín nkehe ntáchro asén sín. ¹³ Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kixin kaín nkehe la noxín siín t'ikon tí nkexro ts'áyéhe kuéntá.

Jesús mé tí nchát'á imá tjetoan

¹⁴ Jesús tí Xjeen Dios mé tí nchát'á tjetoan kuénténi mé k'uixenhen tí tjen Dios la méxra chrókútoehyani tí tinkáchónkini tí jehe ch'án. ¹⁵ Méxra jehe ch'án mé tí nchát'á tjetoan kuénténi mé tsjinkĩtsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxí sitónhen tí jeheni, kjánchó jehe ch'án la ninkehó jie kjuasinhya ch'án kjónté xíkaha kónhen ch'án. ¹⁶ Méxra kaín asénni chrókóchjineheni Dios tí tjen ch'án t'etoan ch'án kixin chrókujikonóeheni ch'án la ko chrókjuinkĩtsa ch'án tí jeheni tí nkehe chrók'uichjánxinhinni.

* 4:3 Salmo 95.11 † 4:4 Génesis 2.2 ‡ 4:5 Salmo 95.11 § 4:7 Salmo 95.7-8 * 4:8 Josué 22.4

5

¹ Kaín nchať'á t'etōan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kíxin ts'itjáyanxín tí jie kuènte chojni. ² Kjaxin tí nchať'á a la fuértēhya kíxin chojni ó, a ntá chrókóninkakuenhya ch'án tí sín noehya la ko tí sín tsíkjichroe. ³ Kjaxin jehe ch'án, kíxin fuértēhya ch'án t'ichjánxín tsjanjon ch'án iko its'en kíxin tí jie chóna ch'án jehe ch'án éxí tjanjon ch'án nkehe kuènte tí í so chojni chóna jie.

⁴ Ninkexró xitjahya jehó sich'éna asén nchať'á t'etōan. Náhi. Jehó tí sín tsíkjeýá Dios tsík'áyéhe tí xra éxí tsík'áyéhe ch'ín Aarón. ⁵ Mé xíkaha Cristo, kjuích'énahya ch'án jehó ch'án asén ch'án nchať'á t'etōan. Náhi. Dios mé kjuikosáyehe ch'án mé tsíkjanjon tí xra éxí tsintáchro kíxin:

Jaha mé xjanna;

Janhan mé kjuít'ána ijie.*

⁶ Kjaxin í jnko nketí nixja xroon itén Dios ntáchro kíxin:

Jaha mé ijnko nchať'á tsjak'e jnkochrín,

éxí yóhe k'uékjak'e ch'ín Melquisedec.†

⁷ Tió kjuák'e Cristo ntihi chjasintajni imá tsjánka ch'án la ko itsen chrónóehe ch'án Dios, kíxin Dios chóna kjuachaxin chrókjuinchekaá ch'án kíxin chrók'uenhya ch'án; la Dios la kuínhin kíxin xíkaha kuítekaon ch'án. ⁸ Méxra Cristo, kjónté Xjeen Dios, la kuítekaon ch'án kjuínchexiteýá ch'án kjónté tí kjuasote ch'án. ⁹ Mé kjuínchexiteýá ch'án, ntá kjuacha ch'án k'óna ch'án tí nkexro sinchekaá jnkochrín kaín tí chojni sinchexiteýéhe tí jehe ch'án.

¹⁰ A ntá Dios mé tsíkjich'éna ch'án nchať'á t'etōan éxí yóhe kjuák'e ch'ín Melquisedec.

Jehya jína chrókuítóheni tí tinkáchónkini Inchéni

¹¹ Chóntani nchónhya nkehe chróchrónkani kuènte tíha, kjánchó imá xra chróchrónkaxínni tíha kíxin tiénxinyará jahará. ¹² Ntá k'uátsínka nchónhya tiempo, a ntá ó jína chrók'ónará maestro, ntá náhi kíxin naxa t'ichjánxínhanrá nkexro chrókjuakoħará inaá tí nkehe xrahya kuènte itén Dios. Éxí xík'ónará lontirá, t'ichjánxín chrók'uirá tsjen inaá kíxin xitjahya sinterá nkehe cha. ¹³ A ntá tí sín it'i tsjen ó, na mé yóhe chánjan takí tsjachahya sín tsjeýá sín nkexrí chrók'uejó sín jína. ¹⁴ Á ntá tí nkehe cha mé ine tí chojni nteto kíxin ó nohe sín ti nkehe jína la ko tí nkehe jínahya.

6

¹ Naxa chrókjueyáni kíxin jína chrókjuenkayáxinni éxí chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxín kuènte Cristo. Náhi. T'ichjánxínhya naxa chrókjuakoħaráni kíxin chrókuítóhéra tí jie k'uékjásinrá chrók'uénxinrá, la ko nkexrí chrókuinkachónkirá Dios, ² la ko nkexrí chrókuikite chojni, la ko nkexrí ts'ejotja tjará chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítóexín ijie chojni. ³ A ntá tí Dios chrókjuanjon kjuachaxin la chrókjuakoni í so nkehe.

⁴ A ntá tí sín ó tsík'áyéhe sín tí xrohi, la ko ó tsjexín sín tí nkehe kjuanjon Dios, la ko tsík'áyéhe sín tí Nchakuen Dios, ⁵ la ko kóxrjínhin sín tí nkehe jína kuènte itén Dios, la ko kónohe sín nkexrí tí kjuachaxin tsochóna tí chjasintajni chr'éxin, ⁶ a ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín inaá, kíxin tí xíkaha la éxí chrókjuak'enkanı sín ntacruz tí Xjeen

* 5:5 Salmo 2.7 † 5:6 Salmo 110.4

Dios ínaá la ko chrókjuanoá sín ch'án nkayakon nchónhya chojni. ⁷ Éxí nonte jnkojnko vez t'aniá chrin la tsjátan la ts'óna jína, a ntá kjuacha tí sín kjuích'e xra kixin Dios kjuíncheyaon ntiha. ⁸ A ntá tí t'óna ntach'i la ko kach'i la ninkehó sínkíhya la tsonínkakohen Dios, la tí tsjixixín mé tsoche.

Tí nkehe tjejóchónhenni mé tjinkítsa kixin jína ts'ejóni

⁹ Kjonté nixjani xíkaha, kíchó ni, ó noheni kixin chaxín jína tjejorá k'uitjará tí ntia tsaáxinrá. ¹⁰ Kixin Dios la jína, la ts'itjáyenhya ch'án tí xra jína tjejoch'erá kixin tjuèherá kichuárá, mé xíkaha kjuákoxinrá kixin kjuínkítsará tí kichuárá tinkáchónki Cristo la naxa tjejótjinkítsará sín xíkaha. ¹¹ Tjinkaonni kixin jnkojnkorá chrókjuákoxinrá hasta tsjixixín kixin chontará kjuachéhe chrókjuínkítsará kichuárá kixin chaxín ts'ayéhérá tí nkehe tjejochonhénra. ¹² Tjinkakonhyani kixin chrókjanrá chrókósáhará. Náhí. Tjinkaonni kixin chrókjuákoxinrá éxí tí sín chaxín tinkáchónki Inchéni tjejóchónhen sín ts'áyéhe sín tí nkehe tsintácho Dios kixin tsjanjon ch'án.

¹³ A ntá Dios, tió tsintácho ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjenxin asén kixin kohya nkexro antsí tjetoan chrók'uákjenxin ch'án. ¹⁴ Ntácho ch'án kixin chaxín sincheyaon ch'án tí ch'ín Abraham la ko nchónhya chojni ts'axrjenixin tí jehe ch'án.* ¹⁵ Ch'ín Abraham kjuák'echónhen ch'án isé kixin ts'áyéhe ch'án tí nkehe tsintácho Dios. ¹⁶ A ntá tió t'ákjenxin chojni ijnko nkexro la mé t'ákjenxin sín ijnko nkexro antsí tjetoan, a ntá jehó sín la náhí. A ntá ts'ákjenxin sín tí xíkaha kixin ijnko nkehe tsoxiteyá, a ntá kohya nkexro tsontácho ninkehó. ¹⁷ Méxra Dios k'uákjenxin ch'án asén ch'án tsintácho ch'án kixin chaxín tsoxiteyá, kixin tjinkaon ch'án chrókjuákoxin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsintácho ch'án la í tsjitóxiyenhya ch'án ninkehó tíha. ¹⁸ Mé xíkaha siín yaá nkehe xitjahya ts'ixitoxin, kixin Dios la xitjahya sich'ia; kixin tíha Dios nchenoexínni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni tí nkehe tsjanjon ch'án. ¹⁹ Tí tjejóchónhenni xíkaha la jína ts'ejó asénni éxí yóhe tí ntabarco chóna gancho tjechruéxin kixin kohya nketí sátsji. Méxra xíkaha kjaxin tí nkehe tjejóchónhenni la sátsíkji hasta nóton tí ka cortina tjen nkaxenhen njnko tjen nkaya nkajní, ²⁰ tí senó k'uíxenhen Jesús kuakitjehe ch'án ijnko ntia ts'ixenxínni. Mé xíkaha jehe ch'án k'óna ch'án nchat'á t'etoan jnkochríxín éxí yóhe kjuák'e tí ch'ín Melquisedec.

7

Ch'ín Jesús mé nchat'á éxí yóhe k'uéjkak'e ch'ín Melquisedec

¹ Tí ch'ín Melquisedec mé k'ué rey kuènte chjasin Salem la ko nchat'á kuènte Dios tjen nkaya nkajní. A ntá tió ch'ín Abraham kjanxin ch'án tí tsíkjkjanjonko ch'án tí í so sín rey, kjuacha ch'án, ntá ch'ín Melquisedec kjuíxinhin ch'án ntia ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham. ² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjača ch'án tí tsíkjkjanjonko ch'án tí sín rey.* A ntá ihnié ch'ín Melquisedec mé t'axrjexín saxín kixin “ijnko rey jína”; a ntá jehe ch'án k'ué rey kuènte chjasin Salem, tíha mé t'axrjexín kixin “kjuaxróxin”, la mé xíkaha jehe ch'án mé “ijnko rey tjanjon kjuaxróxin”. ³ A ntá ch'ín Melquisedec la noehya sín nkexro it'é ch'án la ko nkexro ìné ch'án la ko nkexro tsík'axrjenixin ch'án; la ko noehya sin nkesá tsíkokjhi ch'án la ko nkesá

* **6:14** Génesis 22.16-17 * **7:2** 7.1-2 Génesis 14.17-20

tsík'en ch'án. Mé xíkaha tóyóhē tí Xjēen Dios kixin jehe ch'án mé ijnko nchat'á jnkochrín.

⁴ A ntá jie, tsjehérá kixin imá t'etōan tí ch'ín Melquisedec kixin tí ch'ín Abraham k'uaxrjenínini, la tsíchjéhe ch'án tí ch'ín Melquisedec diezmo tí nkehe tsíkjača ch'án tí tsíkjanjonko ch'an tí sín rey. ⁵ Éxí nixja ley tsík'etōan ch'ín Moisés, kixin tí sín nchat'á tsík'axrjenínin tí ch'ín Leví chóna sín kjuachaxin tsjanchehe sín kaín xín chojni diezmo kjónté naḡa kjéhya sín, tsík'axrjenínin sín tí ch'ín Abraham éxí tí jehe sín. ⁶ A ntá ch'ín Melquisedec, kjónté tsík'axrjeníninhya ch'án tí ch'ín Leví, na mé kjuích'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintáchro Dios. Mé xíkaha tí ch'ín Melquisedec tsíkjincheyaon ch'án tí ch'ín Abraham. ⁷ Kohya nkexro tsontáchro kixin chaxínhya kixin tí nkexro ncheyaon la antsí má t'etōan, a ntá tí nkexro tsíkóyaon la t'etōanhya. Náhí. ⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntáchro tí xroon itén Dios kixin tí ch'ín Melquisedec mé ijnko chojni naḡa tsík'enhya, la naḡa tjechón. ⁹ Mé t'axrjexín kixin ch'ín Leví la ko kaín xín tí sín nchat'á tsík'axrjenínin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sin diezmo tí ch'ín Melquisedec tió tsíkjenka ch'ín Abraham, ¹⁰ kixin naḡa tjiko cuerpo kuènte ch'án tí sín ts'axrjenínin ch'án, naḡa kokjéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nchat'á levita, mé tsík'axrjenínin sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naḡa chrókónoxín í jnko nchat'á í chrókóyóehya éxí tí ch'ín Aarón. A ntá kjuachahya sín xíkaha ntá t'ichjánxín chrókónoxín ijnko nchat'á chrókóyóhe éxí tí ch'ín Melquisedec. ¹² A ntá tí chrók'uixinkí tí nchat'á la kjaxin chrók'uixinkí tí ley. ¹³ A ntá tí xroon itén Dios chrónka tíhi kuènte Ìnchéni. A ntá jehe ch'án la tsík'axrjenínin ch'án í jnko nkexro kuènte Israel la kohya ninkexró tsík'óna nchat'á tsík'axrjenínin tí sín a. ¹⁴ Kixin ó noxín kixin Ìnchéni tsík'axrjenínin ch'án tí ch'ín Judá, a ntá ch'ín Moisés la chrónkahya ch'án ninkehó kuènte tí sín ts'axrjenínin tí ch'ín a tió nixja ch'án kuènte tí sín nchat'á.

¹⁵ A ntá tíhi la antsí má kónoxín kixin tí nchat'á nixin la tóyóhe éxí ch'ín Melquisedec ¹⁶ kixin tió k'óna ch'án nchat'á la jehya kixin xíkaha chrók'uetoan ijnko ley kixin nkexro chrók'uaxrjenínin ch'án. Náhí. Ó jehí k'óna ch'án nchat'á kixin tí kjuachaxin chóna ch'án la xitjahya ts'itjayan. ¹⁷ Kixin nixja Dios kixin nkexrí tjen tí jehe ch'án, ntáchro kixin:

Jaha mé ijnko nchat'á tsjak'e jnkochrín,

éxí yóhe k'uékjak'e ch'ín Melquisedec.†

¹⁸ Méxra tí nkehe k'uék'etōan senó mé ch'ehya xra jie kixin kánhyó kjuachaxin k'uéchóna la ko kjuachahya, ¹⁹ kixin tí nkehe k'uetoan ch'ín Moisés kjuachahya kjuínchetjóá ninkehó nkehe. A ntá jie chónatani ijnko nkehe antsi jina tjejóchónhenni kixin tíha mé antsi jina tsochjinexínni Dios.

²⁰ A ntá tió ntáchro Dios tíha la tsík'ákjenxin ch'án asén ch'án jehó ch'án. ²¹ La ntá tí í so nchat'á, tió tsíkónoxín sín, tsík'ákjenxinhya Dios asén ch'án. A ntá tió tsíkónoxín tí nchat'á í la Dios tsík'ákjenxin ch'án asén ch'án. A ntá ntáchro xroon itén Dios kixin:

Ìnchéni tsík'ákjenxin asén ch'án

a ntá ts'ixitóxinhya tí nkehe tsintáchro ch'án:

“Jaha mé ijnko nchat'á tsjak'e jnkochrín

éxí yóhe k'uékjak'e ch'ín Melquisedec.”‡

† 7:17 Salmo 110.4 ‡ 7:21 Salmo 110.4

22 Méxra ch'ín Jesús ntáchro kixin tí pacto t'etoan ch'án la antsí má jína, a ntá tí pacto senó la náhí. 23 Ntá k'uixin nchónhya sín nchat'á, kjánchó nkák'en sín, ntá xitjahya naxa chrókjuich'e sín tí xra a. 24 A ntá ch'ín Jesús la ts'enhya ch'án la t'ichjánxinhya kixin í jnko nkexro chrókuakja tí xra kuènte ch'án chrók'óna nchat'á. 25 Méxra jehe ch'án tsjacha sinchekaá ch'án jnkochrín tí sín tsochjinehe Dios kixin tinkáchónki sín tí jehe ch'án kixin itjen ch'án jnkochrín chrónóehē ch'án Dios kixin chrókjuinchekaáni ch'án.

26 Mé xikaha Jesús mé tí nchat'á t'etoan t'ichjánxinhinni; jehe ch'án mé ijnko nkexro tjóá, chóntahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní. 27 Ntá tóyóehya tí í so nchat'á t'etoan, kixin t'ichjánxín ts'óyán sín iko tsjanjon sín tsochjéhe sín Dios kaín yaon, saoxín kixin tí jie kuènte sín, a ntá chr'éxin kixin tí jie chóna tí í so chojni. A ntá ch'ín Jesús jnkokoaxón vez kjuanjón asén ch'án ik'uén ch'án. 28 Tí ley k'uék'etoan ch'ín Moisés t'etoan kixin chojni naxa chóna jie chrók'óna nchat'á, a ntá Dios tsík'ákjenxín asén ch'án tió kjuixin k'óna tí ley, ntáchro ch'án kixin tí Xjeen ch'án mé ts'óna nchat'á t'etoan kixin jína kjuínchexiteyá ch'án jnkochrín.

8

Ch'ín Jesús nixjxin ch'án ijnko pacto nixin

1 Tí nkehe antsí má tjetōan chrónkani la mé tíhi kixin tí nchat'á kuènteni mé t'etoan ch'án, la ko tjetjxin ch'án nkaya nkajní, nó chjina tí trono t'etoanxín Dios, 2 k'óna ch'án nchat'á tí nínko chaxín tsík'ájéna Ìnchéni, la jehya chojni tsík'ájéna tíha. 3 Kaín nchat'á t'etoan tsík'áyéhe xra kixin tsjanjon nkehe la ko iko its'en. Méxra Jesucristo t'ichjánxín kixin tsjanjon ch'án ichrén nkehe. 4 Tí chrókjuak'e ch'án chjasintajni, chrók'ónahya ch'án nchat'á kixin naxa siín nchat'á tjanjon nkehe k'uetōan tí ley tsík'áyéhe ch'ín Moisés. 5 A ntá tí sín nchat'á k'uékjanjon nkehe tóyóhó tí nkehe siín nkaya nkajní. Noheni kixin tóyóhó kixin tió ch'ín Moisés chrókjuich'éna ch'án nínko la ntáche Dios tí jehe ch'án kixin: “Tjenkayáxian jína, a ntá s'ich'éna jaha éxí tí nkehe kjuákuáxian chrítaón jna.”* 6 A ntá tí nchat'á t'etoan kuènteni tjech'e ch'án xra antsí jína kixin jehe ch'án mé tí nkexro nixjxin tí pacto nixin tsintáchro Dios chrónka tí nkehe jína tsonhen chr'éxin.

7 A ntá tí pacto tsík'etoan saoxín la tí chróxiteyá jína, la t'ichjánxinhya chrók'óna yóxin pacto. 8 A ntá Dios k'uíkon kixin kjuínchexiteyáhya tí sín a, éxí ntáchro xroon itén Dios kixin:

Ntáchro Ìnchéni kixin: Itsi ijnko yaon

mé tsjánjuan ijnko pacto nixin tsochóna tí sín nación Israel la ko tí sín chjasin Judá.

9 Jehya xikaha tí pacto kuétuñhan tí sín tsík'axrjeníxinrá ósé, tí yaon kjuínkítsa sín k'uaxrjexín sín tí nación Egipto; kjánchó kjuínchexiteyáhya sín tí pacto kuétuñhan sín, méxra kujtoha sín, ichro Ìnchéni.

10 Tí pacto tsétuñhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráxinkavan asén sín tí ley tsétoan,

a ntá tí kjuaxrexinkaon kuènte sín tsokjian tí nkehe tsétuñhan sín.

A ntá janhan ts'óna Dios kuènte sín,

a ntá jehe sín mé ts'óna chjasin kuèntana.

11 Ts'ichjánxinhya naxa tsjakohe kichó sín

* 8:5 Éxodo 25.40

kíxin chróchóxin sín Ìnchéni,
kíxin kaín sín tsochóxinna sín,
kjónté chojni imá ntsíntsí la ko chojni imá hyé.

¹² S̄intak'itjáyan tí nkehe jínahya kjuích'e sín
la ko í tsoxráxinkakonhya ínaá tí jiē chón̄ta sín.†

¹³ X̄ikaha nixja Dios kuènte tí pacto n̄ixin ts'et̄oan ch'án kíxin tsíkóntaxin tí pacto saoxín k'uet̄oan ch'án, tíha mé tinkákóntaxin la ko tinkákjeje, na í séhya ts'itjáyan.

9

Tí n̄inko chjasintajni la ko tí n̄inko nkaya nkajní

¹ A ntá tí pacto saoxín t'et̄oan nkexrí chróxraxinkaonni Dios, kíxin tí n̄inko n̄tihyó chjasintajni. ² A ntá tí n̄inko k'uékjak'e mé tí cuarto saoxín k'uekjinchek'in sín tí Cuarto Tjóa, tí kjuák'e tí candelero la ko tí mesa tjejójen tí niot̄ja k'uéxraxinkakonxín sín Dios. ³ Nóton tí yóxin ka cortina kjuák'e tí cuarto k'uekjinchek'in sín tí Cuarto Antsí Tjóa. ⁴ Ntiha k'uékjak'e tí altar tsík'óna chica oro k'uékjakaxín sín tí chjinc̄o la ko k'uékjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uékjak'e ijnko nchésen tsík'óna chica oro k'uék'inka maná k'óna niot̄ja, la ko kjaxin k'uékjak'e tí nta k'uékjixín ch'ín Aarón kjuankíxin k'uayan nta n̄tahnte, la ko kjaxin ntiha kjuák'e tí x̄ro chón̄ta tí tan k'uet̄oan Dios. ⁵ Chrítaón tí ntacajón k'uék'ejó yaá ángel tsíkjan̄oya tsíkjentoá kan̄enee chrítaón tí kjuák'e tí kjuachaxin kuènte Dios; ntaha k'uékj̄inxín tí jiē k'uéchón̄ta chojni. A ntá ijie la t'ichj̄ánxinhya naxa tsonixjani kuènte tíha.

⁶ A ntá x̄ikaha k'uéjé tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuènte n̄inko kíxin tí x̄ra ch'e sín kuènte n̄inko. ⁷ A ntá tí yóxin cuarto jehó tí nchat'á t'et̄oan t'ixenhen ch'án jnkokoá vez jnkojnko nánó; a ntá tí t'ixenhen ch'án t'ichj̄ánxín ts'ixenko ch'án ijnié iko tsochjéhe ch'án Dios tsotjuáxin ijie ch'án la ko ijie tí i so chojni. ⁸ A ntá tí Nchakuen Dios nchenoexínni tíhi kíxin nachrohe k'uékjich'e x̄ra tí cuarto saoxín la naxa tjexrankehya kíxin chrók'uixenhenni tí Cuarto Antsí Tjóa. ⁹ Kaín tíha tjakoxín ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín kíxin á chaxín kótjóa tí jiē k'uéchón̄ta sín kíxin x̄ikaha k'uéxraxinkaon sín Dios. ¹⁰ A ntá tíha jehó t'et̄oan kuènte tí nkehe chrókjóné sín la ko tí nkehe chrók'ui sín la ko tí chrók'ónti sín kíxin chrókótjuáxin ijie sín, kaín tíha mé k'uítuenhen sín kuènte cuerpo ó la jehó k'uéchón̄ta kjuachaxin tí naxa kjuinkíhya Dios nkexrí chróxraxinkaon sín ch'án.

¹¹ A ntá ó kui Cristo, jehe ch'án mé nchat'á t'et̄oan kuènte tí nkehe antsí jína itsi. A ntá tí n̄inko ch'e ch'án x̄ra la antsí jína la ko antsí ntoá, la jehya chojni tsíkjich'éna tíha kíxin jehya chjasintajni n̄tihi tjen. ¹² Tió k'uíxenhén Cristo tí Cuarto Tjóa, la jehya kíxin chrókjuanjon ch'án ijnié kotents̄o la ko ijnié koxintáxjan. Náhi. Ijnié ch'án kjuanjon ch'án; mé x̄ikaha k'uíxenhén ch'án jnkokoá vez ntiha mé x̄ikaha kjuenk̄a ch'án kíxin chrókuaáxinni jnkochr̄ixín. ¹³ A ntá tí ijnié koxinta la ko ijnié kotents̄o la ko tí nteso kuènte tí koxintáxjan tsíchexín tí altar tikitexín tí sín tjuáhya la mé tíha chón̄ta kjuachaxin tsotjuáxin tí chrítaón ó. ¹⁴ A ntá tí x̄ikaha, la kjá antsí má chón̄ta kjuachaxin tí ijnié Cristo. Kíxin tí kjuachaxin Nchakuen Dios tjen jnkochr̄ixín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chón̄tahya ch'án. A ntá ijnié ch'án nchetjóa tí nkehe kjuích'eni senó chrók'uenxínni kíxin ntá jie la jína chrókjuich'ehe ni x̄ra Dios tjechón.

† 8:12 8.8–12 Jeremías 31.31–34

¹⁵ Méxra Jesucristo nixjaxin ch'án tí pacto nixin k'uetōan Dios. Kíxin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuenhenni senó; kíxin tí sín k'uíyēhe Dios la jína chrók'uáyēhe sín tí nkehe tsjejehya kíxin jehe ch'án xikaha tsintáchro ch'án tsjanjon ch'án. ¹⁶ A ntá tí siín ijnko nkehe tsintáchro ijnko chojni kjuák'e na ntá ik'uén la t'ichjánxin tsonoxín kíxin chaxín tsík'en tí nkexro tsíkjich'éna. ¹⁷ A ntá tí nkehe tsintáchro ch'án la sínkíhya tí naxa tjechón tí nkexro tsíkjich'éna; jehó tió chrók'uen ch'án mé sínkí. ¹⁸ Méxra tí pacto xrankíxín tsík'etōan Dios kjuankíxin kjuích'e xra kíxin k'uítji ijni. ¹⁹ Ch'ín Moisés tsíchronka ch'án kaín nkehe tsík'etōan tí ley kuínhin kaín tí chojni; a ntá chr'éxin kuákja ch'án ichjoén kolélo kjátse la koí ntarama hisopo, ntá kjuínchekjatjaxín ch'án ijnié koxintáxjan la ko ijnié kotèntso tsíkjiko ìnta, ntá kuikjanjin ch'án tí libro chóna ley la ko kuikjanjin ch'án kain tí chojni. ²⁰ A ntá ntáchro ch'án kíxin: “Tí jni i tsoxiteyáxin tí pacto k'uetōan Dios chrókjuinchexiteyéhérá jahará.”* ²¹ Tí ch'ín Moisés kjaxin kuikjanjin ch'án jni tí ninko la ko kaín nkehe t'ichjánxin tí nkaxenhen ninko. ²² Kíxin xikaha ntáchro tí ley kíxin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uixikjanjinhya jni.

Tí ik'uén Cristo mé tsjìnxín ijieni

²³ Méxra t'ichjánxin kíxin ik'uén iko kótjuáxin tí nkehe a, táha mé tóyóhó tí nkehe siín nkaya nkajní; a ntá tí nkehe chaxín kuente nkaya nkajní t'ichjánxin ijnko nkehe antsí jína chrók'uen. ²⁴ A ntá Cristo k'uíxenhya tí ninko tsíkjich'énoxín chojni tja, táha mé ijnko nkehe tóyóhó tí ninko chaxín. Náhí. Jehe ch'án mé k'uíxenhén ch'án tí nkaya nkajní, a ntá jie mé tjen ch'án tí tjen Dios nixjaxin ch'án kaín ni. ²⁵ A ntá jehe ch'án la jehya jnkoyaxón k'uíxenhén ch'án ntiha k'uenyákonhenni ch'án. Náhí. A ntá tí nchat'á t'etōan t'ixenhén tí Cuarto Tjóá jnkoinko nánó kíxin tsjanjon ch'án ijnié ko ó. ²⁶ A ntá tí xikaha chrókónhen Cristo la t'ichjánxin kíxin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kíxin tsjìnxín ijieni. ²⁷ Mé xikaha kaín ni its'enni jnkokoá vez, a ntá chr'éxin tsitōexín ijieni. ²⁸ Mé xikaha kjaxin Cristo jnkokoá vez ik'uén ch'án kíxin tsjìnxín ijie nchónhya chojni. A ntá chr'éxin itsi ch'án inaá, jehya kíxin naxa tsjatsen ch'án ijie chojni. Náhí. Sinchekaá ch'án tí chojni ó tsíkótjóá tjejóchónhen itsi ch'án.

10

¹ A ntá tí ley k'uetōanxín ch'ín Moisés la tóyóhó tí nkehe jína tsi la jehya tí nkehe chrókuaáxinni. Méxra tí ley kjuachahya kjuínchetjóá tí sín kóchjinehe Dios kjuanjon sín iko its'en jnkoinko nánó. ² A ntá tí chrókjuacha tí ley chrókjuinchetjóá ijie sín, ntá chrókjuenkayáxinhya sín kíxin naxa chróchóna sín jie, la chrókuítóhe sín, í chrókjuanjonhya sín iko its'en. ³ A ntá xikaha ich'e sín t'óyán sín ko, la jnkoinko nánó xraxinkakonxín sín tí jie tsíkjasin sín ⁴ kíxin ijnié koxinta la ko ijnié kotèntso xitjahya tsjìnxín ijie chojni.

⁵ A ntá tió Cristo kui chjasintajni ntáche ch'án Dios kíxin: Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhí.

Jaha tsíkjich'éna ijnko cuerpo kíxin tsochonta janhan.

⁶ Jaha tóxrjánhya iko tsíchján la ko tí í so nkehe chrókjuanjonni chrókjuakjìnxian ijie.

⁷ A ntá ntátjan ch'án kíxin: “A ntá ijie la ntihi tjeñ janhan kíxin sintaxiteyá tí nkehe tóxrjínhan jaha Dios,

* 9:20 9.19-20 Éxodo 24.6-8

éxi nixja xroon chrónka nkexrí chrókjuít'a."*

⁸ Senó ntáchro kixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni chrókjuinixín ijiéni kjónté tí ley k'uetóan kixin xikaha chrókónhen. ⁹ A ntá chr'éxin tsintáchro kixin: “A ntá k'uinka janhan kixin sintaxiteyá tí nkehe tóxrjínhan jaha Dios,” ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe nixin. ¹⁰ Dios kjuínchetjuáxinni kixin Jesucristo kjuínchexiteyá éxi tóxrjínhin Dios kixin tí cuerpo kuènte ch'án kjuanjon ch'án ik'uén ch'án jnkokoáxon vez para jnkochrixin.

¹¹ A ntá kaín nchat'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjinixín ijié chojni. ¹² A ntá Jesucristo mé jnkokoá vez k'uenyákonhenni ch'án kixin tsotjuáxin ijiéni la tíha mé sich'e xra jnkochrixin. A ntá kjuixin ntá sákjui ch'án kjuák'etjaxin ch'án nó tí tja chjina kuènte Dios. ¹³ A ntá ntiha tjechónhen ch'án tsjixinjian kaín tí sín nínkakohen ch'án tsjachahya sín ts'etóan sín. ¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsikótjóá. ¹⁵ A ntá tí Nchakuen Dios nchenoheni tíhi kixin senó tsintáchro kixin:

¹⁶ Tí pacto tsotjahá tí jehe sín tió ts'atsínka tí yaon a, ichro Ìnchéni; Sintaxráxinkavan asén sín tí ley tsétoan, a ntá tí kjuaxrexinkaon kuènte sín tsokjian tí nkehe tjínkavan.†

¹⁷ Kjaxin ntáchro kixin:

Í tsoxráxinkakonhya inaá tí ijié sín la ko tí nkehe jínahya kjuích'e sín.‡

¹⁸ Mé xikaha tí ó kótjóá ijiéni la t'ichjánxinhya í so nkehe chrókjuanjonni chrókótjuáxin tí ijiéni.

Méxra t'ichjánxin tsqchjineheni Dios

¹⁹ Kichóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijnié Jesucristo, ²⁰ chréheni tí ntia nixin mé tí ntia tjechón kuakitjehé ch'án nóton tí ka cortina, tíha mé tí cuerpo kuènte ch'án. ²¹ Jesús mé tí nchat'á tjetóan kuènteni t'etóan tí ntóe Dios. ²² Méxra xikaha chrókóchjineheni Dios kaín asénni chrókuinkáchónkini ch'án chaxín kixin jehe ch'án tsikjinchetjóá ch'án asénni kixin chrókjuenkayáxinhanyi kixin naxa chóntani jie kixin tí cuerpo kuènteni kótjuáxin tí ntá jehó.§ ²³ Chrókuítóehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsintáchro ch'án. ²⁴ Chrókjueyáni nkexrí chrókjuinkítsani kichó ni kixin chrótjuèheni kichó ni la chrókjuich'eni tí nkehe jína. ²⁵ Chrókuítóehyani chrókójnkotséni, chrókóyóehyani éxi tí sín í tójnkotséhya sín. Náhí. Chrókjuinchechéheni kichó ni antsí má jie kixin ó noheni kixin í séhya tsokjan Ìnchéni.

²⁶ A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani. ²⁷ A ntá jehó itjen tí kjuachrakon jie tsitóexín jie la ko tí xrohi tjeche ts'itjáyanxín tí sín nínkakohen Dios. ²⁸ A ntá tí tjen jnkojín nkexro titekakonhya tí ley k'uetóanxín ch'ín Moisés, la tsonoxín yaá o y'á tí sín tsík'ikon tí jie tsíkjasin sín, tíha mé ts'enxín sín la kohya nkexro tsikonóehé tí jehe sín. ²⁹ ¿Á tjenkayáxinhayará kixin antsí má chrókjuasóte tí sín kuítékakuenhya tí Xjeen Dios la ko chóntehya sín kjuasáya tí ijnié ch'án la ko t'ántaxínhin sín tí Nchakuen Dios tjuèheni? Kixin tí jni chrónkaxín kixin ts'etóanxín tí pacto la ko tí jni k'uíjmáxinni. ³⁰ Noheni kixin tsintáchro Ìnchéni kixin: “Janhan mé tóna tocar

* **10:7** 10.5-7 Salmo 40.6-8 † **10:16** 10.16-17 Jeremías 31.33-34 ‡ **10:17** 10.16-17 Jeremías 31.33-34

§ **10:22** Ezequiel 36.25

sintakitoxián ijíé chojni la ko janhan tsjénkaha sín.”* Kjaxin tsintáchro kixin: “Inchéni sinchekitoxín ijíé tí sín tinkáchónki ch'án.”† 31 Méxra kjuachrakon jie chrók'uanótjenyáni tí tja Dios tjechón.

32 A ntá chróxráxinkáonrá jahará tí nkehe tsíkónhen ósé kixin tió jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá. 33 A ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkítsa tí sín tsík'ekon. 34 A ntá jahará kuikonóéhérá tí sín tjejóchjina ntoechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajní chontará nkehe antsí jína chónhya tsjeje. 35 Chrókuítóéhyará tí nkehe tinkáchónkirá kixin ó nohará kixin tíha mé ts'ayéxinrá nkehe chr'éxin. 36 Kjaxin jahará t'ichjánxin chrók'uejochonhénrá chrókóninkákonhyará kjónté ichrén nkehe chrókónhanrá, kixin sich'erá tí nkehe tjinkaon Dios, kixin xikaha chrók'uayéhérá tí nkehe tsintáchro tí jehe ch'án. 37 Kixin xikaha ntáchro xroon itén Dios kixin:

Kánhyó sé

itsi tí nkexro tsi, í sinchexrjenhya.

38 Tí sín kótjóá asén mé tjejóchónxin sín kixin tinkáchónki sín Dios; a ntá tí sín tsítóhe tí janhan la í tsochànahya tí xikaha ch'e sín.‡

39 Kjánchó jeheni jehya xikaha chrókuítóheni chrókuinkáchónkihyani tí jehe ch'án kixin ntá chrókjuasinni jie chrók'uitjányanxinni. Náhí. Tinkáchónkini ch'án la tíha chrókuaáxinni.

11

Tí fe

1 Tí fe chóntani la mé noexínni chaxín kixin tsoxiteyá ts'áyéheni tí nkehe tjejóchónhenni, la ko noexínni chaxín kixin kjónté ijnko nkehe t'ikonhyani la chaxín tjen. 2 Tí sín tsík'axrjeníxinni ósé la kóxrjínhin Dios kixin k'uéchónta sín fe.

3 Tí fe mé noexínni kixin Dios tsíkjich'éna kaín nkehe tí kjuachaxin tí nixja ch'án la ko noexínni kixin tí nkehe t'ikonni mé tsík'óna tí nkehe t'ikonhyani.

4 A ntá tí fe k'uéchónta ch'ín Abel mé k'óyán ch'án ijnko kolélo chjéhe ch'án Dios. Tíha ijnko nkehe antsí jína kjuanjon ch'án, a ntá tí nkehe tsíkjanjon ch'ín Caín la náhí. Méxra Dios kóxrjínhin tí nkehe kjuanjon ch'ín Abel ntá ntáchro Dios kixin jína tí ch'ín a. Kjónté ó tsík'en ch'ín Abel la tí nkehe tsíkjich'e ch'án naxa tjákoxin kixin jína tí fe k'uéchónta ch'án.*

5 A ntá tí fe k'uéchónta ch'ín Enoc la Dios sátsíkjiko tí jehe ch'án la k'uénhya ch'án, a ntá k'uitjahya sín ch'án kixin Dios sátsíkjiko. Naxa sákjuihya ch'án la xráxín kóxrjínhin Dios nkexrí k'uékjak'e ch'án.† 6 A ntá tí chróchóntahyani fe la xitjahya chrókuinchechéheni Dios, kixin t'ichjánxin kixin tí sín chrókóchjinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

7 A ntá tí fe k'uéchónta ch'ín Noé tí Dios chénka tí jehe ch'án tí nkehe naxa k'uíkonhya ch'án tsonhen, la kuítekaon ch'án kjuích'éna ch'án ntabárco kixin tsaáxin ch'án la ko tí sín naxa kjéhya ch'án. Tí fe k'uéchónta ch'án kjuákoxin kixin tí í so chojni chjasintajni la jínahya sín tsjasóte sín. A ntá kóxrjínhin Dios tí jehe ch'án kixin kuítekaon ch'án la tí xra kjuích'e ch'án mé kuaáxin ch'án.‡

8 A ntá tí fe k'uéchónta ch'ín Abraham tí k'uíyehé Dios tí jehe ch'án la kuítekaon ch'án sákjui ch'án tí nonte tsjanjon Dios ts'áyehé ch'án, ntá

* 10:30 Deuteronomio 32.35-36 † 10:30 Deuteronomio 32.35-36 ‡ 10:38 10.37-38 Habacuc 2.3-4

* 11:4 Génesis 4.3-10 † 11:5 Génesis 5.21-24 ‡ 11:7 Génesis 6.13-22

k'uaxrjexín ch'án chjasén ch'án kjónté noehya ch'án nketí nó sátsji ch'án. §
 9 A ntá tí fe k'uéchónta ch'án k'uékjak'e ch'án tí nonte chrókjuanjon Dios, éxí
 jehya nontee ch'án tíha. Kjuák'e ch'án nchia tsík'óna ka, la ko kjaxin xikaha
 k'uéchónta ch'ín Isaac la ko ch'ín Jacob la ko kjaxin jehe sín tsík'áyéhe sín tí
 nkehe tsintáchro Dios.* 10 A ntá ch'ín Abraham k'uékjak'echónhen ch'án tí
 chjasin tsíkjach'éna Dios ts'itjáyanhya.

11 A ntá tí fe k'uéchónta tjan Sara kjónté ó nána tjan, k'uáyéhe tjan
 kjuachaxin sich'éna tjan ijnko xjan; a ntá kjuích'éna tjan ijnko xjan kixin
 kuítekaon tjan kixin Dios sinchexiteyá tí nkehe tsintáchro ch'án. † 12 Kjaxin
 xikaha ch'ín Abraham, kjónté ó mero chrók'uen ch'án kixin ó táda ch'án, la
 k'uaxrjeníxin ch'án nchónhya chojni éxí konotsé siín nkajní o éxí nchesen siín
 chrínta ntayaon, xitjahya ts'ekini. ‡

13 A ntá kaín tí chojni a ik'uén sín k'uáyèhya sín tí nkehe tsintáchro Dios
 kixin chrók'uáyéhe sín, a ntá k'uéchónta sín fe, la kjónté ikjín k'uíkon sín la
 ko kuítekaon sín kóchéhe sín. Mé xikaha k'uéchrónka sín kixin tí chjasintajni
 jehya chjasén sín. 14 Mé xikaha k'uénixja sín la tienxínni jína kixin naxa
 xritjeyá sín nketí chrók'óna chjasén sín. 15 A ntá tí chrórxaxinkaon sín tí
 chjasin tsík'axrjexín sín ntá jína chrókjan sín ntiha inaá. 16 Kjánchó tjinkaon
 sín ijnko chjasin antsí má jína, tíha mé chjasin nkaya nkajní. Méxra Dios la
 tósuèhya ch'án kixin chrókjuinçek'in sín ch'án tí Dios kuènte tí jehe sín, kixin ó
 tjechónhen tí chjasin ts'áyéhe tí jehe sín.

17 A ntá fe k'uéchónta ch'ín Abraham kixin Dios kjuích'e prueba tí jehe
 ch'án kjuanchia tí xjeen ch'án Isaac, a ntá kjuikao ch'án chrók'óyán ch'án,
 chrókjuanjon ch'án. Tjechónhen ch'án chrókjuanjon ch'án kjónté jnkokoáxon
 xjeen ch'án tsíkjanjon Dios § tsintáchro kixin: 18 “Tí ch'ín Isaac ts'axrjeníxin
 nchónhya xjan.”* 19 A ntá ch'ín Abraham kjuátsəan ch'án kixin Dios imá
 chónta kjuachaxin, la kjónté chojni tsík'en na nchexechón ch'án, la éxí yóhe
 chrók'uen tí xjeen ch'ín Abraham ntá chrók'uáyéhe ch'án inaá.

20 A ntá tí fe k'uéchónta ch'ín Isaac kjuíncheyaon ch'án tí xjeen ch'án ch'ín
 Jacob la ko Esaú, kixin jína ts'ejó sín. † 21 A ntá tí fe k'uéchónta ch'ín Jacob
 tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí
 nta tjixin ch'án kjuisójixin ch'án nixjehe ch'án Dios. ‡ 22 A ntá tí fe k'uéchónta
 ch'ín José tió chjina its'en ch'án tsintáchro ch'án kixin tí sín israelita la chr'éxin
 ts'axrjexín sín chjasin Egipto, tsík'ətoan ch'án kixin tió sátsji sín la sátsjiko sín
 tí huesóé ch'án. §

23 A ntá tí fe k'uéchónta it'é la ko iné ch'ín Moisés tió kokjíhi ch'án kjuak'ema
 sín ch'án iní nitjó kixin tsík'ikon sín kixin ijnko xjan ntoa náxrjón tsjehe ch'án,
 la ko chrakuenhya sin tí nkehe tsík'ətoan tí ch'ín rey kixin chrók'óyán sín
 xjan.* 24 A ntá tí fe k'uéchónta ch'ín Moisés tió kóntəto ch'án la chrohya ch'án
 its'in ch'án xjeen tí tjan xjeen ch'ín rey Egipto. † 25 Náhí. Kjueyá ch'án kixin
 kjónté chrókjuasóteko ch'án tí sín tinkáchónki Dios, la kóxrjénhya ch'án kixin
 séhya náxrjón chrókjuak'e ch'án chrókjuasin ch'án jie. Náhí. 26 Kjuenkayáxin
 ch'án kixin antsí tjeətoan chrókjuasótexín ch'án tí tinkáchónki ch'án tí Cristo itsi
 chr'éxin, a ntá kánhyó tjeətoan chróchónta ch'án kaín nkehe tjeətoan sín chjasin
 Egipto. Kjuenkayáxin ch'án kixin chrók'uáyéhe ch'án tí nkehe chrókjuanjon
 Dios. 27 A ntá tí fe k'uéchónta ch'ín Moisés sákjuixin sín tí chjasin Egipto, ‡

§ 11:8 Génesis 12.1-5 * 11:9 Génesis 35.27 † 11:11 Génesis 18.11-14; 21.2 ‡ 11:12 Génesis 22.17

§ 11:17 Génesis 22.1-14 * 11:18 Génesis 21.12 † 11:20 Génesis 27.27-29,39-40 ‡ 11:21 Génesis

47.31-48.20 § 11:22 Génesis 50.24-25 * 11:23 Éxodo 1.2; 2.2 † 11:24 Éxodo 2.10-12 ‡ 11:27
 Éxodo 2.15

chrakonhya ch'án kjónté kónínkaon tí ch'ín rey, a ntá kuítóehya ch'án tí tinkáchónki ch'án Dios kixin éxí t'íkon ch'án tí Dios ninkexró t'íkonhya.

²⁸ A ntá tí fe k'uéchónta ch'ín Moisés kjuasin ch'án tí kia pascua, k'uetōan ch'án kixin chrókuikjanjin sín jni tí puerta, kixin tí ángel t'óyan chojni chrókjuincheníehya nijnko tí xjan sao kuènte tí sín Israel. § ²⁹ A ntá tí fe k'uéchónta tí sín israelita k'uátòye sín tí Ntayaon Kjátse kixin k'óna nche xamá, a ntá tió tí sín Egipto tjinkaon sín chróchréhe sín xíkaha la kjánchó kjuínhin sín tí ntá a.*

³⁰ A ntá tí fe k'uéchónta tí sín israelita la xítjen tí tjat'o t'ínkákuènxín tí chjasin Jericó, tió kjuixin k'uántatjen sín yato yaon tí chjasin a.† ³¹ A ntá tí fe k'uéchónta tí tjan Rahab, na mé ijnko tjan k'uéchónta nchónhya chojni ntoa, ntá k'uénkohya tjan kaín tí sín jiehe kuítekakonhya, kixin tsíkjanjon tjan kjuachaxin kixin kjuaxróxin tsíkitohe ntoe tjan tí sín israelita kjuíjitsàya sín tí chjasin Jericó.‡

³² ¿Nkehe naxa chróntáxrjan? Sintak'itjáyan tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta. ³³ Kixin tí fe k'uéchónta tí jehe sín kjuacha sín k'uetōan sín jina ókjé chjasin, la ko jina kjuínchekitoexín sín ijie chojni, la ko k'uáyéhe sín tí nkehe tsintáchro Dios kixin tsjanjon ch'án, la ko k'uikjehe sín ir'va koxra, ³⁴ la ko k'uanka tí xrohi chróchexín sín, la ko kjuachahya tí espada chrók'uenxín sín. A ntá tí sín chrakon la kófuérte sín, k'óna sín chojni tsehe kjuacha sín kjuánjonko sín tí sín soldado tsíkjin ókjé. ³⁵ Kjaxin k'uék'ixin chojni chjin k'uáyéhe inaá tí chojni tsík'en kuènte sín tsíxechón inaá.

A ntá í so sín la kjuasote sín k'uénxin sín kixin kjuínchemáhya sín kixin kuínkáchónki sín Dios kixin ó nohe sín kixin tsoxechón sín antsí jina inaá. ³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín. ³⁷ Í so sín la ixro k'uénxin sín, la í so sín tierra chrít'oxin sín, la í so sín la nchónhya nkehe kjuasótexín sín, la í so sín k'uénxin sín espada, la í so sín k'uék'aji sín tsík'inkáya sín tjoe kolélo la ko tjoe kotèntso, nòa sín, kjuasóte sín, kjuaxróxinhya la náxrjónhya k'uéjó sín. ³⁸ A ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjuí sín nteje, la ko jna, la ko tjo síxrja la ko tòye. ³⁹ Kaín tí sín a kónhen sín prueba kixin á chaxín chóna sín fe la kjónté xíkaha k'uáyèhya sín tí nkehe tsintáchro Dios kixin tsjanjon ch'án ⁴⁰ kixin Dios kjuenkayáxin ch'án ijnko nkehe antsí jina kixin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuínkáchónkini

¹ Méxra tí jeheni la tsík'antátjenni nchónhya chojni tsíkjakoxin sín tí fe k'uéchónta sín, la ntá chrókuítóheni ntáha kaín tí nkehe t'ínkákonhen, la ko tí jie chrókjuachroeni, a ntá chrókjuich'eni jina tí xra chóntani la ntá chrókjuachani antsí má chrókónoheni. ² Jehó Jesús chrókuínkáchónkini kixin jehe ch'án kjuanjon tí fe chóntani kixin jina kjuakoxin ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuèhya ch'án tí nkehe kónhen ch'án ik'uén ch'án, kixin nohe ch'án kixin tsjixin tsjasóte ch'án ntá náxrjón tsjak'e ch'án la ko tsochéhe ch'án kixin tsjak'etjaxin ch'án tí tja chjina tí trono kuènte Dios.

§ 11:28 Éxodo 12.21-30 * 11:29 Éxodo 14.21-31 † 11:30 Josué 6.12-21 ‡ 11:31 Josué 2.1-21

3 Méxra chrókjuenkayáxinrá jahará nkexrí kjuakoxin ch'ín Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án. 4 A ntá jahará naxa k'uénxinhyará tí tjanjonkoará tí jie. 5 ¿Á k'uitjáyanhanrá tí jahará tí nkehe ntaxraxinkaonrá Dios kixin éxi xjeen ch'án t'ikon ch'án tí jahará? Éxi ntáchro xroon itén Dios kixin:

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

6 Kixin Ìnchéni mé tjentuéhe tí sín tjuèhe ch'án la ko nchekjasóte kaín tí sín ts'áyéhe ch'án ts'óna xjeen ch'án.*

7 Chrókuítekáonrá tí nkehe t'etōan Dios kixin Dios t'ikon kixin éxi xjeen ch'án tí jahará. ¿Á siín ijnko it'é xjan chrokjuentuéhya tí xjeen? 8 A ntá tí chrókjuentuáhyará Dios tí jahará éxi tjentuéhe ch'án kaín tí xjeen ch'án, ntá jahará kjá jehya xjeen ch'án chaxín. 9 A ntá tí naxa k'uéchánjanni, na mé it'éni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuinchexiteyeheni It'éni tjen nkaya nkajní kixin chróchóntaxínni kjuachón. 10 It'éni ntihi chjasintajni kjuentuéheni ch'án kjónté kánhyó sé éxi nkexrí kóxrjínhin ch'án; a ntá It'éni Dios tjentuéheni ch'án kixin jnkójina chrók'uejōni, kixin chrók'ónani tjóá kixin jehe ch'án la tjóá ch'án.

11 Chaxín ninkehó xikaha chrókjuinchekjasóte Dios tí jeheni chrókóxrjínhiníni tí nantá chrókónhenni kixin tí kjuatjoté. A ntá xikaha ts'itjaxínni tí kjuaxróxin éxi ijnko nkehe náxrjón kjuachani.

Tí sín tjanoá tí kjuasáyé Dios

12 Méxra tjisójirá tí tjára tsíkóxrjé la ko tóch'inrá chóntahya fuerza, 13 la ko chrókjuéyará tí ntia ntoá. A ntá tí totará níhi xitjahya tjixinrá chrókuitohe jina la ko chrókóniéhya ínaá.

14 Chrókóxakonhanrá kixin kjuaxróxin chrók'uejorá kaín rá, jnkójina tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni.

15 Chrókóxakonhanrá kixin nijnkorá chrókjuitoéhyará tí kjuasáyé Dios la ko nijnkorá chrók'ónahyará éxi ijnko nuèe ka tsjá chóna veneno chrókóniéxin tí í so chojni. 16 Nijnko tí jahará chrókjuásinkoará jie ijnko chojni chjin ókjé, la ko chrókjoniéhyará tí nkehe tjóá éxi kjuích'e ch'ín Esaú, kixin jnkokoá comida kjuínchekjixin ch'án tí nkehe chróchóna ch'án kixin xjan sao jehe ch'án.†

17 Jahará ó nohará kixin chr'éxin, tió tjinkaon ch'án kixin chrókjuincheyaon it'é ch'án tí jehe ch'án la í xitjahya tsoyaon ch'án kixin kohya nkexrí chrók'uixitóxin tí nkehe tsikjich'e ch'án kjónté imá chrótsjánka ch'án.‡

18 A ntá jahará la jehya kóchjinará éxi kóchjina tí sín israelita tí jna jina chrótsé sín tí síchr'ákjen xrohi, tí tjen tí sítie t'inkaséyanhya la ko tí chjéhe xrinto.

19 Na ni tsíkienhyará tí tsintáchro trompeta, la ko tí itén Dios nixja. A ntá tí sín tsíkinhin tí tan a na mé chronòa sín kixin í chrónixjahya ch'án ínaá,§ 20 mé xikaha ichro sín kixin tsjachahya sín sinchexiteyá sín tí nkehe k'uetōan ch'án kixin “Tí nkexro tsinkátja tí jna mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jna la chrók'uen.”* 21 Ijnko kjuachrakon jie tí nkehe k'uikon sín la kjónté ch'ín Moisés tsintáchro ch'án kixin: “Kjaxin síxránkana chrakonna.”†

22 A ntá jahará tsíkóchjineherá tí jna Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel 23 tsíkójnkotsé sín kixin

* 12:6 Job 5.17; Provérbios 3.11-12 † 12:16 Génesis 25.29-34 ‡ 12:17 Génesis 27.30-40 § 12:19 Éxodo 19.16-22, 20.18-21 * 12:20 Éxodo 19.12-13 † 12:21 Deuteronomio 9.19

tsochjéhe sín kjuasáyá Dios, la ko tí sín tsíkójnkotsé sín tsík'óna sín xjeen Dios saoxín ts'ínixín ihnié sín nkaya nkajní. Jahará tsíkóchjineherá Dios, jehe ch'án mé Juez sinchekitoexín ch'án ijié kaín chojni, la ko tsíkóchjineherá tí nchakuen chojni jína ó tsíkjinchetjóá Dios, ²⁴ la ko tsíkóchjineherá ch'ín Jesús, jehe ch'án mé nixjaxin ch'án tí pacto nixin kixin tí ijnié ch'án k'uitji kjuínchetjuáxinni ch'án. **A** ntá antsí jína chrónkaxín tí ijnié ch'án, **a** ntá kánhyó tí ijnié ch'ín Abel.

²⁵ Chrókóxakonhanrá chrókuítekákonehénrá tí nkexro tjenixja. Kixin tí sín kjuanoá Dios tió kjuínchexraxinkaon ch'án tí jehe sín ntihi chjasintajni ó la kuaáhya sín; **a** ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kuixin nkaya nkajní. ²⁶ **A** ntá tí itén Dios tí yaon a kjuínchekinkí nonte. **A** ntá jie tsintáchro ch'án kixin: “**A** ntá inaá jehya nonte ó sintakinkía. Náhi. Kjaxin nkajní sintakinkía”,[‡] ²⁷ **A** ntá tí tsintáchro ch'án kixin “inaá” mé t'axrjexín kixin tsjakjin ch'án tí nkehe jína tsinkí, **a** ntá tsítóhe ch'án tí nkehe xitjahya tsinkí. ²⁸ **A** ntá tí ts'áyéheni tí kjuachaxin kjuanjon Dios la xitjahya ts'ixinkí tíha. Méxra chróchjéheni Dios kjuasáya chróxraxinkaonni ch'án chróchrakonhenni ch'án ²⁹ kixin tí Dios kuènteni mé éxi ijnko xrohi tsjacha sinchek'itjáyan kaín nkehe.§

13

Nkexrí chrók'uejóni kixin chrókóchéhe Dios

¹ Méxra chrókuítóéhyará chrótjuèherá kichuára. ² Chrók'uitjáyanhyará chrókjuánjonrá kjuachaxin chrókuítóhe ntóará tí sín tsíkjin kjin. Mé xikaha kjuích'e iso sín la kjónté ángel tsík'áyéhe sín la kónoehya sín.*

³ Xráxinkáonrá tí sín tjejóchjina éxi kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxi kjaxin tí jahará xikaha chrókonhanrá kjaxin.

⁴ Kaínrá chróchonteherá kjuasáya tí kótehe chojni. **A** ntá jahará tsikótahará la jína chrók'uejokoará kichuára chrótjuèhéra kichuára. **A** ntá tí sín tjinkaon tsochónta chojni chjin ókjé la Dios sinchekjasóte sín kixin xikaha ich'e sín.

⁵ Kénhyó má chrókóxrjínhanrá itsjé chichaon. Chrókócháhará kjónté tí kánhyó tsjé chontará; kixin tsintáchro Dios kixin: “Janhan na tsitóahya tí jahará la ko ts'itjáyanahya tí jahará.”† ⁶ Mé xikaha chrakonhyani tsontáchroni kixin:

Ínchéni mé tjinkitsani,

méxra chróchrakonhyani kjónté ichrén nkehe chrókjuich'ehe ni chojni.‡

⁷ Chróxráxinkáonrá tí sín kjuínkítsa tí jahará kjuakohará sín itén Dios, chrókjuenkayáxinrá nkexrí k'uejó sín ntá xikaha chrókóyóhará sín éxi tí fe k'uéchónta sín.

⁸ Jesucristo mé itjen ch'án ijna la ko ijie la ko jnkochrín. ⁹ Chrókuítóéhyará chrókjuakohará chojni ijnko nkehe ókjé chrókuinkachónkirá. Íchá jína tí asánrá chrók'uáyéhe fuerza kixin Dios tjuahará la jehya tjetóan chrókjuinchexiteyéheni tí nkehe t'etóan nkehe sineni. Mé xikaha tí sín kjuích'e xikaha kjuínchexiteyá tí nkehe k'uituenhen sín nkexrí chrókjóné sín la ninkehó kjuínkítsahya tíha.

¹⁰ **A** ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuích'e xra nkaxenhen ninko ósé.

¹¹ **A** ntá tí nchat'á t'etóan judío kjuíko sín tí ijnié ko nkaxenhen tí Cuarto Antsí Tjóá kixin tí nkehe la tsjatsen tí ijie sín. **A** ntá tí cuérpóé tí ko kjuakaxín

‡ 12:26 Hageo 2.6 § 12:29 Deuteronomio 4.24 * 13:2 Génesis 18.1-8, 19.1-3 † 13:5 Deuteronomio 31.6 ‡ 13:6 Salmo 118.6

sín ikon tí chjasin k'uejó sín. ¹² Kjaxin Ìnchéni Jesús kjuasóte ch'án k'uénxin ch'án ikon chjasin kixin tsotjuáxin kaín ijíe chojni tí ijnié ch'án. ¹³ Tsochréheni Ìnchéni Jesús éxi k'uénxin ch'án ikon chjasin kjónté tsjasóteni éxi kjuasóte tí jehe ch'án kjuikosáyehya sín tí jehe ch'án. ¹⁴ A ntá ntihi chjasintajni chóntahyani nijnko chjasénni chrók'uitjáyanhya; a ntá xritjeyáni tí chjasin itsi chr'éxin. ¹⁵ Méxra chrókuítóehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjéhe sín Dios. Yóhe xikaha chrókjuanjonni kixin ir'vani ó chrókjuikosáyexinni ch'án. ¹⁶ Chrók'uitjáyanhyará chrókjuich'erá xra jína la ko chrókjuínkítsará kichuárá. Tí xikaha chrókjuich'erá la imá tóxrjínhin Dios.

¹⁷ Chrókuítekákónhénrá tí sín tjakohará chrókjuínchexiteyéhérá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuentá tí tjen Dios. Tsjínkítsará sín kixin tsochéhe sín sich'e sín xra la tsonínkakhya sín. A ntá tí chrókjuínchek'ávárá sín, ntá ninkehó tsjachahya sín tsjinkítsa sín tí jahará.

¹⁸ Nixjehérá Dios kixin tí jeheni kaín ni, kixin chaxín jína kjuenkayáxinni la ko tjinkaonni kixin jína chrók'uejóni. ¹⁹ Tjáncháá xra ó kixin chrónixjehérá Dios kixin chrókjuanjon ch'án kjuachaxin kixin tjoka chrókjan janhan chrók'uejóni.

Tjanchia ch'án kixin chrókóyaon sín

²⁰ Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetóan t'ayakonhen tí kolélo, la tí ijnié ch'án mé tsoxiteyáxin tí pacto sich'e xra jnkochrín, ²¹ jehe Dios mé tsjinkítsa tí jahará kixin jína chrók'uejorá la ko kaín xra jína chrókjuich'erá kixin xikaha tjinkaon ch'án; kixin jehe ch'án t'etuénhenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xikaha chjéheni Cristo kjuasáya jnkochrín. Amén.

²² Kíchóni, xrjanóahará kixin tóninkákonhyará kixin tí palabra xrjanka sintaxraxinkáonrá. Méxra ikjian tí xroon kjónté kánhyó tsjé nixja ts'ayéhérá. ²³ Chrókónohará kixin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsahará tí jahará.

²⁴ Nixjehérá jnkojína kaín tí sín tjítaón ntia tjako la ko kaín tí sín kíchó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayéhe

¹ Janhan Santiago mé t'ahá xrá Dios la ko Ìnchéni Jesucristo nixjahá kaín tí sín tsík'axrjeníxin tí teyó xjeen ch'ín Israel tsíxikayéhe sátsíkji kuenté chjasintajni.

Dios mé tsjanjon tí kjuaxrexinkaon jína

² Jahará kichó ni, chrókócháhará kjónté chrók'uats'ínkará ichrén nkehe náxrjónhya. ³ Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará. ⁴ Chrókónohará kixin tí chrókóninkákonhyará la tíha mé ijnko xrá jína chaxín kixin ntá jahará ijnko chojni chaxín kjuacha titekaon la í t'itjáyanhya ninkehó.

⁵ Tí jnkojín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehe ch'án mé xráxin tsjanjon ch'án kaín nkehe ts'áyéhe tí chojni tjanchia la tsonínkakonyhá ch'án. ⁶ Tió chrókjuancheherá Dios nkehe la kénxín asánrá chrókjuanchiará la chrókjóhya asánrá ninkehó. A ntá tí chojni tjo asén la éxí ntayaon tjiko xrínto ijnko lado la í jnko lado. ⁷ A ntá tí xikaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni. ⁸ A ntá tí nkexro xikaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

⁹ Tí kichó ni tinkáchónki Cristo la kjónté nòà chóntahya itsjé nkehe chjasintajni la kjónté xikaha chrókóchéhe kixin tí tinkáchónki ch'án Ìnchéni la antsí má sínkí tíha. ¹⁰ A ntá tí nkexro rico kjónté chrók'uitjáyan tí nkehe chóna la antsí chrókóchéhe kixin tinkáchónki ch'án Ìnchéni, kixin tí nkehe chóna ch'án la kánhyó sínkí la ts'itjáyan éxí itsjo tsík'óna ka. ¹¹ Tió tsjiton yaon la tsosóa imá la tí ka tsoxámá la ko tí tsjo la ts'ánótjen la tí náxrjón tsjehe la tsjeje. Mé xikaha tsonhen tí ch'ín rico, ts'itjáyan ntá tsítóhe ch'án tí xrá k'uéchóna.

Tí nkehe tsonhen chojni

¹² Náxrjón tí nkexro tsjacha ts'atsínka tí nkehe náxrjónhya tsonhen. A ntá tí tsjacha ch'án ts'atsínka kaín tí nkehe náxrjónhya tsonhen ntá ts'áyéhe ch'án tí corona kuènte kjuachón kixin Dios tsíntáchro ch'án kixin tíha mé tsochjéhe ch'án tí sín tjuéhe ch'án. ¹³ A ntá jnkojínrá tí chróntáchro asánrá chrókjuich'erá ichrén nkehe jínahya, la chróntáchrohyará kixin Dios tsíkjanjon kjuachaxin xikaha sích'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'ueñoan ch'án kixin ninkexró chrókjuich'e ijnko nkehe jínahya. ¹⁴ A ntá jnkojín chojni tí ó jehó tjenkayáxixín asén tí jínahya la mé xikaha tsjachroe, tsjasin sín jie. ¹⁵ Mé xikaha tí nkehe jínahya tjenkayáxin chojni mé tjixin tí jie. La mé xikaha ts'ánkí tí jie la ntá tíha ts'enxín chojni.

¹⁶ Kichóni, chrókjuich'iyéhyará asánrá. ¹⁷ Kaín nkehe jína ntoá t'áyéheni mé tixin nkajní tí tjen Dios tí nkexro kjuich'éna kaín tí xrohi kuènte nkajní. Jehe ch'án mé Dios jnkochrínin la jehe ch'án mé xitjahya ts'ixitóxin. ¹⁸ Jehe ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxí tí nkehe senó tsík'óna, mé xikaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chróxráxinkáonrá tíhi jahará kichó ni. Kaínrá chrók'uejorá chrókuinhínrá jína la tjokahya chrónixjará kixin tjokahya chrókóninkáonrá. ²⁰ A ntá tí chojni tjoka tónínkaon la ch'ehya tí xrá jína éxí tóxrjínhin Dios. ²¹ Méxra

tìtoherá tí nkehe tjuáhya la ko tí nkehe jínahya kjuachjinoxínhin síin nkuíxin la chrókjuinchehnkehyará, chrók'uayéherá tí itén Dios chrók'uinka nkaya asánrá. Tí tan a mé chóna kjuachaxin kixin chrókuaáxinrá.

²² Jehya kixin chrókuinhónrá; jahará chrókjuich'erá éxí tí nkehe tjako tí tan a. *A* ntá tí náhí la jahóra ch'iyehérá asánrá. ²³ *A* ntá tí chojni tsinhón tí tan la ntá sinchexiteyáhya la éxí ijnko chojni tsjexín xrosenta tí kon ó. ²⁴ *A* ntá tí k'uíkon tí kon la sátsji la tuénxín k'uitjáyenhen nkexrí tsjehe. ²⁵ *A* ntá tí nkexro k'uitjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etoan tíha la ntá náxrjón tsjak'e kixin kjuínchexiteyá ch'án.

²⁶ *A* ntá jnkojín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'iyehé asén la ninkehó sínkíhya tí nkehe tinkáchónki ch'án. ²⁷ *A* ntá tí nkexro tinkáchónki Dios chaxín jína la ko tjasinhya jie nkayakon It'eni Dios la mé tíhi: mé chrókjuinkítsa tí chojni nòé la ko tí chojni k'án chónahya nkehe sine sín o níhi sín, la ko chrókjuasinhya tí jie jínahya síin chjasintajni.

2

Jnkokón chrókjuikosáyehé kichó ni

¹ Kichóni, jahará tinkáchónkirá Ìnchéni Jesucristo imá tjetooan la t'ichjánxín chrókjuikosáyehé kaín chojni jnkokón. ² Éxí ijnko chojni rico chrók'uixenhen tí tójnkotsérá la chóna koch'aninko oro la ko chóna iké náxrjón, a ntá ntiha kjaxin chrók'uixenhen ijnko chojni nòa chóna iké ntaxin. ³ *A* ntá tí chrókjuikosáyehérá tí chojni t'itsa ka jína la tsontácherá ch'án kixin: “Ntíhi antsí jína tjak'e.” *A* ntá tí chojni nòa tsontácherá ch'án kixin: “Jaha la tjak'éxian totá ntiha o tjak'e nonte ó.” ⁴ Mé xikaha la jnkokónhya tjikosáyehérá kichuárá la tí nkehe jínahya tjenkayáxinrá.

⁵ Kichóni tjuahará, tsinhínrá tíhi: Dios tsíkjeýá tí sín nòa ntihi chjasintajni kixin antsí má tsinkáchónki sín tí jehe ch'án kixin ts'áyéhe sín tí kjuachaxin kuènte ch'án éxí tsintáchro ch'án tsochjéhe ch'án tí sín tjuèhe ch'án. ⁶ *A* ntá jahará mé tjikosáyehyará tí sín nòa. *A* ntá tí sín rico mé tjikosáyehérá. ¿Á jehya tí sín rico tjanchia sín jie sájtiko sín tí jahará nkayakon tí sín t'etoan ní? ⁷ ¿La á jehya jehe sín t'ántaxínhin sín tí ihnié Cristo tjikosáyeheni?

⁸ *A* ntá jahará la jína tjejoch'erá tí nchexiteyárá éxí t'etoan tí ley éxí nixja tí xroon itén Dios kixin: “Chrótjuèherá kichuárá éxí tjuèxíná asánrá”. ⁹ *A* ntá tí jnkokónhya tjikosáyehyará chojni la ntá xikaha la tjásinrá jie la nchexiteyáhyará éxí tí nixja tí ley kuènte Dios. ¹⁰ *A* ntá ijnko nkexro titekaon kaín tí ley la ntá kjuínchexiteyáhya jnkoqá tí nkehe tjetooan la mé tí xikaha la kjuínchexiteyáhya kaín tí nkehe t'etoan tí ley. ¹¹ Ntá Dios tsintáchro kixin: “Chrókuákjahyará í jnko chojni chjin ókjé”, la kjaxin tsintáchro ch'án kixin: “T'oyánhyará kichuárá.” *A* ntá tí nkexro kuákjahya í jnko chojni chjin ókjé kjánchó kjuàya la kjuínchexiteyáhya tí nkehe t'etoan tí ley. ¹² *A* ntá jahará chrónixjará la ko chrókjuinchehnkehyará kixin chrókjuanchiahya jie tí ley sinchekaáni. ¹³ *A* ntá tí nkexro kuikonóehya í jnko chojni la kjaxin tsikonóehya Dios tí jehe. *A* ntá tí nkexro kuikonóehé kichó la mé xikaha tsjacha tsaáxin ch'án tí yaon tsjixixín tsitoxén jie.

Tí fe ch'ehya xra la tsík'en

¹⁴ Kichóni, ¿nkehe tsonhen ntáchrórá kixin chontará fe a ntá ninkehó nkehe jína tjákoxinhyará? ¿Á ntáchrórá kixin xikahó chrokuaáxinrá? ¹⁵ Éxí ijnko kichó ni ntoá o kichó ni chjin chónahya iké o chónahya nkehe sine sín

t'ichjánxinhin sín jnkojín yaon. ¹⁶ Ntá jnkojín tí jahará tsontácherá sín kixin: “Sátjia jnkojína la ko ts'itsa ká la ko sinte jína.” A ntá tí kjuánjonhyará tí nkehe t'ichjánxinhin tí cuerpoé sín la sínkíhya tí nkehe ntáchrora. ¹⁷ La mé xikaha tónhen tí fe la tí tjákojinhýará ninkehó nkehe jína kjuich'erá la éxí nkehe tsík'en tí ntáchrora.

¹⁸ A ntá jnkojín chojni tsontáchrora kixin: “Jaha chonta fe a ntá janhan it'a tí xrá jína.” Tí xikaha la jaha tjákojían tí fe kjónté kohya xrá la janhan tsjákojían tí fe la ko tí xrá jína tjét'a. ¹⁹ Jaha títekávan kixin jnkokoá Dios itjen la chaxín jína xikaha, kjánchó kjáxin tí jínahya titekaon tíha la ko síxránká chrakon. ²⁰ T'ónahýará lontí. Jahará la nohará kixin tí fe ch'ehya xrá la chónkó tíha. ²¹ Dios kóxrjínhin tí nkehe chrókjuich'e ch'ín Abraham, tí nkexro k'uaxrjeníxinni ósé, tíó chrók'óyán ch'án tí xjeen ch'án Isaac la chrókjuanjón ch'án chrók'uáyéhe Dios. ²² Chrókónohará kixin tí fe k'úechóna ch'ín Abraham la kjuákojín ch'án tí xrá kjuich'e ch'án la ntá xikaha kjuákojín ch'án kixin antsí má kuinkáchónki ch'án Dios. ²³ Mé xikaha xiteyá éxí ntáchrora xroon itén Dios kixin: “Abraham kuítekaon Dios la ntá Dios ntáchrora kixin jína ch'án”, la ntá Dios kjuínchek'in ch'án amigo kuente ch'án.

²⁴ Chrókónohará jahará kixin Dios la t'áyéhe ch'án chojni la nchetjóá ch'án kixin tí xrá jína ch'e sín la jehya kixin jehó chrókuinkáchónki sín ch'án. ²⁵ Mé kjáxin xikaha kónhen tí tjan Rahab, tí tjan k'úechóna nchónhya chojni ntoa. Jehé tjan kjuanjón tjan kjuachaxin kuítóhe ntóe tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntía, a ntá Dios la kóxrjínhin tí nkehe kjuich'e tjan. ²⁶ Éxí tí cuerpoé chojni chónahya nchakuen la tsík'en la kjáxin xikaha tí fe la tsík'en tí ninkehó tjákojinhýa tí nkehe jína chrókjuich'e sín.

3

Tí kjuachaxin chóna nejen chojni

¹ Kíchóni, chrók'ónahya tí jahará nchónhya maestro kixin tí ntoáhya chrókjuákorá la tíha mé chrókjuasótiaxínrá imá. ² Kaínni chóntani jie, a ntá tí nkexro ninkehó jie ntáchrora la ijnko chojni jína tíha la ó tsjacha ch'án ts'etuenhen ch'án kuente tí cuerpo kuente ch'án. ³ Éxí tí kokate tsochóna chica freno tí ir'va va kixin tsitekaon va la sátsjiko tí ñché va la tsjacha ch'án ts'etuenhen kuente tí cuerpo kuente va. ⁴ Tjenkáyáxinrá kjáxin nkexrí tjejó tí ntabárcó kjónté imá jie la tsjacha tí xrinto chjéhe tjian sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án. ⁵ Mé xikaha tí ir'va chojni. Kjónté ijnko nkehe imá ntsí kuente tí cuerpo kjánchó nchónhya nkehe jínahya ntáchrora éxí ijnko xrohi ntsí la tsjacha tsochéxin kuente ijnko jnā jie. ⁶ Mé xikaha tí ir'vani la éxí ijnko xrohi kixin nchónhya jie t'axrjexín la éxí ijnko veneno ncheníhi cuerpo mé xikaha mé tsjasixín kuente cuerpoé chojni jie. La tí kjuachaxin kuente ir'vani la mé tjixín tí infierno la tíha mé tjixín tí ts'itjáyanxínni. ⁷ Tí chojni la tsjacha sinchesáncho kaín ko jiehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va. ⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxí ijnko nkehe chóna nchónhya veneno ts'enxín chojni. ⁹ Tí ir'vani la kjáxin tjikosáyexinni It'éni Dios la tíha kjáxin t'ántaxíenxinni chojni tsík'jich'éna Dios éxí tsjehe tí jehe ch'án. ¹⁰ Kjáxin tí ir'vani t'axrjexín tí nkehe itsjeni kuente Dios la kjáxin tíha t'ántaxínxínni. Kíchóni, xikahya chrókjuich'era. ¹¹ Jnkokoá tòye xitjahya ts'axrje ntā xé la ko kjáxin ntā tsjá. ¹² Kíchóni, ¿á jína tí nta higuera chrók'óna to aceituna o tí nta to uva chrók'óna

to higo? Kjaxin xitjahya ijnko tòye chrók'uaxrje ntà xijnta la ko ntiha kjaxin chrók'uaxrje ntà xé.

Tí kjuaxrexinkaon jína

¹³ Tí tjen jnkojín nkexro tí tjejorá nohe jína la ko tienxín la chrókjuakoxin ch'án jnkojína la ko chrókjuinchehnkexínhya ch'án tí nkehe imá nohe ch'án. ¹⁴ A ntá tí jahará chóna kjuachjinoxínhin asánrá la tjinkáonrá jahorá chrókuétoanrá. A ntá tí xikaha la chrókjuinchehnkexínhyará tí nkehe nohará kixin tí xikaha la ch'iyará la tjinkáonhyará chróchronkará tí nkehe chaxín ntoá. ¹⁵ A ntá tí xikaha sinchehnkerá la jehya tí kjuaxrexinkaon kuixín tí tjen Dios. Tí xikaha la kjuachaxin kuente chojni chjasintajni ó la ko kuente ch'ín Tsochren. ¹⁶ A ntá tí xikaha siín kjuachjinoxínhin la ko tjinkaon chojni jehó chrók'uetuan la ntá xitjahya tsonhen xra yóxin kixin xikaha siín nkehe jínahya. ¹⁷ A ntá tí siín kjuaxrexinkaon jína tsíkixín tí tjen Dios la saoxín tjejó chojni jína la ko kjaxin kjuaxróxin tjejó sín la ko náxrjón tjejó sín la ko jnkojína nixjehe kichó sín la ko kjaxin tikónóehe kichó sín la ko tí xra jína tjejóch'e sín la tí nkehe ntoá nixja sín. ¹⁸ Tí nkexro tjejá tí kjuaxróxin xikaha chrók'uenka sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

¹ ¿Nketí tjixín tí guerra la ko tí kjuanínkaon tjanjonkoaxínrá kichuárá? Táha la mé jahorá t'axrjenixínrá kaín tí kjuanínkaon a. ² Jahará tjinkáonrá tsochontará ichrén nkehe ntá chontahyará ntá tónínkáonrá t'oyánrá kichuárá. Tóchjinoxínhanrá kixin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjinkáonrá kixin tjanchehyará Dios. ³ La tí tjanchiará la ts'ayéhyará kixin ntoáhya kjuanchiará kixin tjinkáonrá chrókuicháxinhanrá ó la chrókjuinchehnkexínrá. ⁴ Jahará chojni titekakhya Dios. ¿Á noahyará tí jahará kixin tí imá tsotjuèhéra chjasintajni la ntá tsoninkákonhéna Dios? A ntá tí jnkojínrá tjinkáonrá tsotjuèhéra chjasintajni la tsokjanrá tsoninkákonhéna Dios. ⁵ ¿Á tjenkayáxinrá kixin tí nkehe ntáchro xroon itén Dios la á chónkó? Ntáchro xikihi: “Tí Nchakuen Dios kjuanjón ch'án k'uayéhéna la tjuahará ch'án la tsonínkaon tí tsitohéna ch'án.” Mé xikaha ichro Dios. ⁶ Kixin Dios la imá tjinkitsani ch'án, méxra ntáchro xroon itén Dios kixin: “Dios la nínkakohen tí chojni nchehnke a ntá tjinkitsa ch'án tí chojni nchehnkehya.”* ⁷ Méxra chrókjuinchehnkehhyará. Íchá jína chrókuítekáonrá Dios la chrókjuánjonhyará kjuachaxin tí jínahya chrók'uetuanhanrá ntá chrók'uikon tí jínahya kixin chrók'uetuanhya ntá sáchrókjui. ⁸ Chrókóchjineherá Dios, la tí jehe ch'án kjaxin tsochjinahará ch'án. Jahará chojni chóna jie la chrókjónemará tjára. Chrókjuinchetjóára asánrá kixin chrótjuèhéna Dios la kánhyó chrótjuèhéna chjasintajni. ⁹ Chrók'uavará la ko chrótsjankará. Chrókjuínkírá tí tjanorá la chrótsjankará la chrókjuínkí tí cháhará la chrók'uavará. ¹⁰ Chrókjuinchehnkehhyará chróxráxinkáonrá Inchéni a ntá jehe ch'án chrókjuínkítsa ch'án antsí chrókónohará.

Chrók'uántaxíenhyani kichó ni

¹¹ Kichóni, chrók'uántaxíenhyará kichuárá. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jie tí ley. A ntá tí t'eka ch'án jie tí ley la mé t'óna juez chrínkí chrókuitekaon tí ley. ¹² Kixin jnkokoá nkexro kjuanjón tí ley la tí nkexro a mé tí juez la jehe ch'án sinchekaá

* 4:6 Proverbios 3.34

ch'án chojni la ko sinchekjasóte ch'án chojni. ¿A ntá nkexro tí jaha kixin chrókjuanchéhé jie tí kichuá?

Ínoehyani nkehe tsonhen ntóye

¹³ A ntá jie jahará chrókuinhínrá tíhi kixin tsíntáchrórá kixin: “Ijie o ntóye sáchrókjuini ijnko chjasin la ntiha chrók'uejóni ijnko nánó chrókjuinchekjini nkehe chrókjuachani chichaon.” ¹⁴ A ntá jahará noahyará nkehe tsonhen ntóye kixin tí tjejóchónni la éxí ijnko tjuí nonte ts'ikonni a ntá tuénxín ts'itjáyan. ¹⁵ Íchá jína chróntáchrórá kixin: “Tí tjinkaon Ìnchéni la naxa chrók'uejóchónni la chrókjuich'eni tíhi o tíha.” ¹⁶ A ntá jahará tí nixjará la imá ihnkerá la kaín tí kjuahnke la mé jínahya. ¹⁷ A ntá tí nkexro nohe chrókjuich'e tí nkehe jína la ntá ch'ehya xikaha la mé antsí tjasin jie.

5

Tí nkehe chrókuinhin tí sín rico

¹ Jahará rícorá chrókuinhínrá tíhi. Chrótsjanará la ko chrók'uíyatorá kixin tí nkehe tsonhanrá tsjasótiará. ² Tí nkehe rícoxínrá la ó tsíkótje la ko tí ka chontará la ó tsík'in kué. ³ Tí oro la ko tí plata chontará ó tsíkóchjisen. Tíha mé tjakoxin kixin nkexrí tsonhen ntoará tsoche. ¿Nkehe tsonhen kjuásintonrá nkehe kixin ó tsi tí yaon tsjixixín? ⁴ A ntá tí nkehe chrókjuacha tí sín kjuít'ahará xra la kjuénkehýará sín la ntá tjanchia sín jie tí jahará la t'èya sín, ntá Ìnchéni imá t'etóan mé kuínhin kixin xikaha ichro tí sín kjuích'e xra. ⁵ A ntá ntihi chjasintajni la náxrjón tjejorá la kaín nkehe tóxrjínhanrá ch'erá la éxí iko imá jína ine la tsíkótsanka la ntá itsji yaon ntá its'en la mé xikaha tsonhanrá. ⁶ Kixin jahará la kjuinchekjasóterá la k'oyánrá chojni ninkehó jie chóntahya kjónté kohya nkehe kjuít'ahará sín.

Chrókóninkakonhyani chróchónhenni la chrónixjeheni Dios

⁷ Méxra kichó ni, chrókóninkákonhyará chróchonhénrá tsokjanjian Ìnchéni. Éxí tí ch'ín ch'e xra nontee chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna. ⁸ Mé xikaha jahará la kjaxin chrókóninkákonhyará chróchonhénrá chrókóxrjéhyará kixin tí yaon itsi Ìnchéni la ó chjina tsi. ⁹ Kíchóni, chrókóninkákuenhyará kichuárá kixin ntá chrókjuanchahya Dios jie tí jahará kixin Dios la mé tí juez la ó tjen ch'án tí ntója puerta. ¹⁰ Kíchóni, chrókuankíhírá éxí tí sín k'uéchrónka itén Dios k'uéchrónkaxín sín kjuachaxin ihnié Ìnchéni. Jehe sín kjónté kjuasóte sín la kóninkakonhya sín. ¹¹ A ntá jeheni ntáchroni kixin kóchéhe tí sín a kjónté kjuasóte sín la kjuacha sín. Jahará la ó kuinhínrá kixin nkexrí kónhen ch'ín Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la kuikonóehé ch'án tí ch'ín a.

¹² A ntá kichó ni, chrókuakjénxínhyará ihnié Dios tjen nkaya nkajni la ko ni chjasintajni la nijnko nkexro chrók'uakjénxínhyará. Tí chróntáchrórá chaxín la chaxín la tí náhi la náhi kixin Dios la chrókjuinchekjasótiahyará.

¹³ A ntá jnkojín tí jahará náxrjónhya tjejorá la chrónixjehérá Dios, a ntá jnkojínrá náxrjón tjejorá la chrótsjerá kuènte Dios. ¹⁴ A ntá tí jnkojín nkexro níhi la chrók'uíyehé sín tí sín táda t'etóan kuènte njnko kixin ntá chrónixjehé sín Dios kixin tí sinníhi la ko chróchjéhe sín aceite tí sín a kjuachaxín ihnié Ìnchéni. ¹⁵ Chrónixjehérá Dios kaín asánrá kixin tí sinníhi chrókuítóhe jína la ntá Ìnchéni chrókjuinkítsa sín, a ntá ichrén jie kjuasin sín la jehe ch'án sinchek'itjáyan tíha. ¹⁶ Méxra chróchenkará kichuárá tí jie chontará la ko chrónixjehérá Dios kixin chrókuitóhará jína. Tí nixjehé Dios ijnko chojni jína tinkáchónki Ìnchéni la

chón̄ta nchón̄hya kjuachaxin tíha. ¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án ḱixin ts'aniáhya chrin la ntá k'uániáhya chrin chjasintajni iní nánó ko t'ó. ¹⁸ A ntá chr'éxin kjuanchehe ch'án Dios ḱixin ts'aniá chrin la ntá k'uániá chrin ínaá chjasintajni la jína k'óna tí nkehe k'uęnką sín.

¹⁹ Kíchóni, tí jnkojín chojni chrókjuichroe chrókuítóhe tí nkehe ntoá la í jnko nkexro chrókjuinkítsa ḱixin chrókjan tí nkexro a ²⁰ la chrókónohará tí jahará ḱixin jnkojín chojni tjinkítsa ijnko nkexro chón̄ta jię tsokjanxin tí ntia jínahya k'uék'aji ch'án la ntá ó kjuínkítsa ḱixin tsaáxin asén tí ch'ín a ḱixin ts'itjányanhya ch'án la ntá chrók'uitjányan tí nchón̄hya jię k'uéchón̄ta ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énnen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahá ch'án xra mé ikjian tí xroon chr'anhánrá jahará sátsíkjirá ókjé chjasin tjejorá, mé tjejorá estado Ponto, la ko Galacia, la ko Capadocia, la ko Asia, la ko Bitinia. ² Kjueyará It'éni Dios kixin jehe ch'án tsíkjenkayáxin ch'án ósé xíkaha. Kótjuáxinrá Nchakuen ch'án kixin chrókuítekáonrá ch'án la ko kótjuáxinrá ijnié Jesucristo. Kjuasáyé ch'án chrókjuintayaonrá ch'án kixin antsí chrókuákjará tí kjuaxróxin kuènte ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kuikonóeheni ch'án kixin éxí kokjéxinni nixin kixin xechón Jesucristo. Mé xíkaha tjejóchónhenni sinchekaáni ch'án. ⁴ Mé xíkaha ts'ayéhérahá jahará tí nkehe tsjanjon Dios chóntha ch'án nkaya nkajní mé ijnko nkehe chónhya ts'itjáyan, la ko chónhya tsokjita, la ko chónhya tsoxámá. ⁵ Dios mé t'ayakuanxínrá ch'án tí kjuachaxin kuènte ch'án kixin jahará tinkachónkirá ch'án kixin ntá tsjacha tsaará éxí tsíkjenkayáxin ch'án ósé mé tjinkaon ch'án kixin chrókuaará tí tsjixixín tsjeje chjasintajni.

⁶ Méxra xíkaha chrókócháhará kjónté ichrén nkehe chrókónhanrá iso yaon kixin jehí t'ichjánxin xíkaha itsjé nkehe chrókónhanrá. ⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxí yóhe chica oro xíkaha t'ichjánxin ts'atsínka tí sín xrohi tsotsjexín sín á chaxín jína kohya nkehe tsonhen. A ntá antsí má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xíkaha tí tinkachónkirá Ìnchéni t'ichjánxin xíkaha tsonhanrá kixin tsontáchro Dios kixin jína kjuachará ntá ts'ayéhérahá kjuachaxin tió tsi Jesucristo.

⁸ Jahará tjuéhérahá Jesucristo kjónté k'uikonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jie kohya nkehe sincheyóheni kixin imá náxrjón tíha. ⁹ Mé xíkaha k'uitjará nkexrí tsaáxin asánrá. Tíha mé tí nkehe tjejochonhénrá tinkachónkirá.

¹⁰ Mé xíkaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérahá tí jahará. ¹¹ Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'áyéhe ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkesá tsonhen tí nkehe chrónkaxín Nchakuan Ìnchéni. ¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uéjó sín. Náhi. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kuixin nkaya nkajní mé kjuínkítsa tí jehe sín. Kjaxin tí sín ángel tjinkaon sín chrók'uinkon sín nkexrí tíha.

Dios k'uíyehé ch'án tí jeheni kixin tjóá chrók'uejóni

¹³ Méxra chrókjuenkayáxinrá jína nkehe chrókjuich'erá kixin chrók'uejorá jnkójina. Kaín asánrá chrók'uejochonhénrá kixin tí nkehe sintakitonhanrá Dios tió tsi Ìnchéni Jesucristo. ¹⁴ Éxí ijnko xjan titekaon mé xíkaha jnkójina chrók'uejorá jahará, chrókjuenkayáxinhyará éxí k'uékjenkayáxinrá senó naxa k'uéchonhyará Dios. ¹⁵ Náhi. Jnkójina tjóá chrók'uejorá kixin Dios k'uíyahará

la mé jína ch'án la ko tjóá ch'án. ¹⁶ Kíxin ntáchro xroon itén Dios kíxin: “Jahará chrók'uejorá tjóá kíxin janhan na mé ijnko nkexro tjóá.”*

¹⁷ Tí ntáchrorá jahará kíxin It'ará mé Dios la ko ó nohará kíxin jehe ch'án sinchekitoexín ch'án ijje jnkojnko chojni, kíxin t'ikon kíxin jnkokón sínkí jnkojnko chojni, a ntá jahará chróxráxinkáonrá ch'án jnkochrínín tí naxa tjejochónrá ntihi chjasintajni. ¹⁸ Dios mé kjuíntakaará ch'án kíxin chrók'uejohyará éxí k'uék'ejó tí sín tsík'axrjeníxinrá. Jahará ó nohará jína kíxin tí nkehe k'uínáxinrá tsaáxinrá jehya ijnko nkehe chrók'uejeje éxí chica oro o chica plata. ¹⁹ Náhi. Ná mé k'uínáxinrá ijje Jesucristo imá tjete. Jehe ch'án mé k'óyán sín la k'uáyéhe Dios éxí ijnko kolélo ninkehó xéhya va. ²⁰ Kíxin Cristo mé ósé tsíkónoxín ch'án tí naxa k'ónahya chjasintajni. Kjánchó jehya tuénxín kónhen tíha hasta tí chr'éxin ntá kónoxín ch'án kíxin jína chrók'uejoxínrá tí jahará. ²¹ Ntá xikaha kónhen Cristo a ntá jie jahará la kuítekáonrá Dios, mé tí nkexro kjuínchexechón Cristo la ko kjuikosáyehe ch'án. Mé xikaha jahará tinkachónkirá Dios la ko tjejochonhénrá sintakaará ch'án.

²² A ntá jie ó kuítekáonrá tí tan chaxín ntoá kíxin tjinkitsará Nchakuén Dios. Tíha mé kótjuáxin asánrá kíxin ntá tsojuehéra kichuára. Mé xikaha chrótjuéhéra kichuára kaín asánrá. ²³ Méxra jahará kokjíhará nixin, jehya kíxin naxa chrók'uaxrjeníxinrá it'ará chjasintajni ntiho ts'itjáyan. Náhi. Kokjíaxínrá itén Dios itjen jnkochrínín. ²⁴ Kíxin ntáchro xroon itén Dios kíxin:

Kaín chojni chjasintajni tóyóhe kayoa ó,
a ntá tí kjuachaxin chóna la tóyóhe itsjo t'óna kayoa.
Tí ka la tsoxámá a ntá tí tsjo la ts'anótjen

²⁵ a ntá tí tan kuénte Ìnchéni la tsjak'e jnkochrínín.†
Tí tan í mé tsaáxinni la kuinhínrá tí jahará.

2

¹ Méxra titohéra kaín nkehe jínahya, la ko kaín kjuach'ia, la ko tí ntoáhya tjenkayáxinrá, la ko tí kjuachjinoxínhin, la ko tí xrikoará kaín xín kjuach'ia. ² Chrók'uejorá éxí chánjan na ntá tsíkókjíhi la itsjen ó chrók'ui, mé xikaha jahará chrók'uejorá itén Dios, tíha mé chrókónohará la chrók'uánkíxin kjuaxrexinkaon kuéntará kíxin chrókuaáxinrá, ³ tí chaxín kjuátsoanrá kíxin Ìnchéni la jína.

Cristo mé tí xro tjechón

⁴ Chrókóchjineherá Ìnchéni, mé jehe ch'án me éxí tí xro tjechón. A ntá tí chojni la kuítekakonhya tí xro a, a ntá Dios la kjueyá ch'án tí xro a imá tjete sínkí. ⁵ Mé xikaha Dios kjuích'énará tí jahará éxí xro tjechón la Dios chrókjuich'éna ch'án tí jahará jnkokoá nínko kuénte ch'án, la mé ts'ónará nchat'á tsíkjinchetjóá Dios, a ntá chróchjehéra ch'án tí nkehe tóxrjínhin ch'án kíxin tinkachónkirá Jesucristo. ⁶ Mé xikaha kjaxin xroon itén Dios ntáchro kíxin:

Tsjaké chjasin Jerusalén ijnko xro t'etōan ts'óna nchia, ijnko xro tsíkónoxín imá tjete sínkí

a ntá tí sín tsitekaon tí jehe ch'án mé tsosuèhya sín.*

⁷ A ntá jahará títekáonrá tí xro kíxin imá tjete. A ntá tí sín kuítekakonhya, la mé tsoxiteyá éxí ntáchro xroon itén Dios kíxin:

Tí xro náxrjónhya kuítōenta tí sín ch'éna tjat'ō,
mé ijje mé k'óna tí xro tjetoan.†

⁸ La ko kjaxin tsoxiteyá tí nkehe ntáchro xroon itén Dios kíxin:

* 1:16 Levítico 11.44 † 1:25 1.24-25 Isaías 40.6-8 * 2:6 Isías 28.16 † 2:7 Salmo 118.22

Tí xro mé tsóténkixin sín la mé tíha ijnko tjo tsjitsínkaxín sín.‡
Kjánchó jehe sín kóténkixin sín tí xro kixin kuítekakonhya sín tí itén Dios mé xráxín tsíkitoenxín sín xíkaha tsonhen sín.

Tí sín tinkáchónki Dios

⁹ A ntá jahará tsík'axrjeníxinrá tí sín tsík'jeyá Dios la ko tsík'ónará nchat'á ch'eherá xra tí rey, la ko tsík'ónará ijnko nación tjóá, la ko tsík'ónará ijnko chjasin kuente Dios kixin ntá tsochronkará tí xra náxrjón kuente Dios. K'uíyahará ch'án kixin ts'axrjéxinrá tí sítié ntá ts'ixenhénrá tí siín xrohi náxrjón t'inkaséyan kuente ch'án. ¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uékikonóahyará. A ntá jie la kuikonóahyará Dios.

Chrók'uejóni ch'ehe ni xra Dios

¹¹ Kíchóni, xrjanóahyará tí jahará kixin éxi chojni tsík'jixin ókjé chrók'uejorá ntihi chjasintajni chrókuánjonhyará kjuachaxin chrókoxrjínhin asánrá tí nkehe siín chjasintajni, mé tí nkehe tjanjonko asánrá. ¹² Jína chrók'uejorá tí siín tí sín chónhya Dios kixin kjónté t'ántaxínhanrá sín éxi chojni jínahya chóna jie tí jahará, ichro sín, la ntá tí chrók'uikon sín kixin jína tjejoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Inchéni chrókjuínchexiteyéhérá kaín tí sín t'etōan kuente chjasintajni, á tí ch'ín rey kixin imá t'etōan ch'án, ¹⁴ o á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jína. ¹⁵ Dios tjinkaon kixin jína chrók'uejorá kixin tí sín noehya la ko tí sín lontí la kohya jie ts'ekará sín tí jahará.

¹⁶ Chrók'uejorá éxi chojni t'ítuenhya, a ntá tí kjuachaxin chontará jehya kixin chróchontaxínrá kjuachaxin kixin chrókjuich'erá tí jínahya. Náhi. Chrókjuákoxinrá éxi chojni ch'ehe Dios xra. ¹⁷ Chrókjuíkosáyeherá kaín chojni. Chrótjuèhérá tí sín kichó ni, la ko chróchontehérá Dios kjuasáya, la ko chrókjuíkosáyeherá tí ch'ín gobierno t'etōan.

Tóyóexin éxi tí nkehe kjuasótexin Cristo

¹⁸ Jahará chojni ch'exón xra, chrókjuínchexiteyéhérá tí lámōará, chróchontehérá kjuasáyé sín, kjónté tí sín jína la o tí sín jínahya. ¹⁹ Tíha mé ijnko nkehe jína chrókjuákoxinrá kjónté chrókjuasótiaxínrá ijnko nkehe jínahya kixin xíkaha mé chrókjuínchexiteyéhérá Dios. ²⁰ A ntá tí tjejoch'erá ichrén nkehe jínahya, ntá nchekjasótiaxínrá sín la ¿nkehe tsonhen kixin chrókóninkákonhyará? A ntá tí chrókjuasótiaxínrá ijnko nkehe jína la ntá chrókjuachará chrókóninkákonhyará, la tíha mé tóxrjínhin Dios. ²¹ Méxra xíkaha k'uíyahará Dios kixin Cristo kjuasótéyákonhánrá. Tíha mé kjuákoxin ch'án kixin mé xíkaha chrókjuich'erá. ²² Kixin Cristo la ninkehó jie kjuasinhya ch'án la ko ninkexró kjuich'iyehya ch'án, ²³ la ko ninkehó kjuáteehya ch'án tió k'uántaxínhin sín ch'án; a ntá tió kjuínchekjasóte sín ch'án la ninkehó k'ókjanxinhya ch'án. Náhi. Jehe ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nchekitoexín ijíe chojni. ²⁴ Cristo mé kuamá ch'án tí ijíeni kixin tí cuérpōé ch'án kjuák'enkani ntacruz kixin éxi tsík'enni k'uék'ejóni kixin tí jie k'uéchóntani, a ntá jie chrók'uejóni jnkojína. Kixin Cristo kjuasóte ch'án, chrít'ō ch'án kixin jahará chrókuitoaxínrá jína. ²⁵ A ntá jahará k'uék'ejorá éxi kolélo tsík'jichroe. A ntá jie k'uitjará tí nkexro ts'ayakonhen asánrá.

‡ 2:8 Isaías 8.14

3

Nkexrí chrók'uejó tí sín tsíkótehe

¹ Kjaxin jahará chojni chjin ó tsíkótahará chrókuítekákonhénrá tí xìyará, kixin kjaxin jnkójín tí sín titekakonhya itén Dios chrókuítekaon sín kixin jína tjen tí tjachjin, kjónté t'ichjánxinhya chróchrónka tjan kixin jína tjen tjan, ² kixin chrók'uikon sín xikaha kixin jína tjen tí tjachjin chóna kjuasáyé tjan. ³ Chrókjuínchehnkexinhýará nkehe náxrjón chróchontará la ko tí nkehe náxrjón chróchóna kaxihará la ko nkehe náxrjón tsík'óna chica oro la ko tí ikará imá náxrjón. ⁴ Náhí. Chrókjuínchejínará asánrá, kixin tí nkehe náxrjón chrók'uitjáyanhya na mé tí asén chojni tójehya la ko náxrjón. Tíha mé imá sínkí nkayakon Dios. ⁵ A ntá tí ósé xikaha k'uékjenkayáxin tí chojni chjin jína. Jehe sín mé kuinkáchónki sín Dios la ko kjuínchexiteyéhe sín xì sín. ⁶ Mé xikaha kjuích'e tjan Sara kjuínchexiteyéhe tjan tí ch'ín Abraham, mé kjaxin ntáchro tjan kixin ìnehé tjan tí jehe ch'án. A ntá tí jahará tí xjeen tí jehe tjan la chrókjuínchexiteyará jína la ko ninkehó kjuachrakon chróchontahýará.

⁷ Kjaxin jahará chojni ntoará tsíkótahará chróchontehérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjáhará Dios tí kjuachón. Xikaha chrókjuích'erá ntá tió chrónixjehérá Dios la kohya nkehe chrók'uinkákonhen.

Tí sín tjasótexín sín kixin jína kjuích'e sín

⁸ Méxra, jnkokoá chrókjuenkayáxinrá kaín rá chrókuíkonóehérá kichuárá, chrótjuéhérá kichuárá. Jnkójína chrónixjehérá kichuárá la chrókjuínchehnkehýará asánrá. ⁹ Tí ichrén nkehe jínahya chrókjuít'ahará sín la jahará la xikahya chrókjuích'ehérá sín. Tí chrók'uántaxínhanrá sín la jahará chrók'uantaxíenhyará sín. Náhí. Íchá jína chrókjuancheherá Dios kixin chrókjuíncheyaon ch'án sín kixin Dios la k'uíyahará ch'án kixin chrók'uayéhérá kjuachaxin kuente ch'án. ¹⁰ Kixin:

Tí nkexro tjinkaon tsotjuèhe asén kixin jína chrókjuak'e kaín yaon

la chrónixjahya ch'án ninkehó nkehe jínahya

la ko ninkehó kjuach'ia chrók'uaxrjexínhya ir'va ch'án.

¹¹ Tí nkexro la chrókuítòhe tí nkehe jínahya la íchá jína chrókjuích'e tí nkehe jína,

la ko íchá jína chrókjueyá ch'án kjuaxróxin chrókjuak'e ch'án.

¹² Kixin Ìnehéni t'ayakonhen tí nkexro jína

la ko tinhin ch'án tí nixjehe sín ch'án,

a ntá tí sín ch'e tí jínahya la tjinkítsahya ch'án.*

¹³ ¿Xá nkexro chrókjuít'ahará nkehe jínahya tí jahará tjejoch'erá nkehe jína?

¹⁴ Kjónté chrókjuasótexínrá tí nkehe jína tjejoch'erá kjónté la chrókócháhará chróchrakuenhyará ninkexró la ko chróchrakonhyará. ¹⁵ Náhí. Íchá jína

chrókjuíkosáyehérá Cristo nkaya asánrá kixin Ìnehárá. Chrók'uejorá listo chrókjuáteherá tí nkehe chrókjuanchankíhará kaín chojni kixin nkexrí tinkachónkirá Ìnehéni, la chrókjuínchehnkehýará la kjuasáya chrókjuáteherá.

¹⁶ Chróchontará ijnko kjuaxrexinkaon jína kixin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuèhe sín kixin tí nkehe ntáchro sín la ntoáhya. ¹⁷ Íchá jína chrókjuasótiaxínrá kixin tí jína tjejoch'erá tí xikaha tjinkaon Dios, a ntá chrókósuàhará chrókjuasótiaxínrá tí ichrén jie chrókjuích'erá.

* 3:12 3.10-12 Salmo 34.12-16

18 Kíxin Cristo kjuasóte ch'án la ko k'uénxin ch'án tí jie kuènteni, ónaá k'uén ch'án kixin para jnkochrín. Jehé ch'án la jína ch'án la kjuasóteyákonhenni ch'án kjónté jínahyani, kixin ntá jína sáchrókjuíkoni ch'án tí tjen Dios. **A** ntá ik'uén ch'án éxi chojni, **a** ntá Nchakuen ch'án la k'uénhya mé xechón inaá, 19 kixin tí Nchakuen ch'án sákuíkjakohé tí nchakuen tí sín tsík'en tjejóchjina. 20 Tí sín **a** mé kuítekakonhya sín tí ósé tió kjuák'e ch'ín Noé na mé Dios la kóninkakonhya ch'án kjuák'echónhen ch'án nachrohe sít'óna tí arca, na mé ijníkoá chojni kuítekaon sín mé kuaá sín tí kuíte sín nta. 21 Tí nta **a** mé tóyóhé tí tikitexín chojni ijie kixin tí xíkaha tsonhenni la tsaáxinni ijie. **A** ntá tí tikite chojni la jehya kixin tsotjuáxin tí cuerpo. Náhí. Tsjancheheni Dios kixin sinchetjóá ch'án tí tjenkayáxinni. **A** ntá tí nkehe tsaáxinni la mé tí xechón Ìnchéni Jesucristo, 22 mé tí nkexro sátsíkji nkaya nkajni itjen ch'án itja chjina Dios. **A** ntá jehé ch'án la mé t'etuenhen tí sín ángel la ko tí sín t'etoan.

4

Chrókjuich'eheni Dios xra éxi tí kjuachaxin kjuanjon ch'án

1 Méxra éxi Cristo kjuasóte tí cuérpóe ch'án ntá kjaxinrá kjónté xíkaha chrókjuasóterá chrókóxakuanhyará kixin tí nkexro kjuasóte tí cuérpóe la ó kuítóhe tí jie. 2 **A** ntá tí naxa chrók'uejochónrá intsí la chrók'uejorá éxi tóxrjínhin Dios. Jehya éxi k'uékóxrjínhanrá. 3 **A** ntá tí ósé nchónhya nkehe k'uékjich'erá éxi ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jie k'uéchontará ókjé chojni chjin la ko k'uékókoanrá la k'uekjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjanoya. 4 **A** ntá ijie la jahará t'itohyará tí sín **a** kixin tí jínahya ch'e sín. Méxra xíkaha t'ántaxínhanrá sín. 5 **A** ntá tí jehé sín tsjanjon sín kuentá tsochénka sín tí nkexro tjechónhen sinchekitoexín ijie tí sín tjejóchón la ko tí sín tsík'en. 6 Méxra kjónté tí sín tsík'en tsíxrákóhé sín tí itén Dios kixin tí nchakuen sín chrók'uejé éxi tjinkaon Dios kjónté naxa k'uéjé sín ntihi chjasintajni la kuítóexín tí ijie sín éxi tsitoexín ijie kaín chojni.

7 Ó kuichjina tsjeje chjasintajni **a** ntá xíkaha chrók'uejorá jnkójina la ko chrók'uejotsjehérá chrónixjehérá Dios. 8 Tí nkehe imá tjetóan kixin antsí chrótjuèhé kichuárá. **A** ntá tí tjuèhé kichuárá la mé tíha chrók'uitjáyanxín tí nchónhya jie chontehérá kichuárá. 9 Chrókjuánjonrá kjuachaxin chrókuitohe jnkójín kichuárá ntóará chrókóninkákuénhyará níjnko tí jehé sín. 10 Jnkójnkora nkehe tí xra tjáhará Dios k'uayéhérá chrókjuínkítará kichuárá. Xíkaha jína chrókjuákoxinrá tí kjuasáyé ch'án tjáhará ch'án kixin nchónhya xra k'uayéhérá. 11 Tí jnkójínrá tjinkáonrá chrónixjará ichrén nkehe la chrónixjará éxi níjja itén Dios. Tí jnkójínrá tjinkáonrá chrókjuínkítará la chrókjuákoxinrá tí kjuachaxin tjáhará Dios. Kaín tí xra chrókjuich'erá chrókjuanchehé Dios kjuasáya kixin kjuasáyé Jesucristo tinkachónkirá tí jehé ch'án. Kixin jehé ch'án la kaín tí kjuachaxin siín la kuènte ch'án jnkochrín. Mé xíkaha chaxín. Amén.

Íchá jína chrókjuasótexínni kixin tí tinkáchónkini Cristo

12 Kichóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xíkaha tsonhanrá. Chróntáchrohyará kixin ókjé nkehe tjasótiaxínrá. 13 Náhí. Íchá jína chrókócháhará kixin xíkaha chrókjuasóterá éxi kjuasótexín Cristo, kixin kjaxinrá tsocháhará imá tió ts'ikonrá tí kjuachaxin tsikao Ìnchéni tí itsi ch'án. 14 Chrokócháhará tí t'ántaxínhanrá sín kixin tinkachónkirá Cristo kixin tí Nchakuen Dios chóna kjuachaxin t'ayakonhanrá. Jehé sín t'ántaxínhin sín ch'an, **a** ntá jahará tjíkosáyehérá ch'án. 15 **A** ntá tí jnkójínrá tjejtjasóterá chrókójehya kixin ichrén nkehe chrókjuich'erá

chrókjuàyará o chrókueerá o ichrén nkehe jínahya chrókjuich'erá o chrókjiatérá kjuanínkaon kuènte ókjé chojni. ¹⁶ Náhí. A ntá jnkojínrá chrókjuasótiaxínrá kíxin tinkachónkirá Cristo la chrókósuàhyará. Náhí. Chrókjuancheherá Dios kjuasáya kíxin xíkaha kónhanrá.

¹⁷ Ntá jie ó kui tí tsitoexín ijíe chojni mé xrankíxixín tí sín tsík'óna xjeen Dios. A ntá tí xíkaha tsitoexín ijíe tí jeheni xrankíxixín, a ntá íchá tí ó tsjixixín tí sín titekakonhya tí itén Dios. ¹⁸ Íchá tí sín jína la ko xíkaha tsonhen sín ntá tsaá sín a ntá íchá tí sín jínahya chóna jie kjá antsí tsjasóte sín.* ¹⁹ A ntá tí nkexro tjasóte éxí tjinkaon Dios la kjónté xíkaha la naxa chrókjuich'e sín nkehe jína la ko chrókjuanjón sín asén sín chrók'uayakonhen Dios mé tí nkexro kjuích'éna sín la mé jehe ch'án xráxín jína ch'án.

5

Tí k'uítuenhen tí sín t'etoan kuènte nínko

¹ Tjínkavan tétuanhan tí chojni t'etoan kuènte tí nínko tjejorá ntiha kíxin kjaxin janhan tétuan kuènte nínko éxí tí jehe sín, a ntá janhan mé k'uíkuan kíxin nkexrí kjuasóte Cristo, la ko kjaxin janhan mé tsochonta kjuachaxin kuènte Dios éxí tsochóna tí jehe sín tió itsi Inchéni chr'éxin. ² Jahará chrók'uayakonhénrá tí kolélo kuènte Dios ntiha kíxin xíkaha tí xra k'uayéherá. Jnkojína chrókjuínkítsará sín éxí tjinkaon Dios la jehya kíxin ijnko chojni chrók'uetuanhanrá chrókjuich'erá xra, la ko kjaxin jehya kíxin imá chrókóxrjínhanrá chichaon. Náhí. Kaín asánrá chrókjuích'erá xra jína. ³ Jehya jahará kuéntará tí jehe sín kíxin chjini chrókuétuénhénrá sín. Náhí. Jnkojína chrókjuákoéxínrá tí jehe sín. ⁴ A ntá tió tsi tí Pastor chaxín t'etoan ntá jahará ts'ayéherá ijnko corona náxrjón tsjehéhya.

⁵ Kjaxin jahará ntasoará chrókjuínchexiteyéherá tí sín t'etoan kuènte nínko. Kaínrá chrókjuínchexiteyéherá kíchuará chrókjuínchehnkehýará kíxin: Dios la tsonínkakohen tí sín nchehnke, a ntá tí sín nchehnkehya mé tsjinkítsa ch'án.*

⁶ Méxra chrókjuínchehnkehýará, chrókjuínchexiteyéherá Dios kíxin jehe ch'án imá ts'etoan ch'án kíxin tsjixraká tí yaon mé jehe ch'án tsotjáhara ch'án kjuachaxin kíxin tsétoanrá. ⁷ Chróchjehéherá Dios kaín tí kjuaxrexinkaon chontará kíxin kjaxin jehe ch'án tóxakonhen ch'án tí jahará.

⁸ Chrókóxakonhanrá jína chrók'uejorá. A ntá ijie ixri tí nkexro nínkakohenrá mé tí ch'ín Tsochren éxí ijnko koxra tsjánka va xritjeyá va nkehe sine va. ⁹ Tjánjonhyará kjuachaxin kíxin jehe ch'án chrókjuacha ch'án chrókjuachroerá ch'án, kíxin ó nohará kíxin kaín tí sín kíchuará nkuíxín chjasintajni xíkaha tjejótjasóte sín kíxin tinkáchónki sín Inchéni. ¹⁰ Kjánchó kánhyó sé tsjasótiará, a ntá Dios antsí tsjinkítsará ch'án kíxin tsjachará ts'ejorá jína. A ntá jehe Dios a mé tjuahará ch'án la k'uíyahará ch'án kíxin ts'ejokoará ch'án jnkokoá tí tjen Jesucristo chóna kjuachaxin jnkochríxín. ¹¹ Jehe ch'án tsjancheheni ch'án kjuasáya kíxin chóna ch'án kjuachaxín ts'etoan ch'án jnkochríxín. Amén.

Kjuixixín nixja ch'ín Pedro

¹² Ch'ín Silvano mé t'íkuan ijnko kíchó ni jína mé kjuínkítsa ikjinni tí xroon kjónté kánhyó tsje nixja, la ntaxraxinkáonrá kíxin kjuíntayaonrá Dios ntá xíkaha kjuakoxin ch'án kíxin chaxín tjuahará ch'án. Méxra xíkaha jína chrók'uejorá kíxin tjuahará ch'án.

* 4:18 Proverbios 11.31 * 5:8 Proverbios 3.34

¹³ Tí n̄inko t̄jen Babilonia mé tsík̄jeyá Dios éxí tsík̄jeyá ch'án tí jahará nixjahará sín la ko k̄j̄axin nixjahará ch'ín Marcos, mé éxí x̄j̄anna t'ík̄ūan tí jehe ch'án.

¹⁴ Nixjehérá kíchuará jnkójina. Kjuaxróxin chrók'uejorá tinkachónkirá Jesucristo. Amén.

Xroon yóxin tsíkjin ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'ahā xrā Jesucristo. Ikjian tí xroon ts'ayéhérá jahará ó tinkáchónkirá Ìnchéni éxí tinkáchónkini jeheni kixin Dios la ko Jesucristo tí nkexro sincheakaáni na mé jína ch'án. ² Sintayaonrá Dios la ko antsí ts'ayéhérá kjuaxróxin kixin ó nohará nkexrí tjen Dios la ko Ìnchéni Jesús.

Jína chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jína chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrā imá jié kjuích'e ch'án. ⁴ Mé xikaha kjuanjon ch'án kaín xín tí nkehe a, táha la mé imá jié la ko imá tjete sínkí. Mé xikaha kjuakoxin ch'án kixin chrók'uayéhérá kjuachaxin chrók'uejorá éxí tjinkaon ch'án la ko chrókujtohérá tí nkehe jínahya kixin chrók'uitjáyanxínhyará tí nkehe k'uékjenkayáxinrá síin chjas-intajni. ⁵ A ntá jahará tinkáchónkirá Ìnchéni la kjaxin chrókjuéyará kixin chrók'uejorá jnkójina; a ntá tí jína tjejorá ntá chrókjuachará antsí chrókónohará; ⁶ a ntá tí kónohará ntá chrókjuachará chrókjuenkayáxinrá jína; a ntá tí tjenkayáxinrá jína ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios; ⁷ a ntá tí chaxín xráxinkáonrá Dios ntá chrókjuachará chrótjuèhérá kíchuará; a ntá tí tjuèhérá kíchuará ntá chrókjuachará chrótjuèhérá kaín chojni.

⁸ A ntá xikaha tjejoch'erá tinkák'ánkí tí kjuaxrexinkaon kuéntará, ntá jehya kixin chónkó kuinkáchónkirá Ìnchéni Jesucristo. ⁹ A ntá tí nkexro ch'ehya xikaha la mé éxí ijnko chojni t'ikonhya o ijnko chojni t'ikonhya jína, kixin ó k'uitjáyenhen kixin Ìnchéni ó kjuixin kjuínchetjóá tí jié k'uéchóna ósé. ¹⁰ Méxrā xikaha kíchó ni jnkójina chrók'uejorá kixin ntá tsonohará jína kixin Dios tsíkjeýará tí jahará la ko tsík'íyáhará ch'án kixin xikaha jína chrókjuenkayáxinrá, a ntá xitjahya chrókjuichroerá. ¹¹ A ntá xikaha chrókuítekáonrá ntá tsojtáhará Dios kjuachaxin ts'ixenhenrá tí tjen Ìnchéni Jesucristo t'etōan ch'án jnkochrín. Jehe ch'án mé tí nkexro kjuíncheakaáni.

¹² Méxrā titoahya ntáxráxinkáonrá kaín tí nkehe i, kjónté ó nohará tí nkehe ntoá kjuákoahará. ¹³ Ntáxrjan kixin jína tí naxā tjén chrókjuintáxráxinkáonrá kaín tí nkehe a ¹⁴ kixin Ìnchéni Jesucristo kjuínchenóna kixin í séhya its'én janhan. ¹⁵ Na mé kaín tíha tjet'a kixin tió its'én, ntá jahará tsoxráxinkáonrá jnkochrín kaín tí nkehe kjuít'a.

Tí sín k'uíkon tí kjuachaxin kuènte Cristo

¹⁶ Tí nkehe kjuakoharáni kuènte tí kjuachaxin kuènte Ìnchéni Jesucristo la ko nkexrí itsi ch'án na mé jehya ijnko cuento kjuích'éna chojni chrókjuich'iyaxín. Náhí. Ikonni k'uíkonxínconni Ìnchéni la ko tí kjuachaxin kuènte ch'án. ¹⁷ K'uíkonni tíha tió It'eni Dios kjuikosáyehe ch'án tí Xjeen ch'án, la ntá kuínhinni nixja Dios tjen nkaya nkajní ntáchro ch'án kixin: “Tíhi mé xjanna tjuahā ch'án. Imá chàna kixin nchexiteyá ch'án éxí tjínkavan janhan,” ichro Dios. ¹⁸ Mé kuínhinni itén Dios kuixín nkaya nkajní kixin xikaha ntáchro tió k'uejókoni Ìnchéni chrítaón tí jnā tjóá.

¹⁹ Mé xikaha k'uéchrónka tí sín tsíkjin itén Dios ósé ntá noexínni kixin chaxín tsoxiteyá. A ntá jahará chrók'uejorá chrókuinhínrá jína nkehe k'uéntáchro

sín kixin tí tan mé éxí ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xikaha ts'inkaséyanxín nkaya asánrá. ²⁰ A ntá tjetuan chrókónohará tíhi: kixin ninkehó xroon itén Dios tsík'óna jehó chojni chrókjuacha chrókienxín. ²¹ Náhí. Tí sín k'uéchrónka itén Dios la nixjahya sín tí nkehe jehó sín chrókjuenkayáxin sín. Náhí. Tsíkjinchetjóá Dios tí jehe sín, a ntá Nchakuen Dios kjuínkítsa k'uénixja sín itén Dios.

2

Tí sín tjako kjuach'ia (Judas 4-13)

¹ Kjaxin k'uék'ixin tí sín ntoáhya k'uéchrónka itén Dios tí chjasin Israel, mé kjaxin xikaha tí jie ts'ixin maestro sit'ayahará. Jehe sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xikaha sinchemá sín tí Ìnchéni chrókuaáxinni. Tíha mé tsjixin tsjasótexín tí jehe sín. ² Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxiēnxín chojni tí ntja ntoá kuente Ìnchéni. ³ Tsoxrjínhin sín tsochóna sín nchónhya chichaon, ntá tsjanchiáxínrá sín chichaon tí nkehe ntoáhya tsjakohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

⁴ Dios la kjónté tí sín ángel kjuasin jie la kuikonóehya ch'án sín la k'uetōan ch'án kixin sátsji sín tsjasóte sín sátsjik'íkjehe sín tí sítié na tjejóchjina sín tsjixrakájia tí tsitoexín ijíé sín. ⁵ La ko kjaxin kuikonóehya Dios tí sín k'uéjō chjasintajni ósé ntá ichr'án ch'án ntá kuíteē tí sín jínahya, a ntá Dios kjuínchekaá jehó tí ch'ín Noé, na mé tí nkexro kjuako tí tan jína la ko kjuínchekaá ch'án tí yato sín ó.* ⁶ Kjaxin Dios kjuínchek'itjáyan tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejō chr'éxin kixin xikaha tsonhen sín.† ⁷ Kjánchō Dios kjuínchekaá ch'án tí ch'ín Lot kixin ijnko chojni jína tí jehe ch'án la ko imá kóxakonhen ch'án tí k'uíkon ch'án tí jie kjuasin tí sín jínahya. ⁸ Tí ch'ín Lot mé jína asén ch'án mé k'uékjak'e ch'án tí síin tí sín jínahya ntá kaín yaon kóxakonhen asén ch'án k'uíkon ch'án la ko kuínhin ch'án tí nkehe jínahya k'uékjich'e sín.‡ ⁹ A ntá Ìnchéni na sinchekaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsitoexín ijíé chojni.

¹⁰ Dios antsí sinchekjasóte ch'án tí sín nchexiteyéhe tí nkehe jínahya ntáchro asén sín a ntá nchexiteyèhya sín tí nkehe t'etōan Ìnchéni. Titekakonhya sín la ko chrakonhya sín chrók'uántaxínhin sín tí sín ángel chóna kjuachaxin. ¹¹ A ntá tí sín ángel imá tsehe sín la ko imá chóna sín kjuachaxin la kjónté tjinkakonhya ts'ántaxínhin tí sín a nkayakon Ìnchéni.

¹² A ntá tí chojni a la éxí yóhe iko tjenkayáxinhya ninkehó la nchexiteyéhe tí nkehe ntáchro asén, la kokjíhi kixin ts'óyán kichó ó. T'ántaxínhin sín tí nkehe tienxínhya sín, mé xikaha its'en sín éxí its'en tí ko a. ¹³ Tíha mé tsjasótexín sín kixin jehe sín kjuínchekjasóte í so chojni. Xráxín tóxrjínhin sín ich'e sín tí nkehe ntáchro asén sín. Ijnko kjuatósuèhe kixin tjejóntaxín sín ntekoará sín tí kia chontará la kjónté tí xikaha la naxa tjasin sín jie.

¹⁴ Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótexín sín. ¹⁵ Kuítóhe sín tí ntja ntoá ntá chréhe sín ntja kuente ch'ín Balaam xjeen ch'ín Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án. ¹⁶ A ntá t'ichjánxin tsjasóte ch'án

* 2:5 Génesis 6.1-7.24; 8.18 † 2:6 Génesis 19.24 ‡ 2:8 2.7-8 Génesis 19.1-16, 29

kíxin tí jiē kjuasin ch'án. A ntá ijnko kolócho chjin xitjahya nixja la xrināhya nixja itén chojni la kjuentuéhe tí ch'ín Balaam kíxin tí jiē chón̄ta ch'án ntá kuitohe ch'án tí nkehe jínahya chrókjuich'e ch'án. §

¹⁷ Tí chojni tjako mé éxí yóhē tòyē tjiáhya n̄ta la ko éxí tjuí tjakáko xrinto ó; ó kjuixin k'uítuenhen sín sátsji sín tí imá sítié tsjasóte sín jnkochrín. ¹⁸ Kaín nkehe jínahya nixja sín, a ntá tí jiē tjasin sín tóxrjín̄hín sín chojni chjin ókjé ntá tjachroexín sín tí sín na ntá tjinkaon chrókuítóhe sín tí jiē. ¹⁹ Chrónka sín kíxin kaín nkehe jínahya la jína, kíxin jehe sín nchexiteyéhē sín tí nkehe jínahya ntoáhya; kíxin jnkojnko chojni mé nchexiteyéhē tí nkehe kjuacha k'uetuenhen sín. ²⁰ A ntá tí nkexro ó chóxin Ìnchéni Jesucristo tsaáxinni mé kuitohe sín tí nkehe chrók'uitjáyanxín sín kuènte chjasintajni. A ntá chr'éxin tí chrókuakja sín n̄tia jínahya inaá tí chrókjuacha tí jínahya chrókjuachroe sín, a ntá antsí má jínahya chrókónhen tí jehe sín. ²¹ Íchá jína chrókónoehya sín tí n̄tia jína. A ntá jehya jína tí ó nohe sín ntá tsítóhe sín tí nkehe k'uetōan Dios kuín̄hín sín. ²² A ntá tí jehe sín kjuínchexiteyá sín éxí ntácho tí proverbio kíxin: “Tí kon̄ja t'ókjan ntá xíkjan xíkjine inaá,* la ko tí cochíno na ntá tsík'ónti tjoá ntá xíkjan kjíankí tí nchet'ō kjita.”

3

Tió tsi Ìnchéni

¹ Kíchóni tjuahará tíhi la xroon yóxin ikjian ts'ayéhérá. Yóí tí xroon a ntaxráxinkáonrá kíxin jína chrókjuenkayáxinrá. ² Chróxráxinkáonrá tí nkehe tsíchronka tí sín k'uéchronka itén Dios ósé la ko tí nkehe k'uetōan Ìnchéni, mé tí nkexro tsaáxinni, kjuakohará tí sín kjueyá ch'án.

³ Tjetoan chrókónohará tíhi kíxin tí yaon tsjixín la itsi chojni tsjanoá tí tan jína kuènte Ìnchéni, la sinchexiteyéhē sín kaín nkehe jínahya ntácho asén sín. ⁴ Tsjančankí sín nkehe kónhen tí nkehe tsintácho Cristo kíxin tsokjan ch'án, kíxin desde ik'uén tí sín tsík'axrjeníxinni k'uéjé ósé la xikahó naxa sítónhen éxí tió k'óna chjasintajni. ⁵ Tí sín a titekakonhya sín kíxin ósé k'uénixja Dios ntá k'óna nkajní la ko chjasintajni na mé kjuín tí n̄ta ntá kuitohe nonte xamá. ⁶ A ntá tí n̄ta k'uitjáyanxín chjasintajni inaá. ⁷ A ntá tí nkajní la ko tí chjasintajni naxa tjejó jiē tjejóchónhen tsoche kíxin xikaha k'uetōan Dios kíxin xrohi tsochexín tí yaon tsjixín tsitōexín ijiē chojni la ko kaín tí sín jínahya tsjasóte sín.

⁸ A ntá kichó ni, chrók'uitjáyanhará kíxin Ìnchéni tí ijnko yaon t'ikon ch'án éxí mil nánó la ko mil nánó t'ikon ch'án éxí ijnko yaon ó.* ⁹ Ntá Ìnchéni í séhya sinchexiteyá ch'án tí nkehe tsintácho ch'án la jehya éxí tjenkayáxin í so chojni kíxin ó má sé tjejóchónhen sín. Náhi. Jehí tjechónhen ch'án kíxin ninkexró chrók'uitjáyanhya kíxin tjinkaon ch'án kíxin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxí xichē itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe siín.

¹¹ A ntá tí xikaha kaín nkehe ts'itjáyan, a ntá jahará la jína chrók'uejorá chróxráxinkáonrá Dios. ¹² Chrók'uejochonhénra tí yaon itsi Dios chrókóxonhanrá chrókjuich'erá xra kíxin ntá tjoka chrókui Ìnchéni. A ntá tí yaon tsjixín mé ts'itjáyan nkajní tsoche, la ko kaín nkehe tsoxíka ts'itjáyan

kíxin imá tsosóa. ¹³ A ntá jeheni tjejóchónhenni nkajní nixin la ko chjasintajni nixin éxi tsintáchro Dios kíxin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

¹⁴ Méxra xikaha kichó ni, nachrohe tjejóchónhénra kíxin itsi tí yaon tsonhen xikaha la kaín asánra chrókuéyará jnkojína chrók'uejorá kíxin ts'ikon Dios kíxin kjuaxróxin tjejorá chontahyará jie. ¹⁵ Chrókónohará kíxin naxa tjechónhen Ìnchéni, tjokahya itsi ch'án kíxin í so chojni naxa chrókuitekaon sín ch'án. Kjaxin xikaha tsíkjin tí kichó ni Pablo tí xroon chr'ánhanrá ch'án éxi tí kjuachaxién Dios tsík'áyéhe ch'án chrónka xikaha. ¹⁶ Jnkojnko tí xroon tsíkjin ch'án nixja xikaha la imá xra chrókienxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrjexín tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xikaha jehó sín tjejá sín nkehe ts'itjáyanxín sín.

¹⁷ Méxra kichó ni, ó nohará tí nkehe senó, ntá chrókóxakonhanrá kíxin chrókjuachruèhyará tí kjuach'ia xriko tí sín jínahya ntá chrókujtohérá tí nkehe jína ntoá tinkáchónkirá. ¹⁸ Ichá jína antsí má chróchoxínra Ìnchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxra tsjikosáyeheni ch'án ijie la ko jnkochríxín. Amén. Ó tjen.

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéhérá kixin tsonohará kuènte tí nkexro xráxín kjuák'e tí naxá t'ónahya chjasintajni, mé tí nkexro kuínhinni nixja la ko tí nkexro k'uíkonxín konni. Kixin tí nkexro mé k'uíkonni la ko tí nkexro kuákóxín tjani, mé tí nkexro nixja tí tan tsjanjon kjuachón. ² Kjuakoxín ch'án nkexrí kjuák'e ch'án, a ntá káin tí jeheni k'uíkonni ch'án, mé xíkaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. ³ Chrónkaxínni tí nkehe k'uíkonni la ko tí nkehe kuínhinni, kixin kjaxinrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'éni Dios la ko tí Xjeen ch'án Jesucristo. ⁴ Mé xíkaha ikjinni tí nkehe i, kixin chrókjuintaxín chrókócháhará la ko chrókóchéheni.

Dios mé tí xrohi

⁵ Tí tan i mé Inchéni Jesucristo kjuakohe tí jeheni, a ntá jie tjakocharáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án. ⁶ A ntá tí tsontáchroni kixin tinkáchónkini tí jehe ch'án, a ntá naxá ixrini tí ntia sítié, na mé xíkaha ch'iani kixin ch'ehyani tí nkehe ntáchroni. ⁷ A ntá tí xritjejóni tí t'inkaséyan kixin tí Dios mé jehe ch'án tí t'inkaséyan, na mé xíkaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'íjmáxin káin jie chóntani.

⁸ Tí chróntáchroni kixin ninkehó jie chóntahyani, mé xíkaha la jehóni ch'yeheni asénni, a ntá tí nkehe chaxín la chóntahyani. ⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jína ch'án la ts'itjáyenhen ch'án káin jie chóntani la ko sinchetjóáni ch'án kixin káin tí nkehe jínahya kjuích'eni. ¹⁰ A ntá tí tsontáchroni kixin kjuasinhyani ninkehó jie, la éxí chróntáchroni kixin Dios la ch'ia ch'án, a ntá tí xíkaha tsixroni la chaxínhya tsík'áyéheni tí tan kuènte ch'án.

2

Cristo mé tsonixjayákonhenni ch'án

¹ Kíchóni, éxí xjanna t'íkuan tí jahará, a ntá tjékjian tí xroon ts'ayéhérá tsochrónka kixin chrókjuásinhyará jie. A ntá tí jnkójnra chrókjuásinra jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jína. ² Jesucristo mé k'uenyákonhenni ch'án kixin tí jie chóntani; a ntá jehya ijieni ó. Náhi. Ijie káin chojni siín chjasintajni.

³ Tí tsitekaonni tí nkehe k'uetōan Dios ntá tsonoexínni chaxín kixin chóxinni ch'án. ⁴ A ntá jnkójn nkexro ntáchro kixin chóxin Dios, a ntá titekakonhya tí nkehe tsík'etōan Dios, la mé ch'ia la noehya tí nkehe chaxín. ⁵ A ntá tí nkexro titekaon tí nkehe tsík'etōan Dios la chaxín tjuèhe Dios; mé xíkaha noheni kixin chaxín jnkokoá tjejókoni ch'án. ⁶ Tí nkexro ntáchro kixin chaxín tinkáchónki Dios chrókjuak'e éxí kjuák'e Jesucristo.

Tí mandamiento nixin

⁷ Kíchóni, méxra tí nkehe tjékjian jehya ijnko nkehe nixin tsík'etōan Dios. Náhi. Tíha mé tí nkehe k'uayéhérá tí xrankíxixín, mé tí mandamiento ósé tjen, mé tí nkehe ó tsíkinhínra. ⁸ Kjánchó tí nkehe ikjian mé yóhe ijnko nkehe nixin,

éxi kjuakoxin Cristo mé xikaha tjakoxinni, kixin tí sítié la tinkák'itjáyan kixin ijie la ó t'inkaséyanxín tí xrohi chaxín.

⁹ A ntá tí nkexro tsonáchro kixin ixri tí t'inkaséyan, a ntá naxa nínkakohen kichó, na mé tí xikaha naxa itjen tí sítié a. ¹⁰ A ntá tí nkexro tjuèhe kichó mé tjen tí t'inkaséyan, a ntá xikaha jína tjen, chóntahya jie la chrókjuachruèhya ch'án ninkexró kixin chrókjuasin sín jie ínaá. ¹¹ A ntá tí nkexro nínkakohen kichó mé tjejó sín la ko ixri sín tí sítié a la ko noehya sín nketí nó sátsji sín kixin tí sítié la kjuích'ena ntakótán sín.

¹² Éxi xjanna t'íkuan tí jahará, la méxra tjékjian tí xroon ts'ayéherá kixin tsonohará kixin kjuachaxin ihnié Dios kjuínchetjuáxinrá tí ijjará kixin k'uenyákonhenni Ìnchéni Jesucristo. ¹³ Jahará it'é xjan, ikjian tí xroon ts'ayéherá jahará kixin choxínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéherá jahará kixin kjuachará kixin kjuachahya tí Jínahya chrók'uetuanhanrá.

Ikjian tí xroon ts'ayéherá jahará chánjanrá, kixin choxínrá It'éni. ¹⁴ A ntá jahará it'é xjan ikjian tí xroon ts'ayéherá kixin ó choxínrá tí nkexro itjen tí xrankíxixín tí naxa t'ónahya chjasintajni. Ikjian tí xroon ts'ayéherá jahará ntasoírá, kixin naxa fuérterá, la ko k'uayéherá tí itén Dios, la ko kjuachará kixin kjuachahya Tsochren chrók'uetuanhanrá.

¹⁵ Chrótjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'éni Dios. ¹⁶ Kixin ninkehó tí nkehe chrókjuanjon chjasintajni chrókuixín tí tjen It'éni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni kixin itsjé nkehe chróchóntani. ¹⁷ A ntá tí chjasintajni sítinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínhin Dios mé ts'ejó sín jnkochrísín.

Tí nkehe chaxín la ko tí nkehe kjuach'ia

¹⁸ Éxi xjanna t'íkuan tí jahará, la chrókónohará kixin ó kuichjina tí yaon tsjixixín. Jahará ó kuínhínrá kixin ó tsi tí nkexro nínkakohen Cristo. A ntá ijie tinkákónoxín nchónhya tí sín a, mé noexínni kixin ó kuichjina tí yaon tsjixixín. ¹⁹ Jehé sín tsík'axrjekjanxín sín tí tjejóni; kjánchó chaxínhya kuinkáchónki sín éxi tinkáchónkini. Náhi. Tí chaxín chrókuinkáchónki sín éxi tinkáchónkini la chrók'uaxrjekjanxínhya sín tí tjejóni, naxa chrók'uejókoni sín jnkokoá. A ntá xikaha kónhen k'uaxrjekjan sín kixin tsonoxín kixin kuinkáchónkihya sín éxi tinkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéherá kaín rá, ntá jie tiénxinrá intsí kuènte ch'án. ²¹ Ikjian tí xroon ts'ayéherá kixin ó nohará tí nkehe chaxín, jehya kixin chrókónoahyará; jahará la ó nohará kixin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kixin Jesús la jehya tí Cristo. Tí nkexro a mé nínkakohen Cristo, mé titekakonhya It'éni Dios la ko tí Xjeen ch'án. ²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kixin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínrá tí xrankíxixín la chróxráxinkáonrá jnkochrísín. A ntá xikaha tí chróxráxinkáonrá jnkochrísín tí nkehe tsíkinhínrá tí xrankíxixín, la kjaxin xikaha jnkokoá chrókuinkachónkirá tí Xjeen Dios la ko tí It'é ch'án. ²⁵ Kixin Jesucristo tsíntáchro ch'án kixin tsjanjon ch'án tí kjuachón jnkochrísín.

²⁶ Méxra xikaha tjékjian tí xroon i ts'ayéhérá kixin chrókónohará kuènte tí sín tjinkaon chrókjuít'ayahará. ²⁷ Kjánchó jahará la ó chontará Nchakuen Dios tsítjáhará Jesucristo, a ntá xikaha la í t'ichjánxinhya kixin ókjé nkexro chrókjuakohará, kixin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

²⁸ A ntá jie éxí xjanna t'íkuan tí jahará, chrókuitoéhyará chrókuinkachónkirá Cristo, kixin tió tsi ch'án la antsí chróchoxínrá ch'án la ko chrókósuàhyará chrókóchjinará tió tsi ch'án, ²⁹ kixin ó nohará kixin Jesucristo la jína ch'án. A ntá chrókónohará kixin kaín nkexro jína la xjeen Dios tíha.

3

Tí sín xjeen Dios

¹ Chrókónohará kixin It'éni Dios, imá tjuèhe tí jeheni kixin nchek'in ch'án xjeen ch'án tí jeheni, la mé chaxín jeheni tíha. Mé xikaha tí sín chjasintajni chónhya sín tí jeheni kixin jehe sin la xráxín chónhya sín Dios. ² Mé xikaha kichó ni, ó tsík'ónani xjeen Dios, a ntá naxa tjakoxinhya ch'án nkehe tsonhenni tí tsjixixín. Kjánchó ó noheni kixin tió itsi Ìnchéni Jesucristo la ts'ónani éxí tí jehe ch'án, kixin ts'ikonni kixin nkexrí tjen tí jehe ch'án. ³ A ntá kaín nkexro tjejóchónhen tí tsi ch'án la chrókuítóhe sín ijié sín kixin tsotjóá sín kixin jehe ch'án la tjóá ch'án.

⁴ Kixin kaín tí nkexro tjasin jie mé jínahya ch'e sín, kixin tió tjasin chojni jie la mé xikaha kuítekakonhya sín tí ley a. ⁵ Jahará ó nohará kixin Jesucristo kui chjasintajni kixin tsjatsen ch'án tí ijiéni, a ntá jehe ch'án la ninkehó jie chóntahya ch'án. ⁶ Mé xikaha kaín tí sín chaxín tinkáchónki tí jehe ch'án la mé tjasinhya sín jie; a ntá kaín tí sín tinkákjasin jie la tsík'ikonhya sín ch'án la ko xráxín chónhya sín ch'án. ⁷ Éxí xjanna t'íkuan tí jahará; méxra chrókuitoéhyará kixin ninkexró chrókjuít'ayahará; a ntá tí nkexro ch'e nkehe jína la jína ch'án, kixin Ìnchéni la jína ch'án. ⁸ A ntá tí nkexro xritjasin jie la mé kuènte tí Jínahya; kixin tí Jínahya mé kjuankixin kjuasin jie desde tí xrankixixín k'óna chjasintajni. Méxra tí Xjeen Dios mé kui chjasintajni kixin sinchek'itjáyán ch'án kaín tí xra kjuích'e tí Jínahya.

⁹ Nijnko tí chojni tsík'axrjeníxin Dios naxa chrónkákjasin jie, kixin ó chóna tí kjuachón kjuanjon Dios; la í xitjahya naxa chrókjuasin jie kixin ó tsík'óna xjeen Dios. ¹⁰ Mé xikaha tónoxín kixin nkexro tí xjeen Dios la ko nkexro tí xjeen tí Jínahya, kixin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kichó ni

¹¹ Méxra tí tan tsíkinhínrá tí xrankixixín mé tíhi, kixin chrótjuèheni kichó ni. ¹² Chrókjuích'ehyani éxí kjuích'e ch'ín Caín, kixin jehe ch'án mé kuènte tí Jínahya, kixin k'óyán ch'án tí kichó ch'án. ¿Nkekuènte kixin k'óyán ch'án? Kixin tí ch'ín Caín la tí nkehe jínahya kjuích'e ch'án, a ntá tí kichó ch'án la kjuích'e ch'án tí nkehe jína.

¹³ Kichóni, chróchrakonhyará tí nínkakonhanrá tí sín siín chjasintajni. ¹⁴ A ntá noheni kixin k'uatsínkani tí kjuach'én, a ntá kjuachón, mé noexínni tíhi kixin tjuèheni kichó ni. Tí nkexro tjuèhya kichó la éxí tsík'en sín xikaha xritjéjó sín. ¹⁵ Kaín tí nkexro imá nínkakonhen kichó na mé chojni tjàya tíha, la ko ó nohará kixin ijnko chojni tjàya la xitjahya tsochóna kjuachón jnkochrín. ¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni. ¹⁷ A ntá tí tjen ijnko

nkexro rico t'ikon kixin ijnko tí kichó ch'án t'ichjánxinhin nkehe, a ntá tí tsjinkitsahya tí kichó, ¿a ntá nkexrí chrótjuèhe ch'án Dios kaín asén ch'án? 18 Éxí xjanna t'íkuan tí jahará, méxra chrótjuèxínhyani tí kichó ni tí tan náxrjón chrónixjani ó. Náhí. Chrókuakoxinni tí nkehe jina chrókuich'eni.

Jína tsochjineheni tí tjen Dios

19 Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxí tjinkaon Dios. 20 A ntá tí tjoni asénni kixin chónntani ichrén jie, a ntá Dios la imá nohe ch'án la nohe ch'án kaín nkehe tónhen asénni. 21 Mé xikaha kichó ni, tí tjohya asénni kixin naxa ichrén nkehe jínahya tjenkayáxinni, a ntá antsí jina tsochjineheni tí tjen Dios, 22 a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéhéni tí nkehe k'uetōan ch'án la ko ch'eni tí nkehe tóxrjínhin ch'án. 23 Tí nkehe tsík'etōan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kichó ni éxí k'uetōan ch'án. 24 Tí nkexro nchexiteyéhé tí nkehe k'uetōan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

1 Kichóni, chrókuitekákonhyará kaín tí sín ntáchro sín kixin Nchakuen Dios mé nixjaxin tí jehe sín. Náhí. Chrótsjehérá tí nkehe ch'e sín kixin chrókónohará kixin á chaxín chónnta sín Nchakuen Dios o náhí, kixin tí chjasintajni la ixri nchónhya chojni ch'ia, ntáchro sín kixin nixja sín tí itén Dios. 2 A ntá xikaha mé chrókónoaxínrá kixin á chaxín chónnta sín Nchakuen Dios kixin kaín tí sín chaxín titekaon sín kixin Jesucristo ikui éxí chojni mé chónnta sín Nchakuen Dios. 3 A ntá tí nkexro titekakonhya kixin xikaha tsíki Jesús, na chónntahya sín Nchakuen Dios. Náhí. Chónnta sín tí nchakuen tí nkexro nínkakonhen Cristo. Jahará ó kuínhínrá kixin itsi tí nchakuen a, a ntá jie ó tsíki chjasintajni.

4 T'íkuan tí jahará éxí xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetōan, kixin tí nkexro tjejókoará la imá t'etōan, a ntá tí nkexro t'etōan chjasintajni la kánhyó t'etōan. 5 Kixin jehe sín la kuente chjasintajni ó, méxra nixja sín tí nkehe kuente chjasintajni ó. A ntá tí chojni kuente chjasintajni ó mé tjejótinhin sín. 6 A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjatsoanxínni nkexro chónnta tí Nchakuen tí nkexro chaxín la ko nkexro chónnta tí nchakuen tí nkexro xrich'ia.

Dios mé tjuèheni

7 Kichóni, méxra chrótjuèheni kichó ni, kixin tí tjuèheni kichó ni mé tixin tí tjen Dios. Kaín nkexro tjuèhe kichó mé xjeen Dios, la ko chóxin Dios. 8 A ntá tí nkexro tjuèhya kichó na mé chónhya Dios kixin Dios la xráxin tjuèhe chojni. 9 Dios la ó kjuakoxin ch'án kixin tjuèhe tí jeheni kixin tsíchr'án ch'án tí jnkokoá Xjeen ch'án chjasintajni kixin tsochónntaxínni kjuachón tí jehe ch'án. 10 A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhí. Jehe ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chónntani.

11 Kichóni, a ntá tí xikaha Dios tjuèhe tí jeheni, a ntá kjaxinni jeheni xikaha chrótjuèheni kichó ni. 12 A ntá Dios la nínkexró k'uíkonhya. Kjánchó tí chrótjuèheni kichó ni la Dios ts'ejókoni ch'án, a ntá tsjinkitsa ch'án kixin chaxín tsotjuèheni kichó ni. 13 Tíhi mé noexínni kixin tjejókoni Dios la ko jehe ch'án

tjejóko tí jeheni kixin tsíkjanjon ch'án tí Nchakuen ch'án chóntani. ¹⁴ Jeheni mé k'uíkonxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni síin chjasintajni. ¹⁵ A ntá jnkojín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xíkaha mé noexínni la ko titekaonni kixin Dios la tjuèhe tí jeheni. Dios mé xráxín tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín. ¹⁷ Mé xíkaha chaxín chrótjuèheni Dios kixin ntá chróchrakonhyani tí yaon tsitoexín ijíeni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án. ¹⁸ Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkojín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kixin jehe ch'án senó tjuèhe ch'an tí jeheni. ²⁰ A ntá jnkojín nkexro ntáchró kixin jehe mé tjuèhe Dios, a ntá tuénxín nínkakohen kíchó mé kjuach'ia xriko. Tí tjuèhya ch'án tí kíchó chóxin ch'án, la kjaxin xitjahya tsotjuèhe Dios kixin tsík'ikonhya ch'án Dios. ²¹ Tíhi mé tsík'etōan Jesucristo kixin tí nkexro tjuèhe Dios la mé kjaxin chrótjuèhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a. ² A ntá tí tjuèheni Dios la ko nchexiteyáni tí nkehe t'etōan ch'án, a ntá noheni kixin kjaxin tjuèheni tí sín tsík'óna xjeen Dios. ³ Tí tjuèheni Dios la t'ichjánxin kixin chrókuitekaonni tí nkehe k'uetōan ch'án, kixin ti nkehe t'etōan ch'án la jehya ijnko nkehe imá xra ⁴ kixin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Ìnchéni la mé tsjachaxínni la tsjachahya tí chjasintajni. ⁵ A ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'etuenhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxin tí ìnta la ko tí jni. La jehya kixin jehó tí ìnta kjuakoxin ch'án. Náhi. Kjaxin ìnta la ko ijni kjuakoxin ch'án. A ntá tí Nchakuen Dios mé chrónkaxín tíha, kixin tí Nchakuen Dios la chaxín ntoá. ⁷ Síin iní nkexro chrónkaxín nkaya nkajni: ijnko la It'éni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. ⁸ A ntá síin iní tí nkehe chrónkaxín ntihi chjasintajni, mé tí Nchakuen Dios, la ko tí ìnta la ko tí jni; a ntá tí iní mé jnkokón chrónka. ⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjetoan kixin táha la Dios tsíchrónkaxín kixin nkexrí tjen tí Xjeen ch'án. ¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchró sín kixin Dios la ch'ia ch'án kixin kuítekakonhya sin tí nkehe tsíntáchró Dios kixin nkexrí tjen Xjeen ch'án. ¹¹ Tí nkehe tsíchrónka Dios mé tíhi kixin tsjanjon ch'án kjuachón jnkochrín, a ntá tí kjuachón mé chóna tí Xjeen ch'án. ¹² A ntá tí nkexro chóna tí Xjeen Dios mé kjaxin chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kixin jahará ó títekáonrá tí Xjeen Dios, kixin mé tsonoxínrá kixin chaxín chontará kjuachón jnkochrín.

¹⁴ Tíhi mé chóxixínni Dios kixin noheni kixin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án. ¹⁵ A ntá tí xikaha ó noheni kixin Dios tjetinhin tí nkehe nixjeheni ch'án, a ntá kjaxin ó noheni kixin ó chóntani tí nkehe kjuancheheni ch'án.

¹⁶ A ntá jnkójínrá ts'ikonrá ijnko kichuára tjasin jie, a ntá tí jehya ijnko jie chrók'uenxín ch'án, la chrókjuancheherá Dios kixin chrókjuinchexraxinkaon ch'án kixin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kixin íchá jína chrókjuanchehyará Dios kixin chrókjuinkítsa tí ch'ín a. ¹⁷ Kaín nkehe jínahya la ijié tíha. Kjánchó síin jie ts'enixínhya chojni.

¹⁸ Ó noheni kixin tí nkexro tinkáchónki It'éni Dios tjasinhya sín jie, kixin tí Xjeen Dios tjinkítsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kixin Dios t'ayakonhen tí jeheni, a ntá tí Jínahya chóna kjuachaxin t'etuenhen kuenté chjasintajni.

²⁰ Ó noheni kjaxin kixin Xjeen Dios kui, la ko kjuínkítsa ch'án tí jeheni kixin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín. ²¹ Éxí xjanna t'íkuan tí jahará, la titohérá tí dios tsíkjanoya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjejá Dios tójnkotsé sín ntiha, la mé chaxín tjuahá sín: a ntá jehya janhván, la kjaxin kaín tí sín chóxin tí tan chaxín. ² Tjuahará tí jahará kixin tí tan chaxín ó chóna asénni, tíha mé ts'ejókoni jnkochrín. ³ It'éni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókuiikonóahará ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chàna k'uikuàn kixin isorá tjejorá titekáonrá tí nkehe chaxín, éxí tsík'etoan It'éni Dios. ⁵ A ntá jie jahará kichó ni, xrjanóahará kixin chrótjuèhérá kichuárá. Méxra xikaha tjékjian tí xroon i, la jehya ijnko nkehe nixin tsík'etoan Dios. Náhí. Tíha la mé tí nkehe tsík'áyéheni tí kjuák'e Ìnchéni Jesucristo. ⁶ A ntá tí tjuèheni kichó ni la mé tíhi kixin chrók'uejóni éxí tsík'etoan Dios; a ntá tí nkehe tsík'etoan Dios la mé ó tsíkinhínrá jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xikaha mé ixri xrich'ia la ko nínkakonhen Cristo. ⁸ Chrókóxakonhanrá kixin chrók'uitjáyanhya tí xra kjuich'erá kixin naxa chrók'uayéhérá tí nkehe tsjintaxín ts'ayéhérá.

⁹ A ntá tí siín ijnko nkexro kuitóhe tí nkehe kjuako Cristo ntá kjuichroe la mé chónahya sín Dios; a ntá tí nkexro títóehya tí nkehe kjuako Cristo mé chóna sín It'éni Dios la ko tí Xjeen ch'án. ¹⁰ A ntá jnkojín sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuitóhe tí sín a ntóará la ko ni chrónixjeéhyará sín jnkojína. ¹¹ A ntá tí nkexro tsonixjehe tsontáchro kixin: “¿Á jína k'uinka?” na mé éxí tóxrjínhin sín tí nkehe jínahya ich'e tí sín a.

Tí tan tsjixixín

¹² Chonta nchónhya nkehe chrókuinhínrá jahará, kjánchó tjínkakonhya chrókjian xroon ó. Náhí. Tjínkavan kixin tjoka chrókjuasántsahará tí jahará tsonixjahará kixin chrókjuintaxín chrókóchéheni.

¹³ Tí sín kichuárá tójnkotsé kuènte nínko ntihi, mé tí sin kjaxin tsíkjejá Dios, mé nixjahará sín. Amén. Ó tjen.

Tí níxin xroon tsíkjin ch'ín Juan

¹ Janhan mé tí nkexro t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuaha.

² Kíchóni, tjáncháha Dios kixin éxi jaha jína tjen tinkachónkia Inchéni la jína chrók'uaxrje kaín xra ch'e la ko jína chrókjuak'e jaha. ³ Imá kóchàna tió kui iso tí sín kíchó ni chrónka sín kixin jína tjákoxian tí tan chaxín. ⁴ Kohya ijnko nkehe antsí má nchechàna éxi tió kujnhan kixin tí sín t'íkuan éxi xjanna tjejóititekaon sín tí tan chaxín

⁵ Kíchóni, chaxín jína tjech'e xra tjínkítsa tí sín kíchó ni la ko antsí tjínkítsa tí sín tsíkjin ókjé chjasin. ⁶ A ntá tí tsíkójnksé tí sín kíchó ni la tsíchrónka sín kixin nkexrí tjuéhé tí jehe sín. Jaha chrókjuínkítsa tí nkehe t'ichjánxinhin sín tí sátsji sín. Xíkaha mé tóxrjínhin Dios. ⁷ Tió sákjuí sín kjuankíxin sín chrónka sín itén Inchéni la chrohya sín chrók'uáyéhe sín ninkehó nkehe kuènte tí sín chónhya Dios. ⁸ Méxra tí jeheni t'ichjánxin chrókjuinkítsani tí jehe sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótrfes

⁹ Janhan ikjian ijnko xroon k'uáyéhe tí sín tójnksé ntiha. Kjánchó ch'ín Diótrfes kuítekakonhya ch'án tí nkehe k'uetuenhenni ch'án kixin tjinkaon ch'án chrók'uetōan ch'án jehó ch'án. ¹⁰ Méxra xíkaha tí sátsjia ntiha tsonixjaha ch'án kixin tí kjuach'ia ntáchro ch'án t'ántaxínhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjōn kjuachaxin la t'etōan ch'án kixin tsjanjonhya sín kjuachaxin la ko t'etōan ch'án kixin tsochjinahya sín tí tójnksé tí chojni.

¹¹ Kíchóni chrókjuákoxinhya tí nkehe jínahya. Íchá jína chrókjuákoxian tí nkehe jína. Tí nkexro ich'e nkehe jína na mé kuènte Dios. A ntá tí nkexro ich'e nkehe jínahya la mé tsík'ikonhya sín Dios.

Jína tjákoxin tí ch'ín Demetrio

¹² Kaín sín ntáchro sín kixin jína tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixín nixja ch'án

¹³ Janhan chonta nchónhya nkehe tsontáxrjan, kjánchó tjínkakonhya tsokjian ó ¹⁴ kixin tjínkavan tjoka ts'íkuan tí jaha, a ntá tsjoni.

¹⁵ Kjuaxróxin chrókjuak'e jaha. Kaín nkexro choxian ntihi nixjaha sín. Tétuanhan nixjehé jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'ahā xra Jesucristo, la sana mé Jacobo la mé ikjian tí xroon í ts'áyéhe tí sín tsíkjeýá It'éni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín. ² Imá kuikonóahará ch'án ntá ts'ayéhérá kjuaxróxin kixin tjuahará ch'án.

Tí sín ntoáhya tjako (2 Pedro 2.1-17)

³ Kíchóni, imá tjínkavan tsokjian tí xroon ts'ayéhérá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayéhérá tsoxrjanóaxínrá kixin jína chrókiénxinrá nkehe chrókuáteherá kixin nkexrí tinkachónkirá Ìnchéni kixin tí fe la mé ónaá tsík'áyéhó tí sín tsíkjinchetjóá Dios. ⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuènte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etōan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sintaxráxinkáonrá inaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjáyan ch'án tí sín kuítekakonhya sín tí jehe ch'án.* ⁶ Kjaxin tí sín ángel kuítekakonhya sín tí k'uetōan Dios ntá kuítóhe sín tí kjuachaxin tsíkjanjon Dios tsík'áyéhe sín la ko kuítóhe sín tí k'uék'ejó sín jína, a ntá jie Dios k'uetōan ch'án kixin ts'ejóchjina sín tí sítié la ts'ejóchónhen sín tsijia tí yaon tsitōexín ijjé sín. ⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokónntoa sín. Tíha mé chrórxaxinkakonxín kaín chojni kixin nkexrí tsonhen tí sín titekakonhya tsjasótexín sín tí xrohi jnkochrín ts'ankahya.

⁸ Méxra kjaxin tí chojni a kotáchrién sín tsík'ikonxín kixin ó nchōxon chrókjuasinko sín jie chojni chjin ókjé la ko chrókuítekakonhya sín tí kjuachaxién Ìnchéni la ko chrók'uántaxínhin sín tí sín ángel chóna kjuachaxin t'etōan. ⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuènte ch'ín Moisés.† A ntá jehe ch'án kjónté xikaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.” ¹⁰ A ntá tí chojni i t'ántaxínhin sín tí nkehe tienxínhya sín la tjenkayáxin sín éxi ko tienxínhya nchexiteyéhe tí nkehe ntáchro asén, mé xikaha tí nkehe jínahya kjuích'e sín ts'itjáyanxín.

¹¹ ¡Nòà tí jehe sín! Chréhe sín éxi kjuích'e ch'ín Caín.‡ Tjinkaon sín chrókjuacha sín chichaon ntá ntoáhya kjuích'e sín éxi kjuích'e Balaam, la ko its'en sín éxi ik'uén ch'ín Coré kixin kuítekakonhya sín.§* ¹² Ijnko kjuatósuèhe kixin tjejóyákjanxín sín tí síin kia náxrjón chontará, kixin tjejóne sín la ko tjejóti sín chéhe sín la kjónté xikaha la ninkehó kjuasáya chóntahya sín. Tjejó sín éxi tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxi tjuí chóntahya ntá tjakáko xrjntō; la ko éxi ijnko nta t'ónahya to tí nitjó chrók'óna to, éxi yáya tsík'en tsík'axrjenkixin nuèé. ¹³ Jehe sín na mé éxi ntayaon jiehe síxrjōi lóxrjō ó chóntahya ntá jína mé xikaha chónkó tí nkehe

* 1:5 Éxodo 12.51 Números 14.29-30 † 1:9 Deuteronomio 34.6 ‡ 1:11 Génesis 4.3-8 § 1:11 Números 31.16 * 1:11 Números 16.1-3

ch'e sín mé ijnko kjuatósuèhë tíha; la ko éxí konotsé kjuíchroe sákjuí ókjé; a ntá tjechónhen sátsji sín tsjasóte sín sítié jnkochrín.

¹⁴ A ntá kjuák'e ch'ín Adán, a ntá yatoxin chr'éxin kui ch'ín Enoc nixjixin kjuachaxiën Dios ntáchro ch'án kixin k'uíkon ch'án itjen Ìnchéni kuikao nchónhya mil tí sín ángel kuènte ch'án, ¹⁵ kixin sinchekitoexín ch'án ijíé kaín tí sín jínahya kixin kaín tí jínahya kjuích'e sín la ko kaín nkehe k'uénixja tí sín jínahya k'uántaxínhin sín tí jehe ch'án. ¹⁶ Xráxín tóxrjienhya sín nkehe sítónhen la ko ixri sín tjonta kíchó sín. Jehó xritjeyá sín tí nkehe tóxrjínhin sín tjenkayáxin sín. Ihnke sín nixja sín la ko itjo sín jína chojni kixin ntá tí sín a chrókjuinkitsa jehe sín.

Nchexraxinkaon ch'án tí sín tinkáchónki Cristo

¹⁷ A ntá jahará kíchó ni, xráxinkáonrá kixin tí sín tsíkjeyá Ìnchéni Jesucristo ¹⁸ ntáchro sín kixin tí yaon tsjixixín tsjejexin chjasintajni ts'ixin chojni tsitekakonhya sín ts'ántaxínhin sín tí nkehe tjinkaon Dios la ko tsotjinkaon sín sinchexiteyéhë sín tí nkehe jínahya ntáchro asén sín ó. ¹⁹ Tí sín a mé tjinkaon ts'óxika tí sín jnkokoá tjejótojnkotsé kixin naxa tóxrjínhin sín sich'e sín nkehe síin chjasintajni kixin chóntahya sín Nchakuen Dios.

²⁰ A ntá jahará kíchó ni tjuahará, antsí jína chrók'uejorá tinkachónkirá Ìnchéni. Chrónixjexínrá Dios tí kjuachaxin kuènte Nchakuen ch'án. ²¹ Jína chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsotjáhará ch'án kjuachón jnkochrín.

²² Chrókuikonóehérá tí sín naxa tienxínhya. ²³ Jnkojín sín chrókjuinchekaará chrókuakitsjekjanxínrá sín chríkjan xrohi, la ko chrókuikonóehérá í so sín kjánchó chróchontará cuidado tí jehe sín kixin kjónté ti iké sín kjaxin chóna jie.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jie la ko tió tsjjini tí tjen ch'án la ninkehó jie chróchóntahyani, imá tsöchéheni tí tjen ch'án ntiha. Kjuasáyé Dios imá chóna ch'án kjuachaxin t'etóan ch'án la ko kjuínchekaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

1 18

Kaín tí nkehe i mé chénka Dios Jesucristo kixin jehe ch'án tsochénka tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuènte ch'án kixin nkexrí chrókónohe tí ch'ín Juan ch'ehe ch'án xra. ² A ntá jehe ch'án mé k'uítuenhen ch'án ntá chrónkaxín tí nkehe chaxín tsíntáchro Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxin Dios.

³ Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án inaá la ko kjaxin tí yato Nchakuen ch'án tjejó tí trono t'etoanxín ch'án mé tjanjon kjuaxróxin.

⁵ La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankíxixín xechón kjónté tsík'en kixin tjetoan ch'án kixin t'etuenhen ch'án kjónté kaín tí sín rey la ko tí sín t'etoan siín chjasintajni. Jehe ch'án mé tjuèheni ch'án la ko tí ijnié ch'án mé k'uíjmáxinni kaín tí jie chóntani.

⁶ Jehe ch'án mé tsíkjanjon kjuachaxin tsík'ónani nchát'á kixin sich'ehe ni xra It'éni Dios. Tí kjuachaxin kuènte ch'án me ts'etoan jnkochríxín. Mé xikaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuj. Kaín chojni ts'ikon ch'án la ko kjaxin tí sín k'uékóninkakonhen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin siín chjasintajni tsotsjánka sín tió ts'ikon sín tí jehe ch'án. Mé xikaha tsonhen. Amén.

⁸ Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé xikaha ichro Ìnchéni Dios, tí nkexro imá t'etoan. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án inaá.

Ch'ín Juan tsík'ikon ch'án kixin Cristo chónka kjuachaxin

⁹ Janhan Juan mé ijnko kichó tí jahará mé tjékian Jesús la ko tí kjuachaxin kuènte Dios chonta la mé jahará la ko jeheni jnkokón tjejótjasóteni la jehe ch'án tjinkitsani kixin tsjachani. Kjuakua itén Dios éxí chrónka Jesucristo la mé tíha kjuak'échjinaxián tí isla it'in Patmos. ¹⁰ A ntá ijnko yaon xraxinkakonxínni Ìnchéni la ikui kjuachaxin Nchakuen Dios tí tjén tí janhan la kujnhan kixin nóton tí janhan ijnko nkexro nixja imá itsen éxí itén ijnko trompeta. ¹¹ Mé ntáchro ch'án kixin:

—Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé tsokjian jaha ijnko xroon kaín tí nkehe k'uíkuan kixin tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjía tsjahá kixin nkexro itén tí tjenixjana ntá xrínahya k'uíkuan yato candelero tsík'óna chica oro. ¹³ A ntá chríkjan tí yato candelero k'uíkuan ijnko nkexro éxí yóhe Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsíkóyóhe toté ch'án la ko mé chónka ijnko cinta jehó oro

tjenkáni ntakuin ch'án. ¹⁴ Tí kaxihí ch'án la tjóá éxí kaxree kolélo tjóá o éxí chrinta tsjehe la ko tí ikon ch'án la éxí xrohi nene tsjehe. ¹⁵ Ntá tí toté ch'án la éxí chica sine tjákiní na ntá tsík'axrjexín tja. A ntá tí itén ch'án la itsen éxí tóvéntó nchónhya ntarío. ¹⁶ A ntá tí tja ch'án chjina mé chóna yato konotsé. A ntá tí ir'va ch'án k'uaxrjexín chica espada iyo, yánjín taté. A ntá imá tjákiní tsjehe ikon ch'án la éxí yaon t'inkaséyanxín imá.

¹⁷ A ntá tí k'uíkuan xikaha la kjuáchr'ítsinka toté ch'án éxí tsík'énna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kixin:

—Chrakonhya jaha. Janhan mé tí xrankíxixín la ko tí tsjixixín. ¹⁸ Janhan tí nkexro tjechón. Ik'uén, a ntá ijie la tjéchuon inaá la itjén jnkochr'ixín. Amén. Janhan chonta llave kuènte chojni its'en la ko kuènte tí siín tí sín tsík'en. ¹⁹ Méxra ikjian jaha tí nkehe k'uíkuan mé tí nkehe siín ijie la ko tí nkehe tsonhen chr'éxin. ²⁰ Ninkexró k'uékiénxínhya nkexrí t'axrjexín tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kixin tí yato ángel t'ayakonhen tí yato ninko la ko tí yato candelero k'uíkuan me kjaxin t'axrjexín tí yato ninko.

2

Tí tan k'uáyéhe tí yato ninko: Tí tan k'uáyéhe tí sín chjasin Éfeso

¹ Tsokjian tí nkehe ts'áyéhe tí ángel t'ayakonhen tí ninko Éfeso: “Xikaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xikihi: ² Janhan nòna kaín tí xra ch'erá la ko nòna kixin tóxrjíanhyará tí sín jínahya. Janhan la ó nòna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín. ³ Nchónhya kjuasótiará la kjónté chonhénra kóninkákonhyará la imá kjuich'erá xra kixin tinkachónkirá nina la ko nunca kóxrjéhyará. ⁴ Kjánchó tjánchía ijnko jie tí jahará kixin tinkachónkihyará éxí kjuankíxixínra k'uétjuanará. ⁵ Méxra chróxráxinkáonra kixin ó kujtohéra tí k'uétjuanará la ntá chrókjuinkirá tí nkehe tjenkayáxinra la ko chrókjuich'erá xra éxí tí kjuankíxixínra. A ntá tí náhi, la tjoka tsjasán la tsjakíyan tí candelero tí tjejorá tí nunca tsjínkíhyará tí nkehe jínahya tjenkayáxinra la tí tsokjanhyará tsoxráxinkáonra Dios. ⁶ Kjánchó chrókónohará kixin tóxrjina tí nkehe tjejoch'erá kixin tóxrjíanhyará tí xra ch'e tí sín nicolaítas kixin kjaxin janhan nínkakonhan tí nkehe ch'e sín. ⁷ Tí nkexro tjínkaon chrókuinhin la chrókuinhin sín tí nkehe nixjehe Nchakuen Dios tí ninko ntáchro kixin: Tí sín tsjacha sinchexiteyàna sín la tsotjaha sín kjuachaxin sine sín tí to t'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasin Esmirna

⁸ Ikjian tí nkehe ts'áyéhe tí ángel t'ayakonhen tí ninko Esmirna: “Xikaha ichro tí nkexro xrankíxixín la tsjixixín, mé tí nkexro ik'uén la ntá jie tjechón: ⁹ Janhan la ó nòna kaín nkehe tjejoch'erá. Ó nòna kixin nkexrí tjejótjasótiará la ko ó nòna kixin nòará kjánchó jehya. Náhi. Jehe sín mé tójnksé sín tí ninkoé tí Jínahya. ¹⁰ Kjánchó chrakonhyará kjónté tsjasótiará. Tí ch'ín Tsochren tsochr'ánxanhanra ntöechiso jnkójín tí jahará kixin tsotsjexín nkexrí tí jahará ntá t'ichjánxin tsjasótiará iso yaon. Kjánchó chrókujtoéhyará Dios kjónté chrók'uenra ntá janhan tsotjáhará tí kjuachón chr'éxin. ¹¹ Tí nkexro tjínkaon chrókuinhin la chrókuinhin tí nkehe nixjehe Nchakuen Dios tí ninko: Tí nkexro tsjacha sinchexiteyàna sín la í tsjasótehya, la tí yóxin its'en chojni la í ts'enhya tí jehe sín.”

Tí tan k'uáyéhe tí sín chjasin Pérgamo

¹² 'Tsokjian tí nkehe ts'áyéhe tí ángel t'ayakonhen tí nínko Pérgamo: “Mé xíkaha ichro tí nkexro chóna chica espada yánjín taté: ¹³ Janhan ó nòna kaín nkehe tjejoch'erá la ko ó nòna nketí tjejorá kíxin tí tjejorá la t'etoan ch'ín Satanás la kjónté la jína kuinkachónkirá tí janhan. Jahará kuítóéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyàna jína. Jehe sín tsík'óyánxin sín ch'án tí tjejorá ntiha kíxin ntaha t'etoan ch'ín Satanás. ¹⁴ Kjánchó janhan tjánchíá ijnko jie tí jahará kíxin iso nkehe ntoáhya ch'erá. Siín ntiha chjasin Pérgamo tí tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuenhen ch'án tí ch'ín Balac kíxin tí sín israelita chrókjuasin sín jie chrókjóne sín tí nkehe tsíkjokehe sín tí nkehe tsíkjanoya la ko chróchóna sín chojni chjin ókjé chrókjuasinko sín jie. ¹⁵ Kjaxin xíkaha tí tjejorá la siín iso sín tjinkakonhya sín tsítóhe sín tí nkehe tjako tí sín nicolaítas. Janhan mé tjínkakonhya tí sín a. ¹⁶ Méxra chrókjanrá chrókuinkachónkirá Dios. A ntá tí náhí, la tjoka tsjasán tí tjejorá la tsjánjonkianxian sín tí espada t'axrjexín ir'va. ¹⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntáchro kíxin: Tí nkexro tsjacha sinchexiteyàna sín la tsotjahá sín kjuachaxin chrókjóne sín maná tjechónhen la ko tsotjahá sín ijnko xro tjóá la tí xro la ts'ínixín ihnié sín nixin chónhya ninkexró. Jehó tí nkexro ts'áyéhe mé tsonohe.”

Tí tan k'uáyéhe tí sín chjasin Tiatira

¹⁸ 'Tsokjian tí nkehe ts'áyéhe tí ángel t'ayakonhen tí nínko chjasin Tiatira: “Mé xíkaha chro tí Xjeen Dios, tí nkexro ikon éxí yóhe xrohi nene sít'axrjexín la ko toté éxí chica sine tjákini tsjehe. ¹⁹ Janhan ó nòna kaín tí nkehe tjejoch'erá la ko ó nòna kíxin tjuanará la ko tinkachónkirá tí janhan la ko ó nòna tí xra tjejoch'erá la ko ó nòna kíxin tjejochónhénrá tóninkákonhyará. La ko ó nòna kíxin antsí tjejoch'erá xra ijie ntá tí kjuankíxixínrá la kénhyó. ²⁰ Kjánchó tjánchíá ijnko jie tí jahará kíxin tjánjonrá kjuachaxin tjako tí tjan Jezabel. Kjaxin ntáchro tjan kíxin nixja tjan itén Dios kjánchó ch'ieyehe tjan tí sín ch'ena xra kíxin kjaxin sín chrókjuasinko sín jie chojni chjin ókjé la ko chrókjóne sín tí nkehe tsík'óyán sín tsíkjokehe sín tí nkehe tsíkjanoya. ²¹ A ntá janhan ó kuítóhā tjan intsí kíxin chrókjuinkí tjan tí tjenkayáxin tjan kjánchó tjinkakonhya tjan sich'e tjan xíkaha la tjinkakonhya tjan chrókuítóhe tjan tí jie tjasinko tjan chojni ntoa. ²² A ntá jie tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítóehya sín tí nkehe tjinkaon tjan sich'e tjan. ²³ A ntá janhan ts'oyán tí xjeen tí jehe tjan. Ntá kaín tí nínko tsonoexín sín kíxin janhan choxian nkehe tónhen asén kaín chojni. A ntá jnkojnko tí jahará la tsjénkahará nkexrí tí xra kjuich'erá. ²⁴ A ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuente ch'ín Tsochren la xíkahó la í tsétuanhyará í jnko xra. ²⁵ A ntá jahará la tí nkehe ó chontará la t'ayakonhénrá hasta tsokjan janhan. ²⁶ A ntá tí sín tsjacha sinchexiteyàna sín la ko xíkaha sich'e sín hasta tsjixixín kíxin janhan tjínkavan xíkaha chrókjuich'e sín na mé janhan tsjánjuan kjuachaxin ts'etuenhen sín kaín nación. ²⁷ Na mé xíkaha T'aná mé chjina kjuachaxin tsétoan la kjaxin xíkaha jehe sín mé ts'etuenhen sín tí nación yóhe chróchóna sín ijnko chica vara kíxin chróchjéhe sín tí chj chrók'ókuen tí chj tsík'óna nchetje. ²⁸ Me kjaxin tsotjahá sín tí konotsé tí tji nchítjen. ²⁹ A ntá tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

3

Tí tan k'uáyéhe tí sín chjasin Sardis

¹ 'Tsokjian tí nkehe ts'áyéhe tí ángel t'ayakonhen tí nínko chjasin Sardis: “Xíkaha ichro tí nkexro chóna yato Nchakuen kuènte Dios la ko chóna tí yato konotsé: Janhan nòna kaín nkehe ch'erá, ó nòna kixin éxí tsík'en tí xra ch'erá kjónté nchehnerá kixin tjejochónrá. ² T'àyará. Naxa t'ayakonhénrá kjónté í tsjéhya tí nkehe kuítóhe kixin kjaxin tíha mero its'en. Ó k'uíquán kixin tí xra ch'erá la t'íkon tí Dios kuèntana kixin ntoáhya. ³ Chróxráxinkáonrá tí nkehe tsíxrakohará la ko tíha chrókjuich'erá la chrókjanrá chróxráxinkáonrá Dios. A ntá tí naxa tjejochrinrá la titàya tsjasán éxí ijnko síchee la tsonohyará nkesá tíha. ⁴ Kjánchó naxa síin iso chojni ntaha chjasin Sardis naxa kjuínchekjitaHYA sín iké sín la jehe sín la ts'ájkian sín kixin chóna sín ka tjóá kixin jehe sín la jina sín. ⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxíkaha ihnié sín chóna tí libro ts'ínixin ihnié tí sín tsaá la ko tsochoxian sín nkayakon T'aná la ko nkayakon tí sín ángel kuènte ch'án. ⁶ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

Tí tan k'uáyéhe tí sín chjasin Filadelfia

⁷ 'Tsokjian tí nkehe ts'áyéhe tí ángel t'ayakonhen tí nínko chjasin Filadelfia: “Xíkaha ichro tí nkexro tjóá la ko chaxín mé tí nkexro chóna llave kuènte ch'ín rey David. A ntá tí tsakitjehe ch'án puerta la ninkexró tsjachahya ts'ikjéhe, a ntá tí ts'ikjéhe ch'án puerta la ninkexró tsjachahya tsakitjehe. ⁸ Janhan ó nòna kaín nkehe tjejoch'erá. Kjuaké tí tjejorá ijnko puerta xitjehe la ninkexró xitjahya ts'ikjéhe. Kjónté intsíkoá kjuachaxin chontará la jahará kjuínchexiteyará tí nkehe kjuákua la ko kjuínchemáhyará tí janhan. ⁹ Tí sín tsíkitekaoon Satanás la ntáchro sín kixin judío sín kjánchó jehya sín, xrich'ia sín la chr'éxin tsétuáñhan sín ts'ejóxin tochl'in sín chrínkí totará la ntá tsonohé sín kixin chaxín janhan tjuahará. ¹⁰ Ó kuítékáonrá tí nkehe kuétuáñhanrá la jina tjejorá la mé xíkaha janhan ts'ayakonhanrá tí ichrén nkehe tsonhanrá tíó tsi tí nkehe tsonhen kuenté chjasintajni kixin ó jehí xíkaha tsonhen kaín chojni tjejó chjasintajni. ¹¹ Janhan mé tjoka ts'inka. Méxra t'ayakonhénrá tí nkehe chontará kixin ninkexró chrókuakitsjahará tí nkehe ó kjuachará. ¹² Tí nkexro tsjacha sinchexiteyána la ts'óna sín columna kuènte nínko kuènte Dios kuèntana la nunca xitjahya sátsjixin sín ntiha. La janhan tsokjian ihnié tí Dios kuèntana tsjiko sín la ko tsokjian ihnié chjasén Dios kuèntana mé tí Jerusalén nixin tsixin nkajni tí tjen Dios kuèntana. Kjaxin tsokjian nina nixin tsochóna sín. ¹³ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

Tí tan k'uáyéhe tí sín chjasin Laodicea

¹⁴ 'Tsokjian tí nkehe ts'áyéhe tí ángel t'ayakonhen tí nínko chjasin Laodicea: “Xíkaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuích'énoxín Dios kaín nkehe. ¹⁵ Ó nòna kaín nkehe tjejoch'erá. Ó nòna kixin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará. ¹⁶ A ntá jahará la yásorá la jehya ik-inrá la jehya sóará. A ntá ijie ir'va ó tsíkia tí jahará la ts'itjia. ¹⁷ Ntáchrórá kixin jahará rícorá la imá jina tjejorá la ko ninkehó t'itjáyanhya tí tjejorá, ichrorá. Kjánchó chontahyará kjuachéhe la ko jehya jina tjejorá la ko nòará la ko ntakótánrá la ko tjóchínrá. ¹⁸ Méxra ijie ntaxraxinkáonrá janhan sintakjihará tí nkehe oro náxrjón ts'ík'axrjexín tja kixin ntá chaxín ts'ónará rico. La ko janhan sintakjihará ika tjóá kixin ts'ínkayará ntá tsjìinhanrá kjuatósuèhe kixin

í tjóchínhyará. La ko janhan tsjánjuan xroan kolirio tsjiankí ikonrá kixin ts'ikonrá. ¹⁹ Janhan mé tsjéntuáha kaín tí sín tjuaha. Méxra íchá jína chrókjan sín chrókuinkáchónki sín Dios. ²⁰ Tsjehérá janhan itjén ntója puerta, tjet'eya. A ntá jnkójín nkexro chrókuinhin tí tanná ntá chrókuakitjehe tí puerta ntá chrók'uixanhan ntøe sín la chrókjónekian sín la ko jehe sín la ko janhan. ²¹ A ntá tí sín chrókjuacha chrókjuinchexiteyàna la tsjánjuan kjuachaxin ts'ejókian sín tí tétøanxian ntiha la éxi xikaha janhan kjuacha ntá T'aná kjuanjon kjuachaxin tjékian ch'án tí tjen ch'án t'etøan ch'án ntiha. ²² Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí ninko.”

4

Tí sín tjikosáyehe Dios nkaya nkajní

¹ Ntá chr'éxin janhan k'uikuauan ijnko puerta tjexrankehe nkaya nkajní. Ntá kuinhan ijnko itén nkexro éxi trompeta mé tí nkexro nixjana tí xrankixín, ntá jehe ch'án nixjana ch'án, ntáchro ch'án kixin:

—T'it'ótjen ntihi ntá tsjakoaha kaín nkehe tsonhen chr'éxin.

² Ntá tuénxín ikui tí kjuachaxin kuènte Nchakuen Dios k'uayáha ntá k'uikuauan tí trono itjen nkaya nkajní ntá ntiha tjetjaxin ijnko nkexro. ³ A ntá tí ch'ín tjetjaxin tí trono mé tjákiní tsjehe éxi ixro jaspe o ixro cornalina. A ntá jnkontatjen tí trono itjen ijnko konchecha tjákiní tsjehe éxi ijnko xro esmeralda. ⁴ A ntá kjaxin jnkontatjen tí trono k'uikuauan í so veinticuatro trono kjaxin tjejótxaxin veinticuatro sín táda, iké sín la tjóá la ko tjejóya kja sín corona tsík'óna chica oro. ⁵ A ntá tí trono kuènte Dios la ntiha sít'axrjexín tí sítjónkixín la ko sítjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios. ⁶ A ntá nkayakon tí trono la kjaxin itjen ijnko ntayaon éxi xroxrjo tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton. ⁷ A ntá tí nkexro tjechón k'uikuauan saxín mé éxi koxra tsjehe. A ntá tí nkexro yóxin tóyóhe éxi koxinta, a ntá tí nkexro níxin tsjehe éxi chojni. A ntá tí noóxin la éxi kotjuanhnko xritjaká tsjehe. ⁸ A ntá jnkoinko tí noó nkexro tjejóchón chóna injon kanenee sín la chóna nchónhya ikon nóton la ko nkaxenhen, la nchakotjin la ko tie títøehya sín ntáchro sín kixin:

Santo, santo, santo,

Ínchéni Dios, jaha chonta kaín kjuachaxin,
jaha xráxín tjen la ko itjen ijie la ko jaha ts'inka ínaá.

⁹ A ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehe sín ch'án chjehe sín kjuasáyé tí nkexro tjetjaxin tí trono mé tí nkexro tjechón jnkochrín. ¹⁰ La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehe sín tí jehe ch'án kixin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kixin:

¹¹ Ínchéni Dios kuènteni, jaha la imá jína la t'ayéhé kjuasáya kixin tjikosáyahani tí jaha kixin tí kjuachaxin chonta;

kixin jaha kjuich'éna kaín nkehe siín kixin jaha kóxrjínhan xikaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uikuauan ijnko libro mé tsíkjin sín nkaxenhen la ko nóton la ko mé tsíkjèxin yato sello. ² La k'uikuauan ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jína chrókjuacha chrókuakitjehē tí libro la ko chrókóchrítōn tí sello chón̄ta?

³ La ninkexró ní nkajní o ní chjasintajni o ní chrínkí nonte tsjachahya tsakitjehē tí libro la ní komáhya sín. ⁴ A ntá janhan la imá tsjanka kixin naxa tónoxínhya ninkexró chrókjuacha chrókuakitjehē tí libro o chrókjuinchekuáxin tí libro o chrókomá nkehe tí ntáchro tí libro. ⁵ Ntá ijnko tí sín táda ntá nixjana ntáchro kixin:

—Tsjankahya, tsjehé ntihi tí Koxra k'uaxrjeníxin Judá la ko tsík'axrjeníxin rey David. Mé kjuacha la ó tsjacha tsakitjehē tí libro la ko tsóchrítōn tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uíkuan tjejin toté ijnko Kolélo tsjehe éxí tsík'óyán sín mé chón̄ta yato ntéé la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni. ⁷ A ntá tí Kolélo a kuákja tí libro itjen tja chjina tí nkexro tjetjaxin tí trono. ⁸ A ntá tió k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uejóxin toch'in sín nkayakon tí Kolélo. A ntá kaín tí jehe sín chón̄ta sín ison arpa la ko xraá sín ihnti tsík'óna chica oro tsíkaón chjincō. Tíha mé oración nixjehē Dios kaín tí sín tsíkjinchetjóá ch'án. ⁹ Itsje sín nkehe nixin ntáchro kixin:

Jaha mé ijnko nkexro jína kjuacha kuákja tí libro la ko kóchrítuan tí sello; kixin tsík'óyán sín tí jaha la ko tí ijniá k'ueñaxian tí jeheni ts'áyéhe Dios, mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsíkjich'énani reyes la ko nchāt'á sich'ehe ni xra Dios kuènteni, la ko jaha tsíkjánjuan kjuachaxin ts'etōanni chjasintajni. Mé xikaha ichro sín.

¹¹ Ntá tuénxín k'uíkuan la ko kuñhan itén nchónhya sín ángel tjejó sín jnkontajen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín. ¹² Itsen nixja sín ntáchro sín kixin: Tí Kolélo tsík'óyán sín, tíha mé kjuacha k'uáyéhe kjuachaxin ts'etōan la ko k'uáyéhe tí nkehe tje te kuente Dios, la ko tí kjuaxrexinkaon jína la ko kjuachaxin sich'e xra la ko mé xikaha tjikosáyeheni ch'án.

¹³ Kjaxin kuñhan kixin kaín nkehe kjuích'éna Dios siín nkajní la ko chjasintajni la ko tí nkehe siín chrínkí nonte la ko kaín nkehe siín ntayaon la kaín tíha mé ntáchro kixin: Chjéheni kjuasáya tí nkexro tjetjaxin tí trono la ko tí Kolélo kixin chón̄ta kjuachaxin jnkochrín.

¹⁴ A ntá tí noó sín tjejóchón ntáchro sín kixin:

—Xikaha tsonhen. Amén.

La ko tí veinticuatro tí sín táda k'uejóxin toch'in sín la chjéhe sín kjuasáyé tí nkexro tjechón jnkochrín.

6

Tí yato sello

¹ A ntá k'uíkuan kixin tí Kolélo kóchrítōn tí xránkixín tí yato sello ntá kuñhan ijnko tí noó tí noó tí sín tjejóchón nixja ch'án éxí kjón̄ta, la ntáchro ch'án kixin:

—Xrákiá tsjehé.

² Ntá k'uíkuañ ijnko kokate tjóá. A ntá tí nkexro tjekjen tí kokate chóna ch'án ijnko arco tí tja ch'án la tsík'áyéhe ch'án ijnko corona. Jehe ch'án mé kjuacha ch'án la naxa xikjacha ch'án ínaá.

³ A ntá tí Kolélo kóchrítõn tí yóxin sello ntá kuñhan tí nkexro yóxin tjechón ntáchro kixin: —Xrákiá tsjehé.

⁴ Ntá sákjuí í jnko kokate kjátse. A ntá tí ch'ín tjekjen k'uáyéhe ch'án kjuachaxin tsjakjìn tí kjuaxróxin síin chjasintajni kixin ntá chojni mé ts'óyán kichó sín kixin jehe ch'án mé tsík'áyéhe ch'án ijnko espada ijíé.

⁵ A ntá tí Kolélo kóchrítõn tí níxin sello la ntá kuñhan nixja tí níxin nkexro tjechón ntáchro kixin:

—Xrákiá tsjehé.

Ntá k'uíkuañ ijnko kokate tié. A ntá tí nkexro tjekjen tí kokate chóna itja ch'án ijnko báscula. ⁶ La ntá kuñhan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókjuñchek'itjáyanhya tí aceite la ko tí vino. (Tíha mé t'axrjexín tsokjinta.)

⁷ A ntá tí Kolélo kóchrítõn tí noóxin sello ntá kuñhan tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uíkuañ ijnko kokate sine. A ntá tí ch'ín tjekjen va a mé it'in ch'án Muerte. A ntá nóton tí jehe ch'án la ikui nkehe tóyóhe tí tjejó tí sín tsík'en. Jehe ch'án k'uáyéhe kjuachaxin ts'etõan ch'án noóxin parte chjasintajni kixin ntá ts'óyán kichó sín la tsokjinta la ko ts'enxín sín ichin la ko kaín ko jjehe síin chjasintajni mé tsjaya va.

⁹ A ntá tí Kolélo kóchrítõn tí n'óxin sello ntá k'uíkuañ chrínkí tí altar tí asén tí sín tsík'enxín tí tan kuente Dios tsíchrónka sín. ¹⁰ Ntáchro sín itsen kixin:

—Jaha mé Ìnchéni tjóá jina la jaha mé sinchexiteyá tí nkehe tsintáchrúa, ¿la nkesá sinchekitoexián ijíé tí sín síin chjasintajni tsík'óyán tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uituenhen sín naxa ts'ok'éhe sín í so yaon tsoxetajia tí número tí kichó sín ch'ehe xra Cristo naxa ts'enxín sín éxí k'uén tí jehe sín.

¹² A ntá tí Kolélo kóchrítõn tí injonxin sello ntá xríñahya imá kuínkí nonte. A ntá tí yaon la kótié éxí ika tjiko chojni tsík'en. A ntá nitjó k'óna kjátse éxí jni. ¹³ A ntá konotsé sít'ánótjenxin nkajní sítjitsínka nonte éxí yóhe tí inta t'óna to higo la síxènjín tí to yoa tió tsjixraya tí nta kixin tí imá fuerte chjehe xríntõ. ¹⁴ A ntá nkajní k'uitjáyan éxí ijnko xroon tsíxrèya. Ntá kaín jna la ko tí nonte ntsíntsí síin jnkosiné ntayaon sákjuí ókjé. ¹⁵ A ntá kaín tí sín reyes síin chjasintajni la kjaxin tí sín t'etõan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uixenhen sín tjo síin nteje ts'ejómáxin sín. ¹⁶ Ntáche sín tí jna la ko tí tjo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etõan tjetjaxin trono la ko chrókjuasótehyani tí kjuachrakon jíé tsjanjon tí Kolélo.

¹⁷ Kixin ó kui tí yaon imá jíé kuente kjuachrakon la, ¿xá nkexro chrókjuacha chrók'uejó ntiha?

7

Tí sín israelita chóna sello

¹ A ntá chr'éxin k'uíkuañ noó sín ángel tjejóxin toté sín la jnkojnko sín tjejó sín tí chrínta chjasintajni chónthehe sín tí noó xríntõ kixin tsochjéhya xríntõ chjini

chrítaón chjasintajni la ko ní chrítaón ntayaon la ko nijnko tí nta yoa. ² Kjaxin k'uíkuan í jnko ángel kjuixin nó tjitoxin yaon la chóna sello kuènte Dios tjechón. Ntá tí ángel mé k'uíyehē ch'án itsen tí noó ángel tsík'áyehē kjuachaxin sincheníhi nonte la ko ntayaon. ³ Ntáchro ch'án kixin:

—Náhí, sincheníehya nonte la ko ntayaon la ko kjaxin tí nta la náhi tí naxa tsíkahya sello totjen tí sín ch'ehe xra Dios kuènteni.

⁴ Kuinhan tí número tí sín tsíka sello la me ciento cuarenta y cuatro mil kain tí sín tsík'axrjeníxin tí sín israelita. ⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad ⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés ⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Leví la ko teyó mil tí sín tsíka sello tsík'axrjeníxin Isacar ⁸ la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrjeníxin José la ko teyó mil tí sín tsíka sello tsík'axrjeníxin sín Benjamín.

Sín nchónhya chojni chóna ka tjóá

⁹ Ntá kjuixin tíha ntá k'uíkuan nchónhya chojni kaín xín nación la ko kaín xín nkexrí tsjehe sín la ko kaín xín nkiva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín.

¹⁰ Kaín sín itsen nixja sín ntáchro sín kixin:

Dios kuènteni mé kjuínchekaáni.

Jehe ch'án mé tjetjaxin tí trono tí tjen tí Kolélo kjuínchekaáni.

¹¹ Kaín tí sín ángel tjejóxin toté sín jnkontatjen tí trono la ko jnkontatjen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios.

¹² Ntáchro sín kixin:

Amén. Kjuíncheyaonni Dios la tsochjéheni Dios kjuasáya kixin kaín tí kjuaxrexinkaon jina tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kixin tjinkitsani ch'án jnkochrín.

Amén.

¹³ A ntá ijnko tí sín táda kjuanchankina, ntáchro kixin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsíkjixin sín?

¹⁴ Ntá janhan ntáxrjan kixin:

—Inchéni, jaha ó noha. Ntá jehe ch'án ntáchro ch'án kixin:

—Tí sín i tsíkjixin sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótjuáxin ijnié tí Kolélo. ¹⁵ Méxra xikaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen nínko kuènte ch'án. A ntá tí nkexro tjetjaxin chrítaón tí trono mé t'ayakonhen ch'án sín. ¹⁶ A ntá tí sín a mé ts'enxinhya sín kjinta la ko ts'enxinhya sín ìnta la ko tsochjánxinhya sín yaon la ko ni sóa kohya nkehe sich'ehe sín. ¹⁷ Kixin tí Kolélo tjen jnkosiné tí trono mé t'ayakonhen ch'án tí jehe sín éxí iko kuènte ch'án la ko sátjiko ch'án tí tjiá ntá tjanjon kjuachón la Dios mé sinchexámá kaín tí ntakon tí jehe sín.

8

Tí yatoxin sello la ko tí ihnti oro

¹ A ntá tí Kolélo kóchrítōn tí yatoxin sello kuènte tí libro la ntá kohya ninkehó ruido nkajni chjina it'o hora. ² Ntá tuénxín k'uíkuan yato ángel tjejóxin toté nkayakon Dios la jnkoinko sín k'uáyehē sín jnkoinko trompeta. ³ Ntá chr'éxin

ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjinc̄o tsjak'e ch'án kixin sátsjiko tí oración kuènte kaín tí sín tsíkjinchetjóá Dios kixin tsjak'e chrítaón tí altar oro nkayakon tí trono. ⁴ A ntá tí ihnchi kuènte chjinc̄o chrínxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios. ⁵ A ntá tí ch'ín ángel kuákja ch'án tí ihnti kjuínchekaón ch'án xrinta kuènte xrohi kuènte tí altar la ik'ue ch'án chjasintajni. La ntá kjóna la ko nchónhya ruido la ko sítjónkixin la ko kuínkí nonte.

Tí trompeta

⁶ A ntá tí yato ángel mé chóna sín jnkojnko trompeta ó yaxínhin sín kixin ts'ánao sín.

⁷ A ntá tí ángel saoxín k'uánao trompeta ntá k'uániá toni la ko xrohi tsínkíkjan jni mé xikaha ikui chrítaón chjasintajni. A ntá iche nixin parte nonte la ko nixin parte tí nta la ko kaín tí kayoa siín.

⁸ A ntá tí yóxin ángel k'uánao trompeta la ijnko nkehe yóhe tsjehe éxí ijnko jna jíe tjeche la sákjuí kjuíankí ntayaon la ntá nixin parte tí ntayaon la k'óna jni. ⁹ A ntá tí nixin parte kaín tí nkehe siín tí ntayaon la ik'uén la ko nixin parte kaín tí ntabárc̄o la xíka.

¹⁰ A ntá tí nixin ángel k'uánao trompeta la ntá xrínahya k'uánótjen ijnko konotsé jíe k'uánótjexin nkajní mé tjeche éxí ijnko xrohi jíe. K'uánótjen chrítaón nixin parte ntarío la ko tí sít'axrje nta. ¹¹ Tí konotsé mé it'in Itsjá la tsíkjiankí nixin parte tí nta ntá kótsjá tí nta la nchónhya chojni ik'uén kixin tí nta xikaha tsíkótsjá.

¹² A ntá tí noóxin ángel k'uánao trompeta la kjuíncheníhi ijnko nixin parte tí yaon la ko nixin parte tí nitjó la ko nixin parte tí konotsé. Méxra tí nixin parte kuitóhe sítie la í kohya t'inkaséyan tí nixin parte tí nchakotjin la ko tí tie.

¹³ Nta tuénxín k'uíquuan la ko kuínhan ijnko ángel tjetjaká jnkosiné nkajní t'èya ch'án itsen, ntáchro ch'án kixin:

—Nòa tí sín tjejó chjasintajni tió tsontáchro tí trompeta ts'ánao tí iní ángel inaá.

9

¹ A ntá tí n'óxin ángel k'uánao trompeta la k'uíquuan ijnko konotsé tsík'ánótjexin nkajní chrítaón chjasintajni ntá k'uáyéhe tí llave kuènte tí tòye ninka. ² A ntá tuénxín xitjehe tí tòye ninka ntá ntiha chrínxín nchónhya ihnchi kuènte tja ntá tí t'inkaséyanxín yaon la ko tí xr̄nto k'uíxin tié kixin tí ihnchi kuènte tí tòye. ³ A ntá tí ihnchi mé k'uaxrjexín kochjoa xritjaká chrítaón chjasintajni. A ntá tí kochjoa k'uáyéhe kjuachaxin éxí tí chóna konchija siín chjasintajni. ⁴ K'uítuenhen va kixin sincheníehya va tí kayoa siín chjasintajni la ko ninkehó nkehe yoa la ko ninkehó ntayoa. Jehó chojni chónahya sello kuènte Dios tí totjen mé sincheníhi va. ⁵ Kjánchó k'uáyèhya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxí chojni tsíkjinehe konchija. ⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjonté tjinkaon sín chrók'uen sín la tí muerte sátsíkji ókjé.

⁷ A ntá tí kochjoá éxí kokate tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsík'óna oro la ko tí kàré la tóyóhe éxí kàré chojni. ⁸ A ntá tí kaxree va tsjehe tóyóhe éxí kaxihi chojni chjin, a ntá tí neno va la tóyóhe neno koxra. ⁹ A ntá tí cuérpóé la tjejanjin nkehe tsík'óna chica kixin kohya nkehe tsonhen va. A ntá ruido kuènte kanenee la éxí nchónhya carro tinkánkákjen kokate tió xritinká tí siín kjuanínkaon. ¹⁰ A

ntá tí ntané va mé tsjiate chojni la éxí ntané konchija, la tíha mé tsochóna kjuachaxin sincheníhi chojni hasta in'ó nitjó. ¹¹ A ntá tí kochjoá mé chóna ijnko nkexro t'etoan mé ijnko ángel kuènte tí tòye ninka. Tí ángel mé nkiva hebreo mé it'in Abadón la nkiva griego la mé Apolión mé t'axrjexín kixin táha mé sinchek'itjáyán nkehe.

¹² Mé xikaha kónhen tí kjuachakon xrankixín. A ntá naxa t'itjáyán yaá inaá.

¹³ A ntá tí injonxin ángel k'uañoa trompeta la kuinhan ijnko itén nkexro k'uaxrjexín tí tjejó tí noó ntée kuènte tí altar oro tí tjen Dios. ¹⁴ A ntá tí itén tí nkexro ntáche tí injonxin ángel chóna trompeta kixin:

—Tjasintankehé tí noó ángel kuènte tí jínahya tjejóchroé chjinaxón tí ntarío jié it'in Eufates.

¹⁵ Ntá xikaha xintankehe tí noó sín ángel kixin ts'óyán sín tí nixin parte chojni. Mé xikaha yaxínhin sín sátsji sín tí hora la tí yaon la tí nitjó la tí nánó.

¹⁶ Ntá kuinhan tí número tí soldado la ko tí kokate la doscientos millones.

¹⁷ Mé xikaha xrinahya k'uikuán tí kokate. A ntá tí sín tjejókjen kokate la tí ntakuin sín chóna nkehe tsík'óna chica kjátse la azul la sine. A ntá tí kokate la ikja la éxí kja koxra la tí ir'va la k'uaxrjexín xrohi la ko ihnchi la ko azufre. ¹⁸ A ntá nixin parte chojni tsík'enxín tí iní clase tí chin tsík'axrjexín ir'va kokate mé xrohi la ihnchi la azufre. ¹⁹ Tí kjuachaxin chóna tí kokate la k'uaxrjexín ir'va va la ko tí ntané va. A ntá ntané la éxí konche tsjehe la tí kja va mé sincheníhi chojni.

²⁰ A ntá tí í so chojni kuítóhe k'uénxinhya tí chin a la kjónté kjuinkíhya sín tí nkehe tjenkayáxin sín la kuítóehya sín tinkáchónki sín nchakuen jínahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya. ²¹ La kjónté xikaha la kuítóehya sín tí nkehe jínahya ch'e la ko tí chrók'óyán kichó la ko tí nchekjiko kichó la ko tí chóna sín chojni chjin ókjé la ko tí tjinkaon sín chrókueé.

10

Ijnko ángel la ko tí librito ntsí

¹ Ntá k'uikuán í jnko ángel imá chonta kjuachaxin k'uínkajinxín nkajní tjenkakjan ch'án tjuj la ko ijnko konchecha chrítaón tí ikja ch'án. A ntá tí kàre ch'án imá tjákiní tsjehe éxí yaon, a ntá tí toté la éxí xrohi síchr'ákjen. ² Tjexraá ch'án ijnko libro ntsí tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche. ³ Ntá xrinahya k'uèya ch'án itsen éxí ijnko koxra tsjanka va tí tónínkaon va mé xikaha k'uèya la yato kjónta kjuáteyá tí itén ch'án. ⁴ Ntá kjuixin ntáchro tí yato kjónta la chrókjian ntá kuinhan ijnko itén nkexro nkaya nkajní ntáchro kixin:

—Chróchronkahya tí nkehe ntáchro tí yato kjónta la ko ni chrókjinhya tíha.

⁵ Ntá tuénxín tí ángel k'uikuán ijnko toté tjejkjen ntayaon la ijnko toté tjejkjen nche ntá kjuaya tja chjina nó nkajní. ⁶ Ntá kjuasin ch'án testigo tí nkexro tjen jnkochrín mé tí nkexro a mé kjuích'éna nkajní la ko chjasintajni la ko ntayaon la ko kaín xín nkehe síin la ntáchro ch'án kixin:

—Í séhya má naxa tsoxrjen ⁷ ntá tsjixraká tí yaon tí yatoxin ángel ts'ánoa trompeta ntá tsoxiteyá tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchrónka sín itén ch'án.

⁸ A ntá tí itén nkexro kuinhan k'uaxrjexín nkaya nkajní ntá xínixjana inaá ntáchro kixin:

—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuia kjuáncháha tí ángel tí libro ntsí ntá jehe ch'án ntáchro ch'án kixin: —Tákjá la inte. A ntá tí ir'va la tsoxé éxi tsjen kjánchó tí tsaa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxi tsjen ntá chr'éxin la kótsjá nkaya tsena. ¹¹ Ntá tuénxín k'uetuanna ch'án kixin:

—Ínaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijnko ntavara éxi tji tsjehe tsjáchroaxián ntá ntáchro ch'án kixin:

—T'àyá tjáchrōa nkaxenhen ninko kuente Dios la ko tí altar la tékia nkekjaín nkexro tjejó ntiha tinkáchónki Dios. ² Kjánchó tí ntasin itjen ntója ninko la tjáchrōahya kixin táha ó tsík'áyéhe tí sín tsík'jixin kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó. ³ A ntá mé janhan tsochr'an iyó testigo kuentana tsonixjaxinna mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuente chjasintajni. ⁵ A ntá tí jnkojín sín tjinkaon sich'ehe sín daño la jehe sín la xrohi ts'axrjexín ir'va sín la tsoche kaín tí sín nínkakohen sín la mé xikaha its'en kaín tí sín tjinkaon sich'ehe sín daño tí jehe sín. ⁶ A ntá tí testigo i chóna kjuachaxin ts'ikjehe nkaya nkajní kixin í ts'aniáhya chrin tí tsonixja sín kuente Dios la ko kjaxin chóna sín kjuachaxin tson táche sín tí ntá kixin ts'óna jni la ko sinchekjasótexín sín chojni chjasintajni nchónhya clase chin nchónhya veces éxi tí tjinkaon sín. ⁷ A ntá tí kjuixinhin sín tí xra ntá tí ko jiehe ts'axrjexín tí tòye ninka mé tsjankixin tsjanjonko tí jehe sín ntá tsjacha va ts'óyán va tí jehe sín. ⁸ A ntá tí cuérpōé sín tsitōhe sítsínka tí calle kuente chjasin jie tí tsíkjak'enkani sín Ìnchéni ntacruz mé tí chjasin mé kjaxin nchek'in sín Sodoma la ko Egipto. ⁹ A ntá iní yaon ko t'ō la kaín chojni itsje chjasin la ko kaín nkexrí tsjehe sín la ko nchónhya nkiva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a. ¹⁰ A ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uechrónka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a. ¹¹ A ntá chr'éxin ó k'uátsínka iní yaon ko t'ō la ntá Dios kjuínchexechón tí iyó tí sín a ínaá la k'uàya sín ínaá la ntá kaín chojni k'uíkon la imá chrakon sín. ¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chriyan xrakía antsí ntihi.

Ntá chrinxín sín nkajní ijnko tjuj. A ntá kaín tí sín nínkakohen sín la k'uíkon sín kixin xikaha kónhen sákjuj tí iyó sín a. ¹³ Ntá tuénxín imá kuínki nonte la ntá ijnko ite parte chjasin ntiha la k'uitjáyán la yato mil chojni tsík'en kixin tí kuínki nonte. A ntá kaín tí sín xéhe imá chrakon sín la kjuankixin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí níxin kjuachrakon ínaá.

Tí yatōxin trompeta

¹⁵ A ntá tí yatōxin ángel k'uánoa trompeta ntá kuínhin sín ijnko tan nkajní itsen ntáchro kixin:

A ntá tí sín k'uáyéhe kjuachaxin kuènte chjasintajni la ó kjaxin nchexiteyéhe
sín

Ìnchéni Jesucristo

kíxin jehe Jesucristo mé ts'etōan ch'án jnkochrín.

¹⁶ A ntá tí veinticuatro tí sín táda tjejótxaxin sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios. ¹⁷ Ntáchro sín kíxin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxin tjen la ko jaha ts'inka ínaá.

Kíxin jaha k'uayéhe kjuachaxin jíe kíxin xráxin tētōan.

¹⁸ A ntá kaín tí nación kónínkaon,

a ntá ó kui tí yaon jaha sinchekjasóte sín

la ko kjaxin jaha sinchekitoexián íjé tí sín tsík'en

la ko tsjénkehé tí sín kjuít'aha xra chrónkaxín itán

la ko tí sín ó kjuinchetjóá la ko tí sín kjuikosáyehe tí ihniá,

mé tí chojni nteto la ko tí sín chánjan ntsíntsi.

Jaha tjoka sinchek'itjáyan tí sín chrókjuinчек'itjáyan chjasintajni.

¹⁹ A ntá xitjehe tí ninkoe Dios tjen nkaya nkajní, a tí nkaxenhen kónoxín tí caja tjinká tí nkehe tsík'etōan Dios. A ntá sítjónkíxin la ko nchónhya ruido sítjonta la ko kuínkí nonte la ko imá tsanká k'uániá toni.

12

Tí chojni chjin la ko tí dragón

¹ A ntá kónoxín nkajní ijnko kjuaxroan jíe mé ijnko chojni chjin iké tjákiní éxí yaon tsjehe la chrínkí toté tjan itjen nitjó. A ntá tí kja tjan tjenkáya ijnko corona chóna teyó konotsé. ² A ntá tí chojni chjin a mé tjejá tjan la t'èya tjan kíxin tjeté tjan kíxin sinchekokjíhi tjan xjeen tjan. ³ Kjaxin kónoxín í jnko kjuaxroan nkajní mé ijnko dragón kjátse chóna yato kja la ite ntèé la jnkojnko corona jnkojnko kja. [Tí dragón mé ijnko kots'aja jíe.] ⁴ Tí ntané mé nkánkákjen níxin parte konotsé kuènte nkajní la ik'ue chrítaón chjasintajni. A ntá tí dragón kjuák'e chók'èxin tí tjen tí chojni chjin mero tsokjíhi xjeen kíxin tjinkaon tjoka chrókjóne tí xjan tsokjíhi. ⁵ A ntá tí xjan kjuínchekokjíhi tjan mé xjan ntoá kíxin jehe ch'án mé ts'etuenhen ch'án kaín nación la tsochóna ch'án ijnko vara chica ts'etōanxín ch'án. Ntá tí xjeen tjan la mé Dios sákjuíko tí tjen ch'án t'etōan ch'án. ⁶ A ntá tí chojni chjin la kuínká tjan sákjuí tjan nteje kíxin tsíkjincheyóxin Dios nketí sátsji tjan kíxin ntaha tsoxranjon nkehe sine tjan mil dos cientos sesenta yaon.

⁷ Ntá chr'éxin xrínahya k'uíxin kjuanínkaon jíe nkajní la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín. ⁸ Kjánchó kjuachahya tí dragón la kohya lugar kuènte nkaya nkajní. ⁹ Mé xíkaha kuakitsjexín sín tí dragón nkajní. Jehe mé tí konche ósé íkjí mé nchek'in sín diablo la ko Satanás. Jehe mé k'uékjich'iyehé tí chojni kuénté chjasintajni. Jehe la ko tí sín ángel kuènte k'uaxrjexín ntiha la kjuitsínka chjasintajni.

¹⁰ Ntá kuínhan itén ijnko nkexro nkaya nkajní itsen nixja ntáchro kíxin:

—Ó kui ti tsaáxinni tí kjuachaxién tí Dios kuénténi la ko tí kjuachaxin t'etōan Cristo kíxin ó k'uaxrjexín nkajní tí nkexro t'eka jíe tí kíchó ni mé kjuanchia jíe nchakotjin la ko tie nkayakon Dios kuénténi. ¹¹ Tí sín kíchó ni la kjuacha sín kuaáxin sín kíxin tí ijníé tí Kolélo k'uitji la ko kíxin jehe sín chrónkaxín sín tí tan tsík'áyéhe sín la chrakonhya sín kjónté chrók'uénxín sín. ¹² A ntá jie la tócháhará kaín rá tjejorá nkajní. Ntá nòá tí sín tjejó chjasintajni la ko ntayaon

kíxin k'uínkajin tí ch'ín diablo la imá nínkaon ch'án kíxin ó nohe ch'án kíxin í kánhyó sé tsjak'e ch'án.

¹³ Ntá tí ch'ín dragón ó nohe kíxin k'uánótjenxin nkajní ikui chjasintajni ntá sákjuíchréhe tí chojni chjin chóna tí xjan ntoa kíxin chrókjuinçek'itjáyan tjan. ¹⁴ Kjánchó tí chojni chjin k'uáyéhe yaá kanene kuente kotjuanhnko ijié kíxin jína tsjaká tjan sátsji nteje kíxin ntá ikjín tsitohe tí konche. Sátsji tjan kíxin ntiha tsoxranjon nkehe sine tjan iní nánó ko t'ó. ¹⁵ A ntá tí konche mé k'uaxrjexín ntá ir'va kíxin ts'óna ijnko ntario kíxin tjinkaon va chrók'uátjoáko tí tjan a tí ntá a. ¹⁶ A ntá tí nonte kjuínkítsa tí tjan a kíxin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uíxenhén. ¹⁷ A ntá tí dragón la imá kónínkakohen tí tjan a ná imá kónínkaon kjuánjonko tí í so sín naxa kjéhya tí tjan a kíxin naxa titekaon sín tí nkehe tsík'etōan Dios la naxa tinkáchónki sín tí nkehe tsíchronka Jesucristo.

13

Tí yaá bestia

¹ Tí kjuak'é chrínta ntayaon ntá ntaha k'uíquān chrínxín ijnko bestia chóna yato kja la ko ite ntéé chojni t'ántaxínhin Dios. ² Tí bestia k'uíquān mé tóyóhe kotigre la chóna toté éxí toté ko oso la ko tí ir'va la éxí ir'va koxra. Tí dragón kjuanjon kjuachaxin imá ts'etōan tí bestia a. ³ A ntá ijnko kja tí bestia chóna ijnko tsíchrit'ō jié chóna chrók'uenxín ntá tsíkitohe jína ntá kuenté chjasintajni la chrakon chojni ntá chréhe sín tí bestia. ⁴ Kjuikosáyehe sín tí dragón kíxin jehe kjuanjon tí kjuachaxin k'uáyéhe tí bestia ntá kjaxin kjuikosáyehe sín tí bestia la ntáchro sín kíxin:

—¿Xá nkexro chrókóyóhe tí bestia la xá nkexro chrókjuacha chrókjuanjonko tí jehe?

⁵ Kjaxin tí bestia k'uáyéhe kjuachaxin tsontáchro kíxin chóna kjuachaxin má la ts'ántaxínhin Dios la tsochóna kjuachaxin cuarenta y dos nitjó. ⁶ Ntá mé xikaha kjuích'e k'uántaxínhin Dios la ko k'uántaxínhin ihnié Dios la ko k'uántaxínhin tí nínko tjen nkaya nkajní la ko kaín tí sín tjejó ntiha. ⁷ Kjaxin tsík'áyéhe kjuachaxin tsjanjonko tí sín tinkáchonki Dios hasta tsjacha ts'etuenhen tí sín ntá k'uáyéhe kjuachaxin ts'etuenhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación. ⁸ A ntá tí bestia mé kaín xín chojni siín chjasintajni mé tsjikosáyehe sín tí bestia. Tí chojni a mé ts'ínixínhya ihnié tió k'óna chjasintajni, mé ts'ínixínhya ihnié sín tí libro ts'ínixín ihnié tí sín tsaá. Tí xroon a mé chóna tí Kolélo tsík'óyán sín.

⁹ La jnkojín nkexro tjinkaon chrókuinhin la chrókuinhin tíhi. ¹⁰ Tí nkexro sátsjiko tsjik'ikjehe í so chojni la kjaxin ch'án ts'ikjehe ch'án la tí nkexro tsjayaxin espada la kjaxin espada ts'enxín. A ntá tí nkexro tinkáchónki Dios la t'ichjánxin tsonínkakonhya la ko tsochóna fe.

¹¹ A ntá chr'éxin k'uíquān í jnko bestia k'uaxrjexín nonte, chóna yaá ntéé éxí tsjehe ntéé coronta la mé nixja éxí nixja tí dragón. ¹² Tí bestia la chóna kaín xín kjuachaxin éxí k'uéchóna tí bestia saoxín tí k'ué la t'etuenhen tí sín siín chjasintajni kíxin tinkáchónki sín tí bestia saoxín mé tí bestia tsíchrit'ō kja ntá tsíkitohe jína. ¹³ Kjaxin kjuasin kjuaxroan jié hasta xrohi k'uánótjenxin nkajní ikui nonte ntá nchónhya chojni k'uíkonxín kon sín kíxin xikaha kónhen. ¹⁴ Mé xikaha tí bestia tsík'áyéhe kjuachaxin kjuasin kjuaxroan tí tjen tí bestia saoxín la kjuích'iyehe nchónhya chojni siín chjasintajni. La ntá k'uetuenhen tí sín siín chjasintajni sich'éna sín ijnko nkehe tsíkjanoya éxí yóhe tsjehe tí bestia tsíchrit'ōxin espada la kjónté xikaha naxa kjuák'echón. ¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsíkjanoya tóyóhe tí bestia

sáoxín kixin ntá tí nkehe tsíkjanoya la jína tsonixja la ko jína ts'etoan its'en kaín nkexro tinkáchónkihya tí jehe. ¹⁶ Kjaxin ts'etoan kixin kaín chojni tsochóna marca, á chojni hyé o chojni ntsíntsí, la á chojni rico, la á chojni nòa la á chojni ch'exón xra la ko chojni náhi, mé kaín sín tsochóna sín marca, á tja sín chjina o totjen sín. ¹⁷ Ntá ninkexró xitjahya ts'ena la ko ninkexró xitjahya sinchekji tí chóntahya sín marca o ihnié tí bestia o chóntahya sín número kuènte ihnié tí bestia. ¹⁸ T'ichjánxin chrókiénxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uíkuan tí Kolélo tjaxin toté chrítaón tí jna Jerusalén. Jehe ch'án tjeke ch'án ciento cuarenta y cuatro mil chojni ts'ínixín totjen sín ihnié tí Kolélo la ko ihnié It'é ch'án. ² Ntá tuénxín kuñhan ijnko itén nkexro kuixín nkaya nkajní mé ijnko ruido éxi nchónhya ntarío la ruido éxi sítjonta itsen la éxi ijnko ruido nchónhya chojni it'in sín isón arpa. ³ Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni. ⁴ Tí sín a mé k'uéchóntahya sín itsje chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixín chojni k'uékjasin jie la ko tí sín a mé éxi ijnko ofrenda xrankíxixín k'uáyéhe Dios la ko tí Kolélo kjaxin. ⁵ Kónoxínhya ninkehó kjuach'ia k'uaxrjexínhya ir'va sín. La tí sín la ninkehó jie chóntahya sín tí tjejó sín nkayakon tí trono kuènte Dios.

Tí nkehe chrónka tí iní ángel

⁶ A ntá k'uíkuan í jnko ángel tjetjaká jnkosiné nkajní chrónka tí tan tsaáxinni jnkochrín tsinhin tí sín sún chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin. ⁷ Ntá t'èya itsen ntáchro kixin:

—Chróchrakonrá la chróxráxinkáonrá Dios la chróchjehera ch'án kjuasáya kixin ó kjuixraká tí yaon sinchekitoexín ch'án ijié chojni. Tjikosáyehera ch'án kixin jehe ch'án kjuích'éna ch'án nkajní la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixin kjuítsínka, ó kjuixin kjuítsínka tí chjasin jie Babilonia. Mé ntiha kuixín tí vino kókuaxín sín kaín nación ntá kjuasin sín jie chóna sín chojni chjin ókjé.

⁹ Ntá xíki tí nixin ángel nixja itsen, ntáchro kixin:

—Jnkójín sín tsjikosáyehe sín tí bestia la ko tí nkehe tsíkjanoya kuènte o tsítóhe sín tsochóna tí marca tí totjen sín o tí tja sín, ¹⁰ mé t'ichjánxin its'i sín tí vino tsjasótexín sín kuixín tí tjen Dios kixin xíkaha tjechónhen tí kjuanínkaon kuènte Dios ntá ntiha tsjasótexín sín tí xrohi la ko azufre mé xíkaha tsonhen tí sín a ts'ikon tí sín ángel kuènte Dios la ko tí Kolélo. ¹¹ Tí ihnchi kuènte xrohi sítjasótexín sín síchriin jnkochrín la tí sín a kuinkáchónki tí bestia la ko tí nkehe tsíkjanoya kuènte o chóna sín ihnié kuènte. ¹² A ntá tí sín tinkáchónki Dios la kuítekaon sín tí nkehe k'uetoan ch'án la ko naxa jína tinkáchónki sín Jesús mé t'ichjánxin chrókuíteohya sín titekaon sín ch'án.

¹³ Ntá kuñhan itén ijnko nkexro kuixín nkajní ntáchro kixin:

—Ikjian tíhi: “Náxrjón tjejó tí nkexro kjónté its'en sín ijie o chr'éxín kixin tinkáchónki sín Ìnchéni.” Kjá jína, ichro Nchakuen Dios, kixin tí jehe sín ts'ok'éhe sín kixin ó kjuích'e sín xra la tí xra kjuích'e sín mé kjuacha sín.

Tí nkehe tsík'óna chjasintajni

¹⁴ Ntá xrínahya k'uíkuan ijnko tjuí tjóá la chrítaón tí tjuí tjetjaxin ijnko nkexro éxí yóhé tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjetxraá ch'án. ¹⁵ A ntá nkaxenhen njnko mé k'uaxrjexín í jnko ángel itsen nixja ch'án nixjehe ch'án tí nkexro tjetjaxin chrítaón tjuí ntáchro ch'án kixin:

—Tjankíxian tatexian chica hoz kixin ó kjuixraká tí yaon tsotjá tí nkehe siín chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxín tí nkexro tjetjaxin chrítaón tjuí ntá kjuínchek'átsínka ch'án chica hoz kuenté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí njnko tjen nkaya nkajní la kjaxin sákjuíko ch'án ijnko chica hoz imá taté. ¹⁸ Ntá sákjuíxín í jnko ángel tí tjen altar la chóna ch'án kjuachaxin kuènte xrohi la itsen k'uíyehé ch'án tí nkexro chóna tí chica hoz imá taté la ntáchro ch'án kixin:

—Tjankíxian tatexian tí chica hoz taté la tjankíxian itja tí racimos to uva tsík'óna chjasintajni kixin ó tsíchjé to —ichro ch'án.

¹⁹ A ntá tí ángel kjuínchek'átsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí tjat'o ts'ényaxín sín to. Tíha mé t'axrjexín kixin xikaha Dios sinchekjasóte chojni. ²⁰ A ntá tí to uva tsík'ényaxín sín tjat'o tí ikon chjasin a ntá tí tjat'o a mé k'uaxrjexín nchónhya jni noixín éxí tí freno tjinká ir'va kokate la trescientos kilómetro kjínxín sátsíkji tí jni a.

15

Tí yato tí ángel la ko tí chin tsjixixín

¹ Ntá k'uíkuan tí nkajní í jnko kjuaxroan jié mé ijnko kjuachrakon: mé tí yato sín ángel kuikao tí yato chin tsjixixín tsonéxín chojni. Tíha mé tí kjuanínkaon kuènte Dios tsjixixín.

² Kjaxin k'uíkuan ijnko nkehe tóyóhé ijnko ntayaon tsík'óna éxí xrosenta tsínkíjkan xrohi. La tí sín tsíkjacha kixin kuinkáchónkihya sín tí bestia la ko tí nkehe tsíkjanoya kuènte la ko kuáhya sín tí número kuènte ihnié tí bestia mé tjejóxin toté sín chjinaxón ntayaon tsík'óna éxí xrosenta la ko chóna sín isón arpa tsíkjanjon Dios tsík'áyéhe sín. ³ Itsje sín isón k'uétsje ch'ín Moisés, tí nkexro kjuích'ehe xra Dios la ko isón kuènte tí Kolélo la mé ntáchro kixin:

Imá ijie tí kjuaxroan kuéntá kixin kaín nkehe tsíkjich'éna.

Jaha Ìnchéni Dios kaín kjuachaxin chonta.

Ntoá la ko chaxín tí ntja kuéntá.

Jaha mé ijnko Rey t'etjan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kixin jaha mé ijnko nkexro jína tjóá?

Kuenté chjasintajni tsjikosáyehe sín tí jaha

kixin k'uíkon sín tí xra tsíkjich'e la jína tíha.

⁵ Kjuixin tíha la k'uíkuan nkajní tjetxrankehe tí njnko la ko tí cuarto tjóá t'inkachjina tí nkehe tsík'etjan Dios. ⁶ A ntá tí njnko a k'uaxrjexín yato ángel kuikao yato chin. Tí iké sín la ika tjeje tjóá tjákini. A ntá tí cinta chóna ntakuin sín mé jehó oro. ⁷ A ntá ijnko tí noó tí nkexro tjejóchón mé kjuanjon ijnko copa k'uáyéhe jnkojnko ti yato ángel mé copa tsík'óna chica oro tsíkaón tí

nkehe tsjasótexín chojni kuixín tí tjen Dios tí nkexro tjechón jnkochrín. ⁸ A ntá tí nkaxenhen nínko la tsíkaón ihnchi kuixín tí kjuachaxin jié kuènte Dios la nijnko nkexro xítjahya ts'ixenhen ntiha tsjixinjian ts'átsínka tí yato tí chin kuikao tí yato ángel.

16

Tí copa tjinká nkehe tsjasótexín chojni

¹ Ntá kuinhan ijnko itén ijnko nkexro imá itsen k'uaxrjexín nkaxenhen nínko, ntáche tí yato sín ángel kixin:

—Sátjia tikíkanjian chrítaón chjasintajni tí nkehe tjiá tí yato copa la táha mé tsjasótexín chojni kuixín tí tjen Dios —íchro ch'án.

² A ntá tí ángel saxín sákjuik'itji tí nkehe tjiá tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanoya kuènte tí bestia mé tsík'ayan sín tosóa, imá tjetéhe sín.

³ A ntá tí yóxin ángel sákjuik'itji tí nkehe tjiá copa chrítaón ntayaon. A ntá tí ntayaon la k'óna jni éxi ijnié ijnko chojni tsík'óyan kichó la kaín ko sínkánki ntayaon ik'uén.

⁴ A ntá tí nixin ángel sákjuik'itji tí nkehe tjiá copa chrítaón ntarío la ko chrítaón tí ntá sít'axrje tòye, la ntá tí ntá k'óna jni. ⁵ Ntá tuénxín kuinhan nixja tí ángel kuènte ntá ntáchro kixin:

—Jaha mé ijnko nkexro jína kixin kjuinchekitoxián ijié chojni. Ichéni jaha ijnko Dios jína, ósé tjen la ko naxa tjen ijie ⁶ kixin jehe sín k'óyan tí sín tinkáchónki tí jaha la ko tí sín tsíchrónka itan la ntá jaha Inchéni chjehé sín ijni its'i sín kixin mé xikaha sítjasóte tí jehe sín.

⁷ Kjaxin kuinhan nó altar ijnko nkexro ntáchro kixin:

—Chaxín Inchéni Dios, jaha mé chonta kaín kjuachaxin la ntoá jína kjuinchekitoxián tí ijie a.

⁸ A ntá tí noóxin ángel sákjuik'itji tí nkehe tjiá copa chrítaón yaon, a ntá tí yaon antsí k'uáyéhe kjuachaxin tosóa kixin tsochjánxin chojni tí sóa kuènte.

⁹ A ntá kaín chojni chjánxin tí imá sóa kuènte yaon la k'uántaxínhin sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuik'itji tí nkehe tjiá copa chrítaón tí trono t'etoxánxin tí bestia. A ntá kaín tí k'uéchóna kjuachaxin k'uék'etoxan tí bestia la k'uixin tié. A ntá tí chojni a la netja nejen sín kixin tjetéhe sín. ¹¹ La kjónté xikaha la kjuinkíhya sín tí nkehe jínahya ch'e sín. Náhí. Íchá má k'uántaxínhin sín Dios tjen nkaya nkajni kixin tjetéhe sín kixin xikaha kónhen sín.

¹² A ntá tí injonxin ángel sákjuik'itji tí nkehe tjiá copa chrítaón ijnko ntarío jié it'in Eufrates. A ntá tí ntarío la kjuixié kixin jína tsakitjehé sín ijnko ntia tsjixin tí sín rey tsjixin nó tjitoxin yaon.

¹³ A ntá k'uikuán kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxi korána tsjehe. ¹⁴ Tíha mé nchakuen tí jínahya kjuasixin sín kjuaxroan. A ntá sákjuikjinchejónkotsé kaín rey síin chjasintajni kixin tsjanjon sín ijnko yaon jié kuènte Dios chóna kaín kjuachaxin. ¹⁵ “Tsjehe, janhan titàya ts'inké éxi ijnko xichee. Chéhe tí nkexro tjejótsjehe la t'ayakonhen tí iké kixin ts'itjáyanhya kixin chrók'uajihya sín tjóchin sín la chrókósuèhya sín kixin chrókónoxin kixin tjóchin sín.” ¹⁶ A ntá tsojnkotsé tí sín rey tí nonte it'in Armagedón nkiva Hebreo.

¹⁷ A ntá tí ángel yatoxin sákjuík'itji nkehe tjiá copa chrítaón tí xrinto ntá nkaxenhen ninko nkaya nkajní k'uaxrjexín ijnko itén chojni itsen nixja mé kuixin tí tjen tí trono la ntáchro kixin:

—Ó kjuixin kónhen tíha.

¹⁸ A ntá sítjónkixin la ko ruido sítjonta la ntá imá kuínkí nonte fuerte. La desde tí kjuankixin k'uixin chojni chjasintajni la xikahya kónhen kuínkí nonte a ntá jie antsí fuerte kuínkí nonte. ¹⁹ A ntá tí chjasin jie xitjehe nonte la iní k'óna, chjenca. La koí kaín chjasin siín chjasintajni tsík'oya. A ntá Dios xraxinkaon kixin chrókuínchekjasóte tí sín siín tí chjasin jie Babilonia la k'uetoan ch'án its'i sín tí vino tsjasótexín sín kixin mé xikaha kónínkaon ch'án. ²⁰ A ntá kain tí nonte sínkátáon ntayaon k'uániankí ntá la ko tí jna k'uitjayan. ²¹ A nta nkajní k'uánótjexín toni ijie xrátja chojni mé cuarenta kilo yexín jnkojnko toni. A ntá chojni na antsí má k'uántaxínhín sín Dios kixin tí xikaha kónhen sín xratja sín toni la imá kjoté sín.

17

Tsjasóte tí tjan jínahya

¹ A ntá ikui ijnko tí yatoxin ángel chóna tí yato copa la ntáchro ch'án kixin:

—Xrákiá tsjakoha nkexrí tsjasóte tí chojni chjin tjasin jie tjetjaxín tjan chrítaón tí nchónhya ntá. ² Tí sín rey t'etoan chjasintajni kjuasinko tjan jie la ko tí chojni siín chjasintajni kókuaxín sín tí vino a mé kjaxin kjuasixín sín jie.

³ A ntá tuénxín Nchakuen Dios sákjuikian nteje ntá k'uíkuan ijnko chojni chjin tjetjaxín chrítaón ijnko bestia kjátse la kuenté tí ko a la síma ihnié náxrjónhya tsík'ántaxíenxín sín Dios la chóna yato kja la ko ite ntéé. ⁴ A ntá jehe tjan chóna tjan iké tjan morado la ko kjátse la teyá tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie. ⁵ Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jie Babilonia, mé ìné tí chojni chjin tjasin jie la ko kain chojni jínahya ch'e siín chjasintajni.” ⁶ Ntá kónona kixin tí tjan a la tsékanxín tí ijnié tí sín tinkáchónki Dios la ko tí ijnié tí sín tsík'enxín tí chrónka sín kixin tinkáchónki sín Jesús. Ntá k'uíkuan xikaha imá chrakonna. ⁷ A ntá ijnko ángel ntáchro ch'án kixin:

—¿Nkekuènté chrakuan? Ntá ijie sintanoha tí nkehe tienxínhya chojni kuènte tí tjan a la ko kuènte tí bestia tjejen tjan chóna yato kja la ko ite ntéé. ⁸ Tí bestia k'uíkuan jaha kjuák'e ósé la ijie tjechónhya kjánchó senó tsochriinxín tí tòye ninka ntá chr'éxin ts'itjayan. A ntá tí sín siín chjasintajni ts'ínixínhya ihnié sín tí libro ts'ínixín ihnié chojni tsaá desde k'óna chjasintajni, la mé jehe sín tsochrakon sín tió ts'ikon sín tí bestia kjuák'e ósé la tsík'en la ntá ijie xikjan ínaá.

⁹ Tí jnkójín nkexro chrókiénxín la mé tí yato kja la t'axrjexín yato jna tjejen tí chojni a. ¹⁰ A ntá tí kja kjaxin t'axrjexín yato rey la ntá in'ó tí sín rey la í t'etuanhya sín ijie la ijnko tí jehe sín t'etoan ijie la í jnko naxa tjihya. A ntá tió tsji tí yatoxin la í kánhyó sé ts'etoan. ¹¹ A ntá tí bestia kjuák'e senó la ijie tjechónhya mé tí jnixin rey la jehe ch'án kuènte tí yato rey la chr'éxin la ts'itjayan.

¹² A ntá tí ite ntéé tsík'ikuan mé ite rey naxa t'etuanhya. A ntá ijie la ts'áyéhe sín kjuachaxin ts'etoanko tí bestia kjánchó kánhyó sé. ¹³ Tí ite tí rey la jnkokoá tsjenkayáxin sín la tsjanjon sín kjuachaxin kuènte sín kixin ts'etoan tí bestia.

¹⁴ Tsjanjonko sín tí Kolélo a ntá tí Kolélo la tsjacha ts'etoan kixin jehe ch'án mé

Ìnché kaín chojni la ko jehe ch'án mé tí Rey ts'etueñhen kaín rey la ko tí sín tjejóko ch'án mé tsík'íyehé Dios la tsík'jeyá ch'án sín la jína nchexiteyá sín.

¹⁵ Kjaxin ntáchro tí ch'ín ángel kixin:

—Tí nta k'uíkuan la chrítaón tjetjaxin tí chojni chjin tjasin jie la mé t'axrjéxín kixin nchónhya chjasin la ko nchónhya chojni la ko nchónhya nación la ko nchónhya nkiva. ¹⁶ A ntá tí bestia k'uíkuan la ko tí ite ntée la tíha mé tsonínkakohen tí tjan tjasin jie la tsitöhe tjan tjóchin tjan la sine tí bestia tí nto chóna cuérpóe tjan la ko tsoche tí huésóe tjan. ¹⁷ Dios tsík'etueñhen asén sín kixin xikaha sich'e sín éxí tjinkaon ch'án kixin jnkokoá tsjenkayáxin sín la ko tsjanjon sín kjuachaxin kuente tí sín rey kixin ts'etóan tí bestia tsoxiteyáxia tí nkehe tsintáchro Dios. ¹⁸ A ntá tí chojni chjin k'uíkuan la táha mé tí chjasin jie t'etóan tí sín rey t'etóan chjasintajni.

18

Kjuítsínka chjasin Babilonia

¹ Ntá chr'éxín k'uíkuan í jnko ángel k'uínkajinxin nkajní chóna nchónhya kjuachaxin ntá chjasintajni antsí k'uínkaséyanni tí tjákini tsjehe ch'án. ² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jie Babilonia. Ntá tí jínahya ó kjuacha k'uixenhen t'etóan ntiha la ntiha síin kaín xín clase nchakuen jínahya la ko síin kaké ko xritjaká tjuáhya la ko jínahya. ³ A ntá kaín xín nación kókuaxin tí vino kjuínchekji tjan ntá kjuasinko tjan sín jie la ko tí sín rey t'etóan chjasintajni kjaxin kjuasinko tjan jie. La tí sín nchekji nkehe chjasintajni kóríkoxín sín kixin k'uena tjan nchónhya nkehe.

⁴ Ntá kujnhan í jnko itén nkexro kujxin nkaya nkajní ntáchro kixin:

—T'axrjéxínrá tí chjasin ntiha kixin tí jahará tinkachónkirá tí janhan kixin chrók'uicahyará tí ijie sín la ko chrókjuasótéxínhyará tí nkehe tsonhen sín. ⁵ Kixin tí nchónhya jie tinkák'ánki hasta kjuixraká nkajní la Dios ó nohe tí jie chóna sín. ⁶ Ch'eherá tjan éxí tí jehe tjan kjuích'ehe tjan í so chojni kixin xikaha tsjasótéxín tjan. Chrókjuenkehérá tjan iyó veces éxí tí tsík'jich'éna tjan ik'ui í so chojni. ⁷ Antsí chrókjuasóte tjan tóyóhe tí nkehe kjuích'e tjan kixin kjuínchehnke tjan la ko k'uéchóna tjan kaín nkehe tóxrjínhin tjan. Jehe tjan ntáche asén tjan kixin: “Ntili tjetjaxian éxí ijnko reina. Jehya ik'ána kixin chrókjuasótena.” ⁸ Mé xikaha kjaxin jnkokoá yaon itsi tí kjuaxikaon tsonhen tjan mé its'en tjan la ko tsjasótéxín tjan kjinta la tsoche tjan kixin Ìnchéni imá chóna kjuachaxin la jehe ch'án sinchekjasóte ch'án tjan.

⁹ A ntá tí sín rey síin chjasintajni tsíkjasinko sín tjan jie la ko nchónhya nkehe kjuínchexenko sín tjan la mé tsotsjánka sín la ts'èya sín tió ts'ikon sín ts'àya ihnchi tió tsoche tjan. ¹⁰ Ntá jehe sín tsitöhe sín ikjín kixin chrakon sín kixin xikaha tsjasóte tjan la tsontáchro sín kixin:

—Nòa tí jaha chjasin jie Babilonia, chjasin imá t'etóan kixin titàya kjuasótia.

¹¹ Tí sín xrinchekji nkehe la kjaxin tsjánka sín, t'èya sín kixin xikaha kónhen tí chjasin ntiha kixin kohya nkexro ts'enehe sín tí nkehe sinchekji sín. ¹² Kjuínchekji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjátse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixro chica la ko ixro mármol. ¹³ Kjaxin xrinchekji sín canela la ko xroan xraxé náxrjón la ko chjincó la ko xroan mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokate la ko carreta la ko chojni ch'exón xra kjaxin kjuínchekji sín. ¹⁴ Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'úitjáyan kaín nkehe náxrjón tjete k'uéchonta.

¹⁵ Tí sín k'uékjinčekji tí nkehe la kóríco sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'èya sín ¹⁶ la tsontáchro sín kixin:

—Nòa tí chjasin jié. Éxí ijnko chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla. ¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etòan tí ntabárco la ko tí sín tsík'ixenhen tí ntabárco la ko tí sín ch'e xra chrítaón ntayaon kuítóhe sín ikjín ¹⁸ la tió k'uíkon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jié i?

¹⁹ La tjíjjanjin kja sín nche la tsjánka sín t'èya sín kixin:

—Nòa tí chjasin jié. Kóríco tí sín k'uéchónta ntabárco chrítaón ntayaon kixin tí chjasin i la ntá jnkorató koá kjuixin k'úitjáyan tí nkehe chóna sín.

²⁰ A ntá jahará tjejorá nkajní tócháhará kixin xikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án kixin Dios kjuínčekjasóte tí chjasin a kixin tí jie kjuasin sín kjuínčekjasótíará sín tí jahará.

²¹ A ntá ijnko ch'ín ángel chóna kjuachaxin kjuatsen ijnko xro éxí ijnko xro jié kuènte molino la k'uénkí ch'án ntayaon la ntá ntáchro ch'án kixin:

—Mé xikaha tsonhen tí chjasin Babilonia, tí chjasin jié la nunca ts'ikonhya chojni chr'éxin. ²² Nunca tsienhya sín música kuènte isón arpa la ko flauta la ko trompeta tí ntia la ko ninkexró xitjahya sich'e ninkehó xra ntiha la ko kjaxin tsienhya sín ninkehó tóvéntó xro molino. ²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsotéhe chojni ntiha. Tí sín k'uékjinčekji nkehe ntiha la imá k'uék'etòan kuènte chjasintajni la tí sín k'uékjich'iyehe tí sín síin chjasintajni la k'uékjich'e sín jínahya, k'uédkjinchexroan sín.

²⁴ A ntá tí chjasin jié ntiha tsíkónoxín ijnié tí sín tsík'en k'uéchrónka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajni.

19

¹ Ntá chr'éxin ntá kuínhan itén nchónhya nkexro tjejó nkaya nkajní itsen nixja, ntáchro sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án ti jeheni la imá chóna kjuachaxin Dios kuènteni.

² Kixin jehe ch'án ntoá kjuínčekjasóte ch'án tí tjan kjuasin nchónhya jie kixin jehe tjan kjuachroe tjan chojni síin chjasintajni kixin tí nkehe jínahya k'uékjich'e tjan.

Dios kjuínčekjasóte tjan kixin k'óyán tjan tí sín k'uékjich'ehe ch'án xra.

³ La ntá kjaxin inaá xintáchro kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítóehya chrin hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja sín nonte kjuikosáyéhe sín Dios tí nkexro tjetjaxin tí trono la ntáchro sín kixin:

—¡Amén! ¡Aleluya! ¡Kjuasáyé Dios!

⁵ Ntá xrínahya kuínhin sín itén ijnko nkexro tjen nó trono ntáchro kixin: Chjehérá kjuasáya tí Dios kuènteni kaín rá ch'ehérá ch'án xra la kuítékákonhénrá ch'án,

mé kaín tí jahará kjónte chánjan ntsíntsí ɔ chojni nteto.

Tí kia tsotehe tí Kolélo

⁶ Kjaxin kuinhan nkehe éxí itén nchónhya chojni éxí nchónhya ntarío sítóvéntó la ko imá itsen sítjonta la ntáchro kixin:

¡Aleluya! Kjuasáyé Ìnchéni ó kjuankíxin t'etɔan Ìnchéni Dios kuènteni chóna kaín kjuachaxin.

⁷ Chrókóchéheni la chrókjuikosáyeheni Dios kixin ó kjuixraká tí yaon ts'ixin kia kuènte Kolélo.

La tí tjan tsotehe la tsíkóyaxínhin tjechónhen,

⁸ mé tsík'áyéhe kjuachaxin tsík'itsa ka lino náxrjón tjóá tjákini.

À ntá tí ka lino náxrjón a mé t'axrjexín kixin tí jína k'uéjótí sín tinkáchónki Dios.

⁹ Ntá tí ch'ín ángel k'uɛtɔan ch'án kixin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsotehe tí Kolélo.”

À ntá ntáchro ch'án ínaá kixin:

—Tí palabra a mé chaxín ntoá nixja Dios.

¹⁰ Ntá kjuak'éxian toch'ian toté tí ángel kixin chrókjuikosáyaha ch'án, kjánchó jehe ch'án ntáchro ch'án kixin:

—Xikahya chrokjuich'e kixin janhan kjaxian t'aha xra Dios éxí tí jaha la ko éxí tí sín kichuá kuítóehya kuítekaon tí tan jína chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uíkuan kixin nkajní tjebrankehe la ntaha kónoxín ijnko kokate tjóá la ko tí nkexro tjejen va mé it'in Jína la ko Chaxín kixin ntoá kjuínchekitoexín ch'án ijje chojni la ko ntoá kjuánjonko ch'án chojni. ¹² À ntá tí ikon ch'án mé tjákini éxí xrohi nene xikaha tsjehe. À ntá tí kja ch'án la chóna nchónhya corona la ko ts'ínixín ijnko ihnié ijnko nkexro la jehó ch'án mé nohe ch'án tíha.

¹³ Tjenkáya ch'án ijnko ka tsík'ixikjanjin jni ntá ihnié ch'án mé Itan Kuènte Dios. ¹⁴ Chréhe tí sín soldado kuènte nkajní. Iké sín mé ka lino náxrjón tjóá la tjejókjen sín kokate tjóá. ¹⁵ Ir'va tí jehe ch'án k'uaxrjexín espada imá taté kixin táha mé tsjik'óyánxin ch'án tí sín síin kaín nación la ko ts'etɔanxín ch'án ijnko chica vara. Jehe ch'án mé sinchekitoexín ch'án ijje sín éxí t'énxin sín to uva toté sín mé xikaha ts'etuenhen ch'án kixin its'i sín vino tsjasótexín sín kixin mé xikaha tsixin tí kjuanínkaon kuènte Dios chóna kaín kjuachaxin. ¹⁶ Iké ch'án mé ts'ínixín kixin jehe ch'án me Rey t'etuenhen kaín rey la ko jehe ch'án mé Ìnché kain chojni.

¹⁷ Ntá tuénxín k'uíkuan ijnko ángel tjejen toté tí tjejen yaon la k'uéyato ch'án itsen k'uéyatohe ch'án tí ko xritjaká, ntáchro ch'án kixin:

—Xrákirá tójnksérá ntihi kixin Dios tsjanjon nkehe sinterá ijje. ¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jjehe la ko ntɔe kokate la ko cuerpo kuènte tí sín tsíkjiták'á va la ko cuerpo kuènte kaín chojni libre ɔ chojni ch'exón xra la chojni hyé ɔ chojni ntsíntsí.

¹⁹ K'uíkuan tí bestia la ko tí sín reyes t'etɔan chjasintajni la ko tí soldado kuènte sín, tsíkójnksé sín tsjanjonko sín tí nkexro tjejen kokate la ko koí tí sín soldado kuènte ch'án. ²⁰ À ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xikaha kjuich'e tí nkexro ntoáhya kjuako, kjuich'iyehé ch'án tí sín tsíkítóhe tsíka marca kuènte tí bestia la ko

kjuikosáyehe sín tí nkehe tsíkjanoya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuenhen sín sátsji tí siín xrohi tsoche tjejóchónxinhín sín tsochéxin azufre. ²¹ A ntá tí í so sín la ts'enxín tí espada k'uaxrjexín tí ir'va tí nkexro tjejkjen tí kokaṭe tjóá la kaín ko xritjaká ts'ixín tí siín tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrínahya k'uíkuan ijnko ángel k'uínkajinxín nkajní tjexraá llave kuènte tí tòye nínka la ko ijnko cadena jié tjexraá ch'án. ² A ntá tí ángel a itsé tí dragón mé tí konche ósé kjí mé tíha tí ch'ín diablo la ko Satanás la kjuak'echroé ch'án ijnko mil nánó. ³ Ichr'án ch'án sákjuí tòye nínka ntá k'uikjehe ch'án la ko kjuak'e ch'án ijnko sello chrítaón puerta kixin ntá tí dragón chrókjuich'iyehya tí chojni siín kaín nación hasta chrók'uatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uíkuan tí trono la ko tí sín tjejótxaxín tsík'áyéhe sín kjuachaxin sinchekitoexín ijíe chojni. Kjaxin k'uíkuan asén chojni tsíchrínjin kja kixin kuítekaon sín Jesús la ko tsíchrónkaxín sín itén Dios. Jehe sín la kuinkáchónkihya sín tí bestia la ko tí nkehe tsíkjanoya kuènte la ko kuítóehya sín ikuá sín marca tí totjen sín o tí itja sín. Mé k'uíkuan kixin tsíxechón sín la ko ts'etōanko sín Cristo ijnko mil nánó. ⁵ Ntá í so chojni tsík'en la naxa xechónhya hasta ts'atsínkajia tí mil nánó. Tíha mé xrankíxixín tsoxechón chojni. ⁶ Náxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chóntahya ninkehó kjuachaxin naxa xikaha chrókónhen sín. Jehe sín mé ncha'tá kuènte Dios la ko kuènte Cristo la ts'etōanko sín ch'án tí mil nánó.

⁷ A ntá ts'átsínka tí mil nánó ntá ch'ín Satanás tsoxintankehe tí kjíchroé. ⁸ La sátsjikjich'iyehé tí chojni siín kuenté chjasintajni la ko sátsjikjich'iyehé tí chjasin Gog la ko Magog. La tsojnkotsé sín kixin tsjanjon sín la ko tí soldado kuènte tí jehe sín. Nchónhya sín tsojnkotsé ntiha éxí tí nchesen siín ntayaon. ⁹ Mé xikaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasin jié tjehe ch'án. A ntá xrohi tsixín nkajní kixin tsochexín tí sín jínahya ts'itjáyanxín sín. ¹⁰ A ntá tí diablo tsíkjich'iyehé tí jehe sín kjaxin sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín ncha'kotjin la ko tie jnkochrín.

Tsitoexín ijíe chojni tí tjen tí trono jié tjóá

¹¹ Ntá k'uíkuan ijnko trono jié tjóá la ko tí nkexro tjetjaxín nó ntiha. A ntá tí tjen ch'án ntiha la ó k'uitjáyancoá nonte la ko nkajní la í kónoxínhya inaá tí nonte. ¹² Ntá k'uíkuan tí sín tsík'en; chojni hyé la ko chojni ntsínsí tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihníé tí sín tsaá. Ntiha tsitoexín ijíe chojni tsík'en éxí nixja tí í so libro nkehe tí xra kjuích'e sín ts'ínixín ntiha. ¹³ Tí sín tsík'enxín ntayaon la ntiha xrakuaxín sín la tí sín sátsíkji tí siín chojni tsík'en la ntiha xrakuaxín sín kaín sín tsochjina sín tsitoexín ijíe jnkojnko sín kixin nkexrí tí xra kjuích'e sín. ¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha. ¹⁵ La ko ntaha sátsji tí chojni ts'ínixínhya ihníé sín tí libro ts'ínixín ihníé chojni tsaá.

21

Nkajní nixin la ko nonte nixin

¹ Ntá k'uíkuañ ijnko nkajní nixin la ko ijnko nonte nixin kixin tí nkajní saoxín la ko tí nonte saoxin tsík'itjáyan la ko kjaxin kohya ntayaon. ² Janhan Juan k'uíkuañ tí chjasin jié tjóá. Táha mé tí Jerusalén nixin k'uínkajinxin nkajní kuixin tí tjen Dios la kuenté tsíkóyóxin éxí ijnko chojni chjin tsotehe tsík'itsa kixin tsákja tí xií. ³ Ntá kuinhan ijnko itén ijnko nkexro itsen kuixin nkajní ntáchro kixin:

—Dios itjen tí siín chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuente sín. ⁴ Jehe ch'án mé sinchexámá kaín ntákon sín la í tsokohya nkexro its'en la tsokohya nkexro tsotsjanka la ko ts'aváhya sín la ko tsokohya kjuatjoté kixin kaín tí nkehe k'uékónhen ósé la ó kjuixin k'uátsínka.

⁵ A ntá tí nkexro tjetjaxin tí trono ntáchro ch'án kixin:

—Janhan mé t'ána kaín nkehe nixin.

Kjaxin ntáchro ch'án kixin:

—Ikjian tíha kixin tíha mé palabra chaxín la chrókuítekávan kaín tíha.

⁶ Ntá chr'exin chrónka ch'án kixin:

—Kaín nkehe la ó kjuixin tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkexro t'enixín ntá la janhan tsotjaha sín tí ntá its'i sín mé tí ntá tjanjon kjuachón la ninkehó ts'ixinkíehya sín tíha. ⁷ Tí nkexro tsjacha tsítóehya tí janhan la ts'áyéhe sín kaín tí nkehe tsotjaha sín. La janhan mé ts'óna Dios kuente sín, a ntá jehe sín mé xjanna ts'íkaañ tí jehe sín. ⁸ A ntá tí chojni chrakon la chojni titekakonhya la tí sín chjinoxínhin la ko tí chojni ts'óyán kíchó la ko tí chojni tsakja chojni chjin ókjé la ko tí chojni xrinchexroañ la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí siín xrohi tsochexín sín azufre tió itsi tí yóxin muerte.

Tí Jerusalén nixin

⁹ Ntá ikui ijnko tí yatoxin ángel chóna tí yatoxin copa tsíkaón tí yatoxin chin tsjixixín tsjasótexín chojni. Ntá ntáchro ch'án kixin:

—Xrákia tsjákoaha tí tjan tsotehe tí Kolélo.

¹⁰ Ntá k'uíkuañ ijnko nkehe kjuakoxin Nchakuen Dios la ntá tí ángel sákjuíkian ijnko jnā jié la ko noi la kjuakona ch'án tí chjasin jié tjóá mé tí Jerusalén ts'inkajinxin nkajní tsíkixin tí tjen Dios. ¹¹ A ntá tí chjasin a mé tjákinixin kjuachaxin kuente Dios. A ntá tjákiní éxí ijnko xro imá náxrjón tjehe éxí xro jaspe éxí xrosentá tsjehe. ¹² A ntá jnkontatjen tí chjasin chóna tjat'o noi la chóna teyó puerta la jnkojnko ángel jnkojnko puerta tjejónta la ihnié tí teyó tí sín tsík'axrjeníxin sín Israel ts'ínixín jnkojnko puerta. ¹³ La iní puerta la nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur. ¹⁴ Tí tjat'o tsík'antatjen tí chjasin chóna teyó xro chóntaxín fuerza tí tjat'o la jnkojnko ihnié tí teyó tí sín k'uájiko tí Kolélo a mé ts'ínixín jnkojnko tí xro a.

¹⁵ A ntá tí ángel tjenixjana chóna ijnko nta vara oro, éxí tji tsjehe, tsjachoxín tí chjasin la tí puerta kuente chjasin la ko tí tjat'o t'inkákuènxin. ¹⁶ Tí chjasin la cuadrada la tí kjinjinxin jnkokón la ko tonxín la jnkokón. A ntá tí ángel kjuachoxín tí chjasin tí nta vara éxí tji tsjehe tsíkjachoa ch'án tí chjasin mé chóna dos mil dos cientos kilómetro tí kjinjinxin la ko tí ntetoxín la ko tí tonxín la jnkokón. ¹⁷ Ntá tsíkjachoa ch'án tí tjat'o tsíkjintajin tí chjasin a la chóna sesenta y cuarto metro kixin éxí tjachroa chojni chjasintajni mé xíkaha kjuachoa tí ángel.

¹⁸ Tí tjat'o tsík'antatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosentá tjóá. ¹⁹ Tí xro tsík'óna xrankíxixín tsík'antatjen tí

tjat'o la nchónhya xro chjiní náxrxón tsínkíkjan. A ntá tí xro xrankíxixín la jaspe, a ntá tí xro yóxin la zafiro, la tí xro níxin la ágata, a ntá tí noóxin la esmeralda. ²⁰ A ntá tí n'óxin xro la xro mármol la tí injonxin la cornalina, la tí yaṭoxin la crisólito, a ntá tí jníxin la berilo, la tí xro naxin la topacio, la tí texin la crisoprasa. A ntá tí tejnkoxin la jacinto, a ntá tí teyóxin la amatista. ²¹ A ntá tí teyó puerta mé tjejó perla la jnkoinko puerta tsík'óna jnkokoá perla. A ntá tí ntia jié kuènte chjasin la tsík'óna jehó chica oro éxí xrosentá tsjehe.

²² Ntaha la k'uíkónhya ninkehó nínko tí chjasin a, kixin Inchéni Dios chóna kaín xín kjuachaxin la jehe ch'án la ko tí Kolélo mé tí nínko ntiha. ²³ Tí chjasin a mé t'ichjánxinhya yaon la ko ni nitjó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuènte. ²⁴ A ntá tí chojni kuènte kaín nación tsíkaá la ts'ikonxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín. ²⁵ A ntá tí puerta kuènte chjasin la tsík'èhya tí nchakotjin la ntaha la tsokohya ts'ixin tie. ²⁶ Ntaha sátsjiko kaín xín nación tí nkehe náxrxón k'uéchóna sín chjasintajni. ²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin o chojni ch'ia. Jehó ts'ixenhen tí sín ts'ínixín ihnié tí libro ts'ínixín ihnié tí sín tsaá, mé tí libro chóna tí Kolélo.

22

¹ A ntá tí ángel kjuákona ijnko ntarío tjóá, a ntá tí nta a mé tjanjon kjuachón. Táha mé t'ikonxínni éxí xrosentá la mé k'uaxrxexín tí trono kuènte Dios la ko tí Kolélo. ² A ntá jnkosiné tí calle tjetoan kuènte tí chjasin a la ko nanánko tí ntarío ntiha itjen tí inta tjanjon kjuachón mé t'óna to teyó veces jnkoinko nánó kixin t'óna to jnkoinko nitjó. Tí ka kuènte tí nta la xroan tsitoexín jina tí nación siín ntiha. ³ La mé ntiha tsokohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án. ⁴ Ts'ikon sín tí kàré Dios la ko tsochóna sín ihnié ch'án tí totjen sín. ⁵ Ntiha la tsokohya ts'ixin tie la tí sín siín ntiha la t'ichjánxienhya sín xrohi kuènte lámpara la ko ni xrohi kuènte yaon kixin Inchéni Dios mé ts'inkaséyanxín sín ntiha la ko tsochóna sín kjuachaxin kuènte Dios jnkochrín.

Tí itsi Inchéni la kánhyó sé

⁶ A ntá tí ángel mé nixjana ch'án ntáchro kixin:

—Tí itan a mé chaxín la chrókuítekákonhén tí tan a. La ko Inchéni mé tí Dios nchexraxinkaon tí sín nixja kjuachaxin ihnié ch'án mé ichr'án ch'án tí ángel kuènte ch'án kixin tsjakuexin ch'án tí sín ch'ehe ch'án xra, tí nkehe tjoka tsonhen.

⁷ —¡Tjoka ts'inka janhan!

Náxrxón tjejó tí sín titekaon tí itén Dios nixja tí libro i.

⁸ Janhan Juan, kuñhan la ko k'uíkuan tíha. A ntá chr'éxin kjuixin kuñhan la ko k'uíkuan tíha ntá kjuak'éxian toch'ian chrínkí toté tí ángel kixin xikaha kjuákona la ntá chrókjuíkosáyaha ch'án. ⁹ A ntá jehe ch'án ntáchro ch'án kixin:

—Xikahya sich'e kixin janhan kjaxin t'aha xra Dios éxí tí jaha xikaha la ko éxí tí sín kíchuá mé tí sín nixja itén Dios la ko kaín tí sín tjinkaon chrókuítekaon nkexrí nixja tí libro i. Mé jehó Dios chrókjuíkosáyehé.

¹⁰ Kjaxin k'uetuanna ch'án kixin:

—Chrókjuak'echjinahya tí nkehe jahvá kuñhín kuènte Dios éxí nixja tí libro i kixin ó kuichjina tí yaon tsoxiteyá. ¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tórxjínhin Dios la naxa chrókjuich'e xikaha la ko tí

nkexro tsíkjinchetjóá Dios la naxa jína chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjahará jnkorá kixin nkexrí tí xra chuich'era. ¹³ Janhan mé tí xrankíxixín la ko tí tsjixixín la janhan mé tí saxín la ko tí tsjixixín éxí tí letra xrankíxixín A la tsjixixín Zeta.

¹⁴ Náxrjón ts'ejó tí nkexro tsíkjen iké kixin tsochóna sín kjuachaxin tsochjinehe sín tí nta tjanjon kjuachón kixin jína ts'ixenxín sín tí puerta kuente chjasin. ¹⁵ A ntá ntója tsitohé tí chojni jínahya kuitekakonhya la ko tí chojni nchexroan la ko tí sín chóna nchónhya chojni chjin la ko tí chojni tjaya la ko tí chojni tinkáchónki tí nkehe tsíkjanoya la ko tí chojni tóxrjínhin xrich'ia.

¹⁶ —Janhan Jesús mé ichr'an tí ángel kuéntana kixin tsochénka kaín nínko kaín tíha. Janhan mé k'uaxrjeníxian tí rey David la ko janhan tí konotsé itji tí chjina t'inkáséyan. ¹⁷ Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enxín nta tjinkaon nta la chrók'ui tí nta tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé antsí sinchekjasóte tí jehe sín tsoníhi sín éxí nixja tí libro i. ¹⁹ A ntá jnkojìn nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro ts'ínixín ihnéé tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

²⁰ A ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Inchéni Jesús!

²¹ Inchéni Jesucristo mé sincheyaonrá kaín rá. Amén.